

बाइबिल

सुरजापुरी बाइबिल (बिहार)

The New Testament in Surjapuri

मत्तीर लिखाल खुश-खबरी

यीशुर खानदान

(लूका ३:२३-३८)

१ यीशु दाऊदेर खानदानेर छिले, आर दाऊद इब्राहिमेर खानदानेर छिले। आर यीशुर पूराडा खानदान इकिसम छिले: २ इब्राहिमेर बेटा इसहाक, इसहाकेर बेटा याकूब छिले, आर याकूबेर बेटा यहूदा आर यहूदार भईला। ३ यहूदार बेटा फिरिस आर जोहोर दोनोंइन भई, उसार माँर नाम तामर छिले। फिरिसेर बेटा हिस्त्रोन, हिस्त्रोनेर बेटा एराम, ४ एरामेर बेटा अम्मीनादाब, अम्मीनादाबेर बेटा नहशोन, नहशोनेर बेटा सलमोन ५ सलमोनेर बेटा बोअज आर बोअजेर माँ राहब छिले। बोअजेर बेटा ओबेद आर ओबेदेर माँ रूत छिले। ओबेदेर बेटा यिशै, ६ आर यिशैर बेटा राजा दाऊद छिले। ७ दाऊदेर बेटा सुलेमान। आर सुलेमानेर माँर नाम बेतशेबा छिले, जहाँय पहिले उरिय्याहर पत्नी छिले। ८ सुलेमानेर बेटा रहुबियाम, रहुबियामेर बेटा अबियाह छिले। अबियाहर बेटा आसा छिले, आसार बेटा यहोशाफात, आर यहोशाफातेर बेटा योराम आर योरामेर बेटा उज्जियाह छिले। ९ उज्जियाहर बेटा योताम, योतामेर बेटा आहाज

आर आहाजेर बेटा हिजकिय्याह छिले। १० हिजकिय्याहर बेटा मनश्शे
आर मनश्शेर बेटा आमोन आर आमोनेर बेटा योशिय्याह छिले।
११ योशिय्याहार बेटा यकुन्याह छिले। आर योशिय्याहर आढोह बेटाला
छिले। योशिय्याह राजार समय बाबूल देशेर राजा इजराएली लोकलाक
गोलाम बनाय अपना देश बाबुलोत ले गहिले। १२ गोलाम बने बाबूल देश
जवार बाद यकुन्याहार बेटा शालतिएलेर जनम होल, आर शालतिएलेर
बेटा जरूबाबिल। १३ आर जरूबाबिलेर बेटा अबीहूद, आर अबीहूदेर बेटा
इल्याकीम आर इल्याकीमेर बेटा अजोर। १४ अजोरेर बेटा सदोक।
सदोकेर बेटा अखीम आर अखीमेर बेटा अलीहूदेर जनम होल।
१५ अलीहूदेर बेटा इलीयाजर, इलीयाजरेर बेटा मत्तान, आर मत्तानेर
बेटा याकूबेर जनम होल। १६ याकूबेर बेटा यूसुफ, यहाँय मरियमेर पति
छिले, आर मरियम से यीशुर जनम होल। १७ इकिसम इब्राहिम से दाऊद
तक चौदह पीढ़ी होल, आर दाऊद से बाबूल देशेर गोलामी तक चौदह
पीढ़ी होल, आर बाबूल देशेर गोलामी से मसीहार जनम तक चौदह
पीढ़ी होल।

यीशुर जनम

(लूका १:२६-३८; २:१-७)

१८ यीशुर जनम इकिसम करे होयले। यीशुर माँ मरियम छिले। मरियमेर
डालीखाड़ा यूसुफ नामेर एकझन लोकेर साथे होईले। मगर उसार शादी

हवार आगुते, इडा मालूम होल कि परमेश्वरेर पवित्र आत्मार जरियाय मरियम गर्भवती छे। १९ मरियमेर होनेवाला पति यूसुफ एकझन धर्मी लोक छिले। वहीलाते वहाँय मरियमोक लोकेर आगुत बदनाम करवा नी चाहचिल, बल्के वहाँय मरियमोक चुपचाप छोड़े दुवार बिचार करिल। २० यूसुफ इला बातेर बारे सोचेछिले। एकटा रातोत वहाक परमेश्वरेर एकझन फरीस्ता सपनात देखा दिले, आर कोहले, “हे दाऊदेर बेटा यूसुफ! तुई मरियमोक शादी करते ना डोरा, क्याँकि जहाँय वहार पेटोत छे, वहाँय पवित्र आत्मार जरियाय छे। २१ वहाँय एकझन बेटाक जनम दिबे, आर तुई वहार नाम यीशु राखबो, क्याँकि वहाँय अपना लोकलाक पाप से बचाबे।” २२ इला घटना घटिल जसे कि परमेश्वरेर उला सबला बात पूरा होय, जैला बात वहाँय अपना नबीर जरियाय बोलिहिले। नबी कोहिले, २३ “देखेक, एकझन कुमारी लड़की, जहाँय पवित्र छे, वहाँय गर्भवती होबे आर एकझन बेटाक जनम दिबे। वहार नाम ‘इम्मानुएल’ रखाल जाबे, जहार माने होचे, ‘परमेश्वर हमसार साथे।’ २४ यूसुफ निन से जागिल होल। तहार बाद फरीस्तार कहना मुताबिक यूसुफ मरियमोक शादी करे अपना घर ले ओसिल। २५ मगर जब तक मरियम अपना बेटाक जनम नी दिले, तब तक यूसुफ वहार साथे शारीरिक सम्बन्ध नी बनाल। छुवाडार जन्मेर बाद यूसुफ छुवाडार नाम यीशु राखिल।”

ज्ञानी लोकला यीशुक देखवा जाछे

२ जैखुना हेरोदेश राजा राज करछिले, वहीडा समय यहूदिया प्रदेशेर बैतलेहम शहरोत यीशुर जनम होल। आर पूरब भीति से कुछुला ज्ञानी लोक यरूशलेम शहरोत ओसे पूछवा लागिल, १ “यहूदी लोकेर राजा, जहाँय जनम लिहे, वहाँय कुनठिन छे? क्याँकि हमरा पूरब भीति आसमानोत वहार तारा देखिही, आर वहार भक्ति करवा ओसिही।” ३ इडा बात सुने राजा हेरोदेश आर यरूशलेमेर सबला लोक बेचैन हंय गेल। ४ राजा हेरोदेश यरूशलेम शहरेर सबला बोड़ो-पुजारीक आर शास्त्रेर ज्ञानीलाक जोड़ो करे पूछिल, “मसीहार जनम कुनठिन होनेवाला छे?” ५ वरा वहाक कोहले, “यहूदिया प्रदेशेर बैतलेहम शहरोत क्याँकि नबी वहार बारे इकिसम लिखिहे, ६ ‘हे बैतलेहम! तुई जे यहूदिया प्रदेशेर एकटा छोटो शहर छिस, यहूदिया प्रदेशोत शासन करनेवालार नजरोत तुई सबसे छोटो नी छिस, क्याँकि तोर भीतर से एकझन राजा ओसबे, जहाँय मोर प्रजा इजराएली लोकेर देखभाल करबे।’” ७ यहार बाद हेरोदेश राजा ज्ञानीलाक चुपके से जाब दे पूछिल कि ताराडा कुनडा समय देखा दिहिले। ८ यहार बाद राजा हेरोदेश ज्ञानीलाक इडा कोहय बैतलेहम पठाल कि तुम्हरा जाव आर मन लगाय छुवाडाक छाभो। जैखुना तुम्हरा वहाक पाय जाभेन, ओसे मोक खबर करेन, जसे कि मोहो जाय वहार भक्ति करवा पारी। ९ राजार बात सुने

ज्ञानीला चले गेल। पूरब भीति आसमानोत जैडा ताराक वरा देखिहिले, उडा तारा उसार आग-आगु जवा लागिल। आर ताराडा उखान घरेर उपरोत थामे गेल, जैखान घरोत बच्चाडा छिले। १०-११ इडा देखे वरा बहुत खोश हंय गेल। आर घरखानेर भीतरोत ढुके वरा छुवाडाक आर वहार माँ मरियमोक देखिल। आर वरा छुवाडाक हटुवा पारे भक्ति करिल आर छुवाडाक सोना, धुमना आर मोहकाल तेल दान करिल। १२ आर परमेश्वर उसाक सपनात चेताय दिले कि वरा हेरोदेश राजार लिकिन घुरे ना जाय। वहीलाते वरा दोसरा रास्ता धरे अपना देशोत वापस चले गेल।

यूसुफ यीशुक ले मिसर देशोत भागे जाछे

१३ ज्ञानी लोकला चले जवार बाद, प्रभुर एकझन फरीस्ता सपनात यूसुफोक देखा दिले आर कोहले, “उठेक। छुवाडाक आर वहार माँक ले जल्दी से मिसर देशोत भागे जा, आर जते दिन तक मुई तोक घुरे ओसवा नी कोहमु, तुई वहीठिन रोहबो, क्योंकि हेरोदेश राजा छुवाडाक खतम करवार तने छाभछे।” १४ इडा सुने यूसुफ रात करे उठिल, आर छुवाडाक आर वहार माँक ले मिसर देश चले गेल। १५ जते दिन तक हेरोदेश राजा जिन्दा रोहोल, वरा वहीठिन रोहोल। इडा घटना घटिल जसे कि प्रभु जैडा बात अपना नबीर जरियाय बोलिहिले, उडा पूरा हंय

जाय। प्रभु बोलिहिले, “मुई अपना बेटाक मिसर देश से जाब दे ले ओसिही।”

राजा हेरोदेश छुवालाक मरवाय दिछे

१६ यहार बाद हेरोदेश राजा जैखुना देखिल कि ज्ञानीला वहाक धोखा दिहे, त वहाँय बहुत गोस्सा हंय गेल। आर ज्ञानीला छुवाडार जन्मेर बारे जैडा समय बताहिले, वहीडार मुताबिक हेरोदेश राजा अपना सैनिकलाक पठाल आर बैतलेहम आर बैतलेहमेर अगलेर-बगलेर जगहोर सबला छोटो लड़काक मरवाय दिले, जैला दुई सालेर या दुई साल से कम उमरेर छिले। १७ तब यिरमियाह नबी जैडा बात आगु से कोहिले, उडा बात पूरा हंय गेल। वहाँय कोहिले, १८ “रामात एकटा कानन आर बिलापेर आवाज सुना गेल, राहेल अपना छुवालार तने कानछे, वहाँय कोय हालतोत चुप नी होचे, क्योंकि वहार छुवाला आर नी रोहोल।”

यीशुक मिसर देश से नासरत आनछे

१९ जैखुना हेरोदेश राजा मोरे गेल, प्रभुर एकझन फरीस्ता मिसर देशोत सपनात यूसुफेर लिकिन हाजिर होल आर वहाक कोहले, २० “उठेक, छुवाडाक आर वहार माँक ले इजराएल देशोत वापस चले जा, क्योंकि जैला लोक छुवाडार जान लुवा चाहचिले, वरा सबकोय मोरे गहे।”

२१ तब यूसुफ उठिल। छुवाडाक आर वहार माँक ले इजराएल देश जवा लागिल। २२ मगर जैखुना वहाँय सुनिल, कि हेरोदेश राजार बाद वहार बेटा अरखिलायुस यहूदिया प्रदेशोत राज करछे, त यूसुफ डोराय गेल आर उठिन जवा नी चाहले। वहार बाद वहाँय सपनात परमेश्वरेर आदेश पाय गलील प्रदेश चले गेल। २३ आर नासरत नामेर शहरोत जाय रहवा लागिल जसे कि नबीर कहाल बातला पूरा हंय जाय। नबीला कोहिले, “वहाक नासरी कहाल जाबे।”

यूहन्ना यीशुर तने रास्ता तैयार करछे

(मरकुस १:१-८; लूका ३:१-१८; यूहन्ना १:१९-२८)

३ कुछ साल बाद यूहन्ना नामेर एकझन लोक यहूदिया प्रदेशोर सुनसान इलाकात ओसिल, वहाक बपतिस्मादाता कहाल जाछिले। आर वहाँय प्रचार करवा लागिल, १ “पाप से मन बदली करो क्योंकि स्वर्ग-राज नजदीक चले ओसिहे। २ यहाँय वहीं यूहन्ना छे, जहार बारे यशायाह नबी कोहिले, ‘सुनसान इलाकात एकझन लोकेर जोर से आवाज सुनाल जाछे आर वहाँय कोहचे, प्रभुर तने रास्ता तैयार करो, आर वहार रास्ता सीधा करो।’” ४ यूहन्ना ऊँटेर चूल से बनाल पौशाक पिन्हें छिले। आर वहाँय अपना कमरोत चमड़ार बेल्ट पिन्हें छिले, आर वहाँय फरींग आर जंगलेर शहद खाछिले। ५ यहार बाद यरूशलेम शहर, पूरा यहूदिया, आर यरदन नदीर अगलेर-बगलेर लोकला यूहन्नार लिकिन ओसवा लागिल।

६ इला लोक सभारो सामनात अपना-अपना पाप माने लिले, आर यहार बाद यूहन्ना उसाक यरदन नदीत बपतिस्मा दिले। ७ फरीसी आर सदूकी लोकेर दुईडा धार्मिक दल छिले। उसार भीतर से बहुतला फरीसी आर सदूकी लोक यूहन्नार लिकिन बपतिस्मा लुवार तने ओसिल, त यूहन्ना उसाक देखे कोहले, “ऐ साँपेर बच्चाला! के तुमसाक परमेश्वरेर ओसनेवाला कहर से भागे जवा कोहले? ८ ठीक छे तुम्हरा सबूत देखाव कि तुम्हरा अपना-अपना पाप से मन बदली करे लिहेन। ९ आर तुम्हरा अपना मनोत इडा ना सोचेन कि इब्राहिम हमसार बाप छे। मुई तुमसाक कोहची, परमेश्वर इला पत्थल से इब्राहिमेर तने बाल-बच्चा पैदा करवा पारे। १० कुल्हारीखान गाछेर गोढ़ात रखाल छे, जैडा गाछ अच्छा फल नी दिछे, उडा गाछोक काटे आगिनोत फेके देयाल जाछे। ११ क्योंकि तुम्हरा पाप से मन बदली करिहेन, वहीलाते मुई तुमसाक पानी से बपतिस्मा दिछी, मगर मोर बाद जहाँय ओसछे, वहाँय मोसे बेसी शक्तिशाली छे। मुई वहार जूतालाव उठवार लायक नी छी। वहाँय तुमसाक पवित्र आत्मा आर आगिन से बपतिस्मा दिबे। १२ वहार कुलाखान वहार हाथोत छे, आर वहाँय अपना खमारखान अच्छा करे साफ करबे, वहाँय गोहमलाक अपना बजारीत राखबे, मगर भूसीलाक वहाँय उखान आगिनोत फेके दिबे, जैखान आगिन कोयखुना नी घेमाबे।”

यूहन्ना यीशुक बपतिस्मा दिछे

(मरकुस १:९-११; लूका ३:२१-२२)

१३ यहार बाद यीशु गलील प्रदेश से यरदन नदीत यूहन्नार लिकिन बपतिस्मा लुवा ओसिल। १४ इडा देखे यूहन्ना वहाक कोहले, “मोक तोर लिकिन से बपतिस्मा लुवा लागे, मगर तुई मोर लिकिन से बपतिस्मा लुवा ओसिहिस?” १५ मगर यीशु वहाक जवाब दिले, “अला यही मान्दी हवा दे, क्याँकि परमेश्वरेर इच्छा पूरा करवार तने हमसाक यही किसम करना छे।” यहार बाद यूहन्ना वहाक बपतिस्मा दुवार तने राजी हंय गेल। १६ वहार बाद यीशु बपतिस्मा ले पानी से उपरोत उठिल। आसमानडा वहार तने खोले गेल आर वहाँय देखिल कि परमेश्वरेर आत्मा कबूतरेर मान्दी ओसिल आर वहार पर नाभिल। १७ आर आसमान से एकटा आवाज ओसिल, “यहाँय मोर प्यारा बेटा छे, यहा से मुई बहुत खुश छी।”

यीशुर परीक्षा

(मरकुस १:१२-१३; लूका ४:१-१३)

४ यहार बाद पवित्र आत्मा यीशुक सुनसान इलाकात ले गेल जसे कि शैतान वहाक पापोत गिरवार कोशिश करे। २ सुनसान इलाकात चालीस दिन आर चालीस रात उपास करवार बाद यीशुक भोख लागिल। ३ उखुना शैतान ओसिल आर वहाक कोहले, “तुई अगर

परमेश्वरेर बेटा छिस त इला पत्थलोक रूटी बनवार हुकूम दे दे।”
४ यीशु जवाब दिले, परमेश्वरेर शास्त्रोत लिखाल छे, मानुष सिरिफ रूटी खाय नी बचबे, मगर परमेश्वरेर हरेकटा वचन से जिन्दा रहबे। ५ यहार बाद शैतान यीशुक पवित्र शहर यरूशलेम ले गेल, आर मंदिरेर सबसे उपरोत थाड़ो करिल ६ आर वहाक कोहले, “तुई अगर परमेश्वरेर बेटा छिस त इठिन से कुद्दे पोड़े जा, क्योंकि शास्त्रोत तोर बारे लिखाल छे, परमेश्वर अपना फरीस्तालाक हुकूम दिबे, आर वरा तोक अपना हाथोत उठाय लिबे, जसे कि तोर पाँलात पत्थल दे चोट ना लागे।” ७ मगर यीशु शैतानोक जवाब दिले, “यहोडा लिखाल छे, तुई अपना प्रभु परमेश्वरेर परीक्षा ना लिस।” ८ फेर शैतान यीशुक एकखान बहुत ऊँचा पहाड़ेर पर ले गेल, आर वहाक दुनियाँर सबला राजोक आर सबला शान-शौकतोक देखाय कोहले, ९ “अगर तुई सिरिफ मोर आगुत हटुवा पारे मोक भक्ति करिस, त इला सब कुछ तोक दे दुम।” १० तब यीशु वहाक जवाब दिले, “दूर हंय जा शैतान, क्योंकि शास्त्रोत लिखाल छे, कि तुई अपना प्रभु परमेश्वरेर भक्ति करबो, आर सिरिफ व्हारे सेवा करबो।” ११ यहार बाद शैतान यीशुक छोड़े चले गेल आर स्वर्गेर फरीस्ताला ओसे यीशुर जरूरतोक पूरा करिल।

यीशुर कामेर शुरूवात

(मरकुस १:१४-१५; लूका ४:१४-१५)

१२ यहार बाद यीशु सुनिल कि यूहन्नाक जेलोत दे देयाल गहे, तब वहाँय गलील प्रदेशोत चले गेल। १३ आर नासरत शहर छोड़े चले गेल आर जबलुन आर नापताली इलाकार कफरनहूम शहरोत रहवा लागिल, जैडा कि गलील समुन्द्रेर कछारोत छिले, १४ इला होल जसे कि यशायाह नबीर जरियाय जैला बात कहाल गहिले, उला पूरा हंय जाय। १५ समुन्द्र कछारेर जबुलुन आर नप्ताली इलाकार लोकला आर यरदन नदीर पूरब पारेर गैर-यहूदी लोकला, १६ जैला अन्हारोत बोठे छिले, वरा बोड़ो रोशनी देखिल, आर जैला लोक मौतेर छायात बोठे छिले, उसार पर ज्योति चमकिल। १७ उखुन से यीशु प्रचार करवा लागिल कि “तुम्हरा अपना-अपना पाप से मन बदली करो, क्योंकि स्वर्ग-राज नजदीक चले ओसिहे।” १८ यीशु गलील समुन्द्रेर बगले-बगले जवारखुना दुईझन भईक देखिल। एकझन शिमोन, जहाक पतरस कहाल जाछे, आर दोसराझन छिले अन्द्रियास। वरा समुन्द्रोत जाल फेकछिले क्योंकि वरा मलाह छिले। १९ यीशु उसाक कोहले, “मोर पाछूत ओसो। अला से तुम्हरा माछ नी धरभेन, मगर मुई तुमसाक सिखाम कि तुम्हरा केनमन करे मानुषोक परमेश्वरेर लिकिन आनभेन।” २० वहीखुना वरा अपना जाललाक छोड़े यीशुर पीछूत चले गेल। २१ उठिन से आगु बढ़े यीशु आढ़ोह दुईझन भईक याकूब आर यूहन्नाक देखिल। वरा दोनोंझन

जब्दीर बेटा छिले। वरा अपना बाप जब्दीर साथे नावेर पर बोठे अपना-अपना जाललाक सिलाछिले। यीशु उसाक जाब दिले। २२ वहीखुना वरा नावखानोक आर अपना बाफोक छोड़े वहार पीछूत चले गेल। २३ यीशु पूराडा गलील प्रदेशोत घुरे-घुरे उसार प्रार्थना-घरलात शिक्षा दिते आर स्वर्ग-राजेर खुश-खबरी प्रचार करे बेड़ाल, आर लोकेर सब किसमेर बेमारी आर कमजोरीक अच्छा करते गेल। २४ वहीलाते वहार नाम पूराडा सीरिया देशोत फैले गेल। आर उठिनकार लोकला सब किसमेर बेमार लोकोक वहार लिकिन आनिल। जैला लोक बेमारी से, दरद से, भूत से, मीरगीर बेमारी से आर लकवा से परेशान छिले, वहाँय उसाक अच्छा करे दिले। २५ आर गलील प्रदेश, दिकापुलिस, यरूशलेम, यहूदिया आर यरदन नदीर उपार से लोकेर बोड़ो भीड़ यीशुर पीछू-पीछू जवा लागिल।

यीशुर पहाड़ी उपदेश

(लूका ६:२०-२३)

५ लोकेर भीड़ देखे यीशु पहाड़ेर पर चढ़े गेल। आर जैखुना वहाँय बोठे गेल, वहार चेलाला वहार लिकिन ओसिल २ आर वहाँय उपदेश दुवा लागिल, ३ “खुशहाल वरा छे, जैला लोक अपना-आपोक दिल से छोटो समझेछे क्योंकि स्वर्ग-राज उसार तने छे। ४ खुशहाल वरा छे, जैला लोक शोक मनाछे क्योंकि वरा शांति पाबे। ५ खुशहाल वरा छे, जैला

लोक सीधा छे क्योंकि वरा दुनियाँडार हकदार होबे। ६ खुशहाल वरा छे, जैला लोक परमेश्वरेर इच्छा पूरा करवार तने भूखा आर प्यासा छे क्योंकि परमेश्वर उसार भोख आर प्यास मिटाबे। ७ खुशहाल वरा छे, जैला लोक दया करछे क्योंकि परमेश्वर उसार पर अपना दया देखाबे। ८ खुशहाल वरा छे, जहार मोन शुद्ध छे क्योंकि वरा परमेश्वरोक देखबे। ९ खुशहाल वरा छे, जैला लोक मेल-मिलाप करानेवाला छे, क्योंकि उसाक परमेश्वरेर बेटा-बेटी कहाल जाबे। १० खुशहाल वरा छे, जैला लोक परमेश्वरेर इच्छार मुताबिक चलवार कारण सताल जाछे क्योंकि उसार तने स्वर्ग-राज छे। ११ खुशहाल तुम्हरा छेन, जहाँय मोर तने मानुषेर सताव पाछेन आर सब किसमेर बुराई आर झूठा दोष सहय लिछेन। १२ तुम्हरा आनन्द आर खुशी मनाव, क्योंकि स्वर्गोत तुमसार तने बोड़ो इनाम छे। तुमसासे पहिले जैला नबी छिले, उसाको लोकला सताहिले। १३ तुम्हरा दुनियाँत नूनेर मान्दी छेन, मगर अगर नूनेर स्वाद खतम हंय जाय, त उखानोक कसे करे फेर नून बनाल जाबे? उखान नून कोय कामोत नी लागबे आर फेके देयाल जाबे आर लोक उखानोक पाँ दे खीचबे। १४ तुम्हरा इ-दुनियाँर रोशनी छेन। जैडा शहर पहाड़ेर उपरोत छे, उडा शहर नुकाल नी रोहबे १५ कोय लोक चराक जलाय टोकरी दे झापे नी राखछे, मगर चराकटाक चराकदानीर पर राखछे, जसे कि घरेर रहनेवाला सब लोकोक रोशनी मिले। १६ वही किसम तुमसार

रोशनी लोकेर आगुत चमकवा दव, जसे कि तुमसार अच्छा काम देखे लोक तुमसार पिता जहाँय स्वर्गोत छे, वहार बड़ाई करे। १७ तुम्हरा इडा ना समझेन कि मुई नियम-कानूनोक आर नबीलार बातोक खतम करवा ओसिही, बल्के उलाक पूरा करवा ओसिही। १८ मुई तुमसाक सच-सच कोहची, आसमान आर धरतीखान टले जाबे, मगर परमेश्वरेर नियम कभी नी टलबे, उला पूरा हंय रोहबे। १९ जहाँय परमेश्वरेर नियमेर छोटो से छोटो हुकूमोक तोड़बे, आर यही किसम हुकूमोक तोड़वा सिखाबे, वहाक स्वर्ग-राजोत छोटा कहाल जाबे। मगर जहाँय परमेश्वरेर हुकूमोक मानछे, आर वही मान्दी दोसरा लोकोक मनवा सिखाछे, वहाँय स्वर्ग-राजोत बोड़ो मनाल जाबे। २० मुई तुमसाक कोहची कि शास्त्रेर ज्ञानीला आर फरीसीला से बड़े यदि तुम्हरा परमेश्वरेर इच्छा पूरा नी करभेन, त तुम्हरा कोयखुना स्वर्ग-राजोत ढुकवा नी पारभेन।

गुस्सा आर हत्यार बारे यीशुर नया शिक्षा

२१ तुम्हरा सुनिहिलेन कि पुराना जमानार लोकलाक कहाल गहिले, तुम्हरा कहाको जान से ना मारेन। जहाँय कहाको जान से मारबे, वहार बिचार होबे।” २२ मगर मुई तुमसाक नया बात कोहची, “अगर कोय अपना भईर पर क्रोध करबे, वहार बिचार होबे। जहाँय अपना भईक बेकूफ कोहबे, वहाक महासभार आगुत थाड़ो कराल जाबे। जहाँय अपना भईक निकम्मा कोहबे, वहाँय नरकेर आगिनोत जाबे। २३ जैखुना

तुई अपना दान परमेश्वरेर बेदीर पर चढ़वा जाछिस आर उखुना तोक ख्याल होल कि मोर खिलाफ मोर भईर दिलोत कोय बात छे, त २४ तोर दानखान बेदीर आगुत राखे दे, आर पहिले अपना भईर साथे मेल-मिलाप करे ले, आर वहार बाद ओसे अपना दान चढ़ा। २५ जैखुना तुम्हरा अपना मुद्दईर साथे कचहरीत जाछेन, त जल्दी करे वहार साथे मेल-मिलाप करे लव, नी त तुमसार मुद्दई तुमसाक हाकिमेर हाथोत दे दिबे, आर हाकिम तुमसाक पुलिसेर हाथोत दे दिबे, आर पुलिस तुमसाक जेलखानात दे दिबे। २६ मुई तुमसाक सच-सच कोहची, जब तक तुम्हरा एक-एक पैसा चुकाय नी दिभेन, तुम्हरा कोयखुना जेलखाना से बाहर हवा नी पारभेन। २७ तुम्हरा सुनिहिलेन कि कुकरम ना करेन। २८ मगर मुई तुमसाक नया बात कोहची कि कोय अगर एकझन स्त्रीक बुरा नजर से देखछे, त वहाँय वहार साथे अपना दिलोत कुकरम करे लिछे। २९ अगर तोर दहिनाडा आँख तोक पाप कराछे, त उडा आँखोक निकलाय फेके दे। इडा तोर तने अच्छा छे कि तुई शरीरेर एकटा अंगोक फेके दे, जसे कि तोर पूरा शरीर नरकेर आगिन से बचे जाय। ३० अगर तोर दहिनाखान हाथ तोक पाप कराछे, त उखान हाथोक काटे फेके दे, क्योंकि तोर तने यहीडा अच्छा छे कि तोर शरीरेर एकटा अंग बर्बाद हंय जाय आर तोर पूराडा शरीर नरकोत फेकाल नी जाय। ३१ यहोडा कहाल गहिल कि, कोय अगर अपना स्त्रीक तलाक

दुवा चाहचे, त वहाक लिखा-पढी करे छोड़े दुवा पारे। ३२ मगर मुई तुमसाक नया बात कोहची, अगर कोय स्त्री कुकरम करछे, त वहार पति वहाक छोड़े दुवा पारे। कुकरमेर अलावा अगर दोसरा कारण से तलाक दिछे, त वहाँय अपना स्त्री से कुकरम कराछे। अगर कोय लोक उडा छोड़ाल स्त्रीक शादी करछे, त वहाँय कुकरम करछे। ३३ तुम्हरा यहोडा सुनिहेन, जैडा कि पुराना जमानार लोकलाक कहाल गहिले, तुम्हरा झूठा कसम ना खायन, मगर परमेश्वरेर लिकिन उडाक पूरा करेन, जैडार तने तुम्हरा कसम खाहिलेन। ३४ मगर मुई तुमसाक नया बात कोहची कि तुम्हरा एकदम कसम नी खाभेन। ना त तुम्हरा स्वर्गेर कसम खायेन, क्योंकि स्वर्ग परमेश्वरेर सिंहासन छे। ३५ आर ना त धरतीखानेर कसम खायन, क्योंकि उडा परमेश्वरेर पाँ रखवार जगह छे। आर ना त यरूशलेम शहरेर कसम खायन, क्योंकि यरूशलेम महान राजा परमेश्वरेर शहर छे। ३६ आर ना त तुम्हरा अपना माथार कसम खायन, क्योंकि तुम्हरा माथार एकखान चुलोक सादा करवा नी पारभेन। ३७ तुमसार बात सिरिफ हाँ त हाँ, ना त ना होक। यहा से बेसी जे कुछु तुम्हरा कोहचेन, उला शैतानेर तरफ से छे। ३८ तुम्हरा सुनिहेन, जैडा कि पुराना जमानार लोकलाक कहाल गहिले, ‘आँखेर बदले आँख आर दाँतेर बदले दाँत।’ ३९ मगर मुई तुमसाक नया बात कोहची, तुम्हरा बुराईर बदले, बुराई ना करेन, मगर अगर कोय तुमसार दहिनाडा गालोत

थप्पड़ मारे, त दोसराडा गालको वहार भीति घुराय दे दव। ४० आर अगर कोय तुमसार कोटटा जबरदस्ती ले लिछे, त तुम्हरा वहाक अपना कुरताडाव दे दव। ४१ अगर कोय तुमसाक जबरदस्ती एक कोस ले जाछे त तुम्हरा वहार साथे दुई कोस चले जाव। ४२ जहाँय तुमसार लिकिन कुछु माँगे, वहाक दव। कोय तुमसार लिकिन से धार माँगे, त वहाक दुवार तने इन्कार ना करेन। ४३ तुम्हरा सुनिहेन कि इडा कहाल गहिले, तुम्हरा अपना पड़ोसीक प्रेम करेन, आर अपना दुश्मनला से नफरत करेन। ४४ मगर मुई तुमसाक नया बात कोहची, तुम्हरा अपना दुश्मनलाक प्रेम करो, आर जहाँय तुमसाक सताछे उसार तने प्रार्थना करो, ४५ जसे कि तुम्हरा अपना पितार बेटा-बेटी हवा पारेन, जे पिता स्वर्गोत छे। क्योंकि वहाँय बेलाडाक खराब आर अच्छा सब लोकेर पर पठाछे। आर वहाँय धर्मी लोक आर अधर्मी लोक सभारो पर पानी बरसाछे। ४६ क्योंकि जैला लोक तुमसाक प्रेम करछे, तुम्हराव अगर उसासे प्रेम करेन त इडात कुन इनाम मिलबे? खजना लेनेवाला पापी लोकलाव त यही मान्दी नी करछे। ४७ आर अगर तुम्हरा सिरिफ अपना भईलाके नमस्कार करेन, त दोसराला लोक से की बेसी करलेन? नी करलेन। जैला लोक परमेश्वरोक नी जाने, वरा त यहीकिसम करछे। ४८ वहीलाते तुम्हरा खाँटी बनो, जैकिसम तुमसार स्वर्गेर पिता परमेश्वर खाँटी छे।”

देखावटी दान ना करेन

६ सावधान रोहेन, लोकोक देखवार तने तुम्हरा अपना धर्मेर काम ना करेन। इकिसम करले तुम्हरा अपना स्वर्गेर पितार लिकिन से कोय इनाम नी पाभेन। २ वहीलाते जैखुना दान दिछेन, अपना आगुत ढोल ना बजायेन, जैकिसम कि कपटी लोकला प्रार्थनार घरोत आर रास्तार पर करछे, जसे कि लोक उसार बढ़ाई करे। मुई तुमसाक सच-सच कोहची, वरा अपना इनाम पाय गेल। ३ मगर जैखुना तुम्हरा दान दिछेन, तुमसार बायाँ हाथखान इडा जनवा ना पारे कि तुमसार दहिना हाथखान कि करछे। ४ तुमसार दानेर काम लोकोक देखाय नी करवा लागे, तब तुमसार पिता जहाँय नुकाय देखछे, वहाँय तुमसाक इनाम दिबे।

प्रार्थनार बारे यीशुर शिक्षा

(लूका ११:२-४)

५ आर जैखुना तुम्हरा प्रार्थना करछेन, त कपटी लोकेर मान्दी प्रार्थना ना करेन। कपटी लोकला प्रार्थना-घरलात आर रास्तार मोड़लात थाड़ी हंय प्रार्थना करना पसन्द करछे जसे कि लोकला उसाक देखे। ६ मगर तुम्हरा जैखुना प्रार्थना करछेन, अपना कमरार भीतरोत जाव, आर दरवाजाडा बन्द करे अपना पितार लिकिन प्रार्थना करो, जहाँय नुकाय छे, आर चुपके से तुमसाक देखछे, वहाँय तुमसाक इनाम दिबे। ७ आर प्रार्थना करवारखुना तुम्हरा गैर-लोकेर मान्दी फालतू बकवास ना करेन,

क्याँकि वरा सोचेछे कि बेसी बात बोलले, उसार प्रार्थना सुनाल जाबे।
८ उसार मान्दी ना होयेन, क्याँकि तुमसार पिता वहार लिकिन माँगवार
आगुते जानछे कि तुमसाक कुन-कुन चीजेर जरूरत छे। ९ वहीलाते
तुम्हरा इकिसम करे प्रार्थना करेन, हे पिता तुई जे स्वर्गोत छिस, तोर
नाम पवित्र मनाल जाक। १० तोर राज दुनियाँत कायम होक। तोर इच्छा
जैमान्दी स्वर्ग पुरीत पूरा होचे, वही मान्दी इडा दुनियाँत पूरा होक।
११ हमसाक आजकार तने खाना दे, १२ आर हमसार पापलाक माफ
करेक, जैकिसम हमराव अपना खिलाफ कसूर करनेवाला लोकलाक
माफ करे दिही। १३ आर हमसाक पापोत पोड़वा ना दिस, बल्के पाप से
बचाय राखिस। १४ अगर तुम्हरा अपना कसूरवारलाक माफ करछेन, त
तुमसार स्वर्गेर पिता तुमसाक माफ करबे। १५ मगर अगर तुई अपना
खिलाफ कसूर करनेवाला लोकोक माफ नी करिस, त तोर पिताव तोर
कसूरलाक माफ नी करबे।

सही उपास

१६ आर जैखुना तुम्हरा उपास करछेन, त कपटी लोकेर मान्दी अपना
चेहराडाक उदास ना देखायन। वरा अपना चेहराडाक उदास देखाछे,
जसे कि लोक उसार उपासटाक जनवा पारे। मुई तुमसाक सच कोहची
कि वरा अपना इनाम पाय गेल। १७ मगर जैखुना तुम्हरा उपास करेन, त
अपना माथात तेल लगायन आर अपना मुख धोयेन, १८ जसे कि

तुमसार उपासेर बारे लोक जनवा नी पारे, बल्के तुमसार पिता, जहाँय नुकाय छे, आर नुकाय देखछे, वहाँय तुमसाक इनाम दिबे।

स्वर्ग आर धन-दौलत

(लूका १२:३३-३४; ११:३४-३६; १६:१३)

१९ तुम्हरा अपनार तने दुनियाँत धन जमा ना करो, जैठिन पिलु आर मरछा धरे उलाक बर्बाद करे दिछे, आर चोर घरोत सिंग दे चूरी करछे।
२० मगर तुम्हरा अपनार तने स्वर्गोत धन जोड़ो करो, जैठिन ना त पिलु आर ना मरछा धरछे, आर ना उलाक खराब करवा पारछे, आर ना त चोर सिंग मारछे आर ना चूरी करछे। २१ जैठिन तुमसार धन छे, वहीठिन तुमसार मनडाव रोहबे। २२ आँखटा बदनडार तने चराकेर काम करछे। वहीलाते अगर तुमसार आँखला ठीक छे, त तुमसार पूराडा बदन रोशनीत रोहबे २३ मगर अगर तोर आँखटा ठीक नी छे, त तोर पूराडा बदन अन्हारोत रोहबे। वहीलाते अगर तोर भीतरोत जैडा रोशनी छे, उडा अगर अन्हार हंय जाय त सोचे देखो, उखान अन्हार कतेखान बेसी होबे। २४ कोय लोक दुईझन मालिकेर काम करवा नी पारबे, क्योंकि वहाँय एकझनाक नफरत करबे, आर दोसराझनाक प्रेम करबे, या नीते एकझनार तने वहार भक्ति होबे, आर दोसराझनार परवाह नी करबे। तुम्हरा परमेश्वर आर धन-दौलतेर सेवा एक साथे नी करवा पारभेन।

खाना-पीना आर कपड़ा-लत्तार बारे चिन्ता

(लूका १२:२२-३१)

२५ मुई तुमसाक कोहची, तुम्हरा जानडार बारे फिकिर ना करेन कि खामु आर ना अपना बदनडार बारे फिकिर करेन कि पिन्हमु। जानडा कि खाना से बढ़े नी छे? तुमसार जानडा खाना से बढ़े छे। बदनडा की कपड़ा-लत्ता से बढ़े नी छे? बदनडा कपड़ा-लत्ता से बढ़े छे। २६ तुम्हरा आसमानेर चिड़ियालाक देखो। वरा ना त बुनछे, आर ना त काटछे, आर ना त बजारीत जोड़ो करछे। तहारो पर तुमसार स्वर्गेर पिता उसाक खिलाछे। तुम्हरा की उला से बेसी बढ़े नी छेन? तुम्हरा त उला से बढ़े छेन। २७ आर तुमसार भीतर से के चिन्ता करे दिनोत एक घंटा अपना जीवनडाक बढ़ाय दुवा पारबे? कोय नी पारबे। २८ आर तुम्हरा अपना कपड़ा-लत्तार बारे क्याँ चिन्ता करछेन? घासेर फुललार बारे सोचो, उला केनमन करे बढ़छे! वरा ना त मेहनत करछे आर ना कपड़ा बनाछे २९ तहारो पर मुई कोहची, राजा सुलेमान अपना सबसे सुंदर आर कीमती कपड़ात एकटा घासेर फूलेर मान्दी सुंदर सजाल नी छिले। ३० घासला जैला आज छे आर काल चुल्हात जलाय देयाल जाबे, परमेश्वर अगर इला घासोक इकिसम करे सजाछे, त वहाँय की आढ़ोह बेसी करे कपड़ा-लत्ता नी पिन्हाबे? पिन्हाबे। तुमसार विश्वास अतेक कम क्याँ छे? ३१ वहीलाते तुम्हरा इडा बातेर फिकिर ना करेन कि हमरा की खामु? की पीमु? आर की पिन्हमु? ३२ दोसरा लोक इला चीजेर बारे

चिन्ता करछे, आर तुमसार स्वर्गेर पिता जाने कि इला चीजेर तुमसाक जरूरत छे। ३३ वहीलाते तुम्हरा पहिले वहार स्वर्ग-राजेर खोज करो आर वहार मुताबिक धर्मी जीवन बिताव, त इला सबला चीज तुमसाक मिले जाबे। ३४ वहीलाते तुम्हरा कालकार बारे चिन्ता ना करेन, क्योंकि कालकार बारे चिन्ता काल कराल जाबे। आजकार जिनिसेर चिन्ता आजकार तने काफी छे।

७ “तुम्हरा कहारो गलती ना देखेन, नी त तुमसारो गलती देखाल जाबे। १ क्योंकि जैमान्दी दोष तुम्हरा दोसरा लोकेर पर लगाभेन, वही मान्दी दोष परमेश्वर तुमसारो पर लगाबे। आर जैडा नाप दे तुम्हरा नापे दिभेन, वहीडा नाम से तुमसाको नापे देयाल जाबे। २ तुई अपना भईर आँखेर खेचो देखेछिस, मगर अपना आँखेर लकड़ीखान क्याँ नी देखेछिस? ३ आर तुई क्याँ कोहचिस, मुई तोर आँखेर खेचोखान निकलाय दिछी जबकि तोर अपना आँखतो लकड़ी छे। ४ तुई कपटी छिस। पहिले तुई अपना आँखेर लकड़ीखान निकला, वहार बाद तुई अपना भईर आँखेर खेचो साफ-साफ देखे निकलुवा पारबो। ५ अपना पवित्र चीज कुत्तालाक ना दव आर ना अपना हीरा-मोती सोरलार आगुत फिकाव, नी त यरा इलार पर बेराबे आर तुमसार पर हमला करबे। ६ तुम्हरा माँगभेन, त तुमसाक देयाल जाबे। तुम्हरा छाबभेन, त

પાભેન। તુમ્હરા દરવાજા યટયટાભેન, ત તુમસાર તને દરવાજા યોલે દેયાલ જાબે, ૮ ક્યોંકિ જહોંય માંગે, વહાક દેયાલ જાછે। જહોંય છાભે, વહોંય પાછે, આર જહોંય દરવાજા યટયટાછે, વહાર તને દરવાજા યોલે દેયાલ જાછે। ૯ મુઈ તુમસાક કોહચી, તુમસાર બીતરોત ઇકિસમ કોય લોક ની છે, જહાર લિકિન સે વહાર બેટા રૂટી માંગે, ત વહાક પત્થલ દિબે। ૧૦ આર માછ માંગે, ત વહાક સાંપ દિબે। ૧૧ તુમ્હરા યરાબ લોક હંય, અગર અપના બાલ-બચ્ચાક અચ્છા ચીજ દુવા જાનેન, ત તુમસાર પિતા જહોંય સ્વર્ગોત છે, વહોંય ત અપના માંગનેવાલાક બેસી અચ્છા ચીજ દિબે। ૧૨ તુમ્હરા જૈકિસમ વ્યવહાર લોકલાર લિકિન સે ચાહચેન, ઠીક વહી માન્દી વ્યવહાર તુમ્હરા ઁસાર સાથે કરો, ક્યોંકિ મૂસાર નબીર નિયમોત આર નબીલાર કિતાબોત યહી કિસમ લિયાલ છે। ૧૩ તુમ્હરા પતલા દરવાજા દે પરમેશ્વરેર રાજોત ઢુકો ક્યોંકિ જૈયાન ફાટક ચોડા છે આર રાસ્તાડા આસાન છે, ઁડા બર્બાદીત પહુંચાછે, આર જહોંય ઁડા દે ઢુકછે, ઁસાર ગેનતી બહુત છે। ૧૪ જૈડા ફાટક બિલ્કુલ પતલા છે, આર રાસ્તાડા બહુત કઠિન છે, ઁડા જીવનોત પહુંચાછે, આર જહોંય ઁડા રાસ્તા પાછે, વરા બહુત કમ લોક છે।”

झूठा नबी से हुँसियार

(लूका ६:४३-४४)

१५ “तुम्हरा झूठा नबी से हुँसियार रोहेन, जैला भेड़ालार मान्दी सीधा बने तुमसार लिकिन ओसछे। मगर वरा भीतरी दिल से खतरनाक खटियालार मान्दी छे। १६ उसार कामलाक देखे, तुम्हरा उसाक चिन्हें लुवा पारभेन। तुम्हरा काँटार गाछ से की अंगुर पाभेन? नी पाभेन। आर जंगल-झार से की तुम्हरा डुमरेर फल पाभेन? नी पाभेन। १७ वहीलाते अच्छा गाछ, अच्छा फल दिछे, आर खराब गाछ, खराब फल दिछे। १८ आर अच्छा गाछ खराब फल नी दुवा पारबे, आर ना खराब गाछ अच्छा फल दुवा पारबे। १९ हरेकटा गाछ जैडा अच्छा फल नी दिछे, उडाक काटे देयाल जाछे, आर आगिनोत फेके देयाल जाछे। २० इकिसम करे उसार कामलाक देखे तुम्हरा उसाक चिन्हें लुवा पारभेन।”

सच्चा आर झूठा चेला

२१ “हरेकझन जहाँय मोक हे प्रभु! हे प्रभु! कोहचे, वरा स्वर्ग-राजोत ढुकवा नी पारबे, बल्के खाली वहाँय ढुकवा पारबे, जहाँय मोर पितार हुकूम माने चलबे, वहीं स्वर्गोत जाबे। २२ जे दिना परमेश्वरेर बिचार करवार दिन ओसबे, उदिना बहुतझन लोक मोक कोहबे, हे प्रभु! हमरा तोर नामे परमेश्वरेर बात प्रचार करिही आर जैकिसम शक्ति हमसाक

दिहिलो, हमरा तोर देयाल शक्ति दे भूतलाक भगायिनु। आर बहुतला बोड़ो-बोड़ो शक्तिर काम करिही। २३ उखुना मुई उसाक कोहमु, मुई तुमसाक नी जानी। कुकरमी लोक! मोर लिकिन से चले जाव।”

बुद्धिमान आर बेकूफ लोक

(लूका ६:४७-४९)

२४ “हरेकझन जहाँय मोर इला बातोक सुनछे, आर वही मान्दी करछे, वहाँय बुद्धिमान लोकेर मान्दी छे, जहाँय अपना घर पत्थरीला जमीनेर पर बनाल। २५ जैखुना बरसात होल आर बान उठिल आर आँधी-तूफान ओसिल, उखान घरेर पर धक्का मारिल, मगर उखान नी पोरिल, क्योंकि इखान पत्थरीला जमीनेर पर बनाल गहिल। २६ आर जतेला लोक मोर इला बातोक सुनछे, आर वही किसम नी करछे, वरा उला बेकूफ लोकेर मान्दी छे, जहाँय अपना घर बालूर पर बनाल। २७ जैखुना पानी बरसील, आर बान उठिल आर दून उठिल, आर उखान घरेर पर धक्का मारिल, आर उखान घर पोड़े गेल।” २८ यीशु जैखुना बात बोलवा खतम करिल, त भीड़ेर लोकला वहार बात सुने चकित हंय गेल। २९ क्योंकि वहाँय शास्त्रेर ज्ञानीलार मान्दी लोकोक उपदेश नी दिछिले, मगर वहाँय अधिकारेर साथे लोकोक उपदेश दिछिले।

यीशु कुढ़िया लोकोक ठीक करछे

(मरकुस १:४०-४५; लूका ५:१२-१६)

८ जैखुना यीशु पहाड़ेर पर से नाभिल, लोकेर एकटा बोड़ो भीड़ वहार पीछू-पीछू ओसिल। २ एकझन कुढ़िया लोक छिले, आर वहाँय यीशुर लिकिन ओसिल, आर वहार आगुत हटुवा पारे कोहले, “प्रभु! यदि तुई चाहिस, त मोक अच्छा करे दुवा पारबो।” ३ आर यीशु अपना हाथखान बढाल आर कुढ़ियाडाक लाड़े कोहले, मुई चाहची कि तुई अच्छा हंय जा, आर वहीखुना वहाँय कुढ़ियार बेमारी से अच्छा हंय गेल ४ आर यीशु वहाक कोहले, “देख! मुई तोक कोहची, इडा बात कहाको ना कोहिस, बल्के मन्दिरेर पूजारीर लिकिन जा आर वहाक देखा, आर मूसा नबीर हुकूम मुताबिक बलिदान चढ़ा जसे कि लोकेर लिकिन इडा प्रमाण हंय जाय कि तुई अच्छा हंय गहिस।”

यीशु एकटा हाकिमेर नौकरोक ठीक करछे

(लूका ७:१-१०)

५ जैखुना वहाँय कफरनहूम शहरोत पहुँचिल, त उठिन एकटा फौजेर हाकिम छिले। वहाँय यीशुर लिकिन ओसिल, आर वहाक कोहले, ६ “प्रभु! मोर नौकरटाक लकवा मारे दिहे आर बहुत बेचैन छे, आर घरोत बिछनार पर पोड़े छे।” ७ आर यीशु वहाक कोहले, “मुई ओसे वहाक अच्छा करे दुम।” ८ मगर हाकिमडा वहाक जवाब दिले, “प्रभु!

मुई इकिसम लायक नी छी कि तुई मोर घरोत ओसिस। तुई खाली बोले दुबो, त मोर नौकरटा अच्छा हंय जाबे ९ क्यौंकि मोक मालूम छे कि तोक इखान काम करवार अधिकार छे। मोहो कोय बोड़ो हाकिमेर अधीनोत छी आर मोर अधीनोत फौज छे। मुई जैखुना एकोझनाक कोहची, तुई जा, त वहाँय चले जाछे, आर दोसराझनाक कोहची, तुई ओस, त वहाँय ओसछे। जैखुना मोर गोलामडाक कोहची कि इखान काम करेक, त वहाँय करछे।” १० जैखुना यीशु वहार इला बात सुनिल, त वहाँय बहुत हैरान हंय गेल, आर जैला लोक वहार पीछू-पीछू ओसछिले, उसाक कोहले, “मुई तुमसाक सच-सच कोहची, इजराएली लोकेर भीतरोत मुई एकोझनाक नी पानु, जहार इकिसम विश्वास छे। ११ मुई तुमसाक कोहची, जैखुना परमेश्वर राज करबे, उखुना बहुत लोक पूरब आर पश्चिम भीति से ओसबे, आर हमसार दादो-परदादो इब्राहिम, इसाक, आर याकूबेर साथे राज करबे। १२ मगर इब्राहिमेर बेटा-बेटी जैला कि परमेश्वरेर राजेर हकदार छिले, उसाक अंधकारोत फेके देयाल जाबे, आर उठिन हमेशार तने कानभेन आर अफसोस करबे।” १३ आर यीशु उडा हाकिमोक कोहले, “तुई जा, तुई जैमान्दी विश्वास करिहिस, वही मान्दी हंय जाक।” आर नौकरटा वहीखुना अच्छा हंय गेल।

यीशु बेमार आर भूत धराल लोकोक ठीक करछे

(मरकुस १:२९-३४; लूका ४:३८-४१)

१४ आर जैखुना यीशु पतरसेर घर गेल, वहाँय देखिल कि पतरसेर सास बुखारोत पोड़े छे। १५ यीशु वहार हाथखान धरिल आर बुखारखान वहीखुना छुटे गेल, आर वहाँय उठे यीशुर सेवा करिल। १६ वही दिना शाम करे लोकला बहुतझन भूत धराल लोकोक यीशुर लिकिन आनिल, आर वहाँय अपना बातला से भूतलाक निकले जवा कोहले। आर जैला लोक बेमार छिले, उसाक अच्छा करे दिले १७ इकिसम करे यशायाह नबीर कहाल बातला पूरा हंय गेल कि “वहाँय हमसार कमजोरीलाक आर बेमारीलाक उठाय लिले।”

यीशुर चेला हवार कीमत

(लूका ९:५७-६२)

१८ यहार बाद जैखुना यीशु लोकेर एकटा बोड़ो भीड़ोक अपना चारो भीति देखिल, वहाँय चेलालाक कोहले, “चलो, हमरा समुन्द्रेर उपार चली।” १९ आर एकझन शास्त्रेर ज्ञानी वहार लिकिन ओसिल, आर वहाक पूछिल, “गुरुजी! तुई जैठिन जाबो, मुई तोर साथे जाम।” २० यीशु वहाक जवाब दिले, “खटियालार रहवार खाद छे, आर चिड़ियालाक रहवार तने अपना खोता होचे, मगर मुई जे मानुषेर बेटा मोर लिकिन आराम करवारो कोय जगह नी छे।” २१ एकझन दोसरा

चेला यीशुक कोहले, “प्रभु! पहिले मोक घर जवा दे आर मोर बाफोक माटी दुवा दे।” २२ मगर यीशु वहाक कोहले, “जहार जीवनडा मुर्दा लोकेर मान्दी छे, उसाके मूरदालाक माटी दुवा दे, मगर तुई मोर पीछू-पीछू चल।”

यीशु दूनोक थामे दिछे

(मरकुस ४:३५-४१; लूका ८:२२-२५)

२३ आर जैखुना वहाँय नावखानेर पर बोठिल, आर वहार चेलालाव नावखानोत चढ़िल। २४ आर समुन्द्रोत एकखान बोड़ो दून उठिल। नावखान पानीर ढ्यो से डुबवार मान्दी हंय गेल, मगर यीशु उखुना सुते छिले। २५ चेलाला वहार लिकिन गेल, आर वहाक उठाय कोहले, “हे प्रभु! हमसाक बचा, हमरा मोरे जाछी।” २६ आर वहाँय उसाक कोहले, “तुम्हरा क्याँ डोराछेन, तुमसाक की विश्वास नी छे? यहार बाद वहाँय उठिल आर दूनखानोक आर समुन्द्रटाक थमे जवार हुकूम दिले आर सब कुछ थामे गेल।” २७ वहार बाद चेलाला बोलिल, “अरे! इडा कुन किसम लोक छे, जहार हुकूम दूनखान आर समुन्द्रटाव मानछे?”

यीशु भूत धराल एकटा लोकोक ठीक करछे

(मरकुस ५:१-२०; लूका ८:२६-३९)

२८ आर जैखुना वहाँय समुन्द्रटा पार करे गदरीनेर इलाकात चले ओसिल, वहाँय उठिन दुईझन भूत धराल लोकोक पाले। वरा कबर से निकले ओसिहिले। वरा इकिसम खतरनाक छिले कि कोय लोक उपाके जवा नी पारछिले। २९ वरा चिल्लाय कोहले, “परमेश्वरेर बेटा! तुई हमसाक की करवा चाहचिस? समय ओसवार आगुते तुई की हमसाक तकलीफ दुवा ओसिहिस?” ३० उठिन कुछु दूरोत सोरेर एकटा बोड़ो हंजा चरोछिले। ३१ आर भूतला वहाक बिनती करे कोहले, “अगर तुई हमसाक निकलाय दिछिस, त हमसाक सोरेर हंजाडात पठाय दे।” ३२ आर वहाँय उसाक कोहले, “चले जाव।” आर भूतला दोनोंडा लोक से निकले सोरलार भीतरोत ढूके गेल, आर सोरेर हंजाडा पहाड़ेर पर से समुन्द्रटात पोड़े गेल आर मोरे गेल। ३३ सोरेर रखवालला उठिन से भागे गेल, आर शहरोत जाय सबला बात लोकोक कोहय दिले कि भूत धराल लोकलार साथे की होल। ३४ आर इडा खबर सुने शहरेर सबला लोक यीशुर मुलेकात करवार तने वहार लिकिन ओसिल। आर जैखुना वरा वहाक देखिल, वरा वहाक बिनती करे कोहले, “तुई हमसार इलाका से चले जा।”

यीशु लकवा मराल लोकोक ठीक करछे

(मरकुस २:१-१२; लूका ५:१७-२६)

१ आर यीशु एकखान नावोत चढ़े समुन्द्र पार करिल, आर अपना शहर कफरनहूम पहुँचिल। २ कुछुला लोक एकइन लकवार बेमारीक बिछना समेत वहार लिकिन ले ओसिल। यीशु उसार विश्वास देखे लकवार बेमारीडाक कोहले, “बेटा, तुरई ना घबरा, हिम्मत करेक, मुई तोर पाप माफ करछी।” ३ इडा सुने शास्त्रेर कुछुला ज्ञानी लोक अपना मनोत सोचवा लागिल, “यहाँय त परमेश्वरेर अपमान करछे, क्योंकि सिरिफ परमेश्वर पाप माफ करछे।” ४ मगर यीशु उसार मोनेर बातलाक जाने कोहले, “तुम्हरा अपना मनोत इकिसम खराब बिचार क्याँ करछेन? ५ लकवार बेमारीडाक की कहना आसान छे? इडा कहना आसान छे कि मुई तोर पाप माफ करनूँ, ना इडा कहना आसान छे कि उठेक आर बेरा। ६ मुई तुमसाक साबित करे देखाम कि मानुषेर बेटाक दुनियाँत पाप माफ करवार अधिकार छे।” वहार बाद वहाँय लकवार बेमारी लोकटाक कोहले, “उठेक, अपना बिछनाखान उठा आर घर चले जा।” ७ वहाँय उठिल आर घर चले गेल। ८ भीड़ेर लोकला इडा घटना देखे डोराय गेल आर परमेश्वरेर बड़ाई करे बोलिल कि परमेश्वर मानुषोक इकिसम अधिकार दिहे।

खजना लेनेवाला मत्ती यीशुर चेला बने जाछे

(मरकुस २:१३-१७; लूका ५:२७-३२)

९ उठिन से जवारखुना वहाँय मत्ती नामेर एकझन लोकोक देखिल। वहाँय खजना लुवार जगहोत बोठे छिले। यीशु वहाक कोहले, “मोर पीछू-पीछू चले ओसेक।” आर वहाँय उठिल आर यीशुर पीछूत चले गेल। १० यहार बाद वहाँय खवार तने मत्तीर घर गेल। उठिन यीशुर आर वहार चेलालार साथे बहुतला खजना लेनेवाला आर पापी लोकलाव खवार तने बोठिल। ११ फरीसी दलेर लोकला इडा देखे पूछिल, “तुमसार गुरुजी खजना लेनेवाला आर पापी लोकलार साथे क्याँ खान-पान करछे?” १२ उसार बात सुने यीशु उसाक कोहले, “जहाँय भला-चंगा छे, उसाक डाक्टरेर जरूरत नी होचे, मगर डाक्टरेर जरूरत उसाक होचे, जहाँय बेमार छे। १३ मुई चाहची कि तुम्हरा नबीर इला बातेर माने सीखो, ‘मुई तुमसार लिकिन से बलिदान नी चाहची, मगर मुई चाहची कि तुम्हरा पापी लोकेर पर दया करो।’ कारण, मुई धर्मी लोकेर लिकिन नी, बल्के पापी लोकलार लिकिन ओसिही।”

यूहन्नार चेलाला उपासेर बारे सवाल करछे

(मरकुस २:१८-२२; लूका ५:३३-३९)

१४ यहार बाद यूहन्नार चेलाला यीशुर लिकिन ओसिल आर कोहले, “हमरा आर फरीसीसीला उपास करछी, मगर तोर चेलाला उपास नी

करछे?” १५ यीशु उसाक जवाब दिले, “जैखुन तक बरतियाला दूल्हार साथे रोहचे, वरा की उदास रोहचे? नी रोहचे। मगर एकटा समय ओसबे, जैखुना दूल्हाक अलग करे देयाल जाबे, उखुन से वरा उपास करबे।” १६ कोय लोक नया कपड़ा दे पुन्ना कपड़ात चिप्पी नी लगाछे, क्योंकि नया कपड़ार चिप्पीडा पुन्ना कपड़ाखानोक चीरे दिबे, आर कपड़ाखान आढ़ो बेसी चीरे जाबे। १७ आर ना कोय लोक नया अंगुरेर रसखानोक पुन्ना चमड़ार थैलीत राखछे। इकिसम करले पुन्ना चमड़ार थैलीडा फँटे जाबे, आर अंगुरेर रसखान बर्बाद हंय जाबे। वहीलाते नया अंगुरेर रसोक नया चमड़ार थैलीत रखाल जाछे। इकिसम करले दोनोंखान बचे जाछे।

मराल लड़की आर एकझन बेमार स्त्री

(मरकुस ५:२१-४३; लूका ८:४०-५६)

१८ वहाँय जैखुना उसार साथे इकिसम बोलछिल करे कि प्रार्थना-घरेर एकझन नेता भीतरोत ओसिल, आर वहार आगुत हटुवा पाड़े कोहले, “मोर बेटी अलाय मोरिल। मगर तुई ओसेक, आर वहार पर अपना हाथ राखेक, वहाँय जिन्दा हंय जाबे।” १९ यीशु उठिल आर अपना चेलालार साथे वहार पीछू-पीछू गेल। २० एकझन स्त्री, जहाक बारह साल से खून बहवार बेमारी छिले। यीशुर पीछू-पीछू ओसिल आर वहार कपड़ार पाड़टा लाड़िल। २१ वहाँय अपना मोनडात सोचिल, मुई अगर सिरिफ

कपड़ाखान लाड़े ली, त मुई अच्छा हंय जाम। २२ यीशु घुरिल आर वहाक देखे बोलिल, “हिम्मत कर, बेटी! तुई मोर पर विश्वास करलो, वहीलाते मुई तोक अच्छा करे दिनु।” वहीखुना स्त्रीडा अच्छा हंय गेल। २३ आर जैखुना यीशु प्रार्थना-घरेर नेताडार घर ओसिल, त वहाँय बाँसी बजानेवाला आर भीड़ेर लोकलाक हल्ला-गुल्ला करते देखिल। २४ वहाँय कोहले, “तुम्हरा चले जाव, लड़कीडा मोरे नी, बल्के निनाय गहे।” इडा सुने वरा सबकोय हँसवा लागिल। २५ मगर जैखुना भीड़ेर लोकलाक बाहर करे देयाल गेल, वहाँय घरेर भीतरोत गेल, आर लड़कीडार हाथखान धरिल, त लड़कीडा जिन्दा हंय गेल। २६ आर इडा बातेर खबर पूराडा इलाकात फैले गेल।

यीशु काना लोकेर आँख ठीक करछे

२७ आर जैखुना यीशु उठिन से जाछिल, दुईझन काना लोक वहार पीछू-पीछू जवा लागिल आर जोर से चिल्लाय कोहले, “हे दाऊद राजार बेटा! हमसार पर दया करेक।” २८ जैखुना वहाँय घरखानोत ढुकिल, दोनोंझन काना लोक वहार लिकिन ओसिल। यीशु उसाक कोहले, “तुम्हरा विश्वास करछेन कि मुई तुमसाक अच्छा करे दुवा पारमु?” वरा वहाक जवाब दिले, “हाँ प्रभु। हमरा विश्वास करछी।” २९ यहार बाद वहाँय उसार आँखलाक लाड़िल आर कोहले, “तुमसार विश्वासेर कारण से तुम्हरा अच्छा हंय जाव।” ३० बोलवार साथे-साथे उसार आँख अच्छा

हंय गेल। यीशु उसाक कड़ा से चेताय कोहले, “खबरदार! कोय इडा बातोक जनवा नी पाड़े।” ३१ मगर वरा उठिन से चले गेल आर वहार नाम पूराडा इलाकात फैले गेल।

यीशु गोंगा लोकटाक ठीक करछे

३२ यीशु आर वहार चेलाला चले जाछिले। भूत धराल एकटा गोंगा लोकोक यीशुर लिकिन अनाल गेल। ३३ आर जैखुना भूतटाक निकलाय देयाल गेल, गोंगा लोकटा बोलवा लागिल, आर भीड़ेर लोकला इडा कोहय ताज्जुब करवा लागिल कि “इजराएली लोकेर बीचोत इकिसम घटना कभी देखाल नी जाय।” ३४ मगर फरीसी लोकला कोहले, “यहाँय त भूतेर राजार मदद से भूतलाक भगाछे।”

लोकेर दशा देखे यीशुर मया चले ओसछे

३५ आर यीशु सबला शहरोत आर बस्तीत आर उसार प्रार्थना-घरलात शिक्षा दुवा लागिल। आर परमेश्वरेर राजेर खुश-खबरी प्रचार करते गेल, आर हर किसमेर बेमारीक आर कमजोरीक ठीक करते गेल। ३६ वहाँय जैखुना लोकेर भीड़ोक देखिल, वहाक उसार पर माया चले ओसिल क्योंकि वरा उला भेड़ार मान्दी छिले, जैला तकलीफोत आर बेसहरा छिले, जैलार कोय रखवाल नी छिले। ३७ यहार बाद यीशु अपना चेलालाक कोहले, “पकाल फसल बहुत बेसी छे, मगर कटन्यार कम

छे। ३८ वहीलाते तुम्हरा खेतेर मालिक से बिनती करो कि वहाँय बेसी करे कटन्यार पठाय दे।”

यीशु चेलालाक शक्ति दे प्रचार करवा पठाछे

(मरकुस ३:१३-१९; ६:७-१३; लूका ६:१२-१६; ९:१-६)

१० यहार बाद एक दिना यीशु अपना बारहझन चेलाक अपना लिकिन जाब दिले, आर उसाक भूतलाक धमकवार आर उलाक निकलुवार आर हर किसमेर बेमारीलाक अच्छा करवार आर हर किसमेर कमजोरीलाक दूर करवार अधिकार दिले। १ उला बारहझन चेलार नाम छिले: शिमोन, जहाक पतरस कहाल जाछिल। आर यहार भई अन्द्रियास, जब्दीर बेटा याकूब, आर वहार भई यूहन्ना ३ आर फिलिपुस, बरतुल्मै, थोमा आर खजना लेनेवाला मत्ती, हल्फैर बेटा याकूब, आर तद्दे ४ देश-भक्त शिमोन, आर यहूदा इस्किरियोती, जहाँय यीशुक धोखा दे धराय दिहिले। ५ यीशु इ-बारहझनाक हुकूम दे पठाय दिले, “तुम्हरा गैर-यहूदी लोकेर इलाकात आर सामरिया इलाकात ना जायेन। ६ बल्के तुम्हरा इजराएली लोकलार लिकिन जाव, जैला लोक हराल भेड़ालार मान्दी हराय गहे। ७ आर जैखुना तुम्हरा जाभेन, तुम्हरा इकिसम प्रचार करते जायेन, परमेश्वर अला राजा बने अपना राज करवा शुरू करे दिहे। ८ तुम्हरा बेमारीलाक अच्छा करो, मुर्दा लोकोक जिन्दा करो, कुढ़िया लोकोक ठीक करो, आर भूतलाक भगाव। तुम्हरा फोकटोत पाहेन आर

फोकटोत देन। ९ अपना बटवात तुम्हरा ना सोना, ना चाँदी, आर ना ताँम्बा लेन। १० अपना सफरेर तने तुम्हरा झोला ना लेन, ना दुईडा कूर्ता लेन, ना चप्पल लेन, आर ना लाठी लेन, क्योंकि जहाँय मेहनत करछे, वहाक खाना खवार हक छे। ११ आर जैडा शहरोत या बस्तीत तुम्हरा जाभेन, त तुम्हरा उठिन छाभे निकलायन कि परमेश्वरेर वचन सुनवार लायक लोक के छे? आर तुम्हरा जैखुन तक उठिन से नी जाछेन, वहीठिन व्हारे साथे रहेन। १२ जैखुना तुम्हरा कहारो घरोत जाभेन, त उखुना घरेर लोकेर पर अपना आशीर्वाद देन। १३ अगर घरवालाडा आशीर्वाद पवार लायक छे, त तुम्हरा परमेश्वरेर लिकिन से जैडा शान्ति उडा परिवारेर तने चाहचेन, त उडा शान्ति उसार पर ओसबे। अगर लायक नी छे, त तुमसार शान्ति तुमसार लिकिन घुरे चले ओसबे। १४ अगर कोय तुमसाक ग्रहण नी करछे आर तुमसार बात नी सुनछे, त जैखुना तुम्हरा उडा शहरोक छोड़े चले जाभेन, त अपना पाँर धुला वहीठिन झाड़े देन। इडा साबित करबे कि परमेश्वर उसाक सजा दिबे। १५ मुई तुमसाक सच कोहची परमेश्वरेर बिचारेर दिनोत इला जगहोर दुर्दशा सदोम आर अमोरा शहर से बेसी होबे। १६ देखो, मुई तुमसाक सीधा भेड़लार मान्दी खतरनाक खटियालार बीचोत पठाछी। वहीलाते तुम्हरा साँपेर मान्दी बुद्धिमान आर कबूतरेर मान्दी सीधा बनो। १७ तुम्हरा लोकला से हुँसियार रहेन, क्योंकि वरा तुमसाक प्रार्थना-घरेर नेतालार

लिकिन सोंपे दिबे आर चाभूक दे मारबे। १८ लोक तुमसाक रोमी सरकारे हाकिम आर राजालार आगुत घिसटाय आनबे, मगर तुम्हरा उसाक आर गैर-यहूदी लोकलाक मोर बारे बताभेन। १९ जैखुना वरा तुमसाक उसार हाथोत सोंपे दिबे, तुम्हरा ना घबरायन कि हमरा कि बोलमु, आर कि कोहमु, क्योंकि जैकुछु तुमसाक बोलवा होबे, वहीखुना उडा सिखाय देयाल जाबे २० क्योंकि बोलनेवाला तुम्हरा नी छेन, बल्के तुमसार पिता परमेश्वरेर आत्मा तुमसार जरियाय बोलबे। २१ लोक अपना भईक मारे फिकवार तने धराय दिबे। बाप अपना बाल-बच्चार खिलाफ आर बाल-बच्चाला अपना बाफेर खिलाफ हंय जाबे आर उसाक मारे फिकाबे। २२ आर लोक तुमसाक मोर नामेर चलते नफरत करबे। २३ वरा जैखुना एकटा शहरोत सताबे, तुम्हरा दोसराडा शहरोत भागे जाव। मुई तुमसाक सच कोहची, मुई मानुषेर बेटा मोर घुरे ओसवार समय तक तुम्हरा इजराएल देशेर सबला शहरोत जवार काम खतम नी करवा पारभेन। २४ एकझन चेला अपना गुरु से बोड़ो नी होचे, आर ना एकझन नौकर अपना मालिक से बोड़ो होचे। २५ चेला अपना गुरुर बराबर हंय जाय आर नौकर अपना मालिकेर बराबर हंय जाय, त वहीडा काफी छे। अगर लोकला घरेर मालिकोक शैतान कहवा पारे त, वरा कत्तेक बेसी खराब बात वहार घरेर लोकलार बारे कोहबे।”

परमेश्वर से डोराव मगर मानुष से नी

(लूका १२:२-७)

२६ “वहीलाते तुम्हरा उसासे ना डोरायन। इकिसम कुछु झपाल नी छे, जैलाक खोला नी जाबे। आर इकिसम कुछु भेदेर बात नी छे, जैलाक लोक नी जानबे। २७ मुई जतेला बात तुमसाक अन्हारोत कोहची, तुम्हरा उलाक उजालात प्रचार करो। जैला तुम्हरा छिपे-छिपे सुनछेन, उलाक तुम्हरा घरेर छतेर पर से प्रचार करो। २८ तुम्हरा उसासे ना डोराव, जहाँय तुमसार बदनडाक खतम करवा पारे, मगर आत्माडाक खतम करवा नी पारबे। बल्के वहा से डोरायन, जहाँय तुमसार बदन आर आत्मा दोनोंडाक नरकोत बर्बाद करवा पारे। २९ सबकोय जानछे कि एक टकात दुईडा फुद्गी चिड़िया मिलछे, मगर उलार भीतर से एकटाव पिता परमेश्वरेर इच्छा बिना माटीत नी पोड़छे। ३० तुमसार माथार सबला चूल गेनती कराल छे। ३१ वहीलाते तुम्हरा ना डोराव, क्योंकि फुद्गीला से बेसी तुमसार दाम छे। ३२ वहीलाते जहाँय लोकेर आगुत कोहचे, ‘मुई यीशुर चेला छी,’ त मोहो वहाक मोर स्वर्गेर पितार लिकिन माने लुम कि यहाँय मोर चेला छे। ३३ मगर जहाँय मोक लोकेर आगुत इन्कार करछे, मोहो वहाक मोर स्वर्गेर पितार आगुत इन्कार करूम।”

चेलालार पर आनेवाला सताव

३४ “इडा ना सोचेन कि मुई दुनियाँत लोकेर बीचोत शान्ति पैदा करवा ओसिही, मुई शान्ति पैदा करवार तने नी, बल्के झगड़ा लगवार तने ओसिही। ३५ मुई मानुषोक वहार बाप से अलग करवा, बेटीक वहार माँ से अलग करवा, आर बहूक वहार सास से अलग करवा ओसिही। ३६ मानुषेर दुश्मन वहार घरेर लोकलाय होबे। ३७ जहाँय अपना माँ-बाफोक मोसे बेसी प्रेम करछे, वहाँय मोर लायक नी छे, आर जहाँय अपना बेटा-बेटीक मोसे बेसी प्रेम करछे, वहाँय मोर चेला हवार लायक नी छे। ३८ आर यदि कोय अपना क्रुस उठाय मोर पीछू-पीछू नी ओसछे आर मोर तने दुःख उठवार तने तैयार नी होचे, त वहाँय मोर चेला हवार लायक नी छे। ३९ जहाँय अपना जानडाक बचवार कोशिश करछे, वहाय उडाक बचवा नी पारबे, आर जहाँय अपना जानडाक मोर तने खतम करे दिबे, वहाँय उडाक बचाबे।”

सेवा करवार इनाम

४० “जहाँय तुमसाक ग्रहण करछे, वहाँय मोक ग्रहण करछे, आर जहाँय मोक ग्रहण करछे, वहाँय मोर पठानेवालाक ग्रहण करछे। ४१ अगर कोय लोक एकझन नबीक नबी जाने अपना घरोत ग्रहण करबे, वहाँय एकटा नबीर इनाम पाबे। आर जहाँय एकझन धर्मी लोकोक धर्मी जाने ग्रहण करबे, वहाँय धर्मी लोकेर इनाम पाबे। ४२ आर जहाँय मोर चेलालार बीच

से एकड़न सबसे छोटो चेलाक एक गिलास ठंडा पानी दिछे, मुई तुमसाक सच कोहची, वहाँय जरूर इनाम पाबे।”

यूहन्नार सवाल आर यीशुर जवाब

(लूका ७:१८-३५)

११ आर यीशु अपना बारहड़न चेलाक शिक्षा दुवार बाद उठिनकार शहरलात उपदेश दुवा आर खुश-खबरीर प्रचार करवा चले गेल।
२ जैखुना यूहन्ना जेल से यीशु मसीहार कामलार बारे सुनिल, त वहाँय अपना चेलालाक यीशुर लिकिन पूछवा पठाल कि, ३ “मसीहा जहार ओसवार बात छिले उडा की तुहें छिस, ना हमरा दोसरा कहारो इन्तेजारोत रोहमु?” ४ यीशु उसाक कोहले, “तुम्हरा जैला सुनछेन आर देखछेन, उला यूहन्नाक जाय कोहय दव। ५ वहाक कोह कि काना लोक देखछे, नेंगड़ा लोक बेराछे, कुढ़िया लोक ठीक हंय जाछे, बहिरा सुनछे, मुर्दा जिन्दा हंय जाछे, आर गरीब लोकेर लिकिन खुश-खबरीर प्रचार कराल जाछे। ६ खुशहाल लोक वहाँय छे जहाँय मोर बारे कोय शक नी करछे।”

यीशु यूहन्नार बारे बताछे

७ यूहन्नार चेलाला चले जवार बाद, यीशु भीड़ेर लोकलाक यूहन्नार बारे कहवा लागिल, “तुम्हरा सुनसान जगहोत की देखवार तने गहिलेन? मुई

तुमसाक कोहची, तुम्हरा एकटा कमजोर लोकोक देखवा नी जायन, जहाँय हवात हिलने वाला मधुवालार मान्दी छे। ८ तुम्हरा तब की देखवा गहिलेन? तुम्हरा की मखमल आर रंग-बिरंगी कपड़ा पिन्हाल लोकोक देखवा गहिलेन? नी। उकिसम लोक राज दरबारोत रोहचे। ९ सही माने तुम्हरा की देखवा गहिलेन? तुम्हरा कि कोय नबीक देखवा गहिलेन? हाँ मुई तुमसाक कोहची, एकझन लोकोक देखवा गहिलेन, जहाँय नबी से बोड़ो छे। १० यहाँय वहीं यूहन्ना छे जहार बारे प्रभु परमेश्वर मसीहाक बोलिहिले, ‘देखो, मुई तोर पहिले अपना खबर देनेवालाक पठाछी, जहाँय तोर तने रास्ता तैयार करबे।’” ११ “मुई तुमसाक सच कोहची, जताला लोक स्त्री से जनम लिहे, यूहन्ना बपतिस्मादाता से बोड़ो कोय नी होयेह। मगर मुई तुमसाक कोहची, जहाँय स्वर्ग-राजोत सबसे छोटो छे, वहाँय यूहन्ना बपतिस्मादाता से बोड़ो छे। १२ यूहन्ना बपतिस्मादातार समय से अला तक स्वर्ग-राज बहुत सतावट सहते ओसिहे आर ताकतवर लोक इडाक जबरदस्ती कब्जा करवार कोशिश करछे। १३ सबला नबी आर मूसार नियम-कानून यूहन्नार समय तक बताते रोहोल। १४ आर अगर तुम्हरा इडा विश्वास करछेन कि यूहन्ना एलियाह नबी छे, जहार तुम्हरा इन्तेजार करछिलेन। १५ तुम्हरा जहाँय-जहाँय मोर बातला सुनछेन, ध्यान दे सुनो। १६ मगर इडा पीढ़ीर लोकलाक मुई कहार मान्दी बोलुम? मुई कोहची, इला लोक उला छुवार मान्दी छे,

जैला बजारोत बोठे छे, आर वरा अपना साथीलाक जाब दे कोहचे,
१७ हमरा तुमसार तने बाँसी बजानु आर तुम्हरा नी नाचलेन। हमरा
दुःखेर गीत गानु, मगर तुम्हरा नी कानलेन। १८ यूहन्ना ना त खाले, ना
पीले, वहीलाते लोकला वहार बारे कोहले, वहार भीतरोत भूत छे।
१९ मानुषेर बेटा खाते-पीते ओसिल, त वहार बारे लोकला कोहले, देखो,
वहाँय एकझन पेटू आर पियक्कर, आर खजना लेनेवाला आर पापी
लोकेर दोस्त छे। मगर जहाँय-जहाँय परमेश्वरेर ज्ञानेर अनुसार चलछे,
वरा परमेश्वरेर ज्ञानोक सच साबित करछे।”

विश्वास नी करनेवाला शहरेर पर श्राप

(लूका १०:१३-१५)

२० यहार बाद यीशु शहरेर लोकलाक दोष दुवा लागिल, जैठिन बेसी से
बेसी चमत्कारेर काम कराल गहिले। वरा अपना पापेर तने अफसोस नी
करे आर ना अपना मन बदली करिल। २१ “खुराजीन आर बैतसैदा
शहरेर लोकला! हाय तुमसार पर! क्योंकि जैला शक्तिर काम तुमसार
बीचोत कराल गेल, उला काम अगर सूर आर सैदा लोकेर बीचोत
कराल गेलतेन, जैला बहुत पहिले से छिले, त वरा अपना बदनोत मुस
लगाय आर धोकड़ा पिन्हे अपना पापेर तने अफसोस करिलतेन आर
मन बदली करिलेतन। २२ मगर मुई तुमसाक कोहची, परमेश्वरेर बिचारेर
दिनोत तुमसार दुःख सूर आर सैदा शहरेर लोकला से बेसी होबे।

२३ आर कफरनहूम शहरेर लोकला! तुम्हरा की स्वर्गोत चढ़बेन? तुमसाक त पातालोत टाने नभाल जाबे, क्योंकि जैला चमत्कारेर काम तुमसार बीचोत कराल गेल, उला काम अगर सदोम शहरेर लोकलार बीचोत कराल गेलतन त वरा आजतक बचे रोहिलतन। २४ मगर मुई तुमसाक कोहची, बिचारेर दिनोत तुमसार दशा सदोम शहरेर लोकला से बेसी खराब होबे।”

यीशुर लिकिन आराम

२५ उखुना यीशु पितार बड़ाई करे बोलिल, “हे पिता! स्वर्ग आर दुनियाँर मालिक। मुई तोर बड़ाई करछी क्योंकि तुई इला बातोक बुद्धिमान आर ज्ञानी लोक से नुकाय राखिलो आर छोटो छुवार मान्दी लोकलाक बताय दिलो। २६ हाँ, पिता। इला तोर दया से भराल इच्छा मुताबिक होचे।” २७ मोर पिता सब कुछ मोर हाथोत सोंपे दिहे। कोय नी जानछे कि बेटा के छे, सिरिफ बाप जानछे। आर बाफोक कोय नी जानछे, सिरिफ बेटा। आर बेटा जहाक बाफेर बारे बताछे, वहाँव बाफोक जानछे। २८ तुम्हरा जैला लोक मेहनत करछेन आर भारी बोझ से दबाल छेन, तुम्हरा सबकोय मोर लिकिन ओसो, मुई तुमसाक आराम दुम। २९ मोर जुँआलखान तुम्हरा अपना उपरोत ले लव आर मोर लिकिन से सीखो, क्योंकि मुई नरम आर सीधा छी। तुम्हरा अपना आत्मात आराम

पाभेन। ३० क्याँकि मोर जुँआलखान ठूते आसान छे आर मोर बोझ हल्का छे।

यीशु आरामेर दिनेर मालिक

(मरकुस २:२३-२८; लूका ६:१-५)

१२ एकटा आरामेर दिनोत यीशु आर वहार चेलाला एकखान गोहमेर खेत दे जाछिले। वहार चेलालाक भोख लागिहिले, वहीलाते वरा गोहमेर शीशला सिरताय खवा लागिल। १ मगर जैखुना फरीसी दलेर लोकला इला देखिल, त वरा यीशुक कोहले, “देखेक, तोर चेलाला आरामेर दिनोत गोहमेर शीशलाक सिरताछे आर इकिसम करना आरामेर दिनेर नियमेर खिलाफ छे।” २ यीशु उसाक जवाब दिले, “तुम्हरा की पोढ़ेन नी? जैखुना दाऊद आर वहार साथीला भूखाय छिले, त वहाँय की करिहिले? ३ केनमन करे वहाँय परमेश्वरेर मंदिरोत ढुकिल। आर तब वहाँय आर वहार साथीला परमेश्वरोक चढ़ाल रूटीला खाहिले। इला खाय वरा नियमेर खिलाफ करिहिले क्याँकि पूजारीक छोड़े इला कोय खवा नी सकेछिले। ४ आर तुम्हरा कि नियमोत यहोडा नी पढ़ेन कि पूजारीला आरामेर दिन मंदिरोत काम करे आरामेर दिनेर नियम तोड़े दिछे, मगर वरा दोषी नी छे। ५ मुई तुमसाक कोहची, इठिन एकझन छे, जहाँय मंदिर से बोड़ो छे। ६ परमेश्वरेर शास्त्रोत लिखाल छे, मुई तुमसार लिकिन से बलिदान नी चाहची, मगर मुई चाहची कि तुम्हरा

पापी लोकेर पर दया करो। तुम्हरा अगर शास्त्रेर इडा बातेर माने बुझवा पारलेनतन त तुम्हरा एकझन बेकसूर लोकोक दोषी नी ठहरालेनतन।
८ मानुषेर बेटा आरामेर दिनेर मालिक छे।”

सुखना हाथवाला लोकटाक अच्छा करछे

९ यहार बाद वहाँय उठिन से चले गेल, आर उसार प्रार्थना-घरोत ढुकिल।
१० उठिन एकझन लोक छिले, जहार हाथखान सुखाय गहिले। फरीसीला यीशुक पूछिल, “आरामेर दिनोत कहाको अच्छा करना की नियमेर मुताबिक ठीक छे?” वरा यीशुर पर दोष लगवार तने इडा सवाल पूछिल। ११ वहाँय फरीसीलाक पूछिल, “इकिसम कुन लोक छे, जहार एकटा भेड़ा छे, आर उडा अगर आरामेर दिनोत एकटा खादोत पोड़े जाछे, त वहाँय की उडाक टाने नी उठाबे? उठाबे। १२ एकटा लोकेर दाम एकटा भेड़ार दाम से बहुत बेसी छे, वहीलाते आरामेर दिनोत अच्छा काम करना नियमेर मुताबिक ठीक छे।” १३ यहार बाद वहाँय बेमार लोकटाक कोहले, “तुई अपना हाथखान बढ़ा।” आर उडा लोक अपना हाथखान बढ़ाल, आर इखान हाथ दोसराखान हाथेर मान्दी अच्छा हंय गेल। १४ मगर फरीसी लोकला बाहरे गेल आर वहाक खतम करवार तने योजना बनाल।

परमेश्वरेर चुनाल सेवक

१५ यीशु इडा जाने उठिन से चले गेल, आर बहुतझन वहार पीछू-पीछू गेल, आर वहाँय सभाको अच्छा करिल। १६ आर वहाँय लोकलाक अपना बारे कहाको बतवार तने मना करिल। १७ आर इकिसम करे मसीहार बारे परमेश्वर जैला बात यशायाह नबीक बोलिहिले, उला बात पूरा होल। परमेश्वर बोलिहिले, १८ देखो, यहाँय मोर सेवक छे, जहाक मुई बिछे लिही, यहाँय मोर प्यारा छे, आर यहा से मुई खुश छी, मुई अपना आत्मा वहाक दुम, आर वहाँय सब लोकेर लिकिन सच्चा इन्साफेर बारे प्रचार करबे। १९ वहाँय कहारो साथे झगड़ा या लड़ई नी करबे, आर ना कोय बाजारोत वहार आवाज सुनबे। २० वहाँय झुकाल मधुवार मान्दी कमजोर लोकोक तकलीफ नी दिबे, आर घेरानेवाला चराकेर मान्दी कमजोर लोकोक नी छोड़बे, जैखुन तक कि सही इन्साफ नी होचे। २१ आर तब सब लोक वहार पर भरोसा करबे।

पवित्र आत्मार खिलाफ पाप

(मरकुस ३:२०-३०; लूका ११:१४-२३)

२२ यहार बाद एकझन भूत धराल लोकोक, जहाँय काना आर गोंगा छिले, वहाक यीशुर लिकिन अनाल गेल। आर वहाँय वहाक अच्छा करिल, आर उडा गोंगा लोक बोलवा लागिल आर देखवा पारिल। २३ आर सबला लोक यीशुर इखान काम देखे ताज्जुब करवा लागिल।

आर यीशुर बारे कोहले, “यहाँय की दाऊद राजार खानदानेर बेटा हवा नी पारे, जहार हमरा इन्तेजार करछिनु?” २४ मगर जैखुना फरीसी दलेर लोकला इडा सुनिल, वरा बोलिल, “यहाँय त सिरिफ भूतेर राजा बेलजबूबेर मदद से भूतलाक निकलाछे।” २५ उसार कहवार मतलब जाने, यीशु उसाक कोहले, “अगर कोय भी राजेर भीतरो फूट पैदा हंय जाय, त उडा बर्बाद हंय जाछे। आर कोय शहर या परिवारेर भीतरो फूट पैदा हंय जाछे, कायम नी रोहचे। २६ आर अगर शैतान शैतानोक भगाछे, त मालूम होचे कि उसार भीतरो फूट पैदा हंय गहे, इकिसम होले शैतानेर राज कसे करे टिके रोहबे? २७ आर अगर मुई बेलजबूबेर मदद से भूतोक निकलाछी, त कहार मदद से तुमसार चेलाला भूतलाक निकलाछे? वहीलाते तुमसार कहना मुताबिक तुमसार लोकलाय तुमसार बिचार करबे। २८ अगर मुई परमेश्वरेर आत्मार मदद से भूतलाक निकलाछी त समझे लव कि परमेश्वरेर राज तुमसार लिकिन ओसे गहे। २९ एकझन लोक दोसराझन ताकतवर लोकेर घरोत ढुके की वहार समानलाक लूटे लुवा पारबे? नी पारबे। इडा करवार तने वहाँय पहिले घरेर ताकतवर लोकटाक बान्हे दिबे, तहार बादे वहाँय वहार समानलाक लूटपाट करवा पारबे। ३० जहाँय मोर साथे नी छे, वहाँय मोर खिलाफ छे। जहाँय मोर साथे अनाज जोड़ो नी करछे, वहाँय छिड़ियाछे। ३१ वहीलाते मुई तुमसाक कोहची, लोकेर सब किसमेर पाप आर

परमेश्वरेर खिलाफ बोलवार पाप माफ होबे, मगर पवित्र आत्मार खिलाफ बोलवार पाप माफ नी होबे। ३२ आर जहाँय मानुषेर बेटार खिलाफ कोय बात कोहबे, उडा पाप माफ हंय जाबे, मगर अगर कोय पवित्र आत्मार खिलाफ बोलछे, वहाक माफी नी मिलबे, ना इडा युगोत ना आनेवाला युगोत।”

गाछ आर वहार फल

३३ हमरा जानी कि अगर गाछटा अच्छा छे, त वहार फलडाव अच्छा होबे। आर अगर गाछटा खराब छे, त वहार फलडाव खराब होबे। क्योंकि एकटा गाछ वहार फल से चिन्हाल जाछे। ३४ ऐ साँपेर बच्चा! तुम्हरा खराब हंय कसे करे अच्छा बात बोलवा पाड़ैन, क्योंकि मनेर भीतरोत जैला रोहचे, वहीला मुख दे निकलेछे। ३५ क्योंकि अच्छा लोक अपना अच्छा भंडार से अच्छा बात निकलाछेन आर खराब लोक अपना खराब भंडार से खराब बात निकलाछे। ३६ मुई तुमसाक कोहची, “परमेश्वरेर बिचारेर दिनोत लोकोक अपना हरेकटा फाजूल बातेर जवाब दुवा होबे, जैला वरा बोलछे। ३७ तुमसार बात से तुम्हरा धर्मी ठहरिबेन, आर तुमसार बात से तुम्हरा खुद दोषी होभेन।” ३८ यहार बाद शास्त्रेर कुछुला ज्ञानी आर कुछुला फरीसी दलेर लोक कोहले, “गुरुजी! हमरा तोर लिकिन से कुछु चिन्ह देखवा चाहची।” ३९ मगर वहाँय उसाक जवाब दिले, “बदमाश आर धोखेवाज लोक चिन्ह देखवा चाहचे, मगर

योना नबीर चिन्हेर अलावा मुई तुमसाक कोय दोसरा चिन्ह नी दुम।
४० जैकिसम योना नबी बहुत बोड़ो माछेर पेटोत तीन दिन आर तीन रात छिले। वही मान्दी मानुषेर बेटा यीशु जमीनेर भीतरोत तीन दिन आर तीन रात रोहबे। ४१ परमेश्वरेर बिचारेर दिनोत निनबे शहरेर लोकला इ-युगेर लोकलार खिलाफ गवाह दुवार तने थाड़ो होबे, आर इसाक दोषी ठहराबे क्यौँकि निनबे शहरेर लोकला योनार प्रचार सुने अपना पाप से मन बदली करे मन फिराहिले। मगर इठिन योना से भी कोय बोड़ो छे। ४२ आर दक्खिन देशेर रानी इ-युगेर लोकलार खिलाफ गवाह दुवार तने थाड़ो होबे आर इसाक दोषी ठहराबे, क्यौँकि वहाँय दुनियाँर दोसरा छोर से सुलेमानेर लिकिन वहार बुद्धिर बात सुनवार तने ओसिहिले। मगर इठिन एकझन छे, जहाँय सुलेमान से बोड़ो छे।”

खराब आत्मार रहवार जगह

(लूका ११:२४-२६)

४३ “जैखुना एकटा भूत एकझन लोकेर भीतर से निकले जाछे, वहाँय आराम करवार तने एकखान सुखना जगह छाभछे, मगर कोय जगह नी पाछे। ४४ तब वहाँय कोहचे, ‘मुई जैखान घर से निकले ओसिही, वहीठिन घुरे चले जाम।’ आर जैखुना वहाँय घुरे ओसछे आर घरखानोक खाली आर साफ-सुथरा आर सजाल पाछे। ४५ तब वहाँय जाछे आर अपना से बेसी खराब सातटा भूतोक अपना साथे आनछे, आर वरा

सबकोय उडा लोकेर भीतरोत ढुकछे आर रहवा लागछे। आर उडा लोकेर हालत पहिले से आढोह बेसी खराब हंय जाछे। ठीक वही मान्दी इ-युगेर दुष्ट लोकेर दशा होबे।”

यीशुर माँ आर भई

(मरकुस ३:३१-३५; लूका ८:१९-२१)

४६ जैखुना यीशु लोकलार साथे बोलछिले, उखुना यीशुर माँ आर वहार भईला बाहरे थाड़ो हंय छिले, आर वरा वहार साथे बात करवा चाहचिले। ४७ [कोय यीशुक कोहले, “तोर माँ आर तोर भईला बाहरे थाड़ो हने छे, आर वरा तोर साथे बात करवा चाहचे”] ४८ मगर जैडा लोक वहाक खबर दिले, यीशु वहाक कोहले, “मोर माँ आर मोर भई के छे?” ४९ अपना चेलालार भीति हाथ बढ़ाय कोहले, “यराय मोर माँ आर भई ५० क्यौँकि जैला लोक मोर स्वर्गेर पितार मुताबिक चलछे, वराय मोर माँ, बहिन, आर भाई छे।”

बिच्चन आर खेत

(मरकुस ४:१-९; लूका ८:४-८)

१३ वही दिना यीशु घर से निकले समुन्द्रेर बगलोत जाय बोठिल। २ आर लोकेर बहुत बोड़ो भीड़ वहार चारो भीति जोड़ो हंय गेल। वहीलाते वहाँय एकखान नावर पर बोठिल, आर पूराडा भीड़ समुन्द्रेर

कछारोत थाड़ो हंय रोहोल। ३ आर वहाँय मिसाल दे उसाक बहुतला बात बोलिल। वहाँय बोलिल, “एकझन गृहस्थ अपना खेतोत बिच्चन बुनवा गेल। ४ आर बुनवारखुना कुछुला बिच्चन रास्तार पर पोड़िल, आर चिड़ियाला ओसे उलाक खाय लिले। ५ कुछुला बिच्चन पत्थरीला जमीनोत पोड़िल, आर जल्दी से गाजे उठिल, मगर उठिन बेसी माटी नी पवार चलते उला गाछेड़ जड़ माटीर भीतरोत जवा नी पाड़िल। ६ जैखुना बेला उठिल, जड़ नी रहवार कारण से उला झलसे सुखाय गेल। ७ आढ़ोह कुछुला बिच्चन झाँटीत पोड़िल, आर झाँटीला बढ़े उलाक चापे दिले। ८ आर कुछुला बिच्चन अच्छा खेतोत पोड़िल, आर गाजे उठे कोयला बिच्चन सौ गुणा, कोयला सैठ गुणा, आर कोयला तीस गुणा फल आनिल। ९ तुम्हरा जहाँय-जहाँय मोर बातला सुनछेन, ध्यान दे सुनो।” १० यहार बाद वहार चेलाला ओसिल, आर वहाक पूछिल, “तुई उसार साथे मिसाल दे बात क्याँ करछिस?” ११ यीशु उसाक जवाब दिले, “तुमसाक स्वर्ग-राजेर गुप्त भेदेर बारे बताल गहे, मगर उसाक इकिसम बताल नी जाय। १२ क्याँकि जहार लिकिन छे, वहाक आढ़ोह देयाल जाबे, आर वहार लिकिन बहुत बेसी हंय जाबे। मगर जहार नी छे, वहार लिकिन जैला छे, वहार लिकिन से वहोलाव ले लिया ल जाबे। १३ वहीलाते मुई इसाक मिसालेर जरियाय बताछी क्याँकि वरा देखे नी देखवा पारछे। वरा सुने नी सुनछे, आर ना समझेछे। १४ बहुत पहिले

यशयाह नबीर बोलाल बातला उसार तने सच साबित होचे, जैला इकिसम छे, तुम्हरा सचमुच सुनभेन, मगर बुझवा नी पारभेन, तुम्हरा सचमुच देखभेन, मगर चिन्हवा नी पारभेन। १५ इला लोकेर दिलला मोटो हंय गहे, आर यरा बहिरा हंय गहे। वरा अपना आँखला बन करे लिहे, जसे कि अपना दिल से बुझवा नी पारे, अपना कान दे सुनवा नी पारे वरा अपना आँख दे चिन्हवा नी पारे, आर अच्छा हवार तने मोर लिकिन घुरे नी ओसे। १६ मगर खुशहाल तुम्हरा छेन, जहाँय देखछेन आर सुनछेन। १७ मुई तुमसाक सच कोहची, तुम्हरा जैला देखछेन, उलाक देखवार तने बहुतला नबी आर धर्मी लोक दिल से चाहले, मगर देखवा नी पाड़िल। आर तुम्हरा जैला सुनछेन, उलाक वरा सुनवा चाहिले, मगर सुनवा नी पाड़िल।”

बिच्चन बुनवार मिसालडार माने

(मरकुस ४:१३-२०; लूका ८:११-१५)

१८ अला तुम्हरा बिच्चन बुनवार मिसालडार माने सुनो, १९ जैखुना एकझन लोक परमेश्वरेर राजेर बारे सुनछे आर बुझवा नी पारछे, उखुना शैतान ओसछे आर वहार दिलोत जैडा वचन बुनाल गेल, उडाक छिड़ाय ने चले जाछे। इला उला वचन छे, जैलाक रास्तार पर बुनाल गहिले। २० जैला बिच्चन पत्थरीला जमीनोत पोड़िल, उला इकिसम लोक छे, जैला परमेश्वरेर वचन सुने खुशी से जल्दी करे ग्रहण करछे। २१ मगर

उलार जड़ नी रहवार कारण से बहुत कम समय तक बरदास्त करछे, आर जैखुना वचनेर कारण से बिपत्ति या सतावट ओसछे, वरा बहुत जल्दी विश्वास से हटे जाछे। २२ जैला बिच्चन झाड़ीर बीचोत बुनाल गेल, वरा इकिसम लोक छे, जैला वचनोक सुनछे, मगर दुनियाँर चिन्ता आर धन-दौलतेर लोभ से वचनडाक चापे दिछे, आर कोय फल अनवा नी पारछे। २३ आर जैला बिच्चन अच्छा माटीत बुनाल गेल, उला इकिसम लोक छे, जहाँय परमेश्वरेर वचन सुनछे, आर उडाक समझेछे आर वहाँय सचमुच फल आनछे। कोय लोक सौ गुणा, कोय सैठ गुणा, आर कोय तीस गुणा फल आनछे।

गोहम आर जंगल-झाड़

२४ यीशु आर एकटा छोटो मिसाल दे कोहले, “स्वर्ग-राज एकटा लोकेर मान्दी कहाल जाय, जहाँय अपना जमीनोत अच्छा बिच्चन बुनिल। २५ मगर जैखुना लोकला सुते छिले, वहार दुश्मन ओसे गोहमेर खेतोत जंगल-झाड़ेर बिच्ची बुने दिले आर चले गेल। २६ आर जैखुना बिच्चनला गाजे उठिल, आर गोहमेर दाना निकलिल, उखुना जंगली गाछलाव देखा गेल। २७ यहार बाद मालिकटार नौकरला ओसे वहाक कोहले, मालिक! तुई अपना खेतोत अच्छा बिच्चन बुनिहिलो, त इलार भीतरोत जंगली गाछ कसे करे ओसिल? २८ वहाँय उसाक कोहले, कोय दुश्मन इखान कामोक करिहे। नौकरला वहाक कोहले, तुई अगर बोलिस त हमरा

जाय उलाक जोड़ो करी। २९ मगर वहाँय उसाक कोहले, नी, इकिसम ना होक कि उलाक जोड़ो करवारखुना तुम्हरा गोहमेर गाछलाको अलगाय देन। ३० वहीलाते गहमलाक आर जंगल-झाड़लाक फसल कटवार समय तक एक साथे बढ़वा दव। कटनीर समय मुई कटन्यारलाक पहिले जंगली गाछलाक जोड़ो करवा कोहमु आर जलवार तने बाझा बन्हवा कोहमु, मगर गोहोमलाक जमा करे मोर बजारीत राखो।”

स्वर्ग-राज एकटा तुड़ीर दानार मान्दी

(मरकुस ४:३०-३२; लूका १३:१८-१९)

३१ आर वहाँय एकटा छोटो मिसाल दे कोहले, “स्वर्ग-राज एकटा तुड़ीर दानार मान्दी छे, जैडाक एकझन लोक ले अपना खेतोत बुने दिले। ३२ इडा सबला बिच्चन से छोटो होचे, मगर जैखुना इडा बोड़ो हंय जाछे, इडा सबला साग-पातेर गाछ से बोड़ो हंय जाछे आर चिड़ियाला ओसे वहार पर अपना खोता बनाछे।”

स्वर्ग-राज एकखुदी खमीरेर मान्दी

(लूका १३:२०-२१)

३३ वहाँय उसाक आर एकटा छोटो मिसाल दे कोहले, “स्वर्ग-राज खमीरेर मान्दी छे, जैखानोक एकझन स्त्री लगभग तीन पसेरी आँटात मिलाय दिले, आर गोटाखान आँटा खमीरेर चलते फूले गेल।”

यीशु मिसाल दे क्याँ बोलछे

३४ इला गोटेला मिसाल यीशु भीड़ेर लोकलाक सुनाले। सच-मुच वहाँय उसार साथे हरेकटा बात मिसालेर जरियाय बताल, ३५ जसे कि यशायाह नबीर बातला पूरा होय, जैडा वहाँय कोहिले, “मुई मिसाल दे लोकलार साथे बात करूम, दुनियाडा बनवार आगुते जैला बात नुकाल छिले, उलाक मुई कोहमु।”

जंगली गाछेर मिसाल

३६ यहार बाद यीशु भीड़ेर लोकलाक छोड़े घरखानेर भीतरोत चले गेल। वहार चेलाला वहार लिकिन ओसिल, आर वहाक कोहले, “हमसाक खेतेर जंगली दानार मिसालडा समझाय दे।” ३७ वहाँय बताल, “जहाँय अच्छा बिच्चन बुनछे, वहाँय मानुषेर बेटा छे। ३८ खेत इडा दुनियाँ छे, अच्छा बिच्चनेर लोक छे स्वर्ग-राजेर बेटा-बेटीला, आर जैला जंगली दाना छे, उला दुष्ट शैतानेर बेटा-बेटीला। ३९ आर जैडा दुश्मन खराब बिच्चनलाक बुनिल, वहाँय शैतान छे, आर कटनीर माने होचे, युगेर अन्त, आर काटनेवाला होचे, स्वर्गेर फरीस्ताला। ४० जैमान्दी जंगली गाछलाक जमा करे आगिनोत जलाय देयाल जाछे, यही मान्दी युगेर अन्त समय होबे। ४१ मानुषेर बेटा अपना फरीस्तालाक पठाबे, आर वरा ओसे वहार राज से सब किसमेर पाप करनेवाला लोकोक आर बुराई करनेवाला लोकोक जमा करबे। ४२ आर आग्नेर भट्ठीत फेके देयाल

जाबे, जैठिन लोकला कानबे, आर तकलीफेर मारे दाँत पिसबे।
४३ यहार बाद धर्मी लोकला अपना पितार राजोत सुरजडार मान्दी
चमकिबे, तुम्हरा जहाँय-जहाँय मोर बातला सुनछेन, ध्यान दे सुनो।”

स्वर्ग-राज नुकाल भंडारेर मान्दी

४४ “स्वर्ग-राज जमीनेर भीतरोत नुकाल भंडारेर मान्दी छे, जैडाक
एकझन लोक पाले, आर माटी दे झापे नुकाय राखिल, यहार बाद वहाँय
खुशीर मारे जाछे, आर अपना सब कुछ बेचे, उला पैसा दे उखान
जमीनोक किने लिछे।” ४५ “फेर स्वर्ग-राज एकझन सौदागरेर मान्दी छे,
जहाँय बहुत कीमती मोतीर खोजोत छिले, ४६ आर जैखुना वहाँय एकटा
बहुत कीमती मोतीक पाले, त वहाँय गेल आर अपना सब कुछ बेचे उडा
मोतीक किने लिले।” ४७ “फेर स्वर्ग-राज एकखान बोड़ो पानी-जालेर
मान्दी छे, जैखानोक समुन्द्रोत गिराय देयाल गेल, आर सब किसमेर
माछ धराल गेल। ४८ जैखुना जालखान माछ से भरे गेल, उखानोक
मछुवाला टाने समुन्द्रेर कछारोत उठाल, आर अच्छाला माछोक बिछे
टोकरीत राखिल, मगर खराबला माछोक फेके दिले।” ४९ “ठीक यही
मान्दी युगेर अन्तोत होबे। स्वर्गेर फरीस्ताला ओसबे, आर दुष्ट लोकोक
धर्मी लोक से अलग करबे ५० आर दुष्ट लोकोक आगिनेर भठ्ठीत फेके
दिबे, उठिन उला लोक कानबे, आर तकलीफेर मारे दाँतला पिसबे।”

पुरना आर नया भंडार

५१ “तुम्हरा की इला सबला बातोक समझिलेन?” वरा वहाक कोहले, “हाँ हमरा समझिनु।” ५२ आर वहाँय चेलालाक कोहले, “वहीलाते हरेकइन शास्त्रेर ज्ञानी, जहाँय स्वर्ग-राजेर नया शिक्षाक सीखछे, वरा उला गृहस्थेर मान्दी छे, जैला अपना भण्डार से नया आर पुरना चीजोक निकलाछे।”

नासरत शहरोत यीशुर अपमान

(मरकुस ६:१-६; लूका ४:१६-३०)

५३ आर यीशु इला मिसालोक बोलवार बाद उठिन से चले गेल। ५४ आर अपना शहरोत घुरे ओसिल आर उसार प्रार्थना-घरोत शिक्षा दुवा लागिल। लोकला वहार बातला सुने चकित हंय गेल आर कोहले, “इडा लोक कुनठिन से इकिसम ज्ञान आर काम करवार शक्ति पाले?” ५५ यहाँय त एकइन बढईर बेटा छे, यहार माँर नाम की मरियम नी छे? आर याकूब, यूसुफ, शिमोन, आर यहूदा त यहार भईला छे। ५६ आर यहार बहिनला त हमसार बीचोत रोहचे। मगर इडा लोक इकिसम ज्ञान कुनठिन से पाले?” ५७ वरा वहार पर विश्वास नी करिल। मगर यीशु उसाक कोहले, “एकइन नबी अपना देश आर अपना घर छोड़े सबठिन इज्जत पाछे।” ५८ आर क्याँकि वरा वहार पर विश्वास नी करिल, वहीलाते वहाँय उठिन बहुतला शक्तिर काम नी करिल।

यूहन्ना बपतिस्मादातार मौत

१४ वहीडा समय राजा हेरोदेश यीशुर बारे सुनिल। ^१ आर वहाँय अपना सिपाहीलाक कोहले, “यहाँय त यूहन्ना छे, जहाँय लोकोक बपतिस्मा दिछिले। वहीं जिन्दा हंय उठिहे, वहीलाते वहाँय इकिसम शक्तिशाली काम करछे।” ^३ फिलिपेर पत्नी हेरोदियास छिले। हेरोदेश अपना भई फिलिपेर पत्नीक ब्याह करे लिहिले। यूहन्ना यहीडा बुराईर खिलाफ बोलिहिले। वहीलाते हेरोदेश यूहन्नाक कैद करे जेलोत दे दिहिले। ^४ यूहन्ना वहाक कोहिले, “तुई फिलिपेर स्त्री हेरोदियासोक अपना पत्नी बनाय लिहिस, इडा उचित बात नी छे।” ^५ वहीलाते हेरोदेश राजा यूहन्नाक जान से मारे फिकवा चाहचिले, मगर लोकलार डोरे इकिसम नी करिल, क्यौंकि लोकला यूहन्नाक एकझन नबी मानछिले। ^६ मगर हेरोदेश राजार जनम दिनोत हेरोदियासेर बेटी लोकेर सामनात नाच करिल, आर राजा हेरोदेशोक खुश करे दिले। ^७ वहीलाते हेरोदेश राजा अपना बेटीक कसम खाय कोहले, “तुई जे कुछु माँगबो, तोक दुम।” ^८ अपना माँ हेरोदियासेर उसकानीत वहाँय कोहले, “मोक यूहन्ना बपतिस्मादातार माथाडाक एकखान थालीत आने देयाल जाक।” ^९ इडा बात सुने राजाक बहुत दुःख होल, मगर अपना कसमेर कारण से आर अपना मेहमानलार कारण से राजा यूहन्नार माथाडाक अनवार हुकूम दे दिल। ^{१०} वहाँय सिपाहीलाक जेलखानात पठाल आर यूहन्नार

माथाडाक कटवाय दिले। ११ आर माथाडाक एकखान थालीत राखे उडा लड़कीक दे दिले, आर वहाँय उडाक अपना माँर लिकिन ले ओसिल। १२ यहार बाद यूहन्नार चेलाला ओसिल आर लाशटाक ले जाय माटी दे दिले, आर इडा खबर यीशुक दे दिले।

यीशु पाँच हजार लोकोक खिलाछे

(मरकुस ६:३०-४४; लूका ९:१०-१७; यूहन्ना ६:१-१४)

१३ जैखुना यीशु यूहन्नार खबर पाले, त वहाँय उठिन से एकखान नावत चढ़े आखले एकखान सुनसान जगहोत चले गेल। जैखुना लोकला इडा सुनिल, त वरा शहरला से निकले वहार पीछू-पीछू बेराय जवा लागिल। १४ जैखुना यीशु नावखान से कछारोत नाभिल, त वहाँय लोकेर एकटा बोड़ो भीड़ोक देखिल, आर उसार पर तरस खाले, आर उसार बेमारीलाक अच्छा करिल। १५ जैखुना साँझ हंय गेल, चेलाला यीशुर लिकिन ओसे कोहले, “इखान सुनसान जगह छे, आर बेलाडा डूबनेवाला छे, लोकलाक बस्तीलात पठाय दे कि वरा अपनार तने खाना किने ले।” १६ यीशु कोहले, “उसाक जाना जरूरी नी छे, तुम्हराय उसाक कुछु खवार तने दव।” १७ चेलाला यीशुक जवाब दिले, “हमसार लिकिन सिरिफ पाँचटा रूटी, आर दुईडा माछेर इलावा आर कुछु नी छे।” १८ वहाँय कोहले, “उलाक मोर लिकिन आनो।” १९ तब वहाँय भीड़ेर लोकलाक घासलार पर बोठवार हुकूम दिले। उ पाँचटा रूटी, आर

दुईडा माछ ले, वहाँय स्वर्गेर भीति आँख उठाय देखिल, आर परमेश्वरेर शुकुरिया करिल। वहार बाद रूटीलाक भाँगे चेलालाक दिले, आर चेलाला भीड़ेर लोकलाक दिले। २० वरा सबकोय मन भरे खाले। आर खवार बाद जैला टुकड़ा बचे गेल, उलार बारह टोकरी होल। २१ स्त्री आर छुवालाक छोड़े लगभग पाँच हजार पुरुष खाले।

यीशु पानीर पर बेराछे

(मरकुस ६:४५-५२; यूहन्ना ६:१५-२१)

२२ यीशु अपना चेलालाक नावर पर चढ़े आगु बढ़े उपार जवा कोहले, आर वहाँय भीड़ेर लोकलाक पठवा लागिल। २३ लोकलाक पठाय दुवार बाद वहाँय प्रार्थना करवार तने अखलाय पहाड़ेर पर चले गेल। आर उखुना साँझ हंय गहिले। २४ इडा समय तक नावखान समुन्द्रेर कछारटा से २—३ किलोमीटर दूर चले गहिले। आर हवाखान उसार उलटा भीति बोहछिले, वहीलाते नावखान डगमगा छिले। २५ भोरेर समय यीशु पानीर पर बेराय उसार लिकिन ओसवा लागिल। २६ मगर चेलाला जैखुना एकझन लोकोक पानीर पर बेराय ओसते देखिल, त वरा बहुत डोराय बोलवा लागिल, “भूत भूत!” डोरेर मारे वरा कनहार कटवा लागिल। २७ मगर वहीखुना वहाँय कोहले, “हिम्मत करो। इडा मुई छी, ना डोराव।” २८ तब पतरस वहाक कोहले, “प्रभु, अगर इडा तुई छिस, त मोक पानीर पर बेराय तोर लिकिन ओसवार हुकूम दे।” २९ वहाँय

कोहले, “ओसेक।” वहीलाते पतरस नावखान से नाभिल आर पानीर पर बेराय यीशुर लिकिन ओसवा लागिल। ३० मगर जैखुना पतरस दूनखानोक देखिल, त वहाँय डोराय गेल आर डुबवा लागिल। तब वहाँय कनाहार काटे कोहले, “प्रभु, मोक बचा।” ३१ यीशु वहीखुना अपना हाथ बढ़ाल आर वहाक धरे कोहले, “ऐ कमजोर विश्वासी! तुई क्याँ शक करलो?” ३२ आर जैखुना वरा नावखानेर पर चढ़िल, त दूनखान थामे गेल। ३३ आर जैला लोक नावखानेर पर छिले, वरा यीशुर भक्ति करिल आर कोहले, “सच-मुचोत तुई परमेश्वरेर बेटा छिस।” ३४ आर वरा पार हंय गन्नेशरत नामेर एकखान जगहोत ओसिल। ३५ आर जैखुना उठिनकार लोकला वहाक चिन्हे लिले, त वरा सबला इलाकात खबर पठाय दिले। आर जतेला लोक बेमार छिले, सभाको वहार लिकिन ले ओसिल। ३६ आर बिनती करे कोहले कि हमसाक तोर कपड़ार पाड़टा सिरिफ धरवा दे। आर जतेला लोक धरिल वरा अच्छा हंय गेल।

रीति-रेवाजेर बारे गलत बिचार

(मरकुस ७:१-२३)

१५ यहार बाद यरूशलेम शहर से फरीसीला आर शास्त्रेर ज्ञानीला यीशुर लिकिन ओसिल, आर वहाक बोलिल, १ “तोर चेलाला दादो-परदादोर रीति-रेवाजलाक क्याँ भाँगछे? वरा खवार आगुत अपना हाथ नी धुछे।” ३ यीशु उसाक जवाब दिले, “अपना रीति-रेवाज मनवार तने

तुम्हरा परमेश्वरेर हुकूम क्याँ भाँगछेन? ४ परमेश्वर अपना वचनोत बोलिहे, ‘माँ-बाफेर इज्जत करो, आर जहाँय अपना माँ-बाफेर बुराई बोलछे, वहाक जान से मारे फिकाना जरूरी छे।’ ५ मगर तुम्हरा लोकोक नियमेर उल्टा सिखाछेन आर तब लोक अपना माँ-बाफोक कोहचे, जे कुछ मोर लिकिन से तुमसाक मिलिलतेन, उलाक मुई परमेश्वरोक दान करे दिही। ६ इकिसम करे तुम्हरा एकइन लोकोक कोहचेन कि वहाक अपना माँ-बाफेर इज्जत करना जरूरी नी छे। मगर मुई कोहची, ‘तुम्हरा अपना रीति-रेवाजेर चलते, परमेश्वरेर वचनोक इन्कार करछेन।’ ७ तुम्हरा कपटी छेन। बहुत पहिले यशयाह नबी तुमसार बारे ठिके बोलिहे कि, ८ ‘इला लोक सिरिफ अपना मुखे से मोर इज्जत करछे, मगर उसार दिलला मोसे दूरोत रोहचे। ९ मोर भक्ति करना उसाक बेकार छे, क्याँकि वरा मानुषेर नियम-कानूनलाक परमेश्वरेर नियम-कानून बताछे।”

नापाक करनेवाला बात

१० यहार बाद यीशु लोकलाक जाब दे कोहले, “तुम्हरा मोर बातला सुनो आर समझो। ११ जैला खाना तुम्हरा खाचेन, उला लोकोक नापाक नी करछे, बल्के जैला खराब बात मुखेर भीतर से बाहर निकलेछे, वहीला लोकोक नापाक करे दिछे।” १२ यहार बाद चेलाला यीशुर लिकिन ओसे कोहले, “तोर इला बात सुने फरीसी लोकलार दिलोत चोट पहुँचिल।

तुई की इडा जानिस?” १३ वहाँय जवाब दिले, “मोर पिता जहाँय स्वर्गोत छे, जैला गाछोक वहाँय नी लगाय, उला हरेकटा गाछोक जड़ समेत उखड़ाय फेके देयाल जाबे। १४ तुम्हरा फरीसीलार बातलाक छोड़े दव। वरा काना छे, आर दोसरा काना लोकोक रास्ता देखाछे। एकझन काना लोक अगर दोसराझन काना लोकोक रास्ता देखाय, त दोनोंझन खादोत पोड़े जाबे।” १५ इला बात सुने पतरस यीशुक पूछिल, “हमसाक इडा मिसालेर माने समझाय दे।” १६ यीशु कोहले, “तुम्हरा की नी समझेछेन? १७ तुम्हरा की नी जानेन, जैला खाना मुखेर भीतरोत जाछे, उला पहिले पेटोत जाछे, आर बादोत निकले जाछे। १८ मगर जैला बुरा बात मुख से बाहर निकलेछे, उला दिल से बाहर निकलेछे, आर उला लोकोक नापाक करे दिछे, १९ क्यौंकि दिलेर भीतर से गंदा सोच-बिचार, हत्या, कुकरम, चूरी, झूठा गवाही, धोखा निकलोछे। २० यहीला चीज लोकलाक नापाक बनाय दिछे, हाथ नी धोय खाले लोक अशुद्ध नी होचे।”

एकझन स्त्रीर मजबूत विश्वास

(मरकुस ७:२४-३०)

२१ यहार बाद यीशु उखान जगह छोड़े सूर आर सैदा नामेर इलाकात ओसिल। २२ आर देखो! उठिन कनान देशेर एकझन स्त्री ओसिल आर चिल्लाय कहवा लागिल, “हे प्रभु, राजा दाऊदेर बेटा! मोर पर दया

कर। मोर बेटीक भूत धरिहे आर बहुत सताछे।” २३ मगर यीशु वहाक कोय जवाब नी दिले, आर वहार चेलाला वहार लिकिन ओसिल आर बिनती करिल, “तुई स्त्रीडाक पठाय दे, क्योंकि वहाँय हमसार पीछू-पीछू चिल्लाते ओसछे।” २४ मगर यीशु वहाक जवाब दिले, “मोक सिरिफ इजराएली लोकलार लिकिन पठाल गहे, जैला कि हराल भेड़ार मान्दी छे।” २५ मगर स्त्रीडा ओसिल आर वहार आगुत हटुवा पाड़े कोहले, “प्रभु! मोर मदद करेक।” २६ आर यीशु जवाब दिले, “छुवालार खवार रूटीलाक ले कुत्तालाक देना ठीक नी छे।” २७ स्त्रीडा कोहले, “ठिके कोहलो। प्रभु! मालिकेर खवार टेबुलेर पर से जैला रूटीर टुकड़ा गिरे जाछे, उला टुकड़ाक वहार कुत्ताला खाचे।” २८ तब यीशु वहाक जवाब दिले, “गै! तोर विश्वास बहुत मजबूत छे, जैमान्दी तुई चाहचिस, वही मान्दी तोर तने हंय जाक।” आर वहार बेटी वहीखुना अच्छा हंय गेल।

यीशुर चमत्कारेर काम

२९ यहार बाद यीशु उठिन से गलील समुन्द्रेर बगलोत गेल, आर एकखान पहाड़ेर पर चढ़े बोठे गेल। ३० उखुना लोकला नेंगड़ा, गोंगा, काना, बहिरा आर दोसरा किसमेर बेमार लोकोक वहार लिकिन आनिल, आर वरा सबला लोकोक यीशुर पाँलार लिकिन राखिल, आर वहाँय उसाक अच्छा करिल। ३१ जैखुना लोकला देखिल कि गोंगा लोक

बोलछे, आर जैला लोक हाथ-पाँ चलवा नी पारछे, वरा अच्छा होचे, नेंगरा लोक बेराछे, आर काना लोक देखवा पाड़छे। इला देखे वरा ताज्जुबोत पोड़े गेल, आर इजराएली लोकेर परमेश्वरेर बड़ाई करवा लागिल। ३२ यहार बाद यीशु अपना चेलालाक अपना लिकिन जाब दे कोहले, “मोक इडा भीड़ेर लोकलार पर दया लागछे, क्योंकि इला लोक मोर साथे तीन दिन से छे, आर उसार लिकिन खवार तने कुछु नी छे, आर मुई उसाक भूखाय पठवा नी चाहची, नीते वरा रास्तात भोख से बेहुंस हंय जाबे।” ३३ आर चेलाला वहाक कोहले, हमरा इखान सुनसान जगहोत कुनठिन से अतेला लोकेर तने खिलवार रूटी पामु? ३४ यीशु उसाक कोहले, “तुमसार लिकिन कैडा रूटी छे?” चेलाला कोहले, “सातटा रूटी आर कुछु छोटो माछ छे।” ३५ आर वहाँय भीड़ेर लोकलाक जमीनोत बोठवार हुकूम दिले। ३६ यीशु सातोडा रूटीक आर माछलाक लिले, आर परमेश्वरेर बड़ाई करे रूटीलाक भाँगिल, आर उला रूटीक आर माछोक चेलालाक दिले, आर चेलाला भीड़ेर लोकलाक दिले। ३७ आर खवार बाद सभारो मनडा भरे गेल आर सात टोकरी रूटी बचे गेल। ३८ जैला लोक खाले, स्त्रीलाक आर छुवालाक छोड़े, वरा सबकोय चार हजार लोक छिले। ३९ आर भीड़ेर लोकलाक पठाय दुवार बाद, वहाँय नावर पर चढ़िल आर मेगादोन नामेर इलाकात चले गेल।

फरीसी आर सदूकीला चिन्ह देखवा चाहचे

(मरकुस ८:११-१३; लूका १२:५४-५६)

१६ फरीसी आर सदूकी दलेर लोकला यीशुर लिकिन ओसिल आर जाँच करवार तने वहाक कोहले, “हमसाक स्वर्ग से एकटा चिन्ह देखा।” २ यीशु उसाक जवाब दिले, “बेला डुबनीरखुना आसमानडा लाल देखे तुम्हरा कोहचेन काल मौसमडा साफ होबे। ३ आर बेहाने आसमानडा लाल आर अन्हार देखे कोहचेन कि आज दिनडात जोर से दून होबे। आसमानेर रूप-रंग देखे मौसमडार फरक बतवा पारछेन, मगर युगडार चिन्ह देखे वहार मतलब बतवा नी पारछेन। ४ तुम्हरा दुष्ट लोक परमेश्वरेर कामेर पर विश्वास नी करछेन बल्के चिन्ह देखवा चाहचेन, मगर योना नबीर चिन्हेर अलावा तुमसाक आर कोय दोसरा चिन्ह देयाल नी जाबे।” यहार बाद यीशु उसाक छोड़े चले गेल।

फरीसी आर सदूकीर गलत शिक्षा से सावधान

(मरकुस ८:१४-२१)

५ यीशुर चेलाला जैखुना समुन्द्रेर उपार पहुँचिल, त ख्याल करिल कि वरा रूटी लुवा भूले गहे। ६ यीशु उसाक कोहले, “तुम्हरा फरीसी आर सदूकी लोकलार खमीर से सावधान रहेन।” ७ इडा सुने चेलाला अपना बीचोत बोलवा लागिल, “हमरा त रूटी नी आनी, वहीलाते यहाँय इकिसम कोहचे।” ८ इला बात जाने यीशु कोहले, “ऐ कमजोर

विश्वासेर लोकला! तुम्हरा अपना बीचोत क्याँ बात करछेन, जे तुमसार लिकिन रूटी नी छे? ९ तुम्हरा की अलाव नी समझेन? पाँच हजार लोकेर तने पाँचटा रूटीर बात तुमसाक की ख्याल नी छे, आर यहोडा याद नी छे, कि कै टोकरी रूटी जमा करिहिलेन? १० चार हजार लोकेर तने सातटा रूटीर बात याद नी छे की? आर कै टोकरी रूटी तुम्हरा जमा करिहिलेन? ११ मुई त रूटीर बारे बात नी करी, बल्के इडा कोहनु कि तुम्हरा फरीसी आर सदूकी लोकलार गलत शिक्षा से हुँसियार रोहेन। मगर तुम्हरा इडा बात बुझवा नी पारलेन।” १२ यहार बाद चेलाला बुझवा पारिल कि वहाँय रूटीर खमीरेर बारे बात नी करे, बल्के फरीसी आर सदूकी लोकेर गलत शिक्षा से सावधान रहवा कोहये।

यीशु परमेश्वरेर पठाल मसीहा

(मरकुस ८:२७-३०; लूका ९:१८-२१)

१३ तब यीशु जैखुना कैसरिया फिलिप्पी नामेर इलाकात गेल, वहाँय अपना चेलालाक पूछिल, “मानुषेर बेटार बारे लोकला की कोहचे?” १४ वरा जवाब दिले, “कुछुला लोक कोहचे, तुई यूहन्ना बपतिस्मादाता छिस। कुछुला लोक कोहचे, तुई एलियाह नबी छिस, आर कुछुला लोक कोहचे, यिरमियाह नबी, या त कोय दोसरा नबी छिस।” १५ वहाँय उसाक पूछिल, “मगर तुम्हरा की कोहचेन, मुई के छी?” १६ शिमोन पतरस जवाब दिले, “तुई जिन्दा परमेश्वरेर बेटा मसीहा छिस।”

१७ यीशु पतरसोक कोहले, “हे यूहन्नार बेटा शिमोन! तुई खुशहाल छिस क्यौँकि इडा बातोक तोक कोय लोक नी बताय, बल्के मोर पिता जहाँय स्वर्गोत छे, वहीं बताहे। १८ मुई तोर नाम पतरस राखछी, जहार माने होचे ‘पत्थल’। आर यहीखान पत्थलेर पर मुई अपना मंडली बनाम आर मौतेर शक्ति यहाक जीतवा नी पारबे। १९ मुई स्वर्ग-राजेर अधिकारेर चाभी तोक दिछी, आर जे कुछु तुई दुनियाँत इन्कार करबो, उला स्वर्गोत इन्कार कराल जाबे, आर जे कुछुर तने तुई दुनियाँत राजी होबे, उला स्वर्गोत मंजूर हंय जाबे। २० यहार बाद वहाँय कड़ा करे अपना चेलालाक चेताय दिले, कि वरा कहाको इडा बात ना कोहय कि वहाँय मसीहा छे।

यीशु अपना मौतेर बारे बताछे

(मरकुस ८:३१-३३; लूका ९:२२)

२१ वहीखुना से यीशु अपना चेलालाक बोलवा शुरू करिल कि मोक यरूशलेम शहर जाना जरूरी छे, आर यहूदी नेतालार, बोड़ोला पूजारी, आर शास्त्रेर ज्ञानीलार हाथ से मुई बहुत दुःख उठामु आर मारा जामु, आर तेसरा दिन जिन्दा हंय उठुम।” २२ पतरस यीशुक एक बगल ले जाय डाँटे कोहले, “परमेश्वर माफ करोक, प्रभु तोर पर इडा कभी नी होबे।” २३ मगर यीशु पतरसेर भीति घुरे कोहले, “शैतान, मोर लिकिन से दूर हंय जा। तुई मोर तने ठोकरे कारण छिस, क्यौँकि तुई

परमेश्वरेर बातोत नी, बल्के मानुषेर बातोत मन लगाछिस।” २४ यहार बाद यीशु अपना चेलालाक कोहले, “अगर कोय लोक मोर पाछूत ओसवा चाहचे, त वहाँय अपना मन मुताबिक ना चलोक, आर क्रुस उठाय मोर पाछूत चले ओसोक आर मोर तने दुःख उठवार तने तैयार रहोक। २५ जहाँय अपना जानडाक बचाबे, वहाँय उडाक हराबे, आर जहाँय मोर तने अपना जानडाक हराबे, वहाँय उडाक पाबे। २६ अगर एकझन लोक पूरा दुनियाँडाक पाय जाय, आर अपना जानडाक हराय दे त वहाक की फायदा होबे? कोय फायदा नी होबे। आर मानुष अपना जानडा पवार तने कोय कीमत की दुवा पारबे? नी पारबे। २७ मानुषेर बेटा अपना स्वर्गेर फरीस्तार साथे आर अपना पितार शान-शौकतेर साथे ओसनेवाला छे, आर तब वहाँय हरेकझनाक वहार कामेर मुताबिक मजदूरी दिबे। २८ मुई तुमसाक सच-सच कोहची, इठिन कुछुला लोक थाड़ो हंय छे, वरा जैखुन तक मानुषेर बेटार राज नी देखछे, उखुन तक नी मोरबे।”

यीशुर रूप बदले जाछे

(मरकुस ९:२-१३; लूका ९:२८-३६)

१७ छौ दिन बाद यीशु पतरसोक, याकूबोक आर याकूबेर भई यूहन्नाक अपना साथे ले एकखान ऊँचा पहाड़ेर पर गेल, जैठिन उसाक छोड़े आर कोय नी रहय। १ उठिन उसार आगुत यीशुर रूप बदले गेल,

आर वहार मुखखान बेलाडार मान्दी चमकेछिले आर वहार कपड़ाला सफ्फा धक-धक हंय गेल। ३ चेलाला मूसा नबीक आर एलियाह नबीक यीशुर साथे बात करते देखिल। ४ इडा देखे पतरस यीशुक कोहले, “हे प्रभु, हमसाक इठिन रहना अच्छा छे। अगर तोर इच्छा हंय, त मुई तीनडा मण्डप बनई। एकटा तोर तने, एकटा मूसार तने, आर एकटा एलियाह नबीर तने।” ५ पतरस जैखुना बोलछिले, वहीखुना एकखान सादा रंगेर बदली ओसे उसाक झापे लिले, आर बदलीखानेर भीतर से एकटा आवाज ओसिल, यहाँय मोर प्यारा बेटा छे, यहा से मुई बहुत खुश छी, यहार बात तुम्हरा सुनोव। ६ चेलाला इडा आवाज सुने डोराय गेल आर मुख थबड़ा खाय माटीत पोड़े गेल। ७ उखुना यीशु ओसे उसाक लाड़े कोहले, “उठो, ना डोराव।” ८ यहार बाद वरा अपना आँख खोले यीशुर अलावा आर कहाको नी देखिल। ९ जैखुना वरा पहाड़ेर पर से नाभछिले, उखुना यीशु उसाक हुकूम दिले, “तुम्हरा जैला देखलेन, उला तुम्हरा कहाको ना कहेन, जब तक मानुषेर बेटा यीशु मुर्दा से जिन्दा हंय नी उठछे।” १० चेलाला वहाक पूछिल, “शास्त्रेर ज्ञानी कसे करे इडा कोहये कि मसीहार पहिले एलियाह नबीक ओसना जरूरी छे?” ११ यीशु उसाक जवाब दिले, “एलियाह नबीर पहिले ओसवार बात छिले आर वहाँय सब कुछ ठीक-ठाक करे दितेन। १२ मगर मुई तुमसाक कोहची कि एलियाह नबी आगुते चले ओसिहिले, आर

लोकला वहाक चिन्हवा नी पारिल। लोकला वहार साथे जैकिसम चाहले वही किसम व्यवहार करिल। लोकला वहाक दुःख दिले। ठीक वही मान्दी मानुषेर बेटाव लोकलार हाथ से दुःख उठाबे।” १३ तब चेलाला समझिल कि वहाँय यूहन्ना बपतिस्मादातार बारे बोलछे।

यीशु भूत धराल लड़काक अच्छा करछे

(मरकुस ९:१४-२९; लूका ९:३७-४३)

१४ यहार बाद यीशु आर चेलाला जैखुना भीड़ेर लोकलार लिकिन ओसिल, उखुना एकझन लोक यीशुर लिकिन ओसे, हटुवा पाड़े बिनती करिल, १५ “प्रभु मोर बेटार पर दया करेक, वहाक मीरगीर बेमारी छे, आर वहाँय बहुत तकलीफ पाछे। वहाँय अकसर आगिनोत आर पानीत पोड़े जाछे। १६ मुई वहाक तोर चेलालार लिकिन ले ओसिहिनु, मगर वरा वहाक अच्छा करवा नी पाड़िल।” १७ यीशु अपना चेलालाक कोहले, “ऐ विश्वासोत कमजोर आर जिद्दी लोकला, मुई आर कते दिन तक तुमसार साथे रोहमु? लड़काडाक मोर लिकिन ले ओसेक।” १८ यीशु भूतटाक धमकाल, आर वहार भीतर से भूतटा निकले गेल, आर लड़कडा वहीखुना अच्छा हंय गेल। १९ यहार बाद चेलाला चुपचाप से यीशुर लिकिन ओसिल आर वहाक पूछिल, “हमरा भूतटाक क्याँनि निकलुवा पारनु?” २० यीशु उसाक कोहले, “तुमसार विश्वास कमजोर हवार कारण से नी पारलेन। मुई तुमसाक सच कोहची, अगर तुमसार

विश्वास तुड़ीर दानार बराबर हंय, त तुम्हरा पहाड़खानोक इठिन से सड़के उठिन चले जवा कोहेन, त इखान पहाड़ सड़के जाबे, आर तुमसार तने सब कुछ हंय जाबे। २१ मगर इकिसमेर भूत उखुन तक नी निकलिबे जैखुन तक तुम्हरा प्रार्थना आर उपास नी करभेन।”

यीशु अपना मौतेर बारे बताछे

(मरकुस ९:३०-३२; लूका ९:४३-४५)

२२ जैखुना वरा गलील प्रदेशोत जगह-जगह बेराछिले। यीशु उसाक कोहले, “मानुषेर बेटाक लोकेर हाथोत धराय देयाल जाबे। २३ आर वरा वहाक मारे फिकवाबे, मगर वहाँय तेसरा दिन जिन्दा हंय उठबे।” इडा सुने वरा बहुत घबराय गेल।

यीशु मंदिरेर खजना दिछे

२४ यीशु आर वहार चेलाला जैखुना कफरनहूम शहरोत गेल, उखुना मंदिरेर खजना लेनेवाला पतरसेर लिकिन ओसिल आर वहाक पूछिल, “तुमसार गुरुजी की मंदिरेर खजना नी दिछे?” २५ पतरस जवाब दिले, “हाँ, दिछे।” मगर जैखुना पतरस घर ओसिल, आर यीशुक कुछ पूछवार आगुते, यीशु वहाक पूछिल, “तुई की सोचेछिस शिमोन? दुनियाँर राजाला कहार लिकिन से खजना लिछे, अपना बेटालार लिकिन से, ना दोसरा लोकेर लिकिन से?” २६ पतरस जवाब दिले,

“दोसरा लोकेर लिकिन से।” उखुना यीशु वहाक कोहले, तब त बेटाक दुवा नी होचे। २७ तहारो पर जसे कि वरा हमसाक बदनाम नी करे, वहीलाते तुई अपना छिपखान समुन्द्रोत फिका, आर जैडा माछ पहिले उठबे, उडार मुखखान खोलिस, तुई एकटा चानीर सिक्का पाबो। तुई इडा सिक्का मोर तने आर तुई अपनार तने उसाक खजना दे दिस।

स्वर्ग-राजोत सबसे बोड़ो के

(मरकुस ९:३३-३७; मरकुस ९:४२-४८; लूका ९:४६-४८; १७:१-२)

१८ वहार बाद चेलाला यीशुर लिकिन ओसे वहाक पूछिल, “स्वर्ग-राजोत सबसे बोड़ो के छे?” १ यीशु एकटा छोटो छुवाक जाब दे आनिल, आर वहाक चेलालार बीचोत थाड़ो करे दिले ३ आर कोहले, “मुई तुमसाक सच कोहची, जब तक तुम्हरा अपना मन बदली करे छोटो छुवालार मान्दी नी होभेन, तब तक तुम्हरा स्वर्ग-राजोत ढुकवा नी पारभेन। ४ जहाँय अपना-आपोक इडा छोटो छुवार मान्दी सीधा-साधा बनाछे, वहाँय स्वर्ग-राजोत सबसे बोड़ो होबे। ५ जहाँय इकिसम एकटा छोटो छुवाक मोर नामे ग्रहण करछे, वहाँय मोक ग्रहण करछे।”

पाप करवार परीक्षा

६ जैला छोटो छुवा मोर पर विश्वास करछे, उलार भीतर से अगर कोय लोक कहाको पाप कराछे, त वहार गलात एकखान बोड़ो पत्थल बान्हे

भारी समुन्द्रोत डुबाय देना अच्छा छे। ७ हाय तुमसार पर! क्याँकि दुनियाँत इकिसम चीज छे, जैला लोकोक पाप कराछे। पाप करवार परीक्षा जरूर ओसबे, मगर उडा लोकेर पर श्राप छे, जहाँय पाप कराछे। ८ अगर तोर हाथखान या तोर पाँखान तोक पाप कराछे, त तुई उखानोक काटे फेके दे, क्याँकि दुईखान हाथ आर दुईखान पाँ ने हमेशा जलनेवाला आगिनोत जाना से अच्छा छे कि लुल्हा या नेंगरा हंय स्वर्गोत जईस। ९ अगर तोर आँखला तोक पाप कराछे, त उलाक निकलाय फेके दे, क्याँकि दुईडा आँख ले नरकेर आगिनोत जाना से काना हंय स्वर्गोत जाना तुमसार तने अच्छा छे।

हड़ाल भेड़ार मिसाल

(लूका १५:३-७)

१० सावधान रहेन, इला छोटो छुवार भीतर से तुम्हरा कहाको बेकार ना समझेन। मुई तुमसाक कोहची, स्वर्गोत उसार फरीस्ताला हरखुना मोर स्वर्गीय-पितार आगुत हाजिर रोहचे। ११ [क्याँकि मानुषेर बेटा हड़ाल लोकलाक छभवा आर उसाक बचवा ओसिहे।] १२ तुम्हरा की सोचेछेन? अगर एकझन लोकेर एक सौडा भेड़ा रहय, आर उलार भीतर से एकटा हड़ाय जाय त वहाँय की निनानब्बेडाक पहाड़ेर पर छोड़े हड़ाल भेड़ाडाक छभवार तने नी जाबे? जरूरी जाबे। १३ मुई तुमसाक सच कोहची, अगर लोकटा हड़ाल भेड़ाडाक पाय जाछे, त वहाँय उला

નિનાનબ્બે ભેડાર તને અતેક ખુશી ની મનાબે, જત્તેક કિ ઇડા ભેડાર તને
ખુશી મનાબે, ક્યાંકિ વહાર હડાલ ભેડાડા મિલે ગેલ। ૧૪ વહી માન્દી મોર
સ્વર્ગેર પિતાર ઇચ્છા ની છે કિ ઇલા છોટો છુવાર ભીતર સે કોય નાશ હંય
જાય।

દોષી લોકેર સાથે સલૂક

૧૫ અગર તોર ભઈ તોર ખિલાફ પાપ કરે, ત તુઈ વહાર લિકિન જાય
આખલે બાત કરેક, આર વહાર ગલતીડા વહાક બતાય દે। અગર વહાંય
તોર બાતટા માને લિછે, ત તુઈ અપના ભઈક પાય ગેલો। ૧૬ મગર અગર
વહાંય તોર બાત ની માનછે, ત તુઈ આઢો એકઝન યા દુઈઝન દોસરા
લોકોક અપના સાથે લે જા, જસે કિ દુઈ યા ત્રીનઝન લોકેર ગવાહીર
સાથે હર એકટા બાતેર સચ્ચાઈ સાબિત હંય જાય। ૧૭ અગર વહાંય ઉસારો
બાત ની માનછે, ત ઇડાર બારે મંડલીક બતાવ, વહાંય અગર મંડલીરો બાત
ની માનછે, ત વહાક એકઝન અવિશ્વાસી યા ખજના લેનેવાલાર માન્દી
સમઝોક।

પ્રાર્થનાત એકમન હોના

૧૮ મુઈ તુમસાક સચ કોહચી, “જે કુછુ તુમ્હરા દુનિયાંત ઇન્કાર કરભેન,
ઉલા સ્વર્ગોત ઇન્કાર કરાલ જાબે, આર જે કુછુર તને તુમ્હરા દુનિયાંત
રાજી હોભેન, ઉલા સ્વર્ગોત મંજૂર હંય જાબે। ૧૯ ફેર મુઈ તુમસાક સચ

कोहची, अगर दुनियाँत तुमसार बीचोत दुईझन लोक एक मन हंय पितार लिकिन कोय चीज माँगभेन, त मोर पिता तुमसार तने स्वर्गोत उडा करबे। २० क्यौँकि जैठिन दुई या तीनझन मोर नामे जोड़ो होचे, मुई उसार बीचोत रोहछी।”

माफी नी देनेवालार मिसाल

२१ यहार बाद पतरस यीशुर लिकिन जाय पूछिल, “प्रभु, अगर मोर भई मोर खिलाफ पाप करते रहय, त मुई वहाक कत्तेक बार माफ करूम, सात बार की?” २२ यीशु वहाक जवाब दिले, “मुई तोक कोहची कि खाली सात बार नी बल्के सात बारेर सत्तर गुणा तक।” २३ स्वर्ग-राज इडा मिसालेर मान्दी छे, एकझन राजा छिले। एक दिना वहाँय अपना नौकरलार लिकिन से हिसाब लुवा चाहले। २४ वहाँय जैखुना हिसाब लुवा शुरू करिल, त वहार लिकिन एकझन लोकोक अनाल गेल, जहाँय दस हजार सोनार सिक्का कर्जा लिहिले। २५ वहाँय जैखुना अपना कर्जाला चुकवा नी पारिल, त वहार मालिक वहाक हुकूम दिले कि तुई अपना स्त्रीक आर बेटा-बेटी आर सब कुछ समेत अपना-आपोक बेचे दे, आर कर्ज चुकाय दे। २६ इडा सुने उडा नौकर हटुवा पारे, वहाक बिनती करे कोहले, “मोर पर दया करेक, आर सबुर करेक, मुई तोक सब कुछ चुकाय दुम। २७ वहार बात सुने राजार दिलोत दया ओसे गेल, आर वहाक माफ करे दिले, आर जवा दिले। २८ मगर वहीडा नौकर

जैखुना बाहरे गेल, वहाँय अपना एकझन नौकर साथीक देखिल, जहाँय वहार लिकिन से एक सौडा चानीर सिक्का धार लिहिले। तब वहाँय वहार गलाडा दबाय कोहले, तुई जतेला कर्जा मोर लिकिन से लिहिस सबला चुकाय दे। २९ वहीलाते वहार कर्जदार साथीडा वहार आगुत पोड़े आर वहाक बिनती करे कोहले, मोर पर दया करेक, सबुर करेक, मुई सब कर्जा चुकाय दुम। ३० मगर वहाँय वहार बिनतीडा नी सुनिल आर वहाक जेलोत डाले दिले ताकि जब तक कर्जा चुकाय नी दिछे तब तक वहाँय जेलखानाते रोहय। ३१ जैखुना वहार दोसरा साथी नौकरला इडा घटना देखिल, त वरा बहुत उदास हंय गेल, आर वरा जाय अपना मालिकोक सब कुछ बताय दिले। ३२ इडा सुने मालिक, उडा बेरहमी नौकरोक जाब दे कोहले, तुई दुष्ट नौकर छिस। तुई मोर लिकिन बिनती करिहिलो, त मुई तोर सबला कर्जा माफ करे दिनु। ३३ जैकिसम मुई तोर पर दया करनु, तोहको की तोर साथी नौकरे पर दया करवा नी होलतन? ३४ आर गोस्सार मारे वहार मालिक वहाक सजा देनेवालार हाथोत सोंपे दिले, ताकि जैखुन तक वहाँय अपना पूरा कर्जा चुकाय नी दिछे, तब तक वहाँय जेलखानाते रोहोय। ३५ ठीक यही मान्दी अगर तुम्हरा अपना भईक दिल से माफ नी करेन, त मोर स्वर्गेर पिता तुमसार हरेकझनार साथे यही किसम करबे।”

तलाकेर बारे यीशु शिक्षा

(मरकुस १०:१-१२)

१९ यीशु जैखुना इला बात बोले खतम करिल, वहाँय गलील प्रदेश से यरदन नदी पार करे यहूदिया प्रदेश पहुँचिल। २ उठिन वहार पीछू-पीछू लोकेर एकटा बोड़ो भीड़ ओसिल। यीशु उसार बेमार लोकलाक अच्छा करिल। ३ यहार बाद कुछुला फरीसी लोक यीशु लिकिन ओसिल, आर वहाक जाँच करवार तने पूछिल, “इडा की अच्छा बात छे कि एकइन लोक वहार स्त्रीर कोय भी गलती से तलाक दुवा पारे?” ४ वहाँय जवाब दिले, “तुम्हरा की पोढ़ेन नी? परमेश्वर उसाक शुरू से पुरुष आर स्त्री करे बनाहिले आर कोहिले, ५ पुरुष अपना बाप आर माँक छोड़े अपना स्त्रीर साथे मिलाल रोहबे, आर दोनोंइन मिले एकटा शरीर होबे। ६ वहीलाते वरा दुईडा नी, बल्के एकटा शरीर होबे। जहाक परमेश्वर एक साथे जोड़े दिहे, उसाक कोय लोक अलग ना करे।” ७ तब फरीसीला यीशुक पूछिल, “फेर मूसा नबी क्याँ कोहिले कि एकइन लोक लिखा-पढ़ी करे अपना स्त्रीक तलाक दुवा पारे?” ८ यीशु उसाक जवाब दिले, “तुमसार दिल कठोर हवार कारण से मूसा नबी तुमसाक अपना स्त्रीलाक तलाक दुवार अनुमति दिहिले, मगर शुरूत इकिसम नी छिले। ९ मुई तुमसाक कोहची, जहाँय अपना स्त्रीक कुकरमेर अलावा अगर कोय दोसरा गलती से तलाक दिछे, आर दोसरा स्त्रीक ब्याह करछे,

વહાંય કુકરમ કરછે। [આર જહાંય ઉડા છોડાલ સ્ત્રીક બ્યાહ કરછે, વહોં કુકરમ કરછે।”] ૧૦ ચેલાલા વહાક કોહલે, “અગર પુરુષ આર સ્ત્રીર બીચોત રિસ્તા ઇકિસમ છે, ત બ્યાહ કરના અચ્છા બાત ની છે।” ૧૧ મગર યીશુ ઉસાક કોહલે, “સબકોય ઇડા નિયમોક પાલન કરવા ની પારબે, સિરિફ વહીં પારબે, જહાક ઇડા વરદાન પરમેશ્વર સે મિલિહે। ૧૨ ક્યાંકિ કુછુલા હિજડા છે, જૈલા જનમ સે હિજડા છે, આર કુછુલા હિજડા છે, જૈલાક લોક હિજડા બનાય દિહે, આર કુછુલા ઇડા ઠાને લિહે કિ વરા સ્વર્ગ-રાજેર કામેર તને બ્યાહ ની કરબે। જહાંય-જહાંય ઇડા શિક્ષા મનવા પારબેન, વહાંય માને લોક।”

યીશુ છુવાલાક આર્શીવાદ દિછે

(મરકુસ ૧૦:૧૩-૧૬; લૂકા ૧૮:૧૫-૧૭)

૧૩ યહાર બાદ લોકલા અપના છુવાલાક યીશુ લિકિન આનિલ, કિ વહાંય ઉસાર માથાત હાથ રાખે પ્રાર્થના કરે। મગર ચેલાલા લોકલાક ધમકાલ। ૧૪ ઉખુના યીશુ કોહલે, “છુવાલાક મોર લિકિન ઓસવા દવ, ઉસાક મના ના કરો ક્યાંકિ સ્વર્ગ-રાજ યહી માન્દી લોકેર તને છે।” ૧૫ તબ વહાંય છુવાલાર પર અપના હાથ રાખે આર્શીવાદ દિલે આર ઉઠિન સે ચલે ગેલ।

एकइन धनी जवान

(मरकुस १०:१७-३१; लूका १८:१८-३०)

१६ यहार बाद एकइन लोक यीशुर लिकिन ओसे पूछिल, “गुरुजी! हमेशार जिन्दगी पवार तने मोक कुन किसम भला काम करवा होबे?”

१७ यीशु वहाक जवाब दिले, “भलाईर बारे तुई मोक क्याँ पूछेछिस? सिरिफ परमेश्वर भला छे, अगर तुई हमेशार जिन्दगी पवा चाहचिस त परमेश्वरेर हुकूमलाक मानेक।” १८ वहाँय यीशुक पूछिल, कुनला हुकूम? यीशु लोकटाक जवाब दिले, “तुई हत्या ना करिस, कुकरम ना करिस, चूरी ना करिस, आर झूठा गवाही ना दिस, १९ आर अपना माँ-बाफेर इज्जत करिस, आर अपना पड़ोसीक अपना समान प्रेम करिस।” २० उडा जवान लोक यीशुक कोहले, “इला सबलाक मुई करते ओसिही, मोक आर की करना जरूरी छे?” २१ यीशु वहाक कोहले, “अगर तुई खाँटी बनवा चाहचिस त तोर लिकिन जे कुछ छे, सबला बेचे, गरीब लोकोक दे दे, तब तोक स्वर्गोत धन मिलबे, आर तुई ओसे मोर चेला बने जा। २२ जैखुना उडा जवान इडा बात सुनिल, त वहाँय दुःखी हंय चले गेल, क्योंकि वहार बहुत धन-सम्पति छिले।” २३ तब यीशु अपना चेलालाक कोहले, “मुई तुमसाक सच कोहची, धनी लोकेर तने स्वर्ग-राजोत ढुकना कठिन छे। २४ मुई तुमसाक फेर कोहची, एकटा ऊँटोक सुईर काना दे ढुके पार करना आसान छे, मगर एकइन धनी लोकोक परमेश्वरेर राजोत ढुकना बहुत कठिन छे।” २५ जैखुना

चेलाला इडा बात सुनिल, वरा बहुत ताज्जुब करवा लागिल आर कोहले, “अगर धनी लोकलार मुक्ति नी होबे त कहार मुक्ति होबे?” २६ मगर यीशु उसार भीति देखे कोहले, “मानुष से त इडा नी हवा सकेछे, मगर परमेश्वर से सब कुछ हवा सकेछे।” २७ तब पतरस कोहले, “देखेक हमरा सब कुछ छोड़े तोर चेला बने गही, त हमसाक की मिलबे?” २८ यीशु उसाक जवाब दिले, “मुई तुमसाक सच कोहची, नया दुनियाँत, जैखुना मानुषेर बेटा अपना राजोत शान-शौकतेर राजगद्दीत बोठबे, तुम्हरा जहाँय मोर चेला बने गहेन, बारहडा राजगद्दीत बोठभेन, आर इजराएली लोकेर बारहडा बंशेर इन्साफ करभेन। २९ आर हरेकझन जहाँय अपना घर-द्वार या भाई-बहिन या माँ-बाफोक या छुवा-छोटोक या जगह-जमीनोक मोर चलते छोड़े दिहेन, वहाँय सौ गुणा बेसी पाबे, आर हमेशार जीवन पाबे। ३० मगर बहुतझन, जहाँय पहिलकार छे, वहाँय पाछूत होबे, आर जहाँय पाछूत छे, वहाँय आगुत होबे।”

दानी गृहस्थ

२० “स्वर्ग-राज एकझन गृहस्थेर मान्दी छे, जहाँय बहुत बेहाने उठे अपना अंगुरेर बगानोत काम करवार तने जोन लगवा गेल। २ वहाँय जोनलाक दिनोत एक-एक दिनार दुवार बात करिल आर उसाक अंगुरेर

बगानोत पठाय दिले। ३ वहार बाद फेर वहाँय लगभग नौ बजे बाहरे गेल
आर कुछुला जोनोक चौकोत बेकार थाड़ो रोहते देखिल। ४ वहाँय
उसाक कोहले, तुम्हरा मोर अंगुरेर बगीचात जाय काम करो, आर जैडा
मुनासीफ होबे, उडा मजदूरी तुमसाक देयाल जाबे। यहार बाद वरा काम
करवा चले गेल। ५ वहार बाद गृहस्थटा फेर बारह बजे आर तीन बजे
बाहरे गेल आर वही किसम करिल। ६ फेर वहाँय लगभग पाँच बजे
बाहरे गेल आर कुछुला जोनोक थाड़ो रोहते देखिल। गृहस्थटा उसाक
कोहले, तुम्हरा इठिन क्याँ पूराडा दिन बेकार थाड़ो हंय छेन? ७ वरा
वहाक जवाब दिले, हमसाक कोय लोक जन दुवार तने कामोत नी
लगाय। वहाँय उसाक कोहले, तुम्हराव मोर अंगुरेर बगीचात काम करवा
जाव। ८ बेलाडा डुबवार आगुत बगीचार मालिक अपना मुन्शीक कोहले,
सबला जोनोक जाब दे आर उसाक अपना मजदूरी दे दे। सबसे
पीछूकार जोनला से शुरू करे आगुकार जोनलाक मजदूरी दे दे। ९ जैला
जोनोक पाँच बजे कामोत लगाल गहिले, वरा जैखुना ओसिल, हर
एकझन एक-एक दिनार करे मजदूरी पाले। १० यहार बाद सबसे
पहिलकार जोनला जैखुना ओसिल त वरा सोचिल कि हमरा बेसी पामु,
मगर उसाक सिरिफ एक-एक दिनारे मिलिल। ११ मजदूरी मिले जवार
बाद जोनला गृहस्थटार खिलाफ बोलिल। १२ वरा कोहले, जैला जोन
पाछूत ओसिल, वरा सिरिफ एक घंटा काम करिल, मगर तुई उसाक

हमसार बराबर मजदूरी दिलो, जबकि हमरा पूरा दिन तक काम करनो, धूपोत जलनो। १३ मगर मालिक उसार भीतर से एकझनाक जवाब दिले, दोस्त, मुई तुमसार साथे कोय बेइन्साफी नी करछी, तुई की मोर साथे एक दिनार मजदूरी लुवार तने तय नी करिस? १४ तोर जैडा मजदूरी होचे, उडा तुई ले ले आर चले जा। मोर इच्छा छे कि मुई तोक जत्तेक दिनु, अतेक मुई सबसे पीछूत ओसनेवाला जोनलाको दु। १५ मोर धन-दौलतेर बारे मोर जैडा इच्छा छे, वहीडा करवार तने मोर की अधिकार नी छे? या मोर दानी हवार कारण से की तोक जलन पैदा होचे? १६ वहीलाते मुई तुमसाक कोहची, जहाँय पाछूर छे, वहाँय आगुत होबे, आर जहाँय आगुर छे, वहाँय पाछूत होबे।”

यीशु फेर अपना मौतेर बारे बताछे

(मरकुस १०:३२-३४; लूका १८:३१-३४)

१७ आर जैखुना यीशु यरूशलेम जाछिले, वहाँय अपना बारहझन चेलाक एक बगल ले गेल, आर रास्तात उसाक कोहले, १८ “देखो, हमरा यरूशलेम जाछी, आर मानुषेर बेटाक बोड़ोला पूजारीर आर शास्त्रेर ज्ञानीलार हाथोत सोंपे देयाल जाबे, आर वरा वहाक मौतेर सजई दुवार तने दुषी करबे। १९ आर वहाक गैर-यहूदीर हाथोत मजाक उड़वार तने आर कोड़ा मरवार तने आर क्रुसेर पर चढ़वार तने सोंपे दिबे। आर तेसरा दिन वहाक जिन्दा कराल जाबे।”

एकझन माँर बिनती

(मरकुस १०:३५-४५)

२० यहार बाद जबदीर स्त्री अपना बेटा याकूब आर यूहन्नाक साथे ले ओसे यीशुक प्रणाम करिल, आर कुछु माँगिल। २१ यीशु वहाक पूछिल, “तुई की चाहचिस?” वहाँय यीशुक जवाब दिले, “मोर साथे इडा वादा कर कि तोर राजोत मोर इ-दोनोंझन बेटा एकझन दहिना भीति आर एकझन बाया भीति बोठे।” २२ यीशु दोनोंझन बेटाक जवाब दिले, “तुम्हरा नी जानछेन कि तुम्हरा की माँगछेन? जैडा कटोरा मुई पीने वाला छी, उडा की तुम्हरा पीवा पारभेन?” वरा जवाब दिले, “हाँ पीवा पारमु।” २३ प्रभु उसाक कोहले, “तुम्हरा मोर कटोरा भले पीवा सकेछेन, मगर मोर दहिना भीति आर बाँया भीति बोठाना मोर काम नी, क्योंकि मोर बाफेर तरफ से, इखान जगह जहार तने तैयार कराल गहे, व्हारे तने छे।” २४ इडा सुने दसोझन चेला जब्दीर दोनोंझन बेटार पर गुस्सा हंय गेल। २५ यीशु दसोझन चेलाक अपना लिकिन जाब दे कोहले, “तुम्हरा जानेन कि गैर-यहूदी लोकेर हाकिम अपना प्रजार पर शासन करछे, आर जैला लोक बोड़ो छे, वरा दोसरा लोकेर पर अपना अधिकार जमा छे। २६ मगर तुमसार बीचोत इकिसम नी होबे। क्योंकि जहाँय कोय तुमसार बीचोत बोड़ो हवा चाहचे, वहाँय नौकर बनोक, २७ आर जहाँय तुमसार प्रधान या मालिक बनवा चहाचे, वहाँय सभारो सेवा करनेवाला बनोक। २८ जैकिसम कि मानुषेर बेटा यीशु लोकेर

लिकिन से सेवा पवार तने नी ओसे, बल्के सेवा करवार तने ओसिहिले,
आर बहुत लोकोक मुक्ति दुवार तने अपना प्राण दुवा ओसिहिले।”

दुईझन काना लोक अच्छा होचे

(मरकुस १०:४६-५२; लूका १८:३५-४३)

२९ जैखुना यीशु यरीहो शहर से निकलिल, त लोकेर एकटा बोड़ो भीड़
वहार पीछू-पीछू जवा लागिल। ३० दुईझन काना लोक रास्तार बगलोत
बोठे छिले। वरा इडा सुनिल कि यीशु जाछे, त जोर से कनाहार काटे
कहवा लागिल, “हे प्रभु! दाऊद राजार बेटा दाऊद हमसार पर दया
कर।” ३१ भीड़ेर लोकला उसाक धमकाय कोहले, “चुप रोह।” मगर वरा
आढ़ोह जोर से कनाहार काटे बोलवा लागिल, “हे प्रभु, महान राजा
दाऊदेर बेटा हमसार पर दया कर।” ३२ आर यीशु थाड़ो हंय उसाक जाब
दे कोहले, “तुम्हरा की चाहचेन? मुई तुमसार तने की करी?” ३३ वरा
यीशुक कोहले, “हे प्रभु, हमरा देखवा चाहची।” ३४ आर यीशु दया से
भरे गेल आर उसार आँखलाक लाड़िल, आर वरा वहीखुना से देखवा
लागिल आर दोनोंझन वहार पाछूत चले गेल।

यीशु राजार मान्दी यरूशलेम शहरोत दुकछे

(मरकुस ११:१-११; लूका १९:२८-४०; यूहन्ना १२:१२-१९)

२१ यीशु आर वहार चेलाला यरूशलेम शहरेर बगलोत बैतफगे गाँवोत ओसिल। उडा गाँव जैतून पहाड़ेर पर छिले। तब यीशु अपना दुईझन चेलाक इडा कोहय आगु बढाय पठाल, २ तुम्हरा आगुर गाँवडात जाव। उठिन तुमसाक एकटा गधा बन्हाल मिलबे, आर उडार साथे एकटा बच्चाव छे। उलाक खोले मोर लिकिन ले ओसो। ३ अगर तुमसाक कोय कुछु बोले त तुम्हरा कोहबेन, प्रभुक इलार जरूरत छे। आर वहाँय वहीखुना उलाक पठाय दिबे। ४ इला घटना वहीलाते घटिल जसे कि नबीर कहाल बातला पूरा हंय जाय। नबी कोहिले, ५ यरूशलेम शहरेर लोकलाक कोह, “देखेक, तुमसार राजा तुमसार लिकिन ओसछे, वहाँय सीधा छे, आर गधार बच्चार पर बोठाल छे।” ६ चेलाला गेल आर यीशु उसाक जैकिसम कोहिले, वरा वही किसम करिल। ७ वरा गधाडाक आर वहार बच्चाडाक ले ओसिल, आर अपना कपड़ालाक गधार बच्चाडार पर बिछाय दिले, आर यीशु वहार पर बोठे गेल। ८ भीड़ेर बहुतला लोक अपना-अपना कपड़ाला रास्तार पर बिछाय दिले, आर कुछुला लोक गाछेर ठल्लीलाक काटे रास्तार पर बिछाय दिले। ९ आर भीड़ेर जैला लोक वहार आगुत, आर वहार पाछूत जाछिले वरा जोर-जोर से चिल्लाय कोहचिले, “राजा दाऊदेर बेटार जय जय कार होक!

परमेश्वरेर आशीर्वाद यहार पर छे क्योंकि यहाँय प्रभुर नामे ओसछे! आसमानोत यहार जय जय कार होक।” १० आर जैखुना यीशु यरूशलेम पहुँचिल पूराडा नगरोत हलचल मचे गेल, आर लोकला कहवा लागिल “यहाँय के छे?” ११ आर भीड़ेर लोकला कहवा लागिल, “यहाँय गलील प्रदेशर नासरत शहरेर नबी, यीशु छे।”

यीशु व्यापारीलाक मंदिर से बाहर भगाछे

(मरकुस ११:१५-१९; लूका १९:४५-४८; यूहन्ना २:१३-२२)

१२ यहार बाद यीशु परमेश्वरेर मन्दिरेर सीमानार भीतरोत ढुकिल, उठिन जैला लोक किना-बेचा करछिले, वहाँय उला लोकोक भगाय दिले। आर वहाँय पैसा अदला-बदली करनेवालार टेबुलाक आर कबूतर बेचनेवालार बेंचलाक उलटाय दिले। १३ वहाँय उसाक कोहले, पवित्र शास्त्रोत इकिसम लिखाल छे, “मोर घरखानोक प्रार्थनार घर कहाल जाबे, मगर तुम्हरा इखानोक डकैतेर अड्डा बनाय दिहेन।” १४ तब काना आर नेंगड़ा लोकला यीशुर लिकिन ओसिल आर वहाँय उसाक अच्छा करे दिले। १५ मगर जैखुना बोड़ोला पूजारी आर शास्त्रेर ज्ञानीला वहार चमत्कारेर कामला देखिल आर मन्दिरोत छोटे छुवालाक दाऊदेर बेटा यीशुर जय जय कार करते सुनिल, त वरा बहुत गुस्सा हंय गेल। १६ आर वरा वहाक कोहले, “तुई कि सुनछिस नी, छुवाला की कोहचे?” यीशु उसाक जवाब दिले, “हाँ सुनछी, तुम्हरा कि शास्त्रोत कभी पढ़ेन नी, क्योंकि

मोहरे बारे लिखाल छे कि दूधखोवा छुवालार मुख से मोर जय जय होबे।” १७ यहार बाद यीशु लोकलाक छोड़े यरूशलेम शहर से बाहर चले गेल आर बैतनिय्याह गाँवत जाय रात रोहोल।

डुमरेर गाछ से शिक्षा

(मरकुस ११:१२-१४; मरकुस ११:२०-२४)

१८ बेहाने जैखुना यीशु यरूशलेम शहरोत घुरे ओसछिले, वहाक भोख लागिहिले। १९ वहीलाते वहाँय रास्तार बगलोत एकटा डुमरेर गाछ देखे उडार लिकिन गेल, मगर पत्तालाक छोड़े कोय फल नी पाले। वहाँय गाछटाक कोहले, “तोसे आर कभी फल ना होक।” आर डुमरेर गाछटा वहीखुना सुखाय गेल। २० जैखुना चेलाला इडा देखिल, त वरा ताज्जूब करवा लागिल, डुमरेर गाछटा अतेक जल्दी कसे सुखाय गेल। २१ यीशु उसाक जवाब दिले, “मुई तुमसाक कोहची, अगर तुम्हरा विश्वास करेन, आर कभी शक ना करेन, त जैकिसम मुई इडा डुमरेर गाछेर साथे करनु त तुम्हरा करवा पारभेन। इकिसम कि अगर इखान पहाड़ोक कहय देन, तुई इठिन से उठे समुन्द्रोत जाय पोड़े जा, त इडाव हंय जाबे। २२ यही किसम तुम्हरा विश्वासेर साथे जे कुछु प्रार्थनात माँगभेन, उला तुमसाक मिलबे।”

यीशु अधिकारेर बारे सवाल

(मरकुस ११:२७-३३; लूका २०:१-८)

२३ यहार बाद यीशु जैखुना मंदिरोत शिक्षा दिछिले, त बोड़ोला पूजारी आर लोकेर नेताला वहार लिकिन ओसिल, आर पूछिल, “तुई कहार अधिकार से इला काम करछिस, आर के तोक इडा अधिकार दिहे?”

२४ यीशु उसाक जवाब दिले, “मोहो तुमसाक एकटा सवाल पूछेछी, अगर तुम्हरा मोक जवाब दुवा पारभेन, त मोहो तुमसाक बतायु कि मुई कुन अधिकार से इला काम करछी। २५ यूहन्नार बपतिस्मा कहार तरफ से छिले? स्वर्गेर तरफ से छिले, ना लोकेर तरफ से?” इडा सुने वरा अपना बीचोत बहस करवा लागिल, अगर हमरा बोली कि स्वर्गेर तरफ से छिले, त वहाँय हमसाक पूछबे, “त तुम्हरा वहार बातला विश्वास क्याँनि करेन?” २६ मगर अगर हमरा कोही कि मानुषेर तरफ से छिले, त हमसाक भीड़ेर लोक से डोर छे, क्याँकि लोकला वहाक एकझन नबी मानछिले। २७ वहीलाते लोकला यीशुक जवाब दिले, “हमरा नी जानी।” तब यीशु उसाक कोहले, “मोहो तुमसाक नी कोहमु कि, मुई कहार अधिकार से इला काम करछी।”

दुईडा बेटार कहानी

२८ मुई तुमसाक एकटा किस्सा सुनाछी। तुम्हरा इडा बारे की सोचेछेन? “एकझन लोकेर दुईझन बेटा छिले। लोकटा अपना बोड़ोडा बेटार

लिकिन गेल, आर वहाक कोहले, ‘बेटा! तुई जा आर अंगुरेर बगानोत आज काम करेक।’ २९ बोड़ो बेटा जवाब दिले, ‘मुई नी जामु, मगर पाछूत वहाँय पछताल आर काम करवा चले गेल।’ ३० यहार बाद लोकटा अपना छोटो बेटार लिकिन गेल, आर वहाको वही मान्दी कोहले। उडा बेटा जवाब दिले, ‘जाछी, बाबूजी’ मगर नी गेल।” ३१ अला बताव इ दोनोंझनार भीतर से के अपना बाफेर इच्छाडा पूरा करिल? लोकला जवाब दिले, “पहिलाझन।” यीशु उसाक कोहले, “मुई तुमसाक सच कोहची, खजना लेनेवाला आर बेश्याला तुमसासे आगुत उडा राजोत ढुकबे जैठिन परमेश्वर राज करछे। ३२ क्याँकि यूहन्ना धर्मेर रास्ता बतवार तने ओसिहिले, मगर तुम्हरा वहार बात विश्वास नी करलेन, मगर खजना लेनेवाला आर बेश्याला यूहन्नार बात विश्वास करिल। यहा तक कि तुम्हरा जैखुना उसाक देखलेन, तहारो पर वहार पर विश्वास नी करलेन।”

दुष्ट ठिकेदारेर किस्सा

(मरकुस १२:१-१२; लूका २०:९-१९)

३३ एकटा दोसरा किस्सा आढ़ो सुनोव, एकझन गृहस्थ छिले। वहाँय एकटा अंगुरेर बगान लगाल, आर उडार चारो भीति बेरहा बान्हिल, आर यहार तने एकटा रस जमा करवार खाद खुदिल। आर एकटा पहरा दुवार तने ऊँचा मचान बनाल। आर बगानडाक ठिकेदारलार हाथोत सोंपे दे

एकटा दूर देशोत चले गेल। ३४ जैखुना फलेर समय नजदीक चले ओल, वहाँय अपना नौकरलाक फलेर तने ठिकेदारलार लिकिन पठाल। ३५ मगर ठिकेदारला मालिकेर नौकरलाक धरे कहाको मारिल, आर कहाको जान से मारे दिले, आर कहाको पत्थल दे मारिल। ३६ यहार बाद मालिक अपना दोसराला नौकरोक पठाल। आर ठिकेदारला उसाको वही किसम करिल। ३७ यहार बाद मालिक अपना बेटाक उसार लिकिन इडा समझे पठाल कि वरा मोर बेटार खातिर-मानिन करबे। ३८ मगर जैखुना ठिकेदारला देखिल कि यहाँय त बेटा छे, वरा अपना बीचोत कोहले, “यहाँय त मालिकेर धन-दौलतेर अधिकारी छे, ओसो हमरा यहाको मारे फिकाई आर बाफेर संपत्ति ले ली। ३९ आर वरा वहाको अंगुरेर बगान से बाहरे फेके दिले, आर वहाक जान से मारे दिले। ४० जैखुना अंगुरेर बगानेर मालिक ओसबे वहाँय ठिकेदारलाक की करबे?” ४१ लोकला यीशुक जवाब दिले, “वहाँय उला दुष्ट बदमाश ठिकेदारलाक धरे बेरहमी से मारे खतम करे दिबे, आर अपना अंगुरेर बगानडाक दोसराला ठिकेदारोक दे दिबे, जैला ठीक समय वहाक फसल बाँटे दिबे।” ४२ यीशु उसाक कोहले, “तुम्हरा की मसीहार बारे परमेश्वरेर वचनोत नी पढ़ेन? जैडा कोहचे, ‘जैखान पत्थलोक राजमिस्त्रीला बेकार समझे फेके दिहिले, वहीखान पत्थल घरखानेर कोनार पत्थल बने गेल, इखान काम प्रभुर तरफ से होल, जैडा हमसाक

पसंद छे।” ४३ वहीलाते मुई तुमसाक कोहची, “परमेश्वरेर राजोक तुमसार लिकिन से ले लियांल जाबे, आर दोसरा लोकोक देयांल जाबे, जैडा यहार फल पैदा करबे। ४४ [आर जैला लोक इखान पत्थलेर पर गिरबे, आर वहाँय चकनाचूर हंय जाबे, आर इखान पत्थल जहार पर गिरबे, वहाक पिसे खतम करे दिबे।”] ४५ जैखुना बोड़ोला पूजारी आर फरीसीला यीशुर कहानीला सुनिल, वरा बुझवा पारिल कि यीशु हमसार बारे कोहचे। ४६ वहीलाते वरा यीशुक कैद करे लुवा चाहचिले, मगर वरा भीड़ेर लोकलाक देखे डोराय गेल, क्योंकि लोकला यीशुक एकझन नबी मानछिले।

ब्याहार भोजेर मिसाल

(लूका १४:१५-२४)

२२ यीशु फेर बोड़ोला पूजारीक आर लोकेर नेतालाक एकटा किस्सा सुनाले, २ “स्वर्ग-राज एकझन राजार मान्दी छे, जहाँय अपना बेटार ब्याहत लोकोक निमंत्रण दिले। ३ उडा भोजोत निमंत्रण देयांल लोकलाक जाब दुवार तने, राजा अपना नौकरलाक पठाल, मगर वरा ओसवा नी चाहले। ४ वहाँय फेर दोसराला नौकरोक इडा कोहय पठाल, निमंत्रण देयांल लोकलाक कोहव, ‘देखो, भई, राजार घरेर ब्याहार भोजेर खाना तैयार करे लियांल गहे। पाला-पुशा पशुलाक भोजेर तने काटे दियांल गहे, आर सब कुछु तैयार हंय गहे, तुम्हरा ब्याहार भोजोत

ओसो।’ ५ मगर उला लोक उसार बातोत कोय ध्यान नी दिले, कोय-कोय अपना खेतोत काम करवा गेल त, कोय-कोय अपना कारोबार करवा चले गेल। ६ बाँकी दोसराला लोक, राजार नौकरलाक धरे अपमान करिल, आर उसाक मारे फिकाल। ७ इडा देखे राजा बहुत गुस्सा हंय गेल, आर वहाँय अपना फौज पठाल, आर उला खूनी लोकोक नाश करे दिले, आर उसार नगरटाक जलाय दिले। ८ यहार बाद राजा अपना नौकरलाक कोहले, ‘ब्याहार भोज त तैयार छे, मगर जैला लोकोक दावत देयाल गहिले, उला दावतेर लायक नी छिले, ९ अलाय तुम्हरा रास्तार चौकलात जाव, आर जतेला लोकोक पाछेन, सभाको ब्याहार भोजोत बुलाय आनो।’ १० यहार बाद नौकरला रास्तार चौकलात गेल, आर अच्छा आर खराब सभाको व्यवहार भोजोत बुलाय आनिल, आर ब्याहार घरखान मेहमान लोक से भरे गेल। ११ मगर जैखुना राजा मेहमानलाक देखवार तने भीतरोत ओसिल त उठिन वहाँय एकझन मेहमानोक देखिल कि वहाँय ब्याहार भोजेर कपड़ा पिन्हाल नी छे। १२ राजा वहाक पूछिल, ‘हे दोस्त, तुई ब्याहार कपड़ा बिना पिन्हें कसे करे भोजोत ओसिहिस?’ इडा बात सुने लोकटार मुख बन्द हंय गेल। १३ यहार बाद राजा अपना नौकरलाक हुकूम दिले, ‘यहार हाथ-पाँलाक बान्हे, अन्हारोत फेके दव। उठिन वहाँय तकलीफेर मारे कानबे, आर तकलीफेर मारे दाँत पिसबे।’” १४ तहार बाद यीशु बोलिल, “स्वर्ग-राजेर

तने बहुतझनाक निमंत्रण देयाल गहे, मगर कम लोकोक चुने लियाल गहे।”

महाराजाक खजना दुवार बारे

(मरकुस १२:१३-१७; लूका २०:२०-२६)

१५ यहार बाद फरीसी दलेर लोकला उठिन से चले गेल। आर इडा बात तय करिल कि यीशुक कसे करे वहारे अपना बातोत फँसाल जाय।
१६ आर वरा अपना चेलालाक हेरोदेश राजार दलेर लोकलार साथे यीशुर लिकिन इडा कोहय पठाल, “गुरुजी हमरा जानी कि तुई सच्चा छिस, आर तुई परमेश्वरेर रास्तार बारे सच्चाईर साथे सीखाछिस। कोय लोकेर परवाह नी करछिस, क्योंकि तुई कोय लोकेर मुख देखे बिचार नी करछिस। १७ अला तुई बता, नियम मुताबिक रोम देशेर महाराजाक खजना दुवा लागे ना नी? तुई की कोहचिस?” १८ मगर यीशु उसार मनेर बुरा बिचार समझे गेल आर उसाक कोहले, “ऐ कपटीला! तुम्हरा मोक क्याँ जाँच करछेन? १९ खजना दुवार सिक्काडाक मोक देखाव।” आर वरा वहार लिकिन एकटा सिक्का आनिल। २० यीशु उसाक पूछिल, इडा सिक्कार पर कहार तस्वीर आर कहार मोहर छे? २१ लोकला जवाब दिले, “महाराजार छे।” तब यीशु उसाक कोहले, “जैला महाराजार छे उला महाराजाक दव, मगर जैला परमेश्वरेर छे, उला परमेश्वरोक दोव।”

२२ यीशुर इला बात सुने वरा हैरान हंय गेल, आर वरा वहाक छोड़े चले गेल।

मुर्दा से जिन्दा हवार बाद शादी-ब्याह नी

(मरकुस १२:१८-२७; लूका २०:२७-४०)

२३ सदूकी दलेर लोकला विश्वास करछे कि मुर्दा लोक जिन्दा हंय नी उठबे। वरा यीशुर लिकिन ओसे पूछिल, २४ “हे गुरुजी मूसा नबी कोहिले, ‘अगर कोय लोक बिना बच्चा जन्माय मोरे जाय त अपना विधवा भाभीक शादी करे, आर अपना भईर तने बच्चा जन्मवा पारे।’ २५ हमसार इठिन सातझन भई छिले। पहिलाझन भई ब्याहा करिल, आर बिना बच्चा जन्माय मोरे गेल अपना स्त्रीक अपना भईर तने छोड़े चले गेल। २६ यही मान्दी करे दोसराझन आर तेसराझन आर एक-एक करे सबला छोटो भई शादी करिल। २७ आर इकिसम होल कि एक-एक करे सबकोय मोरे गेल, वहार बाद उडा स्त्री लोको मोरे गेल २८ अला इडा बता कि मुर्दा से जिन्दा हंय उठवार बाद, उला सतोझन भईर भीतर से उडा स्त्री कहार पत्नी होबे? क्याँकि वहाँय त सबला भईर पत्नी हंय गहिले।” २९ यीशु उसाक जवाब दिले, “तुम्हरा गलती करछेन, क्याँकि तुम्हरा ना त पवित्र शास्त्र जानेन, आर ना परमेश्वरेर शक्तिक जानेन। ३० क्याँकि जैखुना मुर्दा लोक जिन्दा हंय उठबे, उखुना वरा ना त शादी-ब्याहा करबे, आर ना कहारो शादी-ब्याहा कराल जाबे, क्याँकि वरा

स्वर्गोत परमेश्वरेर फरीस्तालार मान्दी होबे। ३१ मौत से जिन्दा हंय उठवार बारे तुम्हरा कि परमेश्वरेर वचनोत पोढ़ेन नी कि परमेश्वर शास्त्रोत की कोहये? इब्राहिम, इसहाक आर याकूबेर मरवार बहुत साल बाद परमेश्वर मूसा नबीक बोलिहे कि, ३२ मुई इब्राहिमेर, इसाहकेर, आर याकूबेर, परमेश्वर छी। वहीलाते वरा जिन्दा छे क्योंकि परमेश्वर जिन्दा लोकेर परमेश्वर छे, मगर मुर्दा लोकेर परमेश्वर नी छे।” ३३ भीड़ेर लोकला इडा शिक्षा सुने हैरान हंय गेल।

सबसे बोड़ो हुकूम

(मरकुस १२:२८-३४; लूका १०:२५-२८)

३४ मगर जैखुना फरीसी दलेर लोकला सुनिल कि यीशु सदूकी दलेर लोकलार मुख बन्द करे दिहे, त फरीसी लोकला दल बान्हे ओसिल। ३५ उसार बीचोत एकझन वकील छिले, वहाँय यीशुक जाँच करवार तने एकटा सवाल पूछिल, ३६ “गुरुजी नियम-कानूनेर भीतरोत सबसे बोड़ो हुकूम कुनडा छे?” ३७ यीशु वहाक जवाब दिले, “तुई अपना प्रभु परमेश्वरोक पूरा मन से, पूरा आत्मा से आर पूरा बुद्धि से प्रेम करबो। ३८ यहीडा सबसे बोड़ो आर पहिला हुकूम छे। ३९ आर दोसराडा इकिसम छे, तुई अपना पड़ोसीक अपना मान्दी प्रेम करेक। ४० यही दुईडा हुकूमेर मुताबिक सबला नियम-कानून आर नबी लोकेर शिक्षा पूरा होचे।”

मसीहा दाऊदेर बेटा आर दाऊदेर प्रभु छे

(मरकुस १२:३५-३७; लूका २०:४१-४४)

४१ जैखुना फरीसी दलेर लोकला एक साथे जोड़ो हंय छिले, यीशु उसाक एकटा सवाल पूछिल। ४२ “तुम्हरा मसीहार बारे की सोचेछेन? वहाँय कहार बेटा छे?” वरा यीशुक जवाब दिले, “वहाँय त राजार दाऊदेर बेटा।” ४३ यीशु उसाक कोहले, “तुम्हरा मसीहाक राजा दाऊदेर बेटा कोहचेन, तब क्याँ दाऊद पवित्र आत्मार मदद से मसीहाक अपना प्रभु कोहचे? राजा दाऊद वचनोत कोहचे, ४४ परमेश्वर मोर प्रभुक कोहचे, तुई मोर दहिना भीति बोठेक, जब तक कि मुई तोर दुश्मनलाक तोर पाँर तोलोत करी नी दिछी? ४५ आर दाऊद इकिसम करे मसीहाक प्रभु कोहचे त मसीहा कसे करे दाऊदेर बेटा हवा पारे?” ४६ इडा सुने कोय लोक वहाक एकटाव जवाब दुवा नी पारिल। उदिन से कोय लोक वहाक आर कोय सवाल पूछवार हिम्मत नी पाले।

शास्त्रेर ज्ञानीलार आर फरीसीलार कपट

(मरकुस १२:३८-४०; लूका ११:३९-५२; २०:४५-४७)

२३ यहार बाद यीशु भीड़ेर लोकलाक आर चेलालाक कोहले, २ “शास्त्रेर ज्ञानीला आर फरीसीलार लिकिन मूसा नबीर नियम-कानून सिखवार अधिकार छे। ३ वहीलाते वरा जे कुछु तुमसाक कोहचे, उलाक तुम्हरा करो आर मानो। मगर जैला वरा करछे, उलाक ना करो, क्योंकि

वरा त सिखाछे, मगर वही मुताबिक काम नी करछे। ४ वरा नियम-कानूनेर भारी बझाक बान्छे, जैडाक ठोना मुशिकल छे। उलाक वरा लोकेर काँधेर पर लादे दिछे, मगर उठवार तने वरा अपना अंगुलडाव नी लगाछे। ५ वरा अपना सब काम लोकोक देखवार तने करछे, आर वरा अपना ताबीजलाक बोड़ो करे बनाछे, आर उलार भीतरोत परमेश्वरेर वचन लिखछे, आर अपना बाँहात आर कपालोत बान्हेछे, आर अपना कपड़ात बोड़ो-बोड़ो झालर लगाछे। ६ भोज खवारखुना वरा अच्छा-अच्छा आसनोत आर प्रार्थना-घरोत सबसे अच्छा जगहोत बोठना पसन्द करछे। ७ आर हाट-बजारोत लोकेर लिकिन से सलाम पाना आर लोकेर मुख से अपना-आपोक गुरु कहलाना वरा पसन्द करछे। ८ मगर तुम्हरा अपना-आपोक गुरु ना समझेन, क्योंकि तुमसार एकेझन गुरु छे, आर तुम्हरा आपसोत भई छेन। ९ इडा दुनियाँत तुम्हरा कोय दोसराझनाक बाप ना कोहेन, क्योंकि तुमसार एकेझन बाप छे, जहाँय स्वर्गोत रोहचे। १० तुम्हरा अपना-आपोक अगुवा ना कोहेन, क्योंकि तुमसार एकेझन अगुवा छे, आर जहाँय मसीहा छे। ११ जहाँय तुमसार बीचोत सबसे बोड़ो हवा चाहचे, वहाँय तुमसार नौकर होक। १२ जहाँय अपना-आपोक बोड़ो कोहचे, वहाक छोटी बनाल जाबे, आर जहाँय अपना-आपोक छोटी कोहचे छे, वहाक बोड़ो बनाल जाबे।”

शास्त्रेर ज्ञानीलाक आर फरीसीलाक धिक्कार!

१३ ऐ शास्त्रेर ज्ञानीला आर फरीसीला, तुम्हरा कपटी छेन। हाय तुमसार पर! क्योंकि तुम्हरा मानुषेर तने स्वर्ग-राजेर दरवाजाडा बन्द करे राखछेन। तुम्हरा ना त खुद ढुकछेन, आर ना त कहाको ढुकवा दिछेन। १४ [ऐ शास्त्रेर ज्ञानीला आर फरीसीला तुम्हरा कपटी छेन, तुमसाक धिक्कार, तुम्हरा राँडीलार धन-सम्पतिक लूटे लिछेन, आर लोकोक देखवार तने, बहुत लम्बा-लम्बा प्रार्थना करछेन। वहीलाते तुमसाक बहुत बेसी सजा मिलबे।] १५ ऐ शास्त्रेर ज्ञानीला आर फरीसीला तुम्हरा कपटी छेन, हाय तुमसार पर! तुम्हरा एकझनाक अपना रास्तात अनवार तने पूरा दुनियाँडाक छाँके दिछेन, आर जैखुना वहाँय तुमसार रास्तात चले ओसछे, वहाक तुम्हरा नरक जवार तने दुईगुना बनाय दिछेन। १६ ऐ काना अगुवाला, हाय तुमसार पर! तुम्हरा कोहचेन, “अगर कोय लोक मंदिरेर नामोत कसम खाचे, त यहात कोय नोकसान नी छे, मगर अगर कोय लोक मंदिरेर सोनाखानेर तने कसम खाचे त, वहाँय अपना कसमेर कारण से बन्हाल रोहबे। १७ तुम्हरा काना आर मूर्ख छेन, तुम्हरा बताव कि कुनखान चीज बोड़ो छे? सोनाखान, ना मंदिरटा, क्योंकि मंदिरटाय सोनाखानोक पवित्र कराछे? १८ आर तुम्हरा यहोडा कोहचेन कि अगर कोय थान्डार नामे कसम खाचे, त यहात कोय हरजा नी छे, मगर कोय अगर थान्डार पर चढ़ाल चीजेर बारे कसम खाचे त

वहाँय अपना कसम मुताबिक बन्हाल रोहचे। १९ तुम्हरा काना छेन,
तुम्हरा बताव कुनखान चीज बोड़ो छे, थानडार पर चढ़ाल दान ना
थानडा, क्योंकि थानडाय दानडाक पवित्र करछे।” २० वहीलाते जहाँय
थान्डार नामे कसम खाचे, वहाँय थानडार आर वहार पर चढ़ाल जतेला
चीज छे सबलार कसम खाचे। २१ जहाँय मंदिरेर नामे कसम खाचे,
वहाँय मंदिरेर आर मन्दिरेर भीतरोत रहने वालारो कसम खाचे। २२ आर
जहाँय स्वर्गेर नामे कसम खाचे, वहाँय परमेश्वरेर सिंहासनेर, आर उडार
पर बोठने वालारो कसम खाचे। २३ ऐ शास्त्रेर ज्ञानीला आर फरीसीला,
तुम्हरा कपटी छेन, हाय तुमसार पर! तुम्हरा पुदिना, आर सोंप, आर
जीरार दसमांश दिछेन, मगर मूसार नियम-कानूनेर खास बातलाक
ठुकराय दिहेन, जैला कि न्याय, दया, आर विश्वास छे। तुमसाक इला
काम त करवा होलतन, आर उला बातको छोड़वा नी होलतन।
२४ तुम्हरा काना अगुवा छेन, तुम्हरा मच्छड़लाक छाँके अलग करे
दिछेन, मगर ऊँटलाक गिले खाय लिछेन। २५ ऐ शास्त्रेर ज्ञानीला आर
फरीसीला तुम्हरा कपटी छेन, हाय तुमसार पर! तुम्हरा थाली-बाटीलाक
ऊपरे-ऊपरे मजेछेन, मगर भीतरोत गंदगी आर मैला से भराल रोहचे।
२६ ऐ काना फरीसीला, तुम्हरा पहिले थाली-बाटीलाक भीतर से माजो,
तब उलार बाहरे-बाहरे साफ हंय जाबे। २७ ऐ शास्त्रेर ज्ञानीला आर
फरीसीला तुम्हरा कपटी छेन, हाय तुमसार पर! तुम्हरा चुना लेपाल

कबरेर मान्दी छेन, उला त बहार से सुन्दर देखाल जाछे, मगर उलार भीतरोत मराल लोकेर हड्डी आर गंदगी भराल छे। २८ ठीक वही मान्दी तुम्हरा लोकेर लिकिन बहार से धर्मी देखा जाछेन, मगर भीतर से तुम्हरा कपट आर बुराई से भराल छेन।

शास्त्रेर ज्ञानीलार आर फरीसीलार पर सजा

२९ ऐ शास्त्रेर ज्ञानीला आर फरीसीला तुम्हरा कपटी छेन, हाय तुमसार पर! तुम्हरा नबी लोकेर कबरलाक बनाछेन आर धर्मी लोकेर कबरलाक सजा छेन। ३० तुम्हरा कोहचेन, “हमरा अगर अपना बाप-दादोलार दिनोत रोहनुतेन, त नबी लोकेर खून करवार तने हमरा उसार साथ नी दिनुतन।” ३१ इडा से तुम्हरा अपनार खिलाफ खुद गवाही दिछेन, कि तुम्हरा नबी लोकेर खून करनेवालार औलाद छेन। ३२ वहीलाते तुम्हरा अला अपना बाप-दादोर पापेर खौंचाला कामोक पूरा करे दोव। ३३ ऐ साँपला आर साँपेर बच्चाला, तुम्हरा कसे करे नरकेर सजा से बचभेन? ३४ वहीलाते मुई तुमसार लिकिन नबी लोकोक आर बुद्धिमान लोकोक, आर शास्त्रेर ज्ञानी लोकोक पठाछी। उलार भीतर से कुछुलाक तुम्हरा जान से मारे फिकाभेन आर कुछुलाक क्रुसेर पर चढ़ाभेन, आर कुछुलाक प्रार्थना घोरोत कोड़ा दे मारभेन, आर एक शहर से दोसरा शहर तक पीटाय ले बेराभेन। ३५ बहुत पहिले धर्मी हाबिल से ले बिरिक्याहर बेटा जकरयाह नबी तक, जतेला धर्मी लोकेर खून बहाल

गहिले, उला सबला खूनेर भार तुमसार माथार पर पोड़बे। जकरयाह नबीक तुम्हरा मन्दिरेर आर थान्डार बीचोत मारे फिकाहिलेन। ३६ मुई तुमसाक सच कोहची इला सबला बात इडा पीढ़ीर पर पूरा हंय जाबे।

यरूशलेमेर तने विलाप

(लूका १३:३४-३५)

३७ “ऐ यरूशलेम शहर! तुई नबीलाक मारे फेके दिछिस। जैला लोकोक तोर लिकिन पठाल जाछे, उसाक तुई पत्थल दे मारे फेकाछिस। बहुत बार मुई चाहनु कि जैकिसम एकटा मुर्गी अपना बच्चालाक अपना डेनार तोलोत राखछे, ठीक वही किसम मोहो चाहनु कि तोर छुवालाक एकछिन जोड़ो करे राखी। मगर तुई नी चाहलो कि मुई इडा करी। ३८ देख, तुमसार घर तुमसार नजरेर आगुत उजरे पोड़े रोहबे। ३९ मुई तुमसाक कोहची, तुम्हरा मोक उखुन तक देखवा नी पारभेन, जैखुन तक तुम्हरा इडा नी कोहबेन, ‘परमेश्वरेर आशीर्वाद वहार पर छे जहाँय प्रभु परमेश्वरेर नामे ओसछे।’”

मन्दिरेर विनाशेर भविष्यवाणी

(मरकुस १३:१-३; लूका २१:५-७)

२४ जैखुना यीशु मंदिरटा से निकले जाछिले, उखुना वहार चेलाला मंदिरटार बनावट देखवार तने वहार लिकिन ओसिल। २ यीशु उसाक

बोलिल, “अला तुम्हरा इला सबला देखेन। मगर मुई तुमसाक सच कोहची, ‘इठिन पत्थलेर पर पत्थल नी रोहबे, क्याँकि सबलाक गिराय देयाल जाबे।’” ३ जैखुना यीशु जैतून पहाड़ेर पर बोठे छिले, वहार चेलाला वहाक एक बगले ले जाय पूछिल, “हमसाक बता कि इडा घटना कब घटबे, आर तोर ओसवार आर दुनियाँडार खतम हवार चिन्ह की होबे?”

दुःख-मुसीबतेर शुरूवात

(मरकुस १३:४-१३; लूका २१:८-१९)

४ यीशु चेलालाक जवाब दिले, “तुम्हरा हुँसियार रोहेन, जसे कि तुमसाक कोय भटकाय ना दे, ५ क्याँकि बहुतझन मोर नामे ओसबे, आर कोहबे, मुई मसीहा छी, आर बहुतझनाक भटकाय दिबे। ६ आर तुम्हरा लड़ाईर बात सुनभेन, आर लड़ाईर अफवाह सुनभेन, मगर तुम्हरा ना डोरायन, क्याँकि इला बातेर होना जरूरी छे। यहार इडा माने नी छे कि आखरी समय चले ओसिहे। ७ देशेर खिलाफ देश आर राजेर खिलाफ राज चढ़ाई करबे, आर जगह-जगह आकाल पोड़बे आर भीचाल होबे। ८ मगर इला घटना सिरिफ तकलीफेर शुरूवात छे। ९ तब लोकला तुमसाक दुःख दुवार तने हाकिमेर हाथोत पकड़ाय दिबे, आर मारे फिकाबे, आर मोर नामेर चलते सबला लोक तुमसार साथे दुश्मनी करबे। १० आर उखुना बहुतझन मोर पर विश्वास करवा छोड़े दिबे, आर

आपसोत एक-दोसराझनाक धोखा दे दुश्मनेर हाथोत धराय दिबे, आर एक-दोसराझना से दुश्मनी करबे। ११ आर बहुतझन झूठा नबी उठबे, आर बहुतझनाक गलत रास्तात ले जाबे। १२ आर बुराई बढे जवार कारण से बहुत लोकेर प्रेम ठंडा हंय जाबे। १३ मगर जहाँय आखरी तक मोर पर विश्वास धरे रोहबे, वहीं बचबे। १४ स्वर्ग-राजेर खुश-खबरी दुनियाँर सबला देशेर लोकेर लिकिन प्रचार कराल जाबे, आर तब आखरी समय चले ओसबे। १५ दानिएल नबी एकखान भयानक विनाशकारी जिनीसेर बारे बोलिहिले। जैखुना तुम्हरा उखान विनाशकारी भयानक चीजोक मंदिरेर पवित्र जगहोत थाड़ो देखभेन (पढ़नेवाला समझे लोक), १६ तब जहाँय यहूदिया प्रदेशोत छे, वरा पहाड़ेर पर भागे जाक, १७ जहाँय घरेर छतेर पर छे, वहाँय अपना समान लुवार तने नीचानोत ना नाभेक। १८ आर जहाँय खेतोत छे, वहाँय अपना चादर लुवार तने घुरे ना जाक। १९ उडा समय जहाँय गर्भवती छे, आर जहाँय छुवालाक दूध खिलाछे, उसार तने अफसोसेर बात छे क्योंकि उखुना उसार पर बहुत दुःख पोड़बे। २० तुम्हरा प्रार्थना करो कि जैखुना तुमसाक भगवा होबे उडा जाड़ेर मौसम या आरामेर दिन ना होय। २१ क्योंकि उखुना भयंकर बिपत्ति पोरबे, जैडा कि दुनियाँर शुरू से ले अला तक नी होय, आर ना वहार बाद कभी होबे।”

मानुषेर बेटार दोबारा ओसवार बात

२२ “आर उला तकलीफेर दिनोक अगर परमेश्वर कम करे नी दिलतेन, त कोय मानुष नी बचिलतेन। मगर परमेश्वरेर चुनाल लोकलार कारण से उला तकलीफेर दिनोक परमेश्वर कम करे दिबे। २३ उखुना अगर कोय तुमसाक कोहये, देखो, मसीहा इठिन छे, या उठिन छे, त विश्वास ना करेन। २४ क्यौँकि झूठा मसीहा आर झूठा नबी उठबे, आर बोड़ो-बोड़ो चमत्कारेर काम देखाबे, आर इकिसम होवा पारे कि वरा परमेश्वरेर चुनाल लोकलाको भटकाय दे। २५ देखो, मुई तुमसाक पहिले से इला सबला बात कोहय दिनु। २६ वहीलाते लोकला अगर तुमसाक कोहय, देखो, ‘वहाँय सुनसान इलाकात छे,’ त तुम्हरा बाहरे ना निकलेन। अगर बोले ‘वहाँय घरेर भीतरोत छे,’ त विश्वास ना करेन। २७ लोक जैकिसम आसमानोत एक भीति से दोसरा भीति बिजली चमकिते देखछे, वही किसम लोक मानुषेर बेटाक ओसते देखबे। २८ लोक जैठिन गिधिनोक उड़ते देखछे, त पता चलछे कि उठिन कोय जानवर मोरे पोड़छे। २९ भयंकर बिपत्तिर तुरन्त बाद बेलाडा अन्हार हंय जाबे, आर चाँदडा अपना रेशनी नी दिबे, आर आसमानेर ताराला पोड़बे, आर आसमानेर शक्तिक डमाडोल करे देयाल जाबे। ३० यहार बाद मानुषेर बेटा यीशुर चिन्ह आकाशोत देखा दिबे, आर तब दुनियाँर सबला लोक मातम मनाबे। वरा मानुषेर बेटाक शक्तिर साथे आर

महिमार साथे मेघेर पर ओसते देखबे। ३१ आर वहाँय अपना फरीस्तालाक जोरदार शंखेर आवाजेर साथे पठाबे, आर फरीस्ताला परमेश्वरेर चुनाल लोकलाक दुनियाँर चारो भीति से जोड़ो करबे।”

डुमरेर गाछेर मिसाल

३२ इडा बातेर सबक तुम्हरा डुमरेर गाछ से सीखो। जैखुन तक डुमरेर ठल्लीला खीजा रोहचे आर उलात नया पत्ता निकलेछे, तुम्हरा जानेलिछेन कि गर्मीर मौसम नजदीक चले ओसिहे। ३३ यही मान्दी जैखुना तुम्हरा इला घटनाक घटते देखभेन, त तुम्हरा जाने लेन कि मानुषेर बेटार ओसवार समय नजदीक ओसे गहे, इकिसम कि वहाँय दरवाजाखानेर बगलते छे। ३४ मुई तुमसाक सच कोहची, जैखुन तक इला बात पूरा नी हंय जाछे, तबतक इडा पीढ़ी खतम नी होबे। ३५ आसमान आर दुनियाँडा टले जाबे, मगर मोर बात कोयखुना नी टलबे।

मानुषेर बेटार ओसवार दिनेर बारे

(मरकुस १३:३२-३७; लूका १७:२६-३०; १७:३४-३६; १२:४१-४८)

३६ मगर उडा दिनेर आर उडा समयर बारे कोय नी जानछे। इकिसम कि स्वर्गेर फरीस्तालाव नी जानछे, आर ना बेटा जानछे, मगर सिरिफ परमेश्वर पिता जानछे। ३७ जैकिसम नूहेर दिनोत दुनियाँडा सैलाब से

बिनाश होयले, आर कोय नी जानछिले कि सैलाब ओसनेवाला छे। ठीक वही किसम कोय नी जानबे कि मानुषेर बेटा कब ओसबे? ३८ जैदिन तक नूह जहाजखानोत नी ढुके, उदिन तक लोकला खान-पान करछिले, आर ब्याह-शादी करछिले। ३९ आर वरा उखुना जनवा पारिल, जैखुना सैलाब ओसे उसाक सभाको भसाय ले चले गेल। ठीक वही किसम मानुषेर बेटा यीशु कोद ओसबे, इडा कहाको मालूम नी होबे। ४० उखुना दुईझन लोक खेतोत रोहबे, एकझनाक उठाय लिया ल जाबे, आर दोसराझनाक छोड़े देया ल जाबे ४१ दुईझन स्त्री लोक जाँता पिसबे। एकझनाक ले लिया ल जाबे, आर दोसराझनाक छोड़े देया ल जाबे। ४२ वहीलाते जागिल रहव, क्याँकि तुम्हरा इडा नी जानेन कि तुमसार प्रभु कुन दिन ओसबे। ४३ जैकिसम घरेर मालिकटा अगर इडा जानिलतेन कि रातोत कुनखुना चोर ओसबे, त वहाँय जागिल रोहिलतेन, आर अपना घरखानोत सिंध खोदवा नी दिलतेन। ४४ वहीलाते तुम्हराव तैयार रहेन, क्याँकि मानुषेर बेटा कुनखुना ओसबे, उडा समयर बारे तुम्हरा नी जानेन।

समझदार आर बदमाश नौकर

४५ उडा समझदार नौकर के छे, जहार पर मालिक विश्वास करछे आर वहाक अपना सबला नौकर-चाकरेर पर मनीजर बनाय दिछे जसे कि वहाँय सबला नौकर-चाकरोक सही समय खाना दे। ४६ उडा नौकर

खुशहाल होबे क्यौँकि वहार मालिक ओसे वहाक यही किसम करते देखबे। ४७ मुई तुमसाक सच कोहची, वहार मालिक अपना पूरा धन-दौलतेर देखभाल करवार जिम्मेवारी वहाक सोंपे दिबे। ४८ मगर अगर उडा नौकर बदमाश हंय जाय, आर इडा सोचे कि मोर मालिकोक ओसते देरी छे, ४९ त वहाँय अपना साथी नौकरलाक धरे मारछे आर शराबीर साथे खान-पान करछे। ५० वहार मालिक इकिसम दिनोत ओसबे, जैडा दिनेर बारे आर जैडा समयर बारे नौकरटा नी जाने। ५१ तब वहार मालिक वहाक कठिन सजा दिबे, आर वहाक कपटी लोकेर साथे राखे दिबे, जैठिन वहाँय कानबे, आर तकलीफेर मारे दाँत पिसबे।

दसइन कुमारीर मिसाल

२५ “स्वर्ग-राज इकिसम छे: एक बार दसइन कुमारी अपना-अपना मशाल लिले, आर दूल्हार साथे मुलाकात करवा गेल। २ उलार भीतर से पाँचइन कुमारी बुद्धिमान छिले, आर पाँचइन बेकूफ छिले। ३ बेकूफ कुमारीला अपना मशाल लिले, मगर अपना साथे बेसी तेल नी लिले। ४ मगर बुद्धिमान कुमारीला मशालेर साथे बेसी तेल लिले। ५ दसोइन झूमवा लागिल आर निनाय गेल क्यौँकि दूल्हार ओसते देरी होछिल। ६ मगर आध रातोत हल्ला मचिल कि दूल्हा ओसे गेल। बाहरे ओसे वहार साथे मुलेकात करो। ७ तब सबला कुमारी उठिल आर अपना-

अपना चराकलाक ठीक-ठाक करिल। ८ बेकूफला कुमारी बुद्धिमान कुमारीलाक कोहले, ‘तुमसार तेलखान से कुछु हमसाको दोव, क्योंकि हमसार मशालला घेराय जाछे।’ ९ मगर बुद्धिमान कुमारीला जवाब दिले, ‘हमसार लिकिन तुमसाक दुवार तने बेसी तेल नी होबे। वहीलाते अच्छा होबे कि तुम्हरा दूकानदारेर लिकिन जाव, आर अपना तेल किने ले ओसो।’ १० आर जैखुना वरा तेल किनवार तने गेल, तब दूल्हा चले ओल आर जैला कुमारी तैयार छिले, वरा दूल्हार साथे ब्याहर भोजेर घरोत ढुके गेल, आर दरवाजाखान बन्द करे देयाल गेल। ११ यहार बाद उ-पाँचझन बेकूफ कुमारीलाव ओसे कोहले, ‘हे मालिक! हे मालिक! हमसारो तने दरवाजाडा खोले दे।’ १२ मगर दूल्हा जवाब दिले, मुई सच-सच कोहची कि मुई तुमसाक नी जानी।” १३ मिसालडा बोलवार बाद यीशु चेलालाक कोहले, “तुम्हरा जागिल रोहेन, क्योंकि तुम्हरा नी जानेन कि मानुषेर बेटा कब घुरे ओसबे।”

सम्पतिर जिम्मेवारीर मिसाल

(लूका १९:११-२७)

१४ “स्वर्ग-राज एकझन लोकेर मान्दी छे, जहाँय सफरोत जाछे। जवार आगुत वहाँय अपना नौकरलाक जाब दे अपना धन-सम्पति उसार हाथोत सोंपे दिले। १५ एकझनाक पाँच हजार सोना सिक्का दिले। दोसराझनाक तुई हजार सोनार सिक्का दिले। आर तेसराझनाक वहाँय

एक हजार सोनार सिक्का दिले। हरेकझनाक वहार काम करवार शक्तिर मुताबिक दिले। यहार बाद वहाँय चले गेल। १६ जहाँय पाँच हजार सोनार सिक्का पाहिले, वहाँय जल्दी करे जाय उला सिक्का से व्यापार करले, आर पाँच हजार सोनार सिक्का आढो कमाले। १७ वही मान्दी जहाँय दुई हजार सोनार सिक्का पाहिले, वहाँय आढो दुई हजार सोनार सिक्का कमाले। १८ मगर जहाँय एक हजार सोनार सिक्का पाहिले, वहाँय गेल आर माटी खोदे अपना मालिकेर सोनार सिक्कालाक गाड़े राखे दिले। १९ बहुत दिन बाद उला नौकरेर मालिक ओसिल आर उसार लिकिन से हिसाब माँगिल। २० जहाँय पाँच हजार सोनार सिक्का पाहिले, वहाँय आगु बढे ओसिल, आर कोहले, ‘मालिक, तुई मोक पाँच हजार सोनार सिक्का दिहिलो, मुई आढो पाँच हजार सोनार सिक्का आमदानी करिही।’ २१ वहार मालिक वहाक कोहले, ‘शाबास। अच्छा बात। तुई एकझन ईमानदार नौकर छिस। तुई थोड़ेक चीजोत ईमानदार रोहलो। वहीलाते मुई तोक बहुत चीजेर पर अधिकार दुम। अला ओस आर तुई अपना मालिकेर साथे खुशी मना।’ २२ आर जहाँय दुई हजार सोनार सिक्का पाहिले, वहाँय आगु बढे ओसिल, आर कोहले, ‘मालिक, तुई मोक दुई हजार सोनार सिक्का दिहिलो। देखेक, मुई आढो दुई हजार सोनार सिक्का आमदानी करिही।’ २३ वहार मालिक वहाक कोहले, ‘शाबास’। अच्छा बात। तुई

ईमानदार नौकर छिस। तुई थोड़ेक चीजेर पर ईमानदार रोहलो। मुई तोक बहुतला चीजेर पर अधिकारी ठहराय दिछी। तुई अपना मालिकेर साथे खुशी मना। २४ आर जहाँय एक हजार पाहिले वहाँय ओसे कोहले, ‘मालिक, मुई जानी कि तुई एकझन कठोर लोक छिस। जैठिन तुई नी बुनछिस, उठिन से तुई काटेछिस आर जोड़ो करछिस। २५ वहीलाते मुई डोराय गहिनु, आर तोर सोनार सिक्कालाक माटीर नीचानोत गाड़े दिहिनु। तोड़ जैडा छे उडा तुई ले ले।’ २६ मगर वहार मालिक वहाक कोहले, ‘तुई बदमाश आर आलसी नौकर छिस। तुई जानिस कि मुई उठिन से काटेछी, जैठिन मुई नी बुनेछी, आर उठिन से जोड़ो करछी, जैठिन मुई अनाज साफ नी करछी। २७ तब त तोक मोर टकालाक बैकोत राखे दुवा होलतन, आर मोर ओसवार बाद मुई अपना टाकालाक सूद समेत ले लिनुतन।’ २८ वहीलाते मालिकटा अपना लोकोक कोहले, ‘यहार लिकिन से सिक्कालाक ले लव आर जहार लिकिन दस हजार सोनार सिक्का छे, वहाक दे दव। २९ क्याँकि जहार लिकिन छे, जहार लिकिन छे, वहाक आढ़ो देयाल जाबे। आर जहार लिकिन नी छे, वहार लिकिन जैडा छे, वहोडा ले लियाँल जाबे। ३० अला इडा बेकम्मा नौकरोक बाहर ले जाव आर वहाक अन्हारोत फेके दोव, उठिन वहाँय कानबे आर तकलीफेर मारे दाँत पिसबे।’”

परमेश्वरेर बिचारेर दिन

३१ “मानुषेर बेटा अपना फरीस्तालार साथे अपना शान-शौकतोत ओसबे, आर अपना महिमा से भराल राजगद्दीत बोठबे। ३२ उखुना वहार आगुत सबला देशेर लोकोक जोड़ो कराल जाबे। जैकिसम रखवाल भेड़ालाक बकरीला से अलग करछे, ठीक वही मान्दी वहाँय लोकलाक एक-दोसराइन से अलग करबे। ३३ वहाँय भेड़ालाक अपना दहिना भीति करबे, मगर बकरीलाक बायाँ भीति राखबे। ३४ राजा अपना दहिना भीतकार लोकलाक कोहबे, हे मोर पितार लोक! तुम्हरा खुशहाल छेन। तुम्हरा ओसो, आर उडा राजेर पर अधिकार करो, जैडा दुनियाँडार शुरू से तुमसार तने तैयार कराल गहे। ३५ कारण, जैखुना मुई भूखाय छिनु, तुम्हरा मोक खाना दिहिलेन। मुई प्यासा छिनु, मोक पानी खिलाहिलेन। मुई परदेशी छिनु, आर तुम्हरा मोक अपना घरोत रहवार तने जगह दिहिलेन। ३६ जैखुना मुई नेंगटाय छिनु, तुम्हरा मोक कपड़ा पिन्हाईलेन। जैखुना मुई बेमार छिनु, तुम्हरा मोर देखभाल करिहिलेन। मुई जेलखानात छिनु, तुम्हरा मोर साथे मुलेकात करवा ओसिहिलेन। ३७ तब धर्मी लोकला पूछबे, ‘हे प्रभु! हमरा तोक कुनखुना भूखाय देखिहिनु, आर तोक खिलाहिनु, या फेर प्यासा देखे पानी पिलाहिनु? ३८ हमरा तोक कुनखुना परदेशी देखे अपना घरोत ग्रहण करिहिनु? ३९ आर कुनखुना बेमार देखे आर जेलखानात देखे, तोक देखवा गहिनु?’

૪૦ ઉઘુના રાજા તુમસાક જવાબ દિબે, ‘મુઈ તુમસાક સચ કોહચી, તુમ્હરા જૈઘાન કામ મોર સબસે છોટો ભઈલાર સાથે કરલેન, ઉલા મોર તને કરિહિલેન।’ ૪૧ યહાર બાદ રાજા બાયૉં બગલેર લોકલાક કોહબે, ‘તુમસાર પર શ્રાપ છે! તુમ્હરા મોર લિકિન સે દૂર હંય જાવ। ઉઘાન આગિનોત ચલે જાવ, જૈઘાન કબી ની ઘેરાબે, આર જૈઘાનોક શૈતાન આર વહાર ફરીસ્તાલાર તને તૈયાર કરાલ ગહે। ૪૨ જૈઘુના મુઈ ભૂઘાય છિનુ, તુમ્હરા મોક ઘાના ની દિહિલેન। મુઈ પ્યાસા છિનુ, તુમ્હરા મોક પાની ની ઝિલાહિલેન। ૪૩ મુઈ પરદેશી છિનુ, તુમ્હરા મોક ગ્રહણ ની કરેન। મુઈ નાંગટે છિનુ, તુમ્હરા મોક કપડા ની પિનાહિલેન। જૈઘુના મુઈ બેમાર છિનુ આર જેલઘાનાત છિનુ, તુમ્હરા મોક દેઘવા ની ઓસેન।’ ૪૪ યહાર બાદ વરાવ જવાબ દિબે, ‘હે પ્રભુ! હમરા તોક કુનઘુના ભૂઘાય, પ્યાસા, નાંગટે, પરદેશી, બેમાર, યા જેલઘાનાત દેઘિહિનો, આર તોર સેવા જતન ની કરી?’ ૪૫ તબ રાજા ઁસાક જવાબ દિબે, ‘મુઈ તુમસાક સચ કોહચી, તુમ્હરા જૈઘાન કામ મોર ઁલા છોટો સે છોટો ભઈલાર સાથે ની કરલેન, ત ઁલા મોર તને ની કરલેન। ૪૬ તબ વરા હમેશાર સજઈ પવાર તને ચલે જાબે, મગર ધર્મી લોકલા હમેશાર જીવન પાબે।’”

यीशुक खतम करवार तने साजिश

(मरकुस १४:१-९; लूका २२:१-२; यूहन्ना ११:४५-५३; १२:१-८)

२६ इला उपदेश दुवार बाद यीशु अपना चेलालाक कोहले, ^२ “तुम्हरा जानेन कि दुई दिन बाद फसह परब ओसनेवाला छे, आर मानुषेर बेटाक क्रुसेर पर चढ़वार तने पापी लोकेर हाथोत धराय देयाल जाबे।” ^३ यहार बाद बोड़ोला पूजारी आर लोकेर नेताला महापूजारी कैफार महलेर अंगनात जोड़ो होल। ^४ आर यीशुक धोखा दे गिरफ्तार आर मारे फिकवार तने आपसोत सलाह-मसोरा करिल। ^५ मगर वरा कोहले, परबेर समय इकिसम करना ठीक नी होबे, इकिसम करले लोकलार बीचोत दंगा-फसाद हंय जाबे।

यीशुर तने एकझन स्त्रीर भक्ति

६ बैतनिय्याह गाँवत शिमोन नामेर एकझन लोक छिले, जहाक पहिले कुढ़ियार बेमारी छिले। एक दिना यीशु शिमोनेर घरोत ^७ खवार तने बोठिहिले, एकझन स्त्री संगमरमरेर एकटा बोटलोत बहुत कीमती इत्तेर ले ओसिल। वहाँय उखान इत्तरोक यीशुर माथात ढाले दिले। ^८ मगर चेलाला इडा देखिल त वरा नाराज हंय कोहले, “इकिसम बर्बादी क्याँ होचे? ^९ क्याँकि इखान इतरोक बहुत बेसी दामोत बेचाल गेलतेन आर टाकालाक गरीब लोकोक बाँटे देयाल गेलतेन।” ^{१०} मगर यीशु उसाक कोहले, “तुम्हरा इडा स्त्रीक क्याँ तकलीफ दिछेन आर सताछेन

क्याँकि यहाँय मोर तने एकखान बढिया काम करिहे।” ११ गरीब लोकला त तुमसार साथे हरखुना रोहबे, मगर मोक तुम्हरा हरखुना नी पाभेन। १२ मोर माथात इखान इत्तर ढाले, वहाँय मोक कबर दुवार तैयारीर तने इखान काम करिहे। १३ मुई तुमसाक सच कोहची, पूराडा दुनियाँत जैठिन-जैठिन खुश-खबरी प्रचार कराल जाबे, इडा स्त्रीक याद करवार तने यहार इखान कामेर प्रचार कराल जाबे।

यहूदा इस्किरियोतीर विश्वासघात

(मरकुस १४:१०-११; लूका २२:३-६)

१४ यहार बाद बारहझन चेलार भीतर से एकझन चेला यहूदा इस्किरियोती एकझन छिले, वहाँय बोड़ोला पूजारीर लिकिन गेल। १५ आर कोहले, “अगर मुई यीशुक तुमसार हाथोत धराय दी? त तुम्हरा मोक की दिभेन?” वरा वहाक तीसटा चाँदीर सिक्का दिले। १६ वहीखुन से वहाँय यीशुक धोखा दे धराय दुवार तने मौका छभवा लागिल।

फसह परबेर आखरी भोज

(मरकुस १४:१२-२१; लूका २२:७-१३; २२:२१-२३; यूहन्ना १३:२१-३०)

१७ अखमीरी रूटीर परबेर पहिला दिनोत चेलाला यीशुर लिकिन ओसिल, आर पूछिल, “गुरुजी! फसह परब खवार तने हमरा तोर तने कुनठिन जगह तैयार करमु?” १८ यीशु कोहले, “तुम्हरा शहरेर एकटा खास लोकेर लिकिन जाय कहव, ‘हमसार गुरुजी कोहचे, मोर समय

नजदीक चले ओसिहे, मुई अपना चेलालार साथे तोर घरोत फसह परब मनाम।” १९ यीशु जैकिसम चेलालाक कोहले, वहीकिसम चेलाला करिल, आर वरा फसह परबेर तैयारी करिल। २० जैखुना साँझ हंय गेल, वहाँय बारहझन चेलार साथे बोठिल। २१ आर वरा जैखुना खाछिले, वहाँय कोहले, “मुई कोहची, तुमसार भीतर से एकझन मोक धोखा दे धराय दिबे।” २२ इडा सुने वरा बहुत उदास हंय गेल, आर एक-एक करे वहाक पूछवा लागिल, “हे गुरु इडा की मुई छी?” २३ यीशु जवाब दिले, “जहाँय मोर साथे थालीखानोत हाथ दिले, वहीं मोक धराय दिबे। २४ जैकिसम मानुषेर बेटा यीशुर बारे लिखाल छे, वहाँय त जाछे, मगर हाय वहार पर, जहार जरियाय मानुषेर बेटा यीशुक धराय देयाल जाबे, उडा लोकेर तने इडा अच्छा होलतेन कि वहार जनमे नी होलतन।” २५ यहूदा इस्किरियोती जहाँय वहाक धोखा दे धराय देनेवाला छिले, वहाँय कोहले, “उडा लोक की मुई छी गुरुजी?” यीशु वहाक कोहले, “तुई खुद कोहय दिलो।”

प्रभु-भोज

२६ तब खवार आगुत यीशु रूटी ले परमेश्वरेर शुकुरिया करे भाँगिल, आर चेलालाक दे कोहले, “लव आर खाव। इडा मोर बदन छे।” २७ फेर वहाँय अंगुर-रसेर बाटीडा लिले, आर आशीर्वाद करे उसाक दिले, आर कोहले, “तुम्हरा इडा बाटी से खाव, २८ क्योंकि इखान मोर खून छे,

जैखान परमेश्वर आर मानुषेर बीच नया रिस्ता कायम करवार चिन्ह छे। बहुत लोकेर पापेर माफीर तने मोर खून बहाय-दुवाल जाबे। २९ मुई तुमसाक कोहची, जब तक मुई तुमसार साथे मोर पितार राजोत नया अंगुर-रस नी खाची, तब तक अंगुर-रस नी खामु।” ३० यहार बाद वरा एकटा भजन गाय, जैतून पहाड़ेर पर चले गेल।

पतरसेर इन्कार करवार भविष्यवाणी

(मरकुस १४:२७-३१; लूका २२:३१-३४; यूहन्ना १३:३६-३८)

३१ तब यीशु उसाक कोहले, “आज रातोत तुम्हरा सबकोय मोर कारण से डगमगाय जाभेन, क्योंकि शास्त्रोत लिखाल छे, ‘मुई रखवालडाक मारूम, आर झुन्डेर भेड़ाला तितर-बितर हंय जाबे।’ ३२ मगर मौत से जिन्दा हवार बाद मुई तुमसार पहिले गलील प्रदेशोत जामु।” ३३ इडा सुने पतरस यीशुक कोहले, “अगर वरा सबकोय तोक छोड़े भागे जाय, ताहरो पर मुई नी भागुम।” ३४ यीशु वहाक कोहले, “मुई तोक सच कोहची, आझे रातोत, मुर्गाडा बाँग दुवार आगुत, तुई मोक तीन बार इन्कार करबो।” ३५ पतरस यीशुक कोहले, “मोक अगर तोर साथे मोरे जवा हंय, तहारो पर मुई तोक इन्कार नी करूम।” आर यही मान्दी सबला चेला कोहले।

गतसमनी बगीचात प्रार्थना

(मरकुस १४:३२-४२; लूका २२:३९-४६)

३६ तब यीशु चेलालार साथे गतसमनी नामेर बगीचात गेल, आर उसाक कोहले, “तुम्हरा इठिन बोठे रहव, जैखुन तक मुई कुछु आगुत जाय प्रार्थना करछी।” ३७ यीशु अपना साथे पतरस आर जब्दीर दोनोंझन बेटाक ले गेल, आर वहाँय बहुत दुःखी आर बेचैन हवा लागिल। ३८ तब यीशु उसाक कोहले, “मोर मनडा बहुत दुःख से भरे गहे, इकिसम कि जानडा निकले जाछे। तुम्हरा यही ठिन रहव, आर मोर साथे जागिल रहव।” ३९ यहार बाद वहाँय आढ़ो कुछु दूर जाय हटुआ पारे माथा माटीत लगाय प्रार्थना करिल, “हे मोर पिता, अगर संभव छे त इडा दुःखेर बाटी मोर लिकिन से हटाय दे, मगर मुई जैकिसम चाहची उकिसम नी, बल्के जैकिसम तुई चाहचिस, वही किसम होक।” ४० तब वहाँय चेलालार लिकिन घुरे ओसिल आर उसाक निनाते पाले, आर पतरसोक कोहले, “तुम्हरा की मोर साथे एक घंटाव जागिल रहवा नी पारलेन? ४१ जागते रहव आर प्रार्थना करते रहव, जसे कि तुम्हरा परीक्षात ना पोड़ैन। आत्मा त तैयार छे, मगर, बदनडा कमजोर छे।” ४२ फेर वहाँय दोसरा बार गेल आर प्रार्थना करिल, “हे मोर पिता, अगर मोर बिना खाय इडा दुःखेर बाटी मोर लिकिन से नी हटेछे, त तोर इच्छा पूरा होक।” ४३ आर फेर वहाँय चेलालार लिकिन ओसिल, आर उसाक निनाते पाले, क्योंकि उसाक बहुत झुमनी धरिहिले। ४४ वहीलाते यीशु

उसाक छोड़े जाय तेसरा बार वही किसम प्रार्थना करिल। ४५ तब वहाँय चेलालार लिकिन ओसिल, आर उसाक कोहले, “तुम्हरा अलाव निनाछेन, आर आराम करछेन। देखो, मोर समय नजदीक चले ओसिहे, आर मानुषेर बेटाक पापी लोकेर हाथोत धराय देयाल जाबे। ४६ उठो, आर इठिन से चलोव। देखो, मोक धराय देनेवाला बगलोत चले ओसिहे।”

यीशुक धराय दिछे

(मरकुस १४:४३-५०; लूका २२:४७-५३; यूहन्ना १८:३-१२)

४७ यीशुर बारहझन चेलार भीतर से यहूदा एकझन चेला छिले। जैखुना यीशु बोलछिले, उखुना यहूदा आर वहार साथे एकटा बोड़ो भीड़ यीशुर लिकिन ओसिहिले। इडा बोड़ो भीड़ बोड़ोला-पुजारी आर लोकेर अगुवालार तरफ से ओसिले, आर उसार हाथोत तड़वाल आर लाठी छिले। ४८ वहाक पकड़ानेवाला उसाक एकटा चिन्ह दिहिले, “मुई जहाक चुमा लुम वहीं उडा लोक छे, आर तुम्हरा वहाके धरे लेन।” ४९ आर वहाँय यीशुर लिकिन जल्दी से ओसिल आर कोहले, “हे गुरु, नमस्कार।” आर वहाँय वहार चुमा लिले। ५० यीशु वहाक कोहले, “हे बन्धु, जैखान काम तुई करवा ओसिहिस, उखान करे ले।” तब वरा यीशुर लिकिन ओसे वहाक धरिल आर बन्दी बनाय लिले। ५१ यीशुर चेलालार भीतर से एकझन अपना हाथ बढ़ाय अपना तड़वालखान टाने

महापूजारीर नौकरटार कानडा काटे फिकाल। ५२ तब यीशु वहाक कोहले, “तुई तड़वालखानोक अपनार लिकिन राखेक, क्याँकि जहाँय तड़वाल चलाछे, वहाँय तड़वाल से नाश कराल जाबे। ५३ तुम्हरा की इडा नी जानेन कि मुई अपना पितार लिकिन बिनती करूम, त वहाँय मोर तने हजार-हजार फरीस्ताक पठाय दिबे? ५४ तब शास्त्रेर बात कसे करे पूरा होबे, जैडा बात अभी घटनेवाला छे?” ५५ उखुना यीशु भीड़ेर लोकलाक कोहले, “तुम्हरा की तड़वाल आर लाठी ले मोक एकझन डकैत समझे धरवा ओसिहेन? मुई होर दिना मंदिरोत बोठे उपदेश दिछिनु आर तुम्हरा मोक नी धरेन। ५६ मगर इला सबला घटना घटिल जसे कि नबीर कहाल शास्त्रेर बातला पूरा हंय जाय।” यहार बाद वहार सबला चेला वहाक छोड़े भागे गेल।

महासभात यीशु

(मरकुस १४:५३-६५; लूका २२:५४-५५; २२:६३-७१; यूहन्ना १८:१३-१४; १८:१९-२४)

५७ तब जैला लोक यीशुक धरिहिले, वरा वहाक कैफा महापूजारीर लिकिन ले गेल, जैठिन शास्त्रेर ज्ञानीला आर लोकेर नेताला जमा हंय छिले। ५८ मगर पतरस दूर से यीशुर पीछू-पीछू महापूजारीर अंन तक गेल, आर भीतरोत जाय यीशुर की होबे, इडा देखवार तने वहाँय पहरादारलार साथे बोठे गेल। ५९ यहार बाद बोड़ोला पूजारी आर सभार पूरा लोकला यीशुर खिलाफ झूठा गवाह छाभछिले, जसे कि वरा वहाक

मारे फिकवा पाड़े। ६० मगर बहुतला झूठा गवाही दुवार बादो कोय सबूत नी पाले। आखिरोत दुईझन झूठा गवाह आगु बढे ओसिल, ६१ आर कोहले, “इडा लोक कोहिले, ‘मुई परमेश्वरेर मंदिरोक भाँगे दुवा पारमु, आर इडाक तीन दिनोत बनाय दुवा पारमु।’” ६२ तब महापूजारी थाड़ी हंय यीशुक कोहले, “तोर लिकिन की कोय जवाब नी छे? इला लोक तोर खिलाफ कुन गवाही दिछे?” ६३ मगर यीशु चुप रोहिल। यहार बाद महापूजारी वहाक कोहले, “जिन्दा परमेश्वरेर कसम खाय कोह, ‘तुई की परमेश्वरेर बेटा मसीहा छिस?’” ६४ यीशु वहाक जवाब दिले, “तुई इडा खुद कोहय दिलो। मुई तोक यहोडा कोहची कि अला से तुई मानुषेर बेटा यीशुक परमेश्वरेर दहिना बगल बोठाल देखबो, आर आसमानेर मेघेर पर ओसते देखबो।” ६५ तब महापूजारी अपना कपड़ा फाड़े दिले, आर कोहले, “यहाँय परमेश्वरेर अपमान करिल। हमसाक गवाहीर आर कुन जरूरत छे? तुम्हरा खुद वहार मुख से परमेश्वरेर अपमान करते सुनलेन।” ६६ तुमसार की फैसला छे? वरा जवाब दिले, “यहाँय त मौतेर लायक छे।” ६७ तब वरा यीशुर मुखोत थूक दिले, आर घूसा मारिल आर कोय थप्पर मारिल, आर पूछिल, ६८ “ऐ मसीहा, हमसाक बता, तोक के मारिल?”

पतरस यीशुक इन्कार करछे

(मरकुस १४:६६-७२; लूका २२:५६-६२; यूहन्ना १८:१५-१८; १८:२५-२७)

६९ पतरस बाहरे अंनात बोठे छिले, उठिन एकझन नौकरानी वहार लिकिन ओसे कोहले, “तोहों गलील प्रदेशेर यीशुर साथे छिलो।” ७० मगर वहाँय उसार लिकिन इन्कार करे कोहले, “मुई नी जानी तुई की कोहचिस।” ७१ आर जैखुना पतरस बाहरे गेल, एकझन दोसरा नौकरानी वहाक देखिल, आर वहाँय दोसराला लोकोक कोहले, “यहाँव त नासरत शहरेर यीशुर साथे छिले।” ७२ वहाँय फेर कसम खाय इन्कार करिल, “मुई उडा लोकोक नी जानी।” ७३ जैला लोक उठिन थाड़ो हंय छिले, पतरसोक ओसे कोहले, “तुई जरूर उसार भीतर से एकझन छिस, क्याँकि तोर बातचीतला तोक धराय दिछे।” ७४ तब पतरस अपना-आपोक श्राप दिछे, आर कसम खाचे, “मुई उडा लोकोक नी जानी।” आर वहीखुना मुर्गाडा बाँग दिले। ७५ तब पतरस यीशुर इडा बातोक याद करिल, “मुर्गाडा बाँग दुवार आगुत तुई मोक तीन बार इन्कार करबो।” तब वहाँय बाहरे गेल, आर बहुत दुःख से कनवा लागिल।

२७ जैखुना भोर होल, बोड़ोला पूजारी आर लोकेर नेताला यीशुक मारे फिकवार फैसला करिल। २ वरा यीशुक बान्हे ले जाय रोमी राजपाल पिलातुसेर हाथोत सोंपे दिले।

यहूदा इस्किरियोतीर मौत

३ यीशुक धरानेवाला यहूदा इस्किरियोती जैखुना देखिल कि यीशुक मौतेर सजई दुवार तने दोषी ठहराल गहे, त वहार मनोत बहुत दुःख होल, वहीलाते वहाँय उ तीसटा चाँदीर सिक्काक बोड़ो पूजारी आर नेतालार लिकिन घुराय ले ओसिल। ४ आर उसाक कोहले, “मुई बेकसूर लोकोक मारे फिकवार तने धराय दे पाप करिही।” इडा सुने यहूदी धर्मेर नेताला कोहले, “हमसाक इडा बात से की मतलब छे? तुहें यहार जिम्मेवार छिस।” ५ तब वहाँय उला सिक्काक मन्दिरोत फेके बाहरे चले गेल, आर फाँसी ले लिले। ६ बोड़ोला पूजारी उला सिक्काक ले कोहले, “इला सिक्काक मन्दिरेर भंडार घरोत रखना ठीक नी होबे, क्योंकि इला सिक्का खूनेर दाम छे।” ७ वहीलाते वरा सलाह-मशवारा करे उला सिक्का से एकटा कुम्हारेर जमीनोक किने लिले, जसे कि अगर कोय अनजान लोक मोरे जाय त वहाक उखान जमीनोत कबर देयाल जाय। ८ यही कारण से उखान जमीनोक आजतक खूनेर खेत कहाल जाछे। ९ आर इकिसम करे बहुत पहिले नबीलार जरियाय बोलाल बातला पूरा होल, जैला बात इकिसम छे, “वरा वहार तने तीसटा चाँदीर सिक्का लिले, जैडा कीमत इजराएली लोकला तय करिहिले। १० आर प्रभु जैकिसम मोक हुकूम दिहिले वही मुताबिक वरा इला टाका दे कुम्हारेर खेत किने लिले।”

पिलातुस यीशुक मौतेर सजा दिछे

(मरकुस १५:२-१५; लूका २३:३-५; २३:१३-२५; यूहन्ना १८:३३-४०; १९:१-१६)

११ जैखुना यीशु पिलातुस राजपालेर आगुत थाड़ो हंय छिले, त वहाँय यीशुक पूछिल, “तुई की यहूदी लोकेर राजा छिस?” यीशु वहाक जवाब दिले, “तुई खुद इडा बात कोहचिस।” १२ जैखुना बोड़ोला पूजारी आर लोकेर नेताला यीशुर पर दोष लगाछिले, त यीशु कोय जवाब नी दिले। १३ इडा देखे पिलातुस वहाक कोहले, “तुई की सुनछिस नी कि वरा तोर खिलाफ कतेला दोष लगाछे?” १४ मगर यीशु वहाक एकटा बातरो जवाब नी दिले। इडा देखे पिलातुस बहुत ताज्जुब करवा लागिल।

यीशुक मौतेर सजा देयाल जाछे

१५ फसह परबेर समय पिलातुस लोकलार इच्छा मुताबिक एकझन कैदीक छोड़े दिछिले। १६ उडा समय जेलखानात बरब्बा नामेर एकझन बहुत खतरनाक कैदी छिले। १७ जैखुना लोकला जोड़ो होल, त पिलातुस राजपाल उसाक पूछिल, “तुम्हरा मोक कहाक छोड़े दुवा कोहचेन? बरब्बाक ना यीशुक, जहाक मसीहा कहाल जाछे।” १८ पिलातुस इडा जानछिले कि लोकला जलनेर कारण यीशुक वहार हाथोत धराय दिहे। १९ जैखुना पिलातुस फैसला करवार तने गद्दीत बोठे छिले, उखुना पिलातुसेर पत्नी पिलातुसेर लिकिन कोहय पठाल, “तुई उडा धर्मी लोकेर फैसलात हाथ मत लगा, क्योंकि मुई आज

सपनात वहार कारण से बहुत दुःख उठाही।” २० वहार बाद बोड़ोला पूजारी आर लोकेर नेताला भीड़ेर लोकलाक उसकाय कोहले, “तुम्हरा बरब्बाक माँगे लव, आर यीशुक मारे दुवा कहव।” २१ राजपालडा उसाक पूछिल, “ई-दोनोँझनार बीच से तुम्हरा मोक कहाक छोड़े दुवा कोहचेन?” वरा कोहले, “बरब्बाक।” २२ पिलातुस उसाक पूछिल, “त मुई यीशुक जहाक मसीहा कहाल जाछे, वहाक की करूम?” सबकोय वहाक जवाब दिले, “यीशुक क्रुसेर पर चढ़ा।” २३ पिलातुस राजपाल उसाक पूछिल, “क्याँ? वहाँय कुन बुराई करिहे?” मगर वरा आढ़ो बेसी जोर-जोर से चिल्लाय कोहले, “वहाक क्रुसेर पर चढ़ा।” २४ जैखुना पिलातुस देखिल कि यीशुक बचवार तने वहाक कोय रास्ता नी मिलछे, बल्के वहार खिलाफ हल्ला-गुल्ला बढ़ते जाछे, त वहाँय पानी लिले आर भीड़ेर लोकलार आगुत अपना हाथला धोय लिले, आर कोहले, “मुई इडा धर्मी लोकेर खूनेर तने दुषी नी छी, तुम्हराय यहार जिम्मेवार छे।” २५ सबला लोक जवाब दिले, “वहार खूनेर दोषी हमरा आर हमसार बाल-बच्चा छे।” २६ यहार बाद पिलातुस राजपाल बरब्बाक उसार तने छोड़े दिले, आर यीशुक कोड़ा मरवाल, आर क्रुसेर पर चढ़वार तने लोकलार हाथोत सोंपे दिले।

सिपाहीला यीशुर बेज्जती करछे

(मरकुस १५:१६-२०; यूहन्ना १९:२-३)

२७ यहार बाद पिलातुस राजपालेर कुछुला सिपाही यीशुक राजभवनोत ले गेल, आर बाँकीला सिपाहीक यीशुर चारो भीति जोड़ो करिल। २८ आर वहार कपड़ाला खोले दे, वहाक लाल रंगेर चमकीला कपड़ा पिन्हाय दिले, जैला कपड़ा राजा पिन्हेछिले। २९ यहार बाद वरा काँटार टोपी बनाय यीशुर मथात पिन्हाय दिले। आर वहार हाथोत एकखान लाठी धराय दिले, आर यीशुर आगुत हटुवा पारे वहार मजाक उड़वा लागिल आर कोहले, “हे यहूदी लोकेर राजा! नमस्कार।” ३० यहार बाद वरा यीशुर पर थूक दिले, आर वहार हाथेर लाठीखान ले वहार मथात मरवा लागिल। ३१ जैखुना यीशुर मजाक करवार बाद सिपाही वहार बदन से लाल रंगेर कपड़ाखान खोले लिले, आर वहार अपना कपड़ालाक पिन्हाय दिले, आर क्रुसेर पर चढ़वार तने ले चले गेल।

यीशुक क्रुसेर पर चढ़ाल जाछे

(मरकुस १५:२१-३२; लूका २३:२६-४३; यूहन्ना १९:१७-२७)

३२ जैखुना सिपाहीला यीशुक ले जाछिले, वरा कुरेनी शहरेर शिमोन नामेर एकझन लोकोक देखिल। वरा वहाक यीशुर क्रुसटाक ले जवार तने जबरदस्ती करिल। ३३ तब वरा गोलगाथा नामेर जगहोत पहुँचिल, जैखानेर मतलब होचे, खोपड़ीर जगह। ३४ वरा यीशुक तीतो अंगुरेर रस

खवार तने दिले, मगर वहाँय उखानोक चाखे खवा नी चाहले। ३५ यहार बाद सिपाहीला वहाक क्रुसेर पर चढ़ाल आर लौटरी लगाय वहार कपड़ालाक आपसोत बाँटे लिले। ३६ आर सिपाहीला उठिन बोठे वहार पहरा दुवा लागिल। ३७ आर वरा यीशुर माथार उपरोत क्रुसेर पर एकखान लिखाल तख्ता लटकाय दिले, वहात लिखाल छिले, “यहाँय यहूदी लोकेर राजा यीशु छे।” ३८ तब वहार साथे दुईझन डकैतोक क्रुसेर पर चढ़ाल गेल। एकझनाक दहिना भीति आर दोसराझनाक बाया भीति क्रुसेर पर चढ़ाल। ३९ जैला लोक उपाके जाछिले-ओसछिले, वरा माथा हिलाय-हिलाय वहार बेज्जत करछिले, ४० “तुई त मंदिरडाक भाँगे दुवा चाहचिलो आर उडाक तीन दिनोत बनाय दुवा चाहचिले। अपना-आपोक बचा, अगर तुई परमेश्वरेर बेटा छिस, त क्रुसेर पर से नाभे जा।” ४१ यही किसम करे बोड़ोला पूजारी, शास्त्रेर ज्ञानीलार आर नेतालार साथे मिले यीशुर मजाक उड़ाय कोहचिले। ४२ “यहाँय दोसराला लोकोक बचाल मगर अपना-आपोक बचवा नी पारछे। यहाँय त इजराएल लोकेर राजा छे, यहाँय अला क्रुसेर पर से नाभे ओसोक, त हमरा वहार पर विश्वास करमु। ४३ वहाँय त परमेश्वरेर पर भरोसा करियेह। अगर परमेश्वर चाहचे त वहाक बचाय लोक क्योंकि यहाँय कोहिले, मुई परमेश्वरेर बेटा छी।” ४४ यही किसम जैला डकैतोक वहार साथे क्रुसेर पर चढ़ाल गहिले, वराव यीशुर शिकायत करछिले।

यीशुर मौत

(मरकुस १५:३३-४१; लूका २३:४४-४९; यूहन्ना १९:२८-३०)

४५ बारह बजे से तीन बजे तक उडा पूरा देशोत अन्हार छाया रोहोल।
४६ तीन बजे यीशु बहुत जोर से आवाज लगाय कोहले, “एली-एली लमा शबकतनी” माने “हे मोर परमेश्वर! हे मोर परमेश्वर! तुरई मोक क्याँ छोड़े दिलो?” ४७ जैला लोक उठिन थाड़ो हंय छिले, उलार भीतर से कुछुला लोक इडा सुने कोहले, “यहाँय त एलियाहक जाब दिछे।” ४८ उसार भीतर से एकझन दौड़े गेल, आर एकखान इस्पंज लिले आर खट्टा अंगुरेर रसोत डुबाल आर एकखान लाठीत राखे वहाक चूसवा दिले। ४९ दोसराला लोक कोहले, “थामो। देखी त एलियाह यहाक बचवार तने ओसछे ना नी ओसछे।” ५० यहार बाद यीशु फेर जोर से चिल्लाय अपना प्राण दे दिले। ५१ आर देखो मंदिरेर पर्दाखान उपर से नीचा तक चीरे दुई भाग हंय गेल, आर जमीन हिले गेल, आर पहाड़ेर चट्टानला फटे गेल। ५२ आर कबरला खोले गेल आर जैला लोक मोरे गहिले उलार भीतर से धर्मी लोकेर बहुतला लाश जिन्दा हंय उठिल। ५३ आर यीशुर जिन्दा हंय उठवार बाद इला लोक पवित्र शहर यरूशलेमोत गेल, वरा उठिन बहुतझनाक देखा दिले। ५४ आर फौजेर हाकिमडा आर जैला लोक वहार साथे छिले, यीशुर पर पहरा दिछिले। भीचाल आर सबला घटनाक देखे, वरा डोराय गेल, आर कोहले, “सच-मुच यहाँय परमेश्वरेर बेटा छिले।” ५५ उठिन बहुतला स्त्री लोक दूर से

थाड़ो हंय देखछिले। वरा गलील से यीशुर सेवा करते-करते वहार साथे ओसिहिले। ५६ उला स्त्री लोकेर भीतर से मरियम मगदलीनी, याकूब आर यूसुफेर माँ मरियम, आर जब्दीर पत्नी छिले। ५७ जैखुना शाम हंय गेल, अरिमतियाह शहरेर यूसुफ नामेर एकझन धनी लोक उठिन ओसिल, आर यहाँय यीशुर चेला छिले। ५८ यहाँय पिलातुसेर लिकिन गेल आर यीशुर लाशटाक माँगिल। पिलातुस यीशुर लाशटाक यूसुफोक दे दुवार हुकूम दे दिले। ५९ आर यूसुफ वहार लाशटाक लिले, आर एकखान सादा मखमल कपड़ात लेपटिल। ६० आर लाशटाक वहाँय एकटा नया कबरोत राखिल, जैडा कबरोक वहाँय चट्टानोत खुदे बनाहिले। यहार बाद वहाँय एकखान बोड़ो पत्थलोक सड़काय आने कबरटार मुखखान बन्द करे दे चले गेल। ६१ मरियम मगदलीनी आर दोसराझन मरियम उठिन कबरटार आगु भीति मुख करे बोठे छिले।

कबरेर पर पहरा

६२ फसह परबेर दोसरा दिन यानी आरामेर दिन बोड़ोला-पुजारी आर फरीसीला पिलातुसेर लिकिन जोड़ो होल, ६३ आर वहाक कोहले, “हे राजपाल साहब! हमसाक याद होचे जे इडा भटकानेवाला लोक जैखुना जिन्दा छिले, उखुना कोहिले कि तीन दिन बाद मुई आरमने जिन्दा हंय जामु।” ६४ वहीलाते इडा हुकूम दव कि कबरटाक तेसरा दिन तक बहुत कड़ाई से पहड़ार पर रखाल जाक, नी त वहार चेलाला वहार लाशटाक

चुरी करे ले जाय, आर लोकोक कोहय दे कि, “वहाँय मुर्दा से जिन्दा हंय उठिहे। तब पिछलाडा धोखा, पहिलाडा धोखा से बेसी खराब हंय जाबे।” ६५ पिलातुस उसाक हुकूम दिले, “तुमसार लिकिन फौजेर पहरादारला छे, जाव कबरटाक बहुत कड़ाई से पहरा दव।” ६६ वहीलाते मुख्य पूजारीला आर फरीसीला पहरादारक साथे ले गेल आर कबरटाक सील लगाय पहरादारलाक राखे दिले।

यीशु आरमने जिन्दा होचे

(मरकुस १६:१-१०; लूका २४:१-१०; यूहन्ना २०:१-१०)

२८ आरामेर दिनेर बाद हप्तार पहिलाडा दिनोत यानी एतवारेर दिन भोर पोहरे मरियम मगदलीनी आर दोसरा मरियम कबरटाक देखवा गेल। १ एकाएक एकटा बहुत बोड़ो भूचाल होल, क्योंकि प्रभुर एकझन फरीस्ता स्वर्ग से नाभिल आर ओसे पत्थलखानोक हटाय दिले आर उखानेर पर बोठे गेल। २ वहार शकलडा बिजलीर मान्दी चमकेछिले आर वहार कपड़ाला बरफेर मान्दी सादा छिले। ३ उडा फरीस्तार डर से पहरादारला कँपवा लागिल, आर मुर्दा लोकेर मान्दी हंय गेल। ४ मगर फरीस्ताडा स्त्रीलाक कोहले, “तुम्हरा ना डोराव, क्योंकि मुई जानी कि तुम्हरा यीशुक छाभछेन, जहाक क्रुसेर पर चढ़ाल गहिले। ५ वहाँय इठिन नी छे। वहाँय अपना वचन मुताबिक जिन्दा हंय उठे गहे। तुम्हरा ओसो आर उखान जगह देखो, जैठिन वहाक रखाल गहिले। ६ तुम्हरा जल्दी

करे जाव आर वहार चेलालाक कहव कि वहाँय मुर्दा से जिन्दा हंय उठे गहे, आर देखो तुमसार पहिले वहाँय गलील प्रदेश जाछे, आर उठिन तुम्हरा वहाक देखभेन। मुई तुमसाक इडा बात कोहय दिनु।” ८ वरा जल्दी करे कबरटा से बाहरे निकलिल, आर डोराय आर खुशीर मारे दौड़े चेलालार लिकिन गेल।

यीशु स्त्रीलाक दखा दिछे

९ यीशु उसार सामनात हाजिर होल आर कोहले, “तुमसाक शांति मिलोक।” स्त्रीला ओसे यीशुर पाँलाक धरिल आर वहार भक्ति करिल। १० तब यीशु उसाक कोहले, “तुम्हरा ना डोराव, तुम्हरा जाव आर मोर भईलाक गलील प्रदेश जवा कहव, आर उठिन वरा मोक देखबे।”

पहरादारला झूठ खबर दिछे

११ जैखुना वरा जाछिले, इकिसम होल कि कुछुला पहरादार शहरोत गेल आर जतेला घटना घटिहिले, उला सबलार बारे बोड़ोला पूजारीक कोहय दिले। १२ जैखुना मुख्य पूजारीला आर यहूदी लोकेर नेताला एक साथे जोड़ो होल, वरा सलाह-मशवरा करे फौजलाक कुछु टाका दिले। १३ आर उसाक कोहले, “लोकलाक कोहेन कि जैखुना हमरा रात करे निनाय छिनु, वहार कुछुला चेला रात करे ओसे वहाक चुरी करे लिहे। १४ अगर इडा बात राजपाल हाकिमेर कानोत पहुँचे जाय त हमरा वहाक

मनाय लिमोह, आर तुमसाक मुसीबत से बचाय लिमोह।” १५ वहीलाते सिपाहीला टाका लिले, आर जैकिसम उसाक कहाल गहिले, वही किसम वरा करिल, आर इडा किस्सार बात आजतक यहूदी समाजोत फैलाल छे।

यीशु अपना चेलालाक बोड़ो हुकूम दिछे

१६ यहार बाद एगारोझन चेला गलीलेर उखान पहाड़ेर पर गेल, जैखानेर बारे यीशु उसाक कोहिले। १७ आर चेलाला जैखुना यीशुक देखिल त वरा वहाक भक्ति करिल, मगर कोय-कोय विश्वास नी करिल कि इडा यीशु छे। १८ आर यीशु उसार लिकिन ओसिल आर कोहले, “स्वर्गेर आर दुनियाँर सबला अधिकार मोक देयाल गहे। १९ वहीलाते तुम्हरा जाव आर सब देशेर लोकोक मोर चेला बनाव। उसाक पितार नामे, आर बेटार नामे आर पवित्र आत्मार नामे बपतिस्मा दोव। २० आर मुई जैला हुकूम तुमसाक दिही, उला सबलाक माने चलवार शिक्षा दोव, आर देखो, युगेर आखिर तक मुई हमेशा तुमसार साथे छी।”

मरकुसेर लिखाल खुश-खबरी

यूहन्ना बपतिस्मा देनेवालार प्रचार

(मत्ती ३:१-१२; लूका ३:१-१८; यूहन्ना १:१९-२८)

१ परमेश्वरेर बेटा यीशु मसीहार खुश-खबरीर शुरूवात इकिसम छे:
२ जैकिसम नबीलार किताबोत परमेश्वर बोलछे, “देखो, मुई अपना खबर देनेवालाक तोर पहिले पठाछी, वहाँय तोर तने रास्ता ठीक करबे।” ३ आर वहाँय सुनसान इलाकात जोर से चिल्लाय कोहचे, “तुम्हरा प्रभुर तने रास्ता तैयार करो आर वहार तने रास्तालाक सीधा करो।” ४ इडा भविष्यवाणीर मुताबिक यूहन्ना बपतिस्मादाता ओसिल आर सुनसान इलाकात जाय लोकलार लिकिन प्रचार करवा लागिल, “तुम्हरा पाप से माफी पवार तने अपना मन बदली करो आर बपतिस्मा लव।” ५ वहार प्रचार सुने पूराडा यहूदिया इलाकार आर यरूशलेम शहरेर सबला लोक निकले वहार लिकिन ओसिल आर अपना-अपना पाप माने लिले आर यूहन्नार लिकिन से यरदन नदीत बपतिस्मा लिले। ६ यूहन्ना ऊँटेर चूल दे बनाल पौशाक पिन्हें छिले, आर कमरोत चमड़ार बेल्ट पिन्हें छिले आर फरींग आर जंगलेर शहद खाछिले। ७ वहाँय इडा

प्रचार करछिले, “मोर बाद एकझन ओसछे, जहाँय मोसे बेसी शक्तिशाली छे। मुई झूके वहार जूतार बानलाको खोलवार लायक नी छी। ८ मुई त तुमसाक पानी से बपतिस्मा दिछी, मगर वहाँय तुमसाक परमेश्वरेर पवित्र आत्मा दे बपतिस्मा दिबे।”

यीशुर बपतिस्मा आर परीक्षा

(मत्ती ३:१३—४:११; लूका ३:२१-२२; ४:१-१३)

९ वहीडा समय एक दिना यीशु गलील प्रदेशेर नासरत शहर से यूहन्नार लिकिन ओसिल आर वहार लिकिन से यरदन नदीत बपतिस्मा लिले। १० आर जैखुना यीशु पानी से उठे उपरोत ओसिल, उखुना वहाँय देखिल कि आसमानडा खोले गेल आर परमेश्वरेर आत्मा कबूतरेर मान्दी वहार पर नाभिल। ११ आर आसमानडा से इडा आवाज होल, “तुई मोर प्यारा बेटा छिस, तोसे मुई बहुत खुश छी।” १२ यहार बाद परमेश्वरेर आत्मा यीशुक जल्दी करे एकखान सुनसान इलाकात ले गेल। १३ उठिन शैतान चालीस दिन तक यीशुक पापोत फिकवार कोशिश करिल आर वहाँय उडा समय जंगलेर जानवरलार साथे रोहछिले आर स्वर्गेर फरीस्ताला ओसे वहार सेवा करछिले।

यीशु अपना काम शुरू करछे

(मत्ती ४:१२-२२; लूका ४:१४, १५; ५:१-११)

१४ यहार बाद यूहन्नाक जैखुना कैद करे लिया ल गेल, यीशु परमेश्वरेर खुश-खबरी प्रचार करते-करते गलील प्रदेश ओसिल १५ आर कहवा लागिल, “परमेश्वरेर राज बगलोट चले ओसिहे, तुम्हरा अपना-अपना पाप से मन बदली करो आर खुश-खबरीर पर विश्वास करो।”

यीशु मलाहाक चेला बनाछे

१६ एक दिना यीशु गलील समुन्द्रेर बगल दे जवारखुना शिमोनोक आर वहार भई अन्द्रियासोक समुन्द्रोत जाल फेकते देखिल, क्योंकि वरा मलाह छिले। १७ यीशु उसाक कोहले, “मोर पीछूत ओसो। अला से तुम्हरा माछ नी धरभेन, मगर मुई तुमसाक सिखाम कि तुम्हरा केनमन करे मानुषोक परमेश्वरेर लिकिन आनभेन।” १८ आर वरा वहीखुना अपना जाललाक छोड़े वहार पीछूत चले गेल। १९ कुछ दूर जवार बाद वहाँय जबदीर दुईझन बेटा याकूब आर यूहन्नाक देखिल। वरा अपना नावखानेर पर बोठे जालखानोक सिलाछिले। २० यीशु उसाक देखे दोनोंझनाक जाब दिले। वरा अपना बाप जबदीक आर मजदूरलाक नावखानोत छोड़े दिले आर वहार पीछूत चले गेल।

यीशुर अधिकार

(लूका ४:३१-३७)

२१ यीशु आर वहार चेलाला कफरनहूम शहर चले गेल। आरामेर दिनोत वरा जल्दी करे प्रार्थना-घरोत गेल आर यीशु लोकलाक शिक्षा दुवा लागिल। २२ लोकला वहार शिक्षा सुने ताज्जुब करवा लागिल क्यौंकि वहाँय शास्त्रेर ज्ञानीलार मान्दी शिक्षा नी दिछिले, बल्के अधिकारेर साथे लोकोक शिक्षा दिछिले। २३ आर वहीखुना उसार प्रार्थना-घरोत एकझन भूत धराल लोक छिले। २४ आर वहाँय चिल्लाय कोहले, “ऐ नासरत शहरेर यीशु! तोक हमसा से कि मतलब छे? तुई कि हमसाक बर्बाद करवार तने ओसिहिस? मुई जानी कि तुई के छिस? तुहें परमेश्वरेर पठाल पवित्र लोक छिस।” २५ मगर यीशु वहाक धमकाय कोहले, “चुप रोह, आर यहार भीतर से निकले जा।” २६ आर उडा भूत लोकटाक मोचराय गिराय दिले आर जोर से चिल्लाय वहार भीतर से निकले गेल। २७ सबला लोक ताज्जुब करवा लागिल, आर वरा अपना बीचोत बोलवा लागिल “इडा कुन किसम बात छे? यहाँय त नया किसमेर शिक्षा दिछे। वहाँय अधिकारेर साथे भूतलाक हुकूम दिछे आर भूतलाव वहार हुकूम मानछे।” २८ वहीलाते यीशुर नाम गलील प्रदेशेर चारो भीति फैले गेल।

यीशु बहुतला बेमार लोकोक अच्छा करछे

(मत्ती ८:१४-१७; लूका ४:३८-४१)

२९ आर वहीखुना वहाँय प्रार्थना-घर से निकले, याकूब आर यूहन्नार साथे शिमोन आर अन्द्रियासेर घर गेल। ३० उठिन शिमोनेर सास बुखारोत पोड़े छिले, आर चेलाला वहीखुना शिमोनेर सासेर बारे यीशुक कोहले। ३१ तब यीशु जाय वहार हाथखान धरे उठाल, आर वहार बुखार छुटे गेल, आर वहाँय उठे यीशुर आर चेलालार सेवा करिल। ३२ उदिना शाम करे बेला डुबवारखुना लोकला सबला बेमार आर भूत धराल लोकलाक यीशुर लिकिन ले ओसिल। ३३ आर शहरेर लोकला घरखानेर दरवाजार लिकिन जोड़ो हंय गेल। ३४ आर वहाँय बहुत किसमेर बेमार लोकोक आर बहुतला भूत धराल लोकोक ठीक करिल, आर भूतलाक बोलवा नी दिले, क्योंकि भूतला यीशुक जानछिले।

गलील प्रदेशोत यीशुर काम

(लूका ४:४२-४४)

३५ आर दोसरा दिना खूब भोरे उठे यीशु एकखान सुनसान इलाकात चले गेल, आर उठिन प्रार्थना करवा लागिल। ३६ शिमोन आर वहार साथे जैला चेला छिले, यीशुक छभवा गेल। ३७ आर चेलाला यीशुक पाय वहाक कोहले, “सबकोय तोक छाभछे।” ३८ यीशु उसाक कोहले, “चलोव हमरा दोसराला जगहोत जई, जसे कि मुई वोहला जगहोत

प्रचार करी, क्योंकि यहीखान काम करवार तने मुई ओसिही।” ३९ आर वहाँय पूरा गलील प्रदेशोत आर उसार प्रार्थना-घरलात प्रचार करते आर लोकलार भीतर से भूतलाक निकलाते गेल।

यीशु एकझन कुढ़िया लोकोक अच्छा करछे

(मत्ती ८:१-४; लूका ५:१२-१६)

४० एकझन कुढ़िया लोक यीशुर लिकिन ओसिल आर हटुआ पारे वहाक कोहले, “अगर तुई चाहिस, त मोक तुई अच्छा करवा पारिस।” ४१ कोढ़ीडाक देखे यीशुर दिलडा कल्पे गेल आर वहाक कोहले, “मुई चाहची।” वहार बाद यीशु अपना हाथखानोक बढाल आर वहाक लाड़े कोहले, “तुई अच्छा हंय जा।” ४२ वहीखुना वहार कुढ़िया रोग ठीक हंय गेल, आर वहाँय शुद्ध हंय गेल। ४३ आर यीशु वहाक पठाय चेताय कोहले, ४४ “इडा बात एकदम कभी कहाको ना कोहिस। जा आर पूजारीक देखा। मूसा नबीर नियमेर मुताबिक शुद्ध हवार तने जे कुछु चढ़वा लागे उडाक चढ़ा आर साबित कर कि तुई शुद्ध हंय गहिस।” ४५ मगर वहाँय बाहरे जाय वहार बारे खुल्लम-खुल्ला सभाको कहवा लागिल, आर इडा खबर चारो भीति इकिसम फैले गेल कि यीशु खुल्लम-खुल्ला कोयडा शहरोत ढुकवा नी पारिल। वहीलाते वहाँय बाहरे सुनसान इलाकात रोहिल। तहारो पर लोकला चारो भीति से वहार लिकिन ओसवा लागिल।

यीशु लकवार रोगीक अच्छा करछे

(मत्ती ९:१-८; लूका ५:१७-२६)

२ कुछ दिन बाद यीशु फेर कफरनहूम शहरोत ओसिल, आर लोकला सुनिल कि वहाँय घरेर भीतरोत छे। ३ इडा सुने अताला लोक उठिन जोड़ो हंय गेल कि दरवाजाखानेर लिकिन जगह नी छिले। यीशु लोकलाक परमेश्वरेर वचन सुनाछिले। ४ आर चारझन लोक एकझन लकवार बेमारीक ले ओसिल। ५ मगर वरा भीड़ेर दस्ती वहार लिकिन जवा नी पारिल। वहीलाते वरा घरखानेर छप्परखानोक खोले दिले। आर खाट समेत लकवार बेमारीडाक यीशुर आगुत नभाय दिले। ६ यीशु उसार विश्वास देखे लकवार बेमारीडाक कोहले, “बेटा, मुई तोर पाप माफ करछी।” ७ तब शास्त्रेर कुछला ज्ञानी लोक जैला उठिन बोठे छिले, वरा अपना-अपना मनोत सोचवा लागिल, ८ “इडा लोक क्याँ इकिसम बोलछे? यहाँय त परमेश्वरेर अपमान करछे। परमेश्वरोक छोड़े आर के पाप माफ करवा पाड़े?” ९ जैखुना वरा अपना मनोत इडा बात सोचेछिले, यीशु वहीखुना अपना मनोत उसार बातला जाने लिले। वहीलाते यीशु उसाक कोहले, “तुम्हरा अपना दिलोत इकिसम क्याँ सोचेछेन? १० लकवार बेमारीडाक कि कहना आसान छे? लकवार बेमारीडाक इडा कहना कि मुई तोर पाप माफ करनूँ, ना इडा कहना कि उठेक अपना खाट उठाय बेरा। ११ मुई इकिसम करनु जसे कि तुम्हरा

जाने लुवा पारेन कि मानुषेर बेटाक दुनियाँत पाप माफ करवार अधिकार छे।” तब यीशु लकवार बेमारी लोकटाक कोहले, ११ मुई तोक कोहची, “उठेक, अपना बिछनाखान उठा आर घर चले जा।” १२ वहाँय उठिल आर बिछनाखान उठाय सभारो आगुत निकले चले गेल। इडा देखे सबकोय हैरान हंय गेल, आर परमेश्वरेर बड़ाई करे बोलवा लागिल, “हमरा इकिसम काम कभी नी देखी।”

लेवी यीशुर चेला बने जाछे

(मत्ती ९:९-१३; लूका ५:२७-३२)

१३ यीशु फेर उठिन से निकले समुन्द्रटार कछारोत गेल, आर लोकेर भीड़ वहार लिकिन ओसिल, आर वहाँय उसाक शिक्षा दुवा लागिल। १४ यीशु जवारखुना लेवी नामेर एकझन खजना लेनेवालाक खजना लुवार जगहोत बठाल देखिल। वहाँय हलफेईर बेटा छिले। यीशु वहाक कोहले, “मोर पीछूत चले ओसेक।” इडा सुने लेवी उठे यीशुर पीछूत चले गेल। १५ एक दिना यीशु लेवीर घरोत खवार तने बोठिल, उखुना बहुतझन खजना लेनेवाला आर पापी लोक यीशु आर वहार चेलालार साथे खवार तने बोठिल, क्योंकि वरा यीशुर पीछू-पीछू चलछिले १६ शास्त्रेर ज्ञानीला आर फरीसी दलेर लोकला जैखुना देखिल कि यीशु पापी लोकेर आर खजना लेनेवाला लोकेर साथे खान-पान करछे त वरा यीशुर चेलालाक पूछिल, “वहाँय खजना लेनेवाला आर पापी लोकलार साथे क्याँ खान-

पान करछे?” १७ यीशु इडा बात सुने उसाक कोहले, “जहाँय भला-चंगा छे, उसाक डाक्टर जरूरत नी होचे, मगर जहाँय बेमार छे, उसाके डाक्टर जरूरत होचे। मुई धर्मी लोकोक नी, बल्के पापी लोकोक जाब दुवा ओसिही।”

यीशुर नया शिक्षा

(मत्ती ९:१४-१७; लूका ५:३३-३९)

१८ यूहन्नार चेलाला आर फरीसीलार चेलाला उपास करछिले। इला देखे कुछुला लोक यीशुर लिकिन ओसिल आर बोलिल, “यूहन्नार चेलाला आर फरीसीलार चेलाला उपास करछे, मगर तोर चेलाला उपास क्याँ नी करछे?” १९ यीशु उसाक जवाब दिले, “जैखुन तक बरतियाला दूल्हार साथे रोहचे, वरा कि उपास करछे? नी करछे। जैखुन तक दूल्हा उसार साथे छे, वरा उपास नी करछे। २० मगर समय ओसबे, जैखुना दूल्हाक उसार लिकिन से अलग करे लिया ल जाबे, उखुना वरा उपास करबे।” २१ “कोय लोक नया कपड़ा दे पुन्ना कपड़ात चिप्पी नी लगाछे, क्योंकि नया कपड़ाखान पुन्ना कपड़ाखानोक चीरे दिबे, आर तब कपड़ाखान आगु से बेसी चीरे जाबे। २२ नया अंगुरेर रस पुन्ना चमड़ार थैलात नी राखछे, यदि राखबे त चमड़ार थैलाडा फटे जाबे, आर रसखान आर थैलाडा दोनोंखान बर्बाद हंय जाबे। वहीलाते नया अंगुरेर रस नया थैलात रखाल जाछे।”

प्रभु यीशु आरामेर दिनेर मालिक

(मत्ती १२:१-८; लूका ६:१-५)

२३ एक बार आरामेर दिनोत यीशु आर वहार चेलाला खेत दे जाछिले, आर जाते-जाते चेलाला शीशलाक तुड़े खवा लागिल। २४ इडा देखे फरीसी लोकला यीशुक पूछिल, “तोर चेलाला आरामेर दिनोत शीशलाक क्याँ सिरताछे? इकिसम करना आरामेर दिनेर नियमेर खिलाफ छे।” २५ यीशु उसाक कोहले, “तुम्हरा कि कोयखुना शास्त्रोत पढ़ेन नी? जैखुना दाऊदोक जरूरत छिले, वहाक आर वहार साथीलाक भोख लागिहिले, उखुना वहाँय की करिहिले? २६ वहाँय अबियातर महापूजारीर समय परमेश्वरेर मंदिरोत गहिले, आर परमेश्वरोक चढ़ाल रूटीला खाहिले, आर अपना साथीलाको खवा दिहिले। इला रूटीक पूजारीलाक छोड़े आर कहाको खाना उचित नी छिले।” २७ तब यीशु उसाक कोहले, “आरामेर दिनोक मानुषेर तने बनाल गहे, ना कि मानुषोक आरामेर दिनेर तने बनाल गहे। २८ वहीलाते मानुषेर बेटा आरामेर दिनेर मालिक छे।”

सुखना हाथवाला लोक अच्छा होचे

(मत्ती १२:९-१४; लूका ६:६-११)

३ फेर यीशु प्रार्थना-घरोत ढुकिल। उठिन एकझन लोक छिले, जहार एकखान हाथ सुखाय गहिले। २ फरीसी लोकला यीशुक ध्यान से

देखछिले कि अगर यीशु आरामेर दिनेर नियम भाँगे बेमार लोकटाक अच्छा करछे, त वरा वहार पर दोष लगवा पारे। ३ यीशु सुखना हाथवाला लोकटाक कोहले, “ओसेक आर लोकलार आगुत थाड़ो हंय जा।” ४ आर यीशु उसाक कोहले, “नियम मुताबिक आराम करवार दिनोत लोकेर भलाई करना उचित छे ना बुराई करना? जान बचाना उचित छे ना लोकोक मारना?” मगर वहाक कोय कुछ जवाब नी दिले। ५ यीशु गोस्सा से चारो भीति उसाक देखिल। आर उसार दिलला कठोर हवार कारण मायूस हंय गेल। वहार बाद वहाँय सुखना हाथवाला लोकटाक कोहले, “तुई अपना हाथखान बढ़ा।” आर वहाँय अपना हाथखान बढ़ाल आर वहार हाथखान अच्छा हंय गेल। ६ यहार बाद फरीसी लोकला जल्दी से जाय राजा हेरोदेशेर कुछला लोकेर साथे मिलिल आर यीशुर खिलाफ साजिश करिल कि कसे करे वरा यीशुक खतम करे।

यीशुर पाछूत लोकेर बोड़ो भीड़

७ यहार बाद यीशु अपना चेलालार साथे समुन्द्रेर भीति चले गेल। लोकेर एकटा बोड़ो भीड़ गलील प्रदेश से वहार पीछू-पीछू ओसछिले। ८ आर यहूदिया प्रदेश, यरूशलेम शहर, इदुमिया एलाकार आर यरदन लदीर उपारेर, सूर आर सैदार इलाकार बोड़ो भीड़ जब सुनिल कि यीशु बहुत चमत्कारेर काम करछे, त वरा वहार लिकिन ओसिल। ९ भीड़ेर कारण

वहाँय अपना चेलालाक कोहले, “तुम्हरा मोर तने एकखान छोटी नाव आनो जसे कि मुई नावखानोत भीड़ेर चपाचपी से दूर रही।” १० वहाँय बहुतला लोकोक अच्छा करिहिले, वहीलाते जताला लोक बेमार छिले, यीशुक लड़वार तने ठेला-ठेली करवा लागिल। ११ आर भूत धराल लोकला जैखुना वहाक देखछिले, वहार आगुत हटुवा पाड़े चिल्लाय-चिल्लाय कोहचिले, “तुई परमेश्वरेर बेटा छिस।” १२ मगर यीशु भूतलाक कड़ा से चेताय कोहले, “तुम्हरा मोर बारे लोकोक ना बताव कि मुई के छी।”

यीशुर बारहझन चेला

(मत्ती १०:१-४; लूका ६:१२-१६)

१३ यीशु पहाड़ेर पर उठिल आर जहाक-जहाक वहाँय चाहचिले, उसाक अपना लिकिन बुलाल, आर वरा वहार लिकिन ओसिल। १४ यहार बाद वहाँय बारहझनाक चुने लिले जसे कि वरा वहार साथे रहय आर वहाँय उसाक प्रचार करवा पठाय। १५ [वरा बेमारी लोकोक अच्छा करवा पारे।] आर वरा भूतलाक निकलुवार शक्ति पाय। १६ इला चेलार नाम इकिसम छिले: शिमोन (जहाक यीशु पतरस नाम दिहिले।) १७ जब्दीर दुईझन बेटा याकूब आर यूहन्ना (याकूब आर यूहन्नार नाम यीशु बोनारगेस याने “गरजनेर बेटा” राखिल।) १८ अन्द्रियास, फिलिपुस,

बरतुल्मै, मत्ती, थोमा, आर हल्फैर बेटा याकूब, तद्दे, देश-भक्त शिमोन, १९ आर यहूदा इस्किरियोती, जहाँय यीशु धोखा दे धराहिले।

पवित्र आत्मा खिलाफ बात

(मत्ती १२:२२-३२; लूका ११:१४-२३—१२:१०)

२० यहार बाद यीशु घर गेल, आर लोकेर बोड़ो भीड़ वहार लिकिन फेर जमा होल। वहीलाते वरा खाना खवा नी पारिल। २१ आर जैखुना वहार परिवारेर लोकला इडा सुनिल, त वरा वहाक अनवार तने बाहरे ओसिल क्यौँकि वरा कोहचिले, “यहाँय पगला हंय गहे।” २२ आर शास्त्रेर जैला ज्ञानी लोक यरूशलेम से ओसिहिले, वरा कोहले, “यहार भीतरोत भूतेर राजा शैतान छे, आर वहारे मदद से यहाँय भूतलाक भगाछे।” २३ आर यीशु उसाक अपनार लिकिन जाब दिले आर उसाक मिसाल दे कोहले, “शैतान कसे करे शैतानोक भगवा पारे? २४ अगर कोयडा राजोत फूट पैदा हंय जाय त उडा राज कसे करे टिके रोहबे। २५ वही किसम अगर कोयडा परिवारोत फूट पैदा हंय जाय त उडा परिवार टिके रहवा नी पारबे। २६ ठीक वही मान्दी अगर भूतेर राजा शैतान अपना भूतलार खिलाफ हंय जाय त वहार राज टिके रहवा नी पारबे, बल्के बर्बाद हंय जाबे। २७ कोय लोक एकझन ताकतवर लोकेर घरोत ढुके वहार समानलाक लूटे जवा नी पारबे, जब तक कि वहाँय पहिले उडा ताकतवर लोकोक बान्हे नी दिछे, तब वहाँय उडा लोकेर घरखानोक लूटे

जवा पारबे।” २८ मुई तुमसाक सच कोहची, “लोकेर सब किसमेर पाप आर परमेश्वरेर खिलाफ बोलवार पाप माफ होबे, २९ मगर पवित्र आत्मार खिलाफ बोलवार पाप माफ नी होबे। वहाँय हमेशार तने पापी ठहरिबे। ३० क्याँकि वरा कोहले कि यीशुर भीतरोत पवित्र आत्मा नी, मगर वहार भीतरोत भूत छे।” ३१ तब यीशुर माँ आर वहार भईला ओसिल आर बाहरे थाड़ो होल। वरा वहार लिकिन लोक पठाल आर यीशुक ओसवा कोहले। ३२ लोकेर एकटा भीड़ वहार चारो बगल बोठे छिले, आर लोकटा यीशुक कोहले, “तोर माँ आर तोर भईला बाहरे छे आर तोर साथे मुलाकात करवा चाहचे।” ३३ यीशु कोहले, “मोर माँ आर मोर भई के छे?” ३४ जैला लोक वहार चारो बगल बोठे छिले, उसाक देखाय कोहले, “यराय मोर माँ आर मोर भई छे ३५ क्याँकि जहाँय मोर पितार इच्छा मुताबिक चलछे, वहाँय मोर भई, बहिन आर माँ छे।”

बिच्चन बुननेवालार मिसाल

(मत्ती १३:१-९; लूका ८:४-८)

४ यीशु फेर समुन्द्रेर बगलोत उपदेश दुवा लागिल। आर एकटा बोड़ो भीड़ वहार चारो भीति जोड़ो हंय गेल। इडा देखे वहाँय समुन्द्रटात एकखान नावर पर बोठे गेल, आर पूराडा भीड़ समुन्द्रटार कच्छारोत छिले। २ आर वहाँय मिसाल दे लोकलाक बहुत कुछ सिखवा लागिल, आर वहाँय कहवा लागिल, ३ “तुम्हरा सुनोव। एकइन गृहस्थ बिच्चन

बुनवार तने अपना खेतोत गेल। ४ जैखुना वहाँय बिच्चन बुनछिले, कुछुला बिच्चन रास्तार बगलोत पोड़िल, आर चिड़ियाला ओसे उलाक खाय लिले। ५ कुछुला बिच्चन पत्थरीला जमीनोत पोड़िल, उठिन बेसी माटी नी हवार कारण जल्दी करे गाजे उठिल। ६ मगर जैखुना बेलाडा उठिल, गाछला झलसे सुखाय गेल क्योंकि गाछलात जड़ नी छिले। ७ कुछुला बिच्चन झाँटीत पोड़िल आर झाँटीला बड़े उलाक चापे दिले, आर उला गाछ से कोय फल नी होल। ८ आर कुछुला बिच्चन अच्छा खेतोत पोड़िल आर गाजे उठे आर बोड़ो हंय कोय तीस गुणा, कोय सैठ गुणा आर कोय सौ गुणा फल आनिल।” ९ आर वहाँय कोहले, “तुम्हरा जहाँय-जहाँय मोर बातला सुनछेन, ध्यान दे सुनो।” १० आर जैखुना यीशु आखले छिले, वहार बारहझन चेला आर जैला लोक वहार चारो भीति छिले, वहाक पूछिल, “तुई मिसाल दे क्याँ बात करछिस?” ११ यीशु उसाक कोहले, “तुमसाक परमेश्वरेर राजेर गुप्त भेदेर बारे बताल गहे, मगर जैला लोक हमसार नी छे, उसाक सब कुछु मिसालेर जरियाय बताल जाछे १२ जसे कि वरा देखे नी देखवा पारे, आर सुने नी बुझवा पारे, जसे कि वरा अपना-अपना मन बदली ना करे, आर ना पापेर माफी पाय।” १३ आर यीशु उसाक कोहले, “तुम्हरा कि इडा मिसालोक बुझवा नी पारछेन? फेर कसे करे दोसराला मिसालोक बुझवा पारभेन? १४ गृहस्थटा बिच्चन बुनछे, आर बिच्चन परमेश्वरेर

वचन छे। १५ आर जैला बिच्चन रास्तार बगलोत पोड़छे, वरा उला लोकेर मान्दी छे, जहाँय परमेश्वरेर वचन सुनछे, मगर शैतान जल्दी करे ओसे उसार दिल से वचनडाक ले चले जाछे। १६ आर जैला बिच्चनोक पत्थरीला जमीनोत बुनाल जाछे, उला बिच्चन उला लोकेर मान्दी छे, जहाँय वचनोक सुनछे, आर जल्दी करे खुशी से ग्रहण करे लिछे। १७ मगर उसार मजबूत विश्वास नी हवार कारण से बहुत थोड़ेक समय तक टिके रोहचे, जैखुना वचनेर कारण से बिपत्ति या सतावट ओसछे, वरा बहुत जल्दी विश्वास से हटे जाछे। १८ आर उला बिच्चन जैला झाँटीत पोड़िल, वरा उला लोकेर मान्दी छे, जहाँय वचनोक सुनछे, १९ मगर दुनियाँर चिन्ता आर धन-दौलतेर आर दोसरा-दोसरा चीजेर लोभ उसार दिलोत ओसछे आर वचनडाक चापे दिछे आर कोय फल अनवा नी पारछे। २० मगर जैला बिच्चनोक अच्छा जमीनोत बुनाल गेल, वरा उसार मान्दी छे, जहाँय वचनोक सुनछे, ग्रहण करछे आर फल आनछे। कोय लोक तीस गुणा, कोय सैठ गुणा आर कोय सौ गुणा फल आनछे।”

चराकेर मिसाल

(लूका ८:१६-१८)

२१ यीशु फेर उसाक कोहले, “कोय लोक चराक जलाय की टोकरीर नीचानोंत या खाटेर नीचानोंत राखछे? वहाँय की ऊँचा चड़ाकदानीर पर

नी राखछे? २२ कोय बात छुपाल नी छे जैडा बाहरे निकलाल नी जाबे। इकिसम कोय जिनिस छुपाल नी छे, जैला देखाल नी जाबे। २३ तुम्हरा जहाँय-जहाँय मोर बातला सुनछेन, ध्यान दे सुनो।” २४ यीशु आढ़ोह उसाक कोहले, “तुम्हरा हुँसियार रोहेन, जे कुछु तुम्हरा सुनछेन, ध्यान दे सुनो। जैडा नाप दे तुम्हरा नापे दिभेन, वहीडा नाम से तुमसाको नापे देयाल जाबे आर आढ़ोह बेसी करे देयाल जाबे। २५ क्याँकि जहार लिकिन छे, वहाक आढ़ोह देयाल जाबे, आर वहार लिकिन बहुत बेसी हंय जाबे। मगर जहार नी छे, वहार लिकिन जैला छे, वहार लिकिन से वहोलाव ले लियाल जाबे।”

बिच्चन से फल पैदा होचे

२६ यीशु फेर उसाक कोहले, “परमेश्वरेर राज इडा मिसालेर मान्दी छे: एकझन लोक अपना खेतोत बिच्चन बुने दिछे। २७ वहाँय रात करे सुते रोहचे आर दिन करे जागिल रोहचे, आर इला बिच्चन कुन किसम करे बढ़छे वहाक कुछु पता नी चलछे। २८ जमीनखान खुद फल आनछे, पहिले बिच्चनलात टेको होचे तब शीश होचे आर तब शीशलात दाना बने जाछे। २९ आर जैखुना दानाला पाके जाछे, तब लोकटा जल्दी करे कचिया दे उलाक काटे दिछे क्याँकि कटनीर समय ओसे गहे।”

तुड़ीर दानार मिसाल

(मत्ती १३:३१-३२; १३:३४; लूका १३:१८-१९)

३० यीशु फेर कोहले, “मुई परमेश्वरेर राजेर तुलना कुन चीजेर साथे करूम या यहार तने मुई कुन मिसाल दुम? ३१ परमेश्वरेर राज एकटा तोड़ार दानार मान्दी छे, जैडा सब बिच्चन से छोटो होचे। ३२ मगर जैखुना उडाक बुने देयाल जाछे, उडा गाजे उठोछे आर सबला साग-पातेर गाछ से बोड़ो हंय जाछे, आर इकिसम बोड़ो-बोड़ो ठल्ली निकलोछे, कि चिड़ियाला वहार छेयाँत अपना खोता बनाय लिछे।” ३३ यीशु यही मान्दी आढ़ोह बहुतला मिसाल दे, उसार समझेर मुताबिक वचनेर प्रचार करछिले। ३४ वहाँय बिना मिसाल दे उसार साथे बात नी करछिले, मगर जैखुना यीशु अपना चेलालार साथे आखले रोहछिले, उखुना वहाँय उसाक सब कुछ समझाय दिछिले।

यीशु दूनखानोक शान्त करछे

(मत्ती ८:२३-२७; लूका ८:२२-२५)

३५ वही दिना शाम करे, यीशु चेलालाक कोहले, “चलो, हमरा समुन्द्रटा पार करे उपार जई।” ३६ तब भीड़टाक छोड़े वरा यीशुक अपना साथे नावर पर चढ़ाय लिले, आर आढ़ोह कुछला नाव वहार साथे छिले। ३७ तब समुन्द्रटात एकखान बोड़ो दून उठिल, आर इकिसम धक्का मरवा लागिल कि नावखानोत पानी भरवा लागिल। ३८ मगर यीशु

नावखानेर पीछू भीति सिढ़ानोत माथा दे सुते छिले। तब चेलाला यीशुक उठाय कोहले, “गुरूजी! हमसार तने तोक की कोय फिकिर नी छे? हमरा खतम हंय जाछी।” ३९ आर वहाँय उठिल, आर दूनखानोक धमकाल, आर झीलडाक कोहले, “थमे जा आर शांत हंय जा।” आर दूनखान थमे गेल आर पूरा शांति हंय गेल। ४० यीशु उसाक कोहले, “तुम्हरा क्याँ डोराय गहेन? अलाव तक तुमसाक मोर पर विश्वास नी छे?” ४१ आर चेलाला बहुत डोराय गेल आर आपसोत कहवा लागिल, “यहाँय तब के छे कि दूनखान आर समुन्द्रटाव यहार बात मानछे?”

यीशु भूत धराल लोकोक अच्छा करछे

(मत्ती ८:२८-३४; लूका ८:२६-३९)

५ यहार बाद यीशु आर वहार चेलाला गलील समुन्द्रेर उपार गिरासिन इलाकात ओसिल। २ जैखुना यीशु नावखानेर पर से नाभछिले, एकझन भूत धराल लोक कब्रिस्थान से निकले वहार लिकिन ओसिल। ३ इडा लोक कब्रिस्थानते रोहछिले आर कोय वहाक जंजीरो से बान्हे रखवा नी पारछिले। ४ वहार हाथ पाँलात कड़ी लगाय जंजीर दे बान्हे बहुत बार रखाल गेल, मगर वहाँय कड़ीलाक भाँगे दिछिले आर जंजीरलाक छिड़ाय टुकड़ा-टुकड़ा करे दिछिले। वहाक कोय काबू करवा नी पारछिले। ५ दिन-रात वहाँय कब्रिस्थानोत आर पहाड़ेर पर चिल्लाय बेराछिले, आर अपना बदनडाक पत्थल दे जखम करछिले। ६ जैखुना

वहाँय यीशुक दूर से देखिल, वहार लिकिन दौड़े ओसिल आर वहार पाँत पोड़े गेल। ७ वहाँय जोर से चिल्लाय कोहले, “सर्वशक्तिमान परमेश्वरेर बेटा, यीशु! तुई हमसाक की करवा चाहचिस? परमेश्वरेर नामे कसम खाय बोल कि तुई मोक तकलीफ नी दिबो।” ८ क्याँकि यीशु भूतटाक बोलिल, “तुई यहार भीतर से निकले जा।” ९ यीशु वहाक पूछिल, “तोर नाम की?” वहाँय जवाब दिले, “मोर नाम फौज छे, क्याँकि हमरा बहुतझन छी।” १० भूतटा यीशुक बार-बार बिनती करे कोहले, “हमसाक इडा एलाका से बाहरे ना पठा।” ११ उठिन सोरेर एकटा बोड़ो हंजा पहाड़ेर बगलोत चरछिले। १२ आर भूतला यीशुक बिनती करे कोहले, “हमसाक सोरलार लिकिन पठाय दे आर उसार भीतरोत ढुकवा दे।” १३ वहीलाते यीशु भूतलाक जवा दिले। भूतला लोकटार भीतर से निकले सोरलार भीतरोत ढुके गेल। आर लगभग दुई हजार सोरेर हंजाडा ढालू कछारटा दे दौड़े जाय समुन्द्रोत पोड़े गेल, आर समुन्द्रोत डुबे गेल। १४ सोरेर रखवालला भागे गेल आर शहरेर आर आस-पासेर लोकलाक इडा खबर बताय दिले। इडा खबर सुने लोकला देखवार तने ओसिल कि उठिन कि होय। १५ लोकला यीशुर लिकिन ओसिल, आर देखिल कि जैडा लोकेर भीतरोत बहुतला भूत छिले, वहाँय अच्छा दिल-दिमागेर साथे कपड़ा पिन्हें शांत हंय बोठे छे। इडा देखे लोकला डोराय गेल १६ जैला लोक इडा घटनाक देखिहिले वरा

लोकलाक बताय दिले कि भूत धराल लोकटार आर सोरलार की होल।
१७ इडा देखे लोकला यीशुक बिनती करवा लागिल, “तुई हमसार
इलाका से चले जा।” १८ आर यीशु जैखुना नावखानेर पर चढ़छिले,
उखुना उडा लोक, जहाक भूत धरिहिले, यीशुक बिनती करे कोहले,
“मोहो तोर साथे रहवा चाहची।” १९ मगर यीशु राजी नी होल, आर
वहाक कोहले, “तुई अपना दोस-बन्धुलार लिकिन घुरे घर जा आर
उसाक बता कि तोर तने परमेश्वर कतेखान बोड़ो काम करिहे, आर
कतेखान दया तोर पर देखाहे।” २० वहीलाते वहाँय उठिन से चले गेल
आर दिकापुलिस इलाकात प्रचार करवा लागिल कि मोर तने यीशु
कतेखान बोड़ो काम करिहे। इडा बात सुने सबला लोक बहुत ताज्जुब
करवा लागिल।

मराल लड़की आर बेमार स्त्री

(मत्ती ९:१८-२६; लूका ८:४०-५६)

२१ तब यीशु फेर नावर पर चढ़े समुन्द्रेर उ-पार गेल। जैखुना यीशु
समुन्द्रेर कछारोत छिले, एकटा बोड़ो भीड़ वहार लिकिन जमा होल।
२२ आर प्रार्थना-घरेर एकझन नेता वहार लिकिन ओसिल। नेताडार नाम
याईर छिले। वहाँय यीशुक देखे वहार पाँलात पोड़े गेल २३ आर कोहरी
करे कोहले, “मोर दुलारी बेटी मरवार मान्दी हंय गहे। ओसे वहार पर
हाथखान राखे अच्छा करे दे जसे कि बचे रोहय।” २४ यीशु वहार साथे

गेल आर एकटा बोड़ो भीड़ वहार पीछू-पीछू गेल आर वहार चारो पाके भीड़ लगाल छिले। २५ उठिन एकइन स्त्री छिले, जहाक बारह साल से खून बहवार बेमारी छिले। २६ वहाँय बहुतइन डाक्टरेर लिकिन से इलाज करे बहुत तकलीफ उठाहे। वहार लिकिन जे कुछ छिले, सबलाक खर्च करे दिहिले, मगर अच्छा नी होल, बेमारी आढ़ोह बढ़ते गेल। २७-२८ वहाँय यीशुर कामेर बारे सुनिहिले, वहीलाते वहाँय अपना मनोत सोचिल, “मुई अगर सिरिफ वहार कपड़ाखान लाड़े ली, त मुई अच्छा हंय जाम। आर तब वहाँय भीड़ेर बीच से यीशुर पीछू भीति ओसिल आर वहार कपड़ाखान लाड़िल।” २९ आर वहीखुना वहार खून बहना बंद हंय गेल। वहाक अपना बदनडात मालूम होल कि वहार बेमारीडा अच्छा हंय गहे। ३० आर यीशुक मालूम होल कि वहार भीतर से शक्ति बाहर निकलिहे। वहाँय वहीखुना भीड़टार भीति देखिल आर पूछिल, “के मोर कपड़ाखान लाड़िल?” ३१ वहार चेलाला कोहले, “तुई देखछिस कि भीड़ेर लोकला तोर चारो भीति चपाचपी करछे। तहारो पर तुई कोहचिस, ‘के मोक लाड़िल?’” ३२ मगर यीशु चारो भीति देखवा लागिल कि के इकिसम काम करिल। ३३ मगर स्त्रीडा इडा जाने कि वहार साथे की घटना घटियेह, डोरे-डोरे आर काँपते-काँपते ओसिल आर यीशुर आगुत पोड़े गेल, आर सच बातलाक पूरापूरी बताय दिले। ३४ तब यीशु वहाक कोहले, “बेटी! तुई मोर पर विश्वास करलो,

वहीलाते मुई तोक अच्छा करे दिनु तुई शांति से चले जा आर अपना बेमारी से मुक्त हंय जा।” ३५ यीशु बोलछिले करे कि वहीखुना प्रार्थना-घरेर नेताडार घर से एकझन लोक ओसे कोहले, “तोर बेटी मोरे गेल। गुरुजीक आर क्याँ तकलीफ दिछिस?” ३६ मगर यीशु उसार बातलार पर कोय ध्यान नी दिले। आर प्रार्थना-घरेर नेताडाक कोहले, “ना डोरा, सिरिफ विश्वास करेक।” ३७ आर वहाँय खाली पतरस, याकूब आर याकूबेर भई यूहन्नाक साथे लिले। ३८ जैखुना वरा प्रार्थना-घरेर नेताडार घरोत ओसिल, वहाँय उठिन लोकलाक हल्ला करते आर जोर से कानते आर मातम करते देखिल। ३९ आर जैखुना वहाँय घरखानोत ढुकिल, वहाँय लोकलाक कोहले, “तुम्हरा क्याँ हल्ला करछेन आर कानछेन? छुवाडा नी मोरे, वहाँय निनाय गहे।” ४० इडा बात सुने लोकला वहार पर हाँसील। यीशु सभाको बाहरे निकलाय दिले, आर छुवाडार बाप, माँक आर अपना चेलालाक साथे छिले आर भीतरोत छुवाडार लिकिन गेल। ४१ छुवाडार हाथखान धरे यीशु कोहले, “तलिथा कुम।” जहार मतलब होचे, “मई! मुई तोक कोहची, ‘उठ।’” ४२ आर वहीखुना लड़कीडा उठे गेल आर बेरवा लागिल। यहार उमर बारह साल छिले। आर लोकला साथे-साथे ताज्जुब हंय गेल। ४३ आर यीशु उसाक कड़ा से कोहय दिले कि इडा बात वरा कहाको ना कोहेन आर वहाँय बोलिल, “छुवाडाक कुछु खवार तने दव।”

नासरत शहरोत यीशु अपमान

(मत्ती १३:५३-५८; लूका ४:१६-३०)

६ यीशु उठिन से निकले अपना शहर नासरत गेल, आर वहार चेलाला वहार साथे छिले। २ आर आरामेर दिनोत वहाँय प्रार्थना-घरोत गेल आर लोकलाक शिक्षा दुवा लागिल, आर जैला लोक वहार बात सुनछिले, ताज्जुब हंय गेल आर बोलवा लागिल, “इडा लोक इला बात कुनठिन पाले? यहाक कुन किसम बुद्धि देयाल गहे? इकिसम चमत्कार करवार शक्ति कुनठिन पाले? ३ यहाँय त एकटा बढई छे, जहाँय मरियमेर बेटा छे। यहाँय त याकूब, योसेस, यहूदा आर शिमोनेर भई छे। यहार बहिनला त हमसार साथे छे।” आर यहीला कारण से लोकला वहार पर विश्वास नी करिल। ४ यीशु उसाक कोहले, “एकझन नबी अपना रिस्तेदार, अपना परिवार आर अपना शहरोक छोड़े सब जोगहोत इज्जत पाछे।” ५ वहीलाते यीशु उठिन बेसी चमत्कारेर काम करवा नी पारिल, सिरिफ कुछुला बेमार लोकेर पर हाथ राखे उसाक अच्छा करिल। ६ यीशु ताज्जुबोत पोड़े गेल क्यौंकि वरा वहार पर विश्वास नी करिल। तब वहाँय चारो भीतकार बस्तीलात जाय शिक्षा दुवा लागिल।

बारहइन चेलाक पठाल जाछे

(मत्ती १०:५-१५; लूका ९:१-६)

७ तब यीशु बारहइन चेलाक अपना लिकिन बुलाल, आर उसाक दुईइन-दुईइन करे बाहरे प्रचार करवार तने पठवा लागिल, आर उसाक भूतलाक निकलुवार अधिकार दिले। ८ वहाँय उसाक हुकूम दिले, “तुम्हरा रास्तार तने एकखान लाठीर अलावा आर कुछु ना लेन। ना अपना साथे रूटी, आर ना झोला, आर ना टाका लेन। ९ तुम्हरा चप्पल पिन्हवा पारेन, मगर साथे दुईडा कूर्ता ना लेन।” १० आर यीशु उसाक कोहले, “तुम्हरा जैखान घरोत जाभेन, उठिन से जवार समय तक वहीठिन रोहेन। ११ अगर कोय जगहर लोक तुमसाक ग्रहण नी करछे, आर तुमसार बातलाक सुनते इन्कार करछे, त जैखुना तुम्हरा उठिन से जाभेन, त अपना पाँर धुला झाड़े देन, जैडा देखाबे कि वरा परमेश्वरेर आगुत दोषी छे क्योंकि वरा परमेश्वरेर वचन ग्रहण नी करिल।” १२ यहार बाद चेलाला प्रचार करवार तने चले गेल आर प्रचार करिल कि सभाको अपना-अपना पाप से मन बदली करना जरूरी छे। १३ आर वरा बहुतला भूतोक निकलाल आर बहुतइन बेमार लोकेर पर तेल लगाय उसाक अच्छा करिल।

यूहन्ना बपतिस्मादातार मौत

(मत्ती १४:१-१२; लूका ९:७-९)

१४ यीशुर नाम चारो भीति फैलते गेल। इडा खबर राजा हेरोदेश सुनिल। कुछुला लोक कोहले, “यूहन्ना बपतिस्मादाता मौत से जिन्दा हंय गहे, वहीलाते यहाँय इकिसम शक्तिशाली काम करछे।” १५ मगर दोसराला लोक कोहले, “यहाँय एलियाह नबी छे।” कुछुला लोक कोहले, “यहाँय बहुत पहिलकार एकझन नबी छे।” १६ जैखुना राजा हेरोदेश इडा खबर सुनिल, वहाँय कोहले, “यहाँय यूहन्ना छे, जहार माथा मुई कटवाय दिहिनु, वही जिन्दा हंय उठिहे।” १७ फिलिपेर पत्नी हेरोदियास छिले। हेरोदेश अपना भई फिलिपेर पत्नीक ब्याह करे लिहिले। यूहन्ना यहीडा बुराईर खिलाफ बोलिहिले, वहीलाते हेरोदेश यूहन्नाक कैद करे जेलोत दे दिहिले १८ क्योंकि यूहन्ना हेरोदेश राजाक कोहिले, “अपना भईर स्त्रीक ब्याह करे, इडा उचित बात नी छे।” १९ वहीलाते वहार पत्नी हेरोदियास यूहन्ना से नफरत करछिले, आर वहाक मारे फिकवा चाहचिले, मगर वहाँय इकिसम करवा नी पारे। २० क्योंकि राजा हेरोदेश यूहन्ना से डोराछिले आर जानछिले कि यूहन्ना एकझन धर्मी आर पवित्र लोक छे। आर वहाँय वहाक बचाय राखछिले। जैखुना राजा हेरोदेश यूहन्नार बातला सुनिल, वहाँय बहुत घबराय गेल, मगर ताहरो पर खुशी से वहार बातला सुनछिले। २१ जैखुना राजा हेरोदेशेर जनम दिन ओसिल, उखुना वहार पत्नी हेरोदियासोक एकटा अच्छा मौका मिलिल।

राजा अपना दरवारेर मन्त्रीलार आर सेनापतिलार आर गलील प्रदेशेर नेतालार तने एकटा भोज दिले। २२ उडा भोजोत हेरोदियासेर बेटी ओसे नाच करिल, आर वहार नाच देखे राजा हेरोदेश आर वहार मेहमानला खुश हंय गेल। तब राजा लड़कीडाक कोहले, “तुई की चाहचिस, माँग, मुई उडा तोक दुम।” २३ राजा कसम खाय कोहले, “तुई जैडा चाहचिस, मुई वहीडा तोक दुम। यदि तुई चहिस, त मोर आधाडा राज तक दे दुम।” २४ इडा सुने लड़कीडा अपना माँर लिकिन गेल, आर पूछिल, “मुई कि माँगुम?” वहार माँ कोहले, “यूहन्ना बपतिस्मादातार माथाडाक माँगिक।” २५ आर लड़कीडा जल्दी करे राजार लिकिन ओसिल, आर कोहले, “मोक जल्दी करे यूहन्ना बपतिस्मादातार माथाडा एकखान थालीत करे मंगवाय दे।” २६ इडा बात सुने राजाक बहुत दुःख होल, मगर कसमेर कारण से आर अपना मेहमानलार कारण से वहाँय अपना कसम भंगवा नी चाहचिले। २७ वहीलाते राजा जल्दी करे एकझन सिपाहीक जेलखानात पठाल कि वहाँय यूहन्नार माथाडाक काटे ले ओसे। २८ सिपाहीडा जेलखानात जाय यूहन्नार माथाडाक काटे एकखान थालीत ले राजार लिकिन ओसिल। राजा माथाडाक लड़कीडाक दिले, आर लड़कीडा अपना माँक दे दिले। २९ जैखुना यूहन्नार चेलाला इडा खबर सुनिल, वरा ओसे यूहन्नार लाशटाक ले जाय कबर दिले।

यीशु पाँच हजार लोकोक खिलाछे

(मत्ती १४:१३-२१; लूका ९:१०-१७; यूहन्ना ६:१-१४)

३० यीशु जैला चेलालाक प्रचार करवा पठाहिले, वरा यीशुर लिकिन घुरे ओसिल आर वरा जे कुछु करिहिले आर लोकोक सिखाहिले, सबला बात वहाक कोहय दिले। ३१ यीशु उसाक कोहले, “तुम्हरा मोर साथे एकखान सुनसान एलाकत चलो आर कुछु समय तक आराम करो।” क्यौँकि उसार लिकिन बहुत लोक ओसछिले आर जाछिले आर उसार लिकिन खवारो फूरसत नी छिले। ३२ वहीलाते वरा नावेर पर चढ़े एकखान सुनसान इलाकात चले गेल। ३३ उखुना बहुतझन लोक उसाक जाते देखिल आर लोकला उसाक चिन्हे लिले। वहीलाते आस-पासेर गाँवला से लोकला दौड़े गेल, आर चेलालार पहुँचवार आगुते उखान जगहोत गाँवेर लोकला पहुँचे गेल। ३४ यीशु जैखुना समुन्द्रटार कछारोत पहुँचिल, त वहाँय एकटा बोड़ो भीड़ोक देखिल आर उसाक देखे वहार दिलोत माया चले ओसिल, क्यौँकि उला लोक उकिसम भेड़ार मान्दी छिले, जैलार कोय रखवाल नी होचे। उठिन यीशु उसाक बहुतला बात सिखाते रोहोल। ३५ जैखुना बेलाडा ढले गेल, चेलाला यीशुर लिकिन ओसे कोहले, “इखान सुनसान जगह छे आर बेलाडाव बहुत ढले गहे। ३६ लोकलाक जवा दे जसे कि वरा चारो भीतकार बस्तीलात जाय अपना खवार तने कुछु किने ले।” ३७ मगर यीशु उसाक जवाब दिले, “तुम्हराय उसाक कुछु खवार तने दव।” चेलाला वहाक कोहले, “इसार

तने त दुई सौ चानीर सिक्का दे रूटी किनवा होबे। हमरा की अतेक खर्चा करे रूटी किने आनी आर उसाक खवार तने दी।” ३८ यीशु उसाक कोहले, “तुम्हरा बताव कि तुमसार लिकिन कतेला रूटी छे? जाव आर देखो।” वरा मालूम करे कोहले, “पाँचटा रूटी आर दुईडा माछ छे।” ३९ तब यीशु चेलालाक हुकूम दिले कि लोकलाक घासलार पर लाईन लगाय बोठवा कहव। ४० लोकला एक सौ एक सौ करे आर पचास-पचास करे लाईनोत बोठे गेल। ४१ तब यीशु उ पाँचटा रूटीक आर दुईडा माछोक ले स्वर्गेर भीति देखे परमेश्वरेर शुकुरिया करिल, आर रूटीलाक भाँगिल आर चेलालाक दिते गेल। आर चेलाला लोकलाक बाँटते गेल, आर वही मान्दी करे दुईडा माछको बाँटे दिले। ४२ खाय-दाय सभारो मन भरे गेल। ४३ खवार बाद जैला रूटीर आर माछेर टुकड़ा बचे गेल, चेलाला उलाक बारह टोकरी जमा करिल। ४४ जैला लोक रूटी खाले, वरा पाँच हजार पुरुष छिले।

यीशु पानीर पर बेराछे

(मत्ती १४:२२-३६; यूहन्ना ६:१५-२१)

४५ जल्दी करे यीशु अपना चेलालाक नावर पर बठाल आर बैतसैदा गाँव जवार तने पठाय दिले। आर तहार बाद वहाँय सबला लोकोक उठिन से पठाय दिले। ४६ भीड़ेर लोकला पठवार बाद यीशु प्रार्थना करवार तने पहाड़ेर पर गेल। ४७ आर शाम करे नावखान समुन्द्रेर बीचोत छिले, आर

यीशु आखले कछारटात छिले। ४८ हवाखान नावखानेर उलटा भीति बोहछिल। यीशु देखिल कि चेलाला नावखानोक खेपते-खेपते घबराय गेल। उखुना भोडेर समय छिले आर यीशु समुन्द्रटार पर बेराय उसार लिकिन ओसछिले, आर वहाँय चेलाला से आगु बढे जवा चाहचिले। ४९ मगर चेलाला वहाक समुन्द्रेर पर बेड़ाते देखे समझिले कि उडा भूत छे, वहीलाते वरा चिल्लाय उठिल। ५० क्याँकि वरा सबकोय वहाक देखे डोराय गेल। मगर वहीखुना यीशु उसार साथे बात करे कोहले, “तुम्हरा ना डोराव। हिम्मत करो। इडा मुई छी।” ५१ यहार बाद यीशु उसार नावखानेर पर चढ़िल आर तब दूनखान थामे गेल। आर इडा देखे चेलाला बहुत ताज्जुब करवा लागिल ५२ क्याँकि वरा पाँच रूटी दे पाँच हजार लोकोक खिलवार यीशुर शक्तिक समझवा नी पारिल क्याँकि उसार मनला सककत छिले।

यीशुर कपड़ा लारे बेमारीला अच्छा होचे

५३ आर वरा पार हंय गन्नेशरत नामेर एकखान जगहोत ओसिल आर नावखानोक कछारोत लगाल। ५४ आर जैखुना वरा नावखानेर पर से नाभिल लोकला वहीखुना यीशुक चिन्हे लिले, ५५ आर वरा आस-पासेर सबला जगहोत दौड़े गेल आर अपना-अपना बेमार लोकोक यीशुर लिकिन आनिल, जैठिन-जैठिन वरा यीशुक पाले। ५६ आर यीशु जैडा-जैडा गाँवत, शहरोत, या बस्तीलात जाछिले, लोकला बेमार लोकलाक

हाट-बजारोत सुताय दिछिले। वरा यीशुर लिकिन बिनती करिल कि वहाँय रोगीलाक सिरिफ अपना कपड़ार पाड़टाक लड़वा दे, आर जतेला रोगी वहाक लारछिले, वरा सबकोय अच्छा हंय जाछिले।

रीति-रेवाजेर बारे सवाल

(मत्ती १५:१-९)

७ यहार बाद यरूशलेम शहर से कुछुला फरीसी आर कुछुला शास्त्रेर ज्ञानी यीशुर लिकिन जोड़ो होल। २ वरा देखिल कि यीशुर कुछुला चेला बिना हाथ धोय खाना खाचे, जैडा कि यहूदी रीति-रेवाजेर खिलाफ छे ३ क्योंकि फरीसी लोक आर यहूदी लोक अपना दादो-परदादोर रीति-रेवाजेर मुताबिक बिना हाथ धोय खाना नी खाछिले। ४ हाट-बाजार से ओसवार बाद वरा अपना हाथ धोय खाना खाछिले। आढ़ोह बहुतला रीति-रेवाज छिले, जैलाक वरा मानछिले। जैकिसम कि वरा बाटी, लोटा आर ताँमाँर बरतनलाक माजे छिले आर धुछिले। ५ वहीलाते उला फरीसी आर शास्त्रेर ज्ञानी यीशुक पूछिल, “तोर चेलाला दादो-परदादोर रीति-रेवाजेर मुताबिक क्याँ नी चलछे, आर बिना हाथ धोय क्याँ खाना खाचे?” ६ यीशु उसाक जवाब दिले, “तुम्हरा कपटी छेन। बहुत पहिले यशयाह नबी तुमसार बारे ठिके बोलिहे, जैकिसम कि लिखाल छे, इला लोक त मुख से मोर इज्जत करछे, मगर उसार दिलला मोसे बहुत दूरोत छे। ७ यरा मोर भक्ति बेकार करछे, क्योंकि यरा मानुषेर नियमलाक

उपदेश कोहय लोकोक सिखाछे। ८ वहीलाते मुई तुमसाक कोहची, तुम्हरा परमेश्वरेर हुकूमलाक मनवा छोड़े दिछेन, आर मानुषेर देयाल रीति-रेवाजलाक मजबूती से धरे राखछेन।” ९ यीशु उसाक यहोडा कोहले, “तुम्हरा अपना रीति-रेवाज मनवार तने परमेश्वरेर हुकूम चालाकी से इन्कार करे दिछेन १० क्यौंकि मूसा नबी कोहये, ‘तुम्हरा अपना माँ-बाफेर इज्जत करो। आर जहाँय अपना माँ-बाफेर बुराई बोलछे, वहाक जान से मारे फिकाना जरूरी छे।’ ११ मगर तुम्हरा लोकोक नियमेर उल्टा सिखाछेन आर तब लोक अपना माँ-बाफोक कोहचे, जे कुछ मोर लिकिन से तुमसाक मिलिलतेन, उलाक मुई परमेश्वरोक दान करे दिही। १२ इकिसम करे तुम्हरा एकझन लोकोक अपना माँ-बाफेर सेवा करवा नी दिछेन। १३ इकिसम करे तुम्हरा अपना बनाल रीति-रेवाजेर चलते परमेश्वरेर वचनोक इन्कार करछेन। आर यही किसमेर आढ़ोह बहुतला काम करछेन।”

मानुषोक अशुद्ध करनेवाला चीज

(मत्ती १५:१०-२०)

१४ यहार बाद यीशु आरमाने लोकलाक अपनार लिकिन बुलाल, आर उसाक कोहले, “तुम्हरा सबकोय मोर बात सुनोव आर समझो। १५ जैला चीज बाहर से मानुषेर भीतरोत जाछे, उला मानुषोक अशुद्ध नी करछे, मगर जैला चीज मानुषेर भीतर से निकलेछे, वहीला मानुषोक अशुद्ध

करछे। १६ [जहार सुनवार कान छे, वहाँय सुने लोक।] १७ आर जैखुना यीशु भीड़टाक छोड़े घरोत ढुकिल, वहार चेलाला वहाक इडा मिसालेर बारे पूछिल। १८ तब यीशु उसाक कोहले, “तुम्हराव की उसारे मान्दी समझेछेन? तुम्हरा की नी समझेछेन, बाहर से जैला चीज मानुषेर भीतरोत जाछे, उला वहाक अशुद्ध नी करछे। १९ क्योंकि इला वहार मनडार भीतरोत नी ढुकछे, बल्के वहार पेटटात जाछे, आर बाहरे निकले जाछे।” वहीलाते यीशु सब किसमेर खवार चीजोक शुद्ध ठहराल। २० यीशु फेर कोहले, “जैला बुरा बात मानुषेर दिल से निकलेछे, वहीला मानुषोक अशुद्ध करे दिछे २१-२२ क्योंकि मानुषेर दिल से बुरा सोच, कुकरम, चूरी, हत्या, कुकरम, लोभ, बदमाशी, छल, लुच्चा, बुरा नजर, घेमस बोलनेवाला, अहंकार आर बेकूफी, इला सबला बाहर होचे। २३ इला सबला खराब बात मानुषेर भीतर से निकलेछे, आर उला मानुषोक अशुद्ध करे दिछे।”

एकझन स्त्रीर विश्वास

(मत्ती १५:२१-२८)

२४ यीशु गलील से निकले सूर आर सैदा इलाकात ओसिल आर एकखान घरोत गेल आर चाहचिले कि कोय वहार बारे ना जानोक, मगर वहाँय अपना-आपोक छिपाय रखवा नी पाड़िल। २५ उठिन एकझन स्त्री लोक छिले, जहार बेटीक भूत धरिले। वहाँय यीशुर बारे सुनिल आर

ओसे वहार पाँत पोड़े गेल। २६ उडा स्त्री एकझन गैर-यहूदी छिले आर वहार जनम सीरिया देशेर फीनीके शहरोत होईले। वहाँय अपना बेटीर भीतर से भूतटाक निकलाय दुवार तने यीशुर लिकिन बिनती करिल। २७ यीशु वहाक कोहले, “मोर यहूदी लोकोक जैडा जरूरी छे, उडा पहिले दुवा दे क्याँकि छुवालार खवार रूटीलाक ले कुत्तालाक देना ठीक नी छे।” २८ मगर स्त्रीडा यीशुक जवाब दिले, “ठिके कोहलो, प्रभु। इडा त सच छे, मगर कुत्तालाव त छुवालार टेबुलेर नीचानोंत गिराल टुकड़ालाक खाचे।” २९ यीशु वहाक कोहले, “मोर पर तोर इकिसम विश्वास छे। तुई खुशी-खुशी चले जा। तोर बेटीर भीतर से भूतटा निकले गहे।” ३० स्त्रीडा अपना घरोत ओसे देखिल कि वहार बेटी खाटेर पर सुतेछे, आर भूतटा वहार भीतर से निकले गहे।

यीशु बहिरा लोकोक अच्छा करछे

३१ यहार बाद यीशु सूर आर सैदा इलाका से निकले दिकापुलिस इलाका दे गलील समुन्द्रेर कछारोत पहुँचिल। ३२ उठिन लोकला एकझन बहिरा आर गोंगा लोकोक यीशुर लिकिन आनिल, आर बिनती करिल कि वहाँय उडा लोकेर पर हाथ राखे। ३३ तब यीशु भीड़ेर लोकलार लिकिन से वहाक अलग ले गेल, आर अपना अंगुल्लाक वहार कानलात दिले, आर अपना थूक ले वहार जीभाडाक लाड़िल। ३४ तब स्वर्गेर भीति देखे वहाँय एकटा लम्बा साँस छोड़िल, आर वहाक कोहले,

“इप्फाथाह” जहार माने “खोले जा।” ३५ वहार कानला आर जीभाडा खोले गेल, आर लोकटा साफ-साफ बोलवा लागिल। ३६ यहार बाद यीशु उसाक चेताय कोहले, “इडा बात कहाको ना कोहेन।” मगर यीशु जत्तेक बेसी करे उसाक मना करिल, अतेक बेसी करे वरा प्रचार करवा लागिल। ३७ आर लोकला बहुत ताज्जुब हंय कहवा लागिल, “वहाँय सबला काम ठीक करिहे आर वहाँय बहिरा लोकोक सुनवार शक्ति आर गोंगा लोकोक बोलवार शक्ति दिछे।”

सातटा रूटी आर चार हजार लोक

(मत्ती १५:३२-३९)

८ यहार बाद एक दिना लोकेर एकटा बोड़ो भीड़ यीशुर लिकिन जोड़ो होल, आर उसार लिकिन खवार तने कुछु नी छिले। वहीलाते यीशु अपना चेलालाक बुलाय कोहले, १ “मोक इडा भीड़ेर पर मया ओसछे, क्याँकि तीन दिन से यरा मोर साथे-साथे छे, आर इसार लिकिन खवार तने कुछु नी छे। २ अगर मुई इसाक भूखाय घर पठाय दी, त यरा रास्ताते बेहुस हंय जाबे, क्याँकि इसार भीतर से कोय-कोय बहुत दूर से ओसिहे।” ३ चेलाला यीशुक कोहले, “इखान सुनसान एलाका छे, हमरा कुनठिन से अतेला लोकेर खाना आनुम?” ४ यीशु उसाक पूछिल, “तुमसार लिकिन कतेला रूटी छे?” वरा जवाब दिले “सातटा।” ५ यहार बाद यीशु लोकलाक जमीनोत बोठवा कोहले, आर वहाँय

सातोडा रूटीक लिले। परमेश्वरेर शुक्रिया करे उलाक भाँगिल, आर अपना चेलालाक दिते गेल, आर चेलाला लोकलाक बाँटते गेल। ७ आर उसार लिकिन कुछ छोटो माछ छिले, यीशु माछलारो तने परमेश्वरेर शुक्रिया करिल, आर चेलालाक माछलाको बाँटे दुवा कोहले। ८ उसार खवार बाद सभारो मनडा भरे गेल आर सात टोकरी रूटी बचे गेल। ९ जैला लोक खाले वरा लगभग चार हजार छिले। वहार बाद यीशु उसाक बिदा करिल। १० आर यीशु वहीखुना अपना चेलालार साथे नावर पर चढ़े दलमनूता नामेर इलाकात चले गेल।

फरीसी लोकला चिन्ह देखवा चाहचे

(मत्ती १६:१-१२)

११ तब कुछला फरीसी लोक यीशुर साथे बहसबाजी करवा लागिल, आर वहाक जाँच करवार तने वहार लिकिन से स्वर्गेर एकटा चिन्ह देखवा चाहले। १२ यीशु अपना मनोत निराश हंय लंबा साँस ले बोलील, “इडा पीढ़ीर लोकला क्याँ चिन्ह देखवा चाहचे? मुई तुमसाक सच-सच कोहची इडा पीढ़ीर लोकलाक कोय चिन्ह देयाल नी जाबे।” १३ आर वहाँय उसाक छोड़े दिले, आर नावर पर चढ़े फेर समुन्द्रेर उपार चले गेल।

फरीसी आर हेरोदेशेर शिक्षा से सावधान

१४ चेलाला अपना साथे रूटी लुवा भूले गहिले, नावर पर उसार साथे सिरिफ एकटा रूटी छिले। १५ यीशु चेलालाक कोहले, “हुँसियार! तुम्हरा फरीसी लोकेर आर हेरोदेशेर खमीर से सावधान रोहेन।” १६ चेलाला अपना बीचोत बोलवा लागिल, “वहाँय इकिसम बोलछे क्याँकि हमसार लिकिन रूटी नी छे।” १७ चेलालार बात जाने यीशु उसाक कोहले, “तुम्हरा अपना बीचोत इकिसम बात क्याँ करछेन कि तुमसार लिकिन रूटी नी छे? तुम्हरा की अलाव समझवा नी पारछेन? तुमसार मनला की सककत हंय गहे? १८ तुमसार आँख रोहतोव की देखवा नी पारछेन, आर कान रोहतोव की सुनवा नी पारछेन? तुम्हरा की ख्याल करवा नी पारछेन १९ जैखुना मुई पाँचटा रूटी दे पाँच हजार लोकोक खिलाहिनु, उखुना तुम्हरा कै टोकरी रूटीर टुकड़ा उठाहिलेन?” चेलाला कोहले, “बारह टोकड़ी।” २० यीशु उसाक फेर कोहले, जैखुना मुई सातटा रूटी दे चार हजार लोकोक खिलाहिनु, उखुना तुम्हरा कै टोकरी रूटीर टुकड़ा उठाहिलेन? चेलाला कोहले, “सात टोकड़ी।” २१ तहार बाद यीशु उसाक कोहले, “तुम्हरा की अलाव बुझवा नी पारछेन?”

यीशु एकझन काना लोकोक अच्छा करछे

२२ यहार बाद यीशु आर वहार चेलाला बैतसैदा गाँवत गेल। आर उठिनकार कुछुला लोक एकटा काना लोकोक यीशुर लिकिन ले ओसिल। वरा यीशुक बिनती करे कहवा लागिल, “यहार पर अपना हाथ राखे ठीक करे दे।” २३ यीशु उडा काना लोकेर हाथ धरे बस्तीडार बाहरे ले गेल, आर वहार आँखलात थूकिल आर वहार पर अपना हाथ राखे पूछिल, “तुई की कुछु देखवा पारछिस?” २४ लोकटा माथा उठाय देखिल आर कोहले, “मुई लोकलाक देखवा पारछी, वरा गाछलार मान्दी देखा जाछे, आर वरा बेराछे।” २५ यहार बाद यीशु फेर काना लोकटार आँखलार पर अपना हाथ राखिल, आर वहार आँखला अच्छा हंय गेल, आर वहाँय सब कुछु साफ-साफ देखवा लागिल। २६ यहार बाद यीशु वहाक घर पठवारखुना कोहले, “तुई बस्तीडात ना जा।”

पतरस यीशुक मसीहा मानछे

(मत्ती १६:१३-२०; लूका ९:१८-२१)

२७ यहार बाद यीशु अपना चेलालार साथे कैसरिया फिलिप्पी शहरेर अगल-बगलेर गाँवलात गेल। रास्तात वहाँय अपना चेलालाक पूछिल, “मुई के छी, इडार बारे लोक की कोहचे?” २८ चेलाला जवाब दिले, “कोय तोक यूहन्ना बपतिस्मा देनेवाला कोहचे। कोय एलियाह कोहचे। आर कोय तोक एकझन नबी कोहचे।” २९ यीशु उसाक पूछिल, “मगर

तुम्हरा की कोहचेन, मुई के छी?” पतरस वहाक जवाब दिले, “तुई परमेश्वरेर पठाल मसीहा छिस।” ३० तब यीशु उसाक चेताय कोहले, “मोर बारे इडा बात कहाको ना कोहेन।”

यीशु अपना मौतेर बारे बताछे

(मत्ती १६:२१-२३; लूका ९:२२)

३१ यहार बाद यीशु चेलालाक शिक्षा दुवा लागिल कि मानुषेर बेटाक बहुत दुःख उठवा होबे। समाजेर नेताला, बोड़ोला पूजारी आर शास्त्रेर ज्ञानी लोकला वहाक इन्कार करबे। वहाक मारे फिकाबे, आर वहाँय तीन दिन बाद मौत से जिन्दा हंय उठबे। ३२ यीशु उसाक इडा बात साफ-साफ बताय दिले। इडा सुने पतरस यीशुक एक बगल ले जाय वहाक डाँटे कोहले, “इला बात एकदम ना बोलिस।” ३३ मगर यीशु घुरे अपना चेलालार भीति देखिल, आर पतरसोक धमकाय कोहले, “ऐ शैतान! तुई मोर आगु से दूर हंय जा, क्योंकि तुई परमेश्वरेर बातेर पर नी बल्के मानुषेर बातेर पर मन लगाछिस।” ३४ यीशु भीड़ेर लोकलाक आर चेलालाक अपना लिकिन बुलाल आर उसाक कोहले, “अगर कोय लोक मोर पाछूत ओसवा चाहचे, त वहाँय अपना मन मुताबिक ना चलोक, आर क्रुस उठाय मोर पाछूत चले ओसोक आर मोर तने दुःख उठवार तने तैयार रहोक। ३५ क्योंकि जहाँय अपना जानडा बचवा चाहचे, वहाँय उडाक हराय दिबे, मगर जहाँय अपना जानडाक मोर तने

आर मोर खुश-खबरीर तने दे दिबे, वहाँय उडाक बचाबे। ३६ अगर कोय लोक पूरा दुनियाँडाक हाँसील करे ले, आर अपना आत्मा बर्बाद करे त वहाक की लाभ होबे? ३७ मानुष अपना आत्माडाक बचवार तने की दिबे? कुछु नी दुवा पारबे। ३८ जहाँय इडा कुकरमी आर पापी पीढ़ीत मोसे आर मोर खुश-खबरीर कारण से शर्माबे, जैखुना मानुषेर बेटा अपना पिता परमेश्वरेर महिमार साथे आर पवित्र फरीस्तालार साथे ओसबे, उखुना वहाँव उसासे शर्माबे।”

९ यहार बाद यीशु चेलालाक कोहले, “मुई तुमसाक सच कोहची, इठिन कुछुला लोक थाड़ो हंय छे, जैला परमेश्वरेर राजोक शक्तिर साथे ओसते जब तक नी देखबे, तबतक नी मोरबे।”

यीशुर चेहरा बदले जाछे

(मत्ती १७:१-१३; लूका ९:२८-३६)

२ यहार छौ दिन बाद यीशु पतरस, याकूब आर यूहन्नाक साथे ले एकखान ऊँचा पहाड़ेर पर गेल, आर उसार आगुत यीशुर रूप बदले गेल। ३ वहार कपड़ाला इकिसम सादा धक-धक हंय चमकेछिले कि दुनियाँर कोय धोबी इकिसम सादा करवा नी पारबे। ४ चेलाला यीशुर साथे मूसा नबीक आर एलियाह नबीक देखिल, आर यरा दोनोंइन यीशुर साथे बात करछिले। ५ इडा देखे पतरस यीशुक कोहले, “गुरुजी!

हमसाक इठिन रहना अच्छा छे। हमरा तीनडा मण्डप बनाम। एकटा तोर तने, एकटा मूसा नबीर तने, आर एकटा एलियाह नबीर तने।”
६ पतरस नी जानछिले कि वहाँय की बोलबे, क्याँकि वरा तीनोंझन बहुत डोराय गहिले। ७ उखुना एकखान मेघ ओसे उसाक घेरे लिले, आर उखानेर भीतर से इडा आवाज होल, “यहाँय मोर प्यारा बेटा छे, यहार बात सुनोव।” ८ तब चेलाला ओचकाय चारो भीति देखिल कि यीशुर अलावा उठिन आर कोय नी छे। ९ जैखुना वरा पहाड़ेर पर से नाभछिले, यीशु उसाक चेताय कोहले, “जे कुछु तुम्हरा देखलेन, इडा बात कहाको ना कोहेन, जब तक कि मानुषेर बेटा मुर्दा से जिन्दा हंय नी उठछे।”
१० वहीलाते चेलाला इडा बातोक ख्याल राखिल, आर आपसोत बोलवा लागिल, “मौत से जिन्दा हंय उठवार माने की होचे?” ११ चेलाला यीशुक पूछिल, “गुरुजी! शास्त्रेर ज्ञानीला इडा क्याँ कोहचे कि पहिले एलियाह नबीर ओसना जरूरी छे?” १२ यीशु उसाक जवाब दिले, “इडा सच बात छे कि एलियाह नबी पहिले ओसबे आर सब कुछु ठिकठाक करे दिबे, मगर मानुषेर बेटार बारे इडा क्याँ लिखाल छे कि वहाँय बहुत दुःख उठाबे, आर अपमानित होबे? १३ मगर मुई तुमसाक कोहची, एलियाह त ओसे गहे, आर वहार बारे जैकिसम लिखाल छे, लोकला वहार साथे वही किसम बुरा व्यवहार करिल, जैकिसम वरा चाहले।”

भूत धराल लड़काडा अच्छा होल

(मत्ती १७:१४-२१; लूका ९:३७-४३)

१४ यहार बाद यीशु तीनोंझन चेलार साथे पहाड़ेर पर से नाभे दोसराला चेलार लिकिन ओसिल, वरा चारो भीति लोकेर बोड़ो भीड़ देखिल। उठिन शास्त्रेर ज्ञानीला चेलालार साथे बहस करछिले। १५ यीशुक देखवार साथे-साथे सबला लोक बहुत ताज्जूब करवा लागिल, आर वरा दौड़े ओसे वहाक सलाम करिल। १६ यीशु लोकलाक पूछिल, “तुम्हरा चेलालार साथे की बहस करछिलेन?” १७ भीड़ेर भीतर से एकझन जवाब दिले, “गुरुजी, मुई अपना बेटाक तोर लिकिन ले ओसिही, यहार भीतरीत गोंआँ भूत छे। १८ इडा भूत जैठिन वहाक धरछे, वहीठिन वहाक मोचराय गिराँय दिछे, आर मुख से गाजो निकलाछे, दाँत किरकिराछे, आर लोकटा सिक्का हंय जाछे। मुई वहाक तोर चेलालार लिकिन ले ओसिहिनु कि वरा भूतटाक निकलाय दे, मगर वरा भूतटाक निकलुवा नी पाड़िल।” १९ इडा बात सुने यीशु चेलालाक कोहले, “तुम्हरा कम विश्वासवाला लोक छेन। मुई कतेक दिन तक तुमसार साथे रोहमु? आर कतेक दिन तक तुमसार बातलाक बर्दास्त करते रोहमु? लड़काडाक मोर लिकिन ले ओसो।” २० तब वरा उडा छुवाक यीशुर लिकिन ले ओसिल, आर जैखुना भूत धराल छुवाडा यीशुक देखिल, भूतटा वहीखुना छुवाडाक मोचराय फिकाय दिले, आर वहार मुख से फेना निकलुवा लागिल, आर माटीर पर छुवाडा लोटवा लागिल। २१ यीशु

छुवाडार बाफोक पूछिल, “यहार इकिसम हालत कब से छे?” वहाँय जवाब दिले, “बचपन से। २२ इडा भूत यहाक बर्बाद करवार तने बहुत बार आगिनोत आर बहुत बार पानीत फिकाय दिछे। मगर तुई अगर कुछ करवा पारिस त हमसार पर दया करे कुछ भलाई करेक।” २३ यीशु वहाक कोहले, “अगर तुई करवा पारिस? इडा कुन किसम बात छे? विश्वास करनेवालार तने सब कुछ हवा पारे।” २४ वहीखुना छुवाडार बाप काने बोलिल, “हे प्रभु, मुई विश्वास करछी। मगर मोक मदद कर कि मुई तोर पर बेसी विश्वास करवा पारी।” २५ यीशु जैखुना देखिल कि लोकला दौड़े ओसे भीड़ लगाय दिछे, त वहाँय उडा भूतोक धमकाय कोहले, “ऐ गोंगा आर बहिरा भूत! मुई तोक हुकूम दिछी, यहार भीतर से निकले जा, आर यहार भीतरोत कभी ना ओसिस।” २६ तब उडा गोंगा भूत चिल्लाय वहाक मोचराय फिकाय दिले, आर वहार भीतर से निकले गेल। छुवाडा मुर्दार मान्दी हंय गेल आर लोकला कहवा लागिल कि वहाँय मोरे गेल। २७ मगर यीशु छुवाडार हाथ धरे उठाल, आर लड़काडा थाड़ो हंय गेल। २८ यीशु जैखुना घरोत आखले छिले, वहार चेलाला अलग से वहाक पूछिल, “हमरा भूतटाक क्याँ नी निकलुवा पारनु?” २९ यीशु चेलालाक कोहले, “इकिसम भूत प्रार्थना [आर उपास] छोड़े आर कोय दोसरा उपाय से नी निकलिबे।”

यीशु अपना मौतेर बारे फेर बताछे

(मत्ती १७:२२-२३; लूका ९:४३-४५)

३० उठिन से यीशु अपना चेलालार साथे गलील प्रदेश दे जाछिले, आर वहाँय नी चाहचिले कि कोय वहार बारे जाने कि वहाँय कुनठिन छे ३१ क्योंकि उखुना यीशु अपना चेलालाक सीखाछिले। वहाँय उसाक बोलिल, “मानुषेर बेटा यीशु लोकेर हाथोत धराल जाबे, आर लोक वहाक मारे फिकाबे, आर वहाँय मोरवार तीन दिन बाद जिन्दा हंय उठबे।” ३२ मगर चेलाला इडा बात बुझवा नी पाड़िल, आर वरा यीशुक पूछते डोराछिले।

परमेश्वरेर राजोत सबसे बोड़ो के?

(मत्ती १८:१-५; लूका ९:४६-५०)

३३ फेर वरा कफरनहूम शहरोत ओसिल आर यीशु घरखानेर भीतरोत जाय चेलालाक पूछिल, “तुम्हरा रास्तात कुन बातेर बहस करछिलेन?” ३४ मगर वरा चुप रोहिल, क्योंकि वरा रास्तात अपना बारे बहस करछिले कि हमसार बीचोत सबसे बोड़ो के छे। ३५ तब यीशु बोठे बारहझन चेलालाक अपनार लिकिन बुलाले, आर उसाक कोहले, “अगर कोय बोड़ो हवा चाहचे, त वहाँय सबसे छोटो बनोक, आर सभारो सेवा करोक।” ३६ यहार बाद यीशु एकटा छोटो छुवाक ले उसार बीचोत थाड़ो करिल, आर वहाक कोलात ले उसाक कोहले, ३७ “यदि

कोय लोक मोर नामे इला छुवार बीच से एकटा छुवाक ग्रहण करछे, वहाँय मोक ग्रहण करछे, आर जहाँय मोक ग्रहण करछे, वहाँय सिरिफ मोक नी, बल्के मोर पठाने वालाको ग्रहण करछे।”

मसीहार नामे सेवा आर इनाम

३८ तब यीशुर एकझन चेला यूहन्ना वहाक कोहले, “गुरुजी हमरा एकझन लोकोक तोर नामे भूतलाक भगाते देखनो, आर हमरा वहाक मना करनु, क्याँकि वहाँय हमसार साथे नी छे।” ३९ मगर यीशु कोहले, “वहाक मना ना करो, क्याँकि जहाँय मोर नामे कोय शक्तिर काम करछे, वहाँय मोर खिलाफ जल्दी कोय बुरा बात नी बोलबे। ४० क्याँकि जहाँय हमसार खिलाफ नी छे, वहाँय हमसार साथे छे। ४१ मुई तुमसाक सच कोहची, अगर कोय तुमसाक मसीहार लोक समझे एक गिलास पानी खिलाछे, वहाँय कोय हालतोत अपना इनाम नी हराबे।”

पापोत गिराने वालार सजई

(मत्ती १८:६-९; लूका १७:१-२)

४२ छोटो छुवालार मान्दी जहाँय मोर पर विश्वास करछे, उसार भीतर से कहाको अगर कोय लोक पापोत गिराछे, त उडा लोकेर तने इडा अच्छा होबे कि जाँतार एकटा चक्की वहार गलात बान्हे समुन्द्रोत फेके देयाल जाय। ४३ अगर तोर कोयखान हाथ तोक पाप कराछे त उखान हाथोक

काटे फेके दे। क्योंकि दुईखान हाथ ले नरकेर आगिनोत जाना से, लुल्हा हंय स्वर्गोत जाना तोर तने अच्छा छे, क्योंकि नरकेर आगिन कभी नी घेराछे। ४४ [उसार बदनडाक खानेवाला किड़ाला कभी नी मोरछे, आर उसाक जलानेवाला आगिनखान कभी नी घेराछे।] ४५ अगर तोर कोयखान हाथ तोक पाप कराछे त उखान हाथोक काटे फेके दे। क्योंकि दुईखान हाथ ले नरकेर आगिनोत जाना से, लुल्हा हंय स्वर्गोत जाना तोर तने अच्छा छे। ४६ [उठिनकार किड़ाला कभी नी मोरछे, आर नरकेर आगिनखान कभी नी घेराछे।] ४७ अगर तोर कोयडा आँख तोक पाप कराछे, त उडाक निकलाय फेके दे, क्योंकि दुईडा आँख ले नरकोत जाना से अच्छा छे कि तुई काना हंय स्वर्गोत जईस। ४८ क्योंकि नरकेर किड़ाला कभी नी मोरछे, आर आँगिनखान कभी नी घेराछे। ४९ “जैकिसम नून दे बलिदानोक शुद्ध कराल जाछे, वही किसम हर एकझनाक आगिन दे शुद्ध कराल जाबे। ५० नून त अच्छा जिनिस छे, मगर अगर नूनेर स्वाद अगर खतम हंय जाय, त उखानोक कसे करे फेर नून बनाल जाबे? वहीलाते नूनेर मान्दी बनो, आर अपना बीचोत मेल-मिलाप से रहव।”

तलाकेर बारे यीशु शिक्षा

(मत्ती १९:१-१२; लूका १६:१८)

१० यहार बाद यीशु कफरनहूम छोड़े यहूदिया प्रदेश गेल, आर यरदन नदी पार करिल। उठिन फेर बहुतला लोक वहार लिकिन जोड़ो होल, आर वहाँय अपना नियम मुताबिक लोकलाक शिक्षा दुवा लागिल।
२ वहीखुना कुछुला फरीसी लोक ओसे यीशुक जाँच करवार तने पूछिल, “नियम मुताबिक की लोक अपना पत्नीक तलाक दुवा पाड़े?” ३ यीशु उसाक जवाब दिले, “मूसा नबीर नियम तुमसाक की अनुमति दिहे?”
४ फरीसीला जवाब दिले, “मूसा नबी हमसाक अनुमति दिहे कि कोय लिखा-पढ़ी करे अपना पत्नीक तलाक दुवा पारे।” ५ यीशु उसाक कोहले, “तुमसार मनला कठोर हवार कारण से इकिसम हुकूम दिहे।
६ मगर दुनियाँडा बनवारखुना परमेश्वर उसाक पुरुष आर स्त्री करे बनाहिले। ७ यहीडा कारण से पुरुष अपना माँ-बाफोक छोड़े अपना पत्नीर साथे रोहबे। ८ आर दोनोंइन मिले एक होबे। वहीलाते वरा आर दुईइन नी, बल्के एकटा शरीर समझाल जाबे। ९ वहीलाते जहाक परमेश्वर एक साथे जोड़े दिहे, उसाक कोय लोक अलग ना करे।”
१० यहार बाद घरेर भीतरोत चेलाला वहाक फेर इडा बातेर बारे पूछिल।
११ यीशु उसाक जवाब दिले, “जहाँय अपना पत्नीक तलाक दिछे, आर दोसरा स्त्रीक ब्याह करछे, वहाँय अपना पहिलाडा पत्नीर खिलाफ

कुकरम करछे। १२ आर पत्नी अगर अपना पतिक तलाक दे, दोसराझनाक ब्याह करछे, त उडा स्त्री कुकरम करछे।”

यीशु छुवालाक आशीर्वाद दिछे

(मत्ती १९:१३-१५; लूका १८:१५-१७)

१३ तब लोकला अपना-अपना छोटो-छोटो छुवालाक यीशुर लिकिन ले ओसिल, जसे कि वहाँय छुवालार पर हाथ राखे उसाक आशीर्वाद दे। मगर चेलाला उसाक धमकाल। १४ इडा देखे यीशु नाराज होल, आर चेलालाक कोहले, “छुवालाक मोर लिकिन ओसवा दव। उसाक मना मत करो, क्योंकि परमेश्वरेर राज यही मान्दी लोकेर तने छे। १५ मुई तुमसाक सच कोहची, जहाँय-जहाँय एकझन छोटो छुवार मान्दी बने परमेश्वरेर राजोक ग्रहण नी करछे, वहाँय स्वर्ग-राजोत कभी ठुक्वा नी पारबे।” १६ यहार बाद यीशु उला छुवाक अपना कोलात लिले, आर उसार पर अपना हाथ राखे आशीर्वाद दिले।

एकझन धनवान लोकेर सवाल

(मत्ती १९:१६-३०; लूका १८:१८-३०)

१७ आर जैखुना फेर यीशु रास्ता दे जवा लागिल, उखुना एकझन लोक दौड़े ओसिल आर वहार आगुत हटुवा पाड़े कोहले, “हे गुरु! तुई एकझन अच्छा आदमी छिस। मोक बता हमेशार जिन्दगी पवार तने मोक की करवा होबे?” १८ यीशु वहाक कोहले, “तुई मोक अच्छा क्याँ

कोहचिस? परमेश्वरोक छोड़े आर कोय अच्छा नी छे। १९ तुई त हुकूमलाक जानिस, कहाको जान से ना मारेन, कुकरम ना करेन, चूरी ना करेन, झूठा गवाही ना देन, कहाको ना ठगेन आर अपना माँ-बाफेर इज्जत करेन।” २० लोकटा यीशुक कोहले, “गुरुजी! मुई इला सबला छोटो से ही मानते ओसिही।” २१ यहार बाद यीशु वहार भीति देखिल आर वहाक प्रेम से कोहले, “तोर एकखान चीजेर कमी छे। जा, जे कुछु तोर लिकिन छे, उलाक बेचे गरीबोक बाँटे दे। तहार बाद तुई ओसे मोर चेला बने जा। इलार बदले तोक स्वर्गोत धन मिलबे।” २२ इडा बात सुने लोकटा उदास हंय गेल, आर उठिन से मायूस हंय चले गेल, क्योंकि वहाँय बहुत धन-सम्पति वाला छिले। २३ उखुना यीशु चारो भीति देखिल, आर अपना चेलालाक कोहले, “धनवान लोकेर तने परमेश्वरेर राजोत ढुकना बहुत कठिन छे।” २४ यीशुर इडा बात सुने चेलाला ताज्जुब करवा लागिल। मगर यीशु चेलालाक फेर कोहले, “हे छुवाला! सुनो। [जहाँय धनेर पर भरोसा राखछे, उसार तने] परमेश्वरेर राजोत ढुकना बहुत कठिन छे।” २५ मुई तुमसाक कोहची, “सुईर काना दे ऊँट पार करना आसान छे, मगर धनी लोकेर तने परमेश्वरेर राजोत ढुकना अतेक आसान नी छे।” २६ चेलाला बहुत ताज्जुब करवा लागिल, आर आपसोत बोलवा लागिल, त कहार मुक्ति होबे। २७ यीशु उसार भीति देखिल आर कोहले, “मानुषेर तने इडा असंभव छे, मगर परमेश्वरेर तने

असंभव नी छे, वहार लिकिन सब कुछ संभव छे।” २८ पतरस यीशुक कहवा लागिल, “प्रभु! देखेक हमरा त सब कुछ छोड़े दिही, आर तोर चेला बने गही।” २९ यीशु उसाक कोहले, “मुई तुमसाक सच कोहची, जहाँय मोर तने आर परमेश्वरेर देयाल खुश-खबरीर तने अपना घर-द्वार, भाई-बहिन, माँ-बाप, छुवा-छोटोक, आर जगह-जमीन छोड़े दिहे, ३० वहाँय इडा दुनियाँत सौ गुणा बेसी, आर घर-द्वार, भाई-बहिन, माँ-बाप, छुवा-छोटो जगह-जमीन पाबे, आर साथे-साथे सतावट पाबे आर आनेवाला समयत हमेशार जिन्दगी पाबे। ३१ मगर जहाँय पहिले छे, वहाँय पाछूत होबे: आर जहाय पाछूत छे, आर वहाँय पहिले होबे।” ३२ यहार बाद यीशु आर वहार चेलाला यरूशलेम जवार रास्तात छिले, आर यीशु उसार आगु-आगु जाछिले आर चेलाला बहुत ताज्जुब करछिले, आर जैला लोक साथे जाछिले, वरा डोराय गहिले। तब यीशु अपना बारहझन चेलाक एक बगल ले जाय कहवा लागिल कि मोर पर की की होनेवाला छे। ३३ वहाँय चेलालाक कोहले, “देखो! हमरा यरूशलेम जाछी, आर मानुषेर बेटाक मुख्य पूजारीलार आर शास्त्रेर ज्ञानीलार हाथोत सोंपे देयाल जाबे, आर वरा वहाक मौतेर सजई दुवार तने दोषी करबे, आर वहाक गैर-यहूदीर हाथोत सोंपे दिबे। ३४ आर वहार मजाक उड़ाबे, वहार पर थूकबे दिबे आर कोड़ा मारबे आर मारे फिकाबे, मगर वहाँय मौतेर तीन बाद जिन्दा हंय उठबे।”

याकूब आर यूहन्नार बिनती

(मत्ती २०:२०-२८)

३५ तब जबदीर दोनोंइन बेटा याकूब आर यूहन्ना यीशुर लिकिन ओसिल, आर बिनती करे कोहले, “गुरुजी! हमरा जे कुछु तोर लिकिन माँगछी, दया करे तुई हमसार तने उडा करेक।” ३६ यीशु उसाक कोहले, “तुम्हरा मोक की करवा कोहचेन?” ३७ वरा यीशुक कोहले, “जैखुना तुई महिमार साथे राज करबो, उखुना हमसाक एकझनाक तोर दहिना बगल आर दोसराझनाक बायाँ बगल बोठवार तने मंजूर करेक।” ३८ मगर यीशु उसाक जवाब दिले, “तुम्हरा नी जानेन कि तुम्हरा की माँगछेन। जैडा दुःख भोगेर प्याला से मुई खामु, उडा की तुम्हरा खवा पारभेन? आर जैडा मौतेर बपतिस्मा मुई लुवा जाछी, तुम्हरा की उडा लुवा पारभेन?” ३९ चेलाला यीशुक जवाब दिले, “हमरा पारमु।” यीशु उसाक जवाब दिले, “हाँ, हवा पारे कि जैडा दुःख भोगेर प्याला से मुई खामु, तुम्हरा खवा सकेछेन, आर जैडा बपतिस्मा मुई लुम, तुम्हरा उडा लुवा सकेछेन, ४० मगर मोर दहिना भीति आर बाँया भीति कहाको बठाना मोर काम नी। इखान जगह उसार तने छे, जहार तने परमेश्वर तैयार करिहे।” ४१ जैखुना बाँकी दसइन चेला इडा बात सुनिल, वरा याकूब आर यूहन्नार पर गुस्सा हवा लागिल। ४२ मगर यीशु उसाक अपनार लिकिन जाब दिले, आर उसाक कोहले, “तुम्हरा जानेन कि जैला लोक अपना-अपना देशेर लोकेर पर शासन करछे, वरा उसार

राजा छे आर उसार पर अपना अधिकार चलाछे। ४३ मगर तुमसार बीचोत इकिसम नी होबे, बल्के जहाँय तुमसार बीचोत बोड़ो हवा चाहचे, वहाक तुमसार बीचोत सेवक हवा होबे। ४४ आर जहाँय तुमसार बीचोत प्रधान हवा चाहचेन, वहाक सभारो गोलाम हवा होबे। ४५ क्योंकि मानुषेर बेटा सेवा पवार तने नी, बल्के सेवा करवार तने ओसिहे, आर अपना जान दे बहुतझनार मुक्तिर दाम चुकाबे।”

यीशु बरतिमाईर आँख ठीक करछे

(मत्ती २०:२९-३४; लूका १८:३५-४३)

४६ यहार बाद यीशु आर वहार चेलाला यरीहो नामेर शहरोत ओसिल। उसार साथे एकटा बोड़ो भीड़ छिले। तिमाईर बेटा बरतिमाई रास्तार बगलोत बोठे भीख माँगछिले आर वहाँय काना छिले। ४७ आर जैखुना वहाँय सुनिल कि नासरत शहरेर यीशु उ-पाके जाछे, वहाँय चिल्लाय कहवा लागिल, “हे यीशु! दाऊद राजार बेटा! मोर पर दया करेक।” ४८ मगर बहुतझन लोक वहाक धमकाले आर वहाक चुप रहवा कोहले, मगर वहाँय आढ़ोह बेसी करे चिल्लाय-चिल्लाय बोलवा लागिल, “दाऊदेर बेटा! मोर पर दया करेक।” ४९ इडा सुने यीशु थमे गेल आर कोहले, “वहाक मोर लिकिन ओसवा कहवा।” आर लोकला काना लोकटाक बुलाय आनिल, आर वरा कोहले, “हिम्मत करेक आर उठेक। यीशु तोक बुलाछे।” ५० वहाँय अपना चादर फेके दिले, आर कुद्दे उठे

यीशु लिकिन ओसिल। ५१ यीशु वहाक पूछिल, “तुई मोक की करवा कोहचिस?” काना लोकटा यीशुक कोहले, “हे गुरु! मुई देखवा चाहची।” ५२ यीशु वहाक जवाब दिले, “मोर पर तोर विश्वास करवार कारण से तुई अच्छा हंय गेलो। तुई जवा पारिस।” वहीखुना वहाँय देखवा लागिल, आर रास्ताते वहार पाछू धरे लिले।

यीशु यरूशलेम जाछे

(मत्ती २१:१-११; लूका १९:२८-४०; यूहन्ना १२:१२-१९)

११ आर जैखुना यीशु आर वहार चेलाला यरूशलेम शहरोत पहुँचनेवाला छिले, वरा जैतून पहाड़ेर पर बैतफगे आर बैतनियाह बस्तीत पहुँचिल। आर यीशु अपना चेलालार भीतर से दुईझन चेलाक इडा कोहये पठाय दिले, १ “तुम्हरा उडा आगु भीतकार बस्तीडात जाव, आर बस्तीडात ढुकवारखुना तुम्हरा गधार एकटा बच्चाक बन्हाल पाभेन, उडार पर आजतक कोय नी चढ़े, तुम्हरा उडाक खोले ले ओसो।” २ अगर कोय तुमसाक पूछे, “तुम्हरा इकिसम क्याँ करछेन?” तुम्हरा कोहेन, “प्रभुक इडार जरूरत छे, वहाँय इडाक जल्दी वापस पठाय दिबे।” ३ तहार बाद चेलाला उठिन पहुँचिल आर गधार बच्चाडाक रास्तार बगलोत बन्हाल देखिल। जैखुना वरा बच्चाडाक खोलछिले, ४ उखुना जैला लोक उठिन थाड़ो हंय छिले, वरा बोलिल, “तुम्हरा की करछेन? गधार बच्चाडाक क्याँ खोलछेन?” ५ यीशु चेलालाक जैकिसम

कोहिले, चेलाला वही किसम जवाब दिले। तब लोकला गधार बच्चाडाक ले जवा दिले। ७ आर वरा गधार बच्चाडाक यीशुर लिकिन ले ओसिल, आर अपना कपड़ालाक उडार पर बिछाय दिले, आर यीशु बच्चाडार पर बोठे गेल। ८ यहार बाद बहुतला लोक रास्तात अपना-अपना कपड़ालाक बिछाय दिले, आर दोसराला लोक खेत से पत्ता समेत ठल्लीलाक काटे-काटे रास्तार पर बिछाय दिले। ९ आर जैला लोक यीशुर आगुत आर पीछूत जाछिले, वरा चिल्लाय-चिल्लाय बोलवा लागिल, “परमेश्वरेर जय जय कार होक! परमेश्वर वहाक आशीर्वाद दोक, जहाँय प्रभुर नामे ओसछे १० परमेश्वर आनेवाला नया राजार राजोक आशीर्वाद दोक, जहाँय हमसार पिता राजा दाऊदेर घरानार छे। स्वर्गोत जय जय कार होक!” ११ तब यीशु यरूशलेमोत जाय मन्दिरोत गेल, आर चारो भीति नजर दौड़ाय सब कुछ देखिल, आर उखुना शाम हंय गहिले, वहीलाते वहाँय बारहइन चेलार साथे बेथानी गाँवत चले गेल।

बिना फलवाला डुमरेर गाछ

(मत्ती २१:१८-१९)

१२ यहार दोसरा दिन वरा बेथानी गाँव से ओसछिले, उखुना यीशुक भोख लागिहिले। १३ उखुना डुमरेर फल पकवार समय नी छिले। तहारो पर यीशु दूर से पत्ता वाला डुमरेर गाछोक देखिल आर फल पावार

उम्मेद ले गाछटार लिकिन गेल। गाछटात पत्तालार अलावा आर कुछु नी पाले, १४ तब यीशु उडा गाछोक कोहले, “आज से तोर फलोक कभी आर कोय नी खाबे।” यीशुर चेलाला इडा बात सुनिल।

यीशु व्यापारीलाक मन्दिर से निकलाछे

(मत्ती २१:१२-१७, २०-२२; लूका १९:४५-४८; यूहन्ना २:१३-२२)

१५ तब यीशु अपना चेलालार साथे यरूशलेम पहुँचिल। आर वहाँय मंदिरोत ढुकिल आर उठिन जैला लोक किना-बेचा करछिले, उसाक भगाते गेल। वहाँय टका-पैसा अदला-बदली करनेवालार टेबुलाक आर कबूतर बेचनेवाला बेंचलाक उलटाय दिले। १६ आर वहाँय मन्दिरेर भीतर दे कहाको कोय चीज ले जवार अनुमति नी दिले। १७ यीशु उसाक बताल, “लिखाल छे, ‘मोर घर सब देशेर लोकेर तने प्रार्थनार घर कहाल जाबे। मगर तुम्हरा इखानोक डकैतेर अड्डा बनाय दिहेन।’” १८ इडा बातोक बोड़ो पूजारी आर शास्त्रेर ज्ञानीला सुनिल, आर वहीलाते वरा यीशुक खतम करवार तने उपाय सोचवा लागिल। मगर वरा यीशु से डोराछिले क्योंकि लोकला वहार उपदेश सुने ताज्जुब हंय गहिले। १९ आर जैखुना शाम होल, यीशु आर वहार चेलाला शहर से बाहर चले गेल।

सुखाल डुमरेर गाछ

२० आर वरा भोरेरखुना ओसछिले, त देखिल कि उडा डुमरेर गाछ जड़ से सुखाय गहे। २१ पतरसोक यीशुर उडा बात याद ओल, आर यीशुक कोहले, “गुरुजी! देखेक! जैडा डुमरेर गाछोक तुई श्राप दिहिलो, उडा गाछ सुखाय गहे।” २२ यीशु उसाक कोहले, “परमेश्वरेर पर विश्वास राखो। २३ मुई तुमसाक सच कोहची, अगर कोय अपना दिलोत शक ना करे आर इखान पहाड़ोक कोहय, इठिन से उठे समुन्द्रोत पोड़े जा। इडा विश्वास करे कि जैडा बात कोहले, उडा वहार तने वही किसम हंय जाबे। २४ वहीलाते मुई तुमसाक कोहची, जे कुछु तुम्हरा प्रार्थनात माँगभेन आर इडा विश्वास करेलेन कि तुमसाक मिले गेल, त तुमसार तने हंय जाबे। २५ आर जैखुना तुम्हरा प्रार्थना करवार तने थाड़ो होचेन, अगर तुमसार दिलोत कहारो खिलाफ कुछु छे, तुम्हरा वहाक माफ करे दोव, जसे कि तुमसार स्वर्गेर पिता तुमसार कसूरलाक माफ करे दे। २६ [अगर तुम्हरा कहाको माफ नी करभेन त तुमसार स्वर्गेर पिताव तुमसार कसूरलाक माफ नी करबे।”]

यीशुर अधिकारेर बारे सवाल

(मत्ती २१:२३-२७; लूका २०:१-८)

२७ यीशु आर वहार चेलाला फेर यरूशलेम शहरोत ओसिल आर जैखुना मंदिरोत बेराछिले, उखुना सबसे बोड़ोला पूजारी, आर शास्त्रेर ज्ञानीला

आर उसार समाजेर नेताला वहार लिकिन ओसे पूछवा लागिल, २८ “तुई इला काम कुन अधिकार से करछिस? आर इकिसम काम करवार अधिकार तोक के दिहे?” २९ यीशु उसाक जवाब दिले, “मोहो तुमसाक एकटा सवाल पूछेछी, ‘मोक तुम्हरा अगर जवाब दुवा पारेन त मोहो तुमसाक जवाब दुम कि इला काम मुई कुन अधिकार से करछी।’ ३० तुम्हरा बताव, यूहन्नाक बपतिस्मा दुवार अधिकार परमेश्वरेर तरफ से छिले या मानुषेर तरफ से छिले?” ३१ इडा सुने वरा आपसोत बहस करवा लागिल, “अगर हमरा बोली, परमेश्वरेर तरफ से छिले, त वहाँय कोहबे, तब तुम्हरा वहार पर क्याँ नी विश्वास करेन? ३२ अगर हमरा बोली, मानुषेर तरफ छिले, त लोकला से हमसाक डोर छे, क्योंकि लोकला यूहन्नाक सचमुच एकझन नबी मानछिले।” ३३ वहीलाते वरा यीशुक जवाब दिले, “हमरा नी जानी।” यीशु उसाक जवाब दिले, “तब मोहो तुमसाक नी बताव कि मुई कुन अधिकार से इला काम करछी।”

बदमाश किसानेर मिसाल

(मत्ती २१:३३-४६; लूका २०:९-१९)

१२ तब यीशु उसार बीचोत मिसाल दे शिक्षा दुवा लागिल। वहाँय कोहले, “एकझन लोक एकटा अंगुरेर बगान लगाल। आर इडार चारो भीति बेराह लगाल। अंगुरेर रस निकलुवार तने खाद खोदिल आर पहरा दुवार तने एकखान ऊँचा मचान बनाल। यहार बाद वहाँय बगीचाडाक

कुछ गृहस्थलाक ठिका दे प्रदेश चले गेल। २ फल तुड़वार समय बगानेर मालिक अपना एकड़न नौकरोक गृहस्थलार लिकिन फसलेर हिस्सा अनवार तने पठाल। ३ मगर गृहस्थला वहाक धरे मारिल आर खाली हाथे वहाक पठाय दिले। ४ यहार बाद बगीचार मालिक फेर दोसराड़न नौकरोक पठाल, आर वरा वहार माथाडाक जखम करे दिले, आर वहाक बेज्जत करिल। ५ मालिकटा आढ़ोह एकड़न नौकरोक उसार लिकिन पठाल, गृहस्थला वहाक जान से मारे फिकाल। यहार बाद मालिकटा आढ़ोह कुछला नौकरोक पठाल, मगर गृहस्थला कुछला नौकरोक मारपीट करिल, आर कुछलाक जान से मारे फिकाल। ६ उठिन पठवार तने मालिकटार लिकिन एकड़न लोक बाँकी छिले, जहाँय वहार प्यारा बेटा छिले। आखिरोत मालिकटा वहाको इडा सोचे उसार लिकिन पठाल कि गृहस्थला वहार बेटार इज्जत करबे। ७ मगर गृहस्थला वहाक देखे आपसोत बोलवा लागिल, यहाँय त मालिकेर असली वारिस छे। चलो, हमरा यहाक मारे फिकाई, तब इडा बगीचा हमसार हंय जाबे। ८ वहीलाते वरा वहाक धरे जान से मारे फिकाल आर अंगुरेर बगानेर बाहरे फेके दिले।” ९ अला तुम्हरा बोलो। अंगुरेर बगानेर मालिकटा की करबे? वहाँय ओसबे आर गृहस्थलाक खतम करे दिबे, आर बगीचाडा दोसराड़नार हाथोत दे दिबे। १० तुम्हरा कि शास्त्रोत नी पढ़ेन: “जैखान पत्थलोक राजमिस्त्रीला बेकार समझे फेके दिहिले,

वहीखान घरेर कोनात दुवार पत्थल बने गेल, ^{११} इडा परमेश्वरेर तरफ से होल, आर इडा हमसार नजरोत ताज्जूबेर बात छे।” ^{१२} तब धर्मेर नेताला यीशुक धरवा चाहले, क्याँकि वरा समझेछिले कि इडा मिसाल यीशु उसारे खिलाफ कोहले। मगर वरा लोकला से डोराछिले, वहीलाते वरा वहाक छोड़े चले गेल।

महाराजाक खजना दुवार बारे

(मत्ती २२:१५-२२; लूका २०:२०-२६)

^{१३} यहार बाद धर्मेर नेताला यीशुक अपना बातोत फँसवार तने कुछुला फरीसी आर राजा हेरोदेशेर दलेर कुछुला लोकोक वहार लिकिन पठाल। ^{१४} वरा यीशुर लिकिन ओसे कोहले, “गुरुजी! हमरा जानी कि तुई सच्चा छिस, आर कहारो परवाह नी करछिस, क्याँकि कहारो मुख देखे बात नी करछिस, मगर परमेश्वरेर रास्तार बारे सच्चा शिक्षा दिछिस। अला तुई बता, मूसार नियम-कानून मुताबिक रोम देशेर महाराजाक की खजना देना उचित छे? ^{१५} हमरा वहाक खजना दुम ना नी दुम?” यीशु उसार दिलेर छल-कपट समझे उसाक कोहले, “तुम्हरा मोक क्याँ जाँच करछेन? मोक एकटा सिक्का आने देखाव।” ^{१६} वरा वहार लिकिन एकटा सिक्काक ले ओसिल, आर यीशु उसाक पूछिल, “इडार पर कहार तस्वीर आर मोहर छे?” वरा यीशुक कोहले, “रोम देशेर महाराजार छे।” ^{१७} यीशु उसाक कोहले, “जैला महाराजार छे उला

महाराजाक दो, आर जैला परमेश्वरेर छे उला परमेश्वरोक दव।” वरा यीशुर इला बात सुने ताज्जुब करवा लागिल।

जिन्दा हंय उठवार बारे

(मत्ती २२:२३-३३; लूका २०:२७-४०)

१८ सदूकी दलेर लोकला विश्वास करछे कि मुर्दा लोक जिन्दा हंय नी उठबे। वरा यीशुर लिकिन ओसे पूछिल, १९ “गुरुजी! मूसा नबीर नियमोत हमसार तने इडा लिखाल छे, ‘अगर कोय लोक बिना बाल-बच्चा जन्माय मोरे जाछे, त वहार छोटो भई अपना विधवा भाभीक शादी करे बोड़ो भईर तने बाल-बच्चा पैदा करवा पाड़े।’ २० एकटा परिवारोत सातझन भई छिले। सबसे बोड़ोझन शादी करले आर बिना बाल-बच्चा पैदा करे मोरे गेल। २१ यहार बाद दोसराझन भई अपना विधवा भाभीक शादी करिल आर वहाँव बाल-बच्चा पैदा नी करे मोरे गेल, आर वही मान्दी तेसराझनो करिल। २२ यहार बाद बाँकी सबला भई करिल। इकिसम करे सातोझन भई बिना बाल-बच्चा पैदा करे मोरे गेल, आर आखिरोत स्त्रीडाव मोरे गेल। २३ अला बता, लोकला जैखुना मौत से जिन्दा हंय उठबे, उखुना उडा स्त्री सातझनार भीतर से कहार पत्नी होबे, क्योंकि वहाँय त सातोझनार पत्नी हंय गहिले।” २४ यीशु उसाक जवाब दिले, “तुम्हरा गलती करछेन, क्योंकि तुम्हरा ना त शास्त्र जानेन, आर ना परमेश्वरेर शक्तिक जानेन। २५ जैखुना वरा मुर्दा

से जिन्दा हंय उठबे, उखुना वरा ब्याह-शादी नी करबे आर ना ब्याह-शादी कराबे, बल्के वरा स्वर्गेर फरीस्तालार मान्दी होबे। २६ मौत से जिन्दा हंय उठवार बारे तुम्हरा कि मूसा नबीर किताबोत झाँड़ीर किस्सा नी पोढ़ेन?” इब्राहिम, इसहाक आर याकूबेर मरवार बहुत साल बाद उठिन परमेश्वर मूसा नबीक बोलिहे, “मुई इब्राहिमेर, इसाहकेर, आर याकूबेर, परमेश्वर छी। २७ वहीलाते वरा जिन्दा छे क्याँकि परमेश्वर जिन्दा लोकेर परमेश्वर छे, मुर्दा लोकेर नी छे। इला बातोत तुम्हरा बहुत गलतीत पड़ाल छेन।”

सबसे बोड़ो हुकूम

(मत्ती २२:३४-४०; लूका १०:२५-२८)

२८ उठिन शास्त्रेर एकइन ज्ञानी देखिल कि सदूकीला यीशुर साथे बहस करछे। वहाँय देखिल कि यीशु सदूकीलाक ठीक जवाब दिले। वहीलाते वहाँय यीशुर लिकिन एकटा सवाल ले ओसिल आर पूछिल, “सबसे बोड़ो हुकूम कुनडा छे?” २९-३० यीशु जवाब दिले, “इजराएली लोक! तुम्हरा सुनो। हमसार प्रभु परमेश्वर सिरिफ एकइन छे, जहाँय हमसार प्रभु छे। सबसे बोड़ो हुकूम इडा छे कि तुम्हरा अपना प्रभु परमेश्वरोक अपना पूरा मन से, आर पूरा जान से, आर पूरा बुद्धि से, आर पूरा शक्ति से प्रेम करो। ३१ आर दोसराडा हुकूम इडा छे कि तुम्हरा अपना पड़ोसीक अपनार मान्दी प्रेम करो। इडा से बोड़ो आर कोय हुकूम नी

छे।” ३२ शास्त्रेर ज्ञानीडा यीशुक कोहले, “गुरुजी! बहुत अच्छा! तुई सच कोहलो कि सिरिफ एकझन परमेश्वर छे। वहाक छोड़े आर कोय दोसरा नी छे। ३३ आर हमसाक वहाक पूरा मन से, आर पूरा जान से, आर पूरा बुद्धि से, आर पूरा शक्ति से प्रेम करवा लागे आर अपना पड़ोसीलाक अपनार मान्दी प्रेम करवा लागे। इ-दुईडा हुकूमोक मानना सब किसमेर दान आर बलिदान से बेसी बोड़ो छे।” ३४ यीशु देखिल कि शास्त्रेर ज्ञानीडा बहुत बुद्धिमानी से जवाब दिले, तब यीशु वहाक कोहले, “तुई परमेश्वरेर राज से दूरोत नी छिस।” यहार बाद यीशुक कुछु पूछवार कहारो हिम्मत नी होल।

मसीहा दाऊद राजार बेटा छे

(मत्ती २२:४१-४६; लूका २०:४१-४४)

३५ यहार बाद मंदिरोत उपदेश दुवारखुना यीशु कोहले, “शास्त्रेर ज्ञानीला कसे करे कोहचे कि मसीहा दाऊदेर बेटा छे? ३६ दाऊद त खुद परमेश्वरेर आत्मार जरियाय बोलिहे कि, प्रभु मोर प्रभुक कोहले, मोर दहिना बगल बोठेक, जैखुन तक मुई तोर दुश्मनलाक तोर पाँर तोलोत नी करे दिछी। ३७ दाऊद त खुद वहाक प्रभु कोहचे, त फेर कसे करे वहाँय दाऊदेर बेटा होल?” आर भीड़ेर लोकला वहार बातलाक खुशी से सुनछिले।

शास्त्रेर ज्ञानीला से हुँसियार रहवा बारे

(मत्ती २३:१-३६; लूका २०:४५-४७)

३८ यीशु लोकलाक कोहले, “तुम्हरा शास्त्रेर ज्ञानीला से हुँसियार रोहेन। वरा लम्बा-लम्बा पीरान पिन्हें घुरछे, बाजारोत लोकलार लिकिन से नमस्कार पाना पसन्द करछे। ३९ वरा प्रार्थना-घरलात सम्मानेर जगहलात बोठना पसन्द करछे। आर भोजेर घरोत अच्छा-अच्छा जगहलात बोठना पसन्द करछे। ४० वरा राँरी लोकेर धन-सम्पति चालाकी से हरपे लिछे आर लोकोक देखवार तने लम्बा-लम्बा प्रार्थना करछे। वहीलाते वरा बेसी सजई पाबे।”

एकझन गरीब राँडीर दान

(लूका २१:१-४)

४१ यहार बाद यीशु मंदिरेर भंडार घरखानेर आगुत बोठे देखछिले कि लोकला मंदिरेर भंडारोत कुन किसम करे दान दिछे। बहुतझन धनी लोक बहुत बेसी करे दान दिछिले। ४२ यहारे भीतरोत एकटा गरीब राँडी ओसे सिरिफ दुईडा तामार सिक्का दान करिल। जैडा दान एकटा आठन्नी सिक्कार बराबर छिले। ४३ यहार बाद यीशु अपना चेलालाक जाबे दे, कोहले, “मुई तुमसाक सच कोहची कि मंदिरेर भंडारोत दान करनेवाला सबला लोक से बेसी इडा गरीब राँडी दान करिल ४४ क्योंकि सबकोय अपना बेसी-बेसी धनेर भीतर से दान करिल, मगर यहाँय

अपना कम आमदानीर भीतर से जे कुछु वहार जिन्दा रहवार तने छिले,
सब कुछु दान करे दिले।”

मन्दिर नाश हवार भविष्यवाणी

(मत्ती २४:१-३; लूका २१:५-७)

१३ जैखुना यीशु मंदिर से बाहर निकलेछिले, उखुना वहार एकझन चेला वहाक कोहले, “गुरुजी! देखेक। कत्तेक बोड़ो-बोड़ो पत्थल छे आर मंदिरटा कत्तेक सुन्दर छे।” २ यीशु वहाक कोहले, “तुई की इला बोड़ो-बोड़ो घरलाक देखछिस? मगर इठिन एकखान पत्थलेर पर पत्थल नी रोहबे, सबलाक गिराय देयाल जाबे।”

दुःख आर मुसीबत

३ आर जैखुना यीशु मंदिरटार सामना-सामनी जैतून पहाड़ेर पर बोठे छिले, उखुना पतरस, याकूब, यूहन्ना आर अन्द्रियास यीशुक एक बगलोत ले जाय पूछिल, ४ “तुई हमसाक कोह कुनखुना इला घटना घटबे? आर कुन चिन्ह देखे हमरा बुझवा पारमु कि इला बात पूरा हवार समय चले ओसिये?” ५ यीशु उसाक कहवा लागिल, “हुँसियार रोहेन जसे कि कोय तुमसाक भटकाय ना दे। ६ बहुतझन मोर नामे ओसबे आर कोहबे, ‘मुई मसीहा छी’ आर बहुतझनाक भटकाय दिबे। ७ आर जैखुना तुम्हरा लड़ई आर लड़ाईर अफवाह सुनभेन। इला त होबे,

उखुना तुम्हरा घबराय ना जायेन। उखुना दुनियाँर अन्त नी होबे। ८ देश-देशेर पर चढ़ई करबे। आर राज राजेर पर चढ़ई करबे। जगह-जगह बोड़ो-बोड़ो भीचाल होबे आर आकाल पोर्बे। मगर इला चिन्ह सिरिफ तकलीफेर शुरूवात होबे। ९ मगर तुम्हरा हुँसियार रोहेन, क्योंकि लोक तुमसाक प्रार्थना-घरेर लोकेर हाथोत सोंपे दिबे आर तुमसाक प्रार्थना-घरोत मारबे, आर मोर चलते तुमसाक हाकिम आर राजालार आगुत थाड़ो कराल जाबे, आर उसार आगुत तुमसाक मोर बारे बताभेन। १० मगर इडा जरूरी छे कि परमेश्वरेर खुश-खबरी पहिले सबला देशोत प्रचार कराल जाबे। ११ आर जैखुना तुमसाक पकड़े ले जाबे आर हाकिमेर हाथोत सोंपे दिबे। उखुना की बोलवा होबे, उडा आगु से चिन्ता ना करेन। उखुना पवित्र आत्मा तुमसाक बताबे कि तुमसाक की बोलवा होबे, आर तुम्हरा वहीडा बोलभेन। उखुना तुम्हरा आपने नी बोलभेन, मगर पवित्र आत्मा तुमसाक बोलते मदद करबे। १२ उला दिनोत भई अपना भईक जाने से मारे फिकवार तने हाकिमेर हाथोत धराय दिबे, आर बाप अपना बेटाक जान से मारे फिकवार तने हाकिमेर हाथोत धराय दिबे। आर छुवाला अपना माँ-बाफेर खिलाफ उठबे आर उसाक मारे फिकाबे। १३ आर मोर कारण से सबकोय तुमसाक नफरत करबे, मगर जहाँय आखरी तक विश्वासी बने रोहबे, वहाँय बचबे।”

तकलीफेर दिन

(मत्ती २४:१५-२८; लूका २१:२०-२४)

१४ “मगर उडा दिन ओसछे, जैडा दिनोत तुम्हरा उडा दुष्ट लोकोक उठिन थाड़ो रहते देखभेन, जैठिन वहाक थाड़ो नी रहवा लागे। (पढ़नेवाला यहार मतलब समझे लोक।) उला तकलीफेर दिनोत जहाँय यहूदिया प्रदेशोत छे, वरा पहाड़ेर पर भागे जाक, १५ आर जहाँय घरेर छतेर पर रोहबे, वहाँय घर से कुछु लुवार तने नीचानोंत ना नाभोक, आर ना घरोत ढुकोक, मगर भागे जाक। १६ आर जहाँय खेतोत रोहबे, वहाँय अपना कपड़ा लुवार तने घुरे ना ओसोक। १७ उडा समय जैला स्त्रीर बच्चा होनेवाला छे आर जहाँय बच्चाक अपना दूध खिलाछे, उसार पर कतेक भयानक समय होबे। १८ तुम्हरा प्रार्थना करो कि उडा समय ठंडार मौसमोत ना ओसोक। १९ क्याँकि उला दिनोत इकिसम बिपत्ति पोरबे जैकिसम कि दुनियाँडा बनवार समय से अभी तक नी पोड़े, आर न कभी इकिसम पोड़बे। २० अगर प्रभु इला दिनोक कम नी करिलतेन, त कोय भी नी बचिलतेन, मगर वहार चुनाल लोकलार कारण से उला दिनोक परमेश्वर कम करे दिहे। २१ आर उखुना अगर तुमसाक कोय कोहय, ‘देखो, मसीहा इठिन छे, या कोहय, देखो, मसीहा उठिन छे,’ त तुम्हरा विश्वास ना करेन। २२ कुछु लोक अपना-आपोक मसीहा आर नबी कोहबे आर वरा अद्भूत काम करबे, हवा पारे कि चुनाल

लोकलाको भटकाय दे। २३ मगर तुम्हरा हुँसियार रोहेन, मुई तुमसाक आगुते सब कुछु बताय दिनु।”

मानुषेर बेटा फेर ओसबे

(मत्ती २४:२९-३५; लूका २१:२५-३३)

२४ “उला दिनोत बिपत्तिर बाद सूरजडा अन्हार हंय जाबे, आर चाँनडा अपना रोशनी नी दिबे; २५ आर ताराला आसमान से पोड़बे, आर आसमानेर सबला चीज हिले जाबे। २६ तब लोकला मानुषेर बेटाक बादलोत बहुत शक्तिर आर महिमार साथे ओसते देखबे। २७ वहाँय अपना फरीस्ताक पठाबे, आर दुनियाँर आखरी छोर से आर आसमानेर आखरी छोर तक चारो भीति से अपना चुनाल लोकलाक जोड़ो करबे।”

डूमरेर गाछेर मिसाल

२८ डूमरेर गाछ से इडा बात सीखो: जैखुना गाछटार ठल्लीला मुलायम हंय जाछे, आर वहार पत्ताला निकलेछे, त उखुना तुमसाक मालूम हंय जाछे कि गरमीर मौसम नजदीक ओसिहे। २९ वही मान्दी जैखुना तुम्हरा इला घटना घटते देखभेन, त तुम्हरा जाने जाभेन कि मानुषेर बेटा नजदीक चले ओसिहे। इकिसम कि दरवाजाडात थाड़ो हंय छे। ३० मुई तुमसाक सच कोहची, इडा पीढ़ीर लोकला खतम हवार आगुते, इला

सबला घटना घटबे। ३१ आसमान आर दुनियाँडा टले जाबे, मगर मोर बात कोयखुना नी टलबे।

हुँसियार रोहेन

(मत्ती २४:३६-४४)

३२ मगर उडा दिन या उडा समयर बारे कोय नी जाने, इकिसम कि फरीस्तालाव नी जाने, आर ना बेटा जाने, सिरिफ पिता जाने। ३३ तुम्हरा हुँसियार रोहेन, आर जागिल रोहेन, आर प्रार्थना करते रोहेन, क्याँकि तुम्हरा नी जानेन कि उडा समय कुनखुना ओसबे। ३४ उडा दिन एकटा लोकेर मान्दी छे, जहाँय एकटा दूर देशोत जाछिल, आर घर छोड़वारखुना वहाँय नौकरलार हाथोत जिम्मेदारी सोंपे दिले। वहाँय सबला नौकरोक अपना-अपना काम दे दिले आर चौकीदारोक जागते रहवार हुकूम दिले। ३५ वहीलाते तुम्हरा जागिल रहव, क्याँकि तुम्हरा उडा नी जानेन कि घरेर मालिक कुनखुना ओसबे, शाम करे, ना आध रातोत, ना मुर्गा बाँग दुवारखुना, आर ना बेहाने। ३६ इकिसम नी होय कि वहाँय ओचकाय ओसे आर तुमसाक निनाते पाय। ३७ तुमसाक मुई जैडा बोलछी उडा मुई सभाको बोलछी, जागिल रोहेन।

यीशुक मारे दुवार साजिश

(मत्ती २६:१-५; लूका २२:१-२; यूहन्ना ११:४५-५३)

१४ फसह परब आर अखमीरी रूटीर परबेर दुई दिन पहिलकार बात छे। शास्त्रेर ज्ञानीला आर बोड़ोला पूजारी यीशुक चालाकी से धरवार तने आर मारे फिकवार तने उपाय सोचवा लागिल। २ मगर वरा बोलिल, “हमरा इखान काम परबेर दिनोत नी करमु। इकिसम करले लोकलार बीचोत दंगा-फसाद शुरू हंय जाबे।”

बैतनिय्याह गाँवत यीशुर स्वागत

(मत्ती २६:६-१३; यूहन्ना १२:१-१८)

३ आर बैतनिय्याह गाँवत शिमोन नामेर एकझन लोक छिले, जहाक पहिले कुढ़ियार बेमारी छिले। जैखुना यीशु शिमोनेर घरोत छिले, आर वहाँय जैखुना खवार तने बोठिल, एकझन स्त्री संगमरमरेर बतलोत खोब दामी खाँटी इत्तर ले ओसिल आर बोतलेर मुखखान भाँगे, यीशुर माथात ढाले दिले। ४ उठिन जैला लोक छिले, उसार बीच से कुछुला लोक नाखुश हंय अपना बीचोत बोलवा लागिल, “इखान इत्तरेर इकिसम करे क्याँ बर्बादी कराल गेल? ५ इखान इत्तरोक तीन सौ दिनार से बेसी दामोत बेचाल गेलतेन, आर गरीबलाक बाँटे देयाल गेलतेन।” वहीलाते चेलाला स्त्रीडाक डँटवा लागिल। ६ उखुना यीशु उसाक कोहले, “रूको, वहाक क्याँ तंग करछेन? वहाँय त मोर तने अच्छा काम

करिहे, ७ गरीबला तुमसार साथे हरखुना रोहबे। तुम्हरा जैखुना चाहभेन, उसार भलाई करवा पारेन, मगर तुम्हरा मोक हरखुना नी पाभेन। ८ वहाँय जे कुछ करवा पारिल, वहाँय करिल। मोर कबरोत जवार आगुते वहाँय मोर बदनडार पर इतर डाले दिले। ९ आर मुई तुमसाक सच कोहची, पूराडा दुनियाँत जैठिन-जैठिन खुश-खबरी प्रचार कराल जाबे, इडा स्त्रीक याद करवार तने यहार इखान कामेर प्रचार कराल जाबे।”

गद्दार यहूदा इस्किरियोती

(मत्ती २६:१४-१६; लूका २२:३-६)

१० यहूदा इस्किरियोती यीशुर बारहझन चेलार भीतर से एकझन छिले। वहाँय धोखा दे यीशुक उसार हाथोत धराय दुवार तने बोड़ोला पूजारीर लिकिन गेल। ११ आर जैखुना बोड़ोला पूजारी यहूदार बातला सुनिल, त वरा बहुत खोश हंय गेल, आर वहाक टाका दुवार वादा करिल, आर यहूदा यीशुक धराय दुवार मौका छभवा लागिल।

चेलालार साथे फसह परबेर आखरी भोज

(मत्ती २६:१७-२५; लूका २२:७-१४, २१-२३; यूहन्ना १३:२१-३०)

१२ अखमीरी रूटीर परबेर पहिला दिनोत जैदिना फसह परबेर भेड़ार बच्चाडाक बलि कराल गेलतेन, चेलाला यीशुक पूछिल, “फसह परब खवार तने हमरा तोर तने कुनठिन जगह तैयार करमु?” १३ उखुना यीशु अपना दुईझन चेलाक इडा कोहय पठाय दिले, “तुम्हरा शहरोत जाव।

उठिन एकझन लोकोक देखभेन, जहाँय माथात पानीर घैला ले जाबे, तुम्हरा वहार पीछू-पीछू जायेन।” १४ वहाँय जैखान घरोत ठुकबे, उखान घरेर मालिकटाक कोहबेन, “गुरुजी बोलिहे, जैठिन मुई चेलालार साथे फसह परबेर भोज खामु, उडा मेहमानेर कमराडा कुनठिन छे?” १५ आर वहाँय तुमसाक दो-तल्लार एकटा बोड़ो कमरा देखाबे, जैठिन सब कुछु तैयार कराल छे। आर वहीठिन तुम्हरा हमसार तने भोजेर तैयारी करो। १६ चेलाला शहरोत चले गेल, आर यीशु जैमान्दी कोहिले, वही मान्दी देखवा पाले, आर वरा फसह परबेर तैयारी करिल। १७ आर जैखुना शाम हंय गेल, यीशु बारहझन चेलार साथे उठिन ओसिल। १८ आर जैखुना यीशु अपना चेलालार साथे बोठे खाछिले, आर यीशु कोहले, “मुई तुमसाक सच कोहची, तुमसार भीतर से एकझन मोक धोखा दे धराय दिबे, आर वहाँय मोर साथे खाचे।” १९ चेलाला उदास हंय गेल, आर वरा एक-एक करे यीशुक कहवा लागिल, “उडा कि मुई छी?” २० यीशु उसाक कोहले, “वहाँय बारहझनार भीतर से एकझन छे, जहाँय रूटीखानोक मोर साथे बाटीडात डुबाछे। २१ क्योंकि जैकिसम मानुषेर बेटार बारे शास्त्रेर लिखाल छे, वही किसम मानुषेर बेटाक धराय देयाल जाछे। हाय उडा लोकेर पर जहाँय मानुषेर बेटाक धराय दिछे! उडा लोकेर तने अच्छा होलतेन कि वहार जनम नी होलतेन।”

चेलालार साथे यीशु आखरी भोज

(मत्ती २६:२६-३०; लूका २२:१४-२०; १ कुरिनथियुस ११:२३-२५)

२२ आर खवारखुना यीशु रूटी लिले, परमेश्वरेर शुक्रिया करिल आर उडाक भाँगे चेलालाक दिले आर कोहले, “लव। इडा मोर बदन छे।” २३ आर वहाँय अंगुरे रसेर बाटीडा लिले आर शुक्रिया करे चेलालाक दिले, आर वरा सबकोय इडा बाटी से खाले। २४ आर यीशु उसाक कोहले, “इखान मोर खून छे, जैखान परमेश्वर आर मानुषेर बीचोत नया रिस्ता कायम करवार तने बहाल जाछे।” २५ मुई तुमसाक सच कोहची, “जब तक मुई परमेश्वरेर राजोत नया रस नी खाची, तब तक मुई आर अंगुरे रस कभी नी खामु।” २६ तब वरा भजन गाय जैतून पहाड़ेर पर चले गेल।

पतरसेर इन्कार करवार भविष्यवाणी

(मत्ती २६:३१-३५; लूका २२:३१-३४; यूहन्ना १३:३६-३८)

२७ तब यीशु उसाक कोहले, “तुम्हरा सबकोय मोक छोड़े दिभेन। क्योंकि लिखाल छे, ‘मुई रखवालडाक मारूम आर वहार भेड़ालाक तितर-बितर हंय जाबे।’ २८ मगर मौत से जिन्दा हवार बाद मुई तुमसासे पहिले गलील प्रदेशोत जामु।” २९ पतरस यीशुक कोहले, “अगर सबकोय छोड़े दे त छोड़े दे, मगर मुई तोक कभी नी छोड़ुम।” ३० यीशु वहाक कोहले, “मुई तोक सच कोहची कि आझे रात करे मुर्गाडा दुई

बार बाँग दुवार आगुत तुई मोक तीन बार इन्कार करबो।” ३१ मगर पतरस आढ़ोह जोर दे कोहले, “मोक अगर तोर साथे मोरे जवा हंय, तहारो पर मुई तोक इन्कार नी करूम।” यही मान्दी सबकोय कोहले।

गतसमनीर बगानोत यीशु प्रार्थना

(मत्ती २६:३६-४६; लूका २२:३९-४६)

३२ यहार बाद यीशु अपना चेलालार साथे गतसमनी नामेर एकखान जगहोत गेल। आर वहाँय अपना चेलालाक कोहले, “तुम्हरा इठिन बोठे रहव, जब तक मुई प्रार्थना करछी।” ३३ आर वहाँय पतरस, याकूब आर यूहन्नाक अपना साथे ले लिले। वहाँय बहुत परेशानी महसूस करवा लागिल। ३४ वहाँय उसाक कोहले, “मोर मनडा बहुत दुःख से भरे गहे, इकिसम कि जानडा निकले जाछे। तुम्हरा यही ठिन रहव, आर जागिल रहव।” ३५ आर यीशु थोड़ेक आगुत जाय हटुआ पारे माथाडा माटीत लगाय प्रार्थना करवा लागिल, “पिता! अगर इडा संभव छे, त इडा तकलीफेर समय मोर लिकिन से दूर हंय जाय। ३६ हे अब्बा! हे पिता! तुई सब कुछ करवा पारिस। इडा दुःखेर सजई तुई मोर लिकिन से दूर करे दे। मगर मुई जैडा चाहची उडा नी, मगर जैडा तुई चाहचिस, वहीडा होक।” ३७ यहार बाद यीशु चेलालार लिकिन घुरे ओसिल आर उसाक निनाते पाले। वहाँय पतरसोक कोहले, “शिमोन, तुई निनाछिस। तुई कि एक घंटा जागिल रहवा नी पारलो? ३८ जागते रहव आर प्रार्थना

करते रहव, जसे कि तुम्हरा परीक्षात ना पोड़ेन। आत्मा त तैयार छे, मगर, बदनडा कमजोर छे।” ३९ आर फेर यीशु गेल आर वहीकिसम बोले प्रार्थना करिल। ४० बाद करे यीशु चेलालार लिकिन ओसिल, आर उसाक निनाते पाले, क्यौंकि उसाक बहुत झुमनी धहिले। आर वरा इडा नी जानछिले कि यीशुक की जवाब दिबे। ४१ आर यीशु तेसरा बार घुरे ओसे उसाक कोहले, “तुम्हरा अलाव निनाछेन आर आराम करछेन। उठो, तुम्हरा बहुत निनाय लिहेन। समय चले ओसिहे। देखो मानुषेर बेटाक पापी लोकेर हाथोत धराय देयाल जाबे। ४२ उठो, आर इठिन से चलोव। देखो, मोक धराय देनेवाला बगलोत चले ओसिहे।”

यीशुक धोखा दे धराय दिछे

(मत्ती २६:४७-५६; लूका २२:४७-५३; यूहन्ना १८:३-१२)

४३ यीशु इला बात कोहचिले करे कि वहीखुना यहूदा चले ओसिल। यहूदा यीशुर बारहझन चेलार बीच से एकझन छिले। वहाँय एकटा भीड़ेर साथे ओसिल। भीड़ेर लोकलार लिकिन तलवार आर लाठी छिले। इसाक बोड़ोला पूजारी, शास्त्रेर ज्ञानीला आर सामाजेर नेताला पठाहिले। ४४ यीशुक पकड़ानेवाला उसाक एकटा चिन्ह दिहिले, “मुई जहाक चुमा लुम, वहीं उडा लोक छे, तुम्हरा वहाके धरे लेन आर वहाक सावधानी से ले जायेन।” ४५ वहीलाते वहाँय सीधा यीशुर लिकिन गेल, आर वहाक कोहले, “गुरुजी!” इडा कोहय वहाक बहुत चुमा लिले।

४६ यहार बाद वरा यीशुक बन्दी बनाय लिले। ४७ जैला लोक यीशुर लिकिन थाड़ो हंय छिले, उसार बीच से एकझन अपना तरवालखान टाने निकलाल आर महापूजारीर नौकरटार कानडाक काटे फिकाल। ४८ यीशु उसाक कोहले, “तुम्हरा की मोक डकैत समझे तरवाल आर लाठी ले धरवार तने ओसिहेन? ४९ मुई त तुमसार साथे छिनु आर हर दिना मंदिरोत सिखाछिनु। उखुना तुम्हरा मोक नी धरेन। मगर इला सबला घटिल जसे कि पवित्र शास्त्रेर बात पूरा हंय जाय।” ५० इडा बात सुने सबला चेला वहाक छोड़े भागे गेल। ५१ एकझन जवान सिरिफ चादर उढ़े यीशुर पीछू-पीछू जवा लागिल। ५२ लोकला जैखुना वहाक धरिल वहाँय अपना चादरटा छोड़े नाँगटे-मुँगटे भागे गेल।

महासभार आगुत यीशुर बिचार

(मत्ती २६:५७-६८; लूका २२:५४-५५, ६३-७१; यूहन्ना १८:१३-१४, १९-२४)

५३ यहार बाद लोकला यीशुक महापूजारीर लिकिन ले गेल, आर उठिन बोड़ो-पूजारीला, समाजेर नेताला आर शास्त्रेर ज्ञानीला एक साथे जोड़ो होल। ५४ पतरस कुछु दूर से यीशुर पीछू-पीछू महापूजारीर अंगनात जाय ढुकिल। उठिन वहाँय सिपाहीलार साथे बोठे आगिन तपवा लागिल। ५५ बोड़ोला पूजारी आर सभार पूरा लोकला यीशुर खिलाफ झूठा गवाह छाभछिले, जसे कि वरा वहाक मारे फिकवा पाड़े, मगर कोय गवाह नी पाले। ५६ क्याँकि यीशुर खिलाफ बहुतझन झूठा गवाह

दिछिले, मगर उसार गवाहीला एक मान्दी नी छिले। ५७ तब कुछुला लोक वहार खिलाफ झूठा गवाही दुवा लागिल आर बोलिल, ५८ “यीशु बोलिहिले, ‘मुई इडा हाथेर बनाल मंदिरोक भाँगे दुम आर तीन दिनोत फेर बनाय दुम, जैडा हाथेर बनाल नी होबे।’” ५९ यहोडा बातोत उसार गवाहीला एक मान्दी नी छिले। ६० तब महापूजारी लोकेर बीचोत थाड़ो हंय यीशुक पूछिल, “तुई क्याँ नी कोय जवाब दिछिस? लोकला तोर खिलाफ इला की बोलछे?” ६१ मगर वहाँय चुपचाप रोहोल, आर कोय जवाब नी दिले। महापूजारी फेर वहाक पूछिल, “तुई की महान परमेश्वरेर बेटा मसीहा छिस?” ६२ यीशु जवाब दिले, “हाँ। मुई छी। तुम्हरा मानुषेर बेटाक सर्वशक्तिमान परमेश्वरेर दहिना भीति बठाल देखभेन, आर वहाक आसमानोत मेघेर साथे ओसते देखभेन।” ६३ यीशुर बातला सुने महापूजारी गोस्सा हंय अपना कपड़ालाक चीरे दिले आर कोहले, “हमसाक आर कोय गवाहीर जरूरत नी छे। ६४ तुम्हरा त सुनलेन करे कि वहाँय परमेश्वरेर अपमान करले। तुमसार की फैसला छे?” आर वरा सबकोय कोहले, “यहाँय त मौतेर सजार लायक छे।” ६५ उखुना कुछु लोक वहार पर थूक फेकवा लागिल। आर वहार आँखलात पट्टी बान्हिल आर वहाक थप्पर मारे कहवा लागिल, “अगर तुई नबी छिस त बता तोक के मारिल? वहार बाद सिपाहीला वहाक ले गेल आर वराव वहाक मारिल।”

पतरस प्रभुक इन्कार करछे

(मत्ती २६:६९-७५; लूका २२:५६-६२; यूहन्ना १८:१५-१८, २५-२७)

६६ पतरस महापूजारी अंगनात छिले, उखुना महापूजारीर एकझन नौकरानी उठिन ओसिल। ६७ वहाँय पतरसोक आगिन तापते देखिल आर वहार भीति ध्यान से देखे कोहले, “तोहों त नासरत शहरेर यीशुर साथे छिलो।” ६८ मगर पतरस इन्कार करे कोहले, “तुई की बोलछिस? मोक ना मालूम छे आर ना मुई कुछु समझेछी?” इडा बात बोले पतरस अंगनार से बाहर निकले बाहरी दरवाजार लिकिन गेल, [आर वहीखुना मुर्गाडा बाँग दिले।] ६९ आर नौकरानीडा फेर पतरसोक देखे उठिन जैला लोक थाड़ो हंय छिले, उसाक बोलिल, “इडा लोक उसारे बीच से एकझन छे।” ७० पतरस फेर इन्कार करिल। उठिन जैला लोक थाड़ो हंय छिले, कुछु देर बाद वरा पतरसोक कोहले, “जरूर तुई उसार भीतर से एकझन छिस, क्याँकि तुई त गलील प्रदेशेर लोक छिस।” ७१ पतरस कसम खाय कोहले, “जहार बारे तुम्हरा बोलछेन, मुई उडा लोकोक नी जानी।” ७२ आर वहीखुना मुर्गाडा दोसरा बार बाँग दिले। पतरस यीशुर बातलाक याद करिल। यीशु पतरसोक कोहिले कि मुर्गार दुई बार बाँग दुवार पहिले तुई मोक तीन बार इन्कार करबो। इला सबला बातोक याद करे पतरस कनवा लागिल।

यीशु पिलातुसेर आगुत

(मत्ती २७:१-२, १५-२६; लूका २३:१-५, १३-२५; यूहन्ना १८:२८—१९:१६)

१५ जैखुना भोर होल बोड़ोला पूजारी, समाजेर नेताला, शास्त्रेर ज्ञानीला, आर महासभार सबला लोक मिले फैसला करिल आर वरा यीशुक बान्हे ले जाय पिलातुसेर हाथोत सोंपे दिले। २ पिलातुस यीशुक पूछिल, “तुई की यहूदी लोकेर राजा छिस?” यीशु वहाक जवाब दिले, “इडा बात तुई खुद कोहचिस।” ३ बोड़ोला पूजारी यीशुर पर बहुतला बातेर दोष लगाछिले। ४ पिलातुस फेर यीशुक पूछिल, “तुई की जवाब नी दिबो? देख, वरा तोर पर कतेक बातेर दोष लगाछे।” ५ यीशु फेर कोय जवाब नी दिले। आर वहीलाते पिलातुस ताज्जूब करवा लागिल।

यीशुक मौतेर सजई देयाल जाछे

६ रेवाज मुताबिक फसह परबेर समय पिलातुस कोय एकटा कैदीक छोड़े दिछिले, जहाक लोकला छोड़े दुवा चाहचिले। ७ उडा समय बरब्बा नामेर एकझन कैदी कुछुला कैदीर साथे जेलखानात छिले, वरा सरकारेर खिलाफ बगावत करे लोकोक जान से मारे फिकाहिले। ८ भीड़ेर लोकला पिलातुसेर लिकिन ओसे बिनती करे कोहले, “तुई हमसार तने जैकिसम करते ओसिहिस, वही किसम करेक।” ९ पिलातुस उसाक जवाब दिले, “तुम्हरा की चाहचेन? मुई की तुमसार तने यहूदी लोकेर राजाक छोड़े दी?” १० पिलातुस अच्छा करे जानछिले

कि बोड़ोला पूजारी जलनेर कारण से यीशुक वहार हाथोत धराय दिहे।
११ मगर बोड़ोला पूजारी भीड़ेर लोकलाक उसकाय दिले कि वरा
पिलातुसोक बोले कि पिलातुस यीशुक नी, मगर बरब्बाक छोड़े दे।
१२ पिलातुस फेर भीड़ेर लोकलाक पूछिल, “तब मुई उडा लोकोक की
करूम, जहाक तुम्हरा यहूदी लोकेर राजा कोहचेन?” १३ लोकला
चिल्लाय कोहले, “वहाक क्रुसेर पर चढ़ाव।” १४ पिलातुस उसाक
कोहले, “क्याँ? वहाँय कुन बुड़ाई करिहे?” मगर लोकला आढ़ो
चिल्लाय बोलिल, “वहाक क्रुसेर पर चढ़ाव।” १५ वहीलाते पिलातुस
भीड़ेर लोकलाक खुश करवार तने बरब्बाक उसार तने छोड़े दिले, आर
यीशुक कोड़ा मरवाल आर तब क्रुसेर पर चढ़वार तने सिपाहीलार
हाथोत सोंपे दिले।

सिपाहीला यीशुर अपमान करछे

(मत्ती २७:२७-३१; यूहन्ना १९:२-३)

१६ सिपाहीला यीशुक पिलातुस राजपालेर महलोत ले गेल, आर वरा
एक साथे सिपाहीलार पूराडा झुंडोक जोड़ो करिल। १७ आर सिपाहीला
यीशुक बैगनी रंगेर कपड़ा पिन्हाल, आर काँटार एकटा मुकुट बनाय
वहार माथात पिन्हाय दिले। १८ आर वरा यीशुक सलाम करवा लागिल
आर कोहले, “यहूदी लोकेर राजा! तोर जय होक।” १९ आर वरा यीशुर
माथाडात एकखान लाठी दे बार-बार मरवा लागिल, आर वहार पर थूक

फेकवा लागिल, आर वहार आगुत हटुवा पारे प्रणाम करवा लागिल।
२० यीशुक मजाक उड़वार बाद सिपाहीला वहार बैगनी कपड़ा खोले
लिले, आर वहार अपना कपड़ालाक पिन्हाय दिले। तब वरा वहाक
क्रुसेर पर चढ़वार तने बाहरे ले गेल।

यीशुक क्रुसेर पर चढ़ाल जाछे

(मत्ती २७:३२-४४; लूका २३:२६-४३; यूहन्ना १९:१७-२७)

२१ कुरेन शहरेर शिमोन नामेर एकझन लोक एकटा गाँव से निकले
शहरेर भीति जाछिले। यहाँय सिकन्दर आर रूफोसेर बाप छिले।
सिपाहीला वहाक यीशुर क्रुसटा ले जवार तने जबरदस्ती धरे लिले।
२२ आर सिपाहीला यीशुक गोलगाथा नामेर एकखान जगहोत ले
ओसिल। यहार माने होचे खोपड़ीर जगह। २३ आर वरा मुर्र गाछेर दूध
अंगुरेर रसोत मिलाय यीशुक खवार तने दिले, मगर वहाँय नी खाले।
२४ आर वरा यीशुक क्रुसेर पर चढ़ाल, आर सिपाहीला यीशुर
कपड़ालाक आपसोत बाँटे लुवार तने लौटरी लगाल कि कहाक की
लुवा होबे। २५ नौ बजे दिनोत वरा यीशुक क्रुसेर पर चढ़ाल। २६ यीशुर
पर दोष लगवार तने एकखान दोष-पत्र लिखाल गेल आर क्रुसटार पर
लटकाय देयाल गेल। इखानोत लिखाल छिले, “यहूदी लोकेर राजा।”
२७ आर वरा दुईझन डकैतको यीशुर साथे क्रुसेर पर चढ़ाल। एकझनाक
वहार दहिना बगल आर दोसराझनाक वहार बाँया बगल चढ़ाल गेल।

२८ [आर इकिसम पवित्र शास्त्रेर इडा बात पूरा होल, जैडा यीशुर बारे लिखाल छे, “वहाक अपराधी लोकेर साथे गेनती कराल गेल।”]
२९ जैला लोक उपाके जाछिले-ओसछिले, वरा माथा हिलाय-हिलाय वहार बेज्जत करछिले, “तुई त मंदिरडाक भाँगे दुवा चाहचिलो आर उडाक तीन दिनोत बनाय दुवा चाहचिले। ३० अपना-आपोक बचा, आर क्रुसेर पर से नाभे जा।” ३१ यही मान्दी, बोड़ोला पूजारी, आर शास्त्रेर ज्ञानीला यीशुर मजाक उड़ाय अपना बीचोत बोलवा लागिल, “यहाँय दोसराला लोकोक बचाल, मगर अपना-आपोक बचवा नी पारछे। ३२ अगर वहाँय मसीहा आर इजराएली लोकेर राजा छे, त क्रुसेर पर से नाभे देखाक जसे कि हमरा इडा देखे वहार पर विश्वास करवा पाड़ी।” यही मान्दी उ-दुईझन डाकूवो यीशुर बदनाम करिल, जैलाक क्रुसोत चढ़ाल गहिले।

यीशु अपना प्राण त्यागछे

(मत्ती २७:४५-५६; लूका २३:४४-४९; यूहन्ना १९:२८-३०)

३३ यहार बाद १२ बजे दिन से ३ बजे तक पूराडा देशोत अन्हार हंय रोहोल। ३४ आर बेला ३ बजे यीशु जोर से चिल्लाय बोलिल, “इलोई, इलोई लमा शबक्तनी?” जहार माने होचे, “हे! मोर परमेश्वर! हे! मोर परमेश्वर! तुई मोक क्याँ छोड़े दिलो?” ३५ आर बगलोत जैला लोक थाड़ो हंय छिले, उसार बीच से कुछुला लोक इडा बात सुने कोहले,

“देखो, यहाँय एलियाहक जाब दिछे।” ३६ उखुना एकझन लोक दौड़े गेल आर एकखान स्पोंजोक खट्टा अंगुरेर रसोत डुबाल आर एकखान लाठीर पर राखे वहाक खवार तने दिले। लोकटा कोहले, “हमरा देखी कि एलियाह यहाक नभवार तने ओसछे ना नी।” ३७ यहार बाद यीशु जोर से चिल्लाय अपना प्राण दे दिले। ३८ आर उखुना मंदिरेर पर्दाखान उपर से नीचान तक चीरे दुई भाग हंय गेल। ३९ आर सैनिकेर हाकिमडा जहाँय यीशुर भीति मुख करे थाड़ो हंय छिले, वहाँय यीशुक इकिसम करे मोरते देखे, बोलिल, “सचमुच इडा लोक परमेश्वरेर बेटा छिले।” ४० उठिन कुछुला स्त्री दूर से थाड़ो हंय इला देखछिले। उसार बीच से मरियम मगदलीनी, छोटो याकूब, आर यूसुफेर माँ मरियम, आर सलोमी छिले। ४१ यीशु जैखुना गलील प्रदेशोत छिले। इला स्त्री वहार साथे सबठिन जाछिले, आर वहार सेवा करछिले। आढ़ो बहुतला स्त्री, जैला यीशुर साथे-साथे यरूशलेम शहरोत ओसिहिले, वराव यीशुर साथे उठिन छिले।

यीशुक कबरोत रखाल जाछे

(मत्ती २७:५७-६१; लूका २३:५०-५६; यूहन्ना १९:३८-४२)

४२ आर इडा दिन फसह परबेर तैयारीर दिन, यानी आरामेर दिनेर एक दिन आगुत। ४३ जैखुना शाम हंय गेल, उखुना अरिमतियाह गाँवर यूसुफ हिम्मत करे ओसिल आर पिलातुसेर लिकिन जाय यीशुर लाशटाक

माँगिल, आर यूसुफ महासभार एकझन सम्मानित सदस्य छिले, आर वहाँय परमेश्वरेर राजेर तने इन्तेजार करछिले। ४४ पिलातुस ताज्जुब हंय गेल कि यीशु अतेक जल्दी मोरे गेल। वहाँय एकझन सिपाहीर हाकिमोक बुलाय पूछिल, “सचमुच यीशुर मौत होये की नी?” ४५ आर पिलातुस जैखुना हाकिमडार लिकिन से जनवा पारिल कि यीशु मोरे गहे, वहाँय लाशटाक यूसुफेर हाथोत सोंपे दुवार मंजूरी दे दिले। ४६ आर यूसुफ जाय एकखान मखमल कपड़ा किने आनिल आर यीशुर लाशटाक क्रुसेर पर से नभाय उखान कपड़ा दे लेपटिल आर एकटा कबरोत राखिल। उडा कबर पहाड़खानोक काटे बनाहिले, आर एकखान पत्थलोक कबरटार मुखेर पर राखे बन करे दिले। ४७ यीशुर लाशटाक जैठिन रखाल गेल, इडा मरियम मगदलीनी आर यीशुर माँ मरियम देखिल।

यीशु जिन्दा हंय उठछे

(मत्ती २८:१-८; लूका २४:१-१०; यूहन्ना २०:१-१०)

१६ आरामेर दिन खतम हवार बाद मरियम मगदलीनी, याकूबेर माँ मरियम, आर सलोमी यीशुर बदनडात लेप लगवार तने मोहकाल मसाला किने आनिहिले। २ सप्ताहार पहिला दिन एतवारेर दिन बड़्डी भोरे, बेलाडा उठवारखुना वरा कबरटार लिकिन गेल। ३ उखुना वरा अपना बीचोत बोलवा लागिल, “कबरटार मुखखान से पत्थलखानोक

के सड़काय दिबे?” ४ मगर जवार बाद वरा देखिल कि कबरटार मुखखान से पत्थलखान सड़काल छे, आर उखान पत्थल बहुत बोड़ो छिले। ५ कबरटार भीतरोत ढुके वरा देखिल कि सादा कपड़ा पिन्हें एकझन जवान लोक दहिना बगल बोठे छे, वहाक देखे स्त्री लोकला चकित हंय गेल। ६ उडा लोक स्त्रीलाक कोहले, “तुम्हरा चकित ना हव। तुम्हरा नासरत शहरे यीशुक छाभछेन, जहाक क्रुसेर पर चढ़ाल गहिले। वहाँय इठिन नी छे। वहाँय जिन्दा हंय उठिहे। जैठिन वहाक रखाल गहिले उखान जगहोक देखो। ७ तुम्हरा जाव आर वहार चेलालाक आर पतरसोक बताव कि वहाँय तुमसार पहिले गलील प्रदेश जाछे। उठिन तुम्हरा वहाक देखभेन, जैकिसम कि वहाँय तुमसाक कोहिले।” ८ आर स्त्रीला कुछु बुझवा नी पाड़िल। वरा काँपते-काँपते कबरटा से बाहरे निकलिल आर दौड़े भागे गेल। वरा कहाको कुछु नी कोहले, क्योंकि वरा खोब डोराय गहिले।

यीशु मरियम मगदलीनीक देखा दिछे

(मत्ती २८:९-१०; यूहन्ना २०:११-१८)

९ [सप्ताहार पहिला दिन एतवारेर दिनोत भोरेरखुना यीशु जिन्दा हंय उठिल, आर वहाँय पहिले मरियम मगदलीनीक देखा दिले, जहार भीतर से यीशु सातटा भूतोक निकलाहिले। १० यीशुक देखवार बाद मरियम मगदलीनी उला चेलाक खबर दिले, जैला चेला यीशुर साथे रोहछिले,

उखुना वरा दुःखोत छिले आर कानछिले। ११ मगर वरा इडा बातोक विश्वास नी करिल कि यीशु जिन्दा हंय उठिहे आर मरियम मगदलीनी यीशुक देखिहे।

यीशु दुईझन चेलाक देखा दिछे

(मत्ती २८:१६-२०; लूका २४:१३-४९; यूहन्ना २०:१९-२३; मसीह-दूत १:६-८)

१२ यीशुर दुईझन चेला जैखुना गाँवर भीति बेराय जाछिले, उखुना यीशु दोसरा रूपोत उसाक देखा दिले। १३ आर वरा दोनोंझन घुरे जाय बाँकीला चेलाक खबर दिले, मगर उला चेला इ-दुईझन चेलार बातलार पर विश्वास नी करिल।

यीशु एगारोझन चेलाक देखा दिछे

१४ यहार बाद यीशु अपना एगारोझन चेलाक देखा दिले, उखुना वरा खाछिले, आर यीशु उसार अविश्वासेर कारण आर सक्कत मन हवार कारण से डाँटिल, क्यौंकि वरा उसार बातलाक विश्वास नी करिल, जैला लोक वहाक जिन्दा हंय उठवार बाद देखिहिले। १५ आर यीशु उसाक कोहले, “तुम्हरा पूरा दुनियाँत जाय, सबला लोकेर लिकिन खुश-खबरी प्रचार करो। १६ जहाँय विश्वास करछे आर बपतिस्मा लिछे, वरा बचबे। मगर जहाँय विश्वास नी करछे, उसाक दोषी ठहराल जाबे। १७ जहाँय मोर नामेर पर विश्वास करछे, वहाँय इला चमत्कार करबे:

वरा भूतलाक भगाबे, वहाँय अनजान भाषा बोलबे। १८ वरा साँपलाक उठाय लिबे, आर अगर कोय जहरीला चीज खाय ले, त उसार कोय नोकसान नी होबे। वरा बेमार लोकेर पर हाथ राखबे, आर बेमार लोक अच्छा हंय जाबे।”

यीशु स्वर्ग जाछे

(लूका २४:५०-५३; मसीह-दूत १:९-११)

१९ चेलालार साथे बात करवार बाद यीशुक स्वर्गोत उठाय लिया ल गेल, आर वहाँय जाय परमेश्वरेर दहिना बगल बोठे गेल। २० आर चेलाला सब जगहोत जाय खुश-खबरीर प्रचार करिल, आर प्रभु उसार साथे काम करिल आर चिन्ह आर चमत्कारे जरियाय प्रभु प्रमाण करिल कि चेलालार बातला सच छे।]

लूकार लिखाल खुश-खबरी

लेखकेर लिखवार कारण

१-२ अति आदरणीय थियुफिलुस, हमसार बीचोत जैला घटना घटिले, उलाक शुरू से जैला लोक देखिले आर प्रचार करछिले, वराय सबला बातोक हमसाक बताहे। उला घटनाक लिखवार तने बहुतझन अपना हाथ लगाहे। ३-४ वहीलाते मोह लिखना उचित समझिनु। सबला घटनाक पुरा-पुरी शुरू से छानबिन करे तोर तने सजाय लिखनु, जसे कि जैला बात तोक बताल गहे, उलाक तुई मजबूती से विश्वास करवा पारिस।

जकरयाह यरूशलेम मंदिरोत दर्शन पाछे

५ यहूदिया राजोत हेरोदेश राजार समय, अबियाहर दलोत जकरयाह नामेर एकझन पूजारी छिले। वहार घरवालीर नाम इलीशिबा छिले। दोनोंझन पति-पत्नी हारूण खानदानेर छिले। ६ वरा परमेश्वरेर सामनात बहुत धर्मी छिले आर प्रभुर हरेकटा हुकूम आर विधि सावधानी से मानछिले। ७ मगर उसार कोय बाल-बच्चा नी होय क्याँकि इलीशिबा बाँझी छिले आर दोनोंझनकार उमरो बेसी हंय गहिले। ८ एक दिना

पालीर मुताबिक जकरयाह अपना दलेर साथे यरूशलेम मंदिरोत पूजारीर काम करछिले। ९ आर पूजारीलार नियम मुताबिक वहार नामे पुर्जा उठिल कि वहाँय प्रभुर मंदिरेर भीतरोत जाय पवित्र जगहोत धुमना जलाय। १० जैखुना वहाँय मंदिरेर भीतरोत धुमना जलाछिले, उखुना बहुतला लोक बाहरे थाड़ो हंय प्रार्थना करछिल। ११ आर जकरयाह देखछे कि धूपदानेर दहिना भीति प्रभुर एकटा फरीस्ताक थाड़ो हंय छे। १२ आर वहाँय बहुत डोराय गेल। १३ फरीस्ता कोहले, “जकरयाह! तुई ना डोरा। तोर प्रार्थना सुनाल गहे। तोर घरवाली इलीशिबा से एकझन लड़का जनम लिबे। तुई वहार नाम यूहन्ना राखबो। १४ वहाँय तोर तने बहुत खुशीर कारण होबे, आर वहार जन्मेर वजह से आढ़ो बहुत लोक खुशी मनाबे। १५ इडा लड़का प्रभुर नजरोत महान होबे। माँर पेट से परमेश्वरेर पवित्र आत्मार शक्ति से भराल रोहबे। वहाँय ना दारू आर ना कोय नशार जिनिस खाबे। १६ आर वहाँय बहुतला इजराएली लोकोक प्रभुर लिकिन आनबे। १७ यहाँय एलियाह नबीर बराबर आत्मात शक्तिशाली होबे। प्रभुर पहिले ओसे वहार तने लोकोक तैयार करबे। बाफेर दिल बाल-बच्चार भीति घुराबे। जहाँय परमेश्वरेर हुकूम नी मानछे, उसार मन बदले धर्मी लोकेर मान्दी बुद्धि दिबे।” १८ जकरयाह फरीस्ताक कोहले, “इला बात कसे हवा सकोछे? क्याँकि मुई त बूढ़ा आर मोर घरवालीव बुढ़ी हंय गहे।” १९ वहार बाद फरीस्ताडा कोहले,

“मुई जिब्राएल फरीस्ता छी। मुई हरखुना परमेश्वरेर आगुत हाजिर रोहछी। मोक तोर साथे बात करवार तने आर तोक इडा खुशीर खबर दुवा तने पठाल गहे। २० मगर तहारो पर तुई मोर बातटा विश्वास नी करलो। वहीलाते जैखुन तक तोर लड़का जनम नी होचे, उखुन तक तुई गोंगा हंय रोहबो। आर मोर बातटा अपना समय मुताबिक पूरा होबे।” २१ यहार बीचोत मंदिरेर बाहरे लोकला जकरयाहर तने इन्तेजार करछिल आर हैरान छिले कि वहार बाहरे ओसते अतेक देरी क्याँ होचे? २२ भलेखुन बाद वहाँय बाहरे ओल, मगर लोकलार साथे कुछु बोलवा नी पाले। लोकला समझे गेल कि यहाँय मंदिरोत कोय दर्शन पाहे। वहाँय गोंगा हंय लोकलाक इशारा करते रोहल। २३ वहार पाली खतम हवार बाद अपना घर चले गेल। २४ कुछु दिन बाद जकरयाहर घरवाली इलीशिबार गतरोत रोहिल। आर वहाँय पाँच महीना तक लोकेर साथे भेंट-मुलाकात नी करले। २५ वहाँय कोहले, “प्रभु कतेक दयालु छे! वहाँय मोर बाँझी हवार बदनामीडा दूर करे दिहे।”

परमेश्वर मरियमेर लिकिन फरीस्ताक पठाछे

२६-२७ इलीशिबार गतरोत रहवार छौ महीना चलछिले, परमेश्वर अपना फरीस्ता जिब्राएलोक मरियम नामेर एकइन कुमारी लड़कीर लिकिन पठाले। वहार घर गलील प्रदेशेर नासरत नामेर एकटा शहरोत छिले। वहार ब्याहर बात यूसुफ नामेर एकइन लड़कार साथे पक्का हंय

गहिले, जहाँय राजा दाऊदेर खानदानेर छिले। २८ फरीस्ताडा मरियमोक कोहले, “मरियम! तोर पर परमेश्वरेर आशीर्वाद छे, प्रभु तोर साथे छे।” २९ इडा बात सुने मरियम बहुत घबराय गेल आर सोचवा लागिल इडा कुन किसम खबर छे? ३० तब फरीस्ताडा कोहले, “मरियम! तुई ना डोरा, परमेश्वर तोसे खुश छे। ३१ तोसे एकझन लड़का जनम लिबे आर तुई वहार नाम यीशु राखबो। ३२ वहाँय बहुत महान होबे आर वहाक परमप्रधान परमेश्वरेर बेटा कहाल जाबे। प्रभु वहार बाप-दादो दाऊदेर राजगद्दी वहाक दिबे। ३३ वहाँय इजराएली लोकेर पर हमेशा राज करबे, वहार राज कोयखुना खतम नी होबे।” ३४ मरियम फरीस्ताडाक कोहले, “इडा कसे करे हवा सकोछे, मोर त ब्याह नी होय।” ३५ फरीस्ताडा मरियमोक कोहले, “पवित्र आत्मा तोर पर ओसबे आर परमेश्वरेर शक्ति तोर पर पोरबे। वहीलाते वहाँय पवित्र होबे आर वहाक परमेश्वरेर बेटा कहाल जाबे। ३६ देखेक! तोर रिस्तेदार इलीशिबा बहुत बुढ़ी हंय गहे। लोकला कोहचिले कि वहाँय बाँझी छे, मगर अला वहार पेटोत छौ महीनार बेटा छे। ३७ इकिसम कोय काम नी छे जैडा परमेश्वर करवा नी पारबे।” ३८ इडा बात सुने मरियम कोहले, “मुई प्रभु परमेश्वरेर दासी छी, तुई जैडा बात कोहचिस, उडा पूरा होक।” वहार बाद फरीस्ताडा उछिन से चले गेल।

मरियम इलीशिबार घर जाछे

३९-४० वहार कुछु दिन बाद मरियम जकरयाहर घर गेल। वहार घर यहूदिया देशेर पहाड़ी एलाकार एकटा शहरोत छिले। मरियम जाय इलीशिबाक सलाम करिल। ४१ सलाम सुने इलीशिबार पेटेर बच्चाडा कुद्दे उठिल आर बच्चाडार माँ पवित्र आत्मार शक्तित भरे गेल। ४२ आर वहाँय खुशीर मारे परमेश्वरेर गुनगान करवा लागिल। वहाँय मरियमोक कोहले, “सबला औरत से बढे तोर पर परमेश्वरेर आशीर्वाद छे आर तोर पेटेर बच्चाडारो पर छे। ४३ मोर प्रभुर माँ मोर घर ओसिहे, इडा कसे करे होल? क्याँकि मुई यहार लायक नी छी। ४४ जैखुना मुई तोर आवाज सुननु, वहीखुना मोर पेटेर बच्चाडा खुशीर मारे कुद्दे उठिल। ४५ तोर पर परमेश्वरेर आशीर्वाद छे, क्याँकि तुई विश्वास करे लिहिस कि जैडा बात प्रभु बोलिहे, उडा पूरा होबे।”

मरियम परमेश्वरेर बड़ाई करछे

४६ आर मरियम कोहले, “मोर आत्मा प्रभुर बड़ाई करछे, ४७ मुक्तिदाता परमेश्वरेर कारण दिलडा खुशी से भराल छे। ४८ मोर मान्दी गरीब दासीर पर दया करिहे, सबला लोक अला से मोक धन्य कोहबे। ४९ क्याँकि सर्वशक्तिमान पवित्र छे, मोर तने बोड़ो-बोड़ो काम करिहे। ५० जहाँय परमेश्वरोक मानछे, वहार पीढ़ी-पीढ़ी पर दया करछे। ५१ अपना हाथ से ताकतेर काम करिहे, घमंडी लोकेर घमंड चूर करे

दिहे। ५२ आर राजगद्दी से राजालाक नभाय दिहे, मगर गरीब लोकोक उपरोत उठाहे। ५३ भूखा लोकेर जरूरतलाक पूरा करिहे, आर पैसावालाक खाली हाथ पठाय दिहे। ५४-५५ जैकिसम इब्राहिम आर वहार खानदानोक, सब दिनेर तने वादा करिहिले, वही मान्दी अपना दास इजराएलोक मदद करिहे, आर हमसार पर दया करवार तने नी भूलिहे।” ५६ आर तीन महीना रहवार बाद मरियम अपना घर चले गेल।

यूहन्नार जनम

५७ वहार कुछु दिन बाद इलीशिबार बच्चा हवार समय हंय गेल, आर वहार बेटा जनम होल। ५८ इलीशिबार पर प्रभुर दया देखे, वहार सगा-सम्बन्धीला आर अगलेर-बगलेर लोकला ओसे खुशी मनवा लागिल। ५९ जैखुना बच्चाडा आठ दिनेर होल, सबकोय बच्चाडार सुन्नत करवार तने जोड़ो होल आर कोहले, “यहार नाम वहार बाफेर नामेर पर जकरयाह रखाल जाक।” ६० मगर बच्चाडार माँ इलीशिबा कोहले, “नी, वहार नाम यूहन्ना होबे।” ६१ वरा इलीशिबाक कोहले, “तोर सगा-सम्बन्धीलार भीतरोत इकिसम नाम त कहारो नी छे।” ६२ आर लोकला जकरयाक इशारा करे पूछिल, “तुई यहार की नाम राखबो?” ६३ जकरयाह इशारा करे एकखान सिलेट मँगाल आर लिखिल कि बच्चाडार नाम यूहन्ना होबे। आर सबकोय हैरान हंय गेल। ६४ नामडा लिखते-लिखते वहार मुख खोले गेल आर परमेश्वरेर बड़ाई करवा

लागिल। ६५ इडा देखे सबला अगलेर-बगलेर लोक घबराय गेल आर यहूदिया राजेर चारो भीति पहाड़ी इलाकात इडा बातेर खलबली मचे गेल। ६६ जैला लोक इडा बात सुनिल, सबकोय बोलवा लागिल, “बोड़ो हंय इडा बच्चा की होबे!” क्योंकि वहार पर प्रभुर शक्ति देखिले।

जकरयाह भविष्यवाणी करछे

६७ वहार बाद बच्चाडार बाप जकरयाह पवित्र आत्मार शक्ति से भरे नबीर मान्दी बोलवा लागिल, ६८ “इजराएलेर परमेश्वरेर बड़ाई होक, क्योंकि वहाँय अपना लोकलार पर ध्यान दे उसाक बचाहे। ६९ वहाँय अपना सेवक राजा दाऊदेर घराना से, एकझन शक्तिशाली मुक्तिदाताक पठाहे। ७० आर अपना पवित्र नबीलार जरियाय, बहुत पहिले से परमेश्वर इडा वादा दिहिले कि, वहाँय इडा मुक्तिदाताक पठाबे। ७१ वहाँय ओसे हमसाक दुश्मनला से, आर नफरत करनेवाला से बचाबे। ७२ आर अला परमेश्वर अपना पवित्र चुक्ति याद करे, हमसार पर दया करिहे। इखान दया करवार तने, वहाँय हमसार बाप-दादोलाक वादा दिहिले। ७३ इडा वादा हमसार बाप इब्राहिमोक कसम खाय दिहिले। ७४-७५ वहारे मुताबिक परमेश्वर हमसाक दुश्मनेर हाथ से बचाहे, ताकि हमरा शुद्ध आर धर्मी हंय हिम्मत से, जिन्दगी भर वहार सेवा करवा पारी। ७६ आर बेटा! तुरई परमप्रधान परमेश्वरेर नबी कहलाबो, आगुत जाय मुक्तिदाताक ओसवार तने रास्ता तैयार करबो।

७७ परमेश्वरेर लोकोक पापेर माफी पवार तने तुई बुद्धि दिबो।
७८ हमसार परमेश्वरेर दया से, हमसार पर स्वर्ग से एकटा रोशनी ओसबे। ७९ जैला लोक अन्हारोत आर मौतेर मुखोत पोड़े छे, वहार जरियाय रोशनी पाबे आर हमरा शांतिर रास्तात जवा पारमु।”
८० आस्ते-आस्ते यूहन्ना बोड़ो होल आर आत्मात शक्तिशाली बने गेल। आर जैखुन तक वहाँय इजराएली लोकेर लिकिन प्रचार करवा शुरू नी करिल, उखुन तक जंगलोत रोहिल।

यीशुर जनम

(मत्ती १:१८-२५)

२ वहीडा समय रोम देशेर महाराजा अगस्तुस अपना राजेर सबला लोकोक नाम लिखवार हुकूम दिले। २ इडा पहिला गिनती उखुना होल जैखुना सुरिया देशेर राजपाल किरिनिस छिले। ३ नाम लिखवार तने सभाको अपना-अपना खानदानी शहरोत जाना जरूरी छिले। ४ यूसुफो नाम लिखवार तने गलील प्रदेशेर नासरत शहर से यहूदिया प्रदेशेर बैतलेहम शहरोत गेल क्योंकि बैतलेहम राजा दाऊदेर खानदानी शहर छिले। आर यूसुफ दाऊद राजार खानदानेर लोक छिले। ५ राजार हुकूमेर मुताबिक मरियमो गेल, जहार डालीघाड़ा यूसुफेर साथे होयले। आर मरियमेर गतरोत छिले। ६ बैतलेहम पहुँचवार बाद मरियमेर बच्चा हवार समय हंय गेल। ७ वहाँय अपना पहिला बेटाक जनम दिले आर वहाक

कपड़ा दे लेपटे गुहाली घरेर बेरनीत सुताय दिले, क्यौंकि उसाक रहवार कोय जगह नी मिलिल।

मुक्तिदातार जन्मेर खबर

८ बैतलेहम शहरेर बगलोत रात करे कुछुला रखवाल पड़तीत बोठे अपना भेड़लार पहरा दिछिले। ९ वहीखुना प्रभु परमेश्वरेर एकझन फरीस्ता उसार आगुत हाजिर होल। फरीस्ता ओसवार साथे-साथे प्रभु परमेश्वरेर रोशनी उसार चारो भीति फैले गेल, आर रखवालला बहुत डोराय गेल। १० फरीस्ताडा कोहले, “तुम्हरा ना डोराव, क्यौंकि मुई त तुमसाक बहुत खुशीर खबर दुवार तने ओही आर इडा खबर दुनियाँ सभारो तने छे। ११ आज राजा दाऊदेर शहर बैतलेहमोत तुमसार तने एकझन मुक्तिदाता पैदा लिहे आर वहीं मसीहा छे आर वहीं प्रभु छे। १२ वहाक चिन्हवार इडा चिन्ह होबे जे तुम्हरा एकझन बच्चाक कपड़ा दे लेपटाल आर गुहाली घरेर बेरनीत सुताल पाभेन।” १३ उडा फरीस्तार साथे आढ़ो बहुतला फरीस्ताक दखा गेल आर वरा भजन गाय परमेश्वरेर बड़ाई करे बोलवा लागिल, १४ “स्वर्गोत परमेश्वरेर बड़ाई होक आर दुनियाँत जैला लोक परमेश्वरोक खुश राखछे, उसार बीचोत शांति होक।” १५ फरीस्ताला स्वर्गोत जवार बाद, रखवालला अपनार बीचोत कोहले, “चलो, हमरा बैतलेहम जाय इडा अद्भूत घटनाक देखी, जैडार बारे प्रभु परमेश्वर हमसाक कोहले।” १६ वरा जल्दी करे बैतलेहम

जाय मरियम आर यूसुफोक पाले आर बच्चाडाक गोरूर बेरनीत सुताल देखिल। १७ फरीस्ताडा बच्चाडार बारे जैडा खबर दिहिले, रखवालला उडा खबर सभाको बताय दिले। १८ जताला लोक रखवाललार बात सुनिल, सबकोय हैरान हंय गेल। १९ मगर मरियम इला बातोक अपना दिलोत राखिल आर उलार बारे सोचते रोहिल। २० फरीस्ताडा बच्चाडार बारे जैडा खबर रखवाललाक दिहिले, वही मान्दी वरा सुनिल आर देखिल। उलार तने वरा परमेश्वरेर बड़ाई करते-करते वापस चले गेल।

यीशुक परमेश्वरेर हाथोत सोंपे देयाल जाछे

२१ जन्मेर आठवाँ दिनोत बच्चाडार सुन्नत कराल गेल आर वहार नाम यीशु राखिल। इडा नाम फरीस्ताडा माँर पेटोत ओसवार आगुते राखिहिले। २२ मूसा नबीर नियमेर मुताबिक जैखुना शुद्ध हवार दिन पूरा हंय गेल, यूसुफ आर मरियम यीशुक प्रभु परमेश्वरेर हाथोत सोंपे दुवार तने यरूशलेम मंदिरोत ले गेल। २३ प्रभुर नियमोत लिखाल छे, अगर कोय औरतेर पहिलाडा बच्चा बेटा होय, त वहाक प्रभुर लिकिन पवित्र ठहराल जाबे आर परमेश्वरेर हाथोत सोंपना जरूरी छे। २४ आर प्रभुर नियमेर मुताबिक एक जोड़ा पारकी या दुईडा कबूतरेर बच्चा चढ़ाना जरूरी छिले। यूसुफ आर मरियम नियमडाक पूरा करिल।

शिमोन मुक्तिदाता मसीहाक देखे लिछे

२५ आर वहीडा समय यरूशलेमोत शिमोन नामेर एकझन भक्त आर धर्मी लोक छिले। वहाँय इजराएली लोकलार सुख-शांतिर तने इन्तेजार करछिले। आर परमेश्वरेर पवित्र आत्मा वहार पर छिले। २६ पवित्र आत्मा वहाक आगुते इडा बात कोहिले, “जैखुन तक तुई प्रभुर मसीहाक नी देखबो, उखुन तक तुई नी मोरबो।” २७ पवित्र आत्मा उदिना वहाक यरूशलेम मंदिरोत जवार तने इच्छा दिले। जैखुना मरियम आर यूसुफ नियम अनुसारे यीशुक परमेश्वरोक सोंपे दुवार तने मंदिरोत आनिल, २८ शिमोन उखुना मंदिरोत छिले। वहाँय बच्चाडाक अपना कोलात ले परमेश्वरेर बड़ाई करे कोहले, २९ “हे प्रभु! तुई अपना वादा मुताबिक मोक शांतित बिदायगी दे। ३० क्योंकि मुई अपना आँख से तोर मुक्तिर उपाय देखेलिनु, ३१ जहाक तुई सब लोकेर तने पठाहिस। ३२ वहाँय सब देशेर लोकेर तने चराक होबे, आर तोर इजराएली लोकेर नाम ऊँचा करबे।” ३३ यीशुर बारे इला बात सुने वहार माँ-बाप बहुत हैरान हंय गेल। ३४ वहार बाद शिमोन उसाक आशीर्वाद दिले आर मरियमोक कोहले, “इडा बच्चार वजह से इजराएली लोकेर भीतरोत बहुतझन नाश होबे या बहुतझन खुशी मनाबे। यहाँय परमेश्वरेर एकटा चिन्ह छे, मगर बहुतझन यहार खिलाफ बोलबे। ३५ आर लोकेर दिलेर

बात प्रकट हंय जाबे। मरियम! तोर दिलडाव दुःख से भरे जाबे इकिसम कि दिलडात कोय तलवार घोपे दे।”

हन्नाह यीशुक देखे परमेश्वरेर बड़ाई करछे

३६ मंदिरते हन्नाह नामेर एकझन बुढ़ी छिले, जहाँय परमेश्वरेर नबिया छिले। वहाँय आगुर बातला बताछिले। वहाँय आशेर-खानदानेर फनुएलेर बेटी छिले। ब्याह हवार सात साल बाद राँड़ी हंय गहिले। ३७ आर चौरासी साल तक राँड़ी रोहिल। मंदिरोत रोहय दिन-रात प्रार्थना आर उपास करे परमेश्वरेर भक्ति करछिल। ३८ जैखुना शिमोन मरियम आर यूसुफेर साथे बातचीत करछिले, हन्नाह उठिन ओसिल आर परमेश्वरेर बड़ाई करवा लागिल। आर जैला लोक यरूशलेमेर आजादीर इन्तेजार करछिले उसार लिकिन वहाँय बच्चाडार बारे बोलवा लागिल। ३९ यीशुर माँ-बाप प्रभु परमेश्वरेर नियम मुताबिक सब कुछ पूरा करे गलील प्रदेशेर अपना शहर नासरत चले गेल। ४० बच्चाडा बोड़ो आर मजबूत हवा लागिल। वहार बुद्धि बढ़ते गेल आर परमेश्वरेर विशेष कृपा वहार पर छिले।

बालक यीशु शास्त्रेर ज्ञानीलार साथे बहस करछे

४१ यीशुर माँ-बाप हर साल फसह परब मनवार तने यरूशलेम शहर जाछिले। ४२ आर बारह सालेर उमरोत यीशु उसार साथे परब मनवार

तने यरूशलेम गेल। ४३ परब मनवार बाद यूसुफ आर मरियम अपना घर ओसवार तने नासरत खाना हंय गेल। मगर यीशु वहीछिन रहय गेल। वहार माँ-बाफोक पहिला दिन इडार पता नी चलिल, ४४ क्योंकि वरा सोचिल कि वहाँय होय त दोसरा साथीलार साथे छे। मगर उदिना शाम तक नी देखवार बाद वहाक वहार साथीलार आर सगा-सम्बन्धेर बीचोत छबुवा लागिल। ४५ आर जैखुना वरा यीशुक नी पाले, वहाक छबुवार तने यरूशलेम गेल। ४६ आखिरोत तीन दिन बाद वरा वहाक पाले। वहाँय यरूशलेम मंदिरोत बोठे शास्त्रेर ज्ञानीलाक खूब कठिन-कठिन सवाल पूछेछिले। ४७ लोकला वहार बुद्धिर बात आर जवाबला सुने बहुत हैरान छिले। ४८ आर वहाक देखे वहार माँ-बाफोक बड़ा ताज्जुब होल। यीशुर माँ कोहले, “बेटा! तुरई हमसार साथे इकिसम हरकत क्याँ करलो? देख! तोर बाबा आर मुई तोक छाभते-छाभते बहुत परेशान छिन्नूँ।” ४९ यीशु उसाक जवाब दिले, “मगर तुम्हरा मोक क्याँ छाबछिलेन? तुम्हरा की जानेन नी जे मोक अपना बाफेर घरोत रहना जरूरी छे?” ५० मगर मरियम आर यूसुफ वहार कहवार मतलबडा बुझवा नी पाले। ५१ वहार बाद यीशु अपना माँ-बाफेर साथे अपना घर नासरत चले गेल। उछिन वहाँय उसार हुकूमोत रोहिल। मगर वहार माँ सबला बातोक अपना मोनोत राखिल। ५२ यीशु बदन से आर बुद्धि से

बढ़ते रोहिल। आर वहार पर परमेश्वरेर आर मानुषेर आशीर्वाद होते रोहिल।

यूहन्ना लोकोक परमेश्वरेर राजेर बारे बताछे

(मत्ती ३:१-१२; मरकुस १:१-८; यूहन्ना १:१९-२८)

३ रोम देशेर महाराजा तिबेरियुसेर राज करवार पन्द्रह साल चलछिले। आर वहीडा समय यहूदिया प्रदेशेर राजपाल पिलातुस छिले। आर गलील प्रदेशोत हेरोदेश शासन करछिले। वहार सौतेला भई फिलिप्पुस इतुरैया आर त्रखोनीतिस प्रदेशोत शासन करछिल। आर अबिलेन प्रदेशोत लिसानियास शासन करछिले। २ हन्ना आर कैफा नामेर दुईझन महापूजारी यरूशलेम मंदिरोत छिले। ठीक वहीडा समय जकरयाहर बेटा यूहन्नार लिकिन परमेश्वरेर वचन पहुँचिल कि वहाँय लोकेर लिकिन प्रचार करे। आर उडा समय वहाँय जंगलोत रोहछिले। ३ वहार बाद यूहन्ना यरदन नदीर एलाकार चारो भीति प्रचार करवा लागिल, “तुम्हरा पाप से माफी पवार तने अपना मन बदली करो आर बपतिस्मा लव।” ४ आर इकिसम करे यूहन्ना यशायाह नबीर जरियाय लिखाल बातलाक पूरा करिल। यूहन्नार बारे लिखाल छिले, “सुनसान इलाकात परमेश्वरेर एकझन प्रचारक बोलछे, प्रभुर तने रास्ता तैयार करो, आर रास्तालाक सीधा करो। ५ पहाड़ आर ढिपरीलाक नीचान करो, खाद-खन्नकलाक भरे दव, टेढा-मेढा रास्तालाक सीधा बनाव, आर उबर-खाबर

रास्तालाक बराबर करो। ६ वहार बाद लोक परमेश्वरेर मुक्तिर काम देखवा पाबे।” ७ लोकेर भीड़ बपतिस्मा लुवार तने यूहन्नार लिकिन ओसवा लागिल। यूहन्ना लोकलाक कोहले, “ऐ साँपेर बच्चाला! परमेश्वरेर आनेवाला कहर से बचवार तने तुमसाक के हुँसियार करे दिले? ८ तुम्हरा अपना-अपना पाप से मन बदली हवार सबूत देखाव। इडा ना सोचो कि हमरा परमेश्वरेर भक्त इब्राहिमेर खानदान छी। आर वहीलाते परमेश्वरेर कहर से बचे जामु। मुई तुमसाक कोहची कि परमेश्वर इला पत्थल से इब्राहिमेर तने बाल-बच्चा पैदा करवा सकोछे। ९ परमेश्वरेर बिचारेर कुल्हारीखान गाछेर गोढ़ात रखाल छे। जैडा गाछ अच्छा फल नी दिछे, उडा गाछोक काटे आगिनोत फेके देयाल जाछे।” १० यूहन्नार बात सुने लोकला वहाक पूछिल, “हमसाक की करवा होबे?” ११ वहाँय उसाक कोहले, “अगर तुम्हार लिकिन दुईडा कुरता छे त एकटा कुरता वहाक दे दव, जहार लिकिन एकटाव नी छे। अगर तुमसार लिकिन जरूरत से बेसी खवार जिनिस छे त उलाक भूखा लोकोक खिलाय दव।” १२ खजना लेनेवाला लोकलाव यूहन्नार लिकिन बपतिस्मा लुवार तने ओसिल आर पूछिल, “गुरुजी! हमरा की करूम?” १३ यूहन्ना उसाक कोहले, “सरकारेर तरफ से जतेक खजना लुवार हुकूम छे, वहा से बेसी ना लेन।” १४ कुछुला पुलिस पूछिल, “गुरुजी! मगर हमसाक की करवा होबे?” यूहन्ना उसाक जवाब दिले, “डोराय-

धमकाय कहारो लिकिन से पैसा ना लेन, आर कहारो पर झूठा दोष ना लगायेन। अपना दरमाह से खुश रहेन।” १५ वहीला दिनोत यहूदी लोक मसीहार जल्दी ओसवार इन्तेजार करछिले। वहीलाते लोकला यूहन्नाक देखे सोचवा लागिल, हवा सकेछे यहीं मसीहा छे। १६ इडा जाने यूहन्ना उसाक कोहले, “मुई त खाली पानी से बपतिस्मा दिछी। मगर मोर बाद जहाँय ओसछे, वहाँय मोसे बहुत बेसी शक्तिशाली छे। मुई वहार जूता खोलवार लायक नी छी। वहाँय तुमसाक पवित्र आत्मा आर आगिन दे बपतिस्मा दिबे। १७ वहाँय भूसीलाक गोहमला से अलग करवार तने कुलाखानोक अपना हाथोत राखिहे। वहाँय अपना खमारखान अच्छा करे साफ करबे आर गोहमलाक अपना बजारीत राखबे। मगर भूसीलाक इकिसम आगिनोत फेके दिबे, जैखान कोयखुना नी घेमाबे।” १८ आर यूहन्ना बहुत किसम करे लोकोक चेताय परमेश्वरेर राजेर बारे उपदेश दिछिले।

यूहन्ना जेलोत

१९ हेरोदेश अपना भईर स्त्री हेरोदेयाशोक ब्याह करिल। इडा पापेर वजह से यूहन्ना हेरोदेशोक खूब धिक्कार दिले। २० इडा पापेर इलावा हेरोदेश आढ़ो बहुतला कुकरम करिहिले। वहीलाते यूहन्ना वहाक डाँटिल। आर हेरोदेश यूहन्नाक पकड़े जेलोत दे दिले। इकिसम करे वहाँय इडा सबसे बोड़ो पाप करिल।

यीशुर बपतिस्मा

(मत्ती ३:१३-१७; मरकुस १:९-११)

२१ एक दिना सब लोक यूहन्नार लिकिन बपतिस्मा लिछिल। आर यीशुव बपतिस्मा ले प्रार्थना करछिल आर आसमानडा खोले गेल।
२२ आर पवित्र आत्मा कबूतरेर मान्दी यीशुर पर नाभिल आर आसमान से एकटा आवाज होल, “तुई मोर प्रिय बेटा छिस आर मुई तोसे बहुत खुश छी।”

यीशुर खानदान

(मत्ती १:१-१७)

२३ करीब तीस सालेर उमरोत यीशु परमेश्वरेर राजेर बारे प्रचार करवा शुरू करिल। यहाक यूसुफेर बेटा कहाल गहे। आर यूसुफ एलीर बेटा छिले। २४ एली मत्तार बेटा आर मत्ता लेवीर बेटा छिले। लेवी मलकीर बेटा, मलकी यन्नार बेटा आर यन्ना यूसुफेर बेटा छिले। २५ यूसुफ मत्तातेर बेटा, मत्तात आमोसेर बेटा, आमोस नहूमेर बेटा, नहूम असल्याहर बेटा आर असल्याह नोगहेर बेटा छिले। २६ नोगह मातेर बेटा, मात मतित्याहर बेटा, मतित्याह शिमीर बेटा, शिमी योसेखेर बेटा आर योसेख योदाहर बेटा छिले। २७ योदाह यूहन्नार बेटा, यूहन्ना रेसार बेटा रेसा जरूब्बाबेलेर बेटा, जरूब्बाबेल शालतियेलेर बेटा आर शालतियेल नेरीर बेटा छिले। २८ नेरी मलकीर बेटा, मलकी अद्दीर बेटा, अद्दी

कोसामेर बेटा, कोसाम इलमोदादेर बेटा आर इलमोदाद एरेर बेटा छिले।
२९ एर येशुर बेटा, येशू एलीएजरेर बेटा, एलीएजर योरीमेर बेटा, योरीम
मत्तातेर बेटा आर मत्तात लेवीर बेटा छिले। ३० लेवी शिमोनेर बेटा,
शिमोन यहूदार बेटा, यहूदा यूसुफेर बेटा, यूसुफ योनानेर बेटा आर
योनान एलियाकीमेर बेटा छिले। ३१ एलियाकीम मलेआहेर बेटा,
मलेआह मिन्नाहर बेटा, मिन्नाह मत्ततार बेटा, मत्तता नातानेर बेटा
आर नातान दाऊदेर बेटा छिले। ३२ दाऊद यिशैर बेटा, यिशै ओबदेर
बेटा, ओबेद बोअजेर बेटा, बोअज सलमोनेर बेटा आर सलमोन
नहशोनेर बेटा छिले। ३३ नहशोन अम्मीनादाबेर बेटा, अम्मीनादाब
अरनीर बेटा, अरनी हिस्त्रोनेर बेटा, हिस्त्रोन फिरिसेर बेटा, फिरिस
यहूदार बेटा छिले। ३४ यहूदा याकूबेर बेटा, याकूब इसहाकेर बेटा,
इसहाक इब्राहिमेर बेटा, इब्राहिम तेरहर बेटा आर तेरह नाहोर बेटा छिले।
३५ नाहोर सरूगेर बेटा, सरूग रऊर बेटा, रऊ फिलिगेर बेटा, फिलिग
एबीरेर बेटा आर एबीर शेलाहर बेटा छिले। ३६ शेलाह केनानेर बेटा,
केनान अरिपक्षदेर बेटा, अरिपक्षद शेमेर बेटा, शेम नूहेर बेटा आर नूह
लिमिकेर बेटा छिले। ३७ लिमिक मथूशिलहेर बेटा, मथूशिलह हनोकेर
बेटा, हनोक यिरिदेर बेटा, यिरिद महलालेर बेटा आर महलाल केनानेर
बेटा छिले। ३८ केनान एनोशेर बेटा, एनोश शेतेर बेटा, शेत आदमेर बेटा
आर आदम परमेश्वरेर बेटा छिले।

यीशु परीक्षा

(मत्ती ४:१-११; मरकुस १:१२-१३)

४ परमेश्वरेर पवित्र आत्मा यीशुक अपना वशोत करिल आर वहाक यरदन नदी से सुनसान इलाकात ले गेल। २ उठिन शैतान चालीस दिन तक कोय पाके यीशुक पापोत गिरवार कोशिश करिल। इ-चालीस दिन तक यीशु कुछु नी खाले आर दिन पूरा हवार बाद वहाक भोख लागिल। ३ वहीलाते शैतान यीशुक कोहले, “तुई अगर परमेश्वरेर बेटा छिस, त इखान पत्थलोक रूटी बनवार हुकूम दे दे।” ४ मगर यीशु शैतानोक जवाब दिले, “परमेश्वरेर वचनोत लिखाल छे, ‘मानुष खाली रूटी खाय जिन्दा नी रोहबे।’” ५ यहार बाद शैतान यीशुक एकखान ऊँचा पहाड़ेर पर ले जाय एक पलकोत दुनियाँर सबला राजोक दखाय दिले आर कोहले, ६-७ “मुई तोक दुनियाँडार सब शान-शौकत आर सबला राजेर पर अधिकार दे दुम। इला सबला मोर हाथोत दे देयाल गहे आर मुई जहाक दुवा चाहची, वहाक दुवा सकोछी। अगर तुई मोक भक्ति करिस त इला सबला तोर हंय जाबे।” ८ यीशु शैतानोक जवाब दिले, “परमेश्वरेर वचनोत लिखाल छे, ‘तुई प्रभु परमेश्वरोक छोड़े आर कहारो भक्ति आर सेवा ना करिस।’ ” ९ वहार बाद शैतान यीशुक यरूशलेम शहरोत ले गेल। यरूशलेम मंदिरेर सबसे उपरोत चढ़ाय कोहले, “तुई अगर परमेश्वरेर बेटा छिस, त इठिन से कुद्दे पड़, १० क्यौंकि वचनोत

लिखाल छे कि परमेश्वर तोक बचवार तने अपना फरीस्तालाक पठाय दिबे। ११ आर वरा तोक अपना हाथोत लुखे लिबे जसे कि तोर पाँत पत्थल दे चोट नी लागे।” १२ यीशु शैतानोक जवाब दिले, “वचनोत यहोडा लिखाल छे, ‘तुई अपना प्रभु परमेश्वरेर परीक्षा ना लिस।’ ” १३ जैखुना शैतान यीशुक पापोत गिरवा नी पाले, वहाक छोड़े चले गेल आर दोसरा मौकार इन्तेजारोत रोहिल।

नासरतेर लोक यीशुक इन्कार करछे

(मत्ती ४:१२-१७; मरकुस १:१४-१५)

१४ यहार बाद यीशु पवित्र आत्मार शक्तित भरे गलील चले ओसिल। सब जगोहोत वहार नाम फैले गेल। १५ वहाँय उसार प्रार्थना-घरलात उपदेश दिछिले। सबकोय वहार बड़ाई करछिल। १६ वहाँय अपना शहर नासरत ओसिल, जैठिन वहाँय बोड़ो होयले। अपना रेवाज मुताबिक आरामेर दिन प्रार्थना-घरोत गेल आर परमेश्वरेर वचन पोढ़वार तने थाड़ो होल। १७ वहार हाथोत यशायाह नबीर लिखाल किताबखान देयाल गेल, जैखान गोल करे लेपटाल छिले। आर वहाँय खोले पढ़वा लागिल, जैठिन लिखाल छिले, १८ “प्रभुर आत्मा मोर पर छे क्योंकि परमेश्वर मोक गरीब लोकेर लिकिन खुशीर खबर दुवार तने चुने लिहे। आर मोक खुशीर खबर दुवार तने पठाहे कि कैदीला आजाद होबे। काना लोकला देखबे आर जैला लोकेर पर जूलुम होचे, वरा आजाद होबे, १९ आर खबर

दुवा पठाहे कि प्रभु अपना लोकेर पर तरस खाबे आर उडा समय अला चले ओसिहे।” २० वहार बाद यीशु किताबखान बन करे प्रार्थना-घरेर देखभाल करनेवालार हाथोत दे दिले आर बोठे गेल। प्रार्थना-घरेर सबला लोक वहाक टकटकी लगाय देखवा लागिल। २१ वहार बाद यीशु उसाक कोहले, “आइये शास्त्रेर इडा बात तुमसार नजरेर सामनात पूरा हंय गेल।” २२ उठिन जताला लोक छिले, सबकोय यीशुर बड़ाई करिल आर वहार मुखेर मीठा वचन सुने हैरान हंय कहवा लागिल, “यहाँय की यूसुफेर बेटा नी?” २३ यीशु उसाक कोहले, “तुम्हरा मोक इडा बात जरूर कोहबेन, ‘डाक्टर बाबू! पहिले तुई अपना आपोक अच्छा करेक।’ आर यहोडा कोहबेन, ‘अगर तुई परमेश्वरेर चुनाल लोक छिस, त जैला अद्भूत काम तुई कफरनहूम शहरोत करिहिलो, उला काम अपना शहरोत करे दखा।’ २४ मगर मुई तुमसाक सच-सच कोहची, कोय नबी अपना शहरोत मान-खातिर नी पाछे। २५ मुई तुमसाक ठीक-ठीक कोहची कि एलियाह नबीर जमानात जैखुना साढ़े तीन साल तक इजराएल देशोत पानी नी होय, त उछिन आकाल पोड़िहिले, उखुना उडा देशोत बहुतला राँड़ी छिले। २६ मगर परमेश्वर एलियाहक खाली एकटा राँड़ीर लिकिन पठाले, जहाँय सैदा नगरेर सरापत बस्तीर छिले। २७ एलिशार समय इजराएल देशोत बहुतला कुढ़िया लोक छिले, मगर सीरिया देशेर नामानोक छोड़े आर कोय ठीक नी होय।” २८ प्रार्थना-

घरोत जताला लोक छिले, यीशुर इला बातोक सुने बहुत गोस्सा हंय गेल। २९-३० आर वहाक शहर से बाहर करे पहाड़ेर पर ले गेल, जैखानेर पर नासरत शहर बसाल छिले। लोकला वहाक उछिन से धक्का दे नीचानोंत गिराय दुवा चाहचिले, मगर यीशु उठिन से निकले चले गेल।

भूतेर पर यीशुर अधिकार

(मरकुस १:२१-२८)

३१ आर वहाँय गलील प्रदेशेर नासरत से निकले कफरनहूम शहर पहुँचिल आर उछिन हरेकटा आरामेर दिन लोकलाक उपदेश दिछिले। ३२ लोकला वहार उपदेश सुने ताज्जुब हंय गेल, क्योंकि वहाँय अधिकारेर साथे बोलछिले। ३३ एक बार यीशु उछिनकार प्रार्थना-घरोत छिले। वहीठिन एकझन भूत धराल लोक छिले, जहाँय खूब जोर से चिल्लाय बोलिल, ३४ “हे नासरतेर यीशु! तुई हमसाक की करवा चाहचिस? तुई की हमसाक बर्बाद करवा ओसिहिस? मुई तोक जानछी कि तुई परमेश्वरेर पवित्र लोक छिस।” ३५ मगर यीशु वहाक डाँटिल, “चुप कर। मुई तोक कोहची कि यहाक छोड़े निकले जा।” सभारो सामनात भूतटा लोकटाक माटीखानेर पर अछराय गिराय दिले आर बिना कोय नोकसान पहुँचाय निकले चले गेल। ३६ इडा देखे सबला लोक ताज्जुब करवा लागिल आर अपना बीचोत कहवा लागिल, “यहार लिकिन कुन किसम अधिकार छे, जे भूतला वहार हुकूम मानछे आर

लोकलार भीतर से निकले बाहर चले जाछे।” ३७ आर वहार नाम उडा एलाकार चारो भीति फैले गेल।

यीशु बहुतइन लोकोक अच्छा करछे

(मत्ती ८:१४-१७; मरकुस १:२९-३९)

३८ यहार बाद यीशु प्रार्थना-घर से निकले शिमोनेर घर गेल। शिमोनेर सासोक बहुत जोर बुखार छिले। घरेर लोकला वहाक ठीक करवार तने यीशुर लिकिन बिनती करिल। ३९ आर यीशु वहार बगलोत थाड़ो हंय बुखारखानोक डाँटिल। वहीखुना बुखारखान छुटे गेल। आर वहाँय उठे यीशुक आर चेलालाक खाना खिलाल। ४० बेला डुबवारखुना शहरेर लोकला सब किसमेर बेमारी लोकोक यीशुर लिकिन आनिल। यीशु हर एकटा बीमारीर पर हाथ राखे ठीक करले। ४१ बहुत लोकेर भीतर से भूतलाव निकले गेल आर चिल्लाय बोलिल, “तुई परमेश्वरेर बेटा छिस।” यीशु भूतलाक डाँटिल आर चुप रहवा कोहले क्याँकि वरा जाने गेल कि वहाँय मसीहा छे। ४२ जैखुना बेहान होल, वहाँय निकले एकखान सुनसान जगोहोत गेल। लोकेर भीड़ यीशुक छाभते-छाभते वहार लिकिन पहुँचिल आर कहवा लागिल, “हमसार लिकिन से ना जा।” ४३ मगर यीशु उसाक कोहले, “मोक दोसराला शहरतो परमेश्वरेर राजेर खुशीर खबर सुनाना जरूरी छे, क्याँकि मोक यहीखान काम

करवार तने पठाल गहे।” ४४ आर वहाँय यहूदी लोकेर पूरा एलाकार प्रार्थना-घरलात प्रचार करते रोहिल।

मलाहला यीशुर चेला बने जाछे

(मत्ती ४:१८-२२; मरकुस १:१६-२०)

५ एक दिना यीशु गन्नेशरत नामेर एकटा समुन्द्रेर कछारोत थाड़ो हंय उपदेश दिछिले। परमेश्वरेर वचन सुनवार तने लोकेर भीड़ वहार चारो पाके ठेला-ठेली करछिल। २ यीशु समुन्द्रतार कछारोत दुईखान नाव रखाल देखिल। मलाहला नाव से नाभे जाल धुछिल। ३ यीशु शिमोन नामेर एकटा मलाहार नावोत चढ़िल आर वहाक बोलिल, “भई! नावखानोक एकखुदी दूरोत ले चल।” यीशु नावखानेर पर बोठे लोकलाक उपदेश दुवा लागिल। ४ लोकलाक उपदेश दुवार बाद यीशु शिमोनोक कोहले, “नावखानोक भारी पानीत ले चल। आर माछ मरवार तने जालखानोक गिरा।” ५ शिमोन यीशुक बोलिल, “मालिक! हमरा त पूराडा रात मेहनत करिही मगर एकटाव माछ मरवा नी पाही। मगर तुम्हार बातटा रखवार तने मुई जालखान गिराछी।” ६ जाल गिरवार बाद अताला माछ धरिल कि जालखान छिड़वार मान्दी हंय गेल। ७-१० जब्दीर दुईझन बेटा याकूब आर यूहन्ना दोसरा नावत छिले। दोनों भई शिमोनेर सरिकदार छिले। शिमोन आर वहार साथीला याकूब आर यूहन्नाक इशारा करिल कि ओसे मदद करे। सबकोय मिले

माछलाक नावलात राखिल। आर दोनोंखान नाव माछ से अतेक भरे गेल कि डुबवार मान्दी हंय गेल। माछला देखे वरा बोलिल, “ईश बाप रे! कताला माछ।” शिमोन यीशुर पाँत पोरे बोलिल, “मालिक! तुई मोर लिकिन से चले जा क्योंकि मुई एकझन पापी मानुष छी।” यीशु शिमोनोक कोहले, “तुई ना डोरा। अला से तुई माछ नी मारबो, मगर मानुषोक परमेश्वरेर लिकिन आनबो।” ११ वहार बाद वरा नावलाक आने कछारोत राखे दिले आर सब कुछ छोड़े-छाड़े यीशुर पीछूत चले गेल।

यीशु कुढ़िया लोकटाक अच्छा करछे

(मत्ती ८:१-४; मरकुस १:४०-४५)

१२ एक दिना यीशु एकटा शहरोत छिले। वहीठिन एकटा लोक छिले, जहाक कुढ़ियार बेमारी छिले। जैखुना वहाँय यीशुक देखिल, हटुआ पारे कोहरी करिल, “प्रभु! तुई अगर चाहिस त मोक अच्छा करवा पारिस।” १३ यीशु वहाक बोलिल, “हाँ, मुई चाहची।” वहार बाद यीशु अपना हाथखान बढ़ाय वहाक लाड़िल आर बोलिल, “तुई अच्छा हंय जा।” वहीखुना लोकटार कुढ़ियार बेमारी अच्छा हंय गेल। १४ वहार बाद यीशु लोकटाक ठठाय-बजाय कोहले, “इडा बात कहाको ना कहिस। मगर जा आर पूजारीक दखा कि तुई अच्छा हंय गहिस। लोकेर सामनात साबित करवार तने मूसा नबीर नियमेर मुताबिक जैला चढ़वा लागे, उलाक चढ़ा।” १५ मगर यीशुर नाम चारो भीति फैलते गेल। वहार

उपदेश सुनवार तने आर बेमारी से अच्छा हवार तने लोकेर भीड़ वहार लिकिन ओसवा लागिल। १६ तहातो यीशु सुनसान जगोहोत जाय प्रार्थना करछिल।

यीशु लकवा मराल लोकटाक अच्छा करछे

(मत्ती ९:१-८; मरकुस २:१-१२)

१७ एक दिना यीशु एकखान घरोत उपदेश दिछिले। वहीठिन कुछु फरीसीला आर शास्त्रेर ज्ञानीलाव बोठे छिले, जैला यरूशलेम शहर, यहूदिया आर गलील प्रदेशेर बहुतला बस्ती से ओसिहिले। लोकेर बेमारीक अच्छा करवार तने परमेश्वरेर शक्ति यीशुर लिकिन छिले। १८ वहीखुना कुछुला लोक एकझन लकवार बेमारीक खाटोत करे आनिल आर यीशुर लिकिन जवार रास्ता छाबछिल। १९ मगर बोड़ो भीड़ेर दस्ती वहाक भीतरोत ले जवा नी पाले। वरा खाट समेत वहाक ले छप्परोत चोढ़े गेल। आर छप्परखान काना करे खाट समेत लकवार बेमारीडाक यीशुर आगुत नभाय दिले। २० उसार विश्वास देखे यीशु लोकटाक बोलिल, “भई, मुई तोर पाप माफ करछी।” २१ फरीसीला आर शास्त्रेर ज्ञानीला लोक अपना-अपना मनोत सोचवा लागिल, “यहाँय पाप माफ करनेवाला के छे? यहाँय त परमेश्वरेर अपमान करछे। पापेर माफी त खाली परमेश्वर दुवा सकोछे।” २२ मगर यीशु उसार मनेर बात जाने कोहले, “तुम्हरा अपना मनोत इकिसम क्याँ

सोचोछेन?” २३ आर उसाक बोलिल, “लकवा मराल लोकटाक की कहना आसान छे? मुई तोर पाप माफ करनूँ आर ना इडा कि तुई उठेक आर बेरा। २४ तुम्हरा जसे मालूम करवा पाड़ैन जे इ-दुनियाँत मानुषेर बेटाक पाप माफ करवार अधिकार छे।” यीशु लकवार बेमारी लोकटाक कोहले, “अपना बिछनाखान उठा आर घर चले जा।” २५ वहीखुना बोलते-बोलते उडा लोक उसार सामनात उठिल आर बिछखान ले परमेश्वरेर बड़ाई करते-करते घर चले गेल। २६ जताला लोक उछिन छिले, इडा घटना देखे हैरान हंय गेल आर परमेश्वरेर बड़ाई करवा लागिल। वरा डोराय गेल आर कहवा लागिल, “आज हमरा एकटा अद्भूत घटना देखनु।”

लेवी यीशुर चेला बने जाछे

(मत्ती ९:९-१३; मरकुस २:१३-१७)

२७ वहार बाद यीशु उडा शहर से बाहर जवारखुना लेवी नामेर एकटा रोमी सरकारेर खजना लेनेवालाक देखिल। वहाँय अपना खजना लुवार जगहोत बोठे छिले। यीशु वहाक कोहले, “मोर पीछूत चले ओस।” २८ वहाँय उठिल आर अपना सब कुछ छोड़े-छाड़े यीशुर पीछूत चले गेल। २९ वहार बाद लेवी यीशुर तने अपना घरोत एकटा भोज करिल। खजना लेनेवाला लोक आर दोसराला लोक, यीशुर आर वहार चेलालार साथे खवार तने बोठिल। ३० इडा देखे फरीसीला आर शास्त्रेर ज्ञानीला

यीशुर चेलालार खिलाफ बोलवा लागिल, “तुम्हरा खजना लेनेवाला आर पापी लोकलार साथे क्याँ खान-पान करछेन?” ३१ यीशु उसाक जवाब दिले, “जहाँय भला-चंगा छे, उसाक डाक्टरेर जरूरत नी होचे, मगर जहाँय बेमार छे। ३२ मुई धर्मी लोकोक जाब दुवार तने नी ओही, मगर पापी लोकोक जाब दुवार तने ओही जसे कि वरा पाप से अपना मन बदली करे परमेश्वरेर लिकिन ओसे।”

नया आर पुरना बिचारेर कोय मेल नी

(मत्ती ९:१४-१७; मरकुस २:१८-२२)

३३ एक दिना कुछुला लोक यीशुक बोलिल, “यूहन्नार चेलाला अकसर उपास आर प्रार्थना करछे। इकिसम फरीसीलार चेलालाव करछे। मगर तोर चेलाला हरखुना क्याँ खाते-पीते रोहचे?” ३४ यीशु उसाक जवाब दिले, “जैखुना बरतियाला दूल्हार साथे रोहचे, वरा की उपास करछे? नी करछे। ३५ मगर कुछु दिन बाद दूल्हाक अलग करे देयाल जाबे आर वहार बाद वरा उपास करबे।” ३६ यीशु लोकलाक आढ़ो एकटा मिसाल दे बोलिल, “कोय लोक नया कुरता चीरे पुन्ना कुरतात चिप्पी नी दिछे। इकिसम करले नयाडा बर्बाद हंय जाबे, आर पुन्नाडार साथे मेल नी खाबे। ३७ आर कोय लोक नया अंगुर-रस पुरना चमराड़ थैलीत नी राखछे। राखले टटका अंगुर-रस फाँपे जाबे आर पुन्ना थैलीडा फटे जाबे। आर रसखान आर थैलीडा बर्बाद हंय जाबे। ३८ वहीलाते टटका

रसोक नया चमराड़ थैलीत रखना अच्छा छे। ३९ मगर लोकला इन्कार करे बोलछे, पुन्ना किसमेर रसखाने अच्छा छे। वहीलाते पुन्ना किसमेर रस खवार बाद नया किसमेर रस खवा नी चाहचे।”

यीशु आरामेर दिनेर मालिक

(मत्ती १२:१-८; मरकुस २:२३-२८)

६ एक बार आरामेर दिनोत यीशु अपना चेलालार साथे एकखान गोहमेर खेत दे जाछिल। चेलाला शीशलाक तुड़े हाथ दे मोले खाते-खाते जाछिल। २ कुछुला फरीसी इडा देखे बोलिल, “तोर चेलाला इकिसम क्याँ करछे? इकिसम करना आरामेर दिनेर नियमेर खिलाफ छे?” ३ यीशु उसाक जवाब दिले, “तुम्हरा की पोढ़ेन नी? जैखुना दाऊद आर वहार साथीला भूखाय छिले, त वहाँय की करिहिले? ४ वहाँय परमेश्वरेर घरोत गेल आर जैला रूटी परमेश्वरोक चढ़ाल गहिले, वहीला रूटी आपने खाले आर अपना साथीलाको दिले। इला रूटी पूजारीर अलावा आर कहाको खाना मना छिले। इडा काम त परमेश्वरेर नियमेर खिलाफ छिले।” ५ वहार बाद यीशु फरीसीलाक कोहले, “मुई, मानुषेर बेटाआरामेर दिनेर मालिक छी, इडा दिनोत की करना छे, की नी करना छे, इला मोर अधिकारोत छे।”

फरीसीला यीशु पर दोष लगवा चाहचे

(मत्ती १२:९-१४; मरकुस ३:१-६)

६ आढो एकटा आरामेर दिनोत यीशु प्रार्थना-घरोत उपदेश दिछिले। उठिन एकझन लोक छिले, जहार दहिनाखान हाथ सुखाय गहिले। ७ शास्त्रेर ज्ञानी आर फरीसीला यीशु पर इडा दोष लगवार मौका छाभछिले कि वहाँय आरामेर नियम भाँयें उडा लोकोक अच्छा करछे ना नी। ८ मगर यीशु उसार मोनेर बिचार जानछिले। वहाते वहाँय सुखना हाथवाला लोकटाक कोहले, “उठेक आर बीचोत थाड़ो हंय जा।” वहाँय उठे थाड़ो हंय गेल। ९ यीशु उसाक कोहले, “मुई तुमसाक पूछोछी, आरामेर दिन की करना उचित छे? भलाई करना ना बुराई करना, जानडा बचाना ना मारना?” १० वहार बाद यीशु चारो भीति सभाको देखे लोकटाक कोहले, “अपना हाथखान मोर भीति बढ़ा।” बढ़वार साथे-साथे वहार हाथखान अच्छा हंय गेल। ११ इखान काम देखे शास्त्रेर ज्ञानी आर फरीसीला खूब गोस्सा हंय गेल आर अपनार बीचोत कहवा लागिल, “हमरा यहार साथे की करमु?”

यीशु बारहझन चेलाक मसीह-दूत नाम दिछे

(मत्ती १०:१-४; मरकुस ३:१३-१९)

१२ यहार बाद यीशु प्रार्थना करवार तने एकखान पहाड़ेर पर गेल आर परमेश्वरेर लिकिन प्रार्थना करते-करते पूराडा रात काटे दिले। १३ जैखुना

बेहान होल, यीशु अपना चेलालाक जाब दिले। उसार बीच से बारहझन चेलाक अलग करिल आर उसाक मसीह-दूत कोहले। १४-१६ उसार नाम छिले: शिमोन जहार नाम यीशु पतरस राखिहिले, शिमोनेर भई अन्द्रियास, याकूब, यूहन्ना, फिलिपुस, बरतुल्मै, मत्ती, थोमा, हल्फैर बेटा याकूब, देश-भक्त शिमोन, याकूबेर बेटा यहूदा आर यहूदा इस्करियोती, जहाँय यीशुक धोखा दे धराहिले।

परमेश्वरेर आशीर्वाद आर श्राप

(मत्ती ४:२३-२५)

१७ वहार बाद यीशु चेलालाक ले पहाड़ेर पर से नाभे एकखान परतीत थाड़ो होल। उछिन वहार बहुतला चेला जोड़ो होल। चेलालाक छोड़े यहूदिया प्रदेशेर, यरूशलेम शहरेर आर समुन्द्रेर बगलेर सूर आर सैदा नगरेर लोकेर बहुत बोड़ो भीड़ यीशुर लिकिन जोड़ो होल। १८ इला लोक वहार उपदेश सुनवार तने आर अपना-अपना बेमारी से अच्छा होवार तने ओसीहिल। आर भूत धरा लोकलाव ठीक हंय जाछिल। १९ सबला लोक यीशुक लड़वा चाहचिले क्यौंकि वहा से शक्ति निकलेछिल आर सबकोय ठीक होचिले। २० वहार बाद यीशु अपना चेलालार भीति देखे कोहले, “खुशहाल तुम्हरा छेन, जहाँय गरीब छेन, क्यौंकि परमेश्वरेर राज तुमसारे छे। २१ परमेश्वरेर आशीर्वाद तुमसार पर छे जहाँय भूखा छेन, क्यौंकि परमेश्वर उसार भोख मिटाबे। खुशहाल तुम्हरा छेन,

जहाँय अला कानछेन, क्याँकि पीछूत तुम्हरा हाँसभेन। २२ खुशहाल तुम्हरा छेन, जैखुना लोक मोर नामेर चलते, तुमसाक नफरत करबे आर निकलाय दिबे, तुमसाक बदनाम करबे आर खराब कोहबे। २३ क्याँकि उसार बाप-दादोला त आगुकार नबीलार साथे यही किसम व्यवहार करछिले। मगर उखुना तुम्हरा खुश होयेन आर खुशीर मारे कुद्देन, क्याँकि स्वर्गोत तुमसार तने बोड़ो इनाम छे। २४ मगर हाय तुमसार पर, जहाँय पैसावाला छेन, क्याँकि तुम्हरा अपना सुख पाय गहेन। २५ हाय तुमसार पर जहार पेट भराल छे, क्याँकि पीछूत तुमसाक भोख लागबे। हाय तुमसार पर जहाँय अला हाँसछेन, क्याँकि पीछूत तुमसार पर दुःख पोरबे आर कानभेन। २६ हाय तुमसार पर जैखुना सबला लोक तुमसार बड़ाई करछे, यही किसम बड़ाई उला लोकेर बाप-दादोलाव झूठा नबीलार करछिले।”

दयालु हवार उपदेश

(मत्ती ५:३८-४८; ७:१२)

२७ “मगर तुम्हरा जैला लोक मोर बातला सुनछेन, मुई तुमसाक कोहची कि अपना दुश्मनलाक प्रेम करो। जहाँय तुमसाक नफरत करछे, उसार भलाई करो। २८ जहाँय तुमसाक श्राप दे, वहाक आशीर्वाद दव। जहाँय तुमसार बेज्जती करछे, वहार तने प्रार्थना करो। २९ जहाँय तुमसार एकटा गालोत थप्पड़ मारे, वहाक दोसराडा गालो थप्पर मरवार तने

बढ़ाय दव। जहाँय तुमसार कोटटा ले लै, वहाक कुरताडाव लुवार तने मना ना करो। ३० जहाँय तुमसार लिकिन कुछु माँयें, वहाक दव। जहाँय तुमसार कोय जिनिस छिड़ाय ले, वहार लिकिन से घुराय ना माँयें। ३१ तुम्हरा जैकिसम व्यवहार लोकलार लिकिन से चाहचेन, ठीक वही मान्दी व्यवहार तुम्हरा उसार साथे करो ३२ जैला लोक तुमसाक प्रेम करछे, अगर खाली वहाके प्रेम करछेन, त यहात बड़ाई करवार की बात छे? क्याँकि पापी लोकलाव त अपना प्रेम करनेवाला लोकोक प्रेम करछे। ३३ आर अगर तुम्हरा सिरिफ उसार भलाई करछेन, जहाँय तुमसार भलाई करछे, त यहात बड़ाई करवार कुन बात छे? क्याँकि पापी लोकलाव त यही किसम करछे। ३४ अगर तुम्हरा इकिसम लोकोक धार दिछेन जहार लिकिन से घुराय पाभेन, त यहात बड़ाई करवार कुन बात छे? इकिसम त खराब लोकलाव घुराय पावार तने खराब लोकोक धार दिछे। ३५ मगर तुम्हरा अपना दुश्मनलाक प्रेम करो आर उसार भलाई करो। घुराय नी पावार तने धार दव। यहार तने तुमसाक परमेश्वर बहुत इनाम दिबे आर तुम्हरा परमप्रधान परमेश्वरेर बेटा-बेटी होभेन। क्याँकि परमेश्वर खराब लोक आर नमक हराम दोनोंझनकार पर दया करछे। ३६ जैकिसम पिता परमेश्वर दयालु छे, वही किसम तुम्हराव दयालु बनो।”

यीशु पहिले अपना गलतीक देखवा कोहचे

(मत्ती ७:१-५)

३७ “कहारो गलती ना देखेन, नी त तुमसारो गलती देखाल जाबे। कोयखुना कहारो पर दोष मत लगाव, नी त तुमसारो पर दोष लगाल जाबे। माफ करभेन त माफी पाभेन। ३८ लोकोक दान करो त तुमसाको दान मिलबे। दबाय-दबाय, हिलाय-डोलाय आर टुप-टुप करे पुरा-पुरी नापे तुमसार खोचात देयाल जाबे। जैडा नाप दे तुम्हरा नापे दिभेन, वहीडा नाम से तुमसाको नापे देयाल जाबे।” ३९ वहार बाद यीशु चेलालाक मिसाल दे कोहले, “कोय एकटा काना लोक कोय दोसरा काना लोकोक रास्ता देखवा पारबे? नी पारबे। दोनोंझन की खादोत पोड़े नी जाबे? पोरे जाबे। ४० चेला अपना गुरु से बोड़ो नी होचे। मगर जहाँय पूरापूरी गुरुर शिक्षा सिखे लिछे, वहाँय अपना गुरुर बराबर हंय जाबे। ४१ तुई अपना भईर आँखेर खेचो देखेछिस, मगर अपना आँखेर लकड़ीखान क्याँ नी देखेछिस? ४२ अगर तुई अपना आँखेर लकड़ीखान नी देखवा पारछिस, त अपना भईक केनमन करे कोहचिस, ‘हे भई, मुई तोर आँखेर खेचोखान निकलाय दिछी।’ हे कपटी! आगुत अपना आँखेर लकड़ीखान निकला। वहार बाद तोर भईर आँखेर खेचोखान अच्छा करे देखे निकलुवा पारबो।”

જૈકિસમ ગાછ ઉકિસમ ફલ

(મત્તી ૭:૧૬-૨૦; ૧૨:૩૩-૩૫)

૪૩ “કોયડા અચ્છા ગાછોત खराब फल नी होचे आर ना कोयडा खराब ग़ाछोत अच्छा फल। ४४ हरेकटा ग़ाछ अपना फल से चिन्हाल जाछे। लोक बनबैरेर ग़ाछ से सेव नी तुड़छे आर ना त जुलबीर ग़ाछ से बेदाना तुड़छे। ४५ अच्छा लोक अपना अच्छा दिल से अच्छा बात निकलाछे। खराब लोक अपना दिलेर खराब भंडार से खराब बात निकलाछे। कारण, जैला बात दिलोत रोहचे, वहीला लोकेर मुखोत ओसछे।”

बेकूफ आर हुँसियार लोकेर काम

(मत्ती ७:२४-२७)

४६ “तुम्हरा मोर बात जब मानेछेन करे नी, ‘त मोक हे प्रभु! हे प्रभु! क्याँ कोहचेन।’ ४७ जहाँय मोर लिकिन ओसछे आर मोर बातटा सुने मानछे, वहाँय उडा लोकेर मान्दी छे जहाँय अच्छा से गराट करे अपना घरखान बनाले। ४८ जैखुना बान बढ़े ओल आर पानीर धक्का घरखानोत लागिल। मगर घरखान टस से मस नी होल, क्योंकि घरखानेर गराटटा बहुत मजबूत छिले। ४९ मगर जतेला लोक मोर इला बातोक सुनछे, आर वही किसम नी करछे, जहाँय बिना गराटेर घर बनाले। जैखुना बाँन ओसिल आर पानीर धक्का घरखानोत लागिल, उखान घर साथे-साथे पोड़े एकदम बर्बाद हंय गेल।”

यीशु हाकिमेर नौकरोक अच्छा करछे

(मत्ती ८:५-१३)

७ यीशु लोकोक उपदेश दुवार बाद कफरनहूम शहर चले गेल। ^२ वहीडा शहरोत रोम देशेर सैनिकेर एकटा हाकिम छिले। वहार एकटा खूब प्यारा नौकर छिले। नौकरटा बेमार होय मोरवार लायक हंय गहिले। ^३ हाकिमडा यीशुर बारे सुने यहूदी समाजेर कुछु नेतालाक यीशुक जाब दुवा पठाले कि वहाँय ओसे वहार नौकरटाक ठीक करे दे। ^४ लोकला जाय यीशुक कोहरी करे कोहले, “गुरुजी! चल आर हाकिमेर मदद करेक। वहाँय सही माने तोर मददेर लायक छे, ^५ क्योंकि वहाँय हमसार लोक नी छे, तहारो पर हमसार इजराएली लोकोक प्रेम करछे, इकिसम कि हमसार प्रार्थना-घरखानको बनाहे।” ^६ यीशु उसार साथे चले गेल। जैखुना वहाँय हाकिमडार घरेर बगलोत पहुँचिल, हाकिमडा अपना कुछु दोस्त-बन्धुक यीशुर लिकिन बोले पठाले, “हे प्रभु! मोर तने आर तकलीफ ना उठा। मुई इडा लायक नी छी कि तुई मोर घरोत ओसिस। ^७ आर ना मुई तोर लिकिन ओसे मुलाकात करवार लायक छी। खाली तुई यहीछिन से हुकूम दे, मोर नौकरटा अच्छा हंय जाबे। ^८ मोक इडा विश्वास छे, क्योंकि मोक मालूम छे कि तोक इखान काम करवार अधिकार छे। मोहों कोय बोड़ो हाकिमेर अधीनोत छी आर मोर अधीनोत फौज छे। मुई जैखुना एकझनाक कोहची, तुई जा, त वहाँय चले जाछे,

आर दोसराझनाक कोहची तुई ओस, त वहाँय ओसछे। जैखुना मोर गोलामडाक कोहची कि इखान काम करेक, त वहाँय करछे।”
९ हाकिमडार बात सुने यीशु हैरान हंय गेल। जैला लोक वहार पीछू-पीछू ओसछिले, उसार भीति घुरे बोलिल, “इकिसम विश्वास मुई इजराएली लोकेरो बीचोत नी पानु।” १० हाकिमडा जैला लोकोक पठाहिले, वरा घुरे ओसे देखोछे कि नौकरटा ठीक हंय गहे।

यीशु मुर्दाक जिन्दा करछे

११ वहार बाद यीशु अपना चेलालार साथे कफरनहूम से नाईन नगर चले गेल। लोकेर बोड़ो भीड़ वहार पीछू-पीछू चले ओसछिले। १२ नगरटार फाटकेर लिकिन पहुँचे, देखोछे कि कुछुला लोक एकटा मुर्दाक ले जाछे। मुर्दाडा अपना राँड़ी माँर एकलौता बेटा छिले। नगरेर बहुतला लोक राँड़ीडार साथे छिले। १३ राँड़ीडाक देखे प्रभु यीशुर दिलोत बहुत मया चले ओसिल आर राँड़ीडाक कोहले, “ना कान।” १४ वहार बाद यीशु मछलीखानोक लाड़िल। मछलीखानोक ले जानेवाला लोक थामे गेल। यीशु कोहले, “ऐ जवान, मुई तोक कोहची, उठ।” १५ वहीखुना मुर्दाडा जिन्दा हंय उठे बोठे गेल आर बोलवा लागिल। यीशु लड़काडाक वहार माँर हाथोत सोंपे दिले। १६ सबला लोक डोराय गेल आर परमेश्वरेर बड़ाई करवा लागिल। वरा कहवा लागिल, “हमसार बीचोत एकटा बोड़ो नबी चले ओयेह। परमेश्वर आज हमसाक ख्याल करिहे।”

१७ यीशुर इडा अद्भूत कामेर खबर गोटेनडा यहूदिया प्रदेशेर चारो भीति फैले गेल।

यूहन्ना बपतिस्मा देनेवालार सवाल

(मत्ती ११:२-१९)

१८ यूहन्नार चेलाला यूहन्नाक यीशुर सबला कामेर खबर दिले। १९ वहार बाद यूहन्ना अपना दुईझन चेलाक जाब दे यीशुर लिकिन इडा बात पूछवा पठाले, “मसीहा जहाँय ओसनेवाला छिले, उडा की तुहें? ना हमरा आर कहारो इन्तेजारोत रोहमु।” २० दोनोंझन चेला यीशुर लिकिन ओसे कोहले, “यूहन्ना हमसाक तोर लिकिन पूछवा पठाहे कि मसीहा जहाँय ओसनेवाला छिले, उडा की तुहें छिस? आर ना हमरा आर कहारो इन्तेजारोत रोहमु?” २१ उखुना यीशु बहुतला भूत धराल, काना आर बहुत किसमेर रोगी आर बीमार लोकोक ठीक करछिले। २२ यीशु उसाक जवाब दिले, “जैला काम तुम्हरा देखलेन आर सुनलेन, उला यूहन्नाक कोहय दव कि काना लोक देखछे, नेंगड़ा लोक बेराछे, कुढ़िया लोक ठीक होचे, बहिरा सुनछे, मुर्दा जिन्दा हंय जाछे आर गरीब लोकेर लिकिन खुश-खबरीर प्रचार कराल जाछे। २३ परमेश्वरेर आशीर्वाद वहार पर छे जहाँय मोर बारे कोय शक नी करछे।”

यीशु यूहन्नार बड़ाई करछे

२४ जैखुना यूहन्नार चेलाला चले गेल, यीशु लोकलाक यूहन्नार बारे कहवा लागिल, “तुम्हरा सुनसान जंगलोत कहाक देखवा गहिलेन? मुई तुमसाक कोहची, तुम्हरा एकटा कमजोर लोकोक देखवा नी जायन, जहाँय हवात हिलने वाला मधुवालार मान्दी छे। २५ आर ना त कोय मखमल आर रंग-बिरंगी कपड़ा पिन्हाल लोकोक देखवा गहिलेन, जहाँय ऐस-आरामेर जिन्दगी बिताछे आर राज दरबारोत रोहचे। २६ तुम्हरा की देखवा गहिलेन? तुम्हरा की कोय नबीक देखवा गहिलेन? हाँ। मुई तुमसाक कोहची, एकझन लोकोक देखवा गहिलेन, जहाँय नबी से बोड़ो छे। २७ वहार बारे नबी लिखिहे, देख! मुई तोर पहिले मोर खबर देनेवालाक पठाछी, जहाँय तोर पहिले जाय तोर तने रास्ता बनाबे। २८ आर मुई तुम्हाक कोहची, जताला लोक स्त्री से जनम लिहे। उसार बीचोत कोय यूहन्ना से बोड़ो नी होय। मगर परमेश्वरेर राजोत जहाँय सबसे छोटो छे, वहाँय यूहन्ना से बोड़ो छे।”

परमेश्वरेर रास्ता ठीक छे

२९ आर सबला लोक आर यहा तक कि खजना लेनेवालाव यूहन्नार बात सुने आर यूहन्नार हाथ से बपतिस्मा ले मानिल कि परमेश्वरेर रास्ता ठीक छे। ३० मगर फरीसी आर शास्त्रेर ज्ञानीला यूहन्नार हाथ से बपतिस्मा नी लिले आर इकिसम परमेश्वरेर बिचारोक इन्कार करे दिले।

३१ यीशु कोहले, “इडा पीढ़ीर लोकलाक मुई कहार मान्दी बोलुम? वरा कहार मान्दी छे? ३२ इला लोक उला छुवार मान्दी छे जैला बजारोत बोठे छे। आर एकटा दलेर छुवाला दोसरा दलेर छुवालाक जाब दे कोहचे, हमरा तुमसार तने ब्याहत बाँसी बजानु, मगर तुम्हरा नी नाचलेन। हमरा दुःखेर गीत गानु, मगर तुम्हरा नी कानलेन। ३३ वही किसम यूहन्ना आर मुई तुमसार लिकिन प्रचार करनु। यूहन्ना दोसराला लोकेर खानार मान्दी खाना नी खाले। वहीलाते तुम्हरा इडा कोहय यूहन्नाक इन्कार करे दिलेन कि वहार भीतरोत भूत छे। ३४ आर मुई खाते-पीते ओसनु। वहीलाते तुम्हरा मोक इडा कोहय इन्कार करे दिलेन कि वहाँय पेटू, शराबी, खजना लेनेवालार आर पापी लोकलार दोस्त छे। ३५ मगर जहाँय-जहाँय परमेश्वरेर ज्ञानेर अनुसार चलछे, वरा परमेश्वरेर ज्ञानोक सच साबित करछे।”

पापी स्त्रीक माफ

३६ एक दिना शिमोन नामेर एकझन फरीसी यीशुक अपना घरोत खवार तने बलाहट दिले। आर यीशु वहार घर ओसिल आर खवार तने बोठिल। ३७ इकिसम होल कि उडा शहरेर एकझन पापी स्त्रीक पता चलिल कि यीशु फरीसीडार घर खवार तने बोठिहे। वहाँय संगमरमरेर शीशीत इतर ले यीशुर लिकिन ओल। ३८ वहार पाँर पीछूत थाड़ो हंय कनवा लागिल। काने-काने अपना लोय दे यीशुर पाँला भिंगाय दिले। अपना माथार

चूलला दे पाँला मुछिल। आर पाँलार चुमा खाय उलार पर इत्तरखान लगाय दिले। ३९ मगर फरीसीडा जहाँय यीशुक खवार तने बलाहट दिहिले, इडा देखे अपना दिलडात कहवा लागिल, “अगर इडा लोक कोय नबी होलतेन त जाने लिलतेन कि जैडा स्त्री वहाक लारछे, वहाँय के आर कुन किसमेर स्त्री छे क्योंकि वहाँय एकटा पापी स्त्री छे।” ४० फरीसीडार दिलेर बात जाने यीशु वहाक कोहले, “शिमोन, मुई तोक कुछु कहवा चाहची।” वहाँय कोहले, “हाँ गुरुजी! कोह। की कोहचिस?” ४१ यीशु वहाक एकटा किस्सा सुनाले, “एकइन महाजन छिले। वहार लिकिन से दुईइन लोक कर्जा लिहिले। एकइन पाँचसोडा चानीर सिक्का आर दोसराइन पचासटा चानीर सिक्का। ४२ दोनोंइन अपना कर्जा घुराय दुवार लायक नी छिले। वहीलाते महाजनडा उसार कर्जा माफ करे दिले। तुई बता इ-दुईइनार भीतरोत के महाजनडाक बेसी मानबे?” ४३ शिमोन जवाब दिले, “मुई सोचेछी, जहार बेसी कर्जा माफ होल, वहीं बेसी मानबे।” जवाबडा सुने यीशु वहाक कोहले, “तुई ठीक कोहलो।” ४४ यहार बाद यीशु स्त्रीडार भीति घुरे शिमोनोक कोहले, “शिमोन! इडा स्त्रीक देख। मुई तोर घर ओसनु। मगर तुई मोक पाँ धुवार तने पानी नी दिलो। देख! यहाँय अपना आँखेर लोय दे मोर पाँला धोय दिले। अपना माथार चूल दे पाँलाक मुछे दिले। ४५ आर तुई मोक चुमा नी लिलो। मगर जैखुन से मुई तोर घर ओसिही, यहाँय मोर

पाँलाक चुमा लिते रोहोल। ४६ तुई मोर माथाडात तेल नी लगालो, मगर इडा स्त्री मोर पाँलात इत्तर लगाले। ४७ वहीलाते मुई तोक कोहची, यहार बेसी पाप माफ कराल गेल, वहीलाते यहाँय मोक बेसी मानछे। मगर जहार कम पाप माफ कराल जाछे, वहाँय कम मानछे।” ४८ वहार बाद यीशु स्त्रीडाक कोहले, “तोर पापला माफ हंय गेल।” ४९ जैला लोक यीशुर साथे खवार तने बोठे छिले, यीशुर बात सुने अपनार बीचोत कहवा लागिल, “यहाक त पाप माफ करवा अधिकार नी छे, पाप माफ त खाली परमेश्वर करवा सकोछे।” ५० आर यीशु स्त्रीडाक कोहले, “तोर विश्वासेर कारण तुई अपना पापेर माफी पालो। तुई शांति से चले जा।”

यीशु परमेश्वरेर राजेर बारे बताछे

८ यहार बाद यीशु परमेश्वरेर राजेर खुश-खबरी सबला शहरोत आर बस्तीत दुवा लागिल। वहार साथे वहार बारहझन चेला छिले। २ कैझन स्त्रीव छिले, जहार भीतर से यीशु भूत निकलाहिल आर उसार बेमारीलाक ठीक करहिले। इला स्त्रीर बीचोत मरियम मगदलीनी नामेर एकझन स्त्रीव रहे, जहार अंदर से यीशु सातटा भूतोक निकलाहिले। ३ योअन्नार, सुसन्नाह आर आढ़ो बहुतला स्त्री छिले। वरा अपना सम्पति दे यीशुर आर वहार चेलालार मदद करछिले। योअन्नार पति

खुजा हेरोदेश राजार भण्डारी छिले। ४ वहीखुना नगर-नगर से लोक
यीशुर लिकिन ओसवा लागिल। आर लोकेर बोड़ो भीड़ हंय गेल। यीशु
उसाक एकटा किस्सा सुनाले, ५ “एकझन किसान बिच्चन बुनवार तने
खेतोत गेल। बुनवारखुना कुछुला बिच्चन रास्तात पोड़िल। उला बिच्चन
जा-ओसी करनेवाला लोकेर पाँ दे खिचाल गेल आर चिड़ियाला बिछे
खाय गेल। ६ कुछुला बिच्चन पत्थरीला जमीनेर पर पोल। गाछ त
निकलिल, मगर पानी नी मिलवार कारण सुखाय गेल। ७ कुछुला
बिच्चन झाँटीत पोड़िल आर झाँटीला बढे उलाक चापे दिले। ८ आर
कुछुला बिच्चन अच्छा खेतोत पोड़िल। उला बढे सौ गुणा फसल
दिले।” किस्साडा बोलवार बाद यीशु जोर दे बोलिल, “तुम्हरा जहाँय-
जहाँय मोर बातला सुनछेन, ध्यान दे सुनो।” ९ बाद करे वहार चेलाला
यीशुक पूछिल, “इडा किस्सार माने की छे?” १० यीशु चेलालाक
कोहले, “तुमसाक परमेश्वरेर राजेर गुप्त भेदेर बारे बताल गहे। मगर
उला लोकोक मिसालेर जरियाय बताल जाछे, क्योंकि वरा देखे नी
देखवा पारछे, आर सुने नी बुझवा पारछे।” ११ यीशु अपना चेलालाक
किस्साडार माने बोलिल, “बिच्चन परमेश्वरेर वचन छे। १२ रास्तार
बगलेर बिच्चन उला लोक छे जैला उपदेश सुनिल, मगर शैतान ओसे
उसार मन से वचनडाक ले चले जाछे जसे कि वरा वचनेर पर विश्वास
ना करे आर पापेर माफी ना पाय। १३ पत्थरीला जमीनेर बिच्चन उला

લોક છે, જૈલા વચનડા સુને ખુશી સે ગ્રહણ કરછે। મગર વિશ્વાસ મજબૂત ની હવાર કારણ કુછુ સમય તક વિશ્વાસ રાખછે। પરીક્ષાર સમય વિશ્વાસ છોડે દિછે। ૧૪ ઝાઢીર બિચ્ચન ઉલા લોક છે, જહાંય સુનછે। મગર આગુ ચલે ચિન્તાત, ધનેર લોભ આર જિન્દગીર સુખ વિલાશોત પૈસે જાછે। આર કોય ફલ અનવા ની પાછે। ૧૫ અચ્છા જમીનેર બિચ્ચન ઉલા લોક છે, જૈલા વચનડા સુને અચ્છા મન સે ગ્રહણ કરે દિલોત રાખછે આર ધીરજ સે બહુત ફલ આનછે।” ૧૬ યીશુ એકટા મિસાલ દે કોહલે, “કોય લોક ચરાક જલાય બરતન દે ઝાપે ની રાખછે, ના ખાટેર નીચાનોંત રાખછે। મગર વહાંય ચરાકટાક ચઢાકદાનીર પર રાખછે જસે કિ ઘરેર ભીતરોત જાનેવાલા રોશની પાય। ૧૭ કોય બાત છુપાલ ની છે, જૈડા બાહરે નિકલાર ની જાબે। ઇકિસમ કોય જિનિસ છુપાલ ની છે, જૈલા દેખાર ની જાબે। ૧૮ વહાતે ધ્યાન દે સુનો, જહાર લિકિન કુછુ છે વહાક આઢો દેચાર જાબે। જહાર લિકિન કુછુ ની છે, વહાર લિકિન સે વહોડા લે લિચાર જાબે, જૈડાક વહાંય અપના સમજાછે।”

યીશુર માં આર ભરૂં

(મત્તી ૧૨:૪૬-૫૦; મરકુસ ૩:૩૧-૩૫)

૧૯ યીશુર માં આર વહાર ભરૂંલા વહાર મુલાકાત કરવાર તને ઓસિલ। મગર ભીડેર કારણ યીશુર સાથે મુલાકાત કરવા ની પાલે। ૨૦ યીશુર

लिकिन खबर पठाल गेल कि तोर माँ आर तोर भई ओसिहे। वरा बाहरे थाड़ो हंय छे, आर तोर साथे मुलाकात करवा चाहचे। २१ यीशु जवाब दिले, “मोर माँ आर मोर भई वहीं छे, जहाँय परमेश्वरेर वचन सुनछे आर मानछे।”

यीशु दूनखानोक थमाछे

(मत्ती ८:२३-२७; मरकुस ४:३५-४१)

२२ एक दिना यीशु अपना चेलालार साथे एकखान नावत बोठिल आर उसाक कोहले, “समुन्द्रतार उ-पार चलो।” नावखान जवा लागिल। २३ जैखुना वरा पार करछिल, यीशु नावखानोत सुते गेल। अचुकाय समुन्द्रोत दून चले ओल आर नावखानोत पानी ढुकवा लागिल। चेलाला भारी मुसीबतोत पोड़े गेल। २४ वरा जाय यीशुक उठाय बोलिल, “गुरुजी! हमरा खतम हंय जाछी।” यीशु उठे दूनखानोक आर पानीखानेर ढ्योँलाक धमकाल आर दूनखान थामे गेल। २५ वहार बाद यीशु चेलालाक कोहले, “तुमसार की मोर पर विश्वास नी छे?” वरा डोराय गेल आर हैरान हंय अपनार बीचोत बोलिल, “यहाँय कुन लोक छे, जहार हुकूम दून आर पानीखानो मानछे?”

यीशु भूत धराल लोकोक ठीक करछे

(मत्ती ८:२८-३४; मरकुस ५:१-२०)

२६ वहार बाद यीशु अपना चेलालार साथे गलील प्रदेश से समुन्द्र पार करे गिरासिन इलाकात पहुँचिल। २७ यीशु नाव से नाभछिल करे कि एकझन लोक वहार लिकिन ओसिल। वहाक बहुतला भूत धरिहिल। इडा लोक बहुत दिन से ना त कपड़ा पिन्होंछिले आर ना घरोत रोहछिले। हरखुना कब्रिस्थानोत रोहछिल। २८ यीशुक देखवार साथे लोकटा यीशुर पाँत पोड़े चिल्लाय बोलवा लागिल, “हे परमप्रधान परमेश्वरेर बेटा यीशु! तुई मोक की करवा चाहचिस? मुई बिनती करछी तुई मोक ना सता।” २९ लोकटा वहीलाते इडा बात कोहले क्यौँकि यीशु भूतटाक लोकटार अन्दर से निकलुवार हुकूम दे दिहिले। भूतटा बहुत बार लोकटाक अपना काबूत राखछिले। लोकला हरखुना वहार पर पहरा दिछिले। आर वहार हाथ-पाँ जंजीर दे बानेह राखछिले, मगर वहाँय जंजीरलाक छिड़ाय दिछिले। आर भूतटा वहाक ले जंगलोत चले जाछिल। ३० यीशु भूतटाक पूछिल, “तोर नाम की छे?” वहाँय कोहले, “हमसार नाम फौज छे।” क्यौँकि लोकटार भीतरोत बहुतला भूत छिले। ३१ वरा यीशुक कोहरी करे कोहले, “हमसाक पातालोत ना पठा।” ३२ उठिन पहाड़ेर पर बहुतला सोर चरछिले। भूतला बिनती करिल कि हमसाक सोरलार भीतरोत जवा दे। आर यीशु उसाक जवा दिले। ३३ भूतेर दलडा निकले सोरलार भीतरोत ढुके गेल। आर सबला

सोर पहाड़ेर पर से दौड़े समुन्द्रोत पोड़े डुबे मोरे गेल। ३४ सोरेर रखवालला इडा घटना देखे दौड़े जाय बगलेर शहर आर अगलेर-बगलेर जगोहोत बताय दिले। ३५ जैला घटना घटिहिले, देखवार तने लोकेर भीड़ ओसिल। यीशुर लिकिन ओसे देखछे कि जहाक भूत धरिहिल, वहाँय यीशुर पाँर लिकिन कपड़ा पिन्हे बोठे छे। आर अपना हुँसोत छे। इडा देखे वरा डोराय गेल। ३६ जैला लोक अपना आँख दे देखिहिले कि भूत धराल लोकटा कसे अच्छा होल, वरा जाय दोसरा लोकोक बतवा लागिल। ३७ गिरासिनी एलाकार लोकला इडा चमत्कार देखे डोराय गेल आर यीशुक कोहरी करे कोहले, “यीशु! तुरई हमसार इछिन से चले जा।” वहीलाते यीशु झीलडा पार हवार तने नावत बोठिल। ३८ मगर जैडा लोकेर भीतर से भूतला निकलिहिल, यीशुर लिकिन ओसे कोहरी करवा लागिल कि तोर साथे मोह जाम। मगर यीशु वहाक कोहले, ३९ “नी, तुरई अपना घर जा आर बता कि परमेश्वर तोर तने की करिहे।” लोकटा अपना घर चले गेल। आर गोटेडा शहरोत कोहय बेराल कि यीशु वहार तने कतेक बोड़ो काम करिहे।

मराल लड़की आर बेमार स्त्री

(मत्ती ९:१८-२६; मरकुस ५:२१-४३)

४० यीशु जैखुना झीलडा पार करिल, लोकेर भीड़ वहार स्वागत करिल क्योंकि वरा यीशुर तने इन्तेजार करछिले। ४१ उठिन याईर नामेर एकटा

लोक छिले जहाँय प्रार्थना-घरेर एकझन नेता छिले। वहाँय यीशुर पाँत पोड़े कोहरी करे बोलिल, “तुई मोर घर ओस, ^{४२} क्याँकि मोर बारह सालेर बेटी मोरने वाला छे आर वहाँय मोर एकलौती बेटी छे।” जैखुना यीशु लोकटार साथे जवा लागिल, वहार चारो भीति लोकेर भीड़ ठेला-ठेली करछिले। ^{४३} वहीखान भीड़ोत एकझन स्त्री छिले, जहाक बारह साल से खून बहवार बेमारी छिले। वहाँय बहुत डाक्टरेर लिकिन गेल, मगर ठीक नी होल। ^{४४} वहाँय पीछू से ओसे यीशुर कपड़ार पाड़टा लाड़िल। आर साथे-साथे वहार खून बहवार बेमारी ठीक हंय गेल। ^{४५} यीशु पूछिल, “मोक के लाड़िल?” सबकोय कहवा लागिल, “मुई नी, मुई नी।” पतरस आर वहार साथीला कोहले, “मालिक! तोर पर त चारो भीति से लोकेर भीड़ उजड़े पोरछे।” ^{४६} मगर यीशु उसाक बोलिल, “नी, मोक कोय जाने-बुझे लारिहे क्याँकि मोक पता चलिल कि मोर लिकिन से शक्ति निकलिल।” ^{४७} स्त्रीडा देखिल कि मुई आर छिपवा नी पारमु। काँपते-काँपते यीशुर लिकिन ओसे पाँत पोड़े सब लोकेर सामनात बताल कि वहाँय क्याँ लाड़िल आर कसे करे साथे-साथे ठीक हंय गेल। ^{४८} यीशु स्त्रीडाक बोलिल, “तुई मोर पर विश्वास करलो, वहीलाते मुई तोक अच्छा करे दिनु शांति से चले जा।” ^{४९} यीशु स्त्रीडार साथे बात करछिल करे कि यार्दिर घर से कोय ओसे यार्दिरोक कोहले, “तोर बेटी मोरे गेल। गुरुजीक आर तकलीफ ना दे।” ^{५०} यीशु

इडा सुने बेटीर बाफोक कोहले, “तुई ना घबरा। मोर पर विश्वास कर तोर बेटी जिन्दा हंय जाबे।” ५१ याईरर घर पहुँचवार बाद, यीशु अपना तीनझन चेला पतरस, यूहन्ना, याकूब आर लड़कीर माँ-बाफोक छोड़े आर कहाको घरेर भीतरोत ओसवा नी दिले। ५२ सबकोय इनाय-बिनाय कानछिले। मगर यीशु उसाक कोहले, “ना कानो। लड़कीडा नी मोरे, मगर निनाय गहे।” ५३ भीड़ेर लोकला वहार पर हँसवा लागिल क्याँकि सबकोय जानछिले कि लड़कीडा मोरे गहे। ५४ यीशु लड़कीडार हाथखान धरे कोहले, “बेटी! उठ।” ५५ वहीखुना लड़कीडा जिन्दा हंय गेल आर उठे बोठे गेल। आर यीशु बोलिल, “वहाक कुछु खवार दव।” ५६ लड़कीर माँ-बाप हैरान हंय गेल। मगर यीशु उसाक ठठाय-बजाय बोलिल, “इडा बात कहाको ना कहेन।”

यीशु चेलालाक प्रचार करवा पठाछे

(मत्ती १०:५-१५; मरकुस ६:७-१३)

९ एक दिना यीशु अपना बारहझन चेलाक जाब दे उसाक सब किसमेर भूतेर आर सब किसमेर बेमारीक ठीक करवार शक्ति आर अधिकार दिले। २ वहाँय उसाक परमेश्वरेर राजेर प्रचार करवा आर बेमारीलाक ठीक करवार तने पठाले। ३ वहाँय अपना चेलालाक कोहले, “रास्तार तने कुछु ना लेन। ना त लाठी, ना झोला, ना खवार जिनिस, ना टका-पैसा आर ना साथे दुईडा कुरता लेन। ४ कहारो घर जायन त नगर से

बिदा हवार समय तक वहीठिन रहेन। ५ जे नगरेर लोक तुमसाक ग्रहण नी करे त, उडा नगर से निकलुवारखुना अपना पाँर धुला वहीठिन झाड़े देन। इडा साबित करबे कि परमेश्वर उडा नगरेर लोकोक सजा दिबे।” ६ वहार बाद चेलाला बस्ती-बस्ती परमेश्वरेर राजेर बारे प्रचार करवा लागिल आर लोकेर बेमारीलाक ठीक करते रोहोल। ७ आर जैला घटना उखुना घटछिले, राजा हेरोदेश सुने घबराय गेल क्यौंकि कुछुला लोक बोलछिले कि यूहन्ना बपतिस्मादाता जिन्दा हंय उठयेह। ८ कोय-कोय बोलछिले, यहाँय एलियाह छे। आर कोय-कोय लोक बोलछिले, पुराना जमानार कोय नबी जिन्दा हंय उठयेह। ९ मगर हेरोदेश राजा कोहले, “मुई त यूहन्ना बपतिस्मादातार माथाडा काटे अलग करे दिहिनु। मगर यहाँय के छे, जहार बारे मुई इकिसम सुनछी?” आर वहाँय यीशुक देखवा चाहचिले।

पाँचटा रूटी आर पाँच हजार लोक

(मत्ती १४:१३-२१; मरकुस ६:३०-४४; यूहन्ना ६:१-१४)

१० मसीह-दूतला जैला काम करिहिले, घुरे ओसे सबला यीशुक बताल। आर वहाँय अपना मसीह-दूतलाक ले चुपचाप बैतसैदा शहर चले गेल। ११ इडा खबर पाय भीड़ेर लोकला वहार पीछू-पीछू गेल। यीशु उसाक स्वागत करे परमेश्वरेर राजेर बारे बोलवा लागिल। आर जहाँय-जहाँय बेमारी से ठीक हवा चाहचिले, उसार बेमारीलाक वहाँय ठीक करिल।

१२ भाटी पोहरे बारहझन चेला ओसे यीशुक कोहले, “गुरुजी! लोकलाक अगलेर-बगलेर बस्तीत पठा जसे कि वरा खवार आर रहवार जगह देखे क्यौंकि हमरा इछिन सुनसान जगहोत छी।” १३ यीशु अपना चेलालाक कोहले, “तुम्हरा उसाक खवार तने दव।” चेलाला बोलिल, “हमसार लिकिन पाँचटा रूटी आर दुईडा माछ छोड़े आर कुछु नी छे। हमरा अगर इला सबला लोकेर तने खानाव किने आनी तहारो पर नी जुम्बे।” १४ लोकेर भीड़ कम से कम पाँच हजार रहे। वहार बाद यीशु अपना चेलालाक कोहले, “तुम्हरा सभाको पचास-पचासझन करे बठाय दव।” १५ आर चेलाला सभाको बठाय दिले। १६ चेलालार लिकिन खाली पाँचटा रूटी आर दुईडा माछ छिले। यीशु उला रूटी आर माछोक ले परमेश्वरेर शुकुरिया अदा करिल आर भाँयें-भाँयें चेलालाक दिते गेल आर चेलाला लोकलाक खिलाल। १७ सबकोय पेट भरे खाले। वहार बादो बचे गेल। आर चेलाला बारह टोकरी रूटीर टुकड़ा जोड़ो करिल।

यीशु परमेश्वरेर मसीहा

(मत्ती १६:१३-२०; मरकुस ८:२७-३०)

१८ जैखुना यीशु एकान्तोत प्रार्थना करवा गेल, सिरिफ चेलाला वहार साथे छिले। वहाँय अपना चेलालाक पूछिल, “लोक मोर बारे की बोलछे?” १९ चेलाला जवाब दिले, “कोय कोहचे, यूहन्ना जहाँय लोकोक बपतिस्मा दिछिले। कोय एलियाह आर कोय बहुत पहिलेकार

नबी कोहचे जहाँय मोरे जिन्दा हंय उठयेह।” २० यीशु फेर चेलालाक पूछिल, “मगर तुम्हरा मोक की कोहचेन?” पतरस जवाब दिले, “तुई परमेश्वरेर चुनाल मसीहा छिस।” २१ यीशु चेलालाक ठठाय-बजाय बोलिल, “इडा बात कहाको ना कहेन।”

यीशुर चेला हवार कीमत

(मत्ती १६:२१-२७; मरकुस ८:३१—९:१)

२२ फेर यीशु कोहले, “मानुषेर बेटार तने जरूरी छे कि यहूदी नेतालार, बोड़ोला पूजारी, आर शास्त्रेर ज्ञानीलार हाथ से मुई बहुत दुःख उठामु आर मारा जाम, आर तेसरा दिन जिन्दा हंय उठुम।” २३ यीशु सभाको कोहले, “अगर कोय लोक मोर पाछूत ओसवा चाहचे, त वहाँय अपना मन मुताबिक ना चलोक, आर क्रुस उठाय मोर पाछूत चले ओसोक आर मोर तने दुःख उठवार तने तैयार रहोक। २४ क्योंकि जहाँय अपना जानडा बचवा चाहचे वहाँय उडाक हराय दिबे, मगर जहाँय अपना जानडाक मोर तने आर मोर तने अपना जान दे दिबे, वहाँय उडाक बचाबे। २५ अगर कोय लोक पूरा दुनियाँडार दौलत पाय जाय, मगर नरक चले जाय आर अपना आपोक बर्बाद करे दे, त वहाक की पैदा? २६ अगर कोय मोर नाम से आर मोर वचन से शर्माछे, त जैखुना मानुषेर बेटा अपना महिमात, आर पिता आर पवित्र फरीस्तालार महिमात ओसबे त वहाँव उसाक देखे शर्माबे। २७ मुई तुमसाक ठीक-ठीक

कोहची, जैला लोक इठिन हाजिर छे, उसार बीचोत कुछुला लोक इकिसम छे कि जैखुन तक वरा परमेश्वरेर राजोक देखे नी लिबे, उखुन तक वरा नी मोरबे।”

चेलाला यीशुर महिमा देखिले

(मत्ती १७:१-८; मरकुस ९:२-८)

२८ इला बातेर करीब-करीब आठ दिन बाद यीशु अपना तीनझन चेला पतरस, यूहन्ना आर याकूबोक साथे लिले आर प्रार्थना करवार तने एकखान पहाड़ेर पर गेल। २९ जैखुना वहाँय प्रार्थना करछिल, त वहार मुखखान बदले गेल आर वहार कपड़ाला सप्फा धकधक हंय गेल। ३० आर चेलाला देखिले कि मूसा आर एलियाह दोनोंझन यीशुर साथे बात करछे। ३१ आर उसाक बहुत चमकते देखाल गेल। वरा यीशुर साथे बातचीत करछिले कि वहाँय अपना मौतेर जरियाय यरूशलेमोत परमेश्वरेर योजनाक पूरा करनेवाला छे। ३२ पतरस आर वहार साथीला भारी निनोत पोरे गहिले। जैखुना वरा जागिल, त यीशुर मुखखान चमकते देखिले, आर उ-दुईझन लोकोक वहार साथे देखिले। ३३ जैखुना मूसा आर एलियाह जवा लागिल, त पतरस यीशुक बोलिल, “गुरुजी! हमसाक इठिन रहना अच्छा छे। हमरा इठिन तीनडा मंडप बनामोह। एकटा तोर तने, एकटा मूसार तने आर एकटा एलियाह नबीर तने।” पतरस इडा नी जानछिले वहाय की कोहचे? ३४ वहाँय इडा बात

कोहचिले करे कि एकखान बदली ओसे उसाक घेरे लिले आर चेलाला डोराय गेल। ३५ वहार बाद बदलीखान से एकटा आवाज ओल, “यहाँय मोर बेटा छे आर यहाक मुई पठाही। तुम्हरा यहार बात सुनो।” ३६ इडा आवाज हवार बाद यीशुक अखलाय देखाल गेल आर इडा देखे चेलाला चुप रोहिल आर उडा समय वरा इडा घटना कहाको नी बताल।

यीशु भूत धराल लड़काडाक अच्छा करछे

(मत्ती १७:१४-१८, २२-२३; मरकुस ९:१४-२७, ३०-३२)

३७ इडा घटनार दोसरा दिन जैखुना यीशु चेलालाक ले पहाड़ से नाभिल, लोकेर बोड़ो भीड़ यीशुर लिकिन जोड़ो हंय गेल। ३८ आर भीड़ेर भीतर से एकटा लोक चिल्लाय बोलिल, “गुरु! मुई तोसे बिनती करछी कि तुई मोर बेटाक देख क्यौंकि वहाँय मोर एकलौता बेटा छे। ३९ यहाक एकटा भूत धरछे, वहीलाते वहाँय हल्ला करते रोहचे आर काँपते रोहचे, आर मुख से गाजो निकलिते रोहचे आर वहाक मचड़ाय दिछे आर चोट पहुँचाछे। भूतटा यहाक बहुत मुशिकल से छोड़छे। ४० मुई तोर चेलालार लिकिन बिनती करनु कि तुम्हरा भूतटाक निकलाय दव। मगर निकलुवा नी पारिल।” ४१ यीशु कोहले, “ऐ अविश्वासी आर सक्कत मोनेर लोक, मुई की तुमसार साथे हरखुना रोहमु आर तुमसार बर्दास्त करूम? लड़काडाक मोर लिकिन आन।” ४२ लोकटा अपना बेटाक ले ओसछिले करे कि भूतटा लड़काडाक रास्तात मचड़ाय फेकाय दिले। यीशु

लड़काडा से भूतटाक निकलुवार हुकूम दिले आर वहाक ठीक करे दिले। वहार बाद लड़काडाक वहार बाफेर हाथोत सोंपे दिले।

दोसरा बार यीशु अपना मौतेर बारे बताछे

४३ परमेश्वरेर इडा अद्भूत काम देखे सबला लोक डोराय गेल। जैखुना लोकला यीशुर अद्भूत काम देखे हैरान छिले, यीशु अपना चेलालाक कोहले, ४४ “मोर बात सुनो आर उलाक याद राखो। मोक पापी लोक धोखा दे धराय दिबे।” ४५ मगर चेलाला यीशुर बातला बुझवा नी पारिल क्योंकि उसाक इला बात बुझवार शक्ति नी देयाल गहिले। आर वहाक इला बातोक पूछवार हिम्मत नी पाले।

चेलालार बीचोत सबसे बोड़ो के

(मत्ती १८:१-५; मरकुस ९:३३-४०)

४६ एक दिना यीशुर चेलाला अपना बीचोत बहस करवा लागिल कि हमसार बीचोत सबसे बोड़ो के छे? ४७ यीशु उसार बिचार जाने एकटा छोटो बच्चाक आने अपना बगलोत थाड़ो करे दिले। ४८ आर बोलिल, “जहाँय इडा छोटो बच्चाक अपनाछे, वहाँय मोक अपनाछे। आर जहाँय मोक अपनाछे वहाँय मोर पठानेवालाक अपनाछे। जहाँय अपना आपोक छोटो से छोटो बनाछे, वहीं बोड़ो होचे।” ४९ यीशुर चेला यूहन्ना वहाक बोलिल, “गुरुजी! हमरा देखनु कि तोर नाम से एकझन लोक

भूत निकलाछे। आर हमरा वहाक मना करनु क्याँकि वहाँय हमसार दलेर लोक नी छे।” ५० मगर यीशु चेलाडाक कोहले, “वहाक मना ना करो। अगर कोय तुमसार बिरोध नी करछे, त वहाँय तुमसार दलेर लोक छे।”

यीशु यरूशलेम जाछे

५१ जैखुना यीशुर स्वर्गोत जवार समय बगलोत चले ओसिल, वहाँय यरूशलेम जवार तने अपना मनोत ठाने लिले। ५२ यरूशलेम जवार रास्तात यीशु अपना कुछु लोकोक सामरी लोकेर बस्तीत पहिले पठाले कि वरा जाय वहार रहवार जगह उपाय करबे। ५३ मगर उडा बस्तीर लोकला यीशुक रखवार तने राजी नी होल। लोकला यीशुर साथे कोय नाता रखवा नी चाहचिले क्याँकि यीशु यरूशलेम जानेवाला छिले। ५४ जैखुना याकूब आर यूहन्नाक इला बातेर पता चलिल, त वरा यीशुक कोहले, “गुरुजी! हमरा की उसाक जलाय खतम करे दुवार तने स्वर्ग से आगिन गिरवार हुकूम दे दी, जैकिसम कि एलियाह हुकूम दिहिले?” ५५ मगर यीशु उसाक धमकाय कोहले, “तुमसार कुन किसम दिल छे? ५६ मुई त लोकोक खतम करवार तने नी ओही, बल्के बचवार तने।” वहार बाद वरा उछिन से दोसराडा बस्तीत चले गेल।

असली चेलार जाँच

(मत्ती ८:१९-२२)

५७ रास्तात जाते-जाते कोय यीशुक कोहले, “गुरूजी! तुई जैठिन जाबो, मुई तोर साथे जाम।” ५८ मगर यीशु वहाक कोहले, “खटियालार रहवार खाद छे, चिड़ियालाक रहवार अपना खोता छे, मगर मुई जे मानुषेर बेटा मोर लिकिन आराम करवारो कोय जगह नी छे।” ५९ यीशु दोसराझनाक कोहले, “तुई मोर चेला बने जा।” मगर वहाँय यीशुक कोहले, “गुरूजी! पहिले मोक घर जवा दे आर मोर बाफोक माटी दुवा दे।” ६० यीशु वहाक जवाब दिले, “जहार जीवनडा मुर्दा लोकेर मान्दी छे, उसाके मूरदालाक माटी दुवा दे। तोर इडा काम छे कि तुई परमेश्वरेर राजेर बारे प्रचार कर।” ६१ आर तेसराझन लोक यीशुक कोहले, “हाँ, गुरूजी! मुई तोर चेला बने जाम। मगर पहिले मोक अपना घरेर लोकलार लिकिन से बिदायगी लुवा दे।” ६२ यीशु वहाक जवाब दिले, “जहाँय खेतोत हाल बहाछे आर हालोत हाथ राखे पीछू भीति देखेछे, वहाँय परमेश्वरेर राजेर लायक नी छे।”

सत्तरझन चेलार काम

(मत्ती ११:२०-२७; १३:१६-१७)

१० इला घटनार बाद यीशु आढ़ो सत्तरझन चेलाक चुने उसाक दुईझन-दुईझन करे उला शहरोत पठाले, जैलात वहाँय जानेवाला छिले।

२ आर उसाक कोहले, “देखो! पकाल फसल बहुत बेसी छे, मगर कटन्यार कम छे। वहीलाते मुई तुमसाक कोहची, तुम्हरा खेतेर मालिक से बिनती करो कि वहाँय बेसी करे कटन्यार पठाय दे। ३ तुम्हरा जाव। मुई तुमसाक भेड़ेर बच्चार मान्दी खतरनाक खटियालार बीचोत पठाछी। ४ रास्तार तने कुछु ना लव। ना टाका, ना झोला आर ना चप्पल। रास्तात कहाको प्रणाम-पाती ना करेन। ५ जैडा घरोत तुम्हरा जाभेन, पहिले आशीर्वाद दिभेन। ६ यदि उडा घरेर लोक आशीर्वादिर लायक छे, वहार पर तुमसार आशीर्वाद रोहबे। अगर आशीर्वादिर लायक नी छे त तुमसार आशीर्वाद घुरे चले ओसबे। ७ आर तुम्हरा वहीठिन रहेन। घरे-घरे घुरे ना बेरायन। जैला खवार तने दिबे, वहीला खायेन क्योंकि मजदूरोक मजदूरी पावार हक छे। ८ अगर तुम्हरा कोय शहरोत जायेन आर वरा तुमसाक ग्रहण करछे, त जैला तुमसाक खवा दिबे उला खायेन। ९ लोकेर बेमारी ठीक करेन आर कहेन कि परमेश्वरेर राज तुमसार लिकिन चले ओसिहे। १० मगर कोय शहरेर लोक अगर तुमसाक ग्रहण नी करछे त उडा शहरेर गोलीलात जाय तुम्हरा कहेन, देखो! तुम्हरा त हमसाक ग्रहण नी करलेन। ११ वहीलाते हमरा तुमसार शहरेर धुला हमसार पाँ से झाड़े चले जाछी। इडा साबित करछे कि परमेश्वर तुमसाक सजा दिबे। मगर इडा जाने लव कि परमेश्वरेर राज

बगलोत छे। १२ परमेश्वरेर बिचारेर दिनोत, इडा शहरेर दुःख दुष्ट सदोम नगरेर लोकलार दुःख से बेसी होबे।”

बिचारेर दिनोत पापी नगरेर दुःख

१३ तब यीशु अपना बगलेर शहरलार बारे बोलिल, “खुराजीन आर बैतसैदा शहरेर लोकला! हाय तुमसार पर! क्योंकि जैला शक्तिर काम तुमसार बीचोत कराल गेल, उला काम अगर सूर आर सैदा लोकेर बीचोत कराल गेलतेन, जैला बहुत पहिले से छिले, त वरा अपना बदनोत मुस लगाय आर धोकड़ा पिन्हे अपना पापेर तने अफसोस करिलतेन आर मन बदली करिलेतन। १४ वहीलाते देखो! परमेश्वरेर बिचारेर दिनोत तुमसार दुःख सूर आर सैदा नगरेर लोकेर दुःख से बेसी होबे। १५ आर कफरनहूम शहरेर लोकला! तुम्हरा की स्वर्गोत चढ़बेन? तुमसाक त पातालोत टाने नभाल जाबे” १६ वहार बाद यीशु अपना चेलालाक कोहले, “जहाँय तुमसार बात सुनछे, वहाँय मोर बात सुनछे। जहाँय तुमसाक नी अपनाछे, वरा मोक नी अपनाछे। जहाँय मोक नी अपनाछे, वरा मोर पठानेवालाक नी अपनाछे।”

शैतानेर पर जीत

१७ उ-सत्तरइन चेला घुरे ओसे कहवा लागिल, “हे गुरुजी! तोर नाम से भूतलाव हमसार कब्जात चले ओसछे।” १८ यीशु उसाक कोहले, “मुई

शैतानोक बिजलीर मान्दी स्वर्ग से गिरते देखनु। १९ देख! मुई तुमसाक शैतानेर पूरा शक्तिर पर अधिकार दिछी। तुम्हरा शैतानोक साँप आर बिच्छुर मान्दी कुचले दुवा पारभेन। कुछु तुमसार नोकसान करवा नी पारबे। २० इडा बात से खुश ना होयेन कि भूतला तुमसार कब्जात छे, मगर इडा बात से खुश होयेन जे तुमसार नाम स्वर्गोत लिखाल छे।”

सीधा लोकेर लिकिन भेदेर बात

२१ वहीखुना यीशु पवित्र आत्मात खुशी से भरे गेल आर बोलिल, “हे पिता! स्वर्ग आर दुनियाँर मालिक। मुई तोर बड़ाई करछी क्योंकि तुई इला बातोक बुद्धिमान आर ज्ञानी लोक से नुकाय राखिलो आर छोटे छुवार मान्दी लोकलाक बताय दिहिस। हाँ, पिता। इला तोर दया से भराल इच्छा मुताबिक होचे। २२ मोर बाप मोर हाथोत सब कुछु सोंपे दिहे। कोय नी जानछे कि बेटा के छे, सिरिफ बाप जानछे। आर बाफोक कोय नी जानछे, सिरिफ बेटा। आर बेटा जहाक बाफेर बारे बताछे, वहाँव बाफोक जानछे।” २३ वहाँय चेलालार भीति घुरे अलग करे बोलिल, “खुशहाल उला लोक छे, जहाँय उला काम देखछे, जैला तुम्हरा देखछेन। २४ मुई तुमसाक कोहची कि बहुतला राजा आर नबी इला जिनिस देखवा आर सुनवा चाहचिले, जैलाक तुम्हरा देखछेन आर सुनछेन। मगर वरा देखवा आर सुनवा नी पाड़िल।”

अच्छा पड़ोसी के

२५ एकझन शास्त्रेर ज्ञानी यीशुक जाँच करवार तने उठे यीशुक एकटा सवाल पूछिल, “हे गुरु! स्वर्ग जवार तने की करूम?” २६ यीशु जवाब दिले, “मूसार नियमोत की लिखाल छे? तुई की समझोछिस?” २७ ज्ञानीडा जवाब दिले, “लिखाल छे, तुई प्रभु अपना परमेश्वरोक पूरा मन, पूरा प्राण, पूरा शक्ति आर पूरा बुद्धिर साथे प्रेम कर, आर अपना पड़ोसीक अपना मान्दी प्रेम कर।” २८ यीशु जवाब दिले, “तुई ठीक कोहलो। तुई यही किसम करले स्वर्गोत जाबो।” २९ वहार बाद ज्ञानी लोकटा अपना आपोक धर्मी साबित करवार तने यीशुक आर एकटा सवाल पूछिल, “मोर पड़ोसी के छे?” ३० यीशु वहाक एकटा किस्सा सुनाले, “एकझन लोक यरूशलेम से यरीहो जाछिल। कुछुला डाकू वहाक पकड़े लिले। वहार कपड़ा खोले दिले, मारपीट करिल आर आधमरा करे रास्तार बगलोत फेके चले गेल। ३१ वहीपाके एकझन पूजारी जाछिल आर वहाक देखे कतराय चले गेल। ३२ फेर वहार बाद एकझन लेवी ओसिल आर वहाँ देखे कतराय चले गेल। ३३ वहार बाद एकझन अछुत सामरी लोक उछिन पहुँचिल। लोकटार हालत देखे वहार पर माया चले ओसिल। ३४ वहाँय वहार लिकिन गेल आर वहार घावलात जैतूनेर तेल आर अंगुरेर रस द्वार हिसाबे लगाले आर पट्टी बान्हें दिले। वहार बाद वहाँय लोकटाक अपना गधार पर बठाय

मुसाफिरखानात ले गेल आर देखभाल करिल। ३५ आर दोसरा दिन बेहाने वहाँय मुसाफिरखानार मालिकोक दुईडा चानीर सिक्का दे कोहले, तुई लोकटार देखभाल करेक। यदि कुछ बेसी टाका खर्चा होबे, त मुई ओसे भरे दुम।” ३६ इडा किस्सा बोलवार बाद यीशु ज्ञानी लोकटाक कोहले, “अला तुई बता इ-तीनोंझनार अन्दरोत घायल लोकटार पड़ोसी के होल?” ३७ लोकटा जवाब दिले, “जहाँय वहार पर दया करिल।” यीशु कोहले, “तुई ठीक जवाब दिलो। जा आर यही किसम करेक।”

मार्था आर मरियम

३८ वहार बाद यीशु अपना चेलालार साथे जाते-जाते एकटा बस्तीत पहुँचिल। उडा बस्तीत मार्था नामेर एकझन स्त्री छिले। वहाँय यीशुक अपना घरोत जाब दिले। ३९ वहार बहिन मरियम प्रभु यीशुर पाँर लिकिन बोठे वहार वचन सुनवा लागिल। ४० मगर मार्था नाना प्रकारेर काम करते-करते परेशान छिले। वहाँय यीशुर लिकिन ओसे वहाक कोहचे, “गुरुजी! तुई की कोय बातेर ख्याल नी करछिस? मोर बहिनोक बोल कि वहाँय मोर मदद करे।” ४१ प्रभु यीशु मार्थाक बोलिल, “मार्था! तुई बहुत जिनिसेर तने परेशान छिस। ४२ मगर एकटा बात जरूरी छे। तोर बहिन मरियम अच्छा काम बिछे लिहे, जैखान वहार लिकिन से कोय छिड़ाय लुवा नी पारबे।”

प्रभुर प्रार्थना

(मत्ती ६:९-१३; ७:७-११)

११ एक दिना यीशु एकखान जगोहोत प्रार्थना करछिल। प्रार्थना खतम हवार बाद वहार एकझन चेला वहाक कोहले, “गुरुजी! यूहन्ना बपतिस्मादाता जैकिसम करे अपना चेलालाक प्रार्थना करवा सिखाहे, वही किसम तुई हमसाको प्रार्थना करवा सीखा।” २ यीशु उसाक कोहले, “जैखुना तुम्हरा परमेश्वरेर लिकिन प्रार्थना करभेन, उखुना इकिसम प्रार्थना करेन, हे स्वर्गेर पिता! तोर नाम पवित्र मनाल जाक, आर तोर राज कायम होक। ३ तुई होर दिना हमसाक खवार दे, जैडा कि हमसाक जरूरी छे। ४ जैकिसम हमरा अपना कसूरवारोक माफ करछी, वही किसम तुई हमसारो कसूरलाक माफ करेक। आर हमसाक पापोत पोड़वा ना दे।”

माँगले पाबे

५ यीशु चेलालाक प्रार्थनार बारे आढो सिखवार तने इडा किस्सा सुनाले, “एक दिना आध रातोत एकझन लोक अपना दोस्तेर घरोत जाय कोहचे, ‘दोस्त! मोक तीनडा रूटी दव। ६ मोर एकझन दोस्त सफर करे मोर घर ओसिहे। वहाक खिलवार तने मोर लिकिन कुछु नी छे।’ ७ घरेर भीतर से वहार दोस्त जवाब दिले, ‘दोस्त! तुई मोक तकलीफ ना दे। केवारीखान अला बनछे। मोर छुवाला मोर साथे सुतेछे। मुई अला उठे

तोक कुछु दुवा नी पारमु।' ” ८ यीशु अपना चेलालाक कोहले, “मुई तुमसाक कोहची, दोस्त समझे वहाँय अगर वहाक कुछु नी दे, मगर बार-बार जिद्द करवार कारणे वहाँय बिछना से उठबे आर वहार जरूरत मुताबिक कुछु दे दिबे। ९ यहीलाते मुई तुमसाक कोहची, तुम्हरा माँगभेन, त तुमसाक देयाल जाबे। छाबभेन त पाभेन। केवारी खटखटाभेन त खोलाल जाबे। १० क्यौँकि जहाँय माँगछे, वहाक देयाल जाछे। जहाँय छाभछे, वहाँय पाछे। जहाँय दरवाजा खटखटाछे, वहार तने खोलाल जाछे। ११ तुमसार बीचोत इकिसम बाप कोय नी छे, जहार लिकिन वहार बेटा रूटी माँयें त पत्थल दिबे, माछ माँगले साँप दिबे, १२ डिमा माँगले वहाक बिस-कंकड़ा दिबे। १३ तुम्हरा खराब लोक हंय, अगर अपना बाल-बच्चाक अच्छा चीज दुवा जानेन, त स्वर्गेर पिता अपना माँगने वालाक पवित्र आत्मा दुवार तने क्यौँ नी आढ़ो बेसी तैयार रोहबे?”

यीशु कहार जरियाय काम करछे

(मत्ती १२:२२-३०; मरकुस ३:२०-२७)

१४ एक दिना यीशु एकटा गोंगा भूतोक एकझन लोकेर भीतर से भगाछिले। भूतटा निकले जवार बाद लोकटा बोलवा लागिल। इडा देखे लोकला हैरान हंय गेल। १५ मगर कुछुला लोक बोलिल, “यहाँय त भूतेर राजा शैतानेर मदद से भूतोक भगाछे।” १६ आढ़ो कुछुला लोक यीशुक

जाँच करवार मतलब से पूछिल, “तुई हमसाक स्वर्गेर एकटा चिन्ह दखा।” १७ उसार मोनेर बातलाक जाने यीशु कोहले, “जैडा राजेर भीतर फूट पैदा हंय जाछे, उडा राज बर्बाद हंय जाछे। उडा राजेर परिवारलाव अलग-अलग हंय जाछे। १८ शैतानो अगर अपनार बीचोत लड़े, त वहार राज कसे करे टिकबे? तुम्हरा कोहचेन कि मुई शैतानेर मदद से भूतलाक भगाछी। १९ आर अगर मुई बेलजबूबेर मदद से भूतोक निकाछी, त कहार मदद से तुमसार चेलाला भूतलाक निकलाछे? वहीलाते तुमसार कहना मुताबिक तुमसार लोकलाय तुमसार बिचार करबे। २० अगर मुई परमेश्वरेर शक्ति से भूतलाक निकलाछी, त समझे लव कि परमेश्वरेर राज तुमसार लिकिन ओसे गहे। २१ धरे लव, एकझन ताकतवर लोक जैखुना सब किसमेर हथियार ले अपना घरेर पहरा दिछे, त वहार सबला जिनिस हिफाजतोत रोहचे। २२ वहीखुना वहा से बोड़ो एकटा पहलवान ओसछे, वहार पर हमला करे वहाक हराय दिछे। आर जैला हथियारेर पर वहार भरोसा छिले, उलाक छिड़ाय लिछे। वहार बाद वहार सबला जिनिसोक लूटे ले चले जाछे। २३ जहाँय मोर साथे नी छे, वहाँय मोर खिलाफ छे। जहाँय मोर साथे अनाज जोड़ो नी करछे, वहाँय छिड़ियाछे। २४ जैखुना एकटा भूत एकझन लोकेर भीतर से निकले जाछे, वहाँय आराम करवार तने एकखान सुखना जगह छाभछे, मगर कोय जगह नी पाछे, त २५ वहाँय कोहचे, ‘मुई जैखान घर से

निकले ओसिही, वहीखान घरोत घुरे चले जाम।’ घुरे ओसे उखान घरोक साफ-सुथरा आर सजाल देखछे। २६ वहार बाद वहाँय जाय अपना से बेसी खराब आढ़ोह सातटा भूतोक साथे आनछे आर उडा लोकेर भीतरोत ढुके रहवा लागछे। उडा लोकेर हालत पहिले से आढ़ोह बेसी खराब हंय जाछे।” २७ यीशु बात करछिल करे कि उखुना भीड़ेर अन्दर से एकझन स्त्री कोहले, “परमेश्वरेर आशीर्वाद उडा स्त्रीर पर छे, जहाँय तोक जनम दिहे आर अपना बुकेर दूध खिलाहे।” २८ मगर यीशु बोलिल, “वहा से बेसी वरा आशीर्वादिर लोक छे जहाँय परमेश्वरेर वचन सुनछे आर वचनेर अनुसारे काम करछे।”

यीशु लोकलाक चेताछे

(मत्ती १२:३८-४२)

२९ यीशुर चारो भीति आढ़ो बहुतला लोक जोड़ो होते रोहोल। आर वहाँय कहवा लागिल, “इ-युगेर लोकला खूब खराब। वरा सिरिफ अद्भूत कामेर चिन्ह देखवा चाहचे। मगर योना नबीर चिन्ह छोड़े उसाक आर कोय दोसरा चिन्ह नी देखाल जाबे। ३० निनबे नगरेर लोकलार तने जैकिसम योना एकटा चिन्ह बनिहिले, वही किसम इडा युगेर लोकलार तने मानुषेर बेटा यीशु चिन्ह बनबे। ३१ आर दक्खिन देशेर रानी इ-युगेर लोकलार खिलाफ गवाह दुवार तने थाड़ो होबे आर इसाक दोषी ठहराबे, क्योंकि वहाँय दुनियाँर दोसरा छोर से सुलेमानेर लिकिन वहार बुद्धिर

बात सुनवार तने ओसिहिले। मगर इठिन एकझन छे, जहाँय सुलेमान से बोड़ो छे। ३२ परमेश्वरेर बिचारेर दिनोत निनबे शहरेर लोकला इ-युगेर लोकलार खिलाफ गवाह दुवार तने थाड़ो होबे, आर इसाक दोषी ठहराबे क्योंकि निनबे शहरेर लोकला योनार प्रचार सुने अपना पाप से मन बदली करे मन फिराहिले। मगर इठिन योना से भी कोय बोड़ो छे।”

चराकेर मिसाल

(मत्ती ५:१५; ६:२२-२३)

३३ “कोय लोक चराक जलाय टोकरी दे झापे नी राखछे। मगर चराकदानीर पर राखछे जसे कि घरेर भीतरोत जानेवाला रोशनी पाय। ३४ तुमसार आँखला तुमसार तने चराकेर काम करछे। अगर तुमसार आँखला अच्छा छे, त तुमसार पूराडा बदन रोशनी से भराल छे। अगर तुमसार आँखला अच्छा छे, त तुमसार बदनडा पूरा अन्हारोत छे। ३५ ध्यान दव कि तुमसार भीतरेर रोशनी, अन्हार नी हंय जाय। ३६ अगर तुमसार पूराडा बदन रोशनीत छे आर कोयछिन अन्हार नी छे, त पूराडा बदन चमकिबे, जैकिसम कि चराकेर रोशनी बदनडात पोड़ले बदनडा उजालात रोहचे।”

परमेश्वर भीतर-बाहर देखछे

(मत्ती २३:१-३६; मरकुस १२:३८-४०)

३७ जैखुना यीशु बातचीत खतम हंय गेल, एकझन फरीसी वहाक अपना घरोत खिलवार तने बलाहट दिले। यीशु वहार घर ओसे भीतरोत खवार तने बोठिल। ३८ फरीसीडा देखिले कि यीशु नियम मुताबिक खवार आगुत अपना हाथ नी धुले। इडा देखे वहाय हैरान हंय गेल। ३९ यीशु वहार मोनेर बात जाने वहाक बोलिल, “सुन भई! तुम्हरा फरीसीला थाली आर बाटीर बाहरे-बाहरे माजेछेन, मगर तुमसार भीतरटा लोभ आर खराब बात से भराल छे। ४० तुम्हरा बेवकूफ! जहाँय बाहरी भागडा बनाहे, वहाँय की भीतरी भागडाव नी बनाय? ४१ वहीलाते पहिले तुमसार थाली आर बाटीर भीतरेर जिनिसलाक दान करे दव। वहार बाद परमेश्वर तुमसाक भीतर-बाहर सबछिन शुद्ध ठहराबे। ४२ फरीसीला, तुमसार पर हाय! तुम्हरा पुदिना, तेजपात आर सब किसमेर साग-पातेर दसमांश परमेश्वरोक दिछेन! मगर परमेश्वरोक प्रेम नी करछेन आर ना सही इन्साफ करछेन। छोटो से छोटो नियमेर पालन करवार साथे-साथे तुमसाक इला बोड़ो नियमोक पालन करना जरूरी छे। ४३ तुमसार पर हाय! तुम्हरा प्रार्थना-घरेर सबसे अच्छा-अच्छा आसनलात बोठना आर हाट-बजारोत मान-सम्मान पाना पसंद करछेन। ४४ तुमसार पर हाय! तुम्हरा बिना निशान वाला कबरेर मान्दी छेन, जैलार उपर दे लोक बिना जाने-सुने बेराछे।” ४५ एकझन नियमेर ज्ञानी

यीशुक बोलिल, “गुरुजी! इला बात कोहय त तुई हमचारो अपमान करलो।” ४६ यीशु कोहले, “नियमेर ज्ञानीला, तुमसारो पर हाय! तुम्हरा लोकेर पर बहुत भारी बोझ दिछेन। मगर उसाक मदद करवार तने आँगुल नी लगाछेन। ४७ सही माने तुमसार पर हाय! तुम्हरा नबीलार यादगारीर तने उसार कबरलाक सुंदर बनाछेन। मगर तुमसार बाप-दादोला त उसार खून करिहिले। ४८ इडा से मालूम होचे कि तुम्हरा उसार काम से सहमत छेन। वरा नबीलाक जान से मारे दिहिले आर यादगारीर तने तुम्हरा उसार कबरलाक सुंदर बनाछेन। ४९ वहीलाते सर्वज्ञानी परमेश्वर तुमसार बारे बोलछे, ‘मुई तुमसार लिकिन मोर नबी आर मसीह-दूतलाक पठाय दुम। उलार बीच से तुम्हरा कुछुलाक खून करभेन आर कुछुलार पर जूलुम बरसाबेन।’ ५० यहार नतीजा इडा होबे कि दुनियाँर शुरू से ले परमेश्वरेर जताला नबीर खून कराल गहे, सबलार तने इ-युगेर लोकलार लिकिन से हिसाब लिया ल जाबे। ५१ हाँ, मुई तुमसाक बोलछी, हाबिलेखून से ले जकरयाह नबीर खून तक जताला परमेश्वरेर नबीलाक मराल गहे, उला सबला नबीर खूनेर दोषी इडा युगेर लोकोक ठहराल जाबे। ५२ नियमेर ज्ञानीला, तुमसार पर हाय! तुम्हरा परमेश्वरेर राजेर ज्ञानेर चाभी छिड़ाय अपना हाथोत ले लिहेन। खुद ना त परमेश्वरेर राजोत ढुकछेन आर ना कहाको ढुकवा दिछेन।” ५३-५४ इला बात बोलवार बाद यीशु जैखुना उछिन से जवा लागिल,

शास्त्रेर ज्ञानीला आर फरीसीला यीशु खिलाफ गोस्सा हंय खूब दुश्मनी करवा लागिल। किसम-किसमेर सवाल पूछे-पूछे वहाक बातोत फँसवार तने मौका छभवा लागिल।

फरीसीलार छल-कपट से हुँसियार

(मत्ती १०:२६-२७)

१२ यहार बीचोत हजार-हजार लोकेर भीड़ जोड़ो हंय गेल। इकिसम कि लोक चपाचापी हवा लागिल। आर यीशु पहिले अपना चेलालाक कहवा लागिल, “तुम्हरा फरीसीलार रूटी फूलवार खमीर से हुँसियार रोहेन, जैडा कि उसार छल-कपट छे। १ क्याँकि इकिसम कुछु झपाल नी छे, जैलाक खोला नी जाबे। आर इकिसम कुछु भेदेर बात नी छे, जैलाक लोक नी जानबे। ३ वहीलाते तुम्हरा जैला बातोक अन्हारोत बोलिहेन, उलाक रोशनीत सुनाल जाबे। आर जैला बातोक तुम्हरा घरेर भीतरोत फूस-फूसाय बोलिहेन, उलाक घरेर छतेर पर से प्रचार कराल जाबे।”

परमेश्वर से डरवा चही

(मत्ती १०:२८-३३; १२:३२; १०:१९-२०)

४ यीशु चेलालाक आढ़ो कोहले, “मोर बन्धुला! मुई तुमसाक कोहची कि तुम्हरा उसासे ना डोराव, जहाँय तुमसार बदनडाक खतम करवा

पारे, मगर आत्माडाक खतम करवा नी पारबे। आर वहार बाद आर कुछ करवा नी पारबे। ५ मगर मुई पूछोछी कि तुमसाक कहाक देखे डोरवा लागे? तुम्हरा परमेश्वर से डोराव जहार लिकिन जान से मारे फेकवार बाद नरकोत डलवार शक्ति छे। हाँ, मुई कोहची, खाली परमेश्वर से डोरवा चही। ६ सबकोय जानछे कि दुई टकात पाँचटा फुद्गी चिड़िया मिलछे, मगर तहातो परमेश्वर उलार भीतर से कहाको नी भूलछे। ७ तुमसार माथार सबला चूल गेनती कराल छे। वहीलाते तुम्हरा ना डोराव, क्याँकि फुद्गीला से बेसी तुमसार दाम छे।”

यीशु प्रभु छे

८ “मुई तुमसाक कोहची, जहाँय लोकेर आगुत कोहचे, ‘मुई यीशुर चेला छी,’ मोहो मानुषेर बेटा उसाक परमेश्वरेर फरीस्तार सामनात माने लुम। ९ मगर जहाँय मोक लोकेर आगुत इन्कार करछे, मोहो परमेश्वरेर फरीस्तार सामनात वहाक इन्कार करूम। १० जहाँय मानुषेर बेटार खिलाफ कुछ बोलछे, वहार इडा पाप माफ कराल जाबे। मगर जहाँय परमेश्वरेर पवित्र आत्मार खिलाफ बोलछे, वहार पाप कोयखुना माफ नी होबे। ११ तुम्हरा मोर पीछू-पीछू चलछेन, वहीलाते लोकला तुमसाक सजा दुवार तने प्रार्थना-घरोत, हाकिमलार आर इन्साफ करनेवालार लिकिन ले जाबे, उखुना चिन्ता ना करेन कि हमरा कसे करे कुन जवाब

दुम आर की बोलमु। १२ क्यौँकि पवित्र आत्मा वहीखुना सिखाय दिबे कि तुम्हरा की जवाब दिभेन।”

धनवान मूर्ख

१३ आर भीड़ेर अन्दर से एकझन लोक यीशुक कोहले, “गुरुजी! मोर भईक कहव कि हमसार बाफेर सम्पति मोर साथे बँटवारा करे।” १४ यीशु वहाक कोहले, “बन्धु! के मोक तुमसार फैसला करनेवाला ठहराहे?” १५ यीशु लोकलाक कोहले, “सावधान! तुम्हरा सब किसमेर लोभ-लालच से बचे रहव। कारण, मानुषेर जीवनेर कीमत वहार धन-सम्पति से बढ़े छे, चाहे वहाँय जतेक पैसावाला हंय जाक।” १६ वहार बाद वहाँय उसाक एकटा किस्सा सुनाले, “एकझन पैसावालार खेतोत बहुत उपज होल। १७ इडा देखे वहाँय अपना मनडात सोचवा लागिल, मुई की करूम? क्यौँकि अताला अनाज रखवार तने मोर लिकिन जगह नी छे। १८ वहार बाद वहाँय कोहले, ‘मुई एकखान काम करूम। मुई अपना बजारिलाक भाँयें उला से आढ़ो बोड़ो बजारी बनाम आर उडात मोर सबला अनाज आर सामानलाक राखमु। १९ आर मुई अपना मनडाक कोहमु, मन! अला तोर लिकिन बहुत साल तक खवार तने धन-सम्पति रखाल छे। तुई आराम करेक, खा-पी आर मौज करेक।’ २० मगर परमेश्वर वहाक कोहले, ‘मूर्ख! आझे रात करे तोर प्राणडाक तोर लिकिन से ले लिया ल जाबे। आर जैला धन-सम्पति तुई जोड़ो

करिहिस उला कहार होबे?’ २१ ठीक यही मान्दी उडा लोक छे, जहाँय अपनार तने धन जोड़ो करछे। मगर परमेश्वरेर नजरोत पैसावाला नी छे।”

परमेश्वरेर पर भरोसा

(मत्ती ६:१९-२१, २५-३४)

२२ वहार बाद यीशु अपना चेलालाक कोहले, “वहीलाते मुई तुमसाक कोहची, अपना जानडार बारे फिकिर ना करेन कि की खामु? आर ना अपना बदनडार तने फिकिर करेन कि की पिनमोह? २३ कारण, मानुषेर जानडा खाना-पीना से बढ़े छे, आर बदनडा कपड़ा-लत्ता से बढ़े छे। २४ कौआलार बारे सोचो। वरा ना त बुनछे आर ना काटछे। आर ना त उसार बजारी छे। तहातो परमेश्वर उसाक खिलाछे। तुमसार कीमत त चिड़ियाला से बेसी छे। २५ तुमसार भीतर से के चिन्ता करे दिनोत एक घंटा अपना जानडाक बढ़ाय दुवा पारबे? कोय नी छे। २६ वहीलाते, तुम्हरा अगर इकिसम छोटो से छोटो कामखान करवा नी पारछेन, त आर दोसराला बातेर चिन्ता क्याँ करछेन? २७ घासेर फूललार बारे सोचो, उला केनमन करे बढ़छे! वरा ना त मेहनत करछे आर ना कपड़ा बनाछे, ताहरो पर राजा सुलेमान अपना सबसे सुंदर आर कीमती कपड़ात एकटा घासेर फूलेर मान्दी सुंदर सजाल नी छिले। २८ वहीलाते अगर परमेश्वर इला घासोक इकिसम करे सजाछे, जैला आज छे आर

काल चुल्हात जलाय देयाल जाबे। सोचो कि आढ़ोह कतेक बेसी तुमसाक कपड़ा पिन्हाबे? तुमसार विश्वास अतेक कम क्याँ छे? २९ आर तुम्हरा इडा बातेर फिकिर ना करेन कि की खान-पान करूम, आर ना इलार चिन्ता करेन। ३० क्याँकि इ-दुनियाँर लोकला जैला परमेश्वरोक नी चिन्होंछे, इला जिनिसेर फिकिर करछे। तुमसार स्वर्गेर पिता जाने कि तुमसाक इला जिनिसेर जरूरत छे। ३१ मुई तुमसाक कोहची कि तुम्हरा पहिले वहार स्वर्ग-राज पावार तने मेहनत करो, त परमेश्वर तुमसाक इला जरूरतेर जिनिसो दे दिबे। ३२ वहीलाते मोर छोटो दल! तुम्हरा ना डोराव। क्याँकि तुमसार स्वर्गेर पिताक इडा अच्छा लागछे कि वहाँय तुमसाक अपना राजडा दे। ३३ तुमसार लिकिन जैला धन-दौलत छे, सबलाक बेचे जरूरतमंद लोकोक दान करे दव। इकिसम करले तुम्हरा स्वर्गोत धन जोड़ो करभेन। उछिन बटुवा कोयखुना काना नी होचे। आर ना कोय चूरी करबे आर ना बर्बाद होबे। ३४ मुई तुमसाक कोहची, जैठिन तुमसार धन छे, वहीठिन तुमसार मनडाव रोहबे।”

तैयार रहवार उपदेश

(मत्ती २४:४५-५१)

३५ “तुम्हरा हरखुना अपना कमर बान्हे रोहभेन आर अपना चराकटाक जलते रहवा दिभेन। ३६ तुम्हरा उला लोकेर मान्दी तैयार रहव, जैला अपना मालिकेर घुरे ओसवार तने इन्तेजार करते रोहचे। उसार मालिक

ब्याह-शादी खाय-दाय ओसे दरवाजाखान ठकठाकाबे जसे कि जल्दी करे दरवाजाडा खोले दे। ३७ मालिकेर आशीर्वाद उला नौकर पाबे, जैलाक मालिक घुरे ओसे तैयार पाबे। मुई तुमसाक सच-सच कोहची, उडा मालिक अपना कमर कसे अपना नौकरलाक खिलवार तने बठाबे आर बगलोत थाड़ो हंय खुद उसाक परसे खिलाबे। ३८ उला नौकरेर तने कतेक अच्छा बात छे, जैलाक उसार मालिक आध रातोत या भोर तक ओसे जागिल देखछे। ३९ मगर तुम्हरा इडा जाने राखो, अगर घरेर मालिक इडा जानिलतन कि चोर कुनखुना ओसबे, त वहाँय जागिल रोहलतन। आर अपना घरोत सिंग दुवा नी दिलतन। ४० वहीलाते तुम्हराव तैयार रोहेन क्याँकि मानुषेर बेटा उखुना चले ओसबे जैडा समयेर बारे तुम्हरा कोयखुना नी सोचहेन।”

ईमानदार आर बेईमान नौकर

४१ इला सुने पतरस कोहले, “हे गुरुजी! इला किस्सा तुई हमचाके सुनाछिस ना सभाको?” ४२ प्रभु यीशु कोहले, “ईमानदार आर बुद्धिमान घरेर-भंडारी वहाँय छे, जहाक मालिक अपना सबला नौकरोक समय मुताबिक खाना-पीना दुवार भार दिबे। ४३ मालिकेर आशीर्वाद लायक उडा नौकर छे, जहाक वहार मालिक घुरे ओसे यही मान्दी काम करते देखे। ४४ मुई तुमसाक सच कोहची, उडा नौकरोक मालिक अपना सब धन-दौलतेर पर घरेर-भंडारी बनाय दिबे। ४५ धरे लव, घरेर-भंडारी इडा

सोचे कि मोर मालिक ओसते देरी करछे। आर मालिकेर बाँदीला आर नौकरलाक मारपीट करवा शुरू करे दिछे, आर खाय-पेय मतवाला हंय जाछे। ४६ वहार बाद वहार मालिक उडा दिनोत आर उडा समय घुरे ओसबे, जैडा दिनेर आर समयेर उम्मेद नौकरटा नी करछिल। आर मालिक वहाक कड़ा से कड़ा सजा दे बईमानेर बीचोत फेके दिबे। ४७ नौकर जहाँय मालिकेर इच्छा जानछिले आर तैयार नी रहे आर ना मालिकेर इच्छा मुताबिक काम करिल, वहाँय बहुत सजा पाबे। ४८ मगर नौकर जहाँय मालिकेर इच्छा नी जाने, इकिसम कोय गलत काम करे बोठिल, जैखानेर तने वहाक सजा मिलिल। मगर कम सजा पाबे। मुई तुमसाक कोहची, जहार बेसी जवाबदेही छे, वहार लिकिन से बेसी हिसाब लिया ल जाबे।”

यीशुर चलते परिवारोत झगड़ा

(मत्ती १०:३४-३६)

४९ यीशु बोलिल, “मुई दुनियाँत ओसिही, वहीलाते दुनियाँ बोड़ो मुसीबतो पोड़बे। इकिसम कि दुनियाँत आगिन लगाल छे। अगर आगिनखान अलाय लागे गेलतन, त मोक कतेक अच्छा लागिलतन। ५० मोक एकटा भयानक दुःखेर बपतिस्मा लुवा होबे। जैखुन तक उडा दुःख पूरा नी होचे, उखुन तक मुई खूब बेचैन रोहम। ५१ तुम्हरा कि समझेछेन कि मुई दुनियाँत लोकेर बीचोत शान्ति पैदा करवा ओसिही।

मुई तुमसाक कोहची, नी। मगर फूट पैदा करवा ओसिही। ५२ अला से एकटा घरानात पाँचझन लोकेर बीचोत फूट होबे। तीनझन दुईडा लोकेर बिरोध करबे आर दुईझन तीनडार। ५३ बाप बेटार बिरोध करबे आर बेटा बाफेर। माँ बेटीर बिरोध करबे आर बेटी माँर। सास बहूर आर बहू सासेर बिरोध करबे।”

युगेर चिन्ह

(मत्ती १६:२-३; ५:२५-२६)

५४ यीशु भीड़ेर लोकलाक कोहले, “जैखुना तुम्हरा पश्चिम भीति से मेघ उठते देखछेन, त कोहचेन कि पानी होबे। आर ठीक वही मान्दी होचे। ५५ जैखुना दक्खिना हवा बोहते देखछेन, त कोहचेन कि आज गरम हवा बोहबे। आर वही मान्दी होचे। ५६ कपटीला! तुम्हरा धरती आर आसमानेर रूप-रंग देखे मौसमडार फरक बतवा पारछेन। मगर इडा युगडार चिन्ह देखे वहार मतलब बतवा नी पारछेन।”

समझौता करवार शिक्षा

५७ “ठीक की छे? इडार बारे तुम्हरा आपने क्याँ नी जाँच करे लिछेन? ५८ जैखुना तुम्हरा अपना मुद्देईर साथे हाकिमेर सामनात जाछेन, रास्ताते वहार हाथ से बचवार कोशिश करे लव। इडा ना होय कि वहाँय तुमसाक इन्साफ करनेवाला हाकिमेर आगुत टाने ले जाय। आर

हाकिमडा तुमसाक पुलिसेर हाथोत दे दे। आर पुलिस तुमसाक जेलखानात दे दै। ५९ आर तुम्हरा कोयखुना जेलखाना से बाहर हवा नी पारभेन, जैखुन तक तुम्हरा एक-एकटा पैसा घुराय नी दिभेन।”

मन बदली करवार उपदेश

१३ वहीखुना यीशुक बताल गेल कि पिलातुस गलीलेर कुछुला लोकोक मारे दिहे, जैखुना वरा यरूशलेम मंदिरोत बलिदान दिछिले। २ यीशु जवाब दिले, “तुमसार बिचारोत हवा सकोछे कि वरा गलीलेर बाँकी लोकला से बेसी पापी छिले, आर वहीलाते उसाक मारे देयाल गेल। ३ मगर मुई तुमसाक कोहची, इडा बात सच नी छे। मगर तुम्हराव अगर पाप से मन बदली नी करभेन, त बर्बाद हंय जाभेन। ४ जैकिसम तुम्हरा जानेन कि यरूशलेम शहरेर शीलोहर गुम्बज पोड़वार कारणे अठारहझन लोक मोरे गहिले। तुम्हरा कि समझोछेन कि उ-अठारहझन लोक यरूशलेमेर बाँकीला लोक से बेसी पापी छिले? ५ मुई तुमसाक कोहची, नी। मगर तुम्हरा अगर पाप से मन बदली नी करभेन, त तुम्हराव सबकोय यही किसम बर्बाद हंय जाभेन।”

डुमरेर गाछेर मिसाल

६ यीशु लोकलाक एकटा किस्सा सुनाले, “एकझन लोक अपना बगीचात एकटा डुमरेर गाछ लगाहिले। वहाँय उडा गाछोत डुमर तुड़वार

तने ओसिल। मगर वहाँय एकटाव फल नी पाले। ७ आखिरोत वहाँय बगीचार मालीडाक कोहले, ‘मुई तीन साल से इडा गाछेर फल तुड़वार तने ओसछी, मगर फल नी पाछी। वहीलाते तुई इडा गाछोक काटे फिका जसे कि इडा गाछ जमीनखानोक छेके नी राखे।’ ८ बगीचार मालीडा बोलिल, ‘मालिक! इडा साल गाछटाक रहवा दव। मुई इडा गाछेर चारो भीति सार दुमु। ९ आगु साल अगर गाछटा फल दिछे, त ठीक छे, नी दिछे त काटे देन।’ ”

यीशु कुजी स्त्रीक अच्छा करछे

१० यीशु आरामेर दिन एकखान प्रार्थना-घरोत उपदेश दिछिले। ११ उठिन एकझन स्त्री छिले, जहाक एकटा भूत अठारह साल से सताछिले आर कुब्जी बनाय राखिहिले। वहाँय कोय हालतोत सीधा हवा नी पारछिले। १२ यीशु स्त्रीडाक बगलोत जाब दे कोहले, “माँ! तुई अपना बेमारी से अच्छा हंय गेलो।” १३ वहार बाद यीशु स्त्रीडाक लाड़िल आर वहीखुना वहाँय सीधा हंय गेल। आर वहाँय परमेश्वरेर बड़ाई करवा लागिल। १४ प्रार्थना-घरेर दौनिया देखिले कि यीशु आरामेर दिन बेमारीडाक अच्छा करिल। वहीलाते वहाँय गोस्सा हंय लोकलाक बोलिल, “काम करवार तने त छौ दिन छे। आरामेर दिन छोड़े बाँकी छौ दिनोत की अच्छा हवार तने नी ओसवा पारछेन?” १५ यीशु जवाब दे कोहले, “तुम्हरा दोघला लोकेर दल! आरामेर दिन की तुम्हरा अपना बैल आर गधालाक बथान

સે યોલે પાની ની યિલાછેન? ૧૬ ઇડા સ્ત્રી ત ઇબ્રાહિમેર યાનદાનેર છે, જહાક અઠારહ સાલ સે ભૂત અપના કબ્જાત રાચિહિલે। વહાક આરામેર દિન અચ્છા કરના કી ઠીક ની છે?” ૧૭ યીશુર ઇલા બાત સે સુને વહાર બિરોધ કરનેવાલાલા શર્મોત પોડે ગેલ। મગર બીડેર બાંકી લોકલા યીશુર સબલા બોડો-બોડો કામ દેચે બહુત યુશ હંય ગેલ।

પરમેશ્વરેર રાજેર બારે મિસાલ

(મત્તી ૧૩:૩૧-૩૨; મરકુસ ૪:૩૦-૩૨)

૧૮ યહાર બાદ યીશુ બોલિલ, “પરમેશ્વરેર રાજ કુન કિસમેર છે? યહાર તુલના મુઈ કુન ચીજેર સાથે કરૂમ? ૧૯ ઇડા તુડીર ઇકટા બિચ્વીર માન્દી છે, જૈડાક ઇકઙન લોક અપના જમીનોત લગાલે આર બોડો હંય ઇકટા ગાછ હંય ગેલ। ચિડિયાલા ઓસે ગાછટાર ઠલ્લીલાર પર અપના યોતા બનાલે।” ૨૦ ફેર કોહલે, “મુઈ પરમેશ્વરેર રાજેર તુલના આર કુન ચીજેર સાથે કરૂમ? ૨૧ પરમેશ્વરેર રાજડા યમીરેર માન્દી છે, જૈયાનોક લે ઇકઙન સ્ત્રી લગભગ ત્રીન પસેરી આંટાત મિલાય સાને દિલે। ગોટાયાન આંટા યમીરેર ચલતે ફૂલે ગેલ।”

स्वर्गोत ढुकवार दरवाजा

(मत्ती ७:१३-१४, २१-२३)

२२ यीशु शहरलात आर बस्तीलात उपदेश दिते-दिते यरूशलेम शहरेर भीति जाछिले। २३ एकझन लोक वहाक पूछिल, “गुरूजी, पापेर माफी पाय बहुतला लोक स्वर्ग जाबे ना कुछुला?” यीशु जवाब दिले, २४ “पतला दरवाजा दे ढुकवार तने खूब मेहनत करो। मुई तुमसाक कोहची, बहुतला लोक ढुकवार कोशिश करबे, मगर ढुकवा नी पारबे। २५ जैखुना घरेर मालिक उठे केवारीखान बन करे दिबे, तुम्हरा बाहरे थाड़ो हंय ठकठकाभेन आर कोहबेन, ‘हे मालिक! हमसार तने दरवाजाखान खोले दे।’ मगर मालिक बोलबे, ‘मुई तुमसाक नी जानी। तुम्हरा कुनठिनकार छेन?’ २६ आर तुम्हरा उखुना कोहबेन, ‘हमरा तोर आगुत खान-पान करिही। आर तुई हमसार रास्ता-घाटे उपदेश दे बेराछिलो।’ २७ मगर वहाँय कोहबे, ‘मुई कोहची कि मुई तुमसाक नी जानी कि तुम्हरा कुनठिनकार छेन? ऐ कुकरमीला! मोर आगु से दूर हंय जाव।’ २८ उठिन तुम्हरा इब्राहिम, इसहाक, याकूब आर सबला नबीक परमेश्वरेर राजोत बठाल देखभेन। मगर तुम्हरा बाहरे कानभेन आर अफसोस करभेन। २९ जैखुना परमेश्वर राज करबे, उखुना लोकला पूरब, पश्चिम, उत्तर आर दक्खिन चारो भीति से ओसबे आर परमेश्वरेर राजेर भोजोत बोठबे। ३० अला जैला लोक पीछूत छे, कुछुला आगु हंय जाबे। आर जैला आगु छे, कुछुला पीछू हंय जाबे।”

यरूशलेम शहरेर पर कहर

३१ वहीखुना कुछुला फरीसी ओसे यीशुक खबर दिले, “तुई इठिन से चले जा क्योंकि हेरोदेश राजा तोक मारे फेकवा चाहचे।” ३२ यीशु उसाक कोहले, “तुम्हरा जाय उडा खटियाक कोहय दव। देखेक! मुई आज आर काल भूतलाक निकलामु आर बेमारीलाक अच्छा करूम आर तेसरा दिन अपना कामलाक पूरा करूम। ३३ हाँ, आज, काल आर परसु दिन मोक यरूशलेमेर सफरटा जारी रखवा होबे। क्योंकि इडा कोयखुना नी हवा सकोछे कि कोयडा नबी यरूशलेम शहरेर बाहरे मारा पोड़िहे। ३४ ऐ यरूशलेम शहर! तुई नबीलाक मारे फेके दिछिस। जैला लोकोक तोर लिकिन पठाल जाछे, उसाक तुई पत्थल दे मारे फेकाछिस। बहुत बार मुई चाहनु कि जैकिसम एकटा मुर्गी अपना बच्चालाक अपना डेनार तोलोत राखछे, ठीक वही किसम मोहो चाहनु कि तोर छुवालाक एकछिन जोड़ो करे राखी। मगर तुई नी चाहलो कि मुई इडा करी। ३५ देख, तुमसार घर तुमसार नजरेर आगुत उजरे पोड़े रोहबे। मुई तुमसाक कोहची, तुम्हरा मोक उखुन तक देखवा नी पारभेन, जैखुन तक तुम्हरा इडा नी कोहबेन, ‘परमेश्वरेर आशीर्वाद वहार पर छे जहाँय प्रभु परमेश्वरेर नामे ओसछे।’”

यीशु आरामेर दिन बेमारीलाक अच्छा करछे

१४ एक बार आरामेर दिन यीशु एकटा प्रधान फरीसीर घर खवार तने गेल। आर बाँकी मेहमानला यीशुक ध्यान से देखछिले। २ यीशुर आगुत एकझन लोक छिले, जहार पूराडा बदन फूले गहिले। ३ यीशु शास्त्रेर ज्ञानीलाक आर फरीसीलाक पूछिल, “नियमेर मुताबिक आरामेर दिनोत कहाको अच्छा करना ठीक छे ना नी?” ४ वरा कोय जवाब नी दिले। कुछ देर बाद वहाँय बेमारी लोकटाक लाड़िल आर वहाक अच्छा करे पठाय दिले। ५ वहार बाद यीशु उसाक कोहले, “अगर तुमसार बेटा या बैल कुआँत पोड़े जाय, त आरामेर दिन कुआँडा से की नी उठाभेन? उठाभेन।” ६ आर फेर शास्त्रेर ज्ञानीला आर फरीसीला कोय जवाब दुवा नी पारले।

यीशु नरम हवार उपदेश दिछे

७ जैखुना यीशु देखिले कि मेहमानला केनमन करे बोठवार तने सम्मानेर जगहलाक बिछे लिछे, त वहाँय उसाक इडा मिसाल दे कोहले, ८ “धरे लव तुमसाक शादी-ब्याहर भोज खवार तने बलाहट देयाल गेल, त तुम्हरा सम्मानेर जगहलात ना बोठेन क्याँकि हवा सकोछे कि घरेर मालिकटा तुमसासे बेसी कोय बोड़ो लोकोक बलाहट दिहे। ९ भोजेर मालिक कोहबे, ‘तुई इखान जगह छोड़े दे।’ उखुना तुम्हरा शरमिन्दा हंय

सबसे पीछूर जगहखानोत बोठवा जाभेन। १० वहीलाते जैखुना तुम्हरा बलाहट पाभेन, त सबसे पीछूर जगहलात जाय बोठेन जसे कि जहाँय तुमसाक बलाहट दिहे, वहाँय तुमसाक कोहय, ‘दोस्त! आगुत ओसे बोठो।’ तब सबला लोकेर आगुत तुमसार इज्जत होबे। ११ वहीलाते मुई तुमसाक कोहची, जहाँय अपना आपोक बोड़ो बनाबे, वहाक छोटी कराल जाबे। जहाँय अपना आपोक छोटी बनाबे, वहाक बोड़ो कराल जाबे।” १२ वहार बाद यीशु बलाहट देनेवाला लोकटाक कोहले, “जैखुना तुई खान-पानेर जोगार करबो या कोय भोज दुबो, उखुना अपना दोस्त-बन्धु, भई, रिस्तेदार या पैसावाला पड़ोसीलाक बलाहट ना दिस। हवा सकोछे कि वराव तोक बलाहट दिबे आर तोहको खिलाय-पिलाय शोध करे बराबर करे दिबे। १३ मगर तुई जैखुना भोज दिस, त गरीब, नंगड़ा-लुलहा आर कानालाक बलाहट दिस। १४ उखुना तुई आशीर्वाद पाबो क्योंकि उसार लिकिन तोक शोध करवार तने कुछु नी छे। आर इडार फल तोक उखुना मिलबे, जैखुना धर्मी लोकला आरमने जिन्दा हंय उठबे।”

एकटा बोड़ो भोजेर किस्सा

(मत्ती २२:१-१०)

१५ यीशुर साथे भोज खानेवाला लोकलार बीचोत एकझन लोक इला बात सुने कोहले, “परमेश्वरेर आशीर्वाद वहार पर छे, जहाँय परमेश्वरेर

राजोत रूटी खाबे।” १६ यीशु वहाक एकटा किस्सा कोहले, “एकझन लोक एकटा बहुत बोड़ो भोज करिल। बहुतझन लोकोक बलाहट दिले। १७ जैखुना भोज तैयार हंय गेल, त वहाँय लोकलाक जाब दुवार तने अपना नौकरटाक इडा कहय पठाले, ‘ओसो। खाना तैयार छे।’ १८ मगर वरा सबकोय बहाना करवा लागिल। कोय कोहले, ‘मुई एकखान खेत किने लिही। मोक खेतखानोक देखना जरूरी छे। वहीलाते मुई तोसे बिनती करछी कि तुई मोक माफ करे दे।’ १९ दोसराझन कोहले, ‘मुई पाँच जोड़ा बैल किने लिही। मुई उलाक समुहा जाछी। मुई तोसे बिनती करछी कि मोक माफ करे दे।’ २० आर एकझन कोहले, ‘मुई नया-नया ब्याह करिही। वहीलाते मुई जवा नी पामु।’ २१ नौकरटा घुरे ओसे अपना मालिकोक इला सबला खबर कहय दिले। सुने घरेर मालिकटा बड़ा गोस्सा हंय गेल आर अपना नौकरटाक कोहले, ‘बजारोत आर गोलीलात जल्दी करे जा आर गरीब, नेंगड़ा-लुलहा आर कानालाक ले ओसेक।’ २२ नौकरटा कोहले, ‘मालिक! जैमान्दी तुई कोहलो, वही मान्दी कराल गेल। वहारो पर जगह खाली छे।’ २३ मालिकटा अपना नौकरोक कोहले, ‘बाहरे रास्ताय-रास्ताय आर गोली-गोली जा। आर लोकलाक जबरदस्ती आन जसे कि मोर घर भरे जाय। २४ मुई तुमसाक कोहची, जैला लोकोक बलाहट कराल गहिले, वरा कोय मोर इडा भोजेर खाना चखवाव नी पारबे।”

यीशुर चेला हवार कीमत

(मत्ती १०:३७-३८)

२५ जैखुना लोकेर भीड़ यीशुर साथे-साथे जाछिले, यीशु लोकलार भीति घुरे कोहले, २६ “जहाँय मोर लिकिन ओसछे, वहाँय अगर अपना माँ-बाफेर, घरवालीक, बेटा-बेटीक आर अपना भई-बहिनोक मोसे बेसी प्रेम करछे, इकिसम कि अपना जानडाको मोसे बेसी प्रेम करछे, त वहाँय मोर चेला हवा नी पारबे। २७ आर यदि कोय अपना क्रुस उठाय मोर पीछू-पीछू नी ओसछे आर मोर तने दुःख उठवार तने तैयार नी होचे, वहाँय मोर चेला हवा नी पारबे। २८ तुमसार बीचोत अगर कोय एकखान बोड़ो घर बनवा चाहचे, त वहाँय आगुत हिसाब करे देखबे कि घरखान बनवार खर्चा वहार लिकिन छे ना नी। २९ इकिसम नी होय कि घरखान शुरू करवार बाद बनाय खतम करवा नी पारे। वहार बाद देखनेवाला लोकला वहार मजाक उड़ाबे आर हाँसे कोहय, ३० ‘इडा लोक त घरखान बनवा शुरू करिल, मगर बनाय खतम करवा नी पारिल।’” ३१ यीशु फेर कोहले, “अगर एकझन राजा दोसरा राजार पर चढ़ई करवा जाछे। वहाँय पहिले अच्छा करे सोच-बिचार करबे कि मुई सिरिफ दस हजार फौज ले उडा राजार मुकाबिला करवा पामु ना नी, जहाँय बीस हजार सैनिक ले मोर पर चढ़ई करवा ओसछे। ३२ अगर वहाँय नी पारे त उडा राजा दूरोत रोहतेई, वहार लिकिन अपना लोक पठाबे आर वहार साथे मेल-मिलाप करबे। ३३ ठीक यही मान्दी तुमसार बीचोत अगर कोय

सोचे-समझे अपना सब कुछ छोड़े मोर पीछूत नी ओसे, वहाँय मोर चेला हवा नी पारबे। ३४ नून त अच्छा जिनिस छे। मगर नूनेर स्वाद अगर खतम हंय जाय, त उखानोक कसे करे फेर नून बनाल जाबे? ३५ उखान ना खेतेर आर ना सारेर कामोत ओसबे। लोकला उखानोक बाहरे फेके दिबे। वहीलाते मुई तुमसाक कोहची, तुम्हरा जहाँय-जहाँय मोर बातला सुनछेन, ध्यान दे सुनो।”

हराल भेड़ा

(मत्ती १८:१२-१४)

१५ एक दिना खजना लेनेवाला लोकेर आर पापी लोकेर एकटा बोड़ो भीड़ यीशुर लिकिन उपदेश सुनवार तने जोड़ो होल। २ इडा देखे फरीसीला आर शास्त्रेर ज्ञानीला इडा कोहय बदनाम करिल, “इडा लोक त पापी लोकोक अपनाछे आर उसार साथे खान-पान करछे।” ३ वहाते यीशु फरीसीला आर शास्त्रेर ज्ञानीलाक एकटा किस्सा सुनाले, ४ “एकटा लोक छिले। वहार लिकिन एक सौडा भेड़ा छिले। एक दिना वहार एकटा भेड़ा हराय गेल। आर वहाँय की करिल कि अपना बाँकी उनासोडा भेड़ाक परतीत राखे हराल भेड़ाडाक छबुवा चले गेल। जैखुन तक नी मिलिल, भेड़ाडाक छाबते रोहोल। ५ छाभते-छाभते वहाँय अपना भेड़ाडाक पाय गेल आर खुशीर मारे काँघोत करे ले घर ओसिल। ६ आर वहार बाद की करिल कि वहाँय अपना दोस्त-बन्धुक आर अरस-

पड़ोसेर लोकोक जाब दिले आर उसाक कोहले, ‘देखो, मोर इडा भेड़ा हराय गहिले। मगर मुई पाय गेनु। ओसो मोर साथे तुम्हरा खुशी मनाव क्याँकि मुई अपना हराल भेड़ाडा पाय गेनु।’” ७ वहार बाद यीशु उसाक बोलिल, “मुई तुमसाक कोहची, ठीक यही मान्दी जैखुना एकटा पापी पाप से मन बदली करे परमेश्वरेर लिकिन ओसछे, वहार तने स्वर्गोत खुशी होचे। जताखान खुशी वहार तने होचे, अताखान खुशी उला उनासोझन धर्मी लोकेर तने नी होचे। क्याँकि उला उनासोझन समझाछे कि हमरा धर्मी छी आर हमसाक पाप से मन बदली करवार जरूरी नी छे।”

हराल चानीर सिक्का

८ यहार बाद यीशु उसाक आढ़ो एकटा किस्सा सुनाले, “एकझन स्त्री छिले। वहार लिकिन दसटा चानीर सिक्का छिले। एक दिना वहार एकटा सिक्का हराय गेल। आर वहाँय की करिल कि अपना चराकटा जलाले आर छबुवा लागिल। आर जैखुन तक नी पाले, उखुन तक घरखान बढ़िया से कुर्हाय बटलाय छाबते रोहिल। ९ आर जैखुना सिक्काडाक पाय गेल, वहाँय अपना सहेलीलाक आर अरस-पड़ोसेर स्त्रीलाक अपना घरोत जाब दिले आर उसाक कोहले, ‘देखो! मोर इडा सिक्का हराय गहिले। मुई अला पाय गेनु। ओसो मोर साथे तुम्हरा खुशी मनाव क्याँकि मोर हराल सिक्काडाक मुई पाय गही।’ ” १० वहार

बाद यीशु फरीसी आर शास्त्रेर ज्ञानीलाक बोलिल, “मुई तुमसाक कोहची, ठीक यही मान्दी जैखुना एकटा पापी पाप से मन बदले परमेश्वरेर लिकिन ओसछे, परमेश्वरेर फरीस्ताला वहार तने खुशी मनाछे।”

बिगराल बेटार किस्सा

११ वहार बाद यीशु उसाक आढ़ो एकटा किस्सा सुनाले, “एकझन लोक छिले। वहार दुईडा बेटा छिले। १२ एक दिना छोटोडा बेटा अपना बाफोक बोलिल, ‘बाबा! मोर हिस्सार सम्पति मोक दे दे।’ वहाते वहार बाप वहार हिस्सार सम्पति उसाक बाँटे दे दिले। १३ कुछु दिन बाद छोटोडा बेटा अपना हिस्सार सम्पति ले दूर मुलुक चले गेल। आर उछिन वहाँय खराब रहन-सहनोत अपना टका-पैसा बर्बाद करे दिले। १४ उछिन वहार सब कुछु खतम हंय गेल। आर की होल कि उडा मुलुकोत भारी आकाल पोरे गेल। आर वहाँय खवा बेगर मोहताज हंय गेल। १५ वहीलाते लड़काडा उडा मुलकेर एकटा लोकेर लिकिन रहवार तने गेल। आर लोकटा वहाक सोर चरवार तने अपना खेतोत पठाय दिले। १६ भोखेर चोटे लड़काडा सोरेर खवार जंगली सीम खाय अपना पेट भरवा चाहचिले। मगर वहाक कोय खवा नी दिले। १७ आर जैखुना वहाँय अपना हुँसोत ओसिल, त अपना मनोत सोचिल, ‘मोर बाफेर बहुतला जोनेर लिकिन जरूरत से बेसी खवार जिनिस छे आर मुई इछिन

भूखाय मोरछी। १८ मुई उठुम आर मोर बाफेर लिकिन जाम आर बोलुम, बाबा! मुई परमेश्वरेर आर तोर खिलाफ पाप करिही। १९ मुई आर तोर बेटा कहवार लायक नी छी। मोक तुई अपना एकझन जोनेर मान्दी राखे ले।’ २० आर वहाँय उछिन से उठिल आर अपना बाफेर लिकिन जवा लागिल। आर जैखुना वहाँय दूरते छिले, वहार बाप वहाक देखे लिले। वहाक देखे वहार बाफेर दिलोत कदर चले ओसिल आर दौड़े जाय होकाल बानेह अपना बुकोत लगाय लिले आर चुमवा लागिल। २१ आर बेटाडा अपना बाफोक बोलिल, ‘बाबा! मुई परमेश्वरेर खिलाफ आर तोर खिलाफ पाप करिही। मुई आर तोर बेटा कहवार लायक नी छी।’ २२ मगर वहार बाप अपना नौकरलाक बोलिल, ‘जाव तुम्हरा फूर्ति करे घर से सभा से बढ़िया कामीज आने वहाक पिन्हाय दव। हाथोत आंठी आर पाँत जूता पिन्हाय दव। २३ आर पूसाल मोटोडा पशु आनो आर काटो। ओसो खाय-दाय हमरा मौज करी २४ क्यौंकि मोर इडा बेटा मोरे गहिले, जिन्दा हंय गहे। हराय गहिले, मुई पाय गही। आर सबकोय वरा मौज करवा लागिल।’ २५ उखुना वहार बोड़ोडा बेटा बाधोत छिले। आर जैखुना वहाँय खेत से घर ओसछिले आर घरेर बगलोत पहुँचिल, त वहाँय गान-बजनार आवाज सुनिल। २६ वहाँय घरेर एकटा नौकरोक जाब दे पूछिल, ‘हमसार घरोत की होचे?’ २७ नौकरटा वहाक कोहले, ‘तुम्हार छोटो भई घुरे घर ओसिहे आर तुम्हार बाप वहाक ठीक-ठाक

हालतोत पाहे। वहीलाते तुम्हार बाप मोटोडा पूसाल पशु काटे दिहे।’
२८ इडा सुने बोड़ो भई गोस्सा हंय गेल आर अंनात ओसवा नी चाहले।
आर वहार बाप बाहरे गेल आर वहाक मनवा लागिल। २९ मगर बोड़ोडा
बेटा बाफोक कोहले, ‘एतेक दिन से तोर मुई सेवा करते ओसछी। तोर
मुई हरखुना हुकूम मानिही। तहारो पर मोर दोस्त-बन्धुर साथे खुशी
मनवार तने तुई मोक एकटा बकरीर बच्चाव नी दिहिस। ३० आर तोर
इडा बेटा जहाँय तोर सम्पति बेश्यालार पीछूत बर्बाद करे दिहे। वहार
ओसते-ओसते तुई वहार तने पूसाल मोटोडा पशु काटलो।’ ३१ मगर
वहार बाप वहाक बोलिल, ‘देख बेटा! तुई त मोर साथे हरखुना
रोहछिस, आर मोर जताला सम्पति छे, सबला त तोहरे। ३२ हमसाक
खुशी मनवा चही क्याँकि तोर इडा भई आरमने जिन्दा हंय गहे, जहाँय
मोरे गहिले। हराय गहिले आर वहाक हमरा पाय गही।”

बेईमान मनीजर

१६ वहार बाद यीशु अपना चेलालाक एकटा किस्सा सुनाले, “एकझन
पैसावालार एकटा मनीजर छिले। लोकला उडा मनीजरेर खिलाफ
मालिकोक बोलिल कि वहाँय तोर धन-सम्पतिला बर्बाद करे दिछे।
२ वहीलाते मालिकटा वहाक जाब दे पूछिल, ‘तोर खिलाफ मुई इला
कुन बात सुनछी? जैला भार तोक सोपाल गहिले, उलार हिसाब दे

क्याँकि मुई तोक नौकरी से हटाय दिछी।’ ३ वहार बाद मनीजरटा अपना मनोत सोचवा लागिल, ‘मुई अला की करूम? मालिक मोक मनीजरेर काम से हटाय दिबे। मुई त माटी खुदवा नी पामु आर भीख माँगते त मोक शरम लागबे। ४ अला मुई एकटा काम करछी। जैखुना मोर मालिक मोक काम से हटाय दे उखुना लोकला मोक अपना-अपना घरोत ग्रहण करवा पाड़े।’ ५ यहीडा कारणे वहाँय अपना मालिकेर कर्जदारलाक एकझन-एकझन करे जाब दिले। पहिलाझनाक पूछिल, ‘तोर पर मालिकेर कताला कर्जा छे?’ ६ वहाँय कोहले, ‘अस्सी मन तेल।’ मनीजरटा कोहले, ‘अपना खाता ले आर जल्दी करे चालीस मन लिखे दे।’ ७ वहार बाद वहाँय दोसराझनाक पूछिल, ‘तोर पर कताला कर्जा छे?’ वहाँय कोहले, ‘एक सौ मन गोहम।’ मनीजरटा कोहले, ‘अपना खाता ले आर अस्सी मन लिखे दे।’ ८ मालिकटा मनीजरटार चालाकी देखे वहाक चबासी दिले। आर इडा सच छे कि इडा-खराप जमानार लोकला अपना लोकेर साथे चाल-चलनेर पाके, रोशनीत चलनेवाला परमेश्वरेर लोकला से बेसी हुँसियार होचे। ९ आर मुई तुमसाक कोहची, दुनियाँर धन-दौलत दे लोकेर मदद करो आर उसाक अपना दोस्त-बन्धु बनाय लव। जैखुना तुम्हरा दुनियाँ से चले जाभेन आर तुमसार लिकिन कोय धन-दौलत नी रोहबे, उखुना स्वर्गोत तुमसार स्वागत होबे। १० जहाँय छोटो से छोटो बातोत ईमानदार होचे, वहाँय

बोड़ो बातोत ईमानदार होबे। जहाँय छोटो से छोटो बातोत बेईमान होचे, वहाँय बोड़ो बाततो बेईमान होबे। ११ इडा दुनियाँर धन-दौलतेर बारे अगर तुमसार पर विश्वास करा नी जाय, त के विश्वास करे तुमसार हाथोत स्वर्गेर असली धन दिबे? १२ इडा दुनियाँर धन-दौलत परमेश्वरेर छे, ना तुमसार। सिरिफ तुमसाक इलार देखभाल करवार भार देयाल गहे। अगर तुम्हरा पोरेर धनोत ईमानदार नी छेन, त के तुमसाक असली धनेर वारिस बनाबे? १३ कोय नौकर दुईझन मालिकेर काम करवा नी पारबे क्योंकि वहाँय एकझनाक नफरत करबे आर दोसराझनाक प्रेम करबे। या नीते एकझनार तने वहार भक्ति होबे, आर दोसराझनार परवाह नी करबे। वहीलाते मुई कोहची, तुम्हरा परमेश्वर आर धन-दौलतेर सेवा एक साथे करवा नी पारभेन।”

परमेश्वरेर नियम अटल छे

१४ यीशुर इला बात सुने फरीसीला वहार मजाक करवा लागिल क्योंकि वरा धन-दौलतेर बहुत लोभी छिले। १५ यीशु उसाक कोहले, “तुम्हरा त लोकेर आगुत अपना आपोक धर्मी देखाछेन। मगर परमेश्वर तुमसार मोनडार बारे जानछे। मानुषेर नजरोत जैडा इज्जतेर जिनिस छे, उडा परमेश्वरेर नजरोत घिणेर जिनिस छे। १६ यूहन्ना बपतिस्मादातार ओसवार आगुत मूसार नियम आर नबीला तुमसाक रास्ता दखाछिले। वहार बाद परमेश्वरेर राजेर बारे प्रचार हवा लागिल। आर सबकोय

परमेश्वरेर राजोत जोर-शोर से ढुकवा शुरू करे दिहे। १७ यहार मतलब इडा नी छे कि नियम आर लागू नी होचे। आसमान आर धरतीखान टले जाना आसान छे, मगर परमेश्वरेर नियमेर छोटो से छोटो बात कभी नी टलबे। १८ वहीलाते मुई तुमसाक कोहची, जहाँय अपना स्त्रीक छोड़े दे दोसरा स्त्री से ब्याह करछे, वहाँय कुकरम करछे। आर जहाँय उडा छोड़ाल स्त्रीडाक ब्याह करछे, वहाँव कुकरम करछे।”

एकइन पैसावाला आर एकटा गरीब

१९ वहार बाद यीशु उसाक एकटा किस्सा सुनाले, “एकइन पैसावाला छिले। वहाँय कीमती बैगनी रंगेर मखमल कपड़ा पिन्हेछिले आर होर दिना बढ़िया-बढ़िया खाना खाचिल। २० लाजर नामेर एकटा गरीबोक वहार बाहरी दरवाजार लिकिन होर दिना बठाय देयाल जाछिले। वहार गोटेनडा बदन घाव से भराल छिले। २१ मगर वहाँय चाहचिले कि पैसावालाडार टेबुल से जैला खाना पोड़े जाबे वहीला खाय अपना पेटटा भोरबे। कुत्ताला ओसे वहार घावला चाटछिले। २२ कुछु दिन बाद लाजर मोरे गेल आर फरीस्ताला वहाक परमेश्वरेर दास इब्राहिमेर कोलात पहुँचाय दिले। आर पैसावालाडाव मोरिल आर माटी देयाल गेल। २३ आर वहाँय नरकोत चले गेल। वहाँय नरकेर तकलीफ से छटपटाछिले। दूर से आँख उठाय वहाँय देखिले कि लाजर इब्राहिमेर कोलात बोठे छे। २४ लाजरोक देखे वहाँय इब्राहिमोक खुसामदी करिल,

‘हे बाबा इब्राहिम! मोर पर दया कर। लाजरोक मोर लिकिन पठाय दे जसे कि वहाँय अपना आँगुलडा पानीत डुबाय मोर जीभाडाक ठंडा करे दे क्योंकि मुई इखान आगिनोत बहुत छटपटाछी।’ २५ मगर इब्राहिम जवाब दिले, ‘बेटा! ख्याल करेक कि तुई अपना जिन्दगीत अच्छा-अच्छा जिनिस भोग करिहिस आर लाजर बहुत दुःख पाहे। मगर अला वहाँय शांतित छे आर तुई छटपटाछिस। २६ इला बातोक छोड़े हमसार आर तोर बीचोत एकखान बहुत गहरा खाद छे, जैखानोक पार करे कोय तोर लिकिन जवा चाहे त जवा नी पारबे। आर ना तोर लिकिन से कोय हमसार लिकिन ओसवा पारबे।’ २७ इडा बात सुने पैसावालाडा कोहले, ‘हे बाबा! मुई तोक बिनती करे कोहची कि तुई लाजरोक मोर बाफेर घर पठाय दे, २८ क्योंकि मोर आढ़ो पाँचटा भई छे। वहाँय उसाक चेताय दे कि वरा इखान तकलीफेर जगहोत ना ओसे।’ २९ इब्राहिम वहाक जवाब दिले, ‘उसार लिकिन त मूसार आर नबीलार किताब छे। वरा उसारे बातलाक सुनोक।’ ३० वहाँय कोहले, ‘हे पिता इब्राहिम! वरा नी सुनबे। मगर कोय अगर मुर्दा से जिन्दा हंय उसार लिकिन जाय त वरा पाप से अपना मन बदली करे लिबे।’ ३१ इब्राहिम वहाक कोहले, ‘अगर वरा मूसा आर परमेश्वरेर नबीलार बात नी सुनछे, त कोय मुर्दा से जिन्दा हंय उसार लिकिन गेलेउ, वरा नी सुनबे।’”

पाप आर पापेर माफीर बारे शिक्षा

(मत्ती १८:६-७, २१-२२; मरकुस ९:४२)

१७ वहार बाद यीशु अपना चेलालाक कोहले, “मानुषेर जीवनडात पाप करवार परीक्षा ओसते रोहबे। मगर श्राप वहार पर छे, जहार जरियाय परीक्षा ओसछे। २ जहाँय इला छोटो छुवालार भीतर से कहाको ठोकर खिलाछे, वहार गल्लात एकखान जातार पत्थल बानेह, समुन्द्रोत फेके देना अच्छा छे। ३ तुम्हरा हुँसियार रहेन। अगर तोर भई तोर खिलाफ कोय पाप करे, त वहाक समझाय दे। आर अगर वहाँय अफसोस करे माफी माँगे त वहाक माफ करे दे। ४ वहाँय अगर दिनोत सात बार तोर खिलाफ कसूर करे आर सात बार तोर लिकिन ओसे कहय, ‘मुई अपना पापेर तने अफसोस करछी,’ त तुई वहाक माफ करे दिस।”

विश्वास आर फर्ज

५ वहार बाद बारहझन चेला यीशुक बोलिल, “गुरुजी! हमसार विश्वास बढ़ाय दे।” ६ यीशु उसाक कोहले, “तुमसार विश्वास अगर एकटा तुड़ीर दानार बराबर हंय, आर इडा तुतेर गाछोक कहेन, ‘जड़ समेत उखड़े जाय तुई समुन्द्रटात लागे जा,’ त उडा गाछटा तुमसार बात माने लिबे। ७ धरे लव एकझन नौकर खेत से हाल बहाय या परती से भेड़-बकरी चड़ाय ओसिल। उखुना वहार मालिक वहाक की कोहबे? वहाक इडा कोहबे कि जल्दी करे ओसे खवार तने बोठ ८ आर ना इडा कोहबे कि

कमर कसे मोर खवा-दबार इन्तेजाम करे खिला, यहार बाद तोहों जाय खा। ९ मुई कोहची, नौकरटाक जैखान काम करवार हुकूम देयाल गहिले, वहीखान काम करवार कारणे मालिकटा की वहाक शाबासी दिबे? नी दिबे। १० ठीक यही मान्दी परमेश्वर जैला काम करवार हुकूम तुमसाक दिहे, उला सबला काम पूरा करवार तने परमेश्वर तुमसाक शाबासी नी दिबे, क्याँकि तुम्हरा सिरिफ वहीला काम करिहेन, जैलाक पूरा करना तुमसार फर्ज छिले।”

यीशु दसझन कुढ़ियाक अच्छा करछे

११ यीशु यरूशलेम शहर जवारखुना, गलील आर सामरिया प्रदेशेर सीमानार लिकिन पहुँचिल। १२ एकटा बस्तीत ढुकवारखुना वहाक दसझन कुढ़िया लोक मिलिल। यीशुक देखे वरा दूरोत थाड़ो हंय, १३ जोर-जोर से बोलवा लागिल, “हे यीशु! हे मालिक! हमसार पर दया कर।” १४ यीशु उसाक देखे कोहले, “तुम्हरा पूजारीलार लिकिन जाव आर अपना आपोक दखाव।” वरा जाते-जाते अच्छा हंय गेल। १५ उ-दसझनार बीचोत एकझन जैखुना देखिले कि मुई अच्छा हंय गेनु, वहाँय बहुत जोर-जोर से परमेश्वरेर बड़ाई करते-करते यीशुर लिकिन घुरे ओसिल। १६ ओसे यीशुर पाँत पोरे वहार शुकुरिया अदा करिल। आर वहाँय एकझन सामरी लोक छिले। १७ वहाक देखे यीशु बोलिल, “मुई की दसझन कुढ़ियाक अच्छा नी करनूँ? बाँकी नौझन कुनठिन छे?

१८ इडा परदेशीक छोड़े आर की कोय नी ओसिल, जहाँय परमेश्वरेर शुकुरिया अदा करे?” १९ यीशु वहाक कोहले, “तुई उठे चले जा। तोर विश्वास तोक अच्छा करे दिले।”

धरतीत परमेश्वरेर राज

(मत्ती २४:२३-२८, ३७-४१)

२० जैखुना कुछुला फरीसी यीशुक पूछिल, “परमेश्वरेर राज कतखुना ओसबे?” यीशु उसाक जवाब दिले, “परमेश्वरेर राज लोकोक दखाय नी ओसबे। २१ लोकला इडा कहवा नी पाबे कि देख! परमेश्वरेर राज इठिन छे या परमेश्वरेर राज उठिन छे। क्योंकि परमेश्वरेर राज तुमसार बीचोत छे।” २२ यीशु अपना चेलालाक कोहले, “समय ओसछे कि तुम्हरा मानुषेर बेटार साथे एकटा दिन रहवा चाहभेन। मगर रहवा नी पारभेन। २३ लोकला तुमसाक कोहबे, देख! वहाँय उठिन छे। या देख! वहाँय इठिन छे। इडा सुने तुम्हरा ना बाहरे जायन आर ना उसार पीछू-पीछू जायन। २४ क्योंकि जैकिसम बिजली आसमानेर एक भीति से दोसरा भीति चमकोछे, ठीक वही किसम मानुषेर बेटा यीशु अपना दिनोत ओसते दखा दिबे। २५ मगर इला घटना घटवार पहिले मानुषेर बेटाक बहुत दुःख उठवा होबे। आर इ-युगेर लोक वहाक इन्कार करबे। २६ आर परमेश्वरेर सेवक नूहेर दिनोत जैकिसम होयले, मानुषेर बेटा यीशुरो समय वही किसम होबे। २७ जैखुन तक नूह नावत नी ढुके गेल

आर सैलाब ओसे दुनियाँर सब लोकोक मारे नी फिलाल, उखुन तक लोकला खाछिल-पीछिल आर ब्याह-शादी करछिल। २८ वही किसम लूतेर समय होईले, लोक खान-पान करछिल, किना-बेचा करछिल, गाछ लगाछिले आर घर बनाछिले। २९ मगर जैदिना लूत सदोम नगर छोड़े दिले, उदिना आसमान से आगिन पोरिल आर सदोम नगरेर सभाको जलाय मुस करे दिले। ३० मानुषेर बेटा यीशु जैदिन आरमने ओसबे, उदिना ठीक यही मान्दी होबे। ३१ जहाँय घरेर छतेर पर रोहबे, वहाँय नीचानोंत नाभे घरेर भीतर से अपना सामान लुवार तने ना जाक। आर वही मान्दी जहाँय खेतोत रोहबे, वहाँय घुरे घर ना ओसे। ३२ लूतेर घरवालीडाक ख्याल करो आर हुँसियार रहव। ३३ जहाँय जिन्दा रहवार फिकिर करबे, वहाँय मोरबे। जहाँय मोरवार तने तैयार रोहबे, वहाँय जिन्दा रोहबे। ३४ मुई कोहची, उडा रातोत दुईझन एकखान बिछनात सुते रोहबे। उसार बीचोत एकझनाक उठाय लिया ल जाबे आर दोसराझनाक छोड़े देया ल जाबे। ३५ दुईझन स्त्री एक साथे जाँता पिसबे। उसार बीचोत एकझनाक उपरोत उठाय लिया ल जाबे आर दोसराझनाक छोड़े देया ल जाबे। ३६ [दुईझन लोक खेतोत काम करबे। एकझनाक उपरोत उठाय लिया ल जाबे आर दोसराझनाक छोड़े देया ल जाबे।”] ३७ इडा सुने चेला ला यीशुक पूछिल, “गुरुजी! इला घटना

कुनठिन घटबे?” यीशु उसाक कोहले, “जैठिन गोरू-भैंस मोरे पोरे रोहचे, वहीठिन गिधिनला जोड़ो होचे।”

परमेश्वर अपना भक्तेर प्रार्थना सुनछे

१८ चेलालाक हरखुना प्रार्थना करवा लागे आर कोयखुना निराश हवा नी लागे। इडार बारे यीशु उसाक एकटा किस्सा सुनाले, १ “एकटा शहरोत एकझन इन्साफ करनेवाला छिले। वहाक ना त परमेश्वरेर डर छिले आर ना कहारो परवाह छिले। २ आर वहीडा शहरोत एकझन राँड़ी छिले। राँड़ीडा बार-बार वहार लिकिन जाय कोहचिले, ‘मोर ठीक-ठीक इन्साफ कर आर मोक मोर बिरोधी से बचा।’ ४ कुछु दिन तक इन्साफीडा वहार भीति कोय ध्यान नी दिले। मगर आखिरोत वहाँय मनोत सोचिल, ‘मोक ना त परमेश्वरेर डर छे आर ना कोय मानुषेर परवाह छे। ५ तहातो मुई अगर राँड़ीडार इन्साफ नी करछी त यहाँय बार-बार ओसे मोक परेशान करबे।’ आर इडा सोचे वहाँय आखिरोत राँड़ीडार इन्साफ करे दिले।” ६ वहार बाद प्रभु यीशु चेलालाक बोलिल, “तुमसाक उडा अधर्मी इन्साफ करनेवाला से सिखवा चही। ७ मुई तुमसाक कोहची, परमेश्वरेर चुनाल लोकला जैला दिन-रात वहार लिकिन प्रार्थना करछे, वहाँय की उसार ठीक-ठीक इन्साफ नी करबे? हाँ, करबे। वहाँय की उसार तने ठीक-ठीक इन्साफ करते देरी करबे?

नी करबे। ८ परमेश्वर जल्दी इन्साफ करबे। मगर जैखुना मानुषेर बेटा घुरे ओसबे, त वहाँय की उडा राँड़ीर मान्दी मजबूत विश्वास करनेवाला लोकलाक दुनियाँडात पाबे?”

फरीसी आर खजना लेनेवाला

९ जैला लोक अपना आपोक धर्मी समझोछिले आर दोसरा लोकोक नीच, यीशु उसाक इडा किस्सा सुनाले। १० “दुईडा लोक छिले। एकझन फरीसी आर दोसराझन खजना लेनेवाला। एक दिना दोनोंझन मंदिरोत प्रार्थना करवा गेल। ११ फरीसीडा अपना आपोक बहुत धर्मी आर बोड़ो समझोछिले। वहाँय थाड़ो हंय प्रार्थना करवा लागिल, ‘हे परमेश्वर! मुई तोर शुकुरिया अदा करछी कि मुई दोसरा लोकेर मान्दी नी छी। मुई जूलुम नी करछी। मुई कहाको नी ठगोछी आर ना कुकरम करछी। इकिसम कि मुई इडा खजना लेनेवालार मान्दी नी छी। १२ मुई हप्तात दुई बार उपास करछी, आर अपना कमाईर दसवाँ भाग तोक दिछी।’ १३ मगर खजना लेनेवाला अपना आपोक बहुत नीचा आर पापी समझे दूरोत थाड़ो होल आर आसमानेर भीति अपना आँखो नी उठाले। वहाँय अपना बुकखान डँघाय-डँघाय प्रार्थना करवा लागिल, ‘हे प्रभु! मुई एकझन पापी मानुष छी। मोर पर दया करेक।’” १४ वहार बाद यीशु बोलिल, “मुई तुमसाक कोहची, फरीसीडा धर्मी ठहराल नी गेल बल्के खजना लेनेवालाडा परमेश्वरेर नजरोत धर्मी ठहरे अपना घर चले गेल।

वहीलाते जहाँय अपना आपोक बोड़ो समझोछे, वहाक छोटी कराल जाबे। आर जहाँय अपना आपोक छोटी समझोछे, वहाक बोड़ो बनाल जाबे।”

यीशु छुवालाक आशीर्वाद दिछे

(मत्ती १९:१३-१५; मरकुस १०:१३-१६)

१५ वहार बाद लोकला अपना-अपना छुवालाक यीशुर लिकिन अनवा लागिल जसे कि वहाँय उसार मथात हाथ राखे आशीर्वाद दे। इडा देखे चेलाला लोकलाक धमकाल। १६ मगर यीशु छुवालाक जाब दिले आर चेलालाक कोहले, “छुवालाक मोर लिकिन ओसवा दव। उसाक मना ना करो क्योंकि परमेश्वरेर राज इसारे मान्दी लोकेर तने छे। १७ मुई तुमसाक एकदम सच बोलछी, जहाँय-जहाँय अपना आपोक छोटी छुवालार मान्दी नी करछे, वरा कोयखुना परमेश्वरेर राजोत ढुकवा नी पाबे।”

दुनियाँर धन-सम्पति आर स्वर्ग

(मत्ती १९:१६-३०; मरकुस १०:१७-३१)

१८ एक बार समाजेर एकटा दौनिया यीशुर लिकिन ओल आर पूछिल, “गुरुजी! तुई अच्छा गुरु छिस। की करले मुई अनन्त जीवनेर भागीदार हवा पामु?” १९ यीशु वहाक जवाब दिले, “तुई मोक अच्छा क्याँ कोहचिस? परमेश्वरोक छोड़े कोय अच्छा नी छे। २० तुई त परमेश्वरेर

हुकूमला जानछिस, ‘कुकरम ना करिस, हत्या ना करिस, चूरी ना करिस। कहारो खिलाफ झूठ गवाही ना दिस, माँ-बाफेर कहना मानिस।’ ” २१ दौनियाडा बोलिल, “इला सबला हुकूम त मुई बच्चाय से मानते ओसछी।” २२ यीशु वहाक बोलिल, “मगर तोर जीवनोत एकटा जिनिसेर कमी छे। तुई अपना सब कुछ बेचे-बाचे गरीब लोकोक बाँटे मोर पीछूत चले ओस, त तोक स्वर्गोत धन मिलबे।” २३ इडा बात सुने दौनियाडा मनडा खराब हंय गेल क्योंकि वहाँय बहुत पैसावाला लोक छिले। २४ यीशु वहाक देखे बोलिल, “पैसावालार तने परमेश्वरेर राजोत ढुकना कत्तेक कठिन छे! २५ सुईर कानाखान दे ऊँट पार हंय जाना आसान छे। मगर परमेश्वरेर राजोत पैसावालाक ढुकना आसान बात नी छे।” २६ जैला लोक सुनोछिले, वरा ताज्जुब होय कहवा लागिल, “फेर के परमेश्वरेर राजोत जवा सकोछे?” २७ यीशु जवाब दिले, “मानुष जैडा करवा नी सकोछे, परमेश्वर उडा करवा सकोछे।” २८ पतरस बोलिल, “हे मालिक! देख, मुई त घर-द्वार छोड़े-छाड़े तोर पीछूत चले ओसिही।” २९ यीशु चेलालाक कोहले, “मुई तुमसाक सच कोहची कि तुम्हरा जहाँय-जहाँय अपना घर या अपना घरवाली या अपना भई-बन्धुक या अपना छुवा-पोवाक या अपना माँ-बाफोक परमेश्वरेर राजेर तने छोड़े दिहेन, ३० इला सबला तुमसाक इडा जिन्दगीत के गुणा बेसी देयाल जाबे, आर इडा जिन्दगीर बाद अनन्त जीवन पाभेन।”

तेसरा बार यीशु अपना मोरवार बारे बताछे

(मत्ती २०:१७-१९; मरकुस १०:३२-३४)

३१ यीशु फेर अपना बारहझन चेलाक अलग करे कोहले, “देखो! हमरा यरूशलेम शहर जाछी आर मानुषेर बेटार बारे जैला-जैला बात नबीला लिखिहे, सबला बात पूरा होबे। ३२ क्योंकि वहाक परजातेर हाथोत दे देयाल जाबे। आर वरा वहाक मजाक करबे। वहार अपमान करबे आर वहार पर थूक फेकबे। ३३ वहाक कोड़ा मारबे। आर फेर वहाक जान से मारे दिबे। मगर वहाँय तेसरा दिन मुर्दा से जिन्दा हंय उठबे।” ३४ मगर चेलाला यीशुर बात समझवा नी पारिल। आर इला बात उसासे छुपाल रोहोल। वरा यीशुर कहवार मतलब समझवा नी पारिल।

एकटा काना फेकीर देखवा लागछे

(मत्ती २०:२९-३४; मरकुस १०:४६-५२)

३५ जैखुना यीशु यरीहो शहरेर बगलोत पहुँचिल, उठिन एकटा काना लोक रास्तार बगलोत बोठे भीख माँगछिले। ३६ यीशुर साथे बहुत बड़का भीड़ छिले। कानाडा भीड़ेर आवाज सुने पूछिल, “की होचे?” ३७ लोकला वहाक कोहले, “नासरत शहरेर यीशु इपाके जाछे।” ३८ कानाडा जोर-जोर से कहवा लागिल, “हे दाऊद राजार बेटा! मोर पर दया कर।” ३९ जैला लोक आगु-आगु जाछिले वहाक धमकाय कोहले, “चुप रोह।” मगर वहाँय आढ़ो जोर-जोर से बोलवा लागिल, “हे दाऊद

राजार बेटा! मोर पर दया करेक।” ४० यीशु उछिन थाड़ो होल आर बोलिल, “वहाक मोर लिकिन आनो।” जैखुना वहाक यीशुर लिकिन अनाल गेल त यीशु वहाक पूछिल, ४१ “तुई की चाहचिस? मुई तोर तने की करूम?” कानाडा कोहले, “प्रभु! मुई देखवा चाहची।” ४२ यीशु वहाक कोहले, “तुई अच्छा हंय जा आर देखेक। मोर पर तोर विश्वास करवार कारण से तुई अच्छा हंय गेलो।” ४३ वहाँय वहीखुना देखवा लागिल आर परमेश्वरेर बड़ाई करते-करते यीशुर पीछूत चले गेल। आर इडा देखे उठिनकार सबला लोक परमेश्वरेर बड़ाई करवा लागिल।

जक्कईर जीवन परिवर्तन

१९ यीशु यरीहो शहर दे जाछिले। १ वहीडा शहरोत जक्कई नामेर एकझन लोक छिले। वहाँय खजना लेनेवालार सरदार आर बहुत पैसावाला छिले। २ वहाँय यीशुक देखवा चाहचिले कि यीशु के छे? मगर भीड़ेर कारणे वहाँय यीशुक देखवा नी पारिल क्यौंकि वहाँय बंगड़ा छिले। ३ वहीलाते वहाँय यीशुक देखवार तने आगुत दौड़े जाय एकटा डुमरेर गाछेर पर चढ़े गेल क्यौंकि यीशु वहीडा रास्ता दे जानेवाला छिले। ४ आर जैखुना यीशु उडा गाछेर लिकिन पहुँचिल, त उपरोत देखे जक्कईक बोलिल, “जक्कई! धरफड़ करे गाछटा से नाभेक। आज मोक तोर घरोत रहना जरूरी छे।” ५ जक्कई धरफड़ करे नाभिल आर

खुशी-खुशी यीशुक अपना घरोत ले गेल। ७ इडा देखे लोकला शिकायत करवा लागिल, “यीशु एकझन पापीर घर रात रहवार तने मेहमानी गेल।” ८ आर जैखुना जक्कई अपना घरोत छिले, वहीखुना वहाँय थाड़ो हंय यीशुक बोलिल, “हे स्वामी! मुई अपना आधा धन-सम्पति गरीबलाक दे दुम। आर यदि छल करे कहारो कुछु लिही, त वहाक चार गुणा घुराय दुम।” ९ जक्कईर बात सुने यीशु बोलिल, “आज इडा परिवारोत मुक्ति ओसिहे क्याँकि यहाँ परमेश्वरेर भक्त इब्राहिमेर खानदानेर एकझन बेटा छे। १० क्याँकि मुई मानुषेर बेटा भटकाल लोकोक छबुवा आर मुक्ति दुवा ओसिही।”

मेहनती आर आलसी नौकर

(मत्ती २५:१४-३०)

११ यीशु यरूशलेमेर बगलोत छिले। जैला लोक यीशुर बात सुनछिले, वरा सोचवा लागिल कि परमेश्वरेर राज बगलोत चले ओसिहे आर बहुत जल्दी कायम होबे। वहीलाते यीशु उसाक इडा किस्सा सुनाले, १२ “एकटा बोड़ो लोक छिले। वहाँय राजा बनवार तने दूर देशेर महाराजार लिकिन गेल। १३ जवारखुना वहाँय अपना दसझन नौकरोक जाब दिले आर एक-एकटा सोनार सिक्का दे कोहले, ‘जैखुन तक मुई घुरे नी ओसछी, इला टका ले कारोबार करो।’ १४ मगर वहार देशेर लोकला वहा से नफरत करछिल। वहीलाते वहार जवार बाद वरा

महाराजार लिकिन अपना खबरिया पठाय कोहले, ‘हमरा नी चाहची कि यहाँय हमसार राजा बने।’ १५ जैखुना लोकटा राजा बने चले ओसिल, जैला नौकरोक वहाँय सोनार सिक्का दे गहिले, उसाक जाबे दे पूछिल, ‘तुम्हरा अपना-अपना हिसाब दव,’ १६ पहिलाइन ओसे बोलिल, ‘मालिक! मुई तोड़ देयाल सिक्का से दसटा सिक्का आढ़ो कमाही।’ १७ राजा वहाक कोहले, ‘शाबास! बहुत अच्छा! तुई कम जिनिसोत बफादार रोहलो। वहीलाते मुई तोक इनाम दिछी कि तुई दसटा शहरेर पर शासन करबो।’ १८ दोसराइन नौकर ओसे बोलिल, ‘मालिक! तोर देयाल सिक्का से पाँचटा सिक्का आढ़ो कमाही।’ १९ राजा वहाक कोहले, ‘बहुत अच्छा! तुई पाँचटा शहरेर पर शासन करबो।’ २० तेसराइन ओसे बोलिल, ‘मालिक! हेरा, तुम्हार देयाल सिक्काडा। मुई इडाक उरमालोत लेपटे राखे दिहिनु। २१ मुई तोक देखे बहुत डोराछी क्याँकि तुई बहुत कठोर लोक छिस। मुई जानी कि जैठिन तुई जमा नी करछिस, उठिन से निकलाछिस। जैठिन तुई नी बुनछिस, उछिन फसल काटछिस।’ २२ वहार बाद राजाडा उडा नौकरोक कोहले, ‘कमबख्त! मुई तोर कहना मुताबिक तोक सजई दुम। तुई जब जानिस कि मुई एकइन कठोर लोक छी, जैछिन मुई जमा नी करछी, उछिन से लिछी। आर जैछिन मुई नी बुनछी, उछिन से मुई फसल काटछी। २३ अगर इकिसम बात छिले त तुई मोर देयाल सिक्काडाक क्याँ नी कोय महाजनोक दे

दिहिलो जसे कि मोर ओसवार बाद सूद समेत टाका घुराय लिनुतन?’
२४ वहार बाद राजा अपना बगलेर लोकलाक कोहले, ‘यहार लिकिन से सिक्काडा ले लव आर जहार लिकिन दसटा सिक्का छे, वहाक दे दव।’
२५ वरा बोलिल, ‘राजा साहब! वहार लिकिन त दसटा छे।’ २६ राजाडा कोहले, ‘जहार लिकिन छे, वहाक आढ़ो देयाल जाबे। आर जहार लिकिन नी छे, वहार लिकिन जैडा छे, वहोडा ले लिया ल जाबे। २७ मगर मोर जैला दुश्मन नी चाहचे कि मुई उसार पर राज करी, उसाक मोर सामनात आने मारे फेकाव।’”

यीशु यरूशलेमोत ढुकछे

(मत्ती २१:१-११; मरकुस ११:१-११; यूहन्ना १२:१२-१९)

२८ किस्साडा कोहय यीशु यरूशलेमेर भीति आगु बढ़वा लागिल।
२९ जैखुना वहाँय जैतून नामेर पहाड़ेर उपरोत दुईडा बस्ती बैतफगे आर बैतनियाहर बगलोत पहुँचिल, वहाँय अपना दुईडा चेलाक कोहले,
३० “सामनार गाँवडात जाव। पहुँचवार बाद उछिन एकटा गधार बच्चा बन्हाल पाभेन, जैडार पर आजतक कोय नी चढ़िहे। उडाक खोले मोर लिकिन आनो। ३१ अगर तुमसाक कोय पूछे, ‘क्याँ खोलछेन?’ त कोहबेन, प्रभुक इडार जरूरी छे।” ३२ उडा गाँवत पहुँचवार बाद दोनोंझन यीशुर कहना मुताबिक गधार बच्चाडाक बन्हाल पाले। ३३ जैखुना वरा गधार बच्चाडाक खोलछिले, मालिकला उसाक पूछिल, “तुम्हरा

बच्चाडाक क्याँ खोलछेन?” ३४ चेलाला जवाब दिले, “प्रभुक इडार जरूरी छे।” ३५ तब दोनोंझन चेला गधार बच्चाडाक यीशुर लिकिन आनिल। वरा अपना चादर गधार बच्चाडार पर बिछाय, यीशुक बठाय दिले। ३६ जसे जसे यीशु यरूशलेमेर बगलोत पहुँचते जाछिल, लोकला यीशुर स्वागत आर आदर करवार तने अपना-अपना चादर रास्तात बिछाते जाछिल। ३७ आर वहाँय उछिन पहुँचिल, जैछिन से रास्ता नीचानोंत नाभछे। चेलार गोटेनडा दल जताला अद्भूत काम यीशुक करते देखिहिले, उलार तने वरा जोर-जोर से परमेश्वरेर बड़ाई करवा लागिल, ३८ “राजा, जहाँय प्रभुर नामे ओसछे, वहार पर परमेश्वरेर आशीर्वाद छे। स्वर्गोत शांति होक, आर आसमानोत प्रभुर महिमा!” ३९ इला देखे भीड़ेर बीचोत कुछुला फरीसी यीशुक कोहले, “गुरुजी! तुम्हार चेलालाक मना कर।” ४० मगर यीशु फरीसीलाक कोहले, “मुई तुमसाक कोहची, यरा अगर चुप रहय, त रास्तार पत्थलला चिल्लाय-चिल्लाय परमेश्वरेर बड़ाई करबे।”

यरूशलेम शहरेर पर ओसनेवाला दुर्दशा

४१ जैखुना यीशु यरूशलेमेर बगलोत पहुँचिल, शहरटाक देखे यीशुर आँखोत लोय चले ओसिल ४२ आर बोलिल, “ऐ यरूशलेम! आज अगर तुई खाली शांतिर रास्ताडाक जानलोतन! मगर अला इडा तुई देखवा नी पारछिस। ४३ आर मुई तोक कोहची, इकिसम समय ओसबे, जैखुना

दुश्मन तोर पर हमला करबे आर चारो भीति से तोक घेरे लिबे। ४४ तोक आर तोर बेटा-बेटीलाक जान से मारे माटीत मिलाय दिबे। आर तोर पत्थलेर पर पत्थल रहवा नी दिबे, क्योंकि तुई परमेश्वरेर मुक्तिर उपायडाक चिन्हवा नी पारलो।”

यीशु यरूशलेम मंदिरोत

(मत्ती २१:१२-१७; मरकुस ११:१५-१९; यूहन्ना २:१३-२२)

४५ वहार बाद यीशु मंदिरोत गेल आर पैकारलाक मंदिर से निकलाय दिले ४६ आर कोहले, “परमेश्वरेर शास्त्रोत लिखाल छे, मोर घर प्रार्थनार घर होबे। मगर तुम्हरा इखानोक डकैतेर अड्डा बनाय दिहेन।” ४७ यीशु हर दिन मंदिरोत जाय उपदेश दिछिले। मंदिरेर बोड़ोला-पुजारी, शास्त्रेर ज्ञानीला आर समाजेर दौनियाला वहाक जान से मरवार मौका छाबछिल। ४८ मगर वरा कोय कुछु करवा नी पारिल क्योंकि कि लोकला ध्यान दे यीशु बातला सुनछिले।

यीशु अधिकारेर बारे सवाल

(मत्ती २१:२३-२७; मरकुस ११:२७-३३)

२० एक दिना यीशु यरूशलेम मंदिरोत लोकलाक परमेश्वरेर वचन सीखाछिले आर परमेश्वरेर राजेर बारे खुश-खबरी प्रचार करछिले। वहीखुना बोड़ोला-पुजारी, शास्त्रेर ज्ञानीला आर यहूदी समाजेर दोसरा

नेताला यीशु लिकिन ओसिल २ आर पूछिल, “तुई हमसाक इडा बता कि तुई कुन अधिकारोत इला काम करछिस? आर के तोक इला अधिकार दिहे?” ३ यीशु उसाक कोहले, “तुम्हराव मोर एकटा सवालेर जवाब दव। ४ लोकलाक बपतिस्मा दुवार अधिकार यूहन्नाक के दिले? परमेश्वर दिले ना मानुष दिले?” ५ वरा सोचवा लागिल, “अगर हमरा बोली जे इडा अधिकार वहाक परमेश्वर दिले, त वहाँय कोहबे, ‘तुम्हरा तब वहार बात क्याँ नी मानलेन?’ ६ आर अगर हमरा बोली कि इडा अधिकार वहाक मानुष दिले, त लोकला हमसाक पत्थल दे झटा मारबे क्याँकि लोकला यूहन्नाक एकझन नबी मानछे।” ७ वहीलाते बोड़ोला-पुजारी, शास्त्रेर ज्ञानीला आर यहूदी समाजेर दोसरा नेताला कोहले, “हमरा नी जानी कि बपतिस्मा दुवार इडा अधिकार यूहन्नाक के दिहे?” ८ वहार बाद यीशु उसाक कोहले, “मोहो नी बताव कि मोक इला काम करवार अधिकार के दिहे?”

गद्दार गृहस्थ

(मत्ती २१:३३-४६; २२:१५-२२; मरकुस १२:१-१७)

९ वहार बाद यीशु लोकलाक एकटा किस्सा सुनाले, “एकझन लोक एकटा अंगुरेर बगीचा लगाले। कुछु गृहस्थोक बगीचडा ठिका दे बहुत दिनेर तने दूर मुलुक चले गेल। १० कटनीरखुना वहाँय अपना एकझन नौकरोक गृहस्थलार लिकिन अंगुरेर हिस्सार तने पठाले। मगर

गृहस्थला नौकरटाक मारे-तारे खाली हाथे घुराय दिले। ११ वहार बाद बगीचार मालिकटा आर एकटा नौकरोक पठाले। मगर गृहस्थला वहाको मारपीट आर बेज्जत करे खाली हाथे घुराय दिले। १२ फेर मालिकटा तेसरा बार आढ़ो एकटा नौकरोक पठाले। यहोडा बार गृहस्थला नौकरटाक मारे-तारे आर जखम करे खेत से बाहर फेके दिले। १३ इडा देखे बगीचार मालिकटा सोचिल, ‘इबार मुई की करूम? मुई अपना बेटाडाक पठाम, जहाक मुई प्रेम करछी। हयतो वरा वहार इज्जत करबे।’ १४ मगर जैखुना वहार बेटा गृहस्थला लिकिन गेल, वरा वहाक देखे सोचिल, ‘यहीं त असली वारिस छे। चलो, हमरा यहाक जान से मारे दी जसे कि बगीचाडा हमसार हंय जाय।’ १५ यहीडा समझे वरा मालिकेर बेटाडाक बगीचाडा से जबरान बाहर करे जान से मारे दिले।” किस्सा बोलवार बाद यीशु सुनने वालाक पूछिल, “अला तुम्हरा बताव कि इडा घटना देखे मालिकटा गृहस्थलाक की करबे? १६ वहाँय ओसे उसाक जान से मारे दिबे आर अपना अंगुरेर बगीचाडाक कोय दोसरा गृहस्थोक ठिका दे दिबे।” इडा सुने लोकला कोहले, “परमेश्वर ना करे जे इकिसम घटना कोयखुना घटे।” १७ लोकलार बात सुने यीशु उसार भीति देखिल आर कोहले, “परमेश्वरेर वचनोत लिखाल छे, ‘राजमिस्त्रीला जैखान पत्थलोक बेकार समझे फेके दिहिले, घरेर नींव दुवार तने वहीखान सबसे खास पत्थल बने गेल।’ त इडा बातेर की

मतलब छे? १८ उखान पत्थलेर पर जहाँय पोड़बे, उसाक खूब चोट लागबे आर जहार पर उखान पत्थल पोड़बे, उसाक चखना चूर करे दिबे” १९ बोड़ोला-पुजारी आर शास्त्रेर ज्ञानीला जाने गेल कि यीशु इडा किस्सा उसारे तने बोलिहे। वहीलाते वरा वहाक वहीठिन धरवा चाहचिले। मगर लोकेर डोरे धरवा नी पारिल।

यीशुर गलती धरवार कोशिश

२० वरा यीशुक अपना करा नजरोत राखिल। आर कुछु भेदियालाक यीशुर लिकिन पठाले। उला भेदिया अपना आपोक धर्मी लोकेर मान्दी देखाल। वरा यीशुक गलती बोलते व्हारे बातोत फँसवा चाहले जसे कि वरा वहाक पकड़े रोमी सरकारेर हाथोत दे दे। भेदियाला यीशुक कोहले, २१ “गुरुजी! हमरा जानी कि तुई हरखुना सही बात कोहचिस आर सीखाछिस। कहारो मुख देखे नी बोलछिस। मगर सच्चाईर मुताबिक परमेश्वरेर रास्तार ज्ञान दिछिस। २२ हमसाक बता कि रोम देशेर महाराजाक खजना दुवा लागे ना नी लागे?” २३ यीशु उसार चालाकीडा समझे कोहले, २४ “मोक एकटा सिक्का दव।” सिक्का ले उसाक दखाय पूछिल, “सिक्काडार पर कहार छाप आर नाम छे?” वरा जवाब दिले, “रोम देशेर महाराजार छाप आर नाम छे।” २५ यीशु उसाक कोहले, “जैडा रोम देशेर महाराजाक दुवा लागे, उडा वहाक दव आर जैडा परमेश्वरोक दुवा लागे, उडा परमेश्वरोक दव।” २६ लोकलार

आगुत भेदियाला यीशुक वहार अपना बातोत गलती बोलते फँसवा नी पारिल। वहार जवाबला सुने भेदियाला हैरान हंय गेल आर चुप रोहोल।

मराल लोकेर जिन्दा हवार सवाल

(मत्ती २२:२३-३३; मरकुस १२:१८-२७)

२७-२८ सदूकी लोकला विश्वास नी करछिल कि मोरे जवार बाद मानुष फेर जिन्दा हवा सकोछे। कुछुला सदूकी यीशुर लिकिन ओसिल आर कोहले, “गुरुजी! अगर कोय लोक ब्याह करिल। बिना बाल-बच्चार मोरे जाछे, त मूसार नियमेर मुताबिक वहार भई अपना भौजीक ब्याह करे अपना बोड़ो भईर तने एकटा बेटा पैदा करे वहार खानदानडाक बचाय रखवा पाड़े।” २९ आर सदूकीला यीशुक एकटा किस्सा सुनाले, “एकटा परिवारोत सातझन भई छिले। पहिलाझन शादी करिल। बिना बाल-बच्चा जन्माय वहाँय मोरे गेल। ३० वहार बाद दोसराझन भई अपना भौजीक ब्याह करिल आर बिना बाल-बच्चार मोर गेल। ३१ वहार बाद तेसराझन भईयो वहार भौजीडाक शादी करिल। इकिसम करे सातो भई स्त्रीडाक ब्याह करिल आर बिना बाल-बच्चा पैदा करे मोरे गेल। ३२ आखिरोत स्त्रीडाव मोरे गेल। ३३ अला हमसाक बताव कि जैखुना परमेश्वर लोकोक मुर्दा से जिन्दा करबे, उखुना स्त्रीडा सातो भईर अंदर से कहार पत्नी होबे? क्याँकि वहाक त सातोझन भई ब्याह करिहिले।” ३४ यीशु उसाक जवाब दिले, “इ-दुनियाँत लोक शादी-ब्याह

करछे। ३५ मगर जिन्दा हंय उठवार बाद परमेश्वर जैला लोकोक स्वर्गोत
रहवार लायक समझिबे, उसार बीचोत कोय शादी-ब्याह नी होबे।
३६ वरा फेर नी मोरबे आर वहीलाते परमेश्वरेर फरीस्तार मान्दी होबे।
वरा परमेश्वरेर छुवा होबे क्यौँकि परमेश्वर उसाक मुर्दा से जिन्दा
करिहे। ३७ परमेश्वर मराल लोकोक जिन्दा करबे, इडार बारे मूसाव
जलता झाड़ीर घटनार जरियाय बताछे। मूसा प्रभुर बारे बोलछे, ‘मुई
उडा परमेश्वर छी, जहार भक्ति इब्राहिम, इसहाक आर याकूब करछे।’
३८ मुर्दा लोक परमेश्वरेर भक्ति नी करछे, मगर जिन्दा लोके करछे।
यहार मतलब इडा होचे कि इब्राहिम, इसहाक आर याकूब अलाव
जिन्दा छे।” ३९ यीशुर इला बात सुने कुछु शास्त्रेर ज्ञानीला बोलिल,
“गुरु! तुई अच्छा जवाब दिलो।” ४० वहार बाद सदूकीला वहाक आर
कोय सवाल पूछवार हिम्मत नी पाले।

मसीहा दाऊदेर खानदान ना वहार प्रभु

(मत्ती २२:४१—२३:७; मरकुस १२:३५-४०)

४१ आर यीशु लोकलाक कोहले, “मसीहा राजा दाऊदेर खानदान से
जनम लिहे, इडा कसे करे हवा सकेछे? ४२ जबकि राजा दाऊद वहाक
अपना प्रभु माने भजन-संहितात लिखिहे, प्रभु मोर प्रभुक कोहचे कि
४३ मोर दहिना हाथेर भीति बोठेक जैखुन तक मुई तोर दुश्मनलाक

हराय तोर पाँर तोलोत नी करे दी। ४४ इठिन दाऊद त मसीहाक प्रभु कोहचे। कसे करे वहाँय दाऊदेर बेटा होल?”

शास्त्रेर ज्ञानीला से हुँसियार रहवार सलाह

४५ जैखुना लोकला यीशुर बात सुनछिले, ४६ यीशु अपना चेलालाक कोहले, “शास्त्रेर ज्ञानीला से सावधान रोहेन। वरा लम्बा-लम्बा कपड़ा पिन्हवा पसंद करछे। हाट-बजारोत प्रणाम-पाती चाहचे। प्रार्थना-घरेर सम्मानेर जगोहोत बोठना पसंद करछे। शादी-ब्याहत सम्मानेर जगहलात बोठना पसंद करछे। ४७ राँडीलार लाचारीर पैदा उठाय उसार घर बर्बाद करछे। इखान पापोक झपवार तने लोकोक दखाय लम्बा चौड़ा प्रार्थना करछे। परमेश्वर इसाक त बाँकी लोक से बेसी सजा दिबे।”

एकटा गरीब राँडीर दान

(मरकुस १२:४१-४४)

२१ वहार बाद यीशु देखिले कि पैसावाला लोकला दानेर पेटीत अपना-अपना दान दिछे। २ वहाँय एकटा गरीब राँडीको दुईडा तामार सिक्का दिते देखिले। ३-४ इडा देखे यीशु अपना चेलालाक बोलिल, “मुई सच कोहची कि इला पैसावाला लोकेर लिकिन बेसी पैसा छे, मगर वरा बहुत कम पैसा दान करिल। मगर इडा गरीब राँडीर लिकिन अपना

जरूरत पूरा करवार तने जताला पैसा छिले, गोटालाय दे दिले। वहीलाते मुई कोहची कि परमेश्वरेर नजरोत वहाँय सभा से बेसी दान दिले।”

यीशु ओसनेवाला दुःख-मुसीबतेर बारे बताछे

(मत्ती २४:१-२१; मरकुस १३:१-१९)

५ वहार बाद वहार कुछुला चेला मंदिरटार बारे यीशुक बोलिल कि मंदिरटा बहुत सुन्दर-सुन्दर पत्थल आर सजावट करवार दानेर पवित्र सामान दे सजाल गहे। ६ इडा सुने यीशु उसाक जवाब दिले, “जैला जिनिसोक तुम्हरा देखछेन, समय ओसछे कि पत्थलेर पर पत्थल नी रोहबे। आर सबलाक गिराय देयाल जाबे।” ७ यीशुर इला बात सुने चेलाला पूछिल, “गुरुजी! इला घटना कब घटबे आर इला घटना घटवार चिन्ह की होबे? हमरा कसे करे जानमु?” ८ यीशु उसाक कोहले, “तुम्हरा हुँसियार रोहेन कि इला घटनार बारे तुम्हरा कोय धोखा ना खायन। मोर नामे बहुतझन ओसे कोहबे, ‘मुहें मसीहा छी। आखरी समय चले ओसिहे।’ मगर तुम्हरा उसार पीछू-पीछू ना जायन। ९ जैखुना तुम्हरा लड़ई आर दंगा-फसादेर बारे सुनभेन, उखुना ना घबरायेन क्योंकि पहिले इला घटना होना जरूरी छे। मगर उखुना दुनियाँडा खतम नी होबे। १० देश-देशेर पर चढ़ई करबे। आर राज राजेर पर चढ़ई करबे। ११ जगह-जगह बोड़ो-बोड़ो भीचाल होबे। आकाल आर महामारी पोखबे। भयानक घटना घटबे आर आसमानोत बोड़ो-बोड़ो चिन्ह देखा जाबे

१२ मगर इला सबला बात पूरा हवार आगुत लोकला तुमसाक धरे-पकड़े सताबे। तुमसाक प्रार्थना-घरेर लोकेर हाथोत सोंपे दिबे। वरा तुमसार पर दोष लगाबे आर जेलोत दे दिबे। मोक मनवार कारणे लोकला तुमसाक सरकारेर बोड़ो-बोड़ो हाकिमेर आगुत हाजिर करबे। १३ आर इकिसम होले, मोर बारे लोकोक बतवार तने तुमसाक मौका मिले जाबे। १४ वहीलाते तुम्हरा आगु से इडा ना सोचेन, हमरा अपना बचाव कसे करे करमु? १५ क्याँकि ठीक समय मुई तुमसाक इकिसम बुद्धि आर मुखोत बोली दुम कि तुमसार कोय दुश्मन ना त मुकाबला करवा पारबे आर ना तुमसार बातलाक कटवा पारबे। १६ इकिसम कि तुमसार माँ-बाप, भई, सगा-सम्बन्धी आर दोस्त-बन्धुलाव तुमसाक धोखा दे सरकारी हाकिमेर हाथोत धराय दिबे। आर उला हाकिम तुमसार बीच से कहाको कहाको जान से मारे दिबे। १७ क्याँकि तुम्हरा मोर पर विश्वास करछेन, वहीलाते बहुत लोक तुमसाक नफरत करबे। १८ मगर तुम्हरा पूरापूरी हिफाजतोत रोहभेन। १९ इला मुसीबत बरदास्त करे तुम्हरा अपना जीवनडाक बचाभेन।”

यीशु यरूशलेम शहरेर बर्बादीर बारे बताछे

२० “जैखुना तुम्हरा देखभेन कि यरूशलेम शहरोक दुश्मन अपना सैनिकला दे चारो पाके घेरे लिहे, उखुना तुम्हरा समझे जाभेन कि उडा शहरेर नाश हवार समय बगलोत चले ओसिहे। २१ उखुना जैला लोक

यहूदिया प्रदेशोत छे, वरा निकले पहाड़ेर पर चले जाक। जैला लोक शहरोत छे, वरा शहर से बाहर चले जाक। आर जैला लोक गाँव-बस्तीत छे, वरा शहरोत ना जाक, २२ क्योंकि इला दिनोत परमेश्वर इडा शहरेर लोकलाक कठिन से कठिन सजा दिबे, जैकिसम कि परमेश्वरेर वचनोत लिखाल छे। २३ हाय! उला स्त्रीर पर! जैला उला दिनोत पोवाती रोहबे आर अपना छुवाक दूध खिलाबे। उसार तने इला दिन बहुत कष्टेर दिन होबे क्योंकि उसार तने भागे बाहर जाना बहुत मुश्किल होबे। परमेश्वर इडा शहरेर लोकेर पर अपना कहर बरसाबे। २४ उसार दुश्मन कुछुला लोकोक तलवार दे मारे दिबे आर कुछुला लोकोक कैदी बनाय दोसरा-दोसरा देशोत ले जाबे। गैर-यहूदी लोकला यरूशलेम शहरेर लोकलाक उखुन तक नाश करते रोहबे, जैखुन तक गैर-यहूदी लोकेर राज करवार समय खतम नी हंय जाछे।”

यीशुर दोबारा ओसवार चिन्ह

(मत्ती २४:२९-३५; मरकुस १३:२४-३१)

२५ “सूरज, चाँद आर तारालात अजीब चिन्ह देखाल जाबे आर दुनियाँर लोकलार पर संकट ओसबे। लोकला समुन्द्रेर गरजन आर लहरेर कारणे घबराय जाबे आर कोय दिशा-द्वार नी पाबे। २६ लोकला डोरे सोचते-सोचते बेहोश हंय जाबे क्योंकि पूराडा दुनियाँत भयानक संकट ओसनेवाला छे आर आसमानेर सबला चीज हिले जाबे। २७ उखुना

सबकोय मानुषेर बेटाक एकखान मेघोत शक्ति आर महिमार साथे ओसते देखबे। २८ जैखुना तुम्हरा इला बात होते देखभेन, उखुना तुम्हरा हिम्मतेर साथे अपना माथा उठाय उपरोत देखेन क्योंकि समय बगलोत चले ओसिहे कि परमेश्वर तुमसाक हर किसमेर दुःख-तकलीफ से बचाय।”

डुमरेर गाछेर मिसाल

२९-३० वहार बाद यीशु लोकलाक एकटा मिसाल दे कोहले, “जैखुना तुम्हरा डुमरेर गाछोत आर दोसरा-दोसरा गाछोत नया-नया पत्ताला देखेन, त जाने जाछेन कि गर्मीर मौसम चले ओसिहे। ३१ ठीक यही मान्दी जैखुना तुम्हरा इला घटनाक घटते देखभेन, त जाने लेन कि परमेश्वरेर राज बगलोत चले ओसिहे। ३२ मुई तुमसाक सच-सच कोहची, इडा युगेर लोकला खतम हवार पहिले इला सबला घटनाक घटना जरूरी छे। ३३ धरती आर आसमानडा टले जाबे, मगर मोर बातला कोयखुना नी टलबे आर पूरा हंय रोहबे।”

हुँसियार आर तैयार रहवार सलाह

३४ “हुँसियार रोहेन। तुम्हरा लापरवाही ना करेन। तुम्हरा अपना पूरा समय खान-पान, नशाखोरी आर दुनियाँदारीर बातोत बर्बाद ना करेन। इकिसम ना होय कि उडा दिन अचुकाय ओसे तुमसाक फाँसेर मान्दी

पकड़े ले। ^{३५} क्योंकि इडा दिन दुनियाँर लोकलार पर अचुकाय चले ओसबे। ^{३६} वहीलाते तुम्हरा हरखुना हुँसियार रोहेन आर प्रार्थना करते रोहेन जसे कि तुम्हरा इला घटना से बचवा पाड़ें आर मानुषेर बेटार आगुत उम्मेदेर साथे थाड़ो हवा पाड़ें।” ^{३७} यीशु दिन करे मंदिरोत उपदेश दिछिले आर रात करे जैतून पहाड़ेर पर जाय रात बिताछिले। ^{३८} आर लोकला वहार उपदेश सुनवार तने बेहाने-बेहाने मंदिरोत चले ओसछिले।

यहूदा इस्किरियोतीर योजना

(मत्ती २६:१-५, १४-१६; मरकुस १४:१-२, १०-११)

२२ यहूदी धर्मेर अखमीरी रूटीर परब बगलोत ओसनेवाला छिले। इडा परबेर आर एकटा नाम छिले “फसह परब।” ^१ यहीडा समय बोड़ोला-पुजारी आर शास्त्रेर ज्ञानीला यीशुक धरे मारे फेकुवार मनसुबा बनाछिले। मगर वरा लोकला से डोराछिले। ^२ यीशुर बारहझन चेलार बीचोत यहूदा इस्किरियोती नामेर एकझन चेला छिले। वहार भीतरोत शैतान ढुके गेल। ^३ वहाँय बोड़ोला पूजारीर आर मंदिरेर सिपाहीलार हाकिमलार लिकिन गेल आर इडा बात तय करले कि कुन किसम करे वहाँय यीशुक धराय दिबे। ^४ वरा बहुत खुश होल आर वहाक चानीर सिक्का दुवार तने राजी होल। ^५ वहीखुना से यहूदा इस्किरियोती मौकार

तलाशोत रोहिल कि जैखुना लोकेर भीड़-भाड़ नी रोहबे, वहाँय यीशुक
उसार हाथोत धराय दिबे।

चेलालार साथे यीशुर आखरी भोज

(मत्ती २६:१७-३०; मरकुस १४:१२-२२; यूहन्ना १३:२१-३०; १ कुरिनथियुस ११:२३-२५)

७ आर अखमीरी रूटीर परबेर दिन चले ओसिल जे दिना फसह परबेर
भेड़ार बच्चाडाक बलि कराल जाबे। ८ यीशु पतरस आर यूहन्नाक इडा
कहय पठाले, “तुम्हरा जाव आर फसह परबेर भोज तैयारी करो।”
९ वरा पूछिल, “तोर इच्छा मुताबिक हमरा फसह परब मनवार तैयारी
कुन्हियाँ करमु?” १० यीशु उसाक कोहले, “जैखुना तुम्हरा शहरोत
ढुकबेन, तुमसार आगु-आगु एकटा लोकोक एकटा बरियात पानी ले
जाते देखभेन। तुम्हरा वहार पीछू-पीछू जायन। वहाँय जैखान घरोत
जाबे, तुम्हराव वहीखान घरोत जायेन ११ आर घरेर मालिकटाक पूछेन,
‘हमसार गुरुजी तोर लिकिन मालूम करवा चाहचे, मेहमानेर कमराडा
कुनठिन छे? जैछिन वहाँय अपना चेलालार साथे फसह परबेर भोज
करवा पारे।’ १२ वहाँय तुमसाक पहिला मंजिलोत एकटा बोड़ो कमरा
दखाबे, जैठिन सब कुछु तैयार छे। वहीठिन तुम्हरा भोजेर तैयारी
करभेन।” १३ जैकिसम यीशु कोहिले, वही किसम पतरस आर यूहन्ना
जाय उडा सजाल कमराक पाले आर वरा फसह परबेर तैयारी करिल।

यीशु अपना चेलालार साथे फसह परब मनाछे

१४ जैखुना भोजेर समय होल, यीशु अपना बारहइन मसीह-दूतेर साथे खवा बोठिल १५ आर उसाक कोहले, “मोर बड़ा इच्छा छिले कि मुई दुःख भोगवार आगुत तुमसार साथे फसह परबेर आखरी भोज खई। १६ परमेश्वरेर राजोत जैखुन तक परमेश्वरेर लोक फसह परबेर मतलबडा पूरापूरी नी समझे जाछे, उ-दिन तक मुई आर इडा भोज नी खाम।” १७ वहार बाद वहाँय अंगुर-रसेर बाटी लिले आर परमेश्वरेर शुकुरिया अदा करिल आर अपना चेलालाक दे कोहले, “इखानोक लव आर अपनार बीचोत बाँटे खाव। १८ मुई तुमसाक कोहची, जैखुन तक परमेश्वरेर राज कायम नी होचे, उखुन तक मुई आर अंगुर-रस नी खामु।” १९ वहार बाद यीशु रूटी ले शुकुरिया अदा करिल आर भाँयें चेलालाक दिले आर कोहले, “इडा मोर बदन छे, जैडाक तुमसार तने देयाल जाछे। मोक याद करवार तने यही किसम करते रोहेन।” २० रूटी खवार बाद वहाँय अंगुर-रसेर बाटीडा लिले आर कोहले, “इडा बाटीत मोर खून छे, जैखान तुमसार तने बहाय देयाल जाछे। इखान खून परमेश्वर आर मानुषेर बीचोत एकटा नया रिस्ता कायम करवार चिन्ह छे। २१ मगर देखो, मोक धराय देनेवाला हमसार साथे खाचे। २२ मानुषेर बेटार बारे जैकिसम लिखाल छिले, वही मुताबिक वहाक मरना जरूरी छे। मगर धिक्कार उडा लोकेर पर छे, जहार जरियाय वहाँय धराल

जाबे।” २३ इडा बात सुने चेलाला अपना बीचोत पूछ-ताछ करवा लागिल कि “हमसार बीचोत के छे, जहाँय इखान काम करबे?”

चेलाला बोलछे, हमसार बीचोत बोड़ो के

२४ आर चेलाला अपनार बीचोत बहस करवा लागिल कि हमसार बीचोत के बोड़ो समझाल जाछे। २५ यीशु उसाक कोहले, “संसारेर राजाला अपना-अपना राजेर लोकलार पर शासन करछे आर अधिकार चलाछे। आर वरा अपना आपोक भलाई करनेवाला कहलाछे। २६ मगर तुम्हरा उसार मान्दी ना होयेन। तुमसार बीचोत जहाँय बोड़ो हवा चाहचेन, वहाक सबसे छोटो हवा होबे। आर जहाँय नेता हवा चाहचेन, वहाक नौकर हवा होबे। २७ मुई तुमसाक कोहची, बोड़ो के छे? जहाँय खवार तने बोठछे ना जहाँय परसेछे? मुई कोहची, जहाँय खवार तने बोठछे। मगर मुई तुमसार बीचोत परसे खिलानेवालार मान्दी छी। २८ आर तुम्हरा मोर मुसीबतेर खुना मोर साथ दिहेन। २९ आर जैकिसम पिता परमेश्वर मोर तने एकटा राज राखिहे, वही किसम मुई तुमसार तने एकटा राज राखीही ३० जसे कि तुम्हरा मोर राजोत खान-पान करेन। आर तुम्हरा राजगद्दीर पर बोठे इजराएली लोकेर बारहडा बंशेर पर राज करेन।”

यीशु पतरसेर बारे भविष्यवाणी करछे

(मत्ती २६:३१-३५; मरकुस १४:२७-३१; यूहन्ना १३:३६-३८)

३१ वहार बाद यीशु शिमोनोक बोलिल, “शिमोन, हे शिमोन! सुन! शैतान तुमसाक सभाको जाँच करवार तने परमेश्वरेर लिकिन से अनुमति पाहे कि गोहमलार मान्दी तुमसाक फटके। ३२ मगर मुई तोर तने प्रार्थना करछी कि तुई मोर पर विश्वास करते रोहिस। आर जैखुना तुई पश्चताय मोर लिकिन घुरे ओसबो, उखुना तोर साथी विश्वासी भईलार विश्वासटाक मजबूत करबो।” ३३ इडा सुने पतरस कोहले, “गुरुजी! मुई तोर साथे जेलोत जवार तने आर जानडाव दुवार तने तैयार छी।” ३४ यीशु वहाक कोहले, “पतरस! मुई तोक कोहची, आज भोर करे मुर्गाडा बाँग दुवार पहिले तुई तीन बार मोक इन्कार करे कोहबो कि मुई वहाक नी जानी।”

यीशु चेलालाक बटुवा, झोला आर तलवार लुवा कोहचे

३५ यीशु फेर अपना चेलालाक पूछिल, “जैखुना मुई तुमसाक बिना बटुवा, बिना झोला आर बिना जूता प्रचार करवा पठायनु, त तुमसाक की कोय चीजेर कमी होयले?” चेलाला जवाब दिले, “कोय बातेर कमी नी होय।” ३६ यीशु उसाक कोहले, “मगर अला जहार लिकिन बटुवा आर झोला छे, वहाँय अपना बटुवा आर झोला ले लोक। आर जहार लिकिन तलवार नी छे, वहाँय अपना पिन्हवार कपड़ाला बेचे एकखान

तलवार किने लोक ३७ जसे कि मोर बारे लिखाल भविष्यवाणीडा पूरा हंय जाय। आर शास्त्रोत जैकिसम लिखाल छे, ‘वहाक कसूरबार लोकेर दलोत गिनती कराल जाबे।’ आर समय चले आसियेह कि मोर बारे इला बात पूरा होय।” ३८ चेलाला कोहले, “गुरुजी! हमसार लिकिन दुईखान तलवार छे।” यीशु कोहले, “काफी छे।”

यीशु पर ओसनेवाला दुःख

(मत्ती २६:३६-४६; मरकुस १४:३२-४२)

३९ वहार बाद उछिन से उठे यीशु अपना आदतेर मुताबिक अपना चेलालार साथे जैतून पहाड़ेर पर गेल। ४० उठिन जवार बाद यीशु अपना चेलालाक कोहले, “तुम्हरा प्रार्थना करते रहव जसे कि तुमसार जीवनोत कोय किसमेर परीक्षा ना ओसे।” ४१ वहार बाद वहाँय कुछ दूर जाय हँटुआ पारे प्रार्थना करवा लागिल, ४२ “पिता! अगर इडा तोर मरजी होय त मोक तुई इला भयानक मुसीबतेर अंदर से जवा ना दिस, जैला मोर पर ओसनेवाला छे। मगर मुई जैकिसम चाहची, उकिसम नी। बल्के तुई जैकिसम चाहचिस वही किसम होक।” ४३ [वहीखुना स्वर्ग से एकझन फरीस्ता वहाक दखा दिले आर वहाँय यीशुक दुःख सहवार शक्ति दिले। ४४ आर यीशु बहुत दुःख से भरे प्रार्थना करछिले। वहार पसीना खूनेर बोड़ो-बोड़ो ठोपेर मान्दी माटीत पोड़छिले।] ४५ वहार बाद वहाँय प्रार्थना से उठे चेलालार लिकिन घुरे ओसिल आर उसाक निनाते

पाले क्याँकि वरा शोकोत पोड़े गहिले। ४६ यीशु उसाक कोहले, “तुम्हरा क्याँ निनाछेन? उठे प्रार्थना करो जसे कि तुमसार जीवनोत कोय किसमेर परीक्षा ना ओसे।”

यहूदा दुश्मनलाक मदद करछे

(मत्ती २६:४७-५६; मरकुस १४:४३-५०; यूहन्ना १८:३-११)

४७ यीशु जैखुना इला बात बोलछिले, वहीखुना लोकेर एकटा बहुत बोड़ो भीड़ वहार लिकिन ओसिल। वहार बारहझन चेलार बीच से यहूदा नामेर एकझन चेला भीड़टार आगु-आगु ओसछिले। वहाँय चुमा लुवार तने यीशुर लिकिन ओसिल। ४८ यीशु वहाक कोहले, “यहूदा! की चुमा ले तुई मोक धराय दुवार तने मोर दुश्मनलाक मदद करछिस?” ४९ यीशुर चेलाला इडा देखे कि अब की होनेवाला छे? वरा पूछिल, “गुरुजी! हमरा की उसार पर तलवार चलई?” ५० चेलालार अंदर से एकझन चेला महापूजारीर नौकरटार दहिनाडा कान काटे अलग करे दिले। ५१ इडा देखे यीशु वहाक बोलिल, “थामेक। बस हंय गेल आर नी।” वहार बाद यीशु नौकरटार कानडाक लगाय ठीक करे दिले। ५२ यीशु बोड़ोला पूजारीक, मंदिरेर पहरादारलाक आर यहूदी समाजेर दोसरा नेतालाक कोहले, “तुम्हरा की मोक डकैत समझे तलवार आर लाठी ले धरवा ओसयेन? ५३ जैखुना मुई होर दिना मंदिरोत तुमसार साथे रोहछिनु, तुम्हरा उखुना मोक नी धरलेन। अला इडा समय छे, जैखुना

परमेश्वर तुमसाक उला काम करवार अनुमति दिहे, जैडा काम तुम्हरा करवा चाहचेन। अला इडा समय छे, जैखुना परमेश्वर शैतानोक अन्हारेर पर राज करवार अनुमति दिहे, जैला काम वहाँय करवा चाहचे।”

पतरस यीशुक इन्कार करछे

(मत्ती २६:५७-५८, ६९-७५; मरकुस १४:५३-५४, ६६-७२; यूहन्ना १८:१२-१८, २५-२७)

५४ वहार बाद वरा यीशुक धरे महापूजारीर घरोत ले ओसिल आर पतरस दूर से यीशुर पीछू-पीछू जाछिल। ५५ लोकला अंगनात आगिन जलाय तापछिले आर पतरसो उसार साथे बोठे गेल। ५६ वहाँय जैखुना आगिन तापछिले, एकझन बान्दी पतरसोक देखे कोहले, “यहोडा लोक त यीशुर साथे छिले।” ५७ इडा सुने पतरस कोहले, “हे बहिन! तुई की कोहचिस? मुई त वहाक नी जानी।” ५८ कुछ देर बाद आर एकझन लोक वहाक देखे कोहले, “तोहों त वहार साथे छिलो।” पतरस जवाब दिले, “हे महाशय! मुई वहाक नी जानी।” ५९ करीब एक घंटा बाद आर एकझन लोक जोर दे कोहले, “सच्चे यहोडा लोक त वहार साथे छिले क्योंकि यहाँव गलीलेर लोक छे।” ६० पतरस वहाक जवाब दिले, “महाशय! तुई की कोहचिस? मुई बुझवा नी पारछी।” पतरसेर इडा बात बोलते-बोलते मुर्गाडा बाँग दे दिले। ६१ प्रभु यीशु अपना मुख घुराय पतरसेर भीति देखिले, उखुना पतरस प्रभु यीशुर बातलाक याद करिल

कि “आज मुर्गा बाँग दुवार आगुते तुई मोक तीन बार इन्कार करे कोहबो कि मुई वहाक नी जानी।” ६२ वहार बाद पतरस बाहरे निकले गेल आर बहुत दुःख से कनवा लागिल।

यीशुर बेज्जती

६३ जैला लोक यीशुर पहरा दिछिले, वरा वहार मजाक करछिले आर मारछिले। ६४ आर वहार आँखला बन करे पूछले, “बता, तोक के मारिल?” ६५ आर वरा आढ़ो बहुतला बात कहय यीशुर बेज्जत करिल।

यीशु महासभार आगुत

(मत्ती २६:५९-६६; मरकुस १४:५५-६४; यूहन्ना १८:१९-२४)

६६ जैखुना बेहान होल। बोड़ोला पूजारी, शास्त्रेर ज्ञानीला आर समाजेर दोसरा नेताला सबकोय महासभात जोड़ो होल। आर यीशुक उसार आगुत अनाल गेल। ६७ वरा यीशुक पूछिल, “तुई अगर मसीहा छिस, त हमसाक साफ-साफ बता।” यीशु उसाक जवाब दिले, “अगर मुई तुमसाक बोली, त तुम्हरा विश्वास नी करभेन। ६८ आर अगर तुमसाक कुछु पूछी, त तुम्हरा जवाब नी दिभेन। ६९ मगर अला से मानुषेर बेटा सर्वशक्तिमान परमेश्वरेर दहिना भीति बठाल रोहबे।” ७० इडा सुने सबकोय पूछिल, “तुई की तब परमेश्वरेर बेटा छिस?” यीशु उसाक बोलिल, “हाँ, जैकिसम तुम्हरा कोहचेन, मुई वहीं छी।” ७१ इडा बात

सुने वरा कोहले, “यहार खिलाफ हमसाक आर कोय दोसरा गवाहर जरूरी नी छे। हमरा त खुद वहार मुख से सुने लिनु।”

यीशुक पिलातुसेर आगुत जाछे

(मत्ती २७:१-२, ११-१४; मरकुस १५:१-५; यूहन्ना १८:२८-३८)

२३ महासभात यीशुक पूछ-ताछ करवार तने सबला लोक वहाक पिलातुसेर लिकिन ले गेल। ^२ वरा यीशुर पर इडा दोष लगाले कि यहाँय सरकारेर खिलाफ लोकलाक उसकाछे आर रोम देशेर महाराजाक खजना दुवा मना करछे। यहाँय अपना आपोक मसीहा आर यहूदी लोकलार राजा बताछे। ^३ इला सुने पिलातुस यीशुक पूछिल, “तुई की यहूदी लोकेर राजा छिस?” यीशु जवाब दिले, “इडा तुई खुद कोहचिस।” ^४ यीशुर जवाब सुने पिलातुस बोड़ोला पूजारीक आर भीड़ेर लोकलाक कोहले, “मुई त इडा लोकेर कोय कसूर नी पाछी।” ^५ मगर बोड़ोला पुजारी आर भीड़ेर लोकला आढ़ो जोर-जोर से कहवा लागिल कि यहाँय पूरा यहूदिया राजेर गलील से शुरू करे यरूशलेम शहर तक सरकारेर खिलाफ लोकलाक उसकाछे। ^६ पिलातुस उसाक पूछिल, “यहाँय की गलील प्रदेशर लोक छे?” लोकला कोहले, “हाँ, यहाँय गलीलेर छे।” ^७ उडा समय गलीलेर पर हेरोदेश शासन करछिल। वहीलाते पिलातुस यीशुक पूछ-ताछ करवार तने हेरोदेशेर लिकिन पठाय दिले। उखुना राजा हेरोदेश यरूशलेम शहरोत छिले।

यीशुक हेरोदेशेर लिकिन पठाल जाछे

८ जैखुना यीशुक हेरोदेश राजार लिकिन हाजिर कराल गेल, हेरोदेश वहाक देखे बहुत खुश होल, क्योंकि वहाँय यीशुर बारे बहुत कुछ सुनिहिले आर वहार लिकिन से कुछ अजूबा काम देखवा चाहचिले।
९ वहार बाद राजा हेरोदेश यीशुक बहुतला सवाल पूछिल। मगर यीशु वहार कोयला सवालेर जवाब नी दिले। १० यहार बाद बोड़ोला पूजारी आर शास्त्रेर ज्ञानीला बहुत जोर से यीशुर पर दोष लगाते रोहोल।
११ इडा देखे राजा हेरोदेश अपना सिपाहीलार साथे यीशुर मजाक उड़ाल आर बेज्जत करिल आर वहाक राजार कपड़ा पिन्हाय पिलातुसेर लिकिन वापस पठाय दिले। १२ वही दिन से राजा हेरोदेशेर आर पिलातुसेर बीचोत दोस्ती हंय गेल। यहार आगुत दोनोंझनार बीचोत दुश्मनी छिले।

यीशुक मौतेर सजा

(मत्ती २७:१५-२६; मरकुस १५:६-१५; यूहन्ना १८:३९—१९:१६)

१३ वहार बाद पिलातुस बोड़ोला पूजारीक, यहूदी समाजेर दोसरा नेतालाक आर साधारण लोकलाक कोहले, १४ “तुम्हरा इडा लोकोक मोर आगुत इडा दोष लगाय आनलेन कि यहाँय लोकोक सरकारेर खिलाफ उसकाछे। मगर तुमसार आगुत जाँच करे देखवार बाद मुई यहार कोय कसूर नी पानु। १५ आर हेरोदेशो यहाक पूछ-ताछ करे

देखिले आर कोय कसूर नी पाले आर मोर लिकिन वापस पठाय दिले।
यहाँय इकिसम कोय कसूर नी करिहे कि यहाक मौतेर सजा देयाल
जाय। १६ वहीलाते मुई वहाक कोड़ा मारे छोड़े दिछी।” १७ [यहूदी
लोकलार तने फसह परबेर समय एकटा कैदीक छोड़े देयाल जाछिल।
वहीलाते पिलातुस यीशुक छोड़े दुवा चाहचिले।] १८ पिलातुसेर बात सुने
लोकला जोर-जोर से चिल्लाय कोहले, “यहाक क्रुसेर पर चढ़ा आर
हमसार तने बरब्बाक छोड़े दे।” १९ बरब्बा सरकारेर खिलाफ बगावत
करवार कारणे आर लोकोक खून करवार कारणे जेलोत छिले।
२० यीशुक छोड़े दुवार ख्याल से पिलातुस आरमने लोकलाक समझाल।
२१ मगर लोकला आढ़ो जोर से चिल्लाय कोहले, “यहाक क्रुसेर पर
चढ़ाव।” २२ पिलातुस तेसरा बार लोकलाक पूछिल, “क्याँ? यहाँय त
मौतेर लायक कोय कसूर नी करिहे। मुई यहाक कोड़ा मारे छोड़े
दिछी।” २३ मगर लोकला आढ़ो जोर-जोर से चिल्लाते रोहोल कि
यीशुक क्रुसोत चढ़ाय मारे दव। २४ वहीलाते पिलातुस उसार माँग
मुताबिक यीशुक मौतेर सजा सुनाय दिले। २५ आर बरब्बाक जेल से
छोड़े दिले। वहार बाद लोकलार मनसुबा पूरा करवार तने पिलातुस
यीशुक सिपाहीलार हाथोत सोंपे दिले।

क्रुसेर पर यीशुर मौत

(मत्ती २७:३२-४४; मरकुस १५:२१-३२; यूहन्ना १९:१७-२७)

२६ जैखुना सिपाहीला यीशुक शहर से बाहरे ले जाछिले, उसाक एकझन लोक मिलिल। वहार नाम शिमोन छिले। वरा शिमोनोक धरे वहार काँधोत यीशुर क्रुसटा लादे दिले जसे कि वहाँय यीशुर पीछू-पीछू जाय। २७ लोकेर एकटा बहुत बोड़ो भीड़ वहार पीछू-पीछू जाछिले आर कुछुला स्त्रीव भीड़ेर साथे छिले। स्त्रीला अपना-अपना बुक डँघांय-डँघांय यीशुर तने कानछिले। २८ यीशु उसाक कोहले, “तुम्हरा मोर तने ना कानो, बल्के अपना बाल-बच्चार तने कानो। २९ क्योंकि इकिसम एकटा दिन ओसछे, जैखुना लोकला इडा कोहबे, ‘बाँझीला स्त्री अच्छा छे, जहार कोय बाल-बच्चा नी होय आर उसाक दूध नी खिलाय।’ ३० जैला लोक यरूशलेम शहरोत रोहबे, उखुना वरा बोड़ो पहाड़लाक कोहबे, ‘हमसार पर पोड़े जाव आर छोटोला पहाड़ोक कोहबे, हमसाक झापे लव।’ ३१ मुई निर्दोष छी। तहातो मोर साथे लोकला इकिसम बुरा व्यवहार करछे। मगर तुम्हरा जहाँय दोषी छेन त वरा तुमसार साथे आढ़ो कतेक बेसी खराब व्यवहार करबे।” ३२ सिपाहीला आढ़ो दुईझन कैदीक क्रुसेर पर चढ़वार तने ले गेल। ३३ जैखुना सिपाहीला खोपरी नामेर एकखान पहाड़ेर पर पहुँचिल, वरा यीशुर पाँ आर हाथोत खील ठुके क्रुसोत टाँगे दिले। आर वहीठिन दोनोंडा डकैतको क्रुसोत टाँगे दिले। एकझनाक यीशुर दहिना भीति आर दोसराझनाक बाँया भीति। ३४ क्रुसेर पर से

यीशु प्रार्थना करिल, “पिता! इला लोकोक तुई माफ करे दे क्याँकि यरा नी जाने कि यरा की करछे।” वरा लौटरी लगाय यीशुर कपड़ालाक बाँटे लिले। ३५ लोकला उठिन थाड़ो हंय देखछिले। यहूदी धर्मेर नेताला मजाक करे कोहले, “अरे! यहाँय दोसराला लोकोक बचाल, मगर अपना-आपोक बचवा नी पारछे। यहाँय अगर परमेश्वरेर चुनाल मसीहा छे, त अपना आपोक बचाय लोक।” ३६ सिपाहीलाव वहार मजाक करिल। वरा ओसे वहाक एकखान खट्टा रस दिले आर कोहले, ३७ “अगर तुई यहूदी लोकेर राजा छिस, त क्रुसेर पर से नाभे दखा आर अपना आपोक बचा।” ३८ सरकारी हुकूमेर मुताबिक यीशुर क्रुसेर उपरोत लिखाल छिले, “यहाँय यहूदी लोकेर राजा छे।” ३९ यीशुर साथे क्रुसोत टँगाल एकझन डकैतो यीशुर मजाक करे कोहले, “तुई अगर मसीहा छिस, त अपना आपोक बचा आर मोहको बचा।” ४० मगर दोसराझन डकैत वहाक धमकाय कोहले, “तोक की परमेश्वरेर डर नी छे? ४१ हमरा त अपना कसुरेर सजा भोगोछी। मगर यहाँय त कोय कसूर नी करे।” ४२ वहार बाद वहाँय बिनती करे कोहले, “हे यीशु! जैखुना तुई अपना राजोत ओसबो, त दया करे मोहको ख्याल करिस।” ४३ यीशु वहाक बोलिल, “मुई तोक सच कोहची, आइये तुई मोर साथे स्वर्ग लोकोत रोहबो।” ४४ करीब १२ बजे दिन से ३ बजे भाटी पोहर तक पूराडा देशोत अन्हार हंय गेल। ४५ आर बेलाडार रोशनी बन्द हंय

गेल। मंदिरेर पर्दाखान उपर से नीचान तक फटे दुई भाग हंय गेल।
४६ उखुना यीशु बहुत जोर से चिल्लाय कोहले, “हे पिता! मुई तोर हाथोत अपना आत्माडाक सोंपे दिछी।” इडा कोहय यीशु अपना प्राण दे दिले। ४७ सैनिकेर हाकिमडा इडा घटनाक देखे परमेश्वरेर बड़ाई करे बोलिल, “यहाँय सच्चे एकझन धर्मी लोक छिले।” ४८ जैला लोक उछिन देखवा ओसिहिले, इडा घटनाक देखे अपना बुक डँघांते-डँघांते घुरे चले गेल। ४९ मगर जैला लोक यीशुक चिन्हछिले, आर स्त्रीला जैला गलील से ओसिहिले, दूरोत थाड़ो हंय इला सबला घटना देखते रोहोल।

यीशुर लाशटाक कबरोत रखाल जाछे

(मत्ती २७:५७-६१; मरकुस १५:४२-४७; यूहन्ना १९:३८-४२)

५०-५१ यूसुफ नामेर एकझन धर्मी आर अच्छा लोक छिले। वहाँय यहूदिया प्रदेशेर अरिमतियाह शहरेर लोक छिले। आर वहाँय महासभार एकझन सदस्य छिले। वहाँय परमेश्वरेर राज ओसवार इन्तेजार करछिले। यीशुर इन्साफेर खुना यूसुफ महासभार लोकलार योजना आर काम से राजी नी छिले। ५२ वहाँय पिलातुसेर लिकिन जाय बिनती करे यीशुर लाशटाक कबर दुवार तने माँयें लिले। ५३ वहाँय आर कुछुला लोक यीशुर लाशटाक क्रुसेर पर से नभाय एकखान मखमल कपड़ात लेपटे एकटा कबरोत राखिल। कबरटा एकखान पहाड़ खुदे बनाल गहिल आर उडा कबरोत यहा से पहिले कहाको नी रखाल गहिले।

५४ उडा शुकरेर दिन छिले। वहीलाते उसाक जल्दी करे बेला डुबवार आगुते यीशुर लाशटाक कबर दुवार काम करना छिले। इडा दिनोत वरा आरामेर दिन मनवार तने जिनिस तैयारी करछिले। ५५ जैला स्त्री गलील से यीशुक देखवा ओसिहिले। वरा यूसुफेर साथे-साथे जाय यीशुर कबरटाक देखिले कि यीशुक कबरोत कुन किसम करे रखाल गहे। ५६ स्त्रीला वापस घर जाय यीशुर बदनडार तने मोहकाल तेल आर मोहकाल मसाला तैयारी करिल। आर वरा नियम मुताबिक आरामेर दिन आराम करिल।

यीशु जिन्दा हंय उठछे

(मत्ती २८:१-१०; मरकुस १६:१-८; यूहन्ना २०:१-१०)

२४ एतवारेर दिन बड़्डी भोरे स्त्रीला अपना तैयार कराल मोहकाल मसाला ले यीशुर लाशटात लगवार तने कबरटार लिकिन गेल। २ आर वरा पत्थलखानोक कबरटार मुखखान से सरकाल पाले। ३ आर जैखुना कबरटार भीतरोत ढुकिल, त वरा प्रभु यीशुर लाशटाक नी पाले। ४ इडा देखे वरा सोचवा लागिल कि यीशुर लाशटा की होल? वहीखुना दुईझन लोक सादा धकधक कपड़ा पिन्हें उसार आगुत ओसे थाड़ो होल। ५ उसाक देखे स्त्रीला डोराय गेल आर माथा नीचान करे रोहिल। वरा दोनोंझन स्त्रीलाक कोहले, “तुम्हरा जिन्दा लोकटाक मुर्दा लोकेर बीचोत क्याँ छाभछेन? ६ वहाँय इछिन नी छे, मगर जिन्दा हंय उठयेह।

तुम्हरा ख्याल करो। जैखुना वहाँय गलीलोट छिले, तुमसाक वहाँय की कोहिले? ७ यीशु कोहिले, 'इडा जरूरी छे कि मानुषेर बेटा पापी लोकेर हाथोट धराल जाबे, क्रुसोट मारा जाबे, मगर तेसरा दिनोट वहाँय आरमने जिन्दा हंय उठबे।' ” ८ इडा सुने स्त्रीला यीशुर बातलाक ख्याल करिल। ९ आर वरा कबरेर लिकिन से घुरे ओसे इला सबला बात एगारोझन चेलाक आर बाँकी लोकोक बताले। १० जैला स्त्री कबर देखवा गहिले, वरा मगदला गाँवेर मरियम, योअन्ना, याकूबेर माँ मरियम आर आढ़ो कुछुला दोसरा स्त्री छिले। वरा इला सबला घटनाक मसीह-दूतलाक बताले। ११ मगर स्त्रीलार बात उसाक बनाल किस्सार मान्दी लागिल। वहीलाते वरा विश्वास नी करिल। १२ तहारो पर पतरस दौड़े कबरटाक देखवा गेल। वहाँय ढूलकुटाय कबरटार तोलोत सिरिफ कफनेर कपड़ाला देखिले। आर जैला घटना घटिले उलाक देखे हैरान हंय, वहाँय घुरे अपना घर चले गेल।

यीशु दुईझन चेलाक देखा दिछे

(मरकुस १६:१२-१३)

१३ वही दिना यीशुर दुईझन चेला इम्माउस नामेर एकटा बस्तीत जाछिले। इडा बस्ती यरूशलेम शहर से सात मील दूरोत छिले। १४ वरा जाते-जाते जैला घटना घटिले उलार बारे बातचीत करते-करते जाछिले। १५ वरा इला घटनार बारे बातचीत करछिल करे कि यीशु अचुकाय ओसे

उसार साथे धरे लिले। १६ मगर वरा यीशुक चिन्हवा नी पारिल क्याँकि वहाँय उसाक चिन्हवार ताकत नी दिहिल। १७ यीशु उसाक पूछिल, “तुम्हरा कुन बातचीत करछेन? भई!” जाते-जाते वरा थामे गेल आर वरा उदास दखा गेल। १८ उ-दूईझनकार बीचोत किलयुपास नामेर एकझन लोक कोहले, “यरूशलेम शहरोत तुहें की एकटा लोक छिस, जहाँय उला घटनार बारे नी जाने, जैला आजकाल यरूशलेम शहरोत घटछे।” १९ यीशु उसाक पूछिल, “कुनला घटना घटिहे?” वरा बोलिल, “नासरत शहरेर यीशुर जीवनोत जैला घटना घटिहे। वहाँय एकटा मानुष छिले, जहाँय परमेश्वरेर आगुत आर सोबला लोकेर आगुत अपना शक्तिर काम आर बोली से साबित करे दिहिले कि वहाँय सचमुच एकझन नबी छिले। २० मगर हमसार बोड़ोला-पुजारी आर दोसरा धार्मिक नेताला वहाक मौतेर सजा दुवार तने रोमी हाकिमेर हाथोत सोंपे दिले। उला रोमी हाकिम वहाक क्रुसेर पर चढ़ाय मारे दिले। २१ इला घटना घटवार आज तेसरा दिन छे। हमरा उम्मेद करछिनु कि वहीं मसीहा छिले, जहाँय हमसार इजराएली लोकोक हमसार दुश्मन से आजाद करबे। मगर इकिसम लागछे कि इडा आर संभव नी छे। २२ आर हमसार बीचेर कुछुला स्त्री हमसाक ताज्जूबोत गिराय दिहे। वरा आज बड्डी भोर कबरटा देखवा गहिले। २३ मगर वहार लाशटाक नी पाले। वरा हमसाक ओसे कोहले कि हमरा फरीस्ताक देखनु। आर

फरीस्ताला कोहले कि वहाँय जिन्दा छे। २४ वहार बाद हमसार कुछ साथीलाव कबरटा देखवा गेल। आर जैकिसम स्त्रीला खबर दिहिले, वहाँय वही किसम पाले आर यीशुक नी देखिले।” २५ वहार बाद यीशु उसाक कोहले, “तुम्हरा बहुत बुद्ध छेन। मसीहार बारे तुम्हरा नबीलार बातलाक समझते देरी करछेन। २६ इडा की जरूरी नी छिले कि मसीहा दुःख उठाय मोरबे आर वहार बाद वहाँय अपना महिमार घर स्वर्गोत पहुँचबे?” २७ वहार बाद यीशु मूसार किताब से आर नबीर किताब से शुरू करे पूरा शास्त्रेर बातलाक उसाक समझाय दिले, जैला कि वहार बारे लिखाल छिले। २८ यहार भीतरोत दोनोंइन चेला जैडा बस्तीत जानेवाला छिले, उछिन पहुँचिल। आर इकिसम देखाल कि यीशु आढ़ो आगुत जाबे। २९ मगर वरा वहाक जिद्द करे कोहले, “हमसार साथे रातटा बिता। देख! दिनडा ढले गहे आर बेलाडा डुबने वाला छे।” यीशु राजी हंय गेल आर उसार साथे रहवार तने भीतरोत गेल। ३० जैखुना वहाँय उसार साथे खवार तने बोठिल, वहाँय रूटीलार तने परमेश्वरेर शुकुरिया अदा करिल आर रूटी भाँयें-भाँयें उसाक दिले। ३१ वहीखुना परमेश्वर उसाक यीशुक चिन्हवार तने मदद करिल। आर वरा वहाक चिन्हे लिले। यीशु उसार नजर से गायब हंय गेल। ३२ वहार बाद वरा अपना बीचोत बोलवा लागिल, “रास्तात जैखुना वहाँय हमसार साथे बात करछिले आर शास्त्रेर बात हमसाक बुझाछिले, उखुना हमसार

दिल खुशी से भरे गहिले।” ३३ वहार बाद एम्माउस बस्तीर उ-दुईझन चेला उठिन से उठे यरूशलेम शहर वापस चले गेल। उछिन वरा एगारोझन चेलाक आर जैला लोक उसार साथे जोड़ो होईले सभाको पाले। ३४ सबकोय बात करछिले कि प्रभु यीशु सही माने जिन्दा हंय उठिहे आर शिमोनोक देखा दिहे। ३५ वहार बाद दोनोंझन चेला रास्तार सबला बातोक बताय दिले। आर यहोडा बताल कि रूटी भाँयें दुवारखुना वरा कुन किसम करे वहाक चिन्हे लिले।

यीशु चेलालार साथे मुलाकात करछे

(यूहन्ना २०:१९-२३)

३६ वरा इला बात करछिले करे कि वहीखुना यीशु आपने उसार बीचोत ओसे थाड़ो होल आर उसाक कोहले, “परमेश्वर तुमसार दिलोत शांति दोक।” ३७ मगर चेलाला घबराय आर डोराय कोहले, “भूत! भूत!” ३८ यीशु उसाक कोहले, “तुम्हरा क्याँ घबराछेन? आर मनोत क्याँ शक करछेन? ३९ मोर हाथलाक आर पाँलाक देखो कि इडा मुहें छी ना नी। मोक लारे देखो क्याँकि भूतेर ना हड्डी होचे आर ना मांस।” ४० इडा कोहय वहाँय उसाक अपना हाथ आर पाँ देखाल। ४१ यीशुक देखवार बाद खुशीर मारे उसाक विश्वास नी होल आर वरा आश्चर्य करवा लागिल। वहार बाद यीशु उसाक पूछिल, “तुमसार लिकिन की कुछु खवार जिनिस छे?” ४२ वरा वहाक भजाल माछेर एकखान टुकड़ा

दिले। ४३ उखान ले वहाँय उसार आगुत खाले। ४४ वहार बाद वहाँय उसाक कोहले, “मुई जैखुना तुमसार साथे छिन्नू, उखुना तुमसाक बोलिहिनु कि मूसार नियमोत, दोसराला नबीर किताबलात आर भजन-संहितात मोर बारे जैला-जैला बात लिखाल छे, उला सबला बातोक पूरा होना जरूरी छे।” ४५ वहार बाद वहार बारे शास्त्रोत जैला बात लिखाल छिले, उला बातोक बुझवार तने वहाँय चेलालाक मदद करिल। ४६ आर उसाक कोहले, “शास्त्रोत बहुत पहिले इडा बात लिखाल गहिले कि मसीहा दुःख उठाबे, मोरबे आर तेसरा दिन फेर मुर्दा से जिन्दा हंय उठबे। ४७ आर यरूशलेम से शुरू करे सब देशेर लोकेर बीचोत वहार नामे इडा प्रचार कराल जाबे, ‘तुम्हरा पाप से मन बदली करो आर पापेर माफी पाव।’ ४८ आर तुम्हरा इला सबला बातेर गवाह छेन। ४९ आर देख! मुई तुमसार लिकिन वहाक पठाम, जहार बारे मोर पिता परमेश्वर तुमसाक वादा दिहिले। मगर इडा नगरोत तुमसाक उखुन तक रहवा होबे, जैखुन तक परमेश्वर तुमसाक पवित्र आत्मार शक्ति दे भरे नी दिछे।”

यीशु स्वर्ग चले जाछे

(मरकुस १६:१९-२०; मसीह-दूत १:९-११)

५० वहार बाद यीशु चेलालाक बैतनियाह बस्ती से बाहरे ले गेल आर अपना हाथ उठाय उसाक आशीर्वाद दिले। ५१ आर आशीर्वाद दिते-दिते

यीशु उसासे अलग हंय गेल आर वहाक स्वर्गोत उठाय लिया ल गेल।
५२ वहार बाद चेला ला यीशुक भक्ति दे बहुत खुशी-खुशी यरूशलेम घुरे
चले गेल। ५३ आर वरा होर दिना यरूशलेम मंदिरोत जाछिले आर
परमेश्वरेर बड़ाई करते-करते अपना समय बिताछिले।

यूहन्नार लिखाल खुश-खबरी

वचन मानुष बने जनम लिले

१ परमेश्वर जैखुना दुनियाँडा बनाहिले, वहार पहिले वचन छिले, आर वचन परमेश्वरेर साथे छिले, आर वचन परमेश्वर छिले। २ यही वचन शुरू से परमेश्वरेर साथे छिले। ३ सब कुछ यही वचनेर जरियाय बनाल गहिले। दुनियाँत इकिसम एकोखान चीज नी छे, जैखान कि बिना वहार जरियाय बनाल गहे। ४ यहार भीतरोत जिन्दगी दुवार शक्ति छिले, आर यही जिन्दगी मानुषेर तने खास रोशनी छिले। ५ यही रोशनी अन्हारोत चमकेछे, मगर अन्हार रोशनीक ग्रहण नी करिल। ६ परमेश्वर एकझन लोकोक पठाहिले, जहार नाम छिले यूहन्ना। ७ यहाक पठाल गेल कि रोशनीर बारे लोकोक बताय जसे कि सब लोक वहार बात सुने रोशनीर पर विश्वास करवा पारे। ८ यूहन्ना त खुद उडा रोशनी नी छिले, मगर उडा रोशनीर बारे लोकोक बतवार तने ओसिहिले। ९ उडा असली रोशनी जैडा कि सबला लोकोक उजाला दिछे, दुनियाँत ओसनेवाला छिले। १० रोशनी दुनियाँत छिले आर दुनियाँ वहार जरियाय पैदा होल, मगर दुनियाँ वहार चिन्हवा नी पारिल कि वहाँ परमेश्वरेर लिकिन से

ओसिहे। ११ वहाँय अपना लोकलार बीचोत ओसिल, मगर वहार अपना लोकला वहाक ग्रहण नी करिल। १२ मगर जतेला लोक वहाक विश्वास करे ग्रहण करिल, वहाँय उसाक परमेश्वरेर बेटा-बेटी हवार अधिकार दिले। १३ उला लोक ना त खून से, ना शरीरेर इच्छा से, आर ना मानुषेर इच्छा से परमेश्वरेर बेटा-बेटी होय, बल्के परमेश्वर खुद उसाक अपना बेटा-बेटी बनाहे। १४ आर वचनडा मानुष बने जनम लिले आर हमसार बीचोत रोहिल। आर हमरा वहार महिमा देखनु जैकिसम कि परमेश्वर पितार एकलौता बेटार महिमा छे। वहार दिलोत लोकेर तने बहुत दया छिले आर वहाँय परमेश्वरेर सच्चाईक पुरा-पुरी प्रकट करिल। १५ यूहन्ना वहार बारे लोकलाक बताछिले आर जोर से कोहचिले, “यहाँय वहीडा मानुष छे, जहार बारे मुई तुमसाक बताछिनु कि जहाँय मोर बाद ओसछे, वहाँय मोसे बेसी शक्तिशाली छे। आर वहाँय मोसे पहिले छिले।” १६ वहार दिलोत हमसार तने बहुत दया भराल छिले आर वहीलाते वहाँय हमसार पर बहुत दया करिल। १७ मूसा नबी हमसाक परमेश्वरेर नियम-कानून दिहिले, मगर प्रभु यीशु मसीह हमसार पर दया करिल आर परमेश्वरेर सच्चाईक बताल। १८ परमेश्वरोक कभी कोय नी देखे, मगर एकलौता बेटा, जहाँय खुद परमेश्वर छे आर जहाक पिता बहुत प्रेम करछे, वहीं लोकोक देखाल कि परमेश्वर के आर केनमन छे?

यूहन्ना बपतिस्मादाता यीशुर बारे बताछे

(मत्ती ३:१-१२; मरकुस १:१-८; लूका ३:१-१८)

१९ एक दिना यहूदी नेताला यरूशलेम शहर से कुछुला पूजारीक आर कुछुला लेवीक यूहन्नार लिकिन पूछवा पठाल, “तुई के छिस?”

२० यूहन्ना उसाक जवाब दिते नी हिचकिचाल आर कोहले, “मुई मसीहा नी छी।” २१ तब वरा वहाक पूछिल, “फेर तुई के छिस? तुई की एलियाह छिस?” वहाँय कोहले, “नी, मुई एलियाह नी छी।” वरा पूछिल, “त तुई कि उडा नबी छिस, जहार हमरा इन्तेजार करछी?” यूहन्ना जवाब दिले, “नी, मुई उडा नबी नी छी।” २२ तब वरा यूहन्नाक पूछिल, “त तुई फेर के छिस? तुई अपना बारे की कोहचिस? हमसाक बता जसे कि हमरा अपना पठानेवालाक जवाब दुवा पारी।” २३ वहाँय उसाक यशयाह नबीर किताबोत लिखाल बातला बताल, “मुई सुनसान इलाकात एकटा आवाज छी आर जोर से आवाज दिछी, ‘प्रभुर तने रास्ता सीधा करो।’” २४ यूहन्नार लिकिन जैला लोकोक पठाल गहिले, वरा फरीसी छिले। २५ वरा यूहन्नाक पूछिल, “तुई अगर ना मसीहा छिस, आर ना एलियाह, आर ना उडा नबी छिस, जैडार हमरा इन्तेजार करछी, त फेर बपतिस्मा क्याँ दिछिस?” २६ यूहन्ना उसाक जवाब दिले, “मुई त पानी से बपतिस्मा दिछी, तुमसार बीचोत एकझन थाड़ो हंय छे, जहाक तुम्हरा नी जानेन। २७ वहाँय मोर बाद अपना शिक्षा दुवा शुरू करबे। मुई वहार जूतार फितालाव खोलवार लायक नी छी।” २८ इला

सबला बातचीत यरदन नदीर बगलेर बैतनियाह गाँवत घटिहिले, जैडा नदीत यूहन्ना लोकोक बपतिस्मा दिछिले। २९ दोसरा दिन यूहन्ना देखछे कि यीशु वहार भीति चले ओसछे। वहाक देखे यूहन्ना लोकलाक कोहले, “देखो, यहाँय परमेश्वरेर भेड़ा छे, जहाक परमेश्वर बलिदान हवार तने पठाहे। आर यहाँय मानुषेर पाप उठाय ले जाछे।” ३० यहारे बारे मुई बोलिहिनु कि, “एकझन लोक मोर बाद ओसछे, जहाँय मोसे बोड़ो छे, क्याँकि वहाँय मोसे पहिले छिले।” ३१ मुई त वहाक नी चिन्हेछिनु कि वहाँय ओसनेवाला मसीहा छे। मुई लोकोक पानी से बपतिस्मा दिते ओसनु ताकि इजराएली लोकोक मालूम हंय जाय कि यीशु उसार मसीहा छे। ३२ मुई देखनु कि परमेश्वरेर पवित्र आत्मा कबूतरेर मान्दी आसमान से नाभिल आर वहार पर ठहरे गेल। ३३ मुई त वहाक नी चिन्हछिनु, मगर जहाँय मोक पानी से बपतिस्मा दुवा पठाहे, वहीं मोक कोहये कि जहार पर तुई पवित्र आत्माक नाभते देखबो, वहीं पवित्र आत्मा से लोकोक बपतिस्मा दिबे। ३४ मुई इडा देखनु कि इला सबला बात यीशुर साथे घटिल। आर वहीलाते मुई तुमसाक बोलछी कि वहीं परमेश्वरेर बेटा छे।

यीशुर पहिला चेला

३५ दोसरा दिन यूहन्ना आर वहार चेलालार भीतर से दुईझन चेला थाड़ो हंय छिले। ३६ यूहन्ना यीशुक जाते देखिल आर अपना चेलालाक कोहले, “देखो! यहाँय परमेश्वरेर भेड़ा छे, जहाक परमेश्वर बलिदान हवार तने पठाहे।” ३७ इडा बात सुने यूहन्नार दोनोंझन चेला यीशुर साथ धड़े लिले। ३८ यीशु पीछू भीति घुरे उसाक पूछिल, “तुम्हरा कहाक छाभछेन?” वरा जवाब दिले, “गुरुजी! तुई कुनठिन रोहछिस?” ३९ यीशु उसाक कोहले, “चलो! देखेलिभेन।” यहार बाद दोनोंझन चेला शाम चार बजे वहार रहवार जगहखान देखिल आर वरा उदिना यीशुर साथे रोहोल। ४० जे दुईझन चेला यूहन्नार बात सुने यीशुर पीछू धरे लिहिले, उसार भीतर से एकझन शिमोन पतरसेर भई, अन्द्रियास छिले। ४१ वहाँय सबसे पहिले अपना भई शिमोनेर मुलेकात करिल आर वहाक कोहले, “हमसाक मसीहा मिले गेल।” ४२ अन्द्रियास शिमोनोक यीशुर लिकिन आनिल। यीशु वहाक देखे कोहले, “तुई यूहन्नार बेटा शिमोन छिस। तोक कैफा कहाल जाबे (मतलब ‘पतरस’)|।”

फिलिप आर नथनिएल यीशुर चेला बनछे

४३ दोसरा दिन यीशु गलील प्रदेश जवार तने तैयार होल। जैखुना वहाँय जानेवाला छिले, वहाँय फिलिपेर मुलाकात करिल आर कोहले, “मोर पीछूत ओसेक।” ४४ फिलिप बैतसैदा शहरेर रहनेवाला छिले, जैडा

શહેરેર રહનેવાલા અન્દ્રિયાસ આર પતરસ છિલે। ૪૫ વહાર બાદ ફિલિપ નથનિયલેર મુલેકાત કરિલ આર વહાક કોહલે, “જહાર બારે મૂસા નબીર નિયમોત આર દોસરાલા નબીર કિતાબોત લિખાલ છે, હમરા વહાક પાય ગહી। વહાંય નાસરત શહેરેર યૂસુફેર બેટા યીશુ છે।” ૪૬ નથનિયલ ફિલિપોક કોહલે, “નાસરત સે કોય અચ્છા ચીજ નિકલુવા પારે કી? કબી ની।” ફિલિપુસ વહાક કોહલે, “ઓસોક આર દેખેક।” ૪૭ યીશુ નથનિયલોક અપના બીતિ ઓસતે દેખે વહાર બારે બોલિલ, “સહી માને યહાંય એકઝન ઇજરાએલી છે। યહાર દિલોત કોય છલ-કપટ ની છે।” ૪૮ નથનિયલ યીશુક કોહલે, “તુઈ મોક કસે કરે જાનિસ?” યીશુ વહાક જવાબ દિલે, “જૈખુના ફિલિપ તોક જાબ દુવા ગહિલ, ઉખુના તુઈ ડુમરેર ગાછટાર નીચાનોંત છિલો આર વહીખુના મુઈ તોક દેખિહિનુ।” ૪૯ નથનિયલ યીશુક જવાબ દિલે, “ગુરૂજી! તુઈ પરમેશ્વરેર બેટા છિસ આર ઇજરાએલી લોકેર રાજા છિસ।” ૫૦ યીશુ વહાક જવાબ દિલે, “મુઈ તોક કોહિનુ કિ તોક મુઈ ડુમરેર ગાછટાર નીચાનોત દેખિહિનુ, યહીડા બાત બોલવાર કારણ, કિ તુઈ વિશ્વાસ કરછિસ કિ મુઈ પરમેશ્વરેર બેટા છી। તુઈ યહા સે બઢે બોઢો-બોઢો ચમત્કારેર કામ મોક કરતે દેખબો। ૫૧ મુઈ તોક સચ-સચ કોહચી કિ તુઈ સ્વર્ગ ખોલાલ દેખબો આર પરમેશ્વરેર ફરીસ્તાલાક માનુષેર બેટા પર નાભતે આર ઉપરોત ચઢતે દેખબો।”

यीशुर पहिला आश्चर्य काम

२ दुई दिन बाद गलील प्रदेशेर काना शहरोत एकटा शादी छिले। यीशुर माँव शादीडात छिले। ३ इडा शादीत यीशु आर वहार चेलालाव बलाहट पाहिले। ४ आर जैखुना शादीत लोकोक अंगुरेर रस देयाल जाछिल, त उखुना रस घटे गेल। इडा देखे यीशुर माँ यीशुक कोहले, “इसार लिकिन रस घटे गेल।” ५ मगर यीशु अपना माँक जवाब दिले, “मोक क्याँ कोहचिस? इखान काम करवार समय अभी तक मोर नी ओसिहे।” ६ यीशुर माँ नौकरलाक कोहले, “यीशु जैमान्दी करवा कोहचे, तुम्हरा वही मान्दी करो।” ७ यहूदी लोकेर शुद्ध हवार नियम मुताबिक उठिन पत्थलेर छौडा मटका रखाल छिले। हरेकटा मटकात करीब-करीब ३५ लीटर पानी आँटछिले। ८ यीशु नौकरलाक कोहले, “मटकालात पानी भरे दव।” तब नौकरला उला मटकात छप-छप करे पानी भरे दिले। ९ यहार बाद यीशु उसाक कोहले, “अला कुछु पानी निकलाय भोजेर प्रधानेर लिकिन ले जाव।” वरा कुछु पानी निकलाय प्रधानेर लिकिन ले गेल। १० जैखुना भोजेर प्रधान पानीखान चाखिल, त पानीखान अंगुरेर रस बने गहिले। मगर वहाँय इडा नी जानछिले कि उखान रस कुनठिन से ओसिल? (मगर नौकरला जानछिले।) तब भौजेर प्रधानडा दूल्हाडाक जाब दे कोहले, १० “सब लोक आगुत अच्छा अंगुरेर रस खवा दिछे। जैखुना मन भरे खाय लिछे, त वहार बाद कम दामी रस दिछे।

मगर तुई त अच्छा रसखानोक अभी तक राखे दिहिस।” ११ यीशु गलील प्रदेशेर काना शहरोत अपना इडा पहिला चमत्कार देखाल आर अपना शक्ति लोकेर आगुत प्रकट करिल। इडा देखे वहार चेलाला वहार पर विश्वास करिल। १२ वहार बाद यीशु, वहार माँ, वहार भईला आर वहार चेलाला कफरनहूम शहर गेल। आर वरा उठिन कुछु दिन रोहिल।

यीशु मंदिर से बेपारीलाक निकलाछे

(मत्ती २१:१२-१३; मरकुस ११:१५-१७; लूका १९:४५-४६)

१३ यहूदी लोकेर फसह परब बगलोत छिले। यहीडा समय यीशु यरूशलेम शहरोत गेल। १४ यरूशलेम पहुँचवार बाद वहाँय मंदिरोत देखिल कि लोकला गोरू, भेड़ा आर कबूतर बेचेछे, आर कुछुला व्यापारी लोक बोठे सिक्का अदला-बदली करछे। १५ इला देखे वहाँय रस्सीर कोड़ा बनाय, सबला भेड़ा आर बैलोक मंदिर से निकलाय दिले आर सिक्का अदला-बदली करनेवाला व्यापारीलार सिक्कालाक छिड़याय दिले आर टेबुलाको उलटाय दिले। १६ आर कबूतर बेचनेवालालाक कोहले, “इलाक इठिन से ले जाव। मोर पितार घरखानोक बाजार ना बनाव।” १७ इला देखे वहार चेलालाक परमेश्वरेर शास्त्रोत लिखाल बातला याद होल कि “तोर घरेर धुन मोक खतम करबे।” १८ यीशुर इला काम देखे यहूदी लोकला यीशुक पूछिल, “अगर सही माने तोक इला करवार अधिकार छे, त कोय चमत्कारेर काम करे

देखा।” १९ यीशु उसाक जवाब दिले, “इडा मंदिरोक गिराय दव, मुई तीन दिनोत इडाक फेर बनाय दुम।” २० यहूदी लोकला कोहले, “इडा मंदिरोक बनाते छियालिस साल लागिहिले, आर तुई इडाक तीन दिनोत बनाय दिबो। नी हवा सकेछे।” २१ मगर जैडा मंदिरेर बारे यीशु बोलिल, उडा वहार अपना शरीरेर बारे छिले। २२ वहीलाते मौतेर बाद जैखुना यीशु मुर्दा से जिन्दा हंय उठिल, उखुना वहार चेलालाक ख्याल होल कि वहाँय यहीडा बात बोलिहिले। तब चेलाला पवित्र शास्त्रेर वचनेर पर आर यीशुर कहाल वचनेर पर विश्वास करिल।

यीशु मानुषेर दिलेर बात जाने

२३ फसह परबेर समय यीशु यरूशलेम शहरोत बहुतला चमत्कारेर काम करिल। इला काम देखे बहुत लोक वहार पर विश्वास करिल। २४ मगर यीशु उसार पर भरोसा नी करिल क्यौँकि वहाँय सभारो दिलेर बात जानछिले। २५ मानुषेर बारे जानकारी करवार तने वहाक कोय लोकेर जरूरत नी छे, क्यौँकि वहाँय खुद मानुषेर दिलेर बारे जाने।

यीशु आर निकुदिमुसेर बातचीत

३ फरीसी लोकेर भीतरोत निकुदिमुस नामेर एकझन लोक छिले आर वहाँय यहूदी लोकेर एकटा नेता छिले। २ वहाँय एक दिना रात करे यीशुर लिकिन ओसे वहाक कोहले, “गुरु! हमरा जानी कि तुई गुरु

छिस आर परमेश्वर तोक मानुषेर तने पठाहे। जैला चमत्कारेर काम तुई करछिस, उकिसम चमत्कारेर काम कोय नी करवा पारबे, अगर परमेश्वर वहार साथे ना रहय।” ३ यीशु वहाक जवाब दिले, “मुई तोक सच-सच कोहची, अगर कोय लोक दोबारा जनम ना ले, त वहाँय परमेश्वरेर राज देखवा नी पारबे।” ४ निकुदिमुस यीशुक कोहले, “मानुष बूढ़ा हंय गेले कसे करे जनम लिबे? वहाँय की अपना मार पेटोत दोबारा ढुके जनम लिबे?” ५ यीशु वहाक जवाब दिले, “मुई तोक सच-सच कोहची, जैखुन तक मानुष पानी आर पवित्र आत्मा से जनम नी लिछे, वहाँय परमेश्वरेर राजोत ढुकवा नी पारबे। ६ जहाँय मानुष से जनम लिहे वहाँय मानुष, आर जहाँय पवित्र आत्मा से जनम लिहे, वहाँय आत्मिक लोक छे। ७ मुई जे तोक कोहनु तोक दोबारा जनम लेना जरूरत छे, इडा सुने परेशान ना होयेन। ८ तुई जानिस कि हवा जे भीति जवा चाहचे, वही भीति बोहछे, आर तुई वहार आवाज सुनवा पारछिस, मगर इडा नी जानिस कि हवा कुनठिन से ओसछे आर कुनठिन जाछे। वही मान्दी पवित्र आत्मार जरियाय नया जनम होचे।” ९ निकुदिमुस वहाक जवाब दिले, “इला बात कसे करे हवा सकोछे?” १० इला बात सुने यीशु वहाक जवाब दिले, “तुई इजराएली लोकेर गुरु छिस, तहारो पर तुई इला बातोक बुझवा नी पारछिस। ११ अला मुई जैला बात बोलवा चाहची, उला एकदम सच छे। हमरा तुमसाक उला सबला बात बताछी, जैला

हमरा जानी आर हमरा खुद अपना आँख दे देखिही। मगर तुम्हरा हमसार बातला ग्रहण नी करछेन। १२ मुई तुमसाक सभाको दुनियाँर बात बताछी, मगर तुम्हरा विश्वास नी करछेन। अगर मुई तुमसाक सभाको स्वर्गेर बारे बतायी, त की तुम्हरा विश्वास करभेन? नी करभेन।” १३ “कोय लोक स्वर्ग जाय घुरे नी ओसे, सिरिफ मानुषेर बेटा जहाँय स्वर्गोत रोहचे, वहीं उठिन से धरतीर पर ओसये। १४ जैकिसम मूसा नबी जंगलोत पीतलेर साँप बनाय खंभात लटकाय दिहिले, ठीक वही मान्दी इडा जरूरी छे कि मानुषेर बेटाको क्रुसेर पर लटकाल जाबे १५ जसे कि जहाँय-जहाँय वहार पर विश्वास करबे, वरा हमेशार जिन्दगी पाबे। १६ परमेश्वर दुनियाँर लोकोक अतेक प्रेम करिल कि वहाँय अपना एकलौता बेटाक लोकेर पापेर तने बलिदान हवार तने दे दिले। जहाँय-जहाँय वहार बेटार पर विश्वास करबे, वरा नाश नी होबे, मगर हमेशार जिन्दगी पाबे।” १७ “परमेश्वर अपना बेटाक लोकोक सजई दुवार तने नी पठाय, मगर दुनियाँर लोकोक पापेर माफी आर जिन्दगी दुवार तने पठाहे। १८ जहाँय-जहाँय वहार पर विश्वास करछे, उसार पर कोय सजई नी छे, मगर जहाँय-जहाँय वहार पर विश्वास नी करछे, वरा कसूरबार बने गेल, क्योंकि वरा परमेश्वरेर एकलौता बेटार पर विश्वास नी करिल।” १९ “सजईर कारण इडा छे कि उजाला इडा दुनियाँत ओसिल, मगर लोकला उजालाक पसंद नी करे अन्हारोक पसंद करिल, क्योंकि

उसार कामला खराब छिले। २० जहाँय बुरा काम करछे, वहाँय उजाला से घिण करछे, आर उजालार बगलोत नी ओसछे जसे कि वहार कामलार पर दोष ना लागे। २१ मगर जहाँय सच्चाईर पर चलछे, वहाँय उजालार लिकिन ओसछे, जसे कि उजाला प्रकट करे कि उला काम परमेश्वरेर इच्छा मुताबिक कराल गहे।” २२ यहार बाद यीशु आर वहार चेलाला यहूदिया प्रदेश ओसिल आर उसार साथे रहय वहाँय लोकोक बपतिस्मा दुवा लागिल।

यूहन्ना बपतिस्मादाता यीशुर बड़ाई करछे

२३-२४ उधर यूहनाव शालेम शहरेर बगलोत ऐनोन नामेर जगहोत लोकोक बपतिस्मा दिछिले, क्योंकि उठिन बहुत पानी छिले। यूहन्नाक अभी तक जेलोत देयाल नी जाय, वहीलाते लोकला यूहन्नार लिकिन ओसे बपतिस्मा लिछिले। २५ उठिन यूहन्नार चेलालार आर एकझन यहूदी लोकेर बीचोत शुद्ध हवार बारे बहस होल। २६ वहार बाद यूहन्नार चेलाला यूहन्नाक ओसे बताल, “गुरुजी! जैडा लोक यरदन लदीर उपार तोर साथे छिले, आर जहार बारे तुई बोलिहिलो। देखेक! वहाँय बपतिस्मा दिछे आर सब लोक वहार लिकिन जाछे।” २७ इडा सुने यूहन्ना जवाब दिले, “जैखुन तक परमेश्वर स्वर्ग से कहाको कुछु नी दिछे, उखुन तक वहाँय कुछु नी पाबे। २८ तुम्हरा त खुद मोर उला बातेर गवाह छेन, जैला मुई तुमसाक कोहिनु कि ‘मुई मसीहा नी छी, मगर

मोक मसीहार पहिले पठाल गहे।’ २९ जहार हाथोत कनिया सोंपाल गहे, वहीं दूल्हा छे। दूल्हार दोस्त जहाँय सबखुना दूल्हार साथे-साथे रोहचे, वहाँय दूल्हार बातला से बहुत खुशी मनाछे। ठीक वही मान्दी मुई इडा जाने बहुत खुश छी कि लोक यीशुर लिकिन ओसछे। ३० इडा जरूरी छे कि यीशु बढे आर मुई घटी।” ३१ “वहाँय उपर से ओसिहे आर सभा से बढे छे। जहाँय दुनियाँर छे, वहाँय दुनियाँर बात करछे। मगर यीशु उपर से ओसिहे, वहीलाते सभा से बढे छे। ३२ वहाँय जैला देखिहे आर सुनिहे, वहीलार बारे बताछे, मगर कोय वहार बातलार पर विश्वास नी करछे। ३३ जहाँय वहार बातलार पर विश्वास करछे, वहाँय विश्वास करे साबित करछे कि परमेश्वर जैडा बोलछे, उडा सच छे। ३४ परमेश्वर जहाक पठाहे, वहाँय परमेश्वरेर संवाद दिछे क्योंकि परमेश्वर वहाक अपना आत्मा पुरा-पुरी काम करवार तने दिहे।” ३५ “पिता अपना बेटाक प्रेम करछे, आर वहार हाथोत सब कुछ दे दिहे। ३६ जहाँय बेटार पर विश्वास करछे, वहाँय हमेशार जिन्दगी पाछे। मगर जहाँय बेटाक विश्वास करते इन्कार करछे, वहाँय हमेशार जिन्दगी नी पाबे, बल्के परमेश्वरेर कहार वहार पर पोरबे।”

यीशु जिन्दगीर पानी छे

१-२ फरीसी लोकला सुनिहे कि यीशु यूहन्ना से बेसी चेला बनाछे आर बपतिस्मा दिछे। यीशु आपने बपतिस्मा नी दिछे, मगर वहार चेलाला बपतिस्मा दिछे। ३ इडा खबर पाय यीशु आर वहार चेलाला यहूदिया से गलील प्रदेश जवा लागिल। ४ जवारखुना वहाक सामरिया प्रदेश दे जाना जरूरी छिले ५ वहीलाते वहाँय सामरिया प्रदेशेर सुखार नामेर शहरोत ओसिल। शहरटार बगलोत एकखान जमीन छिले, जैखान जमीन याकूब अपना बेटा यूसुफोक दिहिले। ६ आर यहीखान जमीनोत याकूबेर कुँआडा छिले। रास्ता चलते-चलते यीशु थके गहिल आर कुआँडार बगलोत बोठे गेल। उखुना दिनेर १२ बजे छिले। ७ वहीखुना सामरिया प्रदेशेर एकझन स्त्री पानी भरवार तने कुआँडार लिकिन ओसिल। यीशु वहाक कोहले, “मोक एकखुदी पानी दे।” ८ उखुना वहार चेलाला शहरोत खवार तने कुछु किनवा गहिल। ९ स्त्रीडा वहाक कोहले, “इडा कुन किसम बात छे? तुई एकझन यहूदी लोक छिस आर मुई त एकझन सामरिया प्रदेशेर स्त्री छी। यहूदी लोक हंय क्याँ मोर लिकिन से पानी माँगछिस? (क्याँकि यहूदी लोकला सामरिया प्रदेशेर लोकेर साथे कोय तालुक नी राखछिले)।” १० यीशु स्त्रीडाक जवाब दिले, “तुई यदि परमेश्वरेर दानेर बारे जानलोतन कि के तोर लिकिन पानी खवा माँगछे, त तुई वहार लिकिन से खवार तने पानी माँगलोतन, आर वहाँय

तोक उखान पानी दिलेतन, जैखान पानी मानुषोक जिन्दा राखछे।”

११ स्त्रीडा वहाक कोहले, “गय! तोर लिकिन पानी भरवार तने त बाल्टी नी छे, आर कुआँडाव गहरा छे। फेर तुई जिन्दा रहवार पानी कुन्हियाँ पालो? १२ हमसार पिता याकूब हमसाक इडा कुआँ दिहिले। खुद वहाँय, वहार बेटाला आर वहार माल-जाललाव इडा कुआँर पानी खाछिले। वहा से की तुई बोड़ो छिस?” १३ यीशु वहाक जवाब दिले, “जहाँय-जहाँय इखान पानी खाचे, उसाक आरमने प्यास लागबे। १४ मगर जैखान पानी मुई लोकोक खवार तने दुम, उखान खाले हमेशार तने प्यास खतम हंय जाबे। बल्के मोर देयाल पानीखान कभी खतम नी होबे आर हमेशार जिन्दगी दिबे।” १५ यीशुर बातला सुने स्त्रीडा यीशुक कोहले, “गय! उखान पानी मोक दे जसे कि मोक कभी प्यास नी लागे आर मोक पानी भरवार तने इठिन ओसवा ना होय।” १६ मगर यीशु वहाक कोहले, “जा आर अपना पतिक जाब दे इठिन ले ओसेक।” १७ स्त्रीडा जवाब दिले, “मोर कोय पति नी छे।” यीशु वहाक कोहले, “तुई ठीक कोहलो कि तोर कोय पति नी छे। १८ मगर अब तक तुई पाँचझन लोकोक अपना पति बनाय लिहिस, आर जहार साथे तुई अला रोहछिस, वहाँव तोर पति नी। जैडा बात तुई बोललो, उडा सच छे।” १९ स्त्रीडा वहाक बोलिल, “मोक मालूम होचे कि तुई एकझन नबी छिस। २० हमसार सामरिया प्रदेशेर दादो-परदादोला यहीखान पहाड़ेर पर परमेश्वरेर भक्ति

करछिले। मगर तुम्हरा यहूदी लोकला कोहचेन कि परमेश्वरेर भक्ति करवार जगह यरूशलेम छे।” २१ यीशु स्त्रीडाक कोहले, “हे स्त्री! मोर बातलार पर विश्वास कर। मुई तोक बताछी कि एकटा समय ओसबे, उखुना तुम्हरा पितार भक्ति ना त इखान पहाड़ेर पर आर ना यरूशलेम शहरोत करभेन। २२ तुम्हरा जहाक नी जानेन वहार भक्ति करछेन, मगर हमरा जहाक जानी वहार भक्ति करछिस, क्योंकि यहूदी लोकेर जरियाय पापेर माफी छे। २३ एकटा समय ओसबे, समझे ले कि चले ओसिहे कि परमेश्वरेर सच्चा भक्त छे, पितार भक्ति पवित्र आत्मार शक्ति से आर सच्चा दिल से करबे क्योंकि पिता यही मान्दी भक्तोक छाभछे। २४ परमेश्वर आत्मा छे। वहीलाते वहार भक्त लोकोक वहार भक्ति पवित्र आत्मार शक्ति से आर सच्चा दिल से करना जरूरी छे।” २५ स्त्रीडा यीशुक कोहले, “मुई जानी कि मसीहा ओसनेवाला छे। जैखुना वहाँय ओसबे, हमसाक सबला बात बताय दिबे।” २६ यीशु वहाक कोहले, “मुहें मसीहा छी, जहाँय तोर साथे बात करछे।” २७ वहीखुना वहार चेलाला चले ओसिल आर ताज्जुब करवा लागिल कि गुरुजी एकझन स्त्रीर साथे बात करछे। मगर कोय वहाक नी पूछिल, “तुई वहार लिकिन की चाहचिस या तुई वहार साथे क्याँ बात करछिस?” २८ यहार बाद स्त्रीडा अपना घड़ा राखे शहरोत चले गेल, २९ आर लोकलाक कहवा लागिल, “ओसो। एकझन लोकोक देखो,

जहाँय मोर सबला कामेर बारे बताय दिले, जैला काम मुई करिही। मोक लागछे कि यहीं मसीहा छे।” ३० इडा सुने लोकला शहर से निकले वहार लिकिन ओसवा लागिल। ३१ यहारे भीतरोत चेलाला वहाक बिनती करे कोहले, “गुरूजी! कुछ खाय ले।” ३२ मगर वहाँय चेलालाक कोहले, “मोर लिकिन खवार तने इकिसम खाना छे, जहार बारे तुम्हरा नी जानेन।” ३३ तब चेलाला आपसोत कहवा लागिल, “कोय की वहार तने कुछ खवार जिनिस आनिहे?” ३४ यीशु उसाक कोहले “मोर खाना होचे कि मुई मोर पठानेवालार इच्छा मुताबिक चली आर वहार काम पूरा करी।” ३५ “तुम्हरा त बोलछेन, ‘कटनीर तने चार महीना बाँकी छे?’ मगर मुई तुमसाक कोहची, ‘अपना आँख उठाय फसलार भीति देखो। उला पाके गहे आर कटनीर तने तैयार छे। ३६ जैकिसम काटनेवाला अपना मजदूरी पाछे, ठीक यही मान्दी जैला प्रचारक आत्मिक फलेर मान्दी लोकलाक प्रभुर लिकिन आनछे, वरा हमेशार जिन्दगी पाछे। कटनीर बाद बुननेवाला आर काटनेवाला दोनोंझन मिले खुशी मनाबे। ३७ इडा कहावत सच साबित होचे कि कोय बुनेछे आर कोय काटछे।’ ३८ मुई तुमसाक उखान खेत कटवार तने पठानु, जैखानोत तुम्हरा मेहनत नी करेन। दोसराझन मेहनत करिल आर तुम्हरा उसार मेहनतेर फल भोगछेन।”

सामरी लोकला यीशुर पर विश्वास करछे

३९ उडा शहरेर बहुतला सामरी लोक यीशुर पर विश्वास करिल, क्योंकि स्त्रीडा लोकलाक यीशुर बारे बताहिले, “इडा लोक मोर सबला कामेर बारे बोले दिहे, जैला काम मुई करिही।” ४० उला सामरी जैखुना यीशुर लिकिन ओसिल, वरा बिनती करे कोहले कि हमसार इठिन रोह। वहीलाते वहाँय उठिन दुई दिन रोहोल। ४१ यीशुर वचन सुने आढ़ो बहुतला लोक यीशुर पर विश्वास करिल। ४२ आर लोकला स्त्रीडाक कोहले, “अला हमरा खाली तोहरे बातला से विश्वास नी करछी, मगर हमरा खुद वहार मुख से सुने लिनु आर हमरा जाने लिनु कि यहीं सचमुच दुनियाँर लोकेर मुक्तिदाता छे।” ४३ वहाँय दुई दिन रहवार बाद सामरिया से गलील प्रदेश घुरे चले गेल। ४४ यीशु खुद इडा बात कोहले कि नबी लोक अपना देशोत सम्मान नी पाछे। ४५ जैखुना वहाँय गलील पहुँचिल, उठिनकार लोकला वहाक खुशी-खुशी ग्रहण करिल, क्योंकि वरा यीशुर उला सबला काम देखिले, जैला वहाँय फसह परबेर समय यरूशलेम शहरोत करिहिले। वराव फसह परब मनवार तने यरूशलेम गहिले।

यीशु एकटा हाकिमेर बेटाक अच्छा करछे

४६ यहार बाद यीशु गलील प्रदेशेर काना शहरोत ओसिल, जैठिन वहाँय पानीखानोक अंगुरेर रस बनाहिले। उठिन राजार एकझन हाकिम छिले, जहार बेटा कफरनहूम शहरोत बेमार छिले। ४७ हाकिमडा सुनिल कि यीशु यहूदिया प्रदेश से गलील प्रदेशोत ओसिहे, त वहाँय यीशुर लिकिन गेल, आर बिनती करे कोहले, “तुई कफरनहूम चल आर मोर बेटाक अच्छा करे दे। नी जाबो, त वहाँय मोरे जाबे।” ४८ मगर यीशु वहाक कोहले, “जैखुन तक तुम्हरा मोर जरियाय कोय चमत्कारेर काम नी देखभेन, तुम्हरा कोय हालतोत मोर पर विश्वास नी करभेन।” ४९ हाकिमडा यीशुक कोहले, “हे प्रभु! जल्दी चल, नी त मोर बेटा मोरे जाबे।” ५० यीशु वहाक कोहले, “जा, तोर बेटा अच्छा हंय जाबे।” हाकिमडा यीशुर बातेर पर विश्वास करे चले गेल। ५१ जैखुना वहाँय रास्तात छिले, वहीखुना वहार नौकरला ओसे रास्ताते वहाक खबर दिले, “तोर बेटा अच्छा हंय गहे।” ५२ वहाँय उसाक पूछिल, “कुनखुना वहाँय ठीक होईले?” वरा वहाक बोलिल, “काल दुई पहर एक बजे दिनोत वहाँय ठीक होईले।” ५३ तब हाकिमडाक याद होल कि इडा उडा समय छे, जैखुना यीशु बोलिहिले, “तोर बेटा अच्छा हंय जाबे।” वहार बाद वहाँय आर वहार परिवारेर लोक यीशुर पर विश्वास करिल।

५४ यहूदिया प्रदेश से गलील प्रदेश ओसवार बाद यीशु इडा दोसरा बार चमत्कारेर काम करिल।

अड़तीस सालेर बेमार लोक ठीक होछे

५ इला घटनार बाद यीशु यरूशलेम शहर गेल, क्योंकि उखुना यहूदी लोकेर एकटा परब छिले। २ यरूशलेम शहरोत भेड़-फाटक नामेर एकखान फाटक छिले। यहार बगलोत एकटा तालाब छिले। इब्रानी भाषात इडा तालाबेर नाम बैतसैदा छिले। आर तालाबडार पाँचटा ओसरा छिले आर ओसरालार उपरोत छत देयाल छिले। ३ ओसरालार पर बहुतला बेमार, काना, नेंगरा आर लकवा मराल लोक पोड़े रोहछिले। [वरा तालाबेर पानीखान हिलवार इन्तेजार करछिले] ४ [क्योंकि एकटा खास समय परमेश्वरेर एकझन फरीस्ता तालाबडात नाभछिले, आर पानीखानोक हिलाछिले। पानीखान हिलवार साथे-साथे जहाँय सबसे पहिले पानीखानोत नाभछिले, वहाँय अच्छा हंय जाछिले, चाहे वहार कोय भी बेमारी होक।] ५ उठिन एकझन लोक छिले, जहाँय अड़तीस साल से बेमार पोड़े छिले। ६ यीशु वहाक बेमार देखे आर इडा जाने कि वहाँय बहुत साल से इकिसम हालतोत पोड़े छे, वहाक पूछिल, “तुई की अच्छा हवा चाहचिस?” ७ बेमार लोकटा वहाक जवाब दिले, “बाबू! मोर साथे कोय लोक नी छे। कसे करे मुई सभा से आगुत

पानीखान हिलवारखुना नाभुम। मोर नभवार आगुत कोय दोसरा लोक मोसे पहिले पानीखानोत नाभे जाछे।” ८ यीशु वहाक कोहले, “उठेक, अपना बिछनाखान उठा आर बेरा।” ९ बेमार लोकटा साथे-साथे अच्छा हंय गेल आर अपना बिछनाखान उठाय बेरवा लागिल। १० इडा घटना जे दिना घटिल, उडा दिन यहूदी लोकेर आराम करवार दिन छिले। वहीलाते यहूदी लोकला लोकटाक कोहले, “आज आराम करवार दिन छे आर नियम मुताबिक खाट उठाना मना छे।” ११ मगर वहाँय बोलिल, “जैडा लोक मोक अच्छा करिल, वहीं मोक बिछना उठाय बेरवा कोहले।” १२ वरा वहाक पूछिल, “उडा लोक के छे, जहाँय तोक बिछनाखानोक उठवा आर बेरवा कोहले?” १३ जैडा लोक ठीक हंय गहिले, नी जानछिले कि वहाँय के छिले क्योंकि यीशु उठिन भीड़ से निकले चले गहिले। १४ कुछ देर बाद यीशु लोकटाक मन्दिरोत पाले आर वहाक कोहले, “देखेक! तुई अच्छा हंय गेलो। फेर पाप ना करिस, नीते तोर पर यहा से बेसी मुसीबत ओसवा पारे।” १५ यीशुर बात सुने लोकटा चले गेल आर जाय यहूदी लोकलाक कोहले, “जैडा लोक मोक अच्छा करिल, वहाँय यीशु छे।”

बेटार जरियाय नया जिन्दगी

१६ यीशु आराम करवार दिनोत इला काम करछिले। वहीलाते यहूदी लोकला वहाक सतवा लागिल। १७ मगर यीशु उसाक कोहले, “मोर पिता हरखुना काम करछे, आर मोहो काम करछी।” १८ यीशुर इडा बात सुने यहूदी लोक वहाक मारे फिकवार तने आढ़ोह बेसी कोशिश करवा लागिल, क्याँकि वहाँय ना सिरिफ आराम करवार दिनेर नियम भाँगछिले, बल्के अपना-आपोक परमेश्वरेर बेटा कहय खुद अपना आपोक परमेश्वरेर बराबर मानछिले। १९ यीशु उसाक बोलिल, “मुई तुमसाक सच-सच कोहची, ‘बेटा आपने कुछु नी करछे। वहाँय सिरिफ वहीखान काम करछे, जैखान काम वहाँय अपना पिताक करते देखछे, क्याँकि पिता जे कुछु करछे, बेटाव वहीखान करछे।’ २० पिता अपना बेटाक प्रेम करछे आर जैला काम वहाँय खुद करछे, सबला काम अपना बेटाक देखाछे। हाँ, इला से आढ़ोह बोड़ो काम बेटाक देखाबे जसे कि तुम्हरा ताज्जुब करभेन। २१ जैकिसम पिता मुर्दा लोकोक जिन्दा करछे, वही किसम बेटाव जहाक चाहबे, वहाक जिन्दा करबे। २२ पिता खुद कहारो इन्साफ नी करछे, बल्के इन्साफ करवार पूरा भार बेटाक सोंपे दिहे, २३ जसे कि सब लोक बेटार आदर करे, जैकिसम कि वरा पितार आदर करछे। जहाँय बेटार आदर नी करछे, वहाँय पितार आदर नी करछे, जहाँय अपना बेटाक पठाहे।” २४ मुई तुमसाक सच-सच कोहची,

“जहाँय मोर बातला सुने मोर पठानेवालार पर विश्वास करछे, वहाँय हमेशार जिन्दगी पाछे। वहार पर कोय सजा नी छे। वहाँय आत्मिक रूप से मराल छिले, मगर अला हमेशार तने एकटा नया जिन्दगी पाय गहे।”

२५ मुई तुमसाक सच-सच कोहची, “एकटा समय ओसबे, बल्के उडा समय ओसे गहे। उडा दिनोत मुर्दाला लोक परमेश्वरेर बेतार आवाज सुनबे। सुने वरा जिन्दा हंय उठबे। २६ जैमान्दी पितार लिकिन जिन्दगी दुवार शक्ति छे, वही मान्दी वहाँय बेटाको जिन्दगी दुवार शक्ति दिहे।

२७ आर पिता अपना बेटाक इन्साफ करवारो अधिकार दिहे, क्योंकि वहाँय मानुषेर बेटा छे। २८ इडा बात सुने तुम्हरा ताज्जुब ना करो, क्योंकि समय ओसछे, जैखुना कबरोत गड़ाल मुर्दाला वहार आवाज सुनबे आर कबर से बहार निकले ओसबे। २९ जहाँय-जहाँय अच्छा काम करिहे, वरा जिन्दा हंय उठबे आर हमेशा जिन्दा रोहबे। आर जहाँय-जहाँय बुरा काम करिहे, वरा जिन्दा हंय उठबे आर हमेशार तने सजा काटबे। ३० मुई आपने कुछु नी करछी। मुई जैकिसम मोर पितार लिकिन से सुनछी, वही किसम इन्साफ करछी। वहीलाते मोर इन्साफटा खाँटी छे, क्योंकि मुई अपना-आपोक खुश करवार कोशिश नी करछी, बल्के जहाँय मोक पठाहे, वहाक खुश करवार कोशिश करछी।” ३१ “अगर मुई अपना बारे तुमसाक बोली, तुम्हरा मोर बातला

सच नी मानभेन। ३२ मगर एकझन छे, जहाँय मोर बारे बोलछे आर मुई जानी कि मोर बारे वहाँय सच-सच बोलछे।”

यीशुर बारे गवाही

३३ “तुम्हरा यूहन्नार लिकिन पूछवा पठाहिलेन, आर यूहन्ना मोर बारे तुमसाक सच-सच बताल। ३४ मोक मानुषेर कोय जरूरी नी छे कि मानुष मोर बारे लोकोक बताय। मगर मुई तुमसाक यूहन्नार बातलाक बोलछी कि तुम्हरा पाप से मुक्ति पायन। ३५ यूहन्ना एकटा चराकेर मान्दी छिले, जहाँय जलछिले आर रोशनी दिछिले। कुछु दिन तक तुम्हरा वहार रोशनीत खोब खुशी मनालेन।” ३६ “मोर कामला यूहन्नार गवाही से बढे मोर बारे बताछे क्याँकि जैला काम मुई करछी, उला से साबित होचे कि पिता मोक पठाहे। आर उला कामोक पूरा करना जरूरी छे। ३७ आर पिता जहाँय मोक पठाहे, खुद वहाँय मोर बारे बताछे। तुम्हरा ना त वहार बोलीडा सुनिहेन आर ना वहाक देखिहेन कि वहाँय कुन किसम छे, ३८ आर ना तुमसार भीतरोत वहार वचन छे, क्याँकि पिता जैडा मानुषोक पठाहे, तुम्हरा वहार पर विश्वास नी करछेन। ३९ तुम्हरा परमेश्वरेर शास्त्रोत हमेशार जिन्दगी छाभछेन, मगर शास्त्र बताछे कि मोर जरियाय लोक हमेशार जिन्दगी पाबे। ४० तहारो पर तुम्हरा उडार तने मोर लिकिन ओसवा नी चाहचेन।” ४१ “मुई नी चाहची कि लोक मोर बड़ाई करे। ४२ आर मुई तुमसार दिलडा जानी कि तुम्हरा

परमेश्वरोक प्रेम नी करछेन। ४३ पिता अपना अधिकार दे मोक पठाहे, मगर तुम्हरा मोक ग्रहण नी करछेन। अगर कोय अपना नामे ओसछे, त तुम्हरा वहाक ग्रहण करछेन। ४४ तुम्हरा कोय पाके मोर बातलार पर विश्वास नी करभेन क्योंकि तुम्हरा एक-दोसराझनार बड़ाई करछेन, मगर सिरिफ परमेश्वरेर लिकिन से बड़ाई नी चाहचेन। ४५ तुम्हरा इडा ना सोचेन कि मुई पितार आगुत तुमसाक दोषी ठहराम। मगर तुमसार दोषी ठहरानेवाला मूसा छे, जहार पर तुम्हरा विश्वास करछेन।” ४६ “अगर तुम्हरा मूसार पर विश्वास करिहिलेन, त मोहरो पर विश्वास करलेनतेन, क्योंकि वहाँय मोर बारे लिखिहे। ४७ मगर जब तुम्हरा वहार लिखाल बातलाक विश्वास नी करछेन, त मुई जैला बात कोहची, कसे करे तुम्हरा उला विश्वास करभेन?”

यीशु पाँच हजार लोकोक खिलाछे

(मत्ती १४:१३-२१; मरकुस ६:३०-४४; लूका ९:१०-१७)

६ यहार बाद यीशु गलील समुन्द्र पार करिल, जैडाक तिबिरियास समुन्द्र कहाल जाछे। २ लोकेर बहुत बोड़ो भीड़ वहार पीछू-पीछू जाछिले क्योंकि लोकला वहार चमत्कारेर काम देखिहिले, जैला काम वहाँय बेमार लोकेर तने करछिले। ३ आर यीशु अपना चेलालार साथे जाय एकखान पहाड़ेर पर बोठे गेल। ४ यहूदी लोकेर फसह परब ओसनेवाला छिले। ५ यीशु अपना माथा उठाय देखिल कि लोकेर एकटा बोड़ो भीड़

वहार भीति ओसछे, त वहाँय फिलिपोक कोहले, “इसार खवार तने हमरा खाना कुनठिन से किने आनमु?” ६ यीशु इडा बात फिलिपोक जाँच करवार तने कोहले क्यौँकि यीशु खुद जानछिले कि वहाँय की करबे? ७ फिलिप वहाक जवाब दिले, “दुई सौ चानीर सिक्का दे रूटी किनले आर थोड़ेक-थोड़ेक सभाको दिलेव पूरा नी होबे।” ८ अन्द्रियास नामेर यीशुर एकझन चेला छिले आर वहाँय शिमोन पतरसेर भई छिले। अन्द्रियास यीशुक कोहले, ९ “इठिन एकटा छोटो लड़का छे। वहार लिकिन जौर पाँचटा रूटी आर दुईडा माछ छे, मगर अतेला लोकेर तने इला की होबे?” १० यीशु कोहले, “लोकलाक बठाय दव।” उठिन बहुत घास छिले। वरा सबकोय घासेर पर बोठे गेल। लोकलार बीचोत पुरुष लोक लगभग पाँच हजार छिले। ११ वहार बाद यीशु रूटीलाक लिले आर परमेश्वरेर शुकुरिया करे रूटीलाक चेलालार हाथोत दिले आर चेलाला सबला लोकेर बीचोत बाँटे दिले, आर वही किसम माछलाको बाँटे दिले, जहाँय जत्तेक खवा चाहले। १२ लोकला भरपेट खाले। वहार बाद यीशु अपना चेलालाक कोहले, “रूटीर जैला टुकड़ा बचे गेल, उलाक जोड़ो करे लव, जसे कि कुछु बर्बाद नी हंय।” १३ लोकला पेट भरे खाले। तहारो पर खवार बादो चेलाला पाँचटा रूटी से बारह टोकड़ी रूटीर टुकड़ा जोड़ो करिल। १४ यीशुर चमत्कारेर काम देखवार बाद लोकला बोलवा लागिल, “सचमुच यहाँय परमेश्वरेर उडा नबी छे, जहाँय

दुनियाँत ओसनेवाला छिले।” १५ यीशु इडा बात जाने कि लोकला वहाक जबरदस्ती राजा बनवा चाहचे, त वहाँय आखले उठिन से एकखान पहाड़ेर पर चले गेल।

यीशु पानीर पर बेराछे

(मत्ती १४:२२-३३; मरकुस ६:४५-५२)

१६ जैखुना बेलाडा डुबे गेल, वहार चेलाला गलील समुन्द्रेर कछारोत गेल
१७ आर नावत चढ़े कफरनहूम जवार तने गलील समुन्द्र पार करछिल।
उखुना अन्हार हंय गहिले आर यीशु चेलालार लिकिन नी पहुँचे।
१८ वहीखुना दून चले ओसिल आर समुन्द्रेर दूयो उठवा लागिल।
१९ नावखान खेपते-खेपते जैखुना वरा तीन-चार मील दूरोत चले गेल,
वरा यीशुक समुन्द्रटार पर चलते आर नावखानेर बगलोत ओसते देखिल
आर डोराय गेल। २० मगर वहाँय चेलालाक कोहले, “मुई छी, तुम्हरा ना
डोराव।” २१ चेलाला यीशुक नावखानेर पर चढ़ाय लिले, आर नावखान
जल्दी से उठिन पहुँचिल, जैठिन वरा जाछिले।

लोकला यीशुक छाभछे

२२ दोसरा दिन भीड़ेर लोकला जैला समुन्द्रटार दोसराडा कछारोत थाड़ी
हंय छिले, वरा सिरिफ एकखान नाव देखिले। उखान नावत यीशु नी
बोठिले, खाली वहार चेलाला बोठे चले गहिले। २३ वहार बाद

तिबिरियास नगर से कुछ दोसराला नाव उखान जगहोत ओसिल,
जैठिन प्रभु यीशु परमेश्वरोक रूटीर तने धन्यवाद दिहिले आर लोकला
रूटी खाहिले। २४ जैखुना भीड़ेर लोकला देखिल कि ना त यीशु छे आर
ना वहार चेलालाय उठिन छे, त वरा नावलार पर चढ़े यीशुक छाभते-
छाभते समुन्द्रेर उ-पार कफरनहूम पहुँचे गेल।

यीशु नया जिन्दगी दिछे

२५ उठिन वरा यीशुक पाले आर पूछिल, “गुरुजी! तुई इठिन कोद
ओसलो?” २६ यीशु उसाक जवाब दिले, “मुई तुमसाक सच-सच
कोहची, ‘तुम्हरा मोक मोर चमत्कारेर काम देखे नी छाभछेन, बल्के
छाभछेन क्योंकि तुम्हरा रूटी खाय भोख मेटाहिलेन।’ २७ मुई तुमसाक
कोहची, जैला खाना नाश हंय जाबे, उला खानार तने मेहनत ना करो,
बल्के उला खानार तने मेहनत करो, जैला खाना सब दिनकार तने
रोहबे। इडा खाना मानुषेर बेटा तुमसाक दिबे क्योंकि पिता वहाके चुने
लिहे।” २८ तब वरा यीशुक पूछिल, “परमेश्वर हमसाक की करवा
कोहचे?” २९ यीशु उसाक जवाब दिले, “परमेश्वर चाहचे कि तुम्हरा
वहार पर विश्वास करो, जहाक परमेश्वर पठाहे।” ३० तब वरा यीशुक
पूछिल, “तुई कुन चिन्ह देखाबो जसे कि उडा देखे हमरा तोर पर
विश्वास करी? तुई कुनखान काम करे देखाबो? ३१ हमसार बाप-
दादोला सुनसान जगहोत मन्ना खाहिले, जैकिसम कि शास्त्रोत

लिखाल छे, वहाँय उसाक स्वर्ग से खवार तने रूटी दिले।” ३२ यीशु उसाक कोहले, “मुई तुमसाक सच-सच कोहची कि मूसा तुमसाक उडा रूटी स्वर्ग से नी पठाय, मगर मोर पिता सच्चा रूटी स्वर्ग से तुमसाक दिबे। ३३ परमेश्वरेर रूटी वहाँय छे, जहाँय स्वर्ग से ओसिहे आर दुनियाँर लोकोक जिन्दगी दिछे।” ३४ वरा कोहले, “गुरुजी! अला से हमसाक इडा रूटी दिते रोह।” ३५ यीशु उसाक कोहले, “मुई उडा रूटी छी, जैडा मानुषोक जिन्दगी दिछे। जहाँय मोर लिकिन ओसछे, वहाक कोयखुना भोख नी लागबे। आर जहाँय मोर पर विश्वास करबे, वहाक कभी प्यास नी लागबे।” ३६ मुई तुमसाक कोहिनु कि तुम्हरा मोक देखिहिलेन, मगर विश्वास नी करछेन। ३७ पिता जैला लोकोक मोर हाथोत दिछे, वरा सबकोय मोर लिकिन ओसबे। आर जहाँय मोर लिकिन ओसबे, मुई वहाक संभालाय राखमु ३८ क्यौँकि मुई अपना इच्छा पूरा करवार तने नी, बल्के अपना पठानेवालार इच्छा पूरा करवार तने स्वर्ग से ओसिही। ३९ आर जहाँय मोक पठाहे, वहार इडा इच्छा छे कि वहाँय जतेला लोकोक मोर हाथोत सोंपे दिहे, उसाक मुई संभलाय राखी आर आखरी दिनोत फेर जिन्दा करे उठाई। ४० मोर पितार इच्छा छे कि जहाँय वहार बेटाक देखबे आर वहार पर विश्वास करबे, वरा हमेशार जिन्दगी पाबे, आर आखरी दिनोत मुई वहाक जिन्दा करे उठामु। ४१ इला बात सुने यहूदी लोकला यीशुर खिलाफ बोलवा लागिल क्यौँकि वहाँय कोहले,

“जे रूटी स्वर्ग से नाभिये, उडा मुई छी।” ४२ वरा कोहले, “यहाँय त यूसुफेर बेटा यीशु छे, जहार माँ-बाफोक हमरा जानी। वहाँय इडा कसे कोहचे कि मुई स्वर्ग से ओसिही।” ४३ यीशु उसाक जवाब दिले, “तुम्हरा अपना बीचोत मोर खिलाफ क्याँ बोलछेन? ४४ मोर पिता मोक पठाहे। कोय लोक मोर लिकिन ओसवा नी पारबे, मगर वहीं ओसबे, जहाक पिता मोर लिकिन आनछे। आखरी दिनोत मुई वहाक जिन्दा करे उठामु। ४५ नबीलार किताबोत लिखाल छे कि ‘परमेश्वर उसाक सभाको सिखाहे।’ आर वहीलाते मुई तुमसाक कोहची, जहाँय पितार लिकिन से सुनिहे आर सीखिहे, वहाँय मोर लिकिन ओसबे। ४६ कोय लोक पिताक नी देखे, मगर जहाँय परमेश्वरेर लिकिन से ओसिहे, सिरिफ वहीं पिताक देखिहे। ४७ मुई तुमसाक सच-सच कोहची, जहाँय मोर पर विश्वास करछे, वहाँय हमेशार तने परमेश्वरेर साथे रोहबे। ४८ मुई उडा रूटी छी, जैडा मानुषोक हमेशार जिन्दगी दिछे। ४९ तुमसार बाप-दादोला सुनसान जगहोत मन्ना खाहिले, मगर तहारो पर वरा मोरे गेल। ५० इडा वहीडा रूटी छे, जैडा स्वर्ग से ओसिहे जसे कि लोक उडा रूटी खाय आर नी मोरे। ५१ मुई उडा रूटी छी, जैडा मानुषोक जिन्दा राखछे, उडा स्वर्ग से ओसिहे। अगर कोय लोक इडा रूटी खाचे, त वहाँय हमेशार तने जिन्दा रोहबे। इडा रूटी मोर बदनडा छे, जैडा मुई दुनियाँर लोकेर तने बलिदान हवार तने दे दुम।” ५२ इला सुने यहूदी लोकला गुस्सा हंय

अपना बीचोत बहस करवा लागिल, “कसे करे इडा लोक अपना बदनडा हमसाक खवार तने दिबे?” ५३ यीशु उसाक कोहले, “मुई तुमसाक सच-सच कोहची, जैखुन तक तुम्हरा मानुषेर बेटार बदनेर मांस नी खाभेन, आर वहार बदनेर खून नी खाभेन, उखुन तक तुम्हरा हमेशार जिन्दगी नी पाभेन। ५४ जहाँय मोर मांस आर खून खाचे, वहीं हमेशार जिन्दगी पाछे, आर आखरी दिनोत मुई वहाक जिन्दा करे उठामु। ५५ मोर मांस आर खून सचमुच खवार चीज छे। ५६ जहाँय मोर मांस आर खून खाचे, वहाँय मोर साथे मिले रोहचे आर मुई वहार साथे मिले रोहछी। ५७ मोर पिता जहाँय हमेशा जिन्दा छे, वहाँय मोक पठाहे। जैमान्दी पितार कारण मुई जिन्दा छी, ठीक वही मान्दी जहाँय मोर मांस खाचे, मोर कारण से जिन्दा रोहबे। ५८ इडा रूटी स्वर्ग से ओसिहे। तुमसार बाप-दादोला सुनसान जगहोत मन्ना खाले आर मोरे गेल, मगर जहाँय इडा रूटी खाचे, वहाँय हमेशार तने जिन्दा रोहबे।” ५९ यीशु इला बात कफरनहूम शहरेर प्रार्थना-घरोत बोलिल, जैखुना वहाँय लोकोक सीखाछिले।

यीशुर बहुतला चेला यीशुक छोड़े दिछे

६० यीशुर इला बात सुने वहार बहुतला चेला कोहले, “इडा बहुत कठिन शिक्षा छे। के इडाक ग्रहण करबे?” ६१ चेलाला इडा बात ले अपना बीचोत बहस करवा लागिल। यीशु इडा जाने कि चेलाला इडा बात ले

बहस करछे, त वहाँय उसाक पूछिल, “इडा बात से की तुम्हरा मोर पर विश्वास करवा छोड़े दिभेन? ६२ जैखुना तुम्हरा मानुषेर बेटाक वहार पहिलाखान जगहोत उठते देखभेन, जैठिन वहाँय पहिले छिले, उखुना की करभेन?” ६३ “आत्मा जिन्दगी दिछे। मानुष अपना शक्ति से कुछु नी करवा पारबे। मुई जैला बात तुमसाक बोलनु, उला तुमसार तने आत्मा आर जिन्दगी छे। ६४-६५ तुमसार बीचोत कुछु लोक छे, जैला मोर पर विश्वास नी करछे। यहीडा कारण से मुई तुमसाक कोहनु कि कोय लोक मोर लिकिन ओसवा नी पारबे, मगर वहीं ओसबे, जहाक पिता मोर लिकिन आनछे।” यीशु पहिले से इडा जानछिले कि के-के वहार पर विश्वास नी करबे आर के वहाक धोखा दे धराय दिबे। ६६ इला सुनवार बाद वहार बहुतला चेलाला घुरे चले गेल आर वहार साथे नी गेल। ६७ यहार बाद यीशु अपना बारहझन चेलाक पूछिल, “तुम्हराव की मोक छोड़े चले जवा चाहचेन?” ६८ शिमोन पतरस वहाक जवाब दिले, “प्रभु हमरा कहार लिकिन जामु? जैला वचन हमेशार जिन्दगी दिछे, उला त तोहरे लिकिन छे। ६९ हमरा विश्वास करछी आर जानी कि परमेश्वर जैडा पवित्र लोकोक पठाहे, उडा तुहें छिस।” ७० इडा सुने यीशु जवाब दिले, “मुई तुमसाक बारहझनाक चुने अपना चेला बनाही, मगर तुमसार भीतर से एकझन शैतान छे।” ७१ वहाँय इडा बात शिमोन

इस्क्रियोतीर बेटा यहूदार बारे बोलिल क्यौंकि बारहझन चेलार अन्दरोत वहीं छिले, जहाँय यीशुक धोखा दे धरानेवाला छिले।

यीशु यरूशलेम शहरोत उपदेश दिछे

७ वहार बाद यीशु गलील प्रदेशेर गाँवलात आर शहरलात घुरते-फिरते रोहोल। वहाँय यहूदिया प्रदेशोत घुमा-फिरा करवा नी चाहले क्यौंकि यहूदी लोक वहाक जान से मारे फिकवार कोशिशोत छिले। २ यहूदी लोकेर झोपड़ीर परब बगलोत छिले। ३ वहार भईला वहाक कोहले “तोक इठिन से यहूदिया प्रदेश चले जाना उचित छे, जसे कि तोर चेलाला तोर उला चमत्कारेर काम देखे, जैला चमत्कारेर काम तुई करछिस।” ४ इकिसम कोय लोक नी छे जहाँय लोकेर आगुत बोड़ो हवा चाहचे, मगर अपना कामेर बारे सब लोकोक मालूम हवा नी दिछे। तुई जैला चमत्कारेर काम करछिस, उला सबला कामोक सब लोकेर आगुत करे दखा। ५ वहार भईला इला बात यीशुक बोलिल क्यौंकि खुद वरा वहार पर विश्वास नी करछिले। ६ यहार बाद यीशु उसाक कोहले “मोर समय अभी तक नी ओसे, मगर तुमसार तने सबखुना ठीक छे।” ७ दुनियाँर लोक तुमसाक नफरत नी करबे, मगर मोसे नफरत करछे, क्यौंकि मुई दुनियाँर लोकेर बारे बताछी कि उसार काम खराब छे। ८ तुम्हरा परब मनवार तने यरूशलेम शहर जाव, मुई तुमसार साथे नी

जाम क्याँकि मोर समय अभी तक नी ओसे। ९ इला बात कहवार बाद, यीशु गलील प्रदेशोत रोहय गेल। १० जैखुना वहार भईला परब मनवार तने यरूशलेम शहर चले गेल, त वहाँय लोकोक देखाय नी बल्के चुपके से परब मनवार तने यरूशलेम शहर गेल। ११ यहूदी लोकला परबडात वहाक छभवा लागिल आर पूछवा लागिल, “यीशु कुन्हियाँ छे?” १२ भीड़ेर लोकला यीशुर बारे आपसोत कम आवाजोत बोलवा लागिल। कोय-कोय बोलिल “वहाय एकइन अच्छा लोक छे।” मगर कुछु लोक कहवा लागिल, “नी। वहाँय लोकलाक भटकाछे।” १३ मगर यहूदी लोकेर डोरे कोय लोक वहार बारे नी बोलिल। १४ परबेर आधा-आधी समय खतम हंय जवार बाद, यीशु मन्दिरोत गेल, आर उपदेश दुवा लागिल। १५ इला देखे यहूदी लोकला ताजूबोत पोड़े गेल, आर कहवा लागिल “इडा लोक बिना पढ़ा-लिखा कसे करे अतेक ज्ञान पाले।” १६ यीशु जवाब दिले, “मोर शिक्षा मोर अपना नी छे, इडा शिक्षा मोर पठानेवालार तरफ से छे। १७ अगर कोय लोक मोर पठानेवालार इच्छा मुताबिक चलवा चाहचे त वहाँय इडा जानछे कि इडा शिक्षा परमेश्वरेर तरफ से छे, ना कि मोर तरफ से छे। १८ जहाँय खुद अपना बारे बोलछे, वहाँय अपना मान-सम्मान चाहचे, मगर जहाँय इडा चाहचे कि लोक वहार पठानेवालार बड़ाई करे, त वहाँय सच्चा लोक छे आर वहार दिलोत कोय छल-कपट नी छे। १९ मूसा नबी तुमसाक नियम-कानून

दिहे। मगर तुमसार भीतर से एकोझन नियम पालन नी करछेन। तुम्हरा क्याँ मोक मारे फिकवा चाहचेन?” २० भीड़ेर लोकला जवाब दिले “तोक भूत धरिहे। के तोक मारे फेकवार कोशिश करछे छे?” २१ यीशु उसाक कोहले, “मुई एकटा चमत्कारेर काम करनु आर तुम्हरा ताजूबोत पोड़े गेलेन। २२ मूसा तुमसाक सुन्नत करवार नियम दिहे, मगर सच बात छे कि इडा नियम मूसार नी छिले, बल्के तुमसार बाप-दादोलार तरफ से ओसिहिले। तुम्हरा लड़कालार सुन्नत आरामेर दिनोत करछेन। २३ अला बताव अगर मूसार नियम पालन करवार तने तुम्हरा आरामेर दिनोत लड़कालार सुन्नत करवा परेन, त एकटा लोकोक आरामेर दिनोत अच्छा करे देयाल गेल, तुम्हरा मोर पर क्याँ गोस्सा करछेन? २४ कहारो मुखखान देखे बिचार ना करो, बल्के सही-सही बिचार करो।” २५ यहार बाद यरूशलेम शहरेर लोकला बोलवा लागिल, “यहाँय की वहीडा लोक नी छे, जहाक लोकला मारे फिकवार कोशिश करछे? २६ आर देखो, वहाँय खुल्लम-खुल्ला बात करछे आर लोकला वहाक एकटा बातो नी कोहचे। हमसाक इकिसम लागछे कि हमसार नेताला वहाक मसीहा चिन्हें लिहे। २७ मगर हमरा जानी कि यहाँय कुनठिन से ओसिहे? जैखुना मसीहा ओसबे कोय नी जनवा पारबे, कि वहाँय कुनठिन से ओसबे।” २८ मन्दिरेर आँगनाखानोत प्रचार करवारखुना यीशु गोग दे बोलिल, “हाँ, तुम्हरा मोक जानेन आर यहोडा जानेन कि

मुई कुनठिनकार छी। आर मुई आपने नी ओसिही। मगर जहाँय मोक पठाहे, वहाँय सच्चा छे। तुम्हरा वहाक नी जानेन। २९ मगर मुई वहाक जानी, क्याँकि मुई वहार लिकिन से ओसिही, आर वहाँय मोक पठाहे।” ३० यहीडा बातोत लोकला वहाक धरवार कोशिश करिल, मगर कोय वहार पर हाथ नी लगाले, क्याँकि वहार तने सही समय उखुन तक नी ओसे। ३१ मगर भीड़ेर भीतर से बहुतझन लोक वहार पर विश्वास करिल। वरा कोहले, “जैखुना मसीहा ओसबे, वहाँय की इडा लोक से बेसी चमत्कारेर काम करबे?” ३२ फरीसीला यीशुर बारे भीड़ेर लोकलाक चुपके-चुपके बोलते सुनिल। वहीलाते मुख्य पूजारीला आर फरीसीला यीशुक बान्हे अनवार तने मन्दिरेर कुछुला सिपाहीक पठाय दिले। ३३ यहार बाद यीशु कोहले, “मुई बहुत कम समय तुमसार साथे छी, आर यहार बाद मुई वहार लिकिन जामु, जहाँय मोक पठाहे। ३४ तुम्हरा मोक छाबभेन, मगर मोक नी पाभेन, क्याँकि जैठिन मुई रोहमु, तुम्हरा उठिन जवा नी पारभेन।” ३५ यहार बाद फरीसी लोकला अपना बीचोत बोलवा लागिल, “यहाँय कुनठिन जाबे कि हमरा वहाक छाभे निकलुवा नी पारमु? शायद यहाँय गैर-यहूदी लोकेर बीचोत जाछे, जैठिन हमसार यहूदी लोकला तितर-बितर हंय रोहचे आर गैर-यहूदी लोकलार लिकिन प्रचार करबे?” ३६ तुम्हरा मोक छाबभेन, मगर नी पाभेन आर मुई जैठिन जाछी, तुम्हरा उठिन ओसवा नी पारभेन, इला

बातेर की मतलब छे? ३७ झोपड़ी परबेर आखरी दिनोत यीशु थाड़ी होल आर गोग दे कोहले, “अगर कहाको प्यास लागिहे, त मोर लिकिन ओसोक, मुई वहाक खवार तने पानी दुम। ३८ जहाँय मोर पर विश्वास करछे, वहार भीतर से जीवन देनेवाला पानीर नदी बहबे, जैकिसम कि परमेश्वरेर शास्त्रोत लिखाल छे।” ३९ यीशु पवित्र आत्मार बारे बोलिहिले कि जैला लोक वहार पर विश्वास करछे, वरा पवित्र आत्मा पाबे। आर पवित्र आत्मा उसाक देयाल नी जाय क्योंकि उखुन तक यीशु स्वर्ग नी जाय। ४० यीशुर बातला सुनवार बाद कुछुला लोक कोहले, “सचमुच इडा लोक वहीडा नबी छे, जहार बारे मूसा नबी बोलिहिले।” ४१ दोसराला लोक कोहले, “यहीं मसीहा छे।” कुछुला लोक कोहले, “मसीहा कसे करे गलील से ओसवा पाड़े? इडा कीहवा पाड़े? ४२ शास्त्र कोहचे कि मसीहा दाऊदेर घराना से आर बैतलेहम शहर से ओसबे, जैडा शहरोत दाऊद रोहछिले।” ४३ इकिसम करे लोकलार भीतरोत वहार बारे मतभेद हंय गेल। ४४ कुछुला लोक यीशुक धरवा चाहचिले, मगर कोय लोक वहार पर हाथ नी लगाल।

यहूदी लोकेर अविश्वास

४५ जैला सिपाहीक पठाल गहिले वरा मुख्य पूजारीलार आर फरीसीलार लिकिन घुरे ओसिल। वरा सिपाहीलाक पूछिल, “तुम्हरा वहाक पकड़े क्याँनि आनलेन?” ४६ सिपाहीला जवाब दिले, “हमरा कभी कोय

लोकोक इडा लोकेर मान्दी बोलते नी देखी।” ४७ इला सुने फरीसीला सिपाहीलाक कोहले, “तुम्हराव की ठगाल गहेन? ४८ नेतालार आर फरीसीलार भीतर से कोय त वहार पर विश्वास नी करे। ४९ मगर भीड़ेर इला लोक जैला मूसार नियम-कानून नी जाने, आर वहार पीछू-पीछू चलछे, उसार पर परमेश्वरेर श्राप छे।” ५० निकोदिमुस जहाँय यीशुर लिकिन एक बार आगुते गहिले, वहाँय इला फरीसीर भीतर से एकझन छिले। ५१ वहाँय कोहले, “हमसार नियम-कानूनोत मुताबिक जब तक कोय लोकेर बात वहार मुख से सुने लिया ल नी जाछे कि वहाँय की करिहे, तब तक वहाक दोषी ठहराल नी जाछे?” ५२ फरीसीला निकोदिमुसोक जवाब दिले, “तोहों की गलीलेर लोक छिस? शास्त्रोत छाभे देखेक, गलील से कोय नबीर जनम हवार बात छे की? नी छे।” ५३ [यहार बाद सबकोय अपना-अपनी घर चले गेल।

व्यभिचारी स्त्री

८ यहार बाद यीशु जैतून नामेर एकखान पहाड़ेर पर चले गेल। १ दोसरा दिन बेहाने वहाँय उठे मंदिरोत चले गेल। उठिन सब लोक वहार चारो भीति जोड़ो हंय गेल, आर वहाँय बोठे उसाक उपदेश दुवा लागिल। ३ तब शास्त्रेर कुछुला ज्ञानी आर फरीसी दलेर कुछुला लोक एकझन स्त्री लोकोक धरे यीशुर लिकिन आनिल, जहाक कुकरम करते धराल

गहिले, आर वहाक भीड़ेर आगुत थाड़ो करे दिले। ४ आर वरा यीशुक कोहले, “गुरुजी! इडा स्त्री लोकोक कुकरम करते धराल गहे। ५ हमसार मूसार नबीर नियम-कानून मुताबिक इकिसम स्त्रीक पत्थल मरवार हुकूम छे, अला बता तुई की कोहचिस?” ६ वरा यीशुक जाँच करवार तने इडा सवाल पूछिल जसे कि वहार पर दोष लगवार तने कोय कारण मिले। मगर यीशु माथा नीचान करे माटीखानोत अपना आँगुलडा दे लिखवा लागिल। ७ जैखुना वरा वहाक पूछते रोहोल, यीशु थाड़ो हंय उसाक कोहले, “तुमसार बीचोत जहाँय पाप नी करे, वहीं पहिला पत्थल मारोक।” ८ आर यीशु फेर माथा नीचान करे आँगुल दे माटीर पर लगातार लिखते रोहोल। ९ वरा इडा बात सुने बोड़ो से छोटो तक एक-एक करे उठिन से चले गेल। आर यीशु आखले उठिन रहेंय गेल आर उडा स्त्रीयो वहार सामनात थाड़ो हंय रोहोल। १० यीशु थाड़ो होल आर स्त्रीडाक कोहले, “वरा कुन्हियाँ गेल? की कोय तोर पर दोष नी लगाल?” ११ स्त्रीडा कोहले, “प्रभु! कोय नी दोष लगाल।” यीशु बोलिल, “मोहो तोर दोष नी लगाछी। जा आर पाप ना करिस।”]

यीशु अपना बारे बोलछे

१२ वहार बाद यीशु लोकलाक कोहले, “दुनियाँर रोशनी मुई छी। जहाँय मोर पीछू हंय लिहे, वरा आर अन्हारोत नी चलबे, मगर नया जिन्दगीर रोशनी पाछे।” १३ फरीसीला वहाक कोहले, “तुई अपना बारे खुद

बोलछिस। वहीलाते तोर बातला सच नी छे।” १४ यीशु उसाक जवाब दिले, “मुई यदि अपना बारे खुद बोलछी, तहातो मोर बातला सच छे क्योंकि मुई जानी कि मुई कुन्हियाँ से ओसिही आर कुन्हियाँ जाछी, मगर तुम्हरा नी जानेन कि मुई कुन्हियाँ से ओसिही आर कुन्हियाँ जाछी?” १५ “तुम्हरा दुनियाँर रीति मुताबिक लोकेर इन्साफ करछेन, मगर मुई कहारो इन्साफ नी करछी। १६ मुई अगर इन्साफ करी, त मोर इन्साफ सही छे क्योंकि मुई अकेला नी छी। मोर साथे मोर पिता छे, जहाँय मोक पठाहे। १७ तुमसार नियमोत लिखाल छे दुईझन लोक अगर एके किसम गवाही दे, त उडा सच होचे। १८ मुई अपना गवाही खुद दिछी। आर मोर पिता छे, जहाँय मोक पठाहे, वहाँय मोर बारे गवाही दिछे।” १९ वरा यीशुक पूछिल, “तोर पिता कुन्हियाँ छे?” यीशु जवाब दिले, “ना त तुम्हरा मोक जानछेन, आर ना मोर पिताक जानछेन। तुम्हरा अगर मोक जानलेनतेन, त मोर पिताको जानलेनतेन।” २० इला सबला बात वहाँय मंदिरोत उपदेश दुवारखुना दान पेटीडार लिकिन बोलिल। मगर वहाक कोय नी पकड़िल, क्योंकि उखुन तक वहार समय नी ओसे।

यीशु स्वर्ग वापस चले जाबे

२१ यीशु उसाक बोलिल, “मुई जाछी आर तुम्हरा मोक छाबभेन। तुम्हरा अपना पापोत मोरभेन। जैठिन मुई जाछी, तुम्हरा उठिन ओसवा नी पारभेन।” २२ इला बात सुने यहूदी लोकला बोलिल, “वहाँय की मोरवा जाछे? वहाँय बोलछे कि मुई जैठिन जाछी, उठिन तुम्हरा ओसवा नी पारभेन।” २३ यीशु उसाक जवाब दिले, “तुम्हरा दुनियाँर छेन, मगर मोर घर स्वर्गोत छे। तुम्हरा इडा दुनियाँर छेन, मगर मुई दुनियाँर नी छी। २४ मुई तुमसाक कोहनु कि तुम्हरा अपना पापोत मोरभेन। अगर तुम्हरा विश्वास नी करभेन कि मुई वहीं छी, त तुम्हरा अपना पापोत मोरभेन।” २५ वरा वहाक पूछिल, “तुई के छिस?” यीशु उसाक जवाब दिले, “मुई वहाँय छी, जहार बारे मुई तुमसाक शुरू से कोहते ओसछी। २६ मोर लिकिन तुमसार बारे बोलवार तने आर इन्साफ करवार तने बहुत कुछ छे। मगर मुई उला बात नी बोलछी। आर मुई जैला बात अपना पठानेवालार लिकिन सुनिही, वहीलाय बात बोलछी। आर वहार बातला सच छे।” २७ वरा इडा समझवा नी पारिल कि वहाँय पितार बारे बोलछे। २८ यीशु बोलिल, “जैखुना तुम्हरा मानुषेर बेटाक उपरोत लटकाय दिभेन, उखुना समझिभेन कि मुई वहीं छी। मुई अपना अधिकार से कुछ नी बोलछी, मगर वहीला बोलछी जैला पिता मोक सिखायेह। २९ जहाँय मोक पठाहे, वहाँय मोर साथे छे। वहाँय मोक

आखले नी छोड़े क्यौँकि मुई वहीला काम करछी, जैला वहाक अच्छा लागछे।” ३० यीशुर इला बात सुने बहुत लोक वहार पर विश्वास करिल।

यीशु पापेर गोलामी से आजाद करछे

३१ जैला यहूदी लोक वहार पर विश्वास करिल, यीशु उसाक कोहले, “यदि तुम्हरा वचन मुताबिक चलभेन, त तुम्हरा मोर सच्चा चेला होभेन। ३२ आर तुम्हरा सच्चाईक जानभेन आर सच्चाई तुमसाक आजाद करबे।” ३३ वरा यीशुक जवाब दिले, “हमरा इब्राहिमेर खानदान छी। हमरा कोयखुना कहारो गोलामी नी करी। फेर तुई इडा क्यौँ बोलछिस कि तुई हमसाक आजाद करबो?” ३४ यीशु उसाक जवाब दिले, “मुई तुमसाक सच-सच कोहची, जहाँय पाप करछे, वहाँय पापेर गोलाम छे। ३५ गोलाम लोक मालिकेर घर कुछु समय तक रोहचे, मगर जहाँय घरेर बेटा छे, वहाँय हमेशा घरोत रोहचे। ३६ वहीलाते अगर बेटा तुमसाक आजाद करछे, त तुम्हरा सही माने आजाद हंय जाभेन। ३७ मुई जानी कि तुम्हरा इब्राहिमेर खानदानेर लोक छेन, तहातो तुम्हरा मोक जान से मरवार तने छाभछेन क्यौँकि तुमसार दिलोत मोर वचनेर तने कोय जगह नी छे। ३८ मुई वहीला बात बोलछी, जैला मुई मोर पितार लिकिन देखिही। आर तुम्हरा वहीडा करछेन, जैडा तुम्हरा अपना पितार लिकिन सुनिहेन।” ३९ वरा यीशुक बोलिल, “इब्राहिम हमसार

पिता छे।” यीशु उसाक जवाब दिले, “यदि तुम्हरा इब्राहिमेर बेटा-बेटी होलेनतेन, त तुम्हरा वहीला करलेनतेन, जैला इब्राहिम करिहिले।
४० मगर तुम्हरा मोक जान से मरवार तने छाभोछेन क्यौंकि मुई तुमसाक सच बात बोलनु, जैला मुई परमेश्वरेर लिकिन से सुनिही। तुम्हरा जैकिसम करछेन, उकिसम इब्राहिम नी करे। ४१ तुम्हरा वहीखान काम करछेन, जैखान तुमसार पिता करिहे।” वरा वहाक जवाब दिले, “हमरा की व्यभिचारेर बंश छी? नी। हमसार एकझन पिता छे आर वहाँय छे ‘परमेश्वर।’” ४२ यीशु उसाक कोहले, “यदि परमेश्वर तुमसार पिता होलतेन, त तुम्हरा मोक प्रेम करलेनतेन क्यौंकि मुई पितार लिकिन से ओसिही। मुई आपने इठिन नी ओसिही, मगर मोर पिता मोक पठाहे। ४३ मुई जैला बात बोलछी, उला तुम्हरा क्यौं नी समझवा पारछेन? कारण, मोर बातला सुने तुम्हरा सहवा नी पारभेन।” ४४ तुमसार पिता शैतान छे। तुम्हरा उला बुरा काम करवा चाहचेन, जैला तुमसार पिता करछे। यहाँय शुरू से हत्यारा छे आर झूठ बोलछे क्यौंकि वहाँय कोयखुना सच नी बोलछे। जैखुना शैतान झूठ बोलछे, वहाँय अपना गुण मुताबिक बोलछे क्यौंकि वहाँय झूठा छे आर झूठेर पिता छे। ४५ मुई सच बोलछी, मगर तुम्हरा मोर बातलार पर विश्वास नी करछेन। ४६ तुम्हरा कोय साबित करवा नी पारभेन कि मुई पाप करिही। अगर मुई सच बोलछी, त तुम्हरा क्यौं नी विश्वास करछेन? ४७ मुई तुमसाक

कोहची, जहाँय परमेश्वरेर लिकिन से ओसिहे, वहाँय परमेश्वरेर बात मानछे। तुम्हरा परमेश्वरेर लोक नी छेन, वहीलाते तुम्हरा मोर बातला नी मानछेन।

यीशु इब्राहिम से पहिले छिले

४८ यहूदी लोकला यीशुक बोलिल, “हमरा ठीक कोहिनु कि तुई त सामरिया प्रदेशेर लोक छिस आर तोक भूत धरिहे।” ४९ यीशु उसाक जवाब दिले, “मोक कोय भूत नी धरे। मुई त मोर पितार इज्जत करछी, मगर तुम्हरा मोर अपमान करछेन। ५० मुई नी चाहची कि लोक मोर बड़ाई करे, मगर एकइन छे, जहाँय चाहचे कि लोक मोर बड़ाई करे। आर वहाँय एकइन सच्चा इन्साफी छे। ५१ मुई तुमसाक सच-सच कोहची, जहाँय मोर बात मानछे, वहाँय कोयखुना नी मोरबे।” ५२ वहार बाद यहूदी लोकला वहाक कोहले, “अला हमरा जाने गेनु कि तोक भूत धरिहे। परमेश्वरेर नबीला आर इब्राहिम मोरे गहे, आर तुई कोहचिस कि जहाँय मोर वचन मुताबिक चलबे, वहाँय कोयखुना नी मोरबे। ५३ तुई कि हमसार पूर्वज इब्राहिम से बढे छिस? वहाँय त मोरे गेल आर परमेश्वरेर नबीलाव मोर गेल। फेर तुई के छिस?” ५४ यीशु उसाक जवाब दिले, “यदि मुई अपना बड़ाई आपने करी, त मोर बड़ाई कोय कामेर नी। मगर मोर बड़ाई मोर पिता करछे, जहाक तुम्हरा अपना परमेश्वर कोहचेन। ५५ मगर तुम्हरा वहाक नी जानेन। मुई वहाक

जानछी। यदि मुई बोली कि मुई वहाक नी जानी, त मुई तुमसार मान्दी झूठ बोलछी। मुई वहाक जानी आर वहार कहना मुताबिक चलछी।
 ५६ तुमसार पूर्वज इब्राहिम मोर इडा दिन देखवार तने बहुत खुश छिले आर वहाँय देखे बहुत खुश होल।” ५७ वहार बाद यहूदी लोकला यीशुक बोलिल, “तोर उमर त पचास सालो नी होबे, आर कोहचिस कि तुई हमसार पूर्वज इब्राहिमोक देखिहीस।” ५८ यीशु उसाक कोहले, “मुई तुमसाक सच-सच कोहची, इब्राहिमेर जन्मेर पहिले से मुई छिनु।”
 ५९ इडा सुने वरा वहाक मरवार तने पत्थल उठाल, मगर यीशु चुपके मंदिर से बाहर चले गेल।

यीशु जन्मेर काना लोकोक ठीक करछे

१ रास्ता दे जवारखुना यीशु एकझन काना लोकोक देखिल। वहाँय जनम से काना छिले। २ वहीखुना चेलाला वहाक पूछिल, “गुरु! के पाप करहिले कि इडा लोक काना जनम लिहे? यहाँय पाप करहिले या वहार माँ-बाप पाप करहिले?” ३ यीशु जवाब दिले, “ना वहार अपना पापेर कारण आर ना वहार माँ-बापेर पापेर कारण वहाँय काना जनम लिहे। यहाँय काना जनम लिहे, जसे कि परमेश्वरेर काम यहार जरियाय देखाल जाक। ४ जहाँय मोक पठाहे, वहार काम हमसाक बेलाडा रोहते-रोहते करना जरूरी छे। रात ओसनेवाला छे, जैखुना कोय काम कराल

ની જાહે. ૫ જૈખુન તક મુર્ડે ઇડા દુનિયાંત છી, ઉખુન તક મુર્ડે દુનિયાંર રોશની છી.” ૬ ઇડા બાત કહવાર બાદ યીશુ અપના થુપ સે માટી સાનીલ આર માટીખાન કાનાડાર આંખોત લગાય દિલે. ૭ યીશુ કોહલે, “જા. તુર્ડે શીહલોહ નામેર તાલાબડાત અપના આંખ ધોય લે (શીહલોહર માને હોચે: પઠાલ).” વહાંય જાય અપના આંખલા ધોય લિલે આર વહીખુના દેખવા લાગિલ આર દેખતે-દેખતે ચલે ઓસિલ. ૮ વહાર પડોસીલા આર જૈલા લોક વહાક બીખ માંગતે દેખિહિલે, વરા સબકોય બોલવા લાગિલ, “ઇડા ત વહીડા કાના લોક છે, જહાંય રાસ્તાત બોઠે બીખ માંગછિલે.” ૯ કોય-કોય બોલિલ “હાં, ઇડા વહીડા લોક.” આર ફેર કોય-કોય લોક બોલિલ, “યહાંય ત દેખતે વહારે માન્દી લાગછે, મગર યહાંય ઉડા લોક ની છે.” કાનાડા લોક બોલિલ, “મુર્ડે ત વહીડા લોક છી.” ૧૦ વહાર બાદ લોકલા કાનાડાક પૂછવા લાગિલ, “તોર આંખલા કસે કરે ઠીક હોલ?” ૧૧ વહાંય જવાબ દિલે, “યીશુ નામેર એકઝન લોક માટી સાનીલ આર મોર આંખલાત લગાય દે બોલિલ, તુર્ડે શીલોહ નામેર તાલાબોત આંખલા ધોય લે. આર મુર્ડે તાલાબડાત આંખલા ધોય લિનુ, આર દેખવા લાગનુ.” ૧૨ લોકલા વહાક પૂછિલ, “ઉડા લોક કુનઠિન છે?” વહાંય બોલિલ, “મુર્ડે ની જાની.” ૧૩ જૈડા લોક કાના છિલે, લોકલા વહાક ફરીસીલાર લિકિન લે ગેલ. ૧૪ જે દિના યીશુ માટી સાને વહાર આંખ ઠીક કરહિલે, ઉડા દિન આરામેર દિન છિલે. ૧૫ વહીલાતે

फरीसीला वहाक फेर पूछिल, “तुई कसे करे देखवा पालो।” वहाँय फरीसीलाक जवाब दिले, “वहाँय मोर आँखलात माटी लगाल, फेर मुई धोय लिनु आर मुई वहीखुना से देखवा लागनु।” १६ इला घटना देखे-सुने कुछुला फरीसी बोलवा लागिल, “जैडा लोकेर बारे तुई बोलछिस, वहाँय परमेश्वरेर तरफ से नी छे, क्योंकि वहाँय आरामेर दिनेर नियमोक नी मानछे।” दोसराला लोक बोलवा लागिल, “पापी लोक इकिसम चमत्कारेर काम करवा नी पारबे?” अलग-अलग मतेर कारण उसार बीचोत फूट पोड़े गेल। १७ वरा फेर उडा लोकोक पूछिल, “वहाँय त तोर आँख ठीक करे दिहे, तुई वहार बारे की कोहचिस?” लोकटा बोलिल, “वहाँय एकझन नबी छे।” १८ यहूदी लोकलाक विश्वास नी होचिले कि यहाँय काना छिले, आर अला देखछे। वहीलाते वरा वहार माँ-बाफोक बुलाय आनिल। १९ आर उसाक पूछिल, “इडा कि तुमसार बेटा छे, जहार बारे तुम्हरा कोहचेन कि यहाँय जनम से काना छिले, त फेर यहाँय कसे करे देखछे?” २० वहार माँ-बाप जवाब दिले, “हमरा जानी, यहाँय हमसार बेटा छे, आर यहाँय जनम से काना छिले। २१ मगर हमरा इडा नी जानी कि यहाँय कसे करे देखछे, आर हमरा यहोडा नी जानछी कि यहार आँख के ठीक करिल। यहाँय छोटी छुवा नी छे, यहाके पूछेलव। यहाँय अपना बारे खुद बताय दिबे।” २२ वहार माँ-बाप इकिसम बोलिल क्योंकि वरा यहूदी लोकला से डोराछिले। यहूदी

लोकला एक मत करे लिहले कि अगर कोय लोक यीशुक अपना मसीहा माने ले, त वहाक प्रार्थना-घरोत प्रार्थना करवार तने रोके दिबे।
२३ वहीलाते वहार माँ-बाप कोहले, “वहाँय कोय छोटो छुवा नी छे, वहाके पूछेलव।” २४ सबला यहूदी लोक लोकटाक फेर बुलाय कोहले, “परमेश्वरेर कसम खाय बोल कि तुई सबला बात सच-सच बोलबो। हमरा जानी कि उडा लोक पापी छे।” २५ लोकटा जवाब दिले, “मोक मालूम नी छे कि वहाँय पापी छे कि नी छे। मुई सिरिफ इडा जानी कि मुई पहिले काना छिनु, आर अला मुई देखवा पारछी।” २६ यहार बाद फरीसीला वहाक फेर पूछवा लागिल, “वहाँय तोक की करिल? वहाँय तोर आँखला केनमन करे ठीक करे दिले।” २७ लोकटा जवाब दिले, “मुई तुमसाक साफ-साफ बताय दिनु, मगर तुम्हरा त नी सुनलेन, फेर दोबारा तुम्हरा क्याँ सुनवा चाहचेन? तुम्हराव की वहार चेला हवा चाहचेन?” २८ तब यहूदी लोकला लोकटाक अपमान करे कोहले, “तुहें वहार चेला बने जा, हमरा त मूसा नबीर चेला छी। २९ हमरा जानी कि परमेश्वर मूसा से बात करिहिले, मगर हमरा इडा नी जानी कि इडा लोक कुनठिनकार छे।” ३० लोकटा जवाब दिले, “मोक बड़ा ताज्जुब लागछे कि तुम्हरा वहार बारे नी जानेन कि वहाँय कुनठिनकार छे। मगर वहाँय मोर आँखला अच्छा करे दिहे। ३१ हमरा जानी कि परमेश्वर पापी लोकेर बात नी सुनछे, मगर जैला लोक परमेश्वरेर कहना मुताबिक

चलछे, परमेश्वर उसार इच्छा पूरा करछे। ३२ जैखुन से दुनियाँडा बनिहे, इडा बात कभी नी सुना जाय कि कोय लोक जन्मेर काना लोकोक ठीक करिहे। ३३ अगर इडा लोक परमेश्वरेर लोक नी होलतन त यहाँय कुछु नी करवा पारिलतेन।” ३४ यहूदी लोकला जवाब दिले, “तुई एकदम पापोत जनम लिहिस। तुई हमसाक ना सीखा।” आर वरा वहाक धक्का दे प्रार्थना-घर से बाहर निकलाय दिले। ३५ यीशुक मालूम होल कि फरीसी लोकला वहाक प्रार्थना-घर से बहार करे दिहे, त जैखुना लोकटार साथे यीशुर भेंट होल त, यीशु वहाक पूछिल, “तुई की मानुषेर बेटार पर विश्वास करछिस?” ३६ वहाँय जवाब दिले, “प्रभु! वहाँय के छे जसे कि मुई वहार पर विश्वास करी।” ३७ यीशु वहाक जवाब दिले, “तुई त वहाक देखिहीस आर अला जहार साथे तुई बात करछिस, वहीं छे।” ३८ वहाँय बोलिल, “हे प्रभु! मुई विश्वास करछी।” आर वहाँय यीशुर पाँत पोड़े भक्ति करिल।

फरीसी लोकेर पाप

३९ तब यीशु कोहले, “मुई इडा दुनियाँत इन्साफ करवार तने ओसिही जसे कि जैला लोक देखवा नी पारछे, वरा देखे। आर जैला लोक देखछे, वरा देखवा ना पारे।” ४० जैला फरीसी लोक यीशुर साथे छिले, वरा यीशुर बातला सुने कोहले, “तोर मुताबिक हमराव की काना छी?” ४१ यीशु फरीसीला लोकोक कोहले, “अगर तुम्हरा सही माने काना

होलेनतेन, त पापी नी ठहरलोतेन। मगर तुम्हरा कोहचेन कि हमरा देखछी, वहीलाते तुम्हरा अपना पापेर बन्धनोत छेन।”

रखवाल आर भेड़ार मिसाल

१० वहार बाद यीशु आढ़ोह मिसाल दे कोहले, “मुई तुमसाक सच-सच बताछी कि जहाँय दरवाजा दे भेड़ार घरोत नी ढुकछे, बल्के देवाल तरपे ढुकछे, त वहाँय चोर आर डकैत छे। २ मगर जहाँय दरवाजा दे भीतरोत ढुकछे, वहाँय भेड़ालार रखवाल छे। ३ आर वहार तने चौकीदार दरवाजाडा खोले दिछे, आर भेड़ाला रखवालेर आवाज सुनछे, आर वहाँय भेड़ालार नाम धरे जाब दे बाहरे ले जाछे। ४ जैखुना वहाँय अपना भेड़ालाक निकलाय लिछे तब वहाँय उसार आगु-आगु जाछे आर भेड़ाला वहार पीछू-पीछू जाछे, क्योंकि भेड़ाला वहार आवाजडा चिन्हेछे। ५ मगर भेड़ाला अनजान लोकेर पीछूत कभी नी जाबे, बल्के उसार लिकिन से भागे जाबे, क्योंकि भेड़ाला अनजान लोकेर आवाज नी चिन्हेछे।” ६ यीशु उसार साथे इडा मिसाल दे बात करिल, मगर वरा इडा बुझवा नी पारिल कि इला बातेर मतलब कि छे, जैला वहाँय उसाक बताछे।

यीशु अच्छा रखवाल छे

७ तब यीशु उसाक कोहले, “मुई सच-सच बताछी, भेड़ालार घरेर दरवाजा मुई छी। ८ जतेला रखवाल मोर पहिले ओसिहिले, वरा सबकोय चोर आर डकैत छिले। मगर भेड़ाला उसार बात नी सुनिल। ९ दरवाजा मुई छी, अगर कोय मोर जरियाय भीतरोत ढुकछे, वहाँय बचबे, आर भीतर-बहार ओसबे जाबे आर खाना पाबे। १० चोर आर कोय दोसरा कामेर तने नी, बल्के चूरी, हत्या आर बर्बाद करवार तने ओसछे, आर मुई इडा कारण से ओसिही कि वरा जीवन पाय, आर पूरापूरी पाय। ११ अच्छा रखवाल मुई छी, अच्छा रखवाल भेड़ालार तने अपना जान दे दिछे। १२ मजदूर ना रखवाल छे, ना भेड़ार मालिक छे। खतरनाक जानवरोक देखे, वहाँय भेड़ाक छोड़े भागे जाछे। खतरनाक जानवर भेड़ालाक धड़छे, आर तितर-बितर करे दिछे। १३ वरा भागे जाछे क्योंकि वरा मजदूर छे, आर उसाक भेड़ालार फिकिर नी छे। १४ अच्छा रखवाल मुई छी। जैकिसम पिता मोक जानछे आर मुई पिताक जानी, १५ वही किसम मुई अपना भेड़ालाक जानछी, आर मोर भेड़ाला मोक जानछे, आर मुई अपना भेड़ालार तने अपना जान दिछी। १६ मोर आढ़ोह भेड़ा छे, जैला कि इडा भेड़ार घरेर नी छे। मोक वहलाको अनवा होबे, आर वरा मोर बोलीडा सुनबे, तब एकटा झुण्ड होबे, आर एकटा रखवाल होबे। १७ मोर पिता मोक प्रेम करछे, क्योंकि मुई अपना जानडा

दिछी जसे कि मुई अपना जानडाक फेर ले लुवा पारी। १८ कोय मोर जानडाक मोर लिकिन से छिराय नी लिछे, क्योंकि मुई उडाक आपने दिछी। मोक उडाक दुवार अधिकार छे, आर फेर ले लुवार अधिकार छे। इडा हुकूम मोक मोर पितार लिकिन से मिलिहे।” १९ इला बातेर कारण से यहूदी लोकेर बीचोत वहार बारे फेर फूट पैदा हंय गेल। २० भीड़ेर बीच से बहुतझन यीशुर बारे कहवा लागिल “वहाक भूत धरिहे, आर वहाँय पागल छे, वहार बात क्याँ सुनछेन?” २१ दोसराला लोक कहवा लागिल, “इला बात उकिसम लोकेर हवा नी सकोछे, जहार भीतरोत भूत छे। इडा कि हवा सकोछे कि भूत काना लोकेर आँख ठीक करवा पारे?”

यीशु अपना अधिकारेर बारे बोलछे

२२ वहीडा समय यरूशलेम मंदिरेर समर्पन परब छिले, आर उखुना जाड़ार मौसम छिले। २३ यीशु सुलेमान नामेर बरण्डात टहले छिले। २४ वहीखुना यहूदी लोकला वहाक घेरे लिले आर पूछिल “तुई हमसार मोनडाक कते दिन तक दुविधात राखबो? अगर तुई सचमुच मसीहा छिस, त हमसाक साफ-साफ कोहय दे।” २५ यीशु उसाक जवाब दिले, “मुई तुमसाक कहय दिनु, मगर तुम्हरा विश्वास नी करछेन। जैला काम मुई अपना पितार नामे करछी, वहीला मोर गवाह छे। २६ तुम्हरा विश्वास नी करछेन, क्योंकि तुम्हरा मोर भेड़ालार भीतर से नी छेन। २७ मुई मोर भेड़ालाक जानी। वरा मोर आवाज सुनछे आर मोर पीछू-पीछू चलछे।

२८ आर मुई उसाक हमेशार जिन्दगी दिछी, आर वरा कभी भी बर्बाद नी होबे, आर कोय मोर हाथ से उसाक छिड़ाय लुवा नी पारबे। २९ मोर पिता उसाक मोर हाथोत दे दिहे, वहाँय सभा से बोड़ो छे, आर कोय पितार हाथ से उसाक छिड़ाय लुवा नी पारबे। ३० मुई आर मोर पिता एक छी।” ३१ इडा सुने यहूदी लोकला वहाक मरवार तने पत्थल उठाल। ३२ इला देखे यीशु उसाक कोहले, “मुई अपना पितार तरफ से तुमसाक बहुतला अच्छा-अच्छा काम देखाछी। उलार अन्दर से कुनडा कामेर तने तुम्हरा मोक पत्थल से मरवा चाहचेन?” ३३ यहूदी लोकला वहाक जवाब दिले, “अच्छा कामेर तने हमरा तोर पर पत्थल नी मारछी, मगर परमेश्वरेर अपमान करवार कारण से हमरा पत्थल दे मरवा चाहची, क्योंकि तुई मानुष हंय अपना-आपोक परमेश्वर बनाछिस।” ३४ यीशु उसाक जवाब दिले, “तुमसार नियम-कानूनोत लिखाल छे, ‘मुई कोहनु, तुम्हरा ईश्वर छेन?’ ३५ [आर पवित्र शास्त्रेर बात कोयखुना गलत नी हवा पारे।] वहीलाते जैला लोक परमेश्वरेर वचन पाले, उसाक ईश्वर कहाल गेल। ३६ पिता जहाक पवित्र करे दुनियाँत पठाहे।” तुम्हरा वहाक कोहचेन, “तुई परमेश्वरेर अपमान करछिस” क्योंकि मुई तुमसाक कोहनु कि मुई परमेश्वरेर बेटा छी। ३७ अगर मुई अपना पितार काम नी करछी, त मोर पर विश्वास ना करो। ३८ आर अगर मुई पितार काम करछी, तहारो पर यदि तुम्हरा मोर पर विश्वास नी करछेन, त मोर

कामलार पर विश्वास करो जसे कि तुम्हरा जनवा आर बुझवा पारेन कि मोर पिता आर मुई मिले एक छी। ३९ तब वरा वहाक फेर धरवार कोशिश करिल, मगर यीशु उसासे बचे निकले चले गेल। ४० आर यीशु फेर यरदन नदीर उपार गेल, जैठिन यूहन्ना आगुत बपतिस्मा दिछिले। आर वहाँय वहीठिन रोहोल। ४१ बहुतला लोक वहार लिकिन ओसे कोहचिले, “यूहन्ना त हमसाक कोय चिन्ह नी देखाय, मगर यूहन्ना जैला बात यहार बारे कोहिले, उला बात सच छे।” ४२ आर उठिन बहुतला लोक वहार पर विश्वास करिल।

लाजरेर मौत

११ बैतनियाह गाँवोत मरियम आर मार्था नामे दुईझन बहिन छिले। आर लाजर नामेर उसार एकझन भई छिले, आर वहाँय बेमार छिले। २ इडा वहीडा मरियम, जहाँय प्रभु यीशुर पाँत इत्तर डाले, प्रभुर पाँलाक अपना चूल दे मूछे दिहिले। यहारे भई लाजर बेमार छिले। ३ वहीलाते मरियम आर मार्था प्रभुर लिकिन खबर दे पठाल कि लाजर बेमार छे, जहाक तुई प्रेम करछिस। ४ इडा खबर पाय यीशु बोलिल, “इडा बेमारी लाजरेर जान लुवार तने नी छे, मगर इडा बेमारीर जरियाय देखाल जाबे कि परमेश्वर कतेक शक्तिशाली छे आर यहोडा देखाबे कि वहार बेटाव कतेक शक्तिशाली छे।” ५ यीशु मार्थाक, मरियमोक आर लाजरोक प्रेम

करछिले। ६ वहाँय सुनिल कि लाजर बेमार छे, तहातो वहाँय उठिन दुई दिन आढ़ोह ठहरे गेल, जैठिन वहाँय छिले। ७ दुई दिन बाद वहाँय अपना चेलालाक कोहले, “चलो, हमरा फेर यहूदिया प्रदेश चली।” ८ चेलाला वहाक कोहले, “हे गुरु! कुछ दिन पहिले यहूदी लोकला तोक पत्थल मरवार तने छाभछिले आर तुई कि अला फेर उठिन जवा चाहचिस?” ९ यीशु उसाक जवाब दिले, “तुम्हरा जानेन कि दिनोत १२ घंटा बेलाडा रोशनी दिछे। जहाँय दिनोत चलछे, वहाँय कोयखुना ठोकर नी खाबे क्योंकि वहाँय बेडालार रोशनीत सब कुछ साफ-साफ देखछे। १० मगर कोय अगर रात करे चलबे, त ठोकर खाय पोरे जाबे क्योंकि वहाँय सब कुछ साफ-साफ देखवा नी पारछे।” ११ इला बात बोलवार बाद यीशु चेलालाक कोहले, “हमसार दोस्त लाजर सुते गहे, मुई वहाक निन से उठवा जाछी।” १२ चेलाला वहाक कोहले, “गुरुजी! अगर वहाँय सुतेछे, त वहाँय अच्छा हंय जाबे।” १३ यीशु त लाजरेर मौतेर बारे बोलिहिले, मगर वहार चेलाला समझिल कि वहाँय सही माने सुताल छे। १४ वहीलाते यीशु उसाक साफ-साफ कोहले, “लाजर मोरे गहे। १५ मगर मुई तुमसार कारण खुश छी कि मुई उठिन नी छिनु क्योंकि अला तुम्हरा मोर पर विश्वास करभेन। चलो, हमरा वहार लिकिन चली।” १६ वहार बाद थोमा, जहार दोसरा नाम दिदुमुस छे, वहाँय दोसराला चेलालाक कोहले, “चलो, हमरा वहार साथे मोरवा चली।”

यीशु लाजरोक जिन्दा करछे

१७ बैतनिय्याह पहुँचवार बाद यीशुक मालूम होल कि लाजरेर मोरवार चार दिन हंय गहे। १८ बैतनिय्याह यरूशलेम शहर से लगभग दुई मील दूरोत छिले। १९ बहुतला यहूदी लोक मार्था आर मरियमोक उसार भईर बारे हिम्मत दुवा ओसिहिले। २० जैखुना मार्थाक पता चलिल कि यीशु ओसिहे, त मार्था वहार मुलाकात करवार तने वहार लिकिन गेल, मगर मरियम घरते बोठे रोहोल। २१ मार्था यीशुक कोहले, “प्रभु! तुई अगर इठिन होलोतेन, त मोर भई एकदम नी मोरिलतन। २२ मगर मुई जानछी कि जे कुछु तुई परमेश्वरेर लिकिन से अलाव माँगबो, परमेश्वर तोक दिबे।” २३ यीशु मार्थाक कोहले, “तोर भई जिन्दा हंय उठबे।” २४ मार्था वहाक कोहले, “मुई जानी कि आखरी दिनोत जैखुना परमेश्वर सब मुर्दा लोकोक जिन्दा करबे, उखुना वहाँय जिन्दा हंय उठबे।” २५ यीशु मार्थाक बोलिल, “मुहें मुर्दा लोकोक जिन्दा करछी आर लोकोक जिन्दगी दिछी। जहाँय मोर पर विश्वास करछे, वहाँय मोरे गेलेव, जिन्दा रोहबे। २६ जहाँय जिन्दा छे आर मोर पर विश्वास करछे, त वहाँय हमेशार जिन्दगी पाबे। तुई की मोर इडा बातेर पर विश्वास करछिस?” २७ मार्था वहाक जवाब दिले, “हाँ, प्रभु। मुई विश्वास करे लिही कि मसीहा, जहाँय परमेश्वरेर बेटा छे आर दुनियाँत ओसनेवाला छिले, उडा तुहें छिस।” २८ इडा बात बोले मार्था जाय अपना बहिन मरियमोक एक

बगलोत करे बोलिल, “गुरुजी यही ठिन छे आर तोक जाब दिछे।”
२९ इडा बात सुने मरियम फूर्ति से उठे वहार लिकिन गेल। ३० यीशु
आभी तक बस्तीडात नी पहुँचे, मगर उठिन छिले, जैठिन मार्था वहार
साथे मुलाकात करिल। ३१ जैला यहूदी लोक उसार घर उसाक हिम्मत
दुवार तने ओसिले, वरा देखिल कि मरियम फूर्ति करे उठे बाहर गेल, त
वरा समझिल कि मरियम कबरटार लिकिन कनवार तने गेल, वराव
वहार पीछू-पीछू चले गेल। ३२ जैखुना मरियम यीशुर लिकिन पहुँचिल
वहाँय वहार पाँत पोड़े कोहले, “प्रभु! तुई अगर इठिन होलोतेन, त मोर
भई नी मोरिलतन।” ३३ जैला यहूदी लोक उसार लिकिन ओसिहिले,
वरा आर मरियम कानछिले। उसार कानोन देखे यीशुर दिलोत माया
चले ओसिल आर दुःख से बोलिल, “वहाक कुन्हियाँ कबर दिहेन?”
३४ वरा वहाक बोलिल, “प्रभु! ओस। चले देखे ले।” ३५ यीशु कानिल।
३६ यीशुर लोय देखे यहूदी लोकला आपोसोत कहवा लागिल, “देखो,
वहाँय लाजरोक कतेक प्रेम करछिल।” ३७ मगर कुछुला यहूदी कहवा
लागिल, “इडा लोक त काना लोकेर आँख खोले दिले। यहाँय यहोडा
नी करवा पारिलतन कि लाजर नी मोरिलतन।” ३८ वहार बाद यीशु दुःख
से भरे कबरटार लिकिन ओसिल। कबरटा एकखान गुफात बनाल छिले
आर एकखान पत्थल कबरटार मुखखानेर पर रखाल छिले। ३९ यीशु
बोलिल, “पत्थलखानोक हटाय दव।” मगर मराल लोकटार बहिन मार्था

यीशुक बोलिल, “प्रभु! अला कबरटा से गो न ओसबे क्याँकि लाजरेर मोरवार चार दिन हंय गहे।” ४० यीशु मार्थाक कोहले, “मुई त तोक बोलिही कि अगर तुई विश्वास करबो, त परमेश्वरेर शक्तिक देखबो।” ४१ वहार बाद लोकला पत्थलखानोक हटाय दिले। यीशु अपना आँख उठाय प्रार्थना करिल, “पिता! मुई तोर शुकुरिया करछी कि तुई मोर प्रार्थनार जवाब दिहिस। ४२ मुई जानी कि तुई हरखुना मोर प्रार्थनार जवाब दिछिस। मगर जैला भीड़ मोर बगलोत थाड़ो हंय छे, उसार कारण मुई तोर लिकिन इडा प्रार्थना करनु, जसे कि यरा विश्वास करे कि तुई मोक पठाहिस।” ४३ इडा प्रार्थना करे वहाँय जोर से बोलिल, “लाजर! तुई बाहर निकले ओस।” ४४ लाजर जहाँय मोरे गहिले, वहाँय कफन से हाथ-पाँ बन्हाल कबर से बाहर निकले ओल आर वहार मुखखान कपड़ा से लेपटाल छिले। यीशु उसाक कोहले, “वहार बानला खोले दव आर वहाक जवा दव।” ४५ जैला यहूदी लोक मरियमेर लिकिन ओसिले, इखान काम देखे बहुतझन यहूदी लोक यीशुर पर विश्वास करिल। ४६ मगर उसार भीतर से कुछुला यहूदी लोक फरीसीलार लिकिन गेल आर यीशु जैखान काम करिल, उखान कामेर बारे बताय दिले।

यीशुक जान से मरवार साजिश

४७ वहार बाद मुख्य पूजारीला आर फरीसी लोकला मिले महासभा बुलाल आर लोकलाक जमा करे कोहले, “हमरा की करछी? इडा लोक त बहुत चमत्कारेर काम करछे। ४८ अगर हमरा वहाक यही किसम करवार तने छोड़े दी, त सबला लोक वहार पर विश्वास करबे आर वहार पीछू हंय लिबे। इडा कारण रोमी हाकिम हमसार मंदिर आर हमसार देश नाश करे दिबे।” ४९ इला बात सुने उडा समयेर महापूजारी कार्डिफा भविष्यवाणी करे उसाक कोहले, “तुम्हरा कुछु नी जानेन। ५० आर ना सोचोछेन कि हमसार लोकेर तने एकझन लोकोक मरना जरूरी छे, जसे कि हमसार पूराडा देश बचे जाय।” ५१ इडा बात कार्डिफा अपना तरफ से नी बोले, बल्के उडा समयेर महापूजारी छिले आर भविष्यवाणी करिल कि यीशु अपना जानडा दे यहूदी लोकोक बचाबे। ५२ सिरिफ यहूदी लोकोक बचवार तने नी, मगर परमेश्वरेर अपना भटकाल बच्वालाक एक जगह जोड़ो करवार तने। ५३ वही दिना से वरा योजना बनवा शुरू करिल कि केनमन करे यीशुक जान से मारा जाय। ५४ यहीडा कारण से यीशु उला दिनोत यहूदी लोकेर सामनात नी ओसछिले, मगर यरूशलेम से इफ्राईम नामेर एकटा गाँवत गेल, जैडा गाँव सुनसान जगहेर बगलोत छिले। आर चेलालार साथे वहीडा गाँवत रोहोल। ५५ यहूदी लोकेर फसह परब ओसनेवाला छिले। दुनियाँर बहुत

देश से यहूदी लोक फसह परब से पहिले यरूशलेम ओसिल कि वरा अपना-आपोक शुद्ध करे। ५६ वरा यीशुक छाभछिले आर मंदिरोत थाड़ो हंय आपोसोत कोहचिले, “हमसाक लागछे कि ५७ यीशु परबडात जरूर ओसबे।” मुख्य पूजारीला आर फरीसीलार भीति से आदेश छिले कि अगर कोय लोक यीशुर बारे जाने, त बताय दे जसे कि वहाक धरे लिया ल जाय।

मरियम प्रभु यीशुर पाँत इत्तर लगाछे

(मत्ती २६:६-१३; मरकुस १४:३-९)

१२ वहार बाद यीशु फसह परबेर छः दिन पहिले बैतनिय्याह गाँवत ओसिल, जैठिन लाजर छिले, जहाक यीशु मुर्दा से जिन्दा करिहिले। २ वरा यीशुर तने खाना बनाल आर वहाक खवार तने बठाल। मार्था खिलाछिले। खानेवालालार साथे लाजर एकझन छिले। ३ खिलवारखुना मरियम ३२० ग्राम दामी इत्तर लिले आर यीशुर पाँत लगाल आर अपना चूल दे वहार पाँला मुछे दिले। इत्तरखानेर मोहक से घरखान भरे गेल। ४ मगर वहार चेलालार भीतर से एकझन यहूदा इस्किरियोती छिले, जहाँय यीशुक धोखा दे पकड़ानेवाला छिले, वहाँय बोलवा लागिल, ५ “इखान इत्तर तीन सौ दिनारोत बेचाल गेलतेन आर गरीब लोकोक बाँटे देयाल गेलतेन।” ६ यहूदा गरीब लोकेर तने चिन्ता करे इडा बात नी बोलिल। वहाँय बोलिल क्यौँकि चोर छिले। वहाँय चेलालार टकार बटुवा

राखछिले। बटुवा से अपनार तने कुछ टका लिछिले। ७ यीशु बोलिल,
“वहाक मना ना करो। वहाँय इखान इत्तर मोक कबर दुवार तने रखवा
दव। ८ गरीब लोक त तुमसार बीचोत हरखुना रहबे, मगर मुई हरखुना
तुमसार साथे नी रोहोम।” ९ यहार बीचोत बहुतइन यहूदी लोकोक
मालूम होल कि यीशु बैतनियाह गाँवत छे। वरा खाली यीशुके देखवा नी
ओसिल, मगर लाजरको देखवा ओसिल, जहाक यीशु मुर्दा से जिन्दा
करिहिले। १० मगर मुख्य पूजारीला लाजरको मारे दुवार योजना बनाल
११ क्योंकि वहार कारण बहुतला यहूदी लोक यीशुर लिकिन जाछिल
आर यीशुर पर विश्वास करवा लागिल।

यीशु यरूशलेम शहरोत ढुकछे

(मत्ती २१:१-११; मरकुस ११:१-११; लूका १९:२८-४०)

१२ यहूदी लोकेर बोड़ो भीड़ परब मनवार तने यरूशलेम शहर ओसिहिले।
दोसरा दिन उसाक पता चलिल कि यीशु यरूशलेम शहरोत ओसछे, त
१३ वरा सबकोय खजूरेर ठाल लिले आर यीशुर साथे मुलाकात करवार
तने जवा लागिल आर जोर से परमेश्वरेर जयजयकार करवा लागिल,
“धन्य छे वहाँय जहाँय प्रभुर नामे ओसछे! इजराएल देशेर राजा धन्य
छे।” १४ रास्तात यीशु एकटा गधा पाले आर वहार उपरोत बोठे गेल।
नबीलार किताबोत जैकिसम लिखाल छे, १५ “ऐ यरूशलेम शहरेर
लोकला! तुम्हरा ना डोराव। देख! तोर राजा गधार बच्चार पर बोठे

ओसछे।” १६ पहिले त वहार चेलाला इला बातोक बुझवा नी पारिल।
यीशुर महिमार बाद चेलाला बुझवा पारिल कि इला सबला बात यहारे
बारे लिखाल छे आर इला लोक यीशुरे तने इला करिल। १७ लाजरोक
कबर से जिन्दा करवारखुना जैला लोक यीशुर साथे छिले, वरा इडा
खबर लोकलाक बताछिले। १८ लोकला जैखुना इडा खबर सुनिल कि
यीशु चमत्कारेर काम करिहे, त वरा वहार साथे मिलवार तने गेल।
१९ इडा देखे फरीसी लोकला आपसोत बोलवा लागिल, “हमरा वहार
खिलाफ कुछु नी करवा पारछी। देखो! सबकोय यीशुर पीछू हंय
लिछे।”

गैर-यहूदी लोकला यीशुक देखवा चाहचे

२० उसार बीच से कुछुला गैर-यहूदी लोको छिले, जैला लोक भक्ति
करवार तने इडा परबोत यरूशलेम ओसिहिले। २१ इला गैर-यहूदी लोक
फिलिपेर लिकिन गेल। फिलिप गलील प्रदेशेर बैतसैदा शहरेर रहनेवाला
छिले। वरा फिलिपोक पूछिल, “भई! हमरा यीशुक देखवा चाहची।”
२२ फिलिप जाय अन्द्रियासोक कोहले। आर वहार बाद फिलिप आर
अन्द्रियास जाय इडा बात यीशुक कोहले।

यीशु अपना मौतेर बारे बोलछे

२३ यीशु बोलिल, “उडा समय चले ओसिहे कि परमेश्वर लोकोक देखाबे कि मानुषेर बेटा कतेक शक्तिशाली छे। २४ मुई तुमसाक बोलछी, गेहूर दानाक जमीनोत बुनाल जाछे आर माटीर तोलोत चले जाछे। जैखुन तक माटीर तोलोत रोहचे, उखुन तक दानाडा आखले रोहचे, मगर गाजे उठवार बाद बहुतला फल आनछे। २५ जहाँय अपना जानडाक प्रेम करछे, वहाँय अपना जानडाक हराबे। मगर जहाँय इडा दुनियाँत अपना जानडार परवाह नी करछे, वहाक हमेशार जिन्दगी मिलबे। २६ जहाँय मोर सेवक हवा चाहचे, वहाक मोर पीछू-पीछू चलवा होबे। मुई जैठिन रोहमु, वहीठिन मोर सेवक रोहबे। अगर कोय मोर सेवा करबे, त पिता वहाक सम्मान दिबे।” २७ मुई बहुत परेशान छी। मुई कुन किसम प्रार्थना करी? मुई इडा प्रार्थना करवा पारी, “पिता! मोक इडा मुसीबत से बचा।” मगर नी। मुई त इखान दुःख-तकलीफ भोगवारे तने ओसिही। २८ तहार बाद यीशु प्रार्थना करिल, “पिता! तुई मानुषोक दखा कि तुई कतेक शक्तिशाली छिस।” वहार बाद आसमान से एकटा आवाज होल, “मुई मानुषोक दखाही कि मुई कतेक शक्तिशाली छी आर आढ़ोह देखाम।” २९ जैला लोक बगलोत थाड़ो हंय छिले, उसार बीच से कोय बोलिल, “इडा त कोय मेघेर आवाज छे।” कोय बोलिल, “इडा कोय फरीस्तार आवाज छे।” ३० वहार बाद यीशु बोलिल, “इडा

आवाज खाली मोर तने नी, मगर सभारो तने छे। ३१ अला समय चले ओसिहे कि दुनियाँर लोकेर इन्साफ होबे आर इडा दुनियाँर सरदारोक निकलाय देयाल जाबे। ३२ मोक क्रुसोत चढ़ाल जाबे जसे कि सब लोकोक मुई अपना लिकिन टाने आनी।” ३३ इडा कोहय वहाँय बताल कि वहार कुन किसम करे मौत होबे। ३४ लोकला सुने बोलिल, “हमरा त मूसार नियम से जानी कि मसीहा हरखुना राज करबे, फेर तुई क्याँ कोहचिस कि मानुषेर बेटाक क्रुसेर पर मरना जरूरी छे? मानुषेर बेटा के छे?” ३५ वहार बाद यीशु उसाक कोहले, “तुमसार बीचोत रोशनी आर कुछु दिन तक छे, जैखुन तक रोशनी तुमसार बीचोत छे, चलते रहव। जैखुना रोशनी चले जाबे, अन्हार ओसे तुमसाक घेरे लिबे। जहाँय अन्हारोत चलछे, वहाक मालूम नी होचे कि कुन भीति जाछे। ३६ जैखुन तक रोशनी छे, तुम्हरा रोशनीर पर विश्वास करे रोशनीर बेटा-बेटी बने जाव।” इला बात कोहय यीशु उछिन से चले गेल आर उसार आगुत नी ओसिल।

विश्वास आर अविश्वासेर फल

३७ यीशु उसार आगुत बहुत चमत्कारेर काम करिल, मगर वरा वहार पर विश्वास नी करिल। ३८ आर इकिसम करे यशायाह नबीर बात पूरा होल, जैडा वहाँय बहुत आगुते बोलिहिले। यशायाह नबी बोलिहिले कि “हे प्रभु! हमसार प्रचारेर पर के भरोसा करिहे आर कहार पर प्रभु

अपना शक्ति दखाहे?” ३९ वहीलाते वरा यीशुर पर विश्वास नी करिल। ४० यशायाह नबी यहोडा बोलिहे, “परमेश्वर उसार आँखला काना करे दिहे आर उसार मोनला सक्कत करे दिहे। वहीलाते वरा ना त देखवा पाछे आर ना बुझवा पाछे। आर ना मोर लिकिन घुरे ओसछे जसे कि मुई उसाक ठीक करे दी।” ४१ यशायाह नबी इला बात कोहले क्यौंकि बहुत आगुते वहाँय यीशुर शक्ति देखिहिले आर वहार बारे बोलिहिले। ४२ अगुवालार बीच से कुछुला अगुवा यीशुर पर विश्वास करिल, मगर फरीसी लोकेर डोरे, वरा लोकेर सामनात इडा बात बोलवा नी चाहचिले। इला अगुवा डोराछिले कि कहीं फरीसी लोक उसाक प्रार्थना-घर से बाहर करे ना दे ४३ क्यौंकि उसाक परमेश्वरेर बड़ाई से मानुषेर बड़ाई पाना बेसी अच्छा लागिल। ४४ वहार बाद यीशु जोर से लोकलाक बोलिल, “जहाँय मोर पर विश्वास करछे, वहाँय मोर पर नी, मगर मोर पठानेवालार पर विश्वास करछे। ४५ जहाँय मोक देखछे, वहाँय मोर पठानेवालाक देखछे। ४६ मुई दुनियाडात रोशनी बने ओसिही जसे कि जहाँय मोर पर विश्वास करबे, वहाँय अन्हारोत ना रहय। ४७ जहाँय मोर बात सुने मोर पर विश्वास नी करछे, वहार पर मुई दोष नी लगाछी क्यौंकि मुई दोष लगवार तने नी, मगर दुनियाँर लोकेर पाप माफ करवार तने ओसिही। ४८ जहाँय मोक इन्कार करछे आर मोर वचन ग्रहण नी करछे, इन्साफेर दिनोत मोर वचन उसाक दोषी ठहराबे।

४९ क्यौँकि मुई अपना मन से कोय वचन नी बोलछी, मगर मोर पिता जहाँय मोक पठाहे, वहीं मोक हुकूम दिहे कि मोक कि-कि बोलवा होबे? ५० मुई जानी कि वहार हुकूम हमेशार जिन्दगी दिछे। वहीलाते मोर पितार कहना मुताबिक मुई बोलछी।”

यीशु अपना चेलालार पाँ धुछे

१३ फसह परबेर पहिले, यीशु इडा जाने कि वहार समय चले ओसिहे आर वहाक दुनियाँ छोड़े पितार लिकिन चले जाना छे, त वहाँय अपना लोकलाक प्रेम करते रोहोल, जैला दुनियाँत छिले। जैकिसम प्रेम वहाँय शुरूत करछिल, वही किसम प्रेम वहाँय उसाक आखरी समय तक करिल। २-४ शैतान शमौनेर बेटा यहूदा इस्किरियोतीर मोनोत इडा बात डाले दिहिले कि वहाँय यीशुक धोखा दे धराय दिबे। यीशु इडा जानछिल कि पिता सब कुछ वहार हाथोत करे दिहे, आर वहाँय परमेश्वरेर लिकिन से ओसिहे आर वहाँय परमेश्वरेर लिकिन जाछे। खाना खवारखुना यीशु खानाला छोड़े उठिल आर अपना उपरेर कपड़ाला खोले दिले आर गमछा ले अपना कमरोत बान्हिल। ५ वहार बाद वहाँय गमलात पानी भरे अपना चेलालार पाँला धुले आर कमरोत बन्हाल गमछाखान दे उसार पाँला पूछवा लागिल। ६ जैखुना यीशु शमौन पतरसेर लिकिन ओसिल, त पतरस यीशुक कोहले, “प्रभु! तुई की मोर

पाँला धोय दुवा चाहचिस?” ७ यीशु वहाक जवाब दिले, “जैखान काम मुई करछी, अला तुई बुझवा नी पारबो, पाछूत तुई बुझबो।” ८ पतरस वहाक बोलिल, “मुई तोक अपना पाँ धुवार तने कोयखुना नी दुम।” यीशु पतरसोक बोलिल, “अगर तुई मोक अपना पाँ धुवा नी दुबो, त तोर साथे मोर कोय रिस्ता नी छे।” ९ वहार बाद शिमोन पतरस बोलिल, “प्रभु! खाली मोर पाँलाके नी, बल्के, मोर हाथ आर माथाडाव धोय दे।” १० यीशु वहाक बोलिल, “जहाँय सिनान करे लिहे, वहाक खाली पाँला धुवा होचे, क्योंकि पाँलाक छोड़े वहार गोटेनडा बदन साफ छे।” यीशु पतरसोक कोहले, “तुमसार मोन साफ छे, मगर सभारो नी।” ११ यीशु जानछिले कि के वहाक धोखा दे धराबे? वहीलाते वहाँय बोलिल कि तुमसार बीच से सबकोय साफ नी छे। १२ जैखुना यीशु उसार पाँला धोय दिले, त वहाँय उपरेर कपड़ाला पिन्हें लिले, आर अपना जगहोत बोठे गेल। आर उसाक कोहले, “तुम्हरा कि बुझवा पारलेन कि मुई की करनु?” १३ तुम्हरा मोक गुरु आर प्रभु कोहचेन। तुम्हरा ठिके कोहचेन, क्योंकि मुई गुरु आर प्रभु छी। १४ मुई गुरु आर प्रभु हंय अगर तुमसार पाँला धोय दिनु, त अला तुमसाको एक-दोसराझनार पाँला धोय दुवा लागे। १५ मुई तुमसार आगुत इकिसम करे एकटा नमूना दिनु कि तुम्हराव वही किसम करो जैकिसम मुई तुमसार तने करनु। १६ मुई तुमसाक सच-सच कोहची कि नौकर मालिक से बोड़ो नी होचे, आर ना

दूत वहार पठानेवाला से बोड़ो छे। १७ अगर तुम्हरा इला बात जाने, इलार मुताबिक चलभेन, त परमेश्वर तुमसाक खुशहाल राखबे।

यीशुक धोखा देनेवाला

(मत्ती २६:२०-२५; मरकुस १४:१७-२१; लूका २२:२१-२३)

१८ मुई तुमसाक चुने लिही आर मुई जानी कि तुम्हरा कुन किसम लोक छेन। मगर मुई तुमसार सभारो बारे नी बोलछी। शास्त्रेर इला लिखाल बातला पूरा होय, “जहाँय मोर साथे खाचे, वहीं मोर थालीखानोक लात मारछे। १९ आर मुई तुमसाक कोहची, जैखुना शास्त्रेर इला बात पूरा होबे, उखुना तुम्हरा जानभेन कि मुहें मसीहा छी।” २० “मुई तुमसाक सच-सच कोहची कि जहाँय मोर दूतोक ग्रहण करछे, वहाँय मोक ग्रहण करछे, आर जहाय मोक ग्रहण करछे, वहाय मोर पठानेवालाक ग्रहण करछे।” २१ इडा बात कहवार बाद यीशु आत्मात बेचैन हंय गेल आर बोलिल, “मुई तुमसाक सच-सच कोहची कि तुमसार बीच से एकझन मोक धोखा दे धराबे।” २२ चेलाला एक-दोसराझनार भीति देखवा लागिल आर मोनोत सोचिल कि वहाँय कहार बारे बोलछे? २३ वहार चेलालार बीच से एकझन जहाक यीशु प्रेम करछिल, यीशुर सिनात माथा राखे बोठे छिले। २४ पतरस वहाक इशारा करे पूछिले कि यहाँय कहार बारे बोलछे? २५ जैडा चेला यीशुर सिनात माथा राखे बोठे छिले, वहाँय पूछिल, “प्रभु! इडा के छे?” २६ यीशु वहाक बोलिल, “रूटीर

टुकड़ाखान डुबाय जहाक मुई दुम, वहीं छे।” आर वहाँय टुकड़ाखान डुबाय शमौनेर बेटा यहूदा इस्क्रियोतीक दिले। ^{२७} रूटीर टुकड़ाखान खवार साथे-साथे यहूदार अन्दरोत शैतान ढूके गेल। यीशु वहाक कोहले, “जैखान काम तुई करवा चाहचिस, जल्दी से करेक।” ^{२८} जताला लोक बोठे छिले, कोय नी बुझवा पारिल कि इडा बात वहाँय क्याँ बोलिल? ^{२९} मगर कोय-कोय समझिल कि यीशु यहूदाक कोहचे जसे कि वहाय परबेर जरूरी जिनिसोक किने आने या नीते कुछ टका गरीब-दुःखीयाक दे दे क्याँकि यहूदार लिकिन पैसार बटुवा छिले। ^{३०} यहूदा रूटीर टुकड़ा खाय जल्दी करे बाहर चले गेल, आर उखुना रात हंय गहिले।

नया हुकूम

^{३१} जैखुना यहूदा चले गेल, यीशु बोलिल, “समय चले ओसिहे कि मानुषेर बेटार बड़ाई होक आर वहार कारण परमेश्वरेर बड़ाई होक। ^{३२} अगर बेटार कारण परमेश्वरेर बड़ाई होबे, त साथे-साथे परमेश्वरो खुद बेटार बड़ाई करबे।” ^{३३} यीशु अपना चेलालाक कोहले, “मोर छोटो छुवाला! मुई तुमसार साथे कुछ समय तक छी, जैकिसम कि मुई यहूदी नेतालाक बोलिही, तुम्हरा मोक छाबभेन। जैठिन मुई जाछी, उठिन तुम्हरा ओसवा नी पारभेन।” ^{३४} मुई तुमसाक एकटा नया हुकूम दिछी कि तुम्हरा आपसोत प्रेम राखो। जैकिसम मुई तुमसाक प्रेम करछी,

वही किसम तुम्हराव एक-दोसराझनाक प्रेम करो। ३५ यदि तुम्हरा आपसोत प्रेम राखभेन, त इडा से सब लोक जानबे कि तुम्हरा मोर चेला छेन।

पतरस यीशुक इन्कार करबे

(मत्ती २६:३१-३५; मरकुस १४:२७-३१; लूका २२:३१-३४)

३६ शिमोन पतरस यीशुक पूछिल, “प्रभु! तुई कुन्हियाँ जाछिस?” यीशु वहाक जवाब दिले, “जैठिन मुई जाछी, तुम्हरा उठिन अला मोर पीछू-पीछू ओसवा नी पारभेन, मगर बाद करे मोर पीछू-पीछू ओसभेन।” ३७ पतरस बोलिल, “प्रभु! अला हमरा क्याँनि तोर पीछू-पीछू ओसवा पारमु? मुई तोर तने अपना जानडा दुवार तने तैयार छी।” ३८ यीशु पतरसोक बोलिल, “की तुई मोर तने अपना जानडा दुबो? मुई तोक सच-सच कोहची, मुर्गाडार बाँग दुवार आगुत तुई मोक तीन बार इन्कार करबो।”

परमेश्वरेर लिकिन जवार रास्ता यीशु छे

१४ यीशु चेलालाक बोलिल, “तुम्हरा बेचैन ना हव। तुम्हरा परमेश्वरेर पर विश्वास करछेन, मोहरो पर करो। २ मोर पितार घरोत रहवार बहुत जगह छे। अगर नी होलतेन, त मुई तुमसाक कोहय दिनुतन। मुई तुमसार तने जगह तैयार करवा जाछी। ३ मुई तुमसार तने जगह तैयार

करे लुम आर फेर ओसे मुई तुमसाक अपनार लिकिन ले जाम जसे कि जैठिन मुई रोहमु, उठिन तुम्हराव रोहभेन। ४ मुई जैठिन जाछी, तुम्हरा उठिन जवार रास्ता जानेन।” ५ वहार एकझन चेला थोमा बोलिल, “प्रभु! हमरा नी जानी कि तुई कुन्हियाँ जाछिस? त कन्हें करे पता चलबे कि उठिन जवार रास्ता कुनडा छे?” ६ यीशु वहाक बोलिल, “मुहें उडा रास्ता छी, जैडा रास्ता परमेश्वरेर सच्चाईर बारे बताछे आर मानुषोक जिन्दगी दिछे। कोय मोर बिना पितार लिकिन जवा नी पारबे। ७ अगर तुई मोक जानलोतन, त मोर पिताको जानलोतन। अला तुम्हरा वहाक जानछेन आर देखे लिहेन।” ८ वहार एकझन चेला फिलिप्पुस कोहले, “प्रभु! हमसाक पिताक देखाय दे, त यहीडा काफी हंय जाबे।” ९ यीशु फिलिपुसोक कोहले, “फिलिप्पुस! मुई अतेक दिन तक तोर साथे छी, तुई की मोक जानिस नी? जहाँय मोक देखिहे, वहाँय मोर पिताको देखिहे। फेर तुई क्याँ कोहचिस कि पिता के छे, हमसाक दखा। १० तुई कि विश्वास नी करछिस कि मुई मोर पितार साथे जुड़े छी आर मोर पिता मोर साथे जुड़े छे। जैला बात मुई तुमसाक बोलछी, उला बात मुई अपना अधिकार से नी बोलछी, मगर मोर पिता, जहाँय मोर साथे रहछे, वहाँय अपना काम करछे। ११ मोर बातलार पर विश्वास करेक कि मुई मोर पितार साथे जुड़े छी आर मोर पिता मोर साथे जुड़े छे। आर तोक अगर विश्वास नी होचे, त मोर कामलाय देखे विश्वास

करेक।” १२ मुई तुमसाक सच-सच कोहची, जहाँय मोर पर विश्वास राखछे, वरा इला काम करवा सकेछे, जैला मुई करछी। मगर इला काम से बढे बोड़ो-बोड़ो काम करवा सकेछे क्योंकि मुई पितार लिकिन जाछी। १३ आर जैकुछ तुम्हरा पिता लिकिन से मोर नामे माँगभेन, मुई उला तुमसार तने करूम जसे कि बेटार जरियाय पितार महिमा होय। १४ यदि तुम्हरा कुछ मोर लिकिन से माँगभेन, त मुई उडा करूम।

यीशु पवित्र आत्मा पठाबे

१५ यदि तुम्हरा मोक प्रेम करछेन, त मोर हुकूमलाको मानभेन। १६ मुई मोर पितार लिकिन तुमसार तने बिनती करूम कि वहाँय तुमसार तने एकटा मददगार पठाय, जहाँय तुमसार साथे हरखुना रोहबे। १७ उडा मददगार छे पवित्र आत्मा, जहाँय तुमसाक परमेश्वरेर सच्चाईर बारे बताबे। दुनियाँर लोक पवित्र आत्मार बारे बुझवा नी पारबे क्योंकि ना त वरा पवित्र आत्माक देखवा पारबे आर ना वहार बारे जाने। मगर तुम्हरा पवित्र आत्मार बारे जानेन क्योंकि वहाँय तुमसार साथे रोहचे आर तुमसार भीतरोत रोहबे। १८ मुई तुमसाक अनाथ नी छोड़ुम आर फेर तुमसार लिकिन ओसुम। १९ मुई तुमसार लिकिन आर कुछ समय तक छी। कुछ समय बाद दुनियाँर लोक आर मोक देखवा नी पारबे, मगर तुम्हरा मोक देखभेन। क्योंकि मुई जिन्दा हंय उठुम, वहीलाते तुम्हराव जिन्दा रोहभेन। २० मोर जिन्दा हंय उठवार बाद तुम्हरा जानभेन कि मुई

मोर पितार साथे जुड़े छी आर तुम्हरा मोर साथे जुड़े छेन, आर मुई तुमसार साथे जुड़े छी। २१ जहार लिकिन मोर हुकूम छे आर मोर हुकूम मुताबिक चलछे, वहीं मोक प्रेम करछे। जहाँय मोक प्रेम करछे, वहाक मोर पिताव प्रेम करछे। आर मोहों वहाक प्रेम करूम आर दखा दुम। २२ यीशुर एकझन चेला यहूदा, जहाँय यहूदा इस्किरियोती नी छिले, वहाँय यीशुक पूछिल, “प्रभु! कुन बात छे कि तुई हमसाक दखा दिबो, मगर दुनियाँर लोकोक दखा नी दिबो।” २३ यीशु कोहले, “यदि कोय मोक प्रेम करछे, त वहाँय मोर वचन अपना दिलोत राखबे आर वचन मुताबिक चलबे, आर पिता वहाक प्रेम करबे। मुई आर मोर पिता वहार लिकिन ओसमु आर वहार साथे रोहमु। २४ जहाँय मोक प्रेम नी करछे, वहाँय मोर वचन मुताबिक नी चलछे। जैला वचनोक तुम्हरा सुनछेन, उला मोर नी, मगर पितार छे, जहाँय मोक पठाहे।” २५ “मुई जब तुमसार साथे छी, तुमसाक इला बात बोलछी। २६ मगर पवित्र आत्मा जहाँय तुमसार मददगार छे, जहाक पिता तुमसार लिकिन पठाबे, त उखुना पवित्र आत्मा तुमसाक सब कुछ बताबे आर उला सबला बातोक याद दिलाबे, जैला मुई तुमसाक बोलिही। २७ मुई तुमसार दिलोत शांति दे जाछी। मुई जैडा शांति दिछी, उ-किसम शांति दुनियाँर लोक दुवा नी पारबे। तुम्हरा बेचैन ना होयेन आर ना डोरायन।” २८ “मुई तुमसाक कोहचिनु आर तुम्हरा सुनिहेन, ‘मुई जाछी आर फेर तुमसार लिकिन

ओसुम।’ यदि तुम्हरा मोक प्रेम करछेन, त इडा बात से तुमसाक खुशी हवा चही कि मुई पितार लिकिन जाछी, जहाँय मोसे बोड़ो छे। २९ इला घटना घटवार पहिले मुई तुमसाक इला बात बोलनु जसे कि जैखुना इला घटना घटबे, त जैला बात मुई बोलिही, तुम्हरा विश्वास करवा पारेन। ३० मुई आर बेसी तुमसार साथे बात नी करूम क्याँकि जहाँय दुनियाँत शासन करछे, वहाँय ओसनेवाला छे। मोर पर वहार कोय अधिकार नी छे।” ३१ “मुई उला काम करछी, जैला काम करवार तने मोर पिता मोक हुकूम दिहे जसे कि दुनियाँर लोक जनवा पारे कि मुई मोर पिताक प्रेम करछी। चलो, हमरा इठिन से जई।”

यीशुर साथे जुड़े रहवार फायदा

१५ मुई अंगुरेर असली गाछ छी आर मोर पिता अंगुरेर गाछटार देखभाल करछे। २ जैला लत्ती फल आनछे, उलाक वहाँय छाटेछे जसे कि आढ़ोह बेसी फल आने, मगर जैला लत्ती फल नी आनछे, मोर पिता उलाक काटे फेके दिछे। ३ मुई जैला वचन तुमसाक बोलिही, उलार जरियाय तुम्हरा शुद्ध हंय गहेन। ४ मोर साथे जुड़े रहव, जैकिसम मुई तुमसार साथे जुड़े छी। जैकिसम लत्ती गाछटा से अलग हंय फल अनवा नी पारबे, वही किसम तुम्हरा मोसे अलग हंय कोय फल अनवा नी पारभेन। ५ मुई अंगुरेर गाछ छी आर तुम्हरा लत्ती छेन। जहाँय मोर

साथे जुड़े रोहबे आर मुई वहार साथे, त वहाँय बेसी फल आनबे। अगर तुम्हरा मोर साथे जुड़े नी रोहभेन, त कुछु नी करवा पारभेन। ६ जैडा लोक मोर साथे जुड़े नी रोहबे, त वहाँय एकटा फेकाल लत्तीर मान्दी छे, आर जैखुना लत्तीडा सुखाय जाछे, लोक जमा करे जलाय दिछे। ७ यदि तुम्हरा मोर साथे जुड़े रोहभेन आर मोर वचन तुमसार दिलोत रहय, त जैकुछु तुम्हरा माँगभेन, उला तुमसार तने कराल जाबे। ८ जैखुना तुम्हरा मोर चेला बने खोब फल आनभेन, त इडा से मोर पितार बड़ाई होबे।

यीशु चेलालाक आपसोत प्रेम करवा कोहचे

९-१० जैकिसम पिता मोक प्रेम करिहे, वही किसम मोहों तुमसाक प्रेम करिही। जैकिसम मुई मोर पितार हुकूम अपना दिलोत राखीही आर मोर पिता मोक लगातार प्रेम करछे, वही किसम यदि तुम्हरा मोर हुकूमलाक अपना दिलोत राखभेन, त मुई तुमसार लगातार प्रेम करते रोहमु। ११ मुई तुमसाक इला बात कोहनु जसे कि तुम्हरा मोर साथे खुशी मनायन आर खुशी से भरे जायेन। १२ मोर हुकूम इडा छे कि तुम्हरा एक-दोसराझनाक प्रेम करो जैकिसम मुई तुमसाक प्रेम करिही। १३ अगर कोय लोक अपना बन्धुर तने अपना जानडा दे दिछे, त यहा से बढ़े आर कोय प्रेम नी छे। १४ यदि तुम्हरा मोर हुकूम मुताबिक चलेन, त तुम्हरा मोर बन्धु होभेन। १५ अला से मुई तुमसाक आर नौकर नी बोलमु

क्याँकि नौकर नी जानी कि मालिक की करछे। मगर मुई तुमसाक मोर बन्धु कोहची क्याँकि मुई तुमसाक उला सबला बात कोहची, जैला मोर पिता मोक बोलिहे। १६ तुम्हरा मोक नी चुनिहेन, मगर मुई तुमसाक चुने लिही। मुई तुमसाक चुने काम करवार तने पठाही जसे कि तुम्हरा लगातार फल आनेन। आर मोर नामे मोर पितार लिकिन से जे कुछु माँगभेन, पिता तुमसाक दिबे। १७ मुई तुमसाक इडा हुकूम दिछी कि तुम्हरा एक-दोसराझनाक प्रेम करो।

दुनियाँर लोक चेलाला से नफरत करबे

१८ यदि दुनियाँर लोक तुमसासे नफरत करछे, त इडा जाने लव कि तुमसाक नफरत करवार पहिले वरा मोसे नफरत करिहिले। १९ यदि तुम्हरा इडा दुनियाँर लोक होलेनतेन, त वरा तुमसाक प्रेम करिलतेन। मुई तुमसाक उसार बीच से चुने लिही। इडा कारण तुम्हरा दुनियाँर लोक नी छेन, वहीलाते वरा तुमसासे नफरत करछे। २० मोर बातटाक याद करो जैडा मुई तुमसाक कोहिनु, “नौकर मालिक से बोड़ो नी होचे।” अगर वरा मोक सतवा नी छोड़िहे, त तुमसाको सतवा नी छोड़बे। अगर वरा मोर बातलाक मानिलतेन, त तुमसारो बातलाक मानिलतेन। २१ वरा मोर नामेर कारण से तुमसार साथे इला करबे क्याँकि वरा मोर पठानेवालाक नी जाने। २२ मुई अगर ओसे उसाक नी बतानुतन, त वरा दोषी नी होलतन। मगर अला उसार अपना पाप

छिपवार तने कोय बहानाबाजी नी चलबे। २३ जहाँय मोसे नफरत करछे, वहाँय मोर पिताको नफरत करछे। २४ मुई उसार बीचोत उला काम करछी, जैला कोय नी करे। अगर मुई उकिसम नी करनुतेन, त वरा दोषी नी होलतन। मगर उला काम देखवार बादो वरा मोसे आर पिता से नफरत करछे २५ जसे कि शास्त्रेर इडा बात पूरा हंय, वरा मोक बिना कारण नफरत करिल। २६ मगर तुमसार मददगार पवित्र आत्मा, जहाँय परमेश्वरेर सच्चाईर बारे बताछे, जैखुना वहाक मुई पितार लिकिन से तुमसार लिकिन पठाम, वहाँय मोर बारे बताबे। २७ आर तुम्हराव मोर बारे बताभेन क्याँकि तुम्हरा शुरू से मोर साथे छेन।

पवित्र आत्मा मददगार छे

१६ इला सबला बात मुई तुमसाक बताही जसे कि तुम्हरा विश्वास से दूर ना हंय जायन। १ लोकला तुमसाक प्रार्थना-घरोत प्रार्थना करवा नी दिबे। समय ओसछे, लोक तुमसाक जान से मारे दिबे आर समझिबे कि वरा परमेश्वरेर तने बलिदान करछे। २ वरा इला करबे क्याँकि ना त वरा मोक चिन्हछे आर ना मोर पिताक जानछे। ४ मुई तुमसाक इला बात बोलनु। जैखुना इला घटना घटबे, उखुना तुम्हरा याद करभेन कि मुई तुमसाक इला बात कोहिनु। मुई तुमसाक इला बात पहिले नी बताहिनु क्याँकि मुई तुमसार साथे छिनु। ५ मगर अला मुई मोर पठानेवालार

लिकिन जाछी आर तुमसार बीच से कोय मोक नी पूछोछेन कि तुई कुन्हियाँ जाछिस? ६ मोर बातला सुने तुम्हरा बहुत उदास हंय गहेन। ७ मगर मुई सच-सच कोहची कि मोर जाना तुमसार तने फैदामंद छे। अगर मुई नी जई, त तुमसार मददगार नी ओसबे। अगर मुई जई, त तुमसार तने मददगार पठाम। ८ आर वहाँय ओसे दुनियाँर लोकेर पापेर बारे, परमेश्वरेर मुताबिक चलवार बारे आर वहार इन्साफेर बारे बताबे। ९ लोकेर पापेर बारे बताबे क्याँकि वरा मोर पर विश्वास नी करछे। १० वहाँय परमेश्वरेर मुताबिक चलवार बारे बताबे क्याँकि मुई मोर पितार लिकिन जाछी। तुम्हरा मोक आर देखवा नी पारभेन। ११ वहाँय परमेश्वरेर इन्साफेर बारे बताबे क्याँकि इ-दुनियाँर पर शासन करनेवाला दोषी छे। १२ मोर लिकिन तुमसाक बोलवार तने आढ़ोह बहुत कुछ छे, मगर बोलले तुम्हरा अला सहवा नी पारभेन। १३ पवित्र आत्मा परमेश्वरेर सच्चाईर बारे बताछे, वहाँय ओसे तुमसाक सच्चाईर रास्तात ले जाबे। वहाँय अपना अधिकार से कुछ नी बोलबे, मगर जैकुछु वहाँय सुनबे, वहार मुताबिक बोलबे आर होनेवाला बातोक बताबे। १४ वहाँय मोर महिमा करबे आर तुमसाक मोर बातलाक बताबे। १५ जैकुछु पितार छे, उला मोर छे। वहीलाते मुई तुमसाक बतानु कि वहाँय तुमसाक मोर बातलाक बताबे।

दुःख सुखोत बदले जाबे

१६ कुछ देर बाद तुम्हरा मोक देखवा नी पारभेन, मगर कुछ देर बाद तुम्हरा मोक देखभेन। १७ सुने वहार कुछला चेला आपसोत कहवा लागिल, “वहार इडा बोलवार मतलब कि छे, ‘कुछ देर बाद तुम्हरा मोक देखवा नी पारभेन, मगर कुछ देर बाद तुम्हरा मोक देखभेन। आर मुई मोर पितार लिकिन जाछी।’ १८ ‘कुछ देर’ यहार की माने छे? वहार बोलवार मतलब हमरा बुझवा नी पारछी।” १९ यीशु जाने गेल कि वरा मोर लिकिन पूछवा चाहचे। वहीलाते वहाँय उसाक कोहले, “तुम्हरा अपना-अपना दिलोत इडा सवाल करछेन कि इडा कहवार मतलब कि छे, कुछ देर बाद तुम्हरा मोक देखवा नी पारभेन, मगर कुछ देर बाद तुम्हरा मोक देखभेन। २० मुई तुमसाक सच-सच कोहची, तुम्हरा कानभेन आर शोक मनाभेन, मगर दुनियाँर लोक खुशी मनाबे। तुमसार जिन्दगी दुःख से भरे जाबे। मगर बाद करे दुःखेर बाद तुम्हरा खुशी मनाभेन। २१ जैकिसम कि जैखुना कोय स्त्रीर बच्चा जनम लिछे, त वहाक दरद होचे। मगर छुवाडा जनम हवार बाद अपना दरद भूले जाछे आर खोब खोश होचे क्योंकि वहाँय एकटा मानुषोक दुनियाँत जनम दिले।” २२ अला तुमसार पर दुःख छे। मोर मुलाकात तुमसार साथे फेर होबे आर तुम्हरा दिलोत खोब खोश होभेन। इडा खुशी तुमसार लिकिन से कोय लुवा नी पारबे। २३ उखुना तुम्हरा आर कुछ मोर लिकिन से नी

माँगभेन। मुई तुमसाक सच-सच कोहची, “यदि मोर नामे मोर पितार लिकिन से कुछु माँगभेन, त वहाँय तुमसाक दिबे। २४ अभी तक तुम्हरा मोर नामे पितार लिकिन से कुछु नी माँगयेन। अला से तुम्हरा माँगभेन, त तुमसाक देयाल जाबे जसे कि तुमसार दिलोत खुशी भरे जाय।” २५ मुई इला सबला बात तुमसाक मिसाल दे बोलनु। समय ओसछे कि मुई कोय बात आर मिसाल दे नी बोलमु। मगर पितार बारे सबला बात साफ-साफ बताम। २६ उडा समय तुम्हरा मोर नामे माँगभेन। मुई तुमसाक कोहची कि मुई तुमसार तरफ से पितार लिकिन से कुछु नी माँगमु। २७ पिता तुमसाक प्रेम करछे क्योंकि तुम्हरा मोक प्रेम करछेन आर विश्वास करिहेन कि पिता मोक पठाहे। २८ मुई पितार लिकिन से दुनियाँत ओसिही आर फेर दुनियाँ छोड़े पितार लिकिन जाम। २९ वहार चेलाला बोलिल, “अला तुई साफ-साफ बोलछिस, कोय मिसाल दे नी बोलछिस। ३० अला हमसाक मालूम हंय गेल कि तुई सब कुछु जानिस आर कहाको तोसे आर कोय सवाल करवार जरूरी नी छे। इला से हमसाक मालूम हंय गेल कि तुई परमेश्वरेर लिकिन से ओसिहिस।” ३१ यीशु उसाक कोहले, “सही माने तुमसाक विश्वास हंय गहे कि मुई पितार लिकिन से ओसिही। ३२ एकटा समय ओसछे। समझे लव कि उडा समय चले ओसिहे कि तुम्हरा तितर-बितर हंय जाभेन आर मोक छोड़े भागे जाभेन। मगर मुई अकेला नी छी क्योंकि मोर पिता मोर साथे

छे। ३३ मुई तुमसाक इडा कोहनु जसे कि मोर साथे जुड़े रहवार कारण तुमसाक शांति मिले। दुनियाँत तुमसार पर बिपत्ति पोड़बे। मगर हिम्मत राखो क्याँकि मुई दुनियाँर शक्तिक हराय दिही।”

विश्वासी लोकेर तने यीशु प्रार्थना

१७ इला बात बोलवार बाद यीशु अपना आँख स्वर्गेर भीति उठाय कोहले, “पिता! समय ओसे गहे कि तुई अपना बेटार महिमा करेक जसे कि बेटाव तोर महिमा करे २ क्याँकि तुई वहाक सबला मानुषेर पर अधिकार दिहिस। जतेला लोकोक तुई वहार हाथोत दिहिस, उला लोकोक वहाँय हमेशार जिन्दगी दे।” ३ हमेशार जिन्दगीर माने होचे कि वरा तोक सिरिफ एक सच्चा परमेश्वरोक जाने आर यीशुक जाने, जहाक तुई पठाहिस। ४ जैखान काम तुई मोक करवा दिहिलो, उखान कामोक मुई पूरा करे दुनियाँत तोर महिमा करिही। ५ हे पिता, दुनियाँडा बनवार आगुत मोर जैडा महिमा तोर साथे छिले, उडा महिमा मोक दे। ६ तुई दुनियाँ से जैला लोकोक मोक दिहिस, उसाक मुई तोर बारे बताही। वरा तोर छिले आर तुई उसाक मोर हाथोत दे दिहिस। आर वरा तोर बातलाक माने लिहे। ७ अला वरा जाने गहे कि जैकुछु तुई मोक दिहिस, उला सबला तोर तरफ से छे। ८ तुई जैला-जैला बात बोलिहिस, मुई उलाक उसार लिकिन पहुँचाय दिही, आर वरा उला बातोक माने

लिहे। आर वरा जाने गहे कि मुई सचमुच तोर लिकिन से ओसिही, आर विश्वास करिहे कि तुहें मोक पठाहिस। ९ मुई दुनियाँर सब लोकेर तने प्रार्थना नी करछी, मगर उसार तने करछी, जहाक तुई मोर हाथोत दे दिहिस क्यौंकि वरा तोर छे। १० आर जैला लोक मोर छे, उला सबला तोर छे, आर जैला लोक तोर छे, उला सबला मोर छे। वरा मोर बारे लोकोक बताछे कि मुई कताखान शक्तिशाली छी। ११ अला मुई तोर लिकिन ओसछी। मुई आर बेसी दिन तक दुनियाँत नी रोहमु, मगर यरा दुनियाँत रोहबे। ऐ पवित्र पिता! जैडा नाम तुई मोक दिहिस, उडा नाम दे तुई उसाक बचा जसे कि वरा हमसार मान्दी एक बने रहय। १२ जैखुना मुई उसार साथे छिनु, मुई उसाक तोर नाम दे बचाय राखनु, जैडा नाम मोक दिहिस। उसार अन्दर से कोय नाश नी होय। खाली वहाँय, जहार नाश हवार बारे पहिले से निश्चय कराल छिले जसे कि शास्त्रेर बातला पूरा होय। १३ अला मुई तोर लिकिन ओसछी। आर जैखुन तक मुई दुनियाँत छी, मुई मोर चेलालाक इला सिखाछी जसे कि वरा मोर मान्दी बहुत खुशी से भरे जाय। १४ मुई उसाक तोर वचन दिनु, मगर दुनियाँर लोक उसासे नफरत करियेह क्यौंकि वरा दुनियाँर लोक नी छे, जैकिसम मुई इडा दुनियाँर लोक नी छी। १५ मुई बिनती करछी कि तुई उसाक दुनियाँ से ना ले जा, मगर उसाक दुष्ट शैतान से बचाय राख। १६ मोर चेलाला इडा दुनियाँर लोक नी छे, जैकिसम मुई इडा दुनियाँर

लोक नी छी। १७ तुई अपना सत्य वचनेर जरियाय उसाक पवित्र कर।
१८ जैकिसम तुई मोक अपना इच्छा पूरा करवार तने दुनियाँत पठाहिस,
वही मान्दी मुई उसाक तोर इच्छा पूरा करवार तने पठाही। १९ उसार तने
मुई अपना-आपोक समर्पन करे दिही जसे कि वराव सच्चा दिल से तोर
कामेर तने अपना-आपोक समर्पन करे दे। २० मुई सिरिफ अपना
चेलालार तने बिनती नी करछी, मगर उला लोकेरो तने बिनती करछी,
जैला लोक मोर चेलालार वचन सुने मोर पर विश्वास करबे। आर मुई
बिनती करछी कि वरा एक बने रहय। २१ पिता! जैकिसम तुई मोर साथे
जुड़े छिस आर मुई तोर साथे जुड़े छी, वही किसम सबला विश्वासी
हमसार साथे जुड़े रहय जसे कि दुनियाँर लोक विश्वास करे कि तुई
मोक पठाहिस। २२ तुई जैडा शक्ति मोक दिहिस, उडा शक्ति मुई
उसाक दिही जसे कि वरा एक बने रहवा पारे, जैकिसम तुई आर मुई
मिले एक छी। २३ मुई उसार साथे जुड़े छी आर तुई मोर साथे जुड़े छिस
जसे कि वरा पुरा-पुरी एक बने जाय। आर इडा से दुनियाँर लोक जानबे
कि तुई मोक पठाहिस। आर जैकिसम तुई मोक प्रेम करिहिस, वही
किसम उसाको प्रेम करेक। २४ पिता! मोर इडा इच्छा छे कि जैला
लोकोक तुई मोर हाथोत दिहिस, वरा मोर साथे रहय। यहार बाद वरा
मोर उडा शक्ति देखवा पारे, जे शक्ति तुई मोक प्रेम करे दुनियाँ बनवार
पहिले से दिहिलो। २५ पिता! तुई हरखुना सही इन्साफ करछिस।

दुनियाँर लोक तोक नी जाने, मगर मुई तोक जानी, आर मोर चेलालाव जाने कि तुई मोक पठाहिस। २६ मुई तोर बारे मोर चेलालाक बताय दिही। आर यहोडा बताय कि तुई जैकिसम मोक प्रेम करिहिस, वही किसम वराव आपसोत प्रेम करे कि मुई उसार साथे जुड़े रहई।

यीशुक कैद करे लिया ल जाछे

(मत्ती २६:४७-५६; मरकुस १४:४३-५०; लूका २२:४७-५३)

१८ जैखुना यीशु प्रार्थना करे लिले, वहाँय अपना चेलालार साथे किद्रोन नामेर छोटो बरसाती नदी पार करिल। दोसरा भीति जैतून पहाड़ेर एकटा बगीचा छिले। वहाँय आर वहार चेलाला बगीचाडात गेल। १ यहूदा, जहाँय यीशुक धोखा दे धराय देनेवाला छिले, वहाँय उखान जगहोक जानछिले, क्योंकि अकसर यीशु अपना चेलालार साथे उठिन जाछिले। ३ वहीलाते यहूदा मुख्य पूजारीर आर फरीसी लोकेर पठाल कुछुला पहरादार आर रोमी सैनिकेर दल ले उडा बगीचात ओसिल। उसार साथे मशाल, लालटेन आर हथियार छिले। ४ यीशुर पर जे कुछु बितनेवाला छिले, उला सबला वहाँय जानछिले। वहीलाते वहाँय उसार लिकिन गेल आर उसाक पूछिल, “तुम्हरा कहाक छाभछेन?” ५ वरा जवाब दिले, “नासरत शहरेर यीशुक।” यीशु बोलिल, “मुहें उडा लोक छी।” यहूदा, जहाँय यीशुक धोखा दे धराय देनेवाला छिले, उठिन उसार साथे थाड़ो हंय छिले। ६ जैखुना यीशु इडा कोहले, “उडा लोक मुहें

छी।” वरा पीछू हटे गेल आर माटीत पोड़े गेल। ७ यीशु फेर उसाक पूछिल, “तुम्हरा कहाक छाभछेन?” वरा कोहले, “नासरत शहरेर यीशुक।” ८ यीशु जवाब दिले, “मुई तुमसाक कोहय दिनु कि उडा लोक मुहें छी। अगर तुम्हरा मोक छाभछेन, त इला लोकोक जवा दव।” ९ इला घटना घटिल जसे कि यीशुर बोलाल बातला पूरा हंय। वहाँय बोलिहिले “पिता! तुई जतेला लोकोक मोर हाथोत दिहिस, उसाक सभाको मुई संभलाय राखीही।” १० शिमोन पतरसेर लिकिन एकखान तलवार छिले। वहाँय अपना तलवारखान निकलाय महापूजारीर नौकरेर दाहिनाडा कान काटे गिराय दिले। (उडा नौकरेर नाम मलखुस छिले।) ११ यीशु पतरसोक बोलिल, “अपना तलवारखान अपनार लिकिन राख। देख! जैखान दुःख मोर पिता मोर तने ठहराहे, उखान दुःख त मोक उठवा होबे।” १२ यहार बाद रोमी सैनिकला, उसार हाकिम आर यहूदी लोकेर पठाल पहरादारला मिले यीशुक धरिल आर बान्हें दिले। १३ आर वहाक पहिले हन्नार लिकिन ले गेल, जहाँय उडा समयेर महापूजारी कैफार ससुर छिले। १४ कैफा उडा महापूजारी छिले, जहाँय यहूदी लोकोक सलाह दिहिले कि हमसार लोकलार तने एकझन लोकोक मरना अच्छा छे।

पतरस यीशुक इन्कार करछे

(मत्ती २६:६९-७०; मरकुस १४:६६-६८; लूका २२:५५-५७)

१५ शिमोन पतरस आर एकझन दोसरा चेला यीशुर पीछू-पीछू गेल, आर इडा चेला महापूजारीर जान-पहचानेर लोक छिले। वहीलाते वहाँय यीशुर साथे महापूजारीर अंगनात गेल। १६ मगर पतरस बाहरकार दरवजार बगलोत थाड़ो हंय रोहोल। तब दोसराडा चेला, जहाँय महापूजारीर जान-पहचानेर छिले, बाहरे ओसिल आर चौकीदारीनेर साथे बात करिल आर पतरसोक भीतरोत ले गेल। १७ चौकीदारीनडा पतरसोक कोहले, “तोहों त इडा लोकेर चेला छिस।” पतरस कोहले, “नी। मुई वहार चेला नी छी।” १८ नौकरला आर पहरादारला कोयला दे आगिन जलाल क्याँकि रात करे ठंडा छिले, आर वरा सबकोय आगिनेर बगलोत थाड़ो हंय आगिन तापछिले। पतरसो उछिन थाड़ो हंय आगिन तापछिले।

यीशु महापूजारीर सामनात

(मत्ती २६:५९-६६; मरकुस १४:५५-६४; लूका २२:६६-७१)

१९ महापूजारी यीशुक वहार चेलालार बारे आर वहार शिक्षार बारे पूछ-ताछ करिल। २० यीशु वहाक जवाब दिले, “मुई खुल्लम-खुल्ला दुनियाँर लोकलार साथे बात करछिनु। मुई हरखुना प्रार्थना-घरलात आर मंदिरोत उपदेश दिछिनु, जैठिन हमसार यहूदी लोकला जोड़ो होचे। मुई नुकाय

कुछु नी करी। २१ तुई मोक क्याँ पूछेछिस? उसार लिकिन से पूछेक, जहाँय मोर बातला सुनछिले। मुई जैला बात बोलिही, वरा जाने।” २२ एकटा पहरादार बगलोत थाड़ो हंय छिले। जैखुना वहाँय इला बात बोलिल, उडा पहरादार यीशुक थप्पर मारिल आर कोहले, “तुई महापूजारीक इकिसम जवाब क्याँ दिलो?” २३ यीशु पहरादारटाक बोलिल, “अगर मुई कुछु खराब बोलनु, त बता की खराब बोलनु? अगर मुई ठीक-ठीक बोलनु, त तुई मोक क्याँ मारलो?” २४ तब हन्ना वहाक बन्हाल हालतोत कैफा महापूजारीर लिकिन पठाय दिले।

पतरस फेर यीशुक इन्कार करछे

(मत्ती २६:७१-७५; मरकुस १४:६९-७२; लूका २२:५८-६२)

२५ शिमोन पतरस थाड़ो हंय आगिन तापछिले। लोकला वहाक पूछिल, “तोहों त वहार चेला छिस।” वहाँय इन्कार करे कोहले, “मुई नी छी।” २६-२७ फेर महापूजारीर एकटा नौकर पतरसोक पूछिल, “मुई त तोक वहार साथे जैतून बगीचात देखिहिनु।” पतरस फेर इन्कार करिल आर वहीखुना मुर्गाडा बाँग दे दिले। इडा नौकर उडा लोकेर रिस्तेदार छिले, जहार कानडा पतरस काटे दिहिले।

राजपाल पिलातुसेर सामनात यीशु

(मत्ती २७:१-२, ११-१८, २१; मरकुस १५:१-१०; लूका २३:१-५, १३-२५)

२८ यहार बाद बेहाने वरा यीशुक कैफार लिकिन से सैनिक निवासोत ले गेल। मगर यहूदी लोकला सैनिक निवासेर भीतरोत नी गेल, जसे कि वरा छुताय ना जाय आर फसह परब खवा पारे। २९ यहार बाद पिलातुस उसार लिकिन बाहरे निकले ओसिल आर पूछिल, “तुम्हरा इडा लोकेर पर कुन दोष लगाछेन?” ३० वरा पिलातुसोक जवाब दिले, “अगर यहाँय कुकरमी नी होलतेन, त हमरा तोर हाथोत वहाक नी सोपनुतेन।” ३१ पिलातुस उसाक कोहले, “तुम्हरा वहाक ले जाव आर अपना नियम-कानूनेर मुताबिक इन्साफ करो।” यहूदी लोकला वहाक जवाब दिले, “हमसाक कहारो जान लुवार अधिकार नी छे।” ३२ यहूदी लोक इकिसम बोलिल जसे कि यीशुर कहाल बातला पूरा होय कि वहार मौत कुन किसम करे होबे। ३३ तब पिलातुस आरमने फौजेर निवासेर भीतरोत गेल, आर फेर यीशुक जाब दे पूछिल, “तुई की यहूदी लोकेर राजा छिस?” ३४ यीशु वहाक जवाब दिले, “तुई कि मोर बारे इडा बात अपना मन से कोहचिस, ना कोय दोसरा लोक इडा बात तोक कोहये?” ३५ पिलातुस वहाक जवाब दिले, “मुई त यहूदी नी छी। तोहरे लोक आर मुख्य पूजारीला तोक मोर हाथोत सोंपे दिहे। तुई की करिहिस?” ३६ यीशु जवाब दिले, “मोर राज इडा दुनियाँर नी छे। अगर मोर राज इ-दुनियाँर होलतेन, त मोर सबला नौकर मोर तने लड़ाई करिलतन, जसे

कि मुई यहूदी लोकेर हाथोत सोपाल नी गेनुतन। मगर मोर राज इ-
दुनियाँर नी छे।” ३७ पिलातुस पूछिल, “तुई की राजा छिस?” यीशु
कोहले, “तुहें कोहचिस कि मुई राजा छी। मुई इ-दुनियाँत जनम लिही
जसे कि मुई सच्चाईर बारे लोकोक बताई। जहाँय सच्चाईक जानछे,
वहाँय मोर बात सुनछे।” ३८ पिलातुस वहाक पूछिल, “सच्चाई की
छे?” इडा कोहय वहाँय आरमने यहूदी लोकलार लिकिन गेल आर
उसाक कोहले, “मुई त यहार कोय कसूर नी पाछी। ३९ तुमसार रेवाज
मुताबिक फसह परबेर समय एकटा कैदीक छोड़े देयाल जाछे। तुम्हरा
चाहचेन कि मुई तुमसार तने यहूदी लोकेर राजाक छोड़े दी?” ४० तब
वरा चिल्लाय कोहले, “यीशुक नी, मगर हमसार तने बरब्बासोक छोड़े
दे।” बरब्बास एकझन डाकू छिले।

१९ इकिसम बोलवार बाद पिलातुस यीशुक कोड़ा लगवार हुकूम दिले।
२ अपमान आर मजाक करवार तने सिपाहीला वहार माथात काँटार
मुकुट पिन्हाल आर बैगनी रंगेर कपड़ा पिन्हाय दिले, ३ आर वहार
बेज्जत करे बोलिल, “यहूदी लोकेर राजा! प्रणाम।” आर वहाक थप्पर
मारिल। ४ यहार बाद पिलातुस बाहरे ओसे लोकलाक बोलिल, “देख!
मुई वहाक तुमसार लिकिन बाहरे ले ओसछी, जसे कि तुम्हरा जनवा
पारेन कि मुई वहार कोय कसूर नी पानु।” ५ तब यीशुक काँटार मुकुट

आर बैगनी कपड़ा पिन्हाल बाहरे ले ओसिल। पिलातुस उसाक कोहले, “इडा लोकोक देखो!” ६ जैखुना बोड़ोला पूजारी आर सिपाहीला यीशुक देखिल, त वरा चिल्लाय बोलिल, “वहाक क्रुसेर पर चढ़ाव। क्रुसेर पर चढ़ाव।” पिलातुस उसाक कोहले, “तुम्हराय वहाक क्रुसेर पर चढ़ाव, क्याँकि मुई यहार कोय कसूर नी पाछी।” ७ यहूदी लोकला वहाक जवाब दिले, “हमसार नियम मुताबिक यहारक जान से मारे दुवा चही क्याँकि यहाँय अपना-आपोक परमेश्वरेर बेटा कोहचे।” ८ इडा बात सुने पिलातुस बहुत डोराय गेल। ९ आर पिलातुस फेर फौजेर निवासोत गेल आर यीशुक कोहले, “तुई कुनठिनकार छिस?” मगर यीशु वहाक कोय जवाब नी दिले। १० इडा देखे पिलातुस वहाक पूछिल, “मोक जवाब क्याँ नी दिछिस? तुई कि जानिस नी, मोक तोक छोड़े दुवार अधिकार छे, आर तोक क्रुसेर पर चढ़वारो अधिकार छे।” ११ यीशु वहाक जवाब दिले, “अगर इडा अधिकार तोक परमेश्वरेर लिकिन से देयाल नी गेलतन, त तोक मोर पर कोय अधिकार नी होलतन। जैडा लोक तोर हाथोत मोक धराय दिहे, वहार पाप तोर पाप से बेसी छे।” १२ इला बात सुने पिलातुस वहाक छोड़े दुवा चाहले, मगर यहूदी लोकला चिल्लाय-चिल्लाय कोहले, “अगर तुई यहारक छोड़े दिस, त तुई महाराजार दोस्त नी छिस, क्याँकि जहाँय कोहचे कि मुई राजा छी, त वहाँय महाराजार दुश्मन छे।” १३ इडा बात सुने पिलातुस यीशुक बाहरे आनिल, आर

इन्साफ करवार गद्दीत बोठिल। इडा गद्दी पत्थलेर बनाल एकटा चबूतारा छिले, जैडाक इब्रानी भाषात गब्बता कहाल जाछिल। १४ फसह परबेर तैयारीर दिन छिले आर इडा लगभग दुई पोहरेर समय छिले। तब पिलातुस यहूदी लोकलाक कोहले, “देखो, तुमसार राजाक।” १५ मगर वरा चिल्लाय कोहले, “ले जाव। वहाक क्रुसेर पर चढ़ाव।” पिलातुस उसाक कोहले, “मुई की तुमसार राजाक क्रुसेर पर चढ़ामु?” बोड़ोला पूजारी जवाब दिले, “रोमेर महाराजाक छोड़े, हमसार कोय राजा नी छे।” १६ तब पिलातुस यीशुक उसार हाथोत सोंपे दिले, जसे कि वहाक क्रुसेर पर चढ़ाल जाय।

यीशुक क्रुसेर पर चढ़ाल जाछे

(मत्ती २७:३२-४४; मरकुस १५:२१-३२; लूका २३:२६-३९)

१७ तब वरा यीशुक ले गेल। यीशु अपना क्रुसटाक उठाय खोपरी नामेर जगहोत गेल, जैखान जगहोक इब्रानी भाषात गुलगुता कहाल जाछे। १८ उठिन वरा यीशुक क्रुसेर पर चढ़ाल। आर वहार साथे आढ़ोह दुईझन कैदीक चढ़ाल। एकटा कैदीक यीशुर दहिना भीति आर दोसराझनाक बाँया भीति क्रुसेर पर चढ़ाल। १९ पिलातुस एकखान तख्तार पर यीशुर बारे लिखवाल आर क्रुसेर पर लटकाय दिले। तख्ताखानोत लिखाल छिले, “नासरत शहरेर यीशु यहूदी लोकेर राजा।” २० तख्तार पर लिखाल बातला बहुतला यहूदी लोक पढ़िल, क्योंकि जैखान जगहोत

यीशुक क्रुसेर पर चढ़ाल गहिले, उखान जगह शहरेर बगलोत छिले।
आर तख्ताखानोत इब्रानी, लतीनी, आर यूनानी भाषात लिखाल छिले।
२१ तब यहूदी लोकेर बोड़ोला पूजारी पिलातुसोक कोहले, यहूदी लोकेर
राजा ना लिखेक, मगर इडा लिखेक कि वहाँय कोहले, “मुई यहूदी
लोकेर राजा छी।” २२ पिलातुस जवाब दिले, “मुई जैडा लिखे दिनु,
लिखे दिनु।” २३ जैखुना फौजला यीशुक क्रुसेर पर चढ़ाल, तब वहार
कपड़ालाक अपना बीचोत चार हिस्सा करे बाँटे लिले। वहार बाद
कुरताडाव लिले, आर उडा कुरतात उपर से नीचान तक कोय सिलाई
नी छिले। २४ वहीलाते वरा अपना बीचोत कोहले, “हमरा इडाक नी
चिरमु, मगर इडार पर लौटरी लगामु, जसे कि इडा जनवा पारी कि
कुरताडा कहार होबे।” आर इकिसम पवित्र शास्त्रेर बहुत पहिले से
लिखाल बात पूरा हंय गेल। लिखाल गहिले, वरा मोर कपड़ाला अपना
बीचोत बाँटे लिले, आर मोर कपड़ालार पर लौटरी लगाल। फौजला यही
किसम करिल। २५ यीशुर क्रुसेर लिकिन वहार माँ, आर वहार मुषी,
कलोपासेर पत्नी मरियम, आर मरियम मगदलीनी थाड़ो हंय छिले।
२६ जैखुना यीशु अपना माँक देखिल आर चेलाडा, जहाक वहाँय प्रेम
करछिले, अपना बगलोत थाड़ो देखिल, त वहाँय अपना माँक कोहले,
“देखेक! यहाँय तोर बेटा।” २७ आर चेलाडाक कोहले, “यहाँय तोर
माँ।” वहीखुना चेलाडा यीशुर माँक अपना घरोत ले गेल। २८ यहार बाद

यीशु इडा जाने कि सब कुछ पूरा हंय गेल कोहले, “मोक प्यास लागिहे।” वहाँय इडा कोहले जसे कि पवित्र शास्त्रेर वचन पूरा हंय जाय। २९ उठिन खट्टा अंगुरेर रस से भराल एकटा घड़ा छिले। वरा एकखान इस्पंज लिले आर अंगुरेर रसखानोत डुबाल आर जुफा नामेर एकटा गाछेर ठल्लीत लगाय यीशुर मुखोत दिले। ३० आर यीशु इखान रसोक चाखे कोहले, “पूरा होल” आर अपना माथाडा नीचान करे अपना प्राण दे दिले।

यीशुक बलम घोपे दिछे

३१ उदिना फसह परबेर तैयारीर दिन छिले। वहीलाते यहूदी लोकला नी चाहचिले कि यीशुर लाशटा आरामेर दिनोत क्रुसोत रहेंय जाय, क्योंकि उडा आरामेर दिनोत फसह परब छिले। वरा पिलातुसेर लिकिन बिनती करिल कि उसार पाँलाक भाँगे देयाल जाक आर लाशलाक हटाय लिया ल जाक। ३२ वहीलाते जे दुईझन कैदीको क्रुसेर पर चढ़ाल गहिले, सिपाहीला उसार पाँला भाँयें दिले। ३३ मगर जैखुना फौजला यीशुर लिकिन ओसे देखिल कि वहाँय मोरे गहे, त वरा वहार पाँला नी भाँगिल। ३४ मगर एकझन फौज वहार कोखाडात भाला मारिल, आर वहार शरीर से खून आर पानी निकलिल। ३५ जैडा लोक इडा देखिल वहाँय खुद बताले, आर वहार बातटा सच छे, जसे कि तुम्हराव विश्वास करवा पारेन। ३६ इकिसम घटना घटिल जसे कि परमेश्वरेर शास्त्रोत

लिखाल बातटा पूरा हंय जाय। परमेश्वरेर शास्त्रोत लिखाल छे, “वहार एकखान हड्डीवो भँगाल नी जाबे।” ३७ फेर आढ़ो एकठिन लिखाल छे, “जहाक वरा बलम मारिहे, वरा वहाक देखबे।”

यीशुक कबरोत देयाल जाछे

(मत्ती २७:५७-६१; मरकुस १५:४२-४७; लूका २३:५०-५६)

३८ अरिमतियाह शहरेर रहनेवाला यूसुफ यीशुर एकझन चेला छिले, मगर वहाँय यहूदी लोकेर डोरे इडा बातोक छुपाय राखिहिले कि वहाँय यीशुर एकझन चेला छिले। वहाँय यीशुर लाशटाक ले जवार तने पिलातुसेर लिकिन बिनती करिल। पिलातुस वहार बिनतीडा मंजूर करे लिले, आर यूसुफ यीशुर लाशटाक ले गेल। ३९ निकुदेमुस जहाँय पहिले रात करे यीशुर लिकिन गहिले, पचास सेर मोहकाल तेल आर एलवा मसाला ले ओसिल। ४० तब वरा यीशुर लाशटा लिले, आर यहूदी लोकेर कबर दुवार नियम मुताबिक वहार पर मोहकाल माशाला लेप दिले आर मखमल कपड़ा दे लेपटिल। ४१ जैखान जगहोत यीशुक क्रुसोत चढ़ाल गहिले, उछिन एकटा बगीचा छिले। उडा बगीचात एकटा कबर छिले, जैडात कहाको कभी रखाल नी जाय। ४२ वहीलाते यहूदी लोकेर फसह परबेर तैयारीर दिनेर कारण से वरा वहाक वहीडा कबरोत राखे दिले, क्योंकि उडा कबर बगलोत छिले।

यीशु कबर से जिन्दा हंय उठछे

(मत्ती २८:१-१०; मरकुस १६:१-८; लूका २४:१-१२)

२० हप्तार पहिला दिनोत मरियम मगदलीनी बेहाने अन्हार रोहते कबरटार लिकिन ओसिल, आर पत्थलखानोक कबरटार मुखखान से सरकाल देखिल। २ तब वहाँय दौड़े शिमोन पतरस आर दोसराडा चेला लिकिन ओसिल, जहाक यीशु प्रेम करछिले। उसार लिकिन ओसे कोहले, “कोय लोक प्रभुक कबर से निकलाय ले गहे आर हमरा नी जानी कि वहाक कुनठिन राखियेह।” ३ यहार बाद पतरस आर दोसराडा चेला उठे कबरटार भीति गेल। ४ दोनोंइन एक साथ दौड़ेछिले। मगर दोसराडा चेला पतरस से आगुत कबरटार लिकिन पहुँचे गेल ५ आर झूके देखिल कि वहार कपड़ाला पोड़े छे। मगर वहाँय कबरटार भीतरोत नी गेल। ६ यहार बाद शिमोन पतरस वहार पीछू-पीछू पहुँचिल, आर कबरटार भीतरोत गेल आर कपड़ालाक देखिल कि उला पोड़े छे। ७ आर जैखान कपड़ा दे वहार माथाडा बन्हाल छिले, उखान कपड़ा कपड़ालार साथे नी छिले, मगर दोसरा ठिन लेपटाल पोड़े छिले। ८ तब दोसराइन चेलाव जहाँय कबरटार लिकिन पहिले गहिले, वहाँय भीतरोत गेल, आर देखे विश्वास करिल कि यीशु जिन्दा हंय उठिहे। ९ यहा से पहिले वरा पवित्र शास्त्रेर बात समझवा नी पारे कि वहाँय मौत से जिन्दा हंय उठबे। १० यहार बाद दोनोंइन चेला अपना घर वापस

चले गेल। ११ मगर मरियम कबरटार बाहरे थाड़ो हंय कानछिले आर कानते-कानते कबरटार भीतरो झूके देखिल, १२ वहाँय भीतरोत दुईझन फरीस्ताक सादा कपड़ा पिन्हाल देखिल, जैठिन यीशुर लाशटाक राखिहिले। एकझन माथार लिकिन आर दोसराझन पाँलार लिकिन बठाल छिले। १३ फरीस्ताला वहाक कोहले, “तुई क्याँ कानछिस?” वहाँय फरीस्ताक कोहले, “कोय मोर प्रभुक उठाय ले गहे, आर मुई नी जानी कि वहाक कुनठिन राखे दिहे?” १४ इडा कोहय वहाँय पीछू भीति घुरिल आर यीशुक थाड़ो देखिल, मगर चिन्हवा नी पारिल कि वहाँय यीशु छे। १५ यीशु वहाक कोहले, “तुई क्याँ कानछिस? कहाक छाबछिस?” मरियम वहाक माली समझे कोहले, “गय! तुई अगर वहाक उठाय राखिहिस, त मोक बता कि तुई वहाक कुनठिन राखिहिस, मुई वहाक ले जाम।” १६ यीशु वहाक कोहले, “मरियम।” इडा सुने मरियम यीशुर भीति घुरे इब्रानी भाषात कोहले, “रब्बी” [जहार माने होचे गुरू।] १७ यीशु वहाक कोहले, “मोक ना लारेक, क्याँकि मुई आभी तक मोर पितार लिकिन स्वर्गोत नी जई। मगर तुई अला मोर भईलार लिकिन जाय कहय दे कि मुई मोर पिता आर परमेश्वरेर लिकिन जाछी, जहाँय तुमसारो पिता आर परमेश्वर छे।” १८ मरियम मगदिलिनी जाय चेलालाक बताले, “मुई प्रभुक देखनु आर वहाँय मोक इला बात कोहले।”

यीशु चेलालाक दखा दिछे

(लूका २४:३६-४९)

१९ हप्तार पहिलाडा दिन जैडा अतवारेर दिन छिले। शाम करे चेलाला यहूदी लोकेर डोरे घरेर भीतरोत दरवाजा बंद करे छिले। यीशु उसार बीचोत ओसे थाड़ो होल, आर उसाक कोहले, “तुमसाक शान्ति मिलोक।” २० आर इडा कोहय वहाँय अपना हाथ आर कोखा देखाल। आर चेलाला प्रभुक देखे खोश हंय गेल। २१ यीशु फेर उसाक कोहले, “तुमसाक शान्ति मिलोक। जैकिसम पिता मोक पठाहे, वही मान्दी मोहो तुमसाक पठाछी। २२ आर इडा कोहय वहाँय उसार पर फुके दिले, आर कोहले, पवित्र आत्माक लव। २३ अगर तुम्हरा कहारो पाप माफ करभेन, त वहार पाप माफ होबे। अगर तुम्हरा कहारो पाप माफ नी करभेन, त वहार पाप माफ नी होबे।”

यीशु थोमाक दखा दिछे

२४ थोमा बारहइनन चेलार भीतरोत एकइनन चेला छिले, जहाक जौठिया कहाल जाछिले। जैखुना यीशु चेलालार लिकिन ओसिल, मगर उसार साथे थोमा नी छिले। २५ बाद करे बाँकीला चेलाला थोमाक कोहले, “हमरा प्रभुक देखिही।” मगर थोमा चेलालाक कोहले, “जब तक मुई वहार हाथोत किलेर दागलाक नी देखेलुम आर वहार हाथोत अपना अंगुली डाले नी देखुम, वहार कोखात अपना हाथ डाले नी देखुम, तब

तक मुई विश्वास नी करमु।” २६ आठ दिन बाद वहार चेलाला घरेर भीतरोत छिले, आर थोमाव उसार साथे छिले, आर घरेर दरवाजा बंद छिले। यीशु उसार बीचोत ओसे थाड़ो होल आर कोहले, “तुमसाक शान्ति मिलोक।” २७ वहार बाद यीशु थोमाक कोहले, “अपना आँगुलडा डाले मोर हाथलाक देखेक, आर अपना हाथ आने मोर कोखाडात देखेक। शक करवा छोड़े दे, मगर विश्वास कर।” २८ इला बात सुने थोमा यीशुक जवाब दिले, “हे मोर प्रभु आर हे मोर परमेश्वर!” २९ यीशु वहाक कोहले, “तुई मोक देखे विश्वास करलो। धन्य वहाँय छे, जहाँय बिना देखे मोर पर विश्वास करछे।”

किताबखान लिखवार मकसद

३० यीशु आढ़ोह बहुतला चमत्कारेर काम चेलालार आगुत देखाले, जैला इखान किताबोत लिखाल नी छे। ३१ मगर जैला बात लिखाल गहे, उला से तुम्हरा विश्वास करवा पारेन कि यीशु परमेश्वरेर बेटा आर मसीहा छे, आर वहार नामेर पर विश्वास करे जीवन पायन।

यीशु तेसरा बार चेलालाक दखा दिछे

२१ कुछु दिन बाद यीशु तिबिरियास समुन्द्रेर कछारोत चेलालाक फेर दखा दिले। घटनाडा इकिसम छे: एक दिना यीशुर कुछुला चेला तिबिरियास समुन्द्रेर कछारोत जोड़ो हंय छिले। उसार नाम: २ शिमोन

पतरस, थोमा जहाक जौठिया कहाल जाछे, गलील प्रदेशेर काना शहरेर नथनियल, जब्बदीर बेटाला, आर वहार आढ़ोह दोसरा दुईझन चेला।
३ शिमोन पतरस उसाक कोहले, “मुई माछ मरवा जाछी।” वरा वहाक कोहले, “हमराव तोर साथे जामु।” तब वरा वहार साथे नावत चढ़िल, मगर वरा उडा रातोत एकटाव माछ धरवा नी पाले। ४ बेहाने यीशु ओसे समुन्द्रेर पर थाड़ो होल, मगर चेलाला वहाक चिन्हवा नी पारिल। ५ यीशु चेलालाक पूछिल, “तुमसार लिकिन कुछु माछ छे की?” वरा जवाब दिले, “नी छे।” ६ वहाँय उसाक कोहले, “नावखानेर दहिना भीति जालखान गिराव, त मिलबे।” तब वरा जालखान गिराले। जालखानोत बहुतला माछ धरिल। वरा जालखानोक टनवा नी पारछिले। ७ यहार बाद उडा चेला, जहाक यीशु प्रेम करछिले, पतरसोक कोहले, “यहाँय त प्रभु छे।” शिमोन पतरस इडा सुने कि वहाँय प्रभु छे, जैखान कपड़ा वहाँय खोले राखिहिले, उखान पिन्हें पानीत कुद्दे पोल। ८ मगर दोसराला चेला माछ से भराल जालखानोक एकखान छोटो नावर पीछूत बान्हिल आर टाने कछारोत आनिल क्यौँकि वरा कछारटा से बेसी दूरोत नी छिले, लगभग एक सौ मीटर दूरोत छिले। ९ जैखुना वरा नावखान से कछारटात नाभिल, त वरा कोयलार आगिनेर पर माछ आर रूटी देखिल। १० यीशु उसाक कोहले, “अला तुम्हरा जैला माछ मारलेन, उला से कुछुला आनो।” ११ तब शिमोन पतरस गेल आर जालखानोक टाने

कछारटात ले ओसिल। जालखानोत एक सौ तिरपनडा बोड़ो-बोड़ो माछ धरिले, ताहरो पर जालखान नी छिड़ील। १२ यीशु उसाक कोहले, “ओसो आर खाना खाव।” चेलालार भीतर से कहारो पूछवार हिम्मत नी होल कि वहाँय के छे? क्याँकि वरा जानछिले कि वहाँय प्रभु छे। १३ यीशु उसार लिकिन ओसे उसाक रूटी दिले, आर वही मान्दी करे माछलाको दिले। १४ इडा तेसरा बार छिले कि प्रभु मुर्दा से जिन्दा हवार बाद अपना चेलालाक दखा दिले।

यीशुर तने पतरसेर प्रेम

१५ खाना खवार बाद यीशु शिमोन पतरसोक कोहले, “हे शिमोन! यूहन्नार बेटा! तुरई की मोक इसा से बेसी प्रेम करछिस?” वहाँय यीशुक जवाब दिले, “हाँ, प्रभु। तुरई जानिस कि मुई तोक प्रेम करछी।” यीशु वहाक कोहले, “मोर भेड़ालाक चरा।” १६ यीशु फेर दोसरा बार बोलिल, “हे शिमोन! यूहन्नार बेटा! तुरई की मोक प्रेम करछिस?” शिमोन बोलिल, “हाँ, प्रभु। तुरई जानिस कि मुई तोक प्रेम करछी।” यीशु वहाक कोहले, “मोर भेड़ालार देखभाल कर।” १७ यीशु तेसरा बार फेर पूछिल, “हे शिमोन! यूहन्नार बेटा! तुरई की मोक प्रेम करछिस?” पतरस मायूस हंय गेल, क्याँकि यीशु वहाक तेसरा बार पूछिल, “तुरई की मोक प्रेम करछिस?” आर पतरस कोहले, “हे प्रभु! तुरई त सब कुछ जानिस। तुरई जानिस कि मुई तोक प्रेम करछी।” यीशु वहाक कोहले, “मोर भेड़ालाक

चरा।” १८ मुई तोक सच-सच कोहची, “जैखुना तुई जवान छिलो, उखुना तुई तैयार हंय जैठिन जवा चाहचिलो, उठिन जाछिलो। मगर जैखुना तुई बूढ़ा हंय जाबो, त तुई अपना हाथ फैलाबो, आर दोसरा लोक तोक तैयार करे ले जाबे, जैठिन तुई जवा नी चाहबो।” १९ यीशु इला बात बोले बताय दिले कि पतरस कुन किसम मौतेर जरियाय परमेश्वरेर महिमा करबे। आर तब यीशु कोहले, “मोर पीछूत चले ओसेक।”

पतरसेर सवाल

२० पतरस घुरे देखिल कि यीशु जैडा चेलाक प्रेम करछिल, उडा चेला यीशुर पीछू-पीछू ओसछे। आर जहाँय खाना खवारखुना यीशुर बुखखानेर भीति झूके यीशुक पूछिहिले, “हे प्रभु! तोक के धोखा दे धराय दिबे?” २१ उडा चेलाक देखे, पतरस यीशुक पूछिल, “हे प्रभु! यहार की होबे?” २२ यीशु पतरसोक कोहले, “मुई अगर चही कि वहाँय मोर दोबारा ओसवार समय तक बचे रहय, त इडा से तोक की होचे? तुई मोर पीछूत चले ओस।” २३ वहीलाते चेलार बीचोत इडा बात बताल गेल कि उडा चेला नी मोरबे। मगर यीशु इडा नी कोहये कि उडा चेला नी मोरबे, बल्के यीशु इडा बात कोहिले कि “अगर मुई चही कि वहाँय मोर दोबारा ओसवार समय तक जिन्दा रोहय, त इडा से तोर कि लेना-देना छे।”

आखरी बात

२४ इडा वहीडा चेला छे, जहाँय इला बातेर बारे लोकोक बताछे आर इला बातेर बारे लिखिहे, आर हमरा जानी कि वहाँय जैला बात बोलछे, उला सच छे। २५ इलार अलावा आढ़ोह बहुतला काम छे, जैला यीशु करिहिले। अगर सबला एक-एक करे लिखाल गेलतन त, मुई समझेछी कि अतेला किताब हंय गेलतन कि उला किताब इडा दुनियाँत नी आँटिलतेन।

मसीह-दूतेर काम

पवित्र आत्मार बारे वादा

१ आदरणीय थियुफिलुस, यीशुर काम आर शिक्षार बारे मुई मोर पहिलाखान किताबोत लिखिही, जैला वहाँय शुरू से ले स्वर्गोत उठाय लुवार समय तक करिहिले। २ आर स्वर्गोत उठाय लुवार आगुते जैला दूतोक वहाँय बिछे लिहिले, उसाक परमेश्वरेर पवित्र आत्मार जरियाय हुकूम दिहिले। ३ अपना मौतेर बाद यीशु उसार सामनात हाजिर हंय बहुतला प्रमाण दिले कि वहाँय जिन्दा छे। वहाँय चालीस दिन तक उसाक देखा दिते रोहोल आर परमेश्वरेर राजेर बारे बोलते रोहोल। ४ एक दिना यीशु अपना दूतलार साथे छिले। वहाँय उसाक हुकूम दिहिले, “तुम्हरा यरूशलेम शहर ना छोड़ैन। उखुन तक ना छोड़ैन, जैखुन तक मोर पितार देयाल वादा पूरा नी हंय जाछे। इडा वादार बारे तुम्हरा मोर लिकिन सुनिहेन। ५ यूहन्ना त पानीर बपतिस्मा दिहिल, मगर कुछु दिनेर भीतरोत तुम्हरा पवित्र आत्मार बपतिस्मा पाभेन।”

यीशु स्वर्ग जाछे

६ एक दिना दूतला एक साथे जोड़ो हंय यीशुक पूछिल, “प्रभु! तुई की अलाय इजराएली लोकेर राज उसार हाथोत करे दुबो?” ७ यीशु उसाक जवाब दिले, “कब की होबे, उलार बारे तुमसाक जानना जरूरी नी छे क्योंकि दिन आर समय पिता अपना हाथोत राखियेह। ८ मगर जैखुना पवित्र आत्मा तुमसार पर ओसबे, उखुना तुम्हरा शक्ति पाभेन। तहार बाद तुम्हरा मोर गवाह होभेन। यरूशलेम, पूरा यहूदिया, सामरिया आर गोटांडा दुनियाँत तुम्हरा मोर बारे लोकोक बताभेन।” ९ वहार बाद दूतलार सामनात यीशुक उपरोत उठाय लिया ल गेल आर एकखान बदली ओसे वहाक झापे लिले। वरा आर वहाक देखवा नी पारले। १० वहार जवारखुना वरा आसमानडार भीति देखछिले। वहीखुना सादा कपड़ा पिन्हाल दुईझन लोक उसार आगुत हाजिर होल। ११ वरा दोनोंझन उसाक कोहले, “गलील प्रदेशेर लोकला! तुम्हरा थाड़ो हंय क्याँ आसमानडार भीति टकटकी लगाय देखछेन? यही यीशु जहाक तुम्हार लिकिन से स्वर्गोत उठाय लिया ल गेल, जैमान्दी वहाक स्वर्ग जाते देखलेन, वही मान्दी वहाँय फेर ओसबे।”

मल्लियाक मसीह-दूत चुनाल जाछे

१२ यहार बाद मसीह-दूतला जैतून नामेर पहाड़ से नाभे यरूशलेम शहर घुरे चले गेल। जैतून पहाड़ यरूशलेम से लगभग डेढ़ किलोमीटर दूरोत छिले। १३ वरा उडा उपरेर कमरात गेल, जैठिन वरा रोहछिले। उसार नाम छिले: पतरस, यूहन्ना, याकूब, अन्द्रियास, फिलिप्पुस, थोमा, बरतुलमाई, मती, हलफैर बेटा याकूब, शिमोन जेलोतेस, याकूबेर बेटा यहूदा। १४ इला सबला चेला एक मन हंय कुछुला स्त्रीर साथे, यीशुर माँ मरियम साथे आर वहार भईलार साथे प्रार्थना करते रोहोल। १५ वहीडा समय एक दिना लगभग एक सौ बीसझन विश्वासी लोक जमा छिले। उसार बीच से पतरस थाड़ो होल आर बोलिल, १६ “हे भा-बहिनला! सुनो! पवित्र शास्त्रेर उला बातोक पूरा होना जरूरी छिले, जैला बहुत दिन आगुते राजा दाऊद पवित्र आत्मार जरियाय यहूदार बारे बोलिहिले कि वहाँय यीशुक धराय देनेवाला अगुवा बनबे। १७ यहूदा हमसार साथे गेनती कराल गेल आर प्रभुर कामेर तने हमसार साथी छिले।” १८ वहाँय पापेर कमाई से एकखान खेत किने लिले। वहाँय उठिन मुख थबड़ा हंय पोड़े गेल आर वहार पेट्टा फटे नारी-भूटी निकले गेल। १९ इडा खबर यरूशलेमेर सबला लोकोक मालूम हंय गेल। आर उसार भाषात उखान खेतेर नाम “हकलदामा” पोड़े गेल यानी “खूनेर खेत।” २० आर पतरस बोलिल, “पवित्र शास्त्रेर भजन-संहितात लिखाल छे, ‘वहार घर उजड़े

जाक आर उखानोत कोय ना रोहोक।’ आर यहोडा लिखाल छे, ‘वहार बदले कोय दोसरा लोकोक चुनाल जाक।’ २१-२२ वहीलाते यहूदार जगहोत एकझन लोकोक मसीह-दूतलार दलोत शामिल करना जरूरी छिले। प्रभु यीशु जतेक दिन हमसार साथे चला-फिरा करछिले, याने यूहन्नार जरियाय यीशुर बपतिस्मा से ले वहार स्वर्ग जवार समय तक जैला लोक हमसार साथे छिले, उसार बीच से एकझन लोकोक चुनाल जाक, जसे कि वहाँय हमसार साथे यीशुर जिन्दा हंय उठवार गवाह होय।” २३ यहार बाद वरा यूसुफ आर मत्तियाह नामेर दुईझन लोकोक अलग करिल। यूसुफोक बरसबा कहाल जाछिले आर वहाक यूसतुस नाम सेओ जनाल जाछिल। २४ वहार बाद वरा इडा कहय प्रार्थना करिल, “हे प्रभु! तुई त सभारो दिलेर बात जानिस, इडा देखाय दे कि इ-दुईझनार बीच से तुई कहाक बिछे लिहिस, २५ जसे कि वहाँय मसीह-दूत बने उडा सेवा करवा पाड़े, जैडा सेवाक छोड़े यहूदा अपना जगहोत चले गेल।” २६ वहार बाद वरा दोनोंझनार नामे पुरजा डालिल। पुरजा मत्तियाहार नामे निकलिल आर वहाक एगारोझन मसीह-दूतेर साथे शामिल कराल गेल।

पवित्र आत्मा नाभछे

२ पिन्तेकुस परबेर दिनोत सबला विश्वासी एकखान घरोत जोड़ो हंय छिले। २ ओचकाय आसमान से बहुत बोड़ो दूनेर मान्दी एकटा सनसनीर आवाज होल। जैखान घरोत वरा बोठे छिले, घरखान सनसनीर आवाज से भरे गेल। ३ वरा देखिल कि कोय जिनिस् आग्नेर जीभालार मान्दी अलग-अलग हंय एक-एकझनार उपरोत ओसे थामे गेल। ४ वरा सबकोय पवित्र आत्मा से भरे गेल आर पवित्र आत्मा जहाक जैमान्दी बोलवार शक्ति दिले, वही मान्दी वरा अनजान भाषात बोलवा लागिल। ५ उडा समय दुनियाँर बहुतला देशेर धार्मिक यहूदी लोक यरूशलेम शहरोत रोहछिल। ६ जैखुना वरा उडा आवाज सुनिल, त उठिन भीड़ लागे गेल। लोकला चकित हंय गेल, क्याँकि विश्वासीला जैला बात बोलछिले, उला बात भीड़ेर लोकला अपना-अपना भाषात सुनछिले। ७ वरा चकित हंय बोलवा लागिल, “देखो, यरा इला बात कसे करे बोलछे? यरा त सबकोय गलील प्रदेशेर लोक छे। ८ फेर हमरा हरेकझन अपना-अपना भाषात कसे करे सुनछी? ९ हमरा त अलग-अलग जगहोर लोक छी। हमरा त कुछुला लोक पारथी, मेदी, ऐलामी छी, मेसोपोटामिया आर यहूदिया प्रदेशेर छी। आर कुछुला लोक कपीदुकिया, पुन्तुस, आसिया, १० फ्रुगिया, पंफुलिया आर मिसर देशेर छी। कुछुला लोक लिबिया देशेर कुरेन शहरेर अगलेर-बगलेर छी। आर

कुछुला लोक हमरा रोम शहरेर यहूदी लोक छी आर यहूदी धर्मोक ग्रहण कराल लोक छी। ११ कुछुला क्रेत आर अरब देशेर लोक छी। मगर हमरा सबकोय कसे करे अपना-अपना भाषात उसार मुख से परमेश्वरेर बोड़ो-बोड़ो कामेर बारे सुनछी?” १२ वरा सबकोय ताज्जूब हंय अपना बीचोत कहवा लागिल, “इडार मतलब की छे?” १३ इला देखे कुछुला लोक ठट्ठा करे बोलिल, “इला लोक त मोद खाय निशात चूर छे।”

पतरस प्रभु यीशुर बारे प्रचार करछे

१४ उखुना पतरस अपना एगारोझन साथीर साथे थाड़ो होल आर भीड़ेर लोकलाक जोर से कहवा लागिल, “हे यहूदी भईला आर यरूशलेम शहरेर सबला लोक! तुम्हरा मोर बातला ध्यान दे सुनो आर जाने लव। १५ तुम्हरा समझेछेन कि इला लोक निशात चूर छे। मगर बात इकिसम नी छे क्याँकि अला त सिरिफ बेहानकार नौ बजे छे। १६ इडा घटनार बारे योयल नबी बोलिहिले, १७ ‘परमेश्वर कोहचे कि आखरी दिनोत इकिसम होबे कि मुई अपना आत्मा सब मानुषेर पर ढाले दुम। तुमसार बेटा-बेटीला भविष्यवाणी करबे। तुमसार जवानला दर्शन पाबे। तुमसार बुढ़ा-बूजुर्गला सपना देखबे। १८ हाँ, उला दिनोत मुई अपना नौकर-नौकरानीलार पर अपना आत्मा ढाले दुम। आर वरा भविष्यवाणी करबे। १९ मुई आसमानोत अचरजेर काम देखाम आर नीचानोंत धरतीर पर चमत्कारेर चिन्ह देखाम। खून, आगिन आर धुवाँर बदली चिन्ह

हिसाबे देखाम। २० प्रभुर महान आर महिमार दिन ओसवार आगुत बेलाडा अन्हार हंय जाबे आर चाँदडा खूनेर मान्दी लाल हंय जाबे। २१ आर जहाँय प्रभुर लिकिन बिनती करबे, वहाँय बचबे।’ २२ हे इजराएली लोकला! तुम्हरा सुनो। नासरत शहरेर यीशु, जहाक परमेश्वर तुमसार लिकिन सच ठहराल, वहार जरियाय परमेश्वर अचरजेर आर चमत्कारेर काम तुमसार बीचोत करिल, जैलार बारे तुम्हरा खुद जानेन। २३ वहाक परमेश्वरेर पहिलकार ज्ञान आर ठहराल योजना मुताबिक तुमसार हाथोत धराय दिहिल। आर तुम्हरा वही यीशुक दुष्ट लोकेर जरियाय क्रुसोत चढ़ाय मारे दिहिलेन। २४ वहाँय बहुत कष्ट-तकलीफ सहय मोरिल। मगर परमेश्वर वहाक मराल हालतोत नी छोड़िल आर वहाक मौतेर कब्जा से आजाद करे जिन्दा करिल। मौतेर इकिसम शक्ति नी छिले कि यीशुक अपना कब्जात राखे २५ क्योंकि राजा दाऊद यीशुर बारे इडा बात बोलिहिले, ‘मुई प्रभुक सबखुना देखते रहछी क्योंकि वहाँय मोर दहिना भीति छे। वहीलाते मुई नी घबराम। २६ यही तने मोर दिलडा खुशी से भराल छे आर मुई खुशी से परमेश्वरेर बड़ाई करछी। आर मुई उम्मेदेर साथे जिन्दा रोहमु २७ क्योंकि तुई मोक मुर्दा लोकेर बीचोत छोड़े नी दुबो आर ना अपना धर्मी लोकटाक सड़े जवा दुबो। २८ तुई मोक जिन्दगीर रास्ता बताहिस आर मोर बगलोत छिस आर वहीलाते मुई खुश रोहमु।’” २९ पतरस उसाक समझाय कोहले, “हे

भईला! मुई तुमसाक हमसार खानदानेर लोक दाऊदेर बारे एकदम साफ-साफ बताछी कि वहाँय त मोरे गेल, कबरोत गाड़ा गेल आर वहार कबरटा आजतक हमसार बीचोत छे। ३० वहाँय परमेश्वरेर एकझन नबी छिले। आर परमेश्वर दाऊदोक कसम खाय कोहिले कि वहार खानदान से एकझन लोक वहार राजगद्दीत बोठबे। ३१ जैडा बात आगु चले पूरा होनेवाला छिले। दाऊद उडार बारे आगु से जानछिले आर बोलिहिले कि मसीहा जिन्दा हंय उठबे। आर बोलिहिले कि परमेश्वर वहाक कबरोत रहवा नी दिबे, आर ना वहार बदनडाक सरवार तने छोड़बे। ३२ परमेश्वर यीशुक जिन्दा करिल आर हमरा सबकोय इडार गवाह छी। ३३ आर परमेश्वर वहाक अपना दहिना भीति बठवार सम्मान दिले। पितार लिकिन से पवित्र आत्मा पाय, वहाँय हमसार पर पवित्र आत्मा ढाले दिले, जैकिसम कि परमेश्वर पहिले से वादा करिहिले, आर जैला कि तुम्हरा देखछेन आर सुनछेन। ३४ परमेश्वर दाऊदोक स्वर्गोत नी उठाय, मगर दाऊद खुद कोहचे, प्रभु परमेश्वर मोर प्रभुक कोहले, ‘मोर दहिना भीति बोठेक, ३५ जैखुन तक मुई तोर दुश्मनलाक तोर पाँर तोलोत नी करे दिछी।’ ३६ वहीलाते इजराएली लोक अच्छा से जाने लव कि तुम्हरा जे यीशुक क्रुसेर पर चढ़ाय मारे दिहिलेन, वहाके परमेश्वर प्रभु आर मसीहा ठहराल।” ३७ इला बात सुने लोकला अपना-आपोक दोषी समझिल। वरा पतरस आर दोसराला मसीह-दूतोक पूछिल, “हे भईला!

अला हमरा की करमु?” ३८ पतरस उसाक बोलिल, “तुम्हरा पापेर माफी पावार तने पाप से मन बदली करो आर यीशु मसीहार नामे बपतिस्मा लव जसे कि तुम्हरा पवित्र आत्मार दान पायेन, ३९ क्योंकि परमेश्वर इडा दानेर वादा तुमसार तने आर तुमसार बेटा-बेटीलार तने करिहे। उसारो तने करिहे, जैला लोक दूरोत छे आर उसाक हमसार प्रभु परमेश्वर अपनार लिकिन बुलाछे।” ४० पतरस आढ़ो बहुत पकाय लोकलाक समझाल कि तुम्हरा अपना-आपोक उडा सजई से बचाव जैडा कि इला दुष्ट लोकेर पर पोड़बे। ४१ जैला लोक पतरसेर बातलाक माने लिले, वरा सबकोय बपतिस्मा लिले। उदिना लगभग तीन हजार लोक विश्वासी लोकेर साथे शामिल हंय गेल। ४२ आर इला लोक मसीह-दूतलार लिकिन से सिखछिले। एक साथे मिले प्रभु-भोजोत शामिल होचिले आर प्रार्थना करछिल। ४३ यरा मसीह-दूतलाक बहुतला चमत्कार करते देखिल। आर सबला लोक ताज्जुबोत पोड़े गेल आर परमेश्वरेर बड़ाई करिल।

पहिला विश्वासी लोकेर मंडली

४४ आर इला सबला विश्वासी लोक एक साथे जोड़ो होचिले। अपना-अपना सामान अपना बीचोत बाँटे दिछिल। ४५ वरा सबकोय अपना-अपना सम्पति आर जिनिस बेचोछिले, आर जहार जैकिसम जरूरत होचिले, वही किसम बाँटे दिछिले। ४६ वरा सबकोय हर दिन परमेश्वरेर

मंदिरोत जोड़ो होचिले, घरे-घरे जाय प्रभु-भोजोत शामिल होचिले आर खुशी मनाछिले। वरा मिले-जुले एक साथे खाना खाछिले। ४७ आर वरा परमेश्वरेर बड़ाई करछिले। सब लोक उसासे खुश छिले। जैला लोक पाप से मुक्ति पाछिले, उसाक प्रभु हर दिना विश्वासी लोकेर साथे मिलाय दिछिले।

यीशु नामे नेंगरा लोकटाक ठीक होछे

३ एक दिना तीन बजे दिनोत प्रार्थनार समय पतरस आर यूहन्ना प्रार्थना करवार तने यरूशलेम मंदिरोत जाछिले। २ एकझन लोक छिले। वहाँय जनम से नेंगड़ा छिले। लोकला हर दिना वहाक मंदिरेर फाटकेर लिकिन बठाय दिछिले। इडा फाटकेर नाम सुंदर छिले। जैला लोक मंदिर जाछिले, वहाँय उसार लिकिन से भीख माँगछिले। ३ नेंगड़ाडा पतरस आर यूहन्नाक मंदिरोत जाते देखिल। आर वहाँय उसार लिकिन से भीख माँगिल। ४ यूहन्नार साथे मिले पतरस नेंगड़ाक ध्यान दे देखिल आर कोहले, “हमसार भीति देख।” ५ आर वहाँय कुछु पावार तने उसार भीति देखवा लागिल। ६ पतरस कोहले, “सोना आर चानी त मोर लिकिन नी छे। मगर जैकुछु मोर लिकिन छे, मुई तोक दिछी। नासरत शहरेर यीशु मसीहार नामे तुई उठ आर बेड़ा।” ७ इडा बोले पतरस वहार दहिनाखान हाथ धरे वहाक उठाल। साथे-साथे वहार पाँ आर हटुवालात

ताकत चले ओसिल। ८ वहाँय कुद्दे थाड़ो हंय गेल आर बेड़वा लागिल।
आर उछलते-कुद्ते आर परमेश्वरेर बड़ाई करते उसार साथे मंदिरोत
चले गेल। ९ उठिनकार सबला लोक देखछे कि वहाँय बेड़ाछे आर
परमेश्वरेर बड़ाई करछे। १० आर लोकला वहाक चिन्हे लिले कि यहाँय
वहीडा लोक छे, जहाँय मंदिरेर फाटकटार लिकिन भीख माँगछिले।
वहार साथे जैडा घटना घटिल, इडा देखे सबला लोक बहुत चकित हंय
गेल।

मंदिरोत पतरसेर प्रचार

११ जैखुना लोकला देखिल कि वहाँय अच्छा हंय गहे आर मंदिरेर
सुलेमान नामेर ओसरात पतरस आर यूहन्नाक धरे छे, त वरा बहुत
चकित हंय गेल आर उसार भीति दौड़े गेल। १२ इडा देखे पतरस कोहले,
“इजराएली भईला! तुम्हरा इडा लोकोक देखे क्याँ हंयरान छेन।
हमसार भीति इकिसम करे क्याँ देखछेन? तुम्हरा सोचेछेन कि हमसार
ताकत या भक्ति से यहाँय बेराछे, मगर बात इकिसम नी छे। १३ सुनो!
परमेश्वर जहाँय हमसार बाप-दादो इब्राहिम, इसहाक, याकूबेर परमेश्वर
छे, वहाँय अपना सेवक यीशुक सम्मान दिहे, जहाक तुम्हरा धराय
दिहिलेन। जैखुना पिलातुस यीशुक छोड़े दुवार तने सोच-बिचार
करछिल, उखुना तुम्हरा वहाक इन्कार करलेन। १४ इकिसम करे तुम्हरा
पवित्र आर धर्मी लोकटाक इन्कार करलेन। आर पिलातुसेर लिकिन

बिनती करलेन कि वहाँय तुमसार तने एकझन खूनी लोकोक छोड़े दे।
१५ तुम्हरा वहाक मारे फिकालेन, जहाँय जीवन दिछे। मगर परमेश्वर
वहाक मुर्दा से जिन्दा करे दिहे। आर हमरा इला बातेर गवाह छी।
१६ वहारे नामे इडा लोक तुमसार सामनात अच्छा होल, जहाक तुम्हरा
जानेन आर अला बेराते देखछेन। यीशुर नामेर पर विश्वास करवार
कारण वहाँय अच्छा हंय गेल। १७ अला हे भईला! मुई इडा जानी कि
तुम्हरा अनजानोत यीशुक मारे फिकाहिलेन, आर वही मान्दी तुमसार
धर्मेर अगुवालाव करिहील। १८ परमेश्वर अपना नबीलार जरियाय
बताहिले कि वहार चुनाल मसीहा दुःख उठाबे। उला बातोक परमेश्वर
यही मान्दी करे पूरा करिल। १९ वहीलाते तुम्हरा अला पाप से अपना
मन बदली करो आर परमेश्वरेर लिकिन घुरे ओसो जसे कि परमेश्वर
तुमसार पाप माफ करे। अगर तुम्हरा इकिसम करछेन त प्रभु तुमसाक
शांति आर आराम दिबे २० आर तुमसार तने मसीहा यीशुक पठाबे,
जहाक पठवार बारे प्रभु आगु से बताहिले। २१ मसीहा स्वर्गोत तब तक
रुके रोहबे, जैखुन तक कि परमेश्वर सब कुछ पहिलकार मान्दी नी करे
दे। इलार बारे परमेश्वर अपना नबीलार जरियाय पुराना युग से बोलते
ओसिहिले। २२ वहार बारे मूसा नबी कोहिले, ‘प्रभु परमेश्वर तुमसार
भईलार बीच से तुमसार तने मोर मान्दी एकझन नबीक पठाबे। तुम्हरा
वहार बातला सुनेन। २३ मगर जहाँय उडा नबीर बात नी सुनबे, वहाक

अपना लोकेर बीच से अलग करे देयाल जाबे।’ २४ शमुएल आर शमूएलेर बाद जतेला नबी ओसिल, वरा सबकोय इला दिनेर बारे बोलिहिले। २५ तुम्हरा परमेश्वरेर वादार हकदार छेन, जैला वादा नबीला तुमसार दादो-परदादोर साथे करिहिले। जैकिसम परमेश्वर इब्राहिमोक कोहिले, ‘तोर बंशेर जरियाय दुनियाँर सबला घराना आशीर्वाद पाबे।’ २६ वहीलाते परमेश्वर अपना सेवक मसीह यीशुक पठवार योजना बनाल आर पहिले तुमसार लिकिन पठाल जसे कि परमेश्वर तुमसाक बुराई से बचाय आर आशीर्वाद दे।”

महासभार आगुत पतरस आर यूहन्ना

४ जैखुना पतरस आर यूहन्ना लोकलार साथे बात करछिल, उखुना मंदिरेर पूजारीला, मंदिरेर सिपाहीलार हाकिम आर सदूकीला उठिन हाजिर होल। २ वरा बहुत गोस्सा हंय गहिल क्यौंकि पतरस आर यूहन्ना दोनोंझन यीशु मसीहार बारे प्रचार करछिल कि यीशु जिन्दा हंय उठिहे आर यीशुर जरियाय मुर्दा लोक जिन्दा हंय उठबे। ३ वहीलाते वरा उसाक धरे लिले आर शाम हंय जवार कारण बेहान तक जेलोत राखिल। ४ मगर जैला लोक प्रचार सुनिल, उसार भीतर से बहुतझन विश्वास करिल। विश्वासी लोकेर संख्या लगभग पाँच हजार हंय गेल। ५ दोसरा दिन यहूदी हाकिमला, नेताला आर शास्त्रेर ज्ञानीला एक साथे

यरूशलेम शहरोत महासभात जोड़ो होल। ६ महापूजारी हन्ना आर कैफा महासभात छिले। महापूजारीर रिस्तेदार यूहन्ना, सिकन्दर आर जताला लोक छिले, वराव यरूशलेम शहरोत जोड़ो होल। ७ यरा सबकोय उसाक महासभार आगुत थाड़ो करिल आर पूछवा लागिल, “कुन शक्ति से आर कहार नामे तुम्हरा लोकटाक अच्छा करे दिलेन?” ८ पतरस पवित्र आत्मार शक्ति से भरे गेल आर बोलिल, ९ “समाजेर नेताला आर हाकिमला! इडा बेमार लोकेर तने जैखान भलाईर काम कराल गहे, वहार बारे तुम्हरा हमसाक पूछ-ताछ करछेन कि वहाँय कसे करे अच्छा हंय गेल। १० तुम्हरा सबकोय आर सबला इजराएली लोक इडा जाने लव, नासरतेर यीशु मसीहार नामे इडा लोक अपना बेमारी से ठीक होल आर तुमसार आगुत थाड़ो हंय छे। जे मसीहाक तुम्हरा क्रुसेर पर चढ़ाय मारे दिहिलेन, परमेश्वर वहाक मुर्दा से जिन्दा करिल। ११ वहाँय उखान पत्थल छे, जैखानोक तुम्हरा राजमिस्त्रीला बेकार समझिलेन, मगर वहीखान पत्थल घरेर नींव दुवार तने सबसे खास पत्थल बने गेल। १२ यीशुक छोड़े कोय मुक्ति दुवा नी पाड़बे क्योंकि धरतीर पर परमेश्वर सिरिफ यीशुक मुक्ति दुवार अधिकार दिहे।” १३ जैखुना लोकला पतरस आर यूहन्नार हिम्मत देखिल त वरा अचरज करवा लागिल क्योंकि पतरस आर यूहन्ना कम पढ़ा-लिखा मामुली लोक छिले। लोकला उसाक चिन्हे लिले कि यरा यीशुर साथे रोहछिले।

१४ जैडा लोक अच्छा हंय गहिल, उ-दोनोंझनार साथे थाड़ो हंय छिले। वहीलाते वरा उसार खिलाफ कुछ कहवा नी पारिल। १५ तहार बाद लोकला उसाक महासभार बीच से बाहरे जवार हुकूम दिले आर अपना बीचोत बोलवा लागिल कि १६ हमरा इला लोकेर साथे की करी? यरूशलेमेर सब लोक इडा जाने कि इसार जरियाय एकटा खास चमत्कार देखाल गहे आर हमरा इन्कार करवा नी पारमु। १७ मगर लोकलार बीचोत इडा बात आढ़ो बेसी ना फैले, हमरा इसाक धमकाय दी जसे कि वरा इडा नामे कहारो साथे बात ना करे। १८ यहार बाद उसाक जाब देयाल गेल आर उसाक धमकाय कोहले कि यीशुर बारे कुछ ना बोलेन आर ना वहार बारे कोय शिक्षा देन। १९ मगर पतरस आर यूहन्ना उसाक जवाब दिले, “तुम्हरा बिचार करे देखो कि कहार कहना मानना अच्छा छे, परमेश्वरेर कहना ना मानुषेर कहना। २० जैला हमरा देखिही आर सुनिही, उलार बारे कसे करे चुप रहवा सकेछी।” २१ इला बात सुनवार बाद महासभार हाकिमला उसाक बहुत कड़ा से धमकाय छोड़े दिले। लोकलार कारण वरा उसाक कोय सजा नी दिले। जैडा घटना घटिहिले, देखे सबला लोक परमेश्वरेर बड़ाई करछिले। २२ जैडा लोक बेमारी से ठीक होल, वहार उमर चालीस साल से बेसी छिले।

विश्वासी लोकेर प्रार्थना

२३ पतरस आर यूहन्ना महासभा से निकलिल आर अपना साथीलार लिकिन ओसिल। बोड़ो पूजारीलार आर नेतालार बातलाक उसाक बताय दिले। २४ इला बात सुने वरा सबकोय एक मन हंय जोर से परमेश्वरेर लिकिन प्रार्थना करिल, “हे प्रभु! तुई त आसमान, धरती आर समुन्द्र बनाहिस। इलार अन्दरोत जतेला जिनिस छे, सबलाक तुई बनाहिस। २५ हमरा जानी कि राजा दाऊद तोर भक्त छे आर हमसार पिता छे। पवित्र आत्मार जरियाय वहार मुख से तुई बोलिहिस कि, ‘गैर-यहूदी लोकला क्याँ चिल्लाछे? आर वरा क्याँ बेकार बात सोचेछे?, २६ दुनियाँर राजाला आर हाकिमला प्रभुर आर वहार मसीहार खिलाफ लड़ी करवार तने एकजुट हंय गहे।’ २७ सचमुच राजा हेरोदेश आर पोन्तिस पिलातुस दोनोंझन यहूदी आर गैर-यहूदी लोकेर साथे यरूशलेम शहरोत जोड़ो होये। वरा तोर पवित्र सेवक यीशुर खिलाफ जोड़ो होये, जहाक तुई चुने लिहिस। २८ जैला बात आगु से तोर शक्ति आर तोर इच्छा मुताबिक तय कराल छिले, उला बात घटियेह। २९ अला हे प्रभु! तुई देख, यरा हमसाक केनमान्दी धमकाछे? तुई अपना सेवकलाक वरदान दे कि वरा हिम्मत से तोर वचनेर प्रचार करवा पारे। ३० अपना हाथखान बढ़ाय हमसाक बेमारी लोकोक ठीक करवार शक्ति दे जसे कि तोर पवित्र सेवक यीशुर नामे चमत्कारेर काम कराल जाय।”

३१ जैखुना विश्वासीला प्रार्थना खतम करिल, जैखान घरोत वरा जोड़ी हंय छिले, उखान घर हिले गेल। आर वरा सबकोय पवित्र आत्मार शक्ति से भरे गेल, आर वहार बाद वरा परमेश्वरेर वचन हिम्मत से लोकोक सुनाते रोहोल।

विश्वासी लोकेर एकता

३२ विश्वासीर लोकेर मंडलीत एकता छिले। इकिसम कि कोय विश्वासी अपना सम्पत्तिक अपना नी कोहचिले, मगर सब कुछ अपना बीचोत बाँटेछिले। ३३ मसीह-दूतला बहुत शक्तिर साथे लोकोक बताछिले कि प्रभु यीशु जिन्दा हंय उठयेह। उसार सभारो पर परमेश्वरेर बहुत दया छिले। ३४ उसार बीचोत एकोइन गरीब नी छिले। जहार जमीन या घर छिले, वरा उलाक बेचोछिले आर टाका आने मसीह-दूतलाक दे दिछिले। ३५ आर जहार जैकिसम जरूरी होचिले, वहारे मुताबिक हरेकइनाक बाँटे देयाल जाछिले। ३६ उसार बीचोत यूसुफ नामेर एकइन लेवी लोक छिले, जहाँय साइप्रस टापूर छिले। मसीह-दूतला वहार नाम बरनबास राखिहिले। बरनबास नामेर माने छे “हिम्मत देनेवाला।” ३७ वहार कुछ जमीन छिले, जैखानोक वहाँय बेचे दिले। जमीनेर टाका आने मसीह-दूतलाक दे दिले।

पवित्र आत्मार खिलाफ झूठ बोलवार सजा

५ उसार बीचोत आर एकझन लोक छिले, जहार नाम हनन्याह छिले। वहार स्त्रीर नाम सफीरा छिले। वरा दोनोंझन अपना एकखान जमीनोक बेचिल। २ मगर हनन्याह कुछु टाका राखे लिले। इडा बात वहार स्त्रीव जानछिले। आर हनन्याह बाँकी टाका आने मसीह-दूतलाक सोंपे दिले। ३ उखुना पतरस बोलिल, “हनन्याह! तुई शैतानोक अपना दिलोत क्याँ काम करवा दिलो? परमेश्वरेर पवित्र आत्मार खिलाफ झूठ बोललो क्याँकि तुई जमीनेर कुछु टाका अपना लिकिन राखे लिहिस। ४ जैखुन तक उखान जमीन तोर लिकिन छिले, उखान तोर छिले। जैखुना बिकाय गेल, त टाकाला तोर छिले। फेर तुई इकिसम काम अपना दिलोत क्याँ करलो? देखालो कि जमीनेर गोटाला टाका यहीला छे। इकिसम करे तुई त मानुषोक नी, मगर परमेश्वर लिकिन झूठ बोललो।” ५ सुनवार साथे हनन्याह माटीत पोड़े गेल आर मोरे गेल। जतेला लोक इडा बात सुनिल सभारो अन्दरोत बहुत डर ढुके गेल। ६ तहार बाद कुछुला जवान वहाक कपड़ा उढ़ाले आर वहाक ले जाय माटी दे दिले। ७ इडा घटनार बारे वहार स्त्रीक कुछु मालूम नी छिले। आर वहाँय लगभग तीन घंटा बाद भीतरोत ओसिल। ८ पतरस वहाक पूछिल, “तुई मोक बता, तुम्हरा की अपना जमीनखान यहीला टाकात बेचिहिलेन?” वहाँय जवाब दिले, “हाँ, यहीला टाकात।” ९ पतरस वहाक कोहले, “तुम्हरा दोनोंझन की

प्रभुर पवित्र आत्माक जाँच करवार तने एक हंय गहेन? देख! तोर पतिक लोकला माटी दे ओसे बाहरे दरवाजाडार लिकिन थाड़ो हंय छे, आर वरा तोहको ले जाबे।” १० इडा बात सुनवार साथे-साथे वहाँव पतरसेर पाँलार लिकिन पोड़े गेल मोरे गेल। लोकला घुरे ओसे वहाक मुर्दा पाले आर ले जाय वहाक वहारे पतिर बगलोत कबर दिले। ११ इडा घटना देखे सबला विश्वासीर आर सुननेवाला दोसरा लोकेर भीतरोत डर ढुके गेल।

चमत्कारेर काम

१२ मसीह-दूतलार जरियाय बहुत चमत्कारेर काम लोकलार बीचोत देखाल जाछिल। सबला विश्वासी एक मन से मंदिरेर सुलेमान नामेर ओसरात जोड़ो होचिले। १३ दोसरा लोकेर बीच से कहारो साहस नी होचिले कि उसार साथे मिले जाय। मगर लोकला उसार बड़ाई करछिल। १४ प्रभुर पर विश्वास करनेवाला पुरुष आर स्त्री संख्या बढ़ते गेल। १५ चमत्कारेर काम देखे लोकला बेमार लोकोक रास्तार बगलोत आनछिले। खाट आर पाटिर पर सुताय दिछिले जसे कि जैखुना पतरस रास्ता धरे जाय, वहार अपछाडा उसार पर पोड़े। १६ वहीलाते यरूशलेम शहरेर अगलेर-बगलेर शहरला से लोकला बेमार आर भूत धराल लोकलाक आनछिले आर सबकोय अच्छा हंय जाछिले।

मसीह-दूतलार गिरफ्तारी

१७ इला देखे मंदिरेर महापूजारी आर सदूकी दलेर वहार साथीला मसीह-दूतला से जलवा लागिल आर उसार खिलाफ थाड़ो हंय गेल। १८ आर मसीह-दूतलाक धरे जेलोत दे दिले। १९ मगर वहीडा रातोत प्रभुर फरीस्ता जेलेर दरवाजा खोले दिले आर मसीह-दूतलाक बाहरे ले जाय कोहले, २० “तुम्हरा मंदिरोत जाव आर थाड़ो हंय लोकलाक इडा संवाद प्रचार करो, जैडा जीवन दिछे।” २१ मसीह-दूतला फरीस्ताडार हुकूम माने लिले। बेहाने मंदिरोत जाय वरा प्रचार करवा लागिल। वहार बाद महापूजारी आर वहार साथीला मिले यहूदी लोकेर नेतालाक महासभार तने जोड़ो करिल। वरा पुलिसेर हाकिमलाक पठाल कि जेल से मसीह-दूतलाक आने हाजिर करे। २२ मगर जैखुना वरा जेलखानोत पहुँचिल, वरा कैदीलाक उठिन नी पाले। वहीलाते वरा घुरे ओसे महासभार आगुत बोलिल, २३ “हमरा जैखुना जेलोत गेनु त हमरा जेलखानोक बहुत मजबूत से बन कराल पानु। आर सबला सिपाही फाटकेर लिकिन पहरा दिछे। मगर जैखुना हमरा फाटकखान खोलनु, हमरा कहाको भीतरोत नी पानु।” २४ जैखुना बोड़ो-पूजारीला आर मंदिरेर पहरादारेर हाकिमडा इडा खबर सुनिल त वरा बहुत चिन्तात पोड़े गेल आर बोलिल, “मसीह-दूतलार की होल?” २५ यहारे भीतरोत एकझन लोक उसाक ओसे कोहले, “सुनो! जैला लोकोक जेलखानोत बन करे राखिहिलेन, उला

लोक मंदिरोत थाड़ो हंय लोकलार लिकिन प्रचार करछे।” २६ तब हाकिमला कुछु सिपाहीर साथे जाय मसीह-दूतलाक ले ओसिल। मगर जबरदस्ती से नी क्याँकि वरा लोकला से डोराछिले। इकिसम नी होय कि लोकला उसाक पत्थल फेके मारे। २७ हाकिमला उसाक आने महासभार आगुत थाड़ो करे दिले। वहार बाद महापूजारी उसाक पूछिल, २८ “हमरा की तुमसाक चेताय नी दिहिनु कि तुम्हरा इडा नामेर प्रचार ना करेन? मगर तुम्हरा नी मानलेन आर पूरा यरूशलेम शहरोत अपना प्रचार फैलाय दिहेन। आर तुम्हरा उडा लोकेर मौतेर जिम्मेवार हमसाक बनवा चाहचेन।” २९ इडा सुने पतरस आर दोसराला मसीह-दूत जवाब दिले, “मानुषेर हुकूम से बेसी हमसाक परमेश्वरेर हुकूम मानना जरूरी छे। ३० यीशुक तुम्हरा क्रुसेर पर चढ़ाय मारे फिकाहिलेन, मगर हमसार बाप-दादोर परमेश्वर वहाक जिन्दा करिल ३१ आर वहाक प्रभु आर मुक्तिदाता बनाय अपना दहिना बगल बठाल जसे कि इजराएली लोक पाप से मन बदली करे आर पापेर माफी पाय। ३२ हमरा आर पवित्र आत्मा इला बातेर गवाह छी। जैला लोक परमेश्वरेर हुकूम मानछे, वहाँय उसाक पवित्र आत्मार दान दिहे।” ३३ इला बात सुने वरा बहुत गोस्सा हंय गेल आर मसीह-दूतलाक मारे फिकवा चाहले। ३४ मगर गमालीएल नामेर एकझन फरीसी महासभार आगुत थाड़ो होल। वहाँय शास्त्रेर ज्ञानी आर महासभार सदस्य छिले। वहाक सबकोय सम्मान

दिछिल। वहाँय मसीह-दूतलाक कुछु समयेर तने बाहर जवार हुकूम दिले। ^{३५} आर बोलिल, “इजराएली भईला! तुम्हरा जे कुछु इला लोकेर साथे करवा चाहचेन, सोचे-समझे करेन। ^{३६} यहार आगुत थियुदास नामेर एकझन लोक छिले। वहाँय लोकोक कहवा लागिल कि मोहो एकटा बोड़ो लोक छी आर लगभग ४०० झन लोक वहार कहना माने वहार पीछू-पीछू चलवा लागिल। जैखुना वहाँय मारा गेल, वहार सबला चेला छिड़याछिट हंय गेल आर कुछु करवा नी पारिल। ^{३७} वहार बाद जनगणनार दिनोत गलील प्रदेशेर यहूदा थाड़ो होल आर कुछु लोकोक बहकाय अपना भीति टाने लिले। वहाँय जैखुना मारा गेल, वहार सबला लोक छिड़याछिट हंय गेल आर वराव कुछु करवा नी पारिल। ^{३८} इला लोकेर बारे मुई तुमसाक कोहची, इला लोक से दूरोत रहव आर आखले छोड़े दव। अगर इला काम मानुषेर तरफ से छे, त अपने-आप बर्बाद हंय जाबे। ^{३९} अगर परमेश्वरेर तरफ से छे, त तुम्हरा कोय हालतोत खतम करवा नी पारभेन। इकिसम नी होय कि तुम्हरा परमेश्वरेर खिलाफ लड़ेन।” ^{४०} इला बात सुने सबकोय वहार बात माने लिले, आर मसीह-दूतलाक आने मारिल आर हुकूम दे उसाक छोड़े दिले कि यीशुर बारे आर कोय बात नी बोलभेन। ^{४१} मसीह-दूतला महासभार आगु से चले गेल आर बहुत खोश हंय बोलवा लागिल कि परमेश्वर हमसाक यीशुर

कारण अपमान हवार लायक त समझिल। ४२ वरा हर दिना मंदिरोत आर घरे-घरे प्रचार करते रोहोल कि यीशु ही मसीहा छे।

सातझन लोक चुनाल जाछे

६ दिन-दिन विश्वासीलार संख्या बढ़ते जाछिल। कुछुला विश्वासी इब्रानी भाषा बोलछिल आर कुछुला यूनानी भाषा बोलछिल। यूनानी बोलनेवाला विश्वासी इब्रानी बोलनेवाला विश्वासीर खिलाफ शिकायत करिल कि हर दिना खाना बंटवारखुना हमसार राँरीलार पर कोय ध्यान देयाल नी जाछे। २ जैखुना बारहझन मसीह-दूत इला बातेर बारे पता चलिल, त वरा सबला विश्वासीक जाब दिले आर कोहले, “इडा बात की अच्छा छे कि हमरा विश्वासी लोकोक परमेश्वरेर वचन सिखवा छोड़े दी, आर खिलवा-पिलवार कामोत लगे रोहई। ३ वहीलाते भईला! अपनार बीच से सातझन इकिसम लोकोक बिछे लव, जहार बारे लोक अच्छा बोलछे, आर पवित्र आत्मा आर बुद्धि से भरपूर छे। हमरा उसाक इखान कामेर भार दे दी। ४ आर हमरा प्रार्थना आर वचनेर प्रचारोत लागे रोही।” ५ इडा बात मंडलीर सभाको अच्छा लागिल। इस्तिफनुस विश्वास आर पवित्र आत्मा से भरपूर छिले। वरा इस्तिफनुस, फिलिप, परोकरुस, नीकानोर, तिमोन, पारमिनास आर अन्तकिया प्रदेशेर निकोलसोक बिछे लिले। निकोलस यहूदी नी छिले। विश्वासी हवार

पहिले वहाँय यहूदी धर्म अपनाय लिहिले। ६ इसाक बारहझन मसीह-दूतेर आगुत थाड़ो कराल गेल, आर मसीह-दूतला प्रार्थना करे उसार पर हाथ राखिल। ७ परमेश्वरेर वचन फैलते गेल आर यरूशलेम शहरोत विश्वासीर संख्या बहुत बढ़ते गेल। यहूदी पूजारीलार एकटा बोड़ो दल यीशु मसीहार पर विश्वास करिल।

इस्तिफनुसेर गिरफ्तारी

८ परमेश्वर इस्तिफनुसोक आशीर्वाद करिल आर चमत्कारेर काम करवार शक्ति दिले। आर वहाँय लोकलार बीचोत बोड़ो-बोड़ो चमत्कारेर काम करछिले। ९ मगर कुछुला यहूदी लोक वहार बिरोध करवा लागिल। इला लोक एकखान प्रार्थना-घरेर सदस्य छिले। जैखान प्रार्थना-घरेर नाम “आजाद गोलाम” छिले। वरा कुरेनी आर सिकन्दरिया शहरेर आर किलिकिया आर आसिया प्रदेशेर लोक छिले। १० मगर पवित्र आत्मा इस्तिफनुसोक इकिसम बुद्धि दिले कि जैला लोक बहस करछिले, वरा इस्तिफनुसेर बातेर जवाब दुवा नी पारिल। ११ इडा कारण से वरा कुछुला लोकोक उसकाय बोलिल कि हमरा यहाक मूसा नबी आर परमेश्वरेर खिलाफ बोलते सुनिही। १२ इकिसम करे वरा लोकलाक, नेतालाक आर शास्त्रेर ज्ञानीलाक उसकाले। आर वरा इस्तिफनुसोक गिरफ्तार करिल आर महासभार आगुत ले ओसिल। १३ आर वहार खिलाफ झूठा गवाहलाक हाजिर करिल आर कोहले, “यहाँय इखान

पवित्र मंदिरेर आर मूसार नियमेर खिलाफ बोलवा नी छोड़छे। १४ हमरा यहाक इडा बोलते सुनिही कि नासरत शहरेर यीशु इडा मंदिरोक भाँयें दिबे आर मूसार देयाल रीति-रेवाजोक बदले दिबे।” १५ वहीखुना महासभात बठाल लोकला देखिल कि इस्तिफनुसेर मुखखान फरीस्तार मान्दी चमकेछे।

इस्तिफनुसेर उपदेश

७ यहार बाद महापूजारी इस्तिफनुसोक पूछिल, “इला बात की सच छे?” २-४ इस्तिफनुस जवाब दिले, “हे भईला आर बाप-दादोला! तुम्हरा मोर बात सुनो। हमसार बाप इब्राहिम जैखुना मेसोपोटामिया देशोत छिले, महिमा से भरपूर परमेश्वर वहाक दर्शन दिले आर कोहले, ‘तुई अपना देश आर सगा-सम्बन्धीलाक छोड़े उडा देशोत चले जा जैडा देश मुई तोक देखामु।’ यहार बाद इब्राहिम मेसोपोटामिया देश छोड़े दिले आर हारान शहरोत रहवा लागिल। उठिन वहार बाफेर मौतेर बाद परमेश्वर वहाक इडा देशोत आने बसाल, जैठिन आज तुम्हरा रोहचेन। ५ परमेश्वर वहाक अपनार तने इठिन एकोखुदी जमीन नी दिले। इकिसम कि अपना पाँखानो रखवार जमीन नी दिले। मगर इडा वादा करले कि मुई इडा देश तोक आर तोर खानदानोक दे दुम। जैखुना परमेश्वर इडा वादा करिल, त उखुना वहार कोय बेटा नी छिले।

६ परमेश्वर वहाक यहोडा कोहले, ‘तोर खानदानेर लोकला दोसरा देशोत विदेशी हंय रोहबे। वरा तोर खानदानेर लोकलाक गोलाम बनाबे आर चार सौ साल तक सताबे।’ ७ परमेश्वर आढोह कोहले, ‘जैडा देशेर लोकलार यरा गोलामी करबे, मुई उसाक सजा दुम। यहार बाद यरा उडा देश से निकले ओसे, यही ठिन मोर भक्ति करबे।’ ८ आर परमेश्वर इब्राहिमोक सुन्नत करवार नियम दिले। वहीलाते इसहाकेर जन्मेर आठ दिन बाद इब्राहिम वहार सुन्नत करिल। इसहाक अपना बेटा याकूबोक जनम दिले आर वहार सुन्नत करिल। आर याकूब अपना बारहइन बेटाक जनम दिले आर उसार सुन्नत करिल। आगु चले येराय इजराएली लोकेर बारह बंशेर कूल-पिता बने गेल। ९ याकूबेर बेटाला अपना भई यूसुफ से जलवा लागिल, आर वहाक मिसर देशेर लोकेर हाथोत बेचे दिले। मगर परमेश्वर वहार साथे छिले। १० परमेश्वर यूसुफोक वहार सब किसमेर मुसीबत से बचाले। परमेश्वर फिरोनेर सामनात वहार पर दया करिल आर बुद्धि दिले। आर फिरोन वहाक अपना राज-घराना आर मिसर देशेर हाकिम बनाय दिले। ११ वहीडा समय मिसर आर कनानेर पूराडा देशोत आकाल पोड़े गेल। यहार चलते हमसार दादो-परदादोक बहुत दुख-तखलीफ उठवा होल। उसाक खवार तने अनाज नी मिलिल। १२ मगर जैखुना याकूब सुनिल कि मिसर देशोत अनाज छे, त वहाँय अपना बेटालाक पठाल, जहाँय हमसार बाप-दादो

छे। १३ जैखुना वरा दोसरा बार उठिन गेल, यूसुफ अपना भईलार आगुत अपना परिचय दे दिले आर फिरोनोक यूसुफेर परिवारेर बारे मालूम हंय गेल। १४ यहार बाद यूसुफ अपना बाप याकूबोक आर अपना परिवारेर पचहतरझन लोकोक मिसर देश ओसवा कोहले। १५ तब याकूब मिसर देशोत गेल। उठिन वहाँय आर हमसार दादो-परदादो मोरे गेल। १६ उसार लाशलाक शकेम नामेर एकखान जगहोत ले जाल गेल आर कबरोत रखाल गेल। इडा कबर इब्राहिम होमेर नामेर एकझन लोकेर बेटालार लिकिन से कुछु टका दे किने लिहिले। १७ परमेश्वर इब्राहिमोक जैडा वादा दिहिले, उडा पूरा हवार समय ओसिल। मिसर देशोत हमसार लोकेर संख्या बहुत बढ़े गेल। १८ जैखुना इजराएली लोकेर संख्या बढ़ते जाछिल, उखुना मिसर देशोत नया राजा होल आर वहाँय यूसुफेर बारे कुछु नी जानछिल। १९ उडा राजा हमसार लोकलाक धोखाबाजी करे नाश करवा चाहचिले। वहीलाते हमसार परदादोलार साथे बहुत खराब व्यवहार करिल। उसाक मजबूर करिल कि वरा अपना जन्माल बच्चालाक फेके दे जसे कि बच्चाला मोरे जाय। २० यहीडा समय मूसार जनम होल आर वहाँय परमेश्वरेर नजरोत बहुत सुन्दर छिले। वहाक तीन महीना तक अपना माँ-बाफेर घरोत पूसाल गेल। २१ जैखुना वहाक मोरे जवार तने फेके दिले, फिरोनेर बेटी वहाक उठाय लिले, आर वहाक अपना बेटा बनाय पुसील। २२ मूसार मिसर देशेर सब किसमेर विद्या

सिखाल गेल। वहाँय बोली आर काम-काज से बहुत ताकतवर बने गेल।
२३ जैखुना वहाँय चालीस सालेर हंय गेल, वहाँय मनडात सोचिल कि
मुई अपना इजराएली भईलार साथे मुलेकात करी। २४ एक दिना वहाँय
एकझन इजराएली भईर पर अत्याचार होते देखिल। वहाँय वहाक
बचवार तने ओसिल आर मिसरी लोकटाक मारे अपना भईलार बदला
लिले क्योंकि वहार भईलार पर अत्याचार होचिले। २५ मूसा सोचिल कि
इडा घटना से मोर भईला समझिबे कि परमेश्वर मोर जरियाय उसाक
छुटकारा दिबे, मगर वहार अपना लोकला इडा नी समझिल। २६ दोसरा
दिन दुईझन इजराएली भई अपना बीचोत लड़ई करछिल। वहाँय उसार
लिकिन गेल आर उसार बीचोत मेल कराय दुवार तने कोहले, ‘हे
भईला! तुम्हरा त भई-भयारी छेन। तुम्हरा अपना बीचोत क्याँ झगड़ा
करछेन?’ २७ मगर जहाँय अपना भईर साथे गलत व्यवहार करिल,
वहाँय मूसाक धक्का दे कोहले, ‘के तोक हमसार उपरोत हाकिम आर
इन्साफी बनाहे?’ २८ जैकिसम काल तुई एकझन मिसरी लोकोक मारे
फिकाहिलो, वही किसम कि तुई मोहको मारे फिकवा चाहचिस?’
२९ इडा बात सुने मूसा उठिन से भागे गेल आर मिद्दान देशोत परदेशी
हंय रहवा लागिल। वहीठिन वहार दुईझन बेटा जनम लिले। ३० चालीस
साल बाद, एकटा फरीस्ता वहाक एकखान जलता झाँटीत दखा दिले,
आर उखान झाँटी सिने पहाड़ेर एकखान जंगलोत छिले। ३१ मूसा देखे

बहुत ताज्जुबोत पोड़े गेल आर अच्छा से देखवार तने वहाँय झाँटीखानेर बगलोत गेल। वहाँय प्रभुर इडा आवाज सुनिल, ^{३२} ‘मुई तोर बाप-दादो इब्राहिम, इसहाक आर याकूबेर परमेश्वर छी।’ इडा सुने मूसा काँपे उठिल आर देखवार हिम्मत नी होल। ^{३३} यहार बाद प्रभु वहाक कोहले, ‘तुई अपना जूतालाक खोले दे क्योंकि जैखान जगहोत तुई थाड़ो हंय छिस, उखान पवित्र जगह छे। ^{३४} मुई सचमुच मिसर देशोत मोर लोकलार दुर्दशा देखिही आर उसार कानन-मुनोन सुनिही। उसाक बचवार तने मुई नाभे ओसिही। वहीलाते मुई तोक मिसर देशोत पठाछी आर तुई जा।’ ^{३५} पहिले जैखुना मूसा मिसर देशोत छिले, उखुना वहार लोकला वहाक इडा कहय इन्कार करिहील कि के तोक हमसार हाकिम आर इन्साफी ठहराहे। मगर परमेश्वर फरीस्ता पठाय जलता झाँटीत मूसाक दर्शन दिले आर उडा फरीस्तार जरियाय मूसाक हाकिम आर बचानेवाला बनाय मिसर देशोत भेजिल। ^{३६} आर मूसा चमत्कारेर काम देखाय उसाक मिसर देश से निकलाय आनिल। चमत्कारेर कामेर जरियाय वहाँय उसाक लाल समुन्द्र पार कराल आर जंगल दे चालीस साल तक उसाक ले गेल। ^{३७} वही मूसा इजराएली लोकलाक कोहिले, ‘परमेश्वर तुमसार भईलार अन्दर से मोर मान्दी एकझन नबीक तैयार करबे।’ ^{३८} जैखुना मूसा जंगलोत हमसार दादो-परदादोलार साथे छिले, फरीस्ता सिने पहाड़ेर पर वहार साथे बात करिहिले आर वहाक जीवन

देनेवाला वचन हमसार तने दिले। ३९ मगर हमसार दादो-परदादोला वहार बात मानते इन्कार करिल आर घुरे मिसर देश जवार तने मनोत ठाने लिले ४० आर वरा हारूणोक कोहले, ‘हमसार तने कुछ देवतालाक बना, जहाँय हमसार आगु-आगु जाबे। हमरा नी जानी कि मूसा, जहाँय हमसाक मिसर देश से निकलाय आनिल, वहार की होल?’ ४१ वहीलाते वरा बाछार एकटा मूर्ति बनाल आर मूर्तिडार तने बलि चढ़ाल। आर वरा अपना हाथेर काम देखे खुशी मनवा लागिल। ४२ मगर परमेश्वर उसासे नाराज हंय गेल आर उसाक छोड़े दिले कि वरा आसमानेर चीजोक अपना देवता माने पूजा करे। आर नबीला उसार बारे लिखिहे, ‘हे याकूबेर घराना! तुम्हरा जंगलोत चालीस साल तक मोर तने जानवरेर बलि आर अनाज चढ़ाईलेन की? ४३ नी चढ़ायेन। तुम्हरा त मोलेक देवतार तम्बू आर रिफान देवतार तारा ढोय ले बेराछिलेन, जैला मूर्तिक तुम्हरा भक्ति दुवार तने बनाहिलेन। वहीलाते मुई तुमसाक तुमसार देश से निकलाय गोलाम हवार तने बाबूल देशोत पठाम।’ ४४ हमसार दादो-परदादोला जंगल दे परमेश्वरेर तम्बू ढोय ले जाछिले, जैडा से पता चलछिल कि परमेश्वर उसार साथे छे। परमेश्वर जैकिसम मूसाक देखाल, वही मुताबिक वहाँय तम्बूखान बनाल। ४५ जैखुना यहोशु हमसार दादो-परदादोर अगुवा बनिल आर परमेश्वर इठिनकार लोकलाक भगाय इडा देश हमसाक दिले, वहार बाद वहीखान तम्बूक

वरा इठिन ले ओसिल। आर तम्बूखान राजा दाऊदेर समय तक रखाल रोहोल। ४६ राजा दाऊद परमेश्वरेर कृपा पाले आर परमेश्वरेर लिकिन प्रार्थना करिल, ‘याकूबेर परमेश्वर! मोक आज्ञा दे कि मुई तोर तने एकखान घर बनाई, जैठिन तोर लोक तोर भक्ति करे।’ ४७ मगर वहार बेटा सुलेमान परमेश्वरेर तने घर बनाले। ४८ मगर सर्वशक्तिमान परमेश्वर मानुषेर बनाल घरोत नी रोहचे। आर जैकिसम प्रभु अपना नबीर जरियाय कोहचे, ४९ ‘स्वर्ग मोर सिंहासन आर धरतीखान मोर पाँ रखवार जगह। मोर तने तुई कुन किसम घर बनाबो? ५० इला सबला जिनिस की मोहरे हाथेर बनाल नी छे?’ ५१-५३ ऐ ऐंठा लोक! तुम्हरा फरीस्तार जरियाय परमेश्वरेर नियम पाहेन, मगर उलाक नी मानछेन, आर ना तुम्हरा परमेश्वरेर वचनोक सुनते आर दिलोत राखते पसंद करछेन। तुम्हरा सबखुना पवित्र आत्मार खिलाफ काम करछेन, जैकिसम कि तुमसार दादो-परदादोला करछिले। नबीला एकटा खास धर्मी लोकेर ओसवार बारे बहुत आगु से खबर दिछिले, मगर तुमसार दादो-परदादोला नबीलाक सताहिले आर मारे फिकाहिले। वही किसम तुम्हराव उडा धर्मी लोकोक धोखा से धराय दिलेन आर मारे फिकालेन।”

इस्तिफनुसेर मौत

५४ महासभार नेताला इस्तिफनुसेर इला बात सुने बहुत गोस्सा हंय गेल, आर वहार पर दाँत किड़किड़वा लागिल। ५५ इस्तिफनुस पवित्र आत्मा से भरपूर छिले आर स्वर्गेर भीति टकटकी लगाय देखते रोहोल। वहाँय परमेश्वरेर रोशनी देखिल। आर यीशुक परमेश्वरेर दहिना भीति थाड़ो देखिल ५६ आर बोलिल, “देखो, मुई स्वर्ग खोलाल देखछी आर मानुषेर बेटाक परमेश्वरेर दहिना भीति थाड़ो देखछी।” ५७ इला बात सुने सभार लोकला अपना-अपना कान बन करिल आर जोर से चिल्लाय उठिल, आर एक साथे वहार पर झपटे पोड़िल। ५८ वहार खिलाफ गवाह देनेवालाला अपना-अपनी उपरेर कपड़ाला खोलिल आर शाऊल नामेर एकझन जवानेर आगुत राखे दिले। आर इस्तिफनुसोक शहरेर बाहरे निकलाल आर पत्थल दे मरवा लागिल। ५९ लोकला वहार पर पत्थलला फेकते रोहल। आर वहाँय इडा कहय प्रार्थना करिल, “हे प्रभु यीशु! मोर आत्माडाक ग्रहण कर।” ६० यहार बाद वहाँय अपना हटुवा पारे बहुत चिल्लाय कोहले, “हे प्रभु! इडा पापेर दोष उसार पर ना लगा।” इडा कहय वहाँय अपना प्राण दे दिले।

मंडलीर पर अत्याचार

१-३ उसार कपड़ालार देखभाल करवार कारण शाऊल इस्तिफनुसोक जान से मारते राजी छिले। कुछुला भक्त इस्तिफनुसेर लाशटाक कबर दिले, आर वहार तने खूब कानिल-मुनिल। वहीडा दिन से यरूशलेमेर मंडलीर पर बहुत जूलुम शुरू हंय गेल। शाऊल मंडलीलाक बर्बाद करछिले आर घरे-घरे जाय मर्दाना आर स्त्रीलाक जबरदस्ती जेलोत ठुकाछिले। मसीह-दूतलाक छोड़े, बाँकी सबला विश्वासी यहूदिया आर सामरिया इलाकात तितर-बितर हंय गेल।

सामरिया इलाकात फिलिपेर प्रचार

४ जैला विश्वासी तितर-बितर हंय गहिले, वरा जगह-जगह जाय खुश-खबरी प्रचार करते बेराले। ५ फिलिप सामरिया इलाकात जाय लोकलार लिकिन मसीहार प्रचार करवा लागिल। ६ जैखुना लोकला वहार लिकिन से वचन सुनिल आर वहार जरियाय चमत्कारेर काम देखिल, त वरा सबकोय वहार बातलाक मन लगाय सुनछिले। ७ बहुतझनार भीतर से भूतला बहुत जोर से चिल्लाय निकले गेल। बहुतला लकवार रोगी आर नेंगड़ा लोक अच्छा हंय गेल। ८ वहीलाते उडा शहरोत बहुत खुशी ओसे गेल।

जादूगर शिमोन

९ सामरिया शहरोत शिमोन नामेर एकझन जादूगर रोहछिले। यहार जादू-मंत्र से सामरियार सबला लोक हैरान छिले। वहाँय अपना-आपोक एकझन बोड़ो लोक कोहचिले। १० इडा शहरेर छोटो से बोड़ो, सबला लोक वहार इज्जत करछिले आर कोहचिले, “यहाँय परमेश्वरेर महान शक्ति छे।” ११ बहुत दिन से वहार जादू देखे लोकला हैरान छिले। वहीलाते लोकला वहाक बहुत मानछिले। १२ मगर फिलिप जैखुना परमेश्वरेर राज आर यीशु मसीहार खुश-खबरी प्रचार करिल, त लोकला वहार प्रचारेर पर विश्वास करिल। आर बहुतझन स्त्री-पुरुष बपतिस्मा लुवा लागिल। १३ जादूगर शिमोनो विश्वास करिल आर बपतिस्मा लिले। वहार बाद वहाँय फिलिपेर साथे-साथे सब जगहोत जवा लागिल। आर वहाँय बोड़ो-बोड़ो चमत्कार देखे, ताज्जुबोत पोड़े गेल।

सामरिया शहरोत पतरस आर यूहन्नार काम

१४ यरूशलेम शहरोत मसीह-दूतला सुनले कि सामरिया शहरेर लोकला परमेश्वरेर वचन माने लिहे, त वरा पतरस आर यूहन्नाक उसार लिकिन पठाल। १५ वरा उठिन जाय उसार तने प्रार्थना करे कि उठिनकार विश्वासीला पवित्र आत्मा पाय १६ क्योंकि उखुन तक पवित्र आत्मा उसार कहारो पर नी नाभे। वरा सिरिफ प्रभु यीशुर नामे बपतिस्मा लिहिले। १७ वहार बाद पतरस आर यूहन्ना उसार पर हाथ राखिल आर

वरा पवित्र आत्मा पाले। १८ शिमोन जैखुना देखिल कि मसीह-दूतला हाथ राखले पवित्र आत्मा मिलछे, त वहाँय उसार लिकिन टाका आनिल आर कोहले, १९ “इडा शक्ति मोहको दव, जसे कि जहार पर मुई हाथ राखी, त वहाँ पवित्र आत्मा पाय जाय।” २० इडा बात सुने पतरस वहाक कोहले, “तोर टाकाला तोर साथे बर्बाद हंय जाक क्याँकि तुई परमेश्वरेर दानडाक टाका दे किने लुवार बात सोचिहीस। २१ हमसार इखान कामोत तोर कोय हिस्सा आर अधिकार नी छे क्याँकि परमेश्वरेर नजरोत तोर दिलडा साफ नी छे। २२ इडा बुराई से अपना दिलडाक बदली करेक आर प्रभुर लिकिन प्रार्थना करेक। हवा सकोछे तोर दिलेर इडा खराब बिचार माफ हंय जाय। २३ मुई देखछी कि तोर दिलडा लोभ से भराल छे आर पापेर चंगुलोत फँसाल छे।” २४ शिमोन जवाब दिले, “तुई मोर तने परमेश्वरेर लिकिन प्रार्थना करेक जसे कि जैला बात तुई मोक कोहलो, उलार अन्दर से कोयडा मोर पर नी ओसे।” २५ प्रचार करवार बाद पतरस आर यूहन्ना यरूशलेम वापस चले ओसिल। ओसवारखुना वरा सामरिया इलाकार बहुतला बस्तीत खुश-खबरीर प्रचार करते ओल।

कुश देशेर मंत्रीर जीवन परिवर्तन

२६ एक दिना प्रभुर एकझन फरीस्ता फिलिपोक कोहले, “उठेक। दक्खिन भीतकार बालूर रास्ताडात जा, जैडा रास्ता यरूशलेम से गाजा शहरेर भीति जाछे।” २७ फिलिप उठे उठिन से चले गेल। वहीडा रास्तात वहाँय कुश देशेर एकझन मंत्रीक पाले, जहाँय रानीर टका-पैसार हिसाब राखछिले। वहाँय यरूशलेम मंदिरोत परमेश्वरेर भक्ति करवा ओसिहिले। २८ भक्ति करवार बाद वहाँय अपना रथेर पर बोठे वापस जाछिले आर यशायाह नबीर किताबखान पढ़छिले। २९ वहीखुना परमेश्वरेर आत्मा फिलिपोक कोहले, “इखान रथेर पीछू-पीछू जा।” ३० फिलिप उखान रथेर भीति दौड़े गेल आर मंत्रीडाक यशायाह नबीर किताबखान पोढ़ते सुनिल। फिलिप वहाक पूछिल, “तुई जैला बात पोढ़छिस उलाक की बुझवा पारछिस?” ३१ मंत्रीडा कोहले, “जब तक कोय मोक नी बुझाय दे, मुई कसे करे बुझवा पारमु?” आर वहाँय फिलिपोक अनुरोध करे कोहले कि मोर रथेर पर बोठेक। ३२ परमेश्वरेर शास्त्रेर जैडा भाग वहाँय पोढ़छिले, वहात इकिसम लिखाल छिले, “जैमान्दी भेड़ा कटवारखुना चुप रोहचे, वही मान्दी वहाँव मोरवारखुना चुप रोहोल। आर जैमान्दी भेड़ा अपना बदनेर चूल कटवारखुना चुपचाप रोहचे, वही मान्दी वहाँव अपना मुखखान नी खोलिल। ३३ वहाक बेकार समझाल गेल आर वहार सही बिचार नी होल। वहार खानदानेर बारे

कहना संभव नी छे, क्योंकि वहार जानडाक इडा दुनियाँ से ले लिया ल गेल।” ३४ इला बातेर बारे मंत्रीडा फिलिपोक पूछिल, “तुई मोक बता कि नबी इला बात कहार बारे कोहचे? अपना बारे ना दोसरा कहारो बारे कोहचे?” ३५ मंत्रीडा शास्त्रेर जैडा भाग पोढ़छिले वहीडा भाग से फिलिप समझाले कि इला बात यीशुर बारे लिखाल छे। ३६ रास्तात जाते-जाते वरा एकखान जगहोत पहुँचिल जैठिन पानी छिले। वहार बाद मंत्रीडा कोहले, “देख, इठिन त पानी छे, मोक अला बपतिस्मा लिते किसेर बाधा छे?” ३७ [फिलिप कोहले, “अगर तुई पूरा दिल से विश्वास करछिस, त बपतिस्मा लुवा पारिस।” वहाँय जवाब दिले, “मुई विश्वास करछी कि यीशु मसीहा परमेश्वरेर बेटा छे।”] ३८ यहार बाद मंत्रीडा रथखानोक थमवार हुकूम दिले। वहाँय आर फिलिप दोनोंइन पानीत नाभिल आर फिलिप मंत्रीडाक बपतिस्मा दिले। ३९ जैखुना दोनोंइन पानी से उठे उपरोत ओसिल, परमेश्वरेर आत्मा फिलिपोक उठाय ले चले गेल। मंत्रीडा आर वहाक देखवा नी पारिल। वहाँय खुशी-खुशी अपना रास्ता धरे चले गेल। ४० मगर फिलिप अशदोत नामेर एकखान जगहोत ओसिल, आर अलग-अलग शहरोत खुश-खबरीर प्रचार करते-करते कैसरिया शहरोत पहुँचिल।

शाऊलेर जीवन परिवर्तन

१-२ शाऊल लगातार यीशु मसीहार विश्वासीलाक जान से मारे फिकवार धमकी दिछिले। वहाँय मंदिरेर महापूजारीर लिकिन हुकूम मँगवा गेल आर वहार लिकिन से दमिशक शहरेर हरेकटा प्रार्थना-घरेर खिलाफ चिट्ठी माँगिल जसे कि अगर वहाँय यीशुर पर विश्वास करनेवाला कोय स्त्री या पुरुषोक पाय, त उसाक धरे यरूशलेम ले ओसे। ३ जाते-जाते जैखुना वहाँय दमिशक शहरेर बगलोत पहुँचिल, त ओचकाय शाऊलेर चारो भीति आसमान से रोशनी चमकिल। ४ वहाँय माटीत पोड़े गेल आर इडा आवाज सुनिल, “शाऊल! शाऊल! तुई मोक क्याँ सताछिस?” ५ शाऊल पूछिल, “हे प्रभु! तुई के छिस?” वहाँय कोहले, “मुई यीशु छी, जहाक तुई सताछिस। ६ तुई अला उठेक आर दमिशक शहरोत जा। तोक की करवा होबे? उला तोक बताल जाबे।” ७ जैला लोक शाऊलेर साथे छिले, वरा थाड़ो हंय गेल आर उसार बोली बन्द हंय गेल क्योंकि वरा त आवाज सुनछिले, मगर कहाको देखवा नी पारछिले। ८ वहार बाद शाऊल माटीर पर से उठिल। जैखुना आँखला खोलिल त वहाँय कुछ देखवा नी पारिल। वहार साथीला वहार हाथ धरे दमिशक शहर ले गेल। ९ वहाँय तीन दिन तक ना देखवा पारिल, आर ना कुछ खाले। १० दमिशक शहरोत हनन्याह नामेर यीशुर एकझन विश्वासी छिले। वहाक प्रभु दर्शन दे कोहले, “हे हनन्याह!” वहाँय जवाब दिले

“हाँ, प्रभु।” ११ प्रभु वहाक कोहले, “तुई उठे सीधा नामेर गलीडात जा। वहीडा गलीत यहूदार घरोत, तरशीस शहरेर शाऊल नामेर एकझन लोक छे। १२ वहाँय प्रार्थना करछे आर दर्शनोत देखछे कि हनन्याह नामेर एकझन लोक अन्दरोत ओसछे आर वहार पर हाथ राखछे जसे कि वहाँय देखवा पारे।” १३ हनन्याह जवाब दिले, “हे प्रभु! मुई बहुतझनार लिकिन से सुनिही कि शाऊल यरूशलेम शहरोत तोर भक्तलार साथे बहुत खराब व्यवहार करियेह। १४ आर वहार लिकिन बोड़ो-पूजारीलार चिट्ठी छे। वहाँय हुकूम पाहे कि जैला लोक तोर नाम लिछे, उसाक धरे यरूशलेम ले जाय।” १५ मगर प्रभु वहाक कोहले, “तुई वहार लिकिन जा क्योंकि मुई वहाक अपना कामेर तने चुने लिही। अला से वहाँय गैर-यहूदी, राजा, आर इजराएली लोकेर लिकिन मोर बारे प्रचार करबे। १६ मुई वहाक बताय कि मोर कारणे वहाक बहुत दुःख उठवा होबे।” १७ वहार बाद हनन्याह उठे शाऊलेर लिकिन गेल आर वहार पर हाथ राखे कोहले, “भई शाऊल! प्रभु यीशु जहाँय तोक रास्तात देखा दिहिले, वही मोक पठाहे जसे कि तुई आरमने देखवा पारिस, आर परमेश्वरेर आत्मा से भरे जईस।” १८ वहीखुना साथे-साथे वहार आँखला से छिलकार मान्दी कुछु पोड़िल आर वहाँय देखवा लागिल, आर उठे बपतिस्मा लिले। १९ वहार बाद खाना खाय ताकत पाले।

दमिशक शहरोत शाऊलेर प्रचार

२० शाऊल कुछु दिन तक दमिशक शहरोत विश्वासीलार साथे रोहोल। आर जल्दी करे वहाँय उठिनकार प्रार्थना-घरलात प्रचार करवा लागिल कि यीशु परमेश्वरेर बेटा छे। २१ सब लोक सुने ताज्जुब करवा लागिल आर कोहले, “इडा त वहीडा लोक छे, जहाँय यरूशलेम शहरोत यीशुक माननेवाला लोकोक बर्बाद करछिले। आर वहीलाते इठिन ओसिहिले कि विश्वासीलाक धरे महापूजारीर लिकिन ले जाय।” २२ मगर शाऊल प्रचारेर कामोत आढोह ताकतवर होते गेल। आर प्रमाण दिते गेल कि सिरिफ यीशु छे, जहाँय परमेश्वरेर चुनाल मुक्तिदाता छे। इकिसम प्रचार करे दमिशक शहरेर यहूदी लोकेर मुख बन करते रोहिल। २३ बहुत दिन बिते जवार बाद, यहूदी लोकला वहाक जान से मारे फिकवार साजिश करिल। २४ वहीलाते वरा वहाक मारे फेकवार तने रात-दिन शहरेर फाटकलार बगलोत नुकाय रोहछिले। मगर उसार साजिसेर खबर शाऊलोक मालूम हंय गेल। २५ एक दिना रात करे वहार चेलाला वहाक टोकरीत बठाल आर देवाल से टपाय बाहर करे दिले।

शाऊल यरूशलेम शहरोत प्रचार करछे

२६ यरूशलेम पहुँचवार बाद शाऊल विश्वासीलार साथे मिलवार कोशिश करले, मगर सबकोय वहाक देखे डोराछिले। उसाक विश्वास नी होचिले कि वहाँय एकझन विश्वासी बने गहे। २७ मगर बरनबास वहाक अपना

साथे मसीह-दूतलार लिकिन ले गेल आर उसार लिकिन सिफारिस करिल कि यहाँय रास्तात प्रभुर दर्शन पाहे आर प्रभु यहार साथे बात करिहे। वहार बाद यहाँय हिम्मत से प्रभु यीशुर बारे दमिशक शहरोत प्रचार करछिले। २८ वही दिन से शाऊल विश्वासीलार साथे यरूशलेम शहरोत रहवा लागिल। बिना रोकटोक उसार साथे मिलते-जुलते रोहिल आर हिम्मत से प्रभुर बारे प्रचार करते बेराल। २९ वहाँय यूनानी भाषा बोलनेवाला यहूदी लोकेर साथे बहस करछिले। वहीलाते वरा वहाक जान से मारे फिकवार मनसुबा करिल। ३० इडा खबर पाय विश्वासीला शाऊलोक कैसरिया शहरोत ले ओसिल आर उठिन से वहाक तरशीस शहरोत पठाय दिले। ३१ यहार बाद यहूदिया, गलील आर सामरिया इलाकात जुलूम-सितम बन हंय गेल आर सबला विश्वासीक चैन मिलिल आर वरा शक्ति पाले आर उसार संख्या बढ़ते गेल। उसार दिलोत प्रभुर तने सम्मान छिले आर पवित्र आत्मा उसाक तसल्ली दिछिले।

पतरस लकवा मराल लोकोक ठीक करछे

३२ पतरस जगह-जगह घुरते-घुरते लूद्दा शहरेर प्रभुर भक्तलार लिकिन पहुँचिल। ३३ उठिन वहाँय एनियास नामेर एकझन लोकोक पाले, जहाक लकवार बेमारी छिले। वहाँय आठ साल से बिछनात पोड़े छिले। ३४ पतरस वहाक देखे कोहले, “एनियास! यीशु मसीहा तोक अच्छा

करछे। उठेक आर अपना बिछनाखान उठा।” आर वहाँय वहीखुना उठे थाड़ो हंय गेल। ३५ लूद्दा आर शारोन बस्तीर सबला लोक इडा देखे प्रभुर पर विश्वास करिल।

पतरस मराल स्त्रीक जिन्दा करछे

३६ याफा शहरोत तबिता नामेर एकझन स्त्री छिले आर वहाँय विश्वासी छिले। वहार नाम यूनानी भाषात “दोरकास” छिले। वहाँय लगातार अच्छा काम करछिले आर गरीब लोकेर मदद करछिले। ३७ वहाँय बेमार पोड़े गेल आर मोरे गेल। लोकला लाशटाक सिना कराय उपरेर एकटा कमरात राखिल। ३८ लूद्दा बस्ती याफा शहरेर बगलोत छिले। विश्वासीलाक मालूम छिले कि पतरस लूद्दा बस्तीत छे, त वरा पतरसोक अनवार तने दुईझन लोकोक पठाल आर वहाक बिनती करे कोहले, “मेहरवानी करे, हमसार लिकिन ओसते देरी ना करेक।” ३९ इडा सुने पतरस उठे उसार साथे चले गेल। जैखुना वहाँय उठिन पहुँचिल, त लोकला वहाक उपरेर कमरात ले गेल। सबला राँडी कानते-कानते वहार लिकिन ओसे थाड़ो होल आर तबितार हाथेर बनाल कुरता आर दोसरा कपड़ाला पतरसोक देखाल आर कोहले, “इला कपड़ा उखुना बनाहिले, जैखुना वहाँय हमसार साथे छिले।” ४० वहार बाद पतरस सभाको बाहर करे दिले आर हटुवा पाड़े प्रार्थना करिल। लाशटार भीति देखे कोहले, “तबिता उठ।” यहार बाद वहाँय अपना

आँखला खोलिल आर पतरसोक देखे उठे बोठे गेल। ४१ पतरस वहार हाथ धोड़े वहाक उठाल आर परमेश्वरेर भक्तलाक आर राँडीलाक जाब दिले आर देखाल कि तबिता जिन्दा हंय गहे। ४२ इडा बात गोटांडा याफा शहरोत फैले गेल आर बहुतला लोक प्रभुर पर विश्वास करिल। ४३ वहार बाद पतरस याफा शहरोत शिमोन नामेर एकटा लोकेर घर रहवा लागिल आर वहार घरोत बहुत दिन तक रोहिल। शिमोन चमड़ार काम करछिल।

कुरनेलियुस दर्शन पाछे

१० कैसरिया शहरोत कुरनेलियुस नामेर एकझन लोक छिले। रोम राजेर अधीन इटली सैनिक दलेर एकझन हाकिम छिले। १ वहाँय परमेश्वरेर एकझन भक्त लोक छिले, आर अपना परिवारेर साथे परमेश्वरेर बहुत भक्ति करछिले आर बराबर परमेश्वरेर लिकिन प्रार्थना करछिले। आर वहाँय गरीब लोकोक टका-पैसा दान करछिल। ३ एक दिना तीन बजे दिनोत वहाँय एकटा दर्शन पाले। वहाँय देखिल कि परमेश्वरेर एकझन फरीस्ता वहार लिकिन ओसछे आर वहार नाम ले कोहचे, “ऐ कुरनेलियुस!” ४ कुरनेलियुस सुने डोराय गेल आर वहार भीति देखिल। वहाँय फरीस्ताडाक पूछिल, “की कोहचिस, प्रभु?” फरीस्ताडा बोलिल, “तोर दान आर प्रार्थना से परमेश्वर खोश छे आर

परमेश्वर तोर प्रार्थनार जवाब दुवार तने तैयार छे। ५ अला तुई याफा शहरोत कुछु लोकोक पठा जसे कि वरा उठिन जाय शिमोनोक ले ओसे, जहाक पतरस कहाल जाछे, लोकटाक छाभे निकलाय। ६ वहाँय शिमोन नामेर एकटा लोकेर घरोत रोहचे, जहार घर समुन्द्रेर कछारोत छे आर वहाँय चमड़ार काम करछे।” ७ फरीस्ताडा कुरनेलियुसेर साथे बात करे चले गेल। वहार बाद कुरनेलियुस अपना घरेर दुईझन नौकरोक आर अपना एकझन विश्वासयोग्य सैनिकोक जाब दिले, जहाँय परमेश्वरेर भक्त छिले। ८ जैकुछु होईले, कुरनेलियुस उसाक सबला बातोक बताय दिले आर याफा शहरोत पठाय दिले। ९ दोसरा दिन वरा तीनोंझन याफा शहरेर बगलोत ओसिल। दुई पोहरेर समय पतरस प्रार्थना करवार तने छतेर पर गेल। १० वहार बाद पतरसोक खोब भोख लागिल आर वहाँय कुछु खवा चाहचिले। जैखुना खाना तैयार होचिले, उखुना वहाँय दर्शनीत देखिल ११ कि आसमानडा खोलाल छे आर बोड़ो चादरेर मान्दी कोय चीज आसमान से वहार आगुभिति नाभिल, जहार चारोडा कोना लटकाल छिले। १२ उखानोत सब किसमेर जानवर, साँप आर चिड़ियाला छिले, जैला यहूदी लोक नी खाछिले। १३ वहार बाद वहाँय एकटा आवाज सुनिल, “हे पतरस उठेक, इलाक मारे खा।” १४ मगर पतरस कोहले, “प्रभु! एकदम नी। अपना जिन्दगीत कोय दिना इकिसमेर जीव-जन्तुक नी खई। हमसार यहूदी नियम मुताबिक कोय

अशुद्ध आर खराब चीज मुई नी खई।” १५ फेर दोसरा बार परमेश्वर बोलिल, “मुई जैला चीजोक अच्छा आर शुद्ध कोहची, तुई उलाक खराब आर अशुद्ध ना कह।” १६ तीन बार यही मान्दी आवाज होल। वहार बाद उडा चादरोक आसमानोत उठाय लिया ल गेल। १७ मगर पतरस बुझवा नी पारिल कि दर्शनडार मतलब की छे? इडार बारे पतरस सोचेछिले आर वहीखुना कुरनेलियुसेर पठाल लोकला शिमोनेर घरखानोक छाभते-छाभते पहुँचिल, आर वहार दरवाजार आगुत थाड़ो हंय गेल। १८ वहार बाद उला लोक पूछिल, “इठिन की पतरस रोहचे?” १९ वहीखुना पतरस दर्शनडार बारे सोचेछिल आर पवित्र आत्मा वहाक कोहले, “देख! तीनझन लोक तोक छाभछे। २० तुई उठे नीचानोंत जा आर कोय शक ना कर। बेधरक तुई उसार साथे चले जा क्योंकि मुई उसाक पठाही।” २१ वहार बाद पतरस नाभे नीचानोंत ओसिल आर लोकलाक कोहले, “तुम्हरा जैडा लोकोक छाभछेन, उडा लोक मुई छी। तुम्हरा क्याँ ओसिहेन?” २२ लोकला कोहले, “हमसाक हमसार हाकिम कुरनेलियुस पठाहे। वहाँय एकझन धर्मी लोक छे आर परमेश्वरेर भक्ति करछे। सबला यहूदी लोक वहार खूब नाम करछे। परमेश्वरेर एकझन फरीस्ताक कुरनेलियुसोक हुकूम दिहिले कि वहाँय तोक अपना घरोत बुलाय ले जाय आर तोर लिकिन से परमेश्वरेर वचन सुने।” २३ वहार बाद पतरस उसाक घरेर भीतरोत ले गेल आर उसाक रात राखिल।

दोसरा दिन वहाँय उसार साथे चले गेल आर वहार साथे याफा शहरेर कुछुला विश्वासी भाईलाव गेल। २४ दोसरा दिन वरा कैसरिया शहरोत पहुँचिल। कुरनेलियुस उसार इन्तेजार करछिले। वहाँय अपना रिस्तेदार आर दोस्त-बन्धुलाको जाब दिले कि पतरसेर साथे मुलेकात करे। २५ पतरस जैखुना कुरनेलियुसेर घरोत अपना पाँव राखिल, कुरनेलियुस वहार पाँत पोड़े वहार भक्ति करिल। २६ मगर पतरस वहाक फट से उठाय कोहले, “इकिसम ना कर क्योंकि मुई परमेश्वर नी छी। मुई तोहरे मान्दी एकझन मानुष छी।” २७ वहार बाद दोनोंझन बातचीत करते-करते भीतरोत गेल। घरखानेर भीतरोत आढ़ो कुछुला लोक छिले। २८ पतरस उसाक कोहले, “तुम्हरा जानेन कि मोक गैर-यहूदी लोकेर घर जाना हमसार यहूदी नियमेर खिलाफ छे। मगर परमेश्वर मोक दर्शनेर जरियाय सिखायेह कि मुई कहाको छुत आर छोटो नी समझी। २९ वहीलाते जैखुना तुई मोक जाब दिलो, त मुई तोर लिकिन बिना हिचकिचाय चले ओसनु। अला मोक बताव, तुम्हरा की चाहचेन?” ३० कुरनेलियुस जवाब दिले, “चार दिन आगुत मुई तीन बजे दिनोत प्रार्थानार समय अपना घरोत प्रार्थना करछिनु। वहीखुना ओचकाय एकझन लोक सादा आर चमकाल कपड़ा पिन्हे मोर आगुत ओसे थाड़ो होल। ३१ वहाँय मोक कोहले, ‘कुरनेलियुस! परमेश्वर तोर प्रार्थना सुने लिहे आर तोर दानलाको देखिहे, जैला तुई गरीब लोकोक

दान करिहिस। ३२ अला तुई याफा शहरोत कुछु लोकोक पठाय पतरसोक जाब दे ले ओसेक। वहाँय चमड़ार काम करनेवाला शिमोनेर घरोत रहछे, जहार घर समुन्द्रेर कछारोत छे।’ ३३ वहार बाद मुई तोक जाब दुवा पठानु। तुई बहुत अच्छा करलो कि जल्दी करे चले ओसलो। अला हमरा सबकोय इठिन छी आर परमेश्वर हमेशार साथे छे। हमरा तोर लिकिन से परमेश्वरेर वचन सुनवार तने बेचैन छी, जैडा कि परमेश्वर तोक बोलिहे।”

पतरसेर प्रचार

३४ वहार बाद पतरस बोलवा शुरू करिल, “अला मोक अच्छा से मालूम हंय गेल कि परमेश्वर कहारो मुख देखे इन्साफ नी करछे। ३५ कोय देशेर लोक होक, अगर वरा परमेश्वरेर भक्ति करछे आर अच्छा काम करछे, त परमेश्वर उसाक ग्रहण करछे। ३६ तुम्हरा जानेन कि परमेश्वर इजराएली लोकेर लिकिन शांतिर खुश-खबरी पठाहिले। उडा शांति यीशु मसीहार जरियाय मिलबे, जहाँय सब लोकेर प्रभु छे। ३७ इडा खुश-खबरी बपतिस्मा देनेवाला यूहन्नार बाद ओसिल आर गलील प्रदेश से शुरू होल आर पूराडा यहूदिया प्रदेशोत फैले गेल। ३८ परमेश्वर नासरत शहरेर यीशुक चुने लिहिल, आर वहाक पवित्र आत्मार शक्ति दे भरे दिहिल। वहाँय सभारो भलेई करते रोहिल। भूत आर बेमारी से परेशान लोकलाक अच्छा करते रोहिल। आर परमेश्वर सबखुना वहार साथे

छिले। ३९ हमरा उला सबला कामेर गवाह छी, जैला वहाँय यरूशलेम शहरोत आर पूरा इजराएल देशोत करले। लोकला वहाक क्रुसेर पर चढ़ाय मारे फिकाल। ४० मगर परमेश्वर वहाक तेसरा दिन जिन्दा करे दिले। ४१ जिन्दा हंय उठवार बाद वहाँय सभाको देखा नी दिले, मगर सिरिफ हमसाके देखा दिले, हमरा जहाँय वहार साथे खान-पान करिहिनु। परमेश्वर हमसाके वहार बारे लोकोक बतवार तने चुने लिहे आर ४२ हुकूम दिहे कि हमरा लोकलार लिकिन वहार बारे बताई। हमरा इडा बात बताई कि परमेश्वर यीशुक चुने लिहे, आर वहाक जिन्दा आर मुर्दा लोकेर इन्साफ करनेवाला बनाहे। ४३ वहार बारे सबला नबी बताछे कि वहार पर जहाँय विश्वास करबे, उसाक पापेर माफी मिलबे।” ४४ जैखुना पतरस प्रचार करछिले, वहीखुना सबला लोकेर पर पवित्र आत्मा नाभे गेल। ४५ कुछुला विश्वासी पतरसेर साथे ओसिहिले, जैला लोक विश्वासी बने गहिले, वराव पतरसेर साथे ओसिहिले। वरा इडा देखे ताज्जुब करवा लागिल कि कन्हें करे गैर-यहूदी लोकला पवित्र आत्मार दान पाले ४६ क्याँकि वरा उसाक अनजान भाषालात बोलते आर परमेश्वरेर बड़ाई करते सुनिल। ४७ वहार बाद पतरस कोहले, “जैला लोक हमसारे मान्दी पवित्र आत्मा पाहे, उसाक की कोय बपतिस्मा लिते मना करवा पारबे? नी पारबे।” ४८ वहार बाद पतरस

उसाक यीशु मसीहार नामे बपतिस्मा दिले। आर उठिन जताला लोक छिले, वरा पतरसोक अपनार साथे कुछु दिन रहवार तने बिनती करिल।

यहूदी विश्वासीलाक पतरसेर जवाब

११ मसीह-दूतला आर पूरा यहूदिया प्रदेशेर विश्वासीला सुनिल कि गैर-यहूदीलाव परमेश्वरेर वचनेर पर विश्वास करे लिहे। २ जैखुना पतरस यरूशलेम शहरोत ओसिल। उठिन यहूदी-विश्वासीला वहार पर आरोप लागाय बोलिल, ३ “तुई त गैर-यहूदी लोकलार घर जाय खान-पान करलो।” ४ उखुना पतरस उसाक सबला घटनार बारे एक-एक करे समझाय कोहले, ५ “मुई त याफा नगरोत प्रार्थना करछिनु आर दर्शन देखनु कि बोड़ो चादरेर मान्दी कोय चीज आसमान से मोर लिकिन नाभिल, जहार चारोडा कोना लटकाल छिले। ओसे मोर सामनात थामे गेल। ६ मुई ध्यान से देखनु कि वहात चार पाँ वाला जानवर, जंगली जानवर, साँपेर मान्दी चलनेवाला जीव आर चिड़ियाला छे। ७ आर आसमान से यहोडा आवाज सुन्नु, ‘पतरस! उठे इलाक मारे खा।’ ८ मुई कोहनु, ‘नी प्रभु, एकदम नी। मुई कोय अशुद्ध चीज कभी नी खई।’ ९ आसमान से परमेश्वर कोहले, ‘मुई जैला चीजोक अच्छा आर शुद्ध कोहची, तुई उला चीजोक खराब आर अशुद्ध ना कह।’ १० यही मान्दी तीन बार होल। वहार बाद सबला चीजोक आसमानोत उठाय लिया

गेल। ११ वहीखुना साथे-साथे कैसरिया से तीनझन लोक हमसार घरेर लिकिन थाड़ो होल, जैखान घरोत हमरा छिनु। १२ यहार बाद पवित्र आत्मा मोक कोहले, ‘कोय शक ना कर। उसार साथे चले जा।’ याफा नगर से ई-छौझन भई मोर साथे कुरनेलियुसेर घर गेल। १३ कुरनेलियुस हमसाक कोहले, ‘मुई एकझन फरीस्ताक देखनु, जहाँय मोर घरोत थाड़ो हंय छिले। आर मोक कोहले, याफा शहरोत लोक पठाय शिमोन नामेर लोकोक ले ओसेक, जहाक पतरस कहाल जाछे। १४ वहाँय ओसे तुमसाक जैला बात कोहबे, उला से तुई आर तोर पूरा परिवार पापेर माफी पाभेन।’ १५ जैखुना मुई बोलवा शुरू करनु, उसार पर पवित्र आत्मा नाभिल आर वरा पवित्र आत्मार बपतिस्मा पाले, जैकिसम हमसार पर शुरूत नाभिले। १६ उखुना मोक प्रभुर बातला ख्याल होल। प्रभु कोहिले, ‘यूहन्ना त लोकोक पानी दे बपतिस्मा दिहिले, मगर तुम्हरा पवित्र आत्मार बपतिस्मा पाभेन।’ १७ वहीलाते परमेश्वर गैर-यहूदी विश्वासीलाको पवित्र आत्मार दान दिले, जैडा दान वहाँय हमसाक दिहिले, जैखुना हमरा प्रभु यीशु मसीहार पर विश्वास करिहिनु। मुई के जे परमेश्वरोकर बाधा दिनुतन?” १८ पतरसेर जवाब सुने सबकोय चुप हंय गेल आर वहार खिलाफ कुछु नी बोलिल, आर परमेश्वरेर बड़ाई करे बोलिल कि परमेश्वर गैर-यहूदी लोकलाको पाप से मन बदली करवार मौका दिहे जसे कि वरा नया जीवन पाय।

अन्तकिया शहरेर मंडलीर काम

१९ इस्तिफनुसेर पर जैला अत्याचार होईले, उलाक देखे कुछुला विश्वासी तितर-बितर हंय गेल आर वरा फीनीके इलाकात, साइप्रस टापूत आर सीरिया देशेर अन्तकिया शहरोत पहुँचिल। आर वरा सिरिफ यहूदी लोकेर लिकिन जाय प्रचार करते रोहले। २० मगर कुछुला विश्वासी जैला तितर-बितर हंय गहिले, वरा साइप्रस टापू आर कुरेन शहरेर छिले। वरा अन्तकिया शहरोत ओसिल आर गैर-यहूदी लोकलाको यीशुर खुश-खबरी प्रचार करिल। २१ प्रभुर आशीर्वाद उसार पर छिले। आर बहुतला लोक प्रभुर पर विश्वास करिल। २२ जैखुना यरूशलेम शहरेर विश्वासीला इला विश्वासीर बारे सुनिल, त वरा बरनबासोक अन्तकिया शहर पठाल। २३-२४ बरनबास एकझन अच्छा लोक छिले, जहाँय पवित्र आत्मा आर विश्वास से भरपूर छिले। उठिन जवार बाद वहाँय देखिल कि परमेश्वर उसार पर आशीर्वाद दिहे, त वहाँय बहुत खुश होल, आर हौशला दिले कि सबकोय पूरा दिल से प्रभुर साथे चले। आर उठिन बहुतला लोक प्रभुर लोक बने गेल। २५ यहार बाद बरनबास शाऊलोक छभवार तने तरशीस शहर चले गेल। २६ जैखुना वहाँय शाऊलोक पाले, वहाक अन्तकिया ले ओसिल। उठिन बरनबास आर शाऊल दोनोंझन एक साथे मिले बहुतला लोकोक एक साल तक शिक्षा दिते रोहोल। सबसे पहिले अन्तकिया शहरोत

विश्वासीलाक इसाई कहाल गेल। २७ वहीला दिनोत कुछुला नबी यरूशलेम शहर से अन्तकिया शहरोत ओसिल। २८ उसार बीचोत अगबुस नामेर एकझन नबी छिले। वहाँय थाड़ो हंय पवित्र आत्मार कहना मुताबिक बताल कि पूरा रोम देशोत भारी आकाल पोरबे। इडा आकाल कलोदियुस महाराजार समय पोड़िहिले। २९ विश्वासीला इडा सुने मनोत निश्चय करिल कि वरा अपना-अपना शक्ति मुताबिक यहूदिया प्रदेशेर विश्वासी भईलाक मदद करवार तने कुछु टका पठाबे। ३० आर वरा वही मान्दी करिल। वरा बरनबास आर शाऊलेर हाथे यहूदियार मंडलीर अगुवालार लिकिन टका पठाय दिले।

पतरसेर गिरफ्तारी आर छुटकारा

१२ यहीडा समय हेरोदेश राजा कुछुला विश्वासीर पर अत्याचार करवार तने उसाक कैद करे लिले। १ वहाँय यूहन्नार भाई याकूबोक तरवाल दे मरवाय दिले। ३-४ वहाँय देखिल कि यहूदी लोकला इडा से बहुत खुश होचे, त वहाँय अखमीरी रूटीर परबेर दिनोत पतरसोक धरे जेलोत दे दिले। वहार पर चारटा सैनिकेर दलोक पहरा दुवार भार सोंपे देयाल गेल। राजा हेरोदेश चाहचिले कि अखमीरी रूटीर परबेर बाद पतरसोक लोकलार आगुत अनाल जाक। ५ पतरस त जेलोत बन्द छिले, मगर मंडलीर लोकला वहार तने दिलो-जान से परमेश्वरेर लिकिन

प्रार्थना करछिले। ६ जैखुना राजा हेरोदेश पतरसोक लोकलार आगुत अनवा चाहचिले, उडा रातोत पतरस दुईखान जन्जीर दे बन्हाल दुईझन सैनिकेर बीचोत सुते छिले। पहरादारला जेलेर फाटकेर आगुत थाड़ो हंय जेलखानार पहरा दिछिले। ७ आर इकिसम होल कि प्रभुर एकझन फरीस्ता ओसे थाड़ो होल आर उडा कमरात रोशनी फैले गेल। वहाँय पतरसोक हिलाय दिले आर जगाय कोहले, “जल्दी उठेक।” आर वहीखुना वहार हाथेर जंजीरला खोले पोड़े गेल। ८ यहार बाद फरीस्ताडा वहाक कोहले, “बेल्टखान लगा आर जूताला पिन्हेक।” आर पतरस वही मान्दी करिल। फेर फरीस्ताडा वहाक कोहले, “अपना चादरटा उढ़ेक आर मोर पीछू-पीछू ओस।” ९ इडा सुने पतरस फरीस्ताडार पीछू-पीछू गेल। वहाँय बुझवा नी पारिल कि फरीस्ताडा जैकुछु करछे उडा सच छे। वहाँय इडा समझिल कि मुई एकटा दर्शन देखछी। १० यहार बाद पतरस फरीस्ताडार साथे-साथे पहिला आर दोसरा पहरादारेर दलोक पार करिल। आर वरा लोहार फाटकखानेर लिकिन पहुँचिल, जैखान फाटक शहर जवार रास्ताडात छिले। फाटकखान अपने-आप उसार तने खोले गेल। फाटकटा से निकले वरा एकटा गली दे चले गेल। आर एक पलकोत फरीस्ताडा पतरसोक छोड़े जल्दी से चले गेल। ११ जैखुना पतरस अपना हुँसोत ओसिल। वहाँय समझिल कि सचमुच प्रभु अपना फरीस्ता पठाय मोक राजा हेरोदेशेर हाथ से आर यहूदी

लोकलार साजिश से बचाय लिले। १२ इला बात जाने वहाँय यूहन्नार माँ मरियमेर घर ओसिल। इडा यूहन्नार दोसरा नाम छिले मरकुस। उखान घरोत बहुतला लोक जोड़ो हंय पतरसेर तने प्रार्थना करछिले। १३ जैखुना पतरस दरवाजाडा खटखटाल, त रूदे नामेर एकझन नौकरानी लड़की देखवार तने ओसिल। १४ पतरसेर आवाज सुने वहाँय खुशीर मारे दरवाजाडा नी खोलिल। वहाँय दौड़े भीतरोत जाय कोहले कि “पतरस दरवाजार आगुत थाड़ो हंय छे।” १५ लोकला वहाक कोहले, “तुई की पागल हंय गहिस?” मगर वहाँय जोर लगाय कोहले, “नी, इडा बात सच छे।” इडा सुने वरा कोहले, “हवा सकोछे कि वहार फरीस्ता छे।” १६ इधर पतरस केवारखान खटखटाते रोहोल। वरा दरवाजाडा खोले दिले आर पतरसोक देखे खूब ताज्जुबोत पोड़े गेल। १७ पतरस हाथ दे इशारा करे उसाक चुप हंय रहवा कोहले। आर बताल कि कुन किसम करे प्रभु वहाक जेलखाना से निकलाय आनिल। वहाँय यहोडा कोहले कि तुम्हरा याकूब आर दोसरा भईलाक इडा खबर दे दो। वहार बाद वहाँय दोसरा जगह चले गेल। १८ जैखुना बेहान होल, सैनिकलार भीतरोत हलचल मचे गेल आर बोलवा लागिल कि पतरस कुन्हियाँ चले गेल? १९ राजा हेरोदेश अच्छा करे वहाक छाभिल, मगर वहाक नी पाले। आर वहाँय सैनिकलाक पूछिल, “तुम्हरा पतरसेर पर ठीक से पहरा क्याँ नी दिलेन।” वहीलाते वहाँय उसाक मारे फिकवार हुकूम दिले।

यहार बाद राजा हेरोदेश यहूदिया से कैसरिया प्रदेश चले गेल आर उठिन कुछु दिन रोहोल।

राजा हेरोदेशेर मौत

२० सूर आर सैदा शहरेर लोकलार पर राजा हेरोदेशेर बहुत गोस्सा छिले। वहीलाते इला शहरेर लोकला राजार एकझन बोड़ो हाकिमेर लिकिन ओसिल आर वहार साथे दोस्ती करिल। हाकिमडार नाम छिले, बलासतुस। राजा हेरोदेशेर देश से इसार शहरोत खाना-पीनार सामान ओसछिले, वहीलाते वरा बलातुसेर लिकिन अनुरोध करिल कि राजार साथे उसार मेल कराय दे। २१ राजा हेरोदेशेर साथे मिलवार तने एकटा दिन ठहराल गेल। वहाँय अपना राज-पोशाक पिन्हें राजगद्दीत बोठिल आर भाषण दिले। २२ जैखुना राजा बोलछिले, वहार बात सुने लोकला वहार बड़ाई करे जोर से बोलिल, “मानुषटा नी बोलछे, मगर परमेश्वर बोलछे।” २३ इडा सुने वहाँय बहुत खुश होल आर परमेश्वरेर बड़ाई नी करिल। वहीलाते वहीखुना परमेश्वरेर एकझन फरीस्ता राजाडाक बेमारी दे दिले आर वहाँय पिल्लु फूटे मोरे गेल। २४ मगर परमेश्वरेर वचन बढ़ते आर फैलते गेल।

बरनबास आर शाऊल यरूशलेम शहरोत

२५ बरनबास आर शाऊल यरूशलेम शहरोत दान पहुँचाले। आर यूहन्नाक साथे ले अन्तकिया वापस चले ओल। यूहन्नार दोसरा नाम मरकुस छिले।

१३ अन्तकिया शहरेर मंडलीत कुछुला नबी आर शिक्षक छिले। उसार नाम छिले-बरनबास, शाऊल, शिमोन जहार दोसरा नाम निगर, कुरेनी शहरेर लूकियुस, हेरोदेशेर पोश-भई मनहेम। ^१ इला लोक उपास राखे परमेश्वरेर भक्ति करछिले। पवित्र आत्मा उसाक कोहले, “मुई बरनबास आर शाऊलोक बिछे लिही। वहीलाते तुम्हरा दोनोंझनाक मोर कामेर तने सोंपे दव।” ^३ उपास आर प्रार्थना करवार बाद वरा दोनोंझनार पर हाथ राखिल आर उसाक प्रभुर कामेर तने सोंपे दिले आर प्रचारेर तने पठाय दिले। ^{४-५} पवित्र आत्मा बरनबास आर शाऊलोक प्रचार करवार तने पठाल। वरा दोनोंझन पहिले सिलुकिया नामेर जगहोत गेल। उठिन से वरा पानी जहाजोत चढ़े साइप्रस टापूर सलमीस नामेर शहरोत पहुँचिल। उठिन यहूदी लोकलार प्रार्थना-घरलात परमेश्वरेर वचन प्रचार करिल। यूहन्ना दोनोंझनकाक प्रचारेर कामोत मदद करछिले। ^६ सलमीस शहर से शुरू करे गोटांडा टापूत प्रचार करते-करते वरा पाफूस शहर पहुँचिल। उठिन वरा बारयीशु नामेर एकझन यहूदी

लोकोक पाले, जहाँय जादूगर आर झूठा नबी छिले। ७-८ यहाक यूनानी भाषात इलिमास कहाल जाछिले, जहार माने होचे जादूगर। वहाँय राजपालेर एकइन सलाहकार छिले। राजपालडार नाम सिरगियुस पौलुस छिले आर वहाँय एकइन बुद्धिमान लोक छिले। वहाँय परमेश्वरेर वचन सुनवार तने बरनबास आर शाऊलोक जाब दे पठाल। मगर जादूगरटा उसार बिरोध करवा लागिल आर राजपालोक कोहले, “राजपाल साहाब! यीशुर पर विश्वास ना करेन।” ९ शाऊल, जहार दोसरा नाम पौलुस छिले, उखुना वहाँय पवित्र आत्मा से भरे गेल। वहाँय जादूगरटार भीति टकटकी लगाय देखिल आर कोहले १० “हे शैतानेर औलाद आर सब अच्छा कामेर दुश्मन! तोर भीतरोत कपट आर सब किसमेर बुराई भराल छे। तुई प्रभुर सीधा रास्ताडाक बेका करवा छोड़े दे। ११ देखेक! प्रभु तोक सजा दिबे। तुई कुछुखुन तक बेलाडा देखवा नी पारबो।” वहीखुना वहार आँखला झपसा आर अन्हार हंय गेल। वहाँय हंसतलाय बेरवा लागिल कि कोय वहार हाथ धरे ले जाय। १२ जैला घटना घटिल, उलाक देखे राजपाल चकित हंय गेल आर प्रभुर शिक्षार पर विश्वास करिल।

बरनबास आर पौलुस अन्तकिया शहरोत

१३ यहार बाद पौलुस आर वहार साथीला पाफूस शहर से पानी जहाज दे पंफुलिया प्रदेशेर पिरगा शहरोत गेल। यूहन्ना इसाक छोड़े यरूशलेम चले गेल। १४ वरा पिरगा शहर से आगु बढिल आर पिसिदिया प्रदेशेर अन्तकिया शहरोत ओसिल। आर वरा आरामेर दिन प्रार्थना-घरोत जाय बोठिल। १५ मूसा नबीर नियम आर नबीलार किताब से पोढ़वार बाद प्रार्थना-घरेर हाकिमला उसार लिकिन खबर दे पठाल, “हे भईला! अगर लोकलार हौशला बढवार तने तुमसार लिकिन कोय वचन छे, त बताव।” १६ उखुना पौलुस थाड़ो होल आर अपना हाथ उठाय लोकलाक कहवा लागिल, “हे इजराएली भईला आर परमेश्वरेर भक्तला! तुम्हरा मोर बात सुनो। १७ परमेश्वर हमसार बाप-दादोलाक बिछे लिहिले। वरा जैखुना मिसर देशोत परदेशी हंय छिले, त परमेश्वर उसाक उठिन बहुत बढाले आर अपना शक्ति से उसाक मिसर देश से बाहर ले ओसिल। १८ परमेश्वरेर इच्छा मुताबिक नी चलवार बादो परमेश्वर लगभग चालीस साल तक जंगलोत इजराएली लोकेर देखभाल करिल। १९ आर कनान देशेर सातटा छोटो-छोटो राजोक नाश करे उसार कनान देश इजराएली लोकोक दे दिले। २० इला पूरा घटना घटते लगभग ४५० साल लागिहिले। यहार बाद परमेश्वर देशटाक बिचारकर्तलार हाथोत दे दिले। शमुएल नबी सबसे आखरी बिचारकर्ता छिले। २१ बिचारकर्तलार

बाद इजराएली लोकला अपनार तने एकटा राजा माँगिल। तहार बाद परमेश्वर बिन्यामिन खानदानेर कीशेर बेटाक चुनिल। वहार नाम छिले शाऊल। वहाँय चालीस साल तक राज करिल। २२ यहार बाद परमेश्वर शाऊलोक हटाय दिले आर दाऊदोक उसार राजा बनाल। दाऊदेर बारे परमेश्वर बोलछे, ‘मुई यिशैर बेटा दाऊदोक मोर मन पसंद लोक पाही। वहाँय मोर मनेर सबला इच्छा पूरा करबे।’ २३ यही दाऊदेर बंश से परमेश्वर इजराएली लोकेर तने मुक्तिदाताक पठवार वादा करिल आर इजराएली लोकेर लिकिन मुक्तिदाता यीशुक पठाय अपना वादा पूरा करिल। २४ यीशुर ओसवार आगुते यूहन्ना सबला इजराएली लोकेर लिकिन पाप से मन बदली करवार प्रचार करिल आर बपतिस्मा लुवा कोहले। २५ यूहन्नार काम जैखुना खतम होनेवाला छिले, त वहाँय कोहले, ‘तुम्हरा मोर बारे की कोहचेन? मुई मसीहा नी छी, जहार तुम्हरा इन्तेजार करछेन। मोर बाद एकझन ओसबे, जहार मुई पाँर जूतालाव खोलवार लायक नी छी।’ २६ हे भईला! इब्राहिमेर खानदान आर परमेश्वरेर भक्ति करनेवाला गैर-यहूदी लोक! परमेश्वर खबर पठाहे कि यीशु लोकोक पाप से बचाबे। २७-२९ मगर यरूशलेम शहरेर लोकला आर उसार अगुवाला यीशुक चिन्हवा नी पारिल, आर ना वरा नबीलार लिखाल बातलाक बुझवा पारिल, जैलार बारे हरेकटा आरामेर दिनोत पढ़ाल जाछिल। वरा यीशुक जान से मारे फिकवार कोय कसूर नी

पाले, यहारो पर वरा यीशुक जान से मारे फिकवार दोषी ठहराल। पिलातुसोक बिनती करे यीशुक क्रुसेर पर जान से मारे देयाल। इकिसम करे वरा नबीलार बातलाक पूरा करिल। यहार बाद वहाक क्रुसेर पर से नभाय कबरोत राखिल। ३० मगर परमेश्वर वहाक मौत से जिन्दा करिल। ३१ जैला लोक गलील प्रदेश से यीशुर साथे यरूशलेम ओसिहिले, यीशु उसाक बहुत दिन देखा दिते रोहोल। वहीला लोक अला हमसार लोकेर लिकिन वहार बारे बताछे। ३२ परमेश्वर जैला चीजेर बारे हमसार बाप-दादोलाक वादा करिहिले, वही वादा मुताबिक हमरा तुमसार लिकिन खुश-खबरी आनिही। ३३ परमेश्वर यीशुक जिन्दा करे वहीडा वादाक हमसार बाप-दादोलार खानदानेर तने पूरा करिल। आर हमरा उसार खानदान छी। वहार बारे भजन-संहिता लिखाल छे, ‘तुई मोर बेटा छिस, आज मुई तोर बाप बने गही।’ ३४ परमेश्वर यीशुक मुर्दा से जिन्दा करिहे, आर वहार बदनडा कोयखुना नी गलबे। इडा बातेर बारे परमेश्वर अपना पवित्र शास्त्रोत बोलिहे, ‘मुई तोक अपना उडा विश्वायोग्य वादा जरूर दुम, जैडा कि मुई दाऊदोक दिहिनु।’ ३५ यहीडा बात आढ़ोह एकठिन भजन-संहितात लिखाल छे, ‘तुई अपना पवित्र भक्तोक कबरोत सड़वा नी दिबो।’ ३६ दाऊद अपना लोकेर बीचोत परमेश्वरेर इच्छा मुताबिक परमेश्वरेर सेवा करिल आर मोरे गेल। आर वहाक अपना बाप-दादोलार साथे कबर देयाल गेल आर

वहार बदनडा सड़े गेल। ३७ मगर परमेश्वर जहाक जिन्दा करिल, वहाँय नी सड़ील। ३८ वहीलाते हे भईला! तुम्हरा जाने लव कि यीशुर जरियाय पाप से मुक्ति पवार खुश-खबरी तुमसाक देयाल जाछे। ३९ तुम्हरा मूसा नबीर नियमेर जरियाय पापेर सजई से बचवा नी पारेन। मगर जैला लोक पापेर माफीर तने यीशुर पर विश्वास करछे, वरा पापेर सजई से बचे जाछे। ४० वहीलाते तुम्हरा हुँसियार हंय जाव। इकिसम ना होक कि उला बात तुमसार पर घटे जाय, जैला बात नबीलार किताबोत लिखाल छे, ४१ ‘ऐ मजाक उड़ाने वाला लोक! मुई तुमसार दिनोत एकखान काम करवा जाछी, जैखान कामेर बारे तुम्हरा पहिले से सुनिहेन, मगर तुम्हरा विश्वास नी करभेन। उखान काम देखे तुम्हरा ताज्जुब करभेन आर मोरभेन।’” ४२ पौलुस आर बरनबास जैखुना प्रार्थना-घरखान छोड़े बाहरे जाछिल, लोकला उसाक बिनती करवा लागिल कि अगला आरामेर दिनोत हमसाक इला बात आढ़ोह सुनायेन। ४३ जैखुना उसार सभा खतम हंय गेल, बहुतला यहूदी लोक आर यहूदी धर्मोक माननेवाला लोक पौलुस आर बरनबासेर साथे धड़े लिले। वरा इला विश्वासी लोकोक समझाले कि तुम्हरा हमेशा परमेश्वरेर दयार पर भरोसा राखो।

पौलुस आर बरनबास

४४ अगला आरामेर दिनोत शहरेर लगभग सबला लोक परमेश्वरेर वचन सुनवार तने जोड़ो होल। ४५ मगर यहूदी लोकला लोकेर भीड़ देखे जलवा लागिल। वरा पौलुसेर बातेर पर वाद-विवाद करवा लागिल आर वहार शिकात करवा लागिल। ४६ इला सुने पौलुस आर बरनबास हिम्मत करे बोलिल, “पहिले तुमसाक परमेश्वरेर वचनोक सुनाना जरूरी छिले। तुम्हरा इडाक इन्कार करे दिलेन आर अपना-आपोक अनन्त जीवन पवार लायक नी समझिलेन। वहीलाते अला हमरा गैर-यहूदी लोकेर लिकिन परमेश्वरेर वचन ले जाछी। ४७ जैकिसम कि प्रभु हमसाक हुकूम दिहे: ‘मुई तोक दुनियाँर लोकेर तने उजाला ठहराही, जसे कि गोटांडा दुनियाँर तने तुई मुक्तिर दरवजा बने जईस।’” ४८ इडा बात सुने गैर-यहूदी लोकला खोश हंय गेल आर वरा इडा बोले परमेश्वरेर बड़ाई करवा लागिल कि परमेश्वरेर वचन बहुत अच्छा छे। आर परमेश्वर जैला लोकोक अनन्त जिन्दगी दुवार तने बिछे लिहिले, वरा सबकोय विश्वास करिल। ४९ यहार बाद प्रभुर वचन पूराडा इलाकात फैलते गेल। ५० मगर यहूदी लोकला नगरेर बोड़ोला लोकोक आर भक्त स्त्रीलाक उसकाय दिले। समाजोत इला स्त्रीर बहुत सम्मान छिले। वरा पौलुस आर बरनबासेर पर अत्याचार शुरू करिल। यहार बाद वरा उसाक अपना इलाका से जबरदस्ती निकलाय दिले। ५१ तब पौलुस

आर बरनबास अपना पाँर धुला झाड़े दिले आर इडा देखाल कि परमेश्वर उसाक सजा दिबे, जैडार जिम्मेवार पौलुस आर बरनबास नी छे। वहार बाद वरा इकोनियम शहरोत चले गेल। ५२ मगर उठिनकार विश्वासीला खुशी से भरे गेल आर पवित्र आत्मार इच्छा मुताबिक चलवा लागिल।

पौलुस आर बरनबास इकोनियम शहरोत

१४ एक दिना पौलुस आर बरनबास दोनोंइन मिले इकोनियम शहरेर यहूदी लोकेर प्रार्थना-घरोत गेल आर उठिन वरा इकिसम प्रचार करिल कि बहुतला यहूदी आर गैर-यहूदी लोक उसार प्रचारेर पर विश्वास करिल। २ मगर जैला यहूदी लोक विश्वास नी करिल, वरा गैर-यहूदी लोकोक विश्वासीलार खिलाफ उसकाय दिले। ३ पौलुस आर बरनबास इडा शहरोत बहुत दिन तक रोहिल। वरा प्रभुर पर भरोसा करे हिम्मत से प्रभुर बारे आर प्रभुर दयार बारे बोलते रोहिल। प्रभु इसार जरियाय बहुत किसमेर चिन्ह आर चमत्कारेर काम करे प्रमाण करिल कि उसार प्रचार सच छे। ४ शहरेर लोकला दुई भाग हंय गेल। कुछुला लोक यहूदीलार भीति चले गेल आर कुछुला मसीह-दूतलार भीति चले गेल। ५ कुछुला यहूदी आर कुछुला गैर-यहूदी लोक अपना अगुवालार साथे मिले उसार बेज्जती करवार आर पत्थल दे झाँटा मरवार बात तय

करिल। ६ इडा जाने वरा लुकाउनिया प्रदेशेर लुस्त्रा आर दिरबे शहरोत आर आस-पासेर इलाकात भागे गेल। ७ इला जगहोत वरा खुश-खबरी प्रचार करवा लागिल।

पौलुस आर बरनबास लुस्त्रा शहरोत

८ लुस्त्रा शहरोत वरा एकझन नेंगड़ा लोकोक बोठाल देखिल। उडा लोक जनम से नेंगड़ा छिले, वहाँय कोय दिना नी बेड़ाय। ९ वहाँय पौलुसेर प्रचार सुनछिले। पौलुस वहार भीति ध्यान दे देखिल कि वहाक अच्छा हवार विश्वास छे। १० वहीलाते पौलुस जोर से आवाज दे वहाक कोहले, “अपना पाँर पर सीधा थाड़ो हंय जा।” यहार बाद वहाँय कुद्दे थाड़ो होल आर बेड़वा लागिल। ११ लोकला पौलुसेर इखान चमत्कारेर काम देखे, लुकाउनिया भाषात जोर से बोलिल, “देवताला मानुषेर रूप ले हमसार बीचोत नाभे ओसिहे।” १२ वरा बरनबासोक ज्युस देवता समझिल, आर पौलुसोक हिरमेस देवता समझिल क्यौंकि बोलवार काम बेसी पौलुस करछिले। १३ ज्युस देवतार मंदिरटा शहरेर बाहरे छिले। उडा मन्दिरेर पूजारी बैल आर फूलेर माला आनिल। वहाँय शहरेर फाटकटार लिकिन लोकलार साथे मिले उसार तने बलि चढ़वा चाहचिले। १४ मगर मसीह-दूत बरनबास आर पौलुस जैखुना इडा बात सुनिल, त वरा बहुत नाराज हंय अपना कपड़ा चीरे दिले आर भीड़ेर लोकलार बीचोत जाय चिल्लाय कोहले, १५ “हे भईला! तुम्हरा इला की

करछेन? हमराव त तुमसारे मान्दी मानुष छी। हमरा त तुमसाक खुश-खबरी सुनाछी कि तुम्हरा इला बेकार जिनिसोक छोड़े जिन्दा परमेश्वरेर लिकिन घुरे ओसो। वही परमेश्वर आसमानडाक, दुनियाँडाक आर समुन्द्रोक बनाहे आर जैला चीज उलार भीतरोत छे, सबलाक बनाहे। १६ आगुकार युगोत परमेश्वर सब देशेर लोकोक अपना-अपना रास्तात चलवा दिहिले। १७ यहारो पर परमेश्वर अपना बारे लोकोक बताना नी छोड़िल। वहाँय मानुषेर भलेई करते रोहोल। आसमान से पानी दिते रोहोल आर मौसमेर मुताबिक फसल दिते रोहोल। वहाँय खाना दिते रोहोल आर तुमसार मनलात खुशी भरे दिले।” १८ इला सबला बात कहवार बादो, उसाक बहुत मुशिकल से बलि करते थमाल गेल। १९ मगर कुछुला यहूदी लोक अन्तकिया आर इकोनियम शहर से ओसे लोकलाक अपना भीति टाने लिले। वरा पौलुसोक पत्थल दे मारिल आर वहाक मुर्दा समझे घिसटाय शहरेर बहार ले गेल। २० मगर विश्वासीला जैखुना वहार चारो भीति ओसे थाड़ो होल, त वहाँय उठे शहरोत गेल। दोसरा दिन वहाँय बरनबासेर साथे दिरबे शहर चले गेल। २१ वरा दिरबे शहरेर लोकलाक खुश-खबरी सुनाल आर बहुतला लोक विश्वासी बने गेल। यहार बाद लुस्त्रा आर इकोनियम शहर दे आखिरोत अन्तकिया शहर घुरे ओसिल। २२ इला शहरोत विश्वासीलाक मजबूत करिल आर हौशला दे कोहले, “तुम्हरा विश्वासोत मजबूत रोहेन

क्याँकि परमेश्वरेर राजोत ढुकवार तने हमसाक बहुत दुःख-तकलीफ उठवा होबे।” २३ आर हरेकटा मंडलीक चलवार तने पौलुस आर बरनबास अगुवा बनाल। वरा उपास राखिल आर प्रार्थना करे उसाक प्रभुर हाथोत सोंपे दिले, जे प्रभुर पर वरा विश्वास करहिले।

पौलुस आर बरनबास अन्तकिया शहरोत

२४ यहार बाद पौलुस आर बरनबास पिसिदिया प्रदेश दे पंफुलिया प्रदेशोत पहुँचिल। २५ उठिन पिरगा शहरोत परमेश्वरेर वचन प्रचार करवार बाद अतालिया शहरोत गेल। २६-२७ उठिन से पानी जहाजोत चढ़े वरा अन्तकिया पहुँचिल, आर मंडलीर लोकलाक जोड़ो करिल। यहीडा मंडलीर विश्वासीला सबसे पहिले प्रार्थना करे पौलुस आर बरनबासोक परमेश्वरेर हाथोत सोंपे दिहिले आर प्रचारेर कामोत पठाहिले। इला कामोक पूरा करे वरा घुरे अन्तकिया चले ओसिल। वरा सबला बात उसाक बताल कि परमेश्वर उसार जरियाय कुन किसम बोड़ो-बोड़ो काम करिहे। यहोडा बताल कि परमेश्वर गैर-यहूदी लोकेरो तने रास्ता खोले दिहे कि वराव प्रभुर विश्वासी हवा पाड़े। २८ पौलुस आर बरनबास दोनोंइन इठिनकार विश्वासीलार साथे बहुत दिन तक रोहोल।

यरूशलेमेर सभा

१५ यहूदिया प्रदेशेर कुछुला लोक अन्तकिया शहरेर विश्वासीलार लिकिन ओसिल आर उसाक सिखवा लागिल कि “अगर मूसा नबीर नियम मुताबिक तुमसार सुन्नत नी होय, त तुम्हरा पापेर माफी नी पाभेन।” २ मगर पौलुस आर बरनबास उसार शिक्षा से राजी नी छिले आर उसार साथे बहुत वाद-विवाद करिल। यहार बाद मंडलीर लोकला तय करिल कि वरा पौलुस आर बरनबासेर साथे आढ़ोह कुछु लोक यरूशलेम पठाबे जसे कि वरा जाय इडा समस्यार बारे मसीह-दूतलाक आर अगुवालाक बताय। ३ वहार बाद मंडलीर लोकला उसाक कुछु दूर तक आगु बढ़ाय दिले। जवारखुना वरा फीनीके आर सामरिया प्रदेशेर विश्वासीलाक इडा खुश-खबरी बताते गेल कि गैर-यहूदीलाव मन बदले प्रभुर लिकिन ओसिहे। इडा खबर पाय विश्वासी भाई-बहिनला बहुत खुश होल। ४ जैखुना वरा यरूशलेम पहुँचिल, त मंडलीर लोकला, मसीह-दूतला आर अगुवाला उसाक सम्मानेर साथे ग्रहण करिल। पौलुस आर बरनबास सभाको बताल कि परमेश्वर उसार जरियाय कुन किसम बोड़ो-बोड़ो काम गैर-यहूदी लोकलार बीचोत करिहे। ५ मगर फरीसी दलेर जैला लोक विश्वास करिहिले, थाड़ो हंय बोलिल कि जैला गैर-यहूदी लोक विश्वास करिहे, उसाक सुन्नत करवार आर मूसा नबीर नियमोक मनवार हुकूम दुवा लागे। ६ यहार बाद मसीह-दूतला आर

अगुवाला इडा बातेर पर सोच-बिचार करवार तने जोड़ो होल। ७ बहुत बातचीत करवार बाद, पतरस थाड़ो हंय उसाक कहवा लागिल, “हे भईला! तुम्हरा जानेन कि परमेश्वर बहुत दिन आगुते तुमसार बीच से मोक बिछे लिहे। वहाँय चाहचिले कि गैर-यहूदीला मोर मुख से परमेश्वरेर खुश-खबरी सुने यीशुर पर विश्वास करे। ८ हमरा जानी कि परमेश्वर सभारो मोनेर बात जाने। परमेश्वर देखाहे कि जैकिसम वहाँय हमसाक अपना पवित्र आत्मा दे ग्रहण करिहे, वही मान्दी वहाँय गैर-यहूदीलाको पवित्र आत्मा दे ग्रहण करिहे। ९ परमेश्वर हमसार आर उसार बीचोत कोय फरक नी राखे क्यौंकि विश्वासेर कारण परमेश्वर उसारो पाप माफ करिल। १० जैला गैर-यहूदी लोक विश्वासी बने गहे, अला तुम्हरा उसार पर यहूदी धर्मेर नियमेर भारी बोझ राखे, क्यौं परमेश्वरेर खिलाफ काम करछेन? जैडा बोझ न त हमसार बाप-दादोला उठवा पारिल आर ना हमरा उठवा पारमु। ११ हाँ, हमरा विश्वास करछी कि जैमान्दी हमरा प्रभु यीशुर दया से पापेर माफी पाही, ठीक वही मान्दी वराव पापेर माफी पाबे।” १२ इला बात सुने सभार सबला लोक चुप हंय गेल। पौलुस आर बरनबासेर बात से उसाक पता चलिल कि परमेश्वर उसार जरियाय गैर-यहूदी लोकेर बीचोत कत्तेक चमत्कारेर काम करिहे। १३ जैखुना वरा बोले खतम करे दिले, याकूब बोलवा शुरू करिल, “हे भईला! मोर बात सुनो। १४ पतरस तुमसाक बोलिहिले कि

कुन किसम करे परमेश्वर पहिला बार गैर-यहूदी लोकेर पर दया करिल आर उसार बीच से कुछु लोकोक चुने अपना लोक बनाल। १५ पतरसेर इला बातेर साथे नबीलार बात मेल खाचे, जैकिसम नबीला बोलिही, १६-१८ ‘प्रभु बहुत आगु से इला बात बताहे कि मुई आरमने ओसे दाऊदेर भँगाल घरखानोक फेर उठामु। घरखानेर जैला सामान बर्बाद हंय गहे, उलाक फेर थाड़ो करूम। वहार बाद सबला देशेर लोक प्रभुक छाभबे, आर इकिसम कि गैर-यहूदीलाव मोर लोक बने जाबे।’ १९ वहीलाते मोर सलाह छे कि जैला लोक गैर-यहूदीर अन्दर से परमेश्वरेर लिकिन ओसछे, हमरा उसाक तकलीफ ना दी। २० मगर उसाक इडा लिखे पठाल जाक कि वरा मूर्ति पूजा से आर कुकरम से दूर रहे, आर ना गला चापे मराल जानवरेर मांस खाय आर ना खून खाय २१ क्योंकि पुराना जमाना से हरेकटा शहरोत मूसा नबीर नियम से इला बातोक हरेकटा आरामेर दिनोत प्रार्थना-घरलात सिखाल जाछिल।”

गैर-यहूदी इसाई भईलार लिकिन चिट्ठी

२२ यहार बाद मसीह-दूतला, मंडलीर अगुवाला आर मंडलीर पूरा विश्वासीला इडा तय करिल कि अपना लोकलार भीतर से कुछुला लोकोक बिछे लियांल जाक जसे कि उसाक पौलुस आर बरनबासेर साथे अन्तकियार मंडलीत पठाल जाय। वहीलाते वरा यहूदाक आर सीलासोक बिछे लिले। यहूदार दोसरा नाम बरसब्बा छिले। दोनोंइन

मंडलीर अगुवा छिले। २३ मंडलीर अगुवाला आर मसीह-दूतला चिट्ठी लिखिल आर उसार हाथे पठाल। अन्तकिया, सीरिया आर किलिकियार गैर-यहूदी भईला! तुम्हरा जहाँय यीशुर पर विश्वास करिहेन, तुमसाक सबला मसीह-दूतेर आर अगुवालार तरफ से नमस्कार! २४ हमरा इडा सुनिही कि हमसार बीच से कुछुला लोक तुमसार बीचोत गहिले। वरा अपना शिक्षा से तुमसाक दुविधात डाले दिहे, आर तुमसार मनलाक बहकाय दिहे। मगर हमरा उसाक इकिसम हुकूम नी दी। २५-२७ वहीलाते हमरा सबकोय एक हंय यहूदा आर सीलासोक चुने पौलुस आर बरनबासेर साथे तुमसार लिकिन पठवार तने तय करनु। पौलुस आर बरनबास इकिसम लोक छे, जहाँय प्रभु यीशु मसीहार तने अपना जानडाको खतरात फिकाय दिहिले। जैला बात हमरा चिट्ठीखानोत लिखिही, यहूदा आर सीलास पहुँचे खुद अपना मुख से तुमसाक सबला बात कहय सुनाबे। २८ पवित्र आत्माक आर हमसाक अच्छा लागिल कि कुछुला जरूरी बातोक छोड़े, तुमसार पर आर बेसी बोझ ना देयाल जाक। २९ ना तुम्हरा मूर्तिक चढ़ाल बलिदानेर मांस खायन, ना गला चापे मराल पशुर मांस खायन आर ना खून खायन आर कुकरम से दूर रहेन। इकिसम करले तुमसार तने अच्छा होबे। हमरा प्रार्थना करछी कि प्रभु तुमसार साथे रहे। ३० पौलुस, बरनबास आर उला लोकोक यरूशलेम से अन्तकिया पठाल गेल। वरा उठिन जाय मंडलीर लोकलाक जोड़ो

करिल आर उखान चिठ्ठी उसाक दे दिले। ३१ चिठ्ठीखान पढ़े आर हिम्मत पाय वरा बहुत खुश होल। ३२ यहूदा आर सीलास खुद नबी छिले। वराव बहुतला बात बोले उसार विश्वासोक मजबूत करिल आर हिम्मत दिले। ३३ वरा उठिन कुछु दिन रोहिल। वहार बाद अन्तकिया मंडलीर विश्वासीला आशीर्वाद दे यहूदा आर सीलासोक यरूशलेम मंडलीत वापस पठाय दिले। ३४ [मगर सीलास वहीठिन रहेंय गेल क्योंकि वहाक उठिन रहना अच्छा लागिल।] ३५ पौलुस आर बरनबास अन्तकिया मंडलीते कुछु दिन रोहिल आर उठिन वरा आढ़ोह कुछु लोकेर साथे मिले प्रभुर वचनेर प्रचार करते रोहिल आर सिखाते रोहिल।

पौलुस आर बरनबासेर बीचोत मतभेद

३६ कुछु दिन बाद पौलुस बरनबासोक कोहले, “जैला शहरोत हमरा प्रभुर वचन प्रचार करिहिनु, उला शहरोत जाय भईलाक देखी कि वरा केनमन छे।” ३७ बरनबास यूहन्नाक साथे लुवा चाहचिले। यूहन्नाक मरकुसो कहाल जाछिले। ३८ मगर पौलुस वहाक अपना साथे ले जाना अच्छा नी समझिल। कारण यूहन्ना पहिलाडा यात्रात पंफुलिया प्रदेशोत उसाक छोड़े दिहिले, आर प्रचारेर कामोत नी जाय। ३९ यहीडा बात से इकिसम बिवाद होल कि पौलुस आर बरनबास अलग हंय गेल। बरनबास अपना साथे मरकुसोक ले जहाजोत चढ़े साइप्रस शहर चले गेल। ४० आर पौलुस सीलासोक चुनिल। मंडलीर लोकला उसाक प्रभुर

हाथोत सोंपे दिले। तहार बाद पौलुस सीलासोक ले उठिन से चले गेल।
४९ पौलुस सीरिया आर किलिकिया प्रदेशेर मंडलीलाक मजबूत करते चलते गेल।

पौलुस आर सीलासेर साथे तिमोथी

१६ वहार बाद पौलुस आर सीलास दिरबे आर लुस्त्रा शहरतो गेल। लुस्त्रा शहरोत तिमोथी नामेर एकझन विश्वासी छिले। वहार माँ यहूदी आर बाप गैर-यहूदी लोक छिले। वहार माँ प्रभु यीशुर विश्वासी छिले।
२ लुस्त्रा आर इकोनियम शहरेर विश्वासीला तिमोथीर बहुत बड़ाई करछिले। ३ जैठिन-जैठिन पौलुस जवा चाहचिले, तिमोथीक अपना साथे ले जवा चाहचिले। लुस्त्रा आर इकोनियम शहरेर यहूदी लोकला जानछिले कि तिमोथीर बाप गैर-यहूदी छे, वहीलाते पौलुस तिमोथीर सुन्नत कराल जसे कि यहूदी लोक तिमोथीर बात सुने। ४ वरा शहरलात जाते गेल, आर जैला नियम मसीह-दूतला आर यरूशलेमेर अगुवाला तय करिहिले, आर वहीला नियमोक यरा विश्वासीलाक बताते गेल आर पालन करवार तने सिखाते गेल। ५ इकिसम करे विश्वासीला मजबूत होते गेल आर उसार संख्या बढ़ते गेल।

पौलुस मकिदोनिया जवार दर्शन पाछे

६ वहार बाद पवित्र आत्मा पौलुसोक आर वहार साथीलाक आसिया प्रदेशोत प्रचार करवा मना करिल। वहीलाते वरा फ्रुगिया आर गलतिया प्रदेश दे आगु बढे गेल। ७ वरा मुसिया प्रदेशेर बगलोत पहुँचे बितुनियाँ प्रदेश जवा चाहले, मगर यीशुर आत्मा उसाक उठिन जवा नी दिले। ८ यहार बाद वरा मुसिया प्रदेश दे तरोआस शहरोत ओसिल। ९ पौलुस उठिन रात करे एकटा दर्शन देखिल कि मकिदोनियार एकझन लोक वहार सामनात थाड़ो हंय बिनती करे कोहले कि “मकिदोनियात ओसे हमसाक मदद कर।” १० दर्शनडार बाद हमरा वहीखुना मकिदोनिया जवार तने तैयार हंय गेनु। हमरा इडा बुझवा पारनु कि परमेश्वर हमसाक खुश-खबरी प्रचार करवार तने मकिदोनियात जवा कोहचे।

फिलिपी शहरोत पहिला विश्वासी

११ वहीलाते हमरा तरोआस नगर से जहाज धरे सीधा समुत्राके पहुँचिनु। दोसरा दिन हमरा नियापुलिस शहर ओसनु। १२ इठिन से हमरा फिलिप्पी शहरोत गेनु, जैडा शहर मकिदोनिया प्रदेशेर एकटा जिलार मुख्य शहर छिले आर इठिन रोमी लोकेर आबादी बेसी छिले। हमरा इडा शहरोत कुछु दिन रोहनु। १३ आरामेर दिनोत हमरा शहरेर फाटकेर बाहर एकटा नदीर बगलोत गेनु। हमरा सोचनु कि उठिन यहूदी लोकेर प्रार्थना करवार कोय जगह छे। उठिन जाय देखनु कि कुछुला स्त्री एक साथे

बोठे छे। हमरा उसार साथे बोठे बात करवा लागनु। १४ जैला स्त्री सुनछिले, उसार भीतर से थुआथिरा शहरेर लुदिया नामेर एकझन स्त्री छिले, जहाँय परमेश्वरेर भक्त छिले। वहाँय बैगनी रंगेर दामी कपड़ार कारोबार करछिले। वहाँय पौलुसेर बातलाक सुनछिले। प्रभु वहार दिलोत काम करिल कि पौलुसेर बातलार पर विश्वास करे। १५ वहाँय अपना पूरा परिवारेर साथे बपतिस्मा लिले। आर हमसाक जिद्द करे कोहले, “अगर तुम्हरा मोक प्रभुर विश्वासी समझेछेन, त मोर घरोत रहव।” इकिसम बोले वहाँय हमसाक अपना घर ले गेल।

पौलुस आर सीलास जेलखानात

१६ एक दिना इकिसम होल कि जैखुना हमरा प्रार्थना करवार जगहोत जाछिनु, त हमसाक एकझन बान्दी लड़की मिलिल। वहार भीतरोत एकटा दुष्ट आत्मा रोहछिले, जैडा वहाक आगुर बातला बोलवार शक्ति दिछिले। वहाँय लोकोक आगुर बात बताय अपना मालिकलार तने बहुत पैसा कमाछिले। १७ वहाँय पौलुसेर आर हमसार पीछू-पीछू ओसे, चिल्लाय कोहले, “इला लोक परमप्रधान परमेश्वरेर गोलाम छे। यरा तुमसाक मुक्तिर रास्तार बारे बताछे।” १८ लड़कीडा बहुत दिन तक यही मान्दी बोलते रोहोल। आखिरोत एक दिना पौलुस बहुत तंग हंय गेल, आर वहार भीति घुरे उडा आत्माक कोहले, “मुई तोक यीशु मसीहार नामे हुकूम दिछी कि वहार भीतर से निकले जा।” आर वहीखुना साथे-

साथे आत्माडा वहार भीतर से निकले गेल। १९ जैखुना आत्माडा लड़कीडार भीतर से निकले गेल, मालिकला सोचिल कि हमसार आमदानीर रास्ताडा बन्द हंय गेल, तब वरा पौलुस आर सीलासोक धरे लिले आर घिस्टाय उडा शहरेर बाजारोत हाकिमलार लिकिन बिचारेर तने ले गेल। २० आर मालिकला बिचारपतिर लिकिन उसार पर दोष लगाय बोलिल, “इला लोक यहूदी छे आर हमसार शहरटात गड़बरी पैदा करे दिहे, २१ आर यरा इकिसम रीति-रेवाजेर बारे बताछे, जैलाक मानना हमसार रोमी नियमेर खिलाफ छे।” २२ यहार बाद भीड़ेर लोकला पौलुस आर सीलासेर खिलाफ हंय मालिकलार साथे मिले गेल। इडा देखे बिचारपतिला उसार कपड़ा छिड़े दिले आर उसाक बेत मरवार हुकूम दिले। २३ उसाक खोब मरवार बाद जेलोत दे दिले आर अच्छा से पहरा दुवार तने जेलेर दारोगाक हुकूम दिले। २४ इडा हुकूम पाय दारोगा पौलुस आर सीलासोक जेलेर भीतरी कमरात ले गेल। उठिन लकड़ीर फाँसोत उसार पाँलाक अटकाय राखिल।

जेलेर दारोगा

२५ लगभग आध रातोत पौलुस आर सीलास प्रार्थना करछिले, आर परमेश्वरेर भजन गाछिले। जेलेर सबला कैदी उसार भजन आर प्रार्थना सुनछिले। २६ यहारे भीतरोत ओचकाय बहुत बोड़ो भीचाल ओसिल। जेलखान हिले गेल। सबला दरवाजा खोले गेल आर गोटेली कैदीर हाथ-

पाँ खुले गेल। २७ आर जेलखानेर दारोगा जागिल होल। जेलखानेर दरवाजा खोलाल देखे सोचिल, “लागछे, सबला कैदी भागे गहे।” इडा सोचे वहाँय तलवार निकलाय अपना-आपोक खतम करे दुवा चाहले। २८ मगर पौलुस चिल्लाय कोहले, “अपना-आपोक खतम ना कर, क्योंकि हमरा सबकोय इठिन छी।” २९ वहार बाद दारोगाडा चराक मँगाले आर जेलेर भीतरोत गेल। पौलुस आर सीलासोक देखे वहाँय काँपते-काँपते उसार पाँत पोड़े गेल। ३० उसाक जेलखानेर बाहरे आने कोहले, “साहब लोक! पापेर माफी पवार तने मोक कि करवा होबे?” ३१ वरा दोनोंझन वहाक कोहले, “प्रभु यीशु मसीहार पर विश्वास करेक, त तुई आर तोर घराना पापेर माफी पाभेन।” ३२ यहार बाद पौलुस आर सीलास दारोगाक आर वहार पूरा परिवारोक प्रभुर वचन सुनाल। ३३ वहीखुना रात करे दारोगाडा उसार दोनोंझनार जखमला धोय दिले, आर अपना पूरा परिवारेर साथे बपतिस्मा लिले। ३४ वहार बाद वहाँय उसाक अपना घरोत आने खाना खिलाल आर पूरा परिवारेर साथे परमेश्वरेर पर विश्वास करे खुशी मनाल। ३५ दोसरा दिन बिचारपतिला पुलिसलार हाथे जेलरटाक कहय पठाल कि उला लोकोक छोड़े दव। ३६ इडा खबर पाय जेलर पौलुसोक कोहले, “बिचारपतिला तुमसाक छोड़े दुवार हुकूम दिहे। तुम्हरा निकले शांति से चले जाव।” ३७ मगर पौलुस वहाक जवाब दिले, “हमरा रोमी नागरिक छी। वरा हमसाक

बिना कसूर लोकेर आगुत हमसाक मारिल आर जेलोत दे दिले। आर अला वरा चुपचाप हमसाक बाहरे जवा कोहचे। इकिसम नी होबे, मगर वरा खुद ओसे हमसाक बाहरे निकलाक।” ३८ पुलिसला इला बातोक बिचारपतिलाक सुनाल। वरा सुनिल कि पौलुस आर सीलास रोमी नागरिक छे, त बहुत डोराय गेल। ३९ वहीलाते बिचारपतिला ओसे उसार लिकिन माफी माँगिल। वहार बाद उसाक बाहरे ले गेल आर बिनती करे कोहले कि तुम्हरा शहर से बाहरे चले जाव। ४० वहार बाद पौलुस आर सीलास जेल से निकले लुदियार घर गेल आर विश्वासीला से मुलाकात करे उसार हौशला बढ़ाल, आर फेर उठिन से दोनोंइन चले गेल।

पौलुस आर सीलास थिसलुनिकी शहरोत

१७ पौलुस आर सीलास अम्फिपुलिस आर अप्पोलोनिया शहर दे थिसलुनिकी शहरोत पहुँचिल। उठिन यहूदी लोकेर एकखान प्रार्थना-घर छिले। २ पौलुस अपना नियम मुताबिक प्रार्थना-घरोत गेल आर लगातार तीनडा आरामेर दिन प्रार्थना-घरोत परमेश्वरेर वचन से लोकलार साथे बहस करिल। ३ वहाँय शास्त्रेर बातलाक साफ-साफ लोकलाक समझाय कोहले, “यीशु मसीहाक दुःख उठाना आर मुर्दा से जिन्दा हंय उठना जरूरी छिले। मुई तुमसाक बताछी कि यही यीशु जहार बारे मुई बात करछी, वहाँय परमेश्वरेर चुनाल मसीहा छे।” ४ इडा बात सुने

कुछुला यहूदी लोक पौलुसेर बातेर पर विश्वास करिल, आर पौलुस आर सीलासेर साथे मिले गेल। आढोह कुछुला नामी-गामी स्त्री आर परमेश्वरेर भक्ति करनेवाला गैर-यहूदी विश्वासीला पौलुस आर सीलासेर साथे मिले गेल। ५ जैला यहूदी लोक विश्वास नी करिल, इला देखे जलवा लागिल आर बाजारेर कुछुला गुण्डा लोकोक अपना साथे लिले। आर बहुत लोकोक जोड़ो करे शहरटात हंगामा मचाय दिले। वरा पौलुस आर सीलासोक धरे लोकलार आगुत अनवार तने यासोनेर घरेर घेराव करिल, ६ मगर उसाक उठिन नी पाले। वहीलाते वरा यासोन आर कुछुला विश्वासी भईक टाने शहरेर हाकिमलार लिकिन ले गेल आर चिल्लाय कोहले, “जैला लोक दुनियाँडात हलचल मचाय दिहे, आर वरा यहोठिन ओसिहे। ७ आर यासोन उला लोकोक अपना घरोत राखियेह। एरा सबकोय महाराजार हुकूमेर खिलाफ काम करछे आर बोलछे कि आढोह एकझन दोसरा राजा छे, जहार नाम यीशु छे।” ८ इला बात सुने शहरेर हाकिमला आर लोकला परेशान हंय गेल। ९ यासोन आर वहार साथीला इडा कहय हाकिमलाक जोरवाना दिले कि आर इकिसम कभी नी होबे। वहार बाद हाकिमला उसाक छोड़े दिले।

पौलुस आर सीलास बिरीया शहरोत

१० वहीखुना विश्वासीला राते-रात पौलुस आर सीलासोक बिरीया शहरोत पठाय दिले। उठिन जवार बाद वरा यहूदी लोकेर प्रार्थना-घरोत गेल। ११ बिरीया शहरेर यहूदी लोकला थिसलुनिकी शहरेर यहूदी लोकला से बेसी खोला दिलेर लोक छिले। वरा खुशी-खुशी परमेश्वरेर वचन ग्रहण करे लिले। पौलुसेर बातला सही छे ना नी, इडा मालूम करवार तने वरा हर दिन परमेश्वरेर वचन पढ़छिले। १२ आर इडा कारण बहुतझन यहूदी लोक आर बहुतझन गैर-यहूदी पुरुष आर बहुतझन इज्जतदार गैर-यहूदी स्त्री यीशुर पर विश्वास करिल। १३ मगर थिसलुनिकी शहरेर यहूदी लोकला जैखुना सुनिल कि पौलुस बिरीया शहरोत परमेश्वरेर वचन सुनाछे, त वरा वहोठिन जाय लोकलाक उसकाय दिले आर हलचल मचाय दिले। १४ इडा देखे उठिनकार विश्वासीला पौलुसोक बहुत दूर समुन्द्रेर कछारोत पठाय दिले। मगर सीलास आर तिमोथी बिरीया शहरते रहेंय गेल। १५ कुछुला विश्वासी पौलुसोक एथेंस शहर ले गेल। आर पौलुस उसार हाथे सीलास आर तिमोथीर लिकिन खबर दे पठाल कि वरा वहार लिकिन जल्दी करे ओसे।

पौलुस एथेंस शरोत

१६ पौलुस एथेंस शहरोत सीलास आर तिमोथीर इन्तेजार करछिले। वहाँय देखिल कि शहरटा मूर्ति से भराल छे, त वहार दिलोत बहुत दुःख होल। १७ वहाँय प्रार्थना-घरोत परमेश्वरेर भक्ति करनेवाला यहूदी आर गैर-यहूदी लोकेर साथे बहस करवा लागिल। यहार अलावा जैला लोक बजारोत आर चौकोत ओसछिले, उसारो साथे हर दिन बहस करते रोहोल। १८ इडा देखे इपीकुरी आर इस्तकोई मतेर कुछुला गुरु पौलुसेर साथे बहस करवा लागिल। जैखुना पौलुस यीशुर खुश-खबरीर बारे प्रचार करछिल आर बताछिले कि मानुष मोरे जिन्दा हंय उठबे, उसार भीतर से कुछुला ज्ञानी लोक कोहले, “इडा बकवास लोक की कहवा चाहचे?” दोसराला लोक कोहले, “हवा सकेछे यहाँय कोय दोसरा देशेर देवी-देवतार प्रचार करछे।” १९ यहार बाद उला ज्ञानी गुरु पौलुसोक अरिपगुस नामेर एकटा सभात हाजिर करिल। उठिन वरा पौलुसोक पूछिल, “जैडा नया शिक्षा तुई लोकोक दिछिस, उडा की छे? उडा की हमरा जनवा पारी? २० क्याँकि तुई हमसाक नया किसमेर बात सुनाछिस। वहीलाते हमरा जनवा चाहची कि इडार मतलब की छे।” २१ एथेंस शहरेर लोक, आर उठिन रहनेवाला सब परदेशी लोक यही मान्दी नया-नया बात सुने, आर उलार बारे बोले समय कटाछिले। यहार अलावा आर कोय काम नी करछे।

अरिपगुस सभात पौलुसेर भाषण

२२ एथेंस शहरेर अरिपगुस सभार आगुत थाड़ो हंय पौलुस कोहले, “हे एथेंस शहरेर भईला! मुई देखछी कि तुम्हरा हर बातोत बहुत धार्मिक लोक छेन २३ क्याँकि जैखुना मुई तुमसार शहरटा घुमे बेराछिनु, त मुई तुमसार पूजवार जिनिसलाक ध्यान से देखनु। मुई इकिसम एकटा थान देखनु, जैडार पर लिखाल छिले, ‘अनजान देवतार तने।’ जहाक तुम्हरा बिना जाने-सुने पूजेछेन, मुई वहारे बारे तुमसाक बताछी। २४ वहाँय दुनियाँडाक आर दुनियाँर सबला जिनिसोक बनाहे। वहाँय स्वर्ग आर दुनियाँर मालिक छे, वहीलाते वहाँय हाथेर बनाल मंदिरोत नी रोहचे। २५ वहाक कोय चीजेर कमी-घटी नी छे, आर ना वहाँय मानुषेर लिकिन से कुछु चाहचे क्याँकि वहाँय खुद सब लोकोक जिन्दगी, साँस आर सब कुछु दिछे। २६ वहाँय एकझन मानुष से सब देशेर लोकोक पूराडा दुनियाँत रहवार तने बनाहे। लोकला कुनखुना आर कुनठिन रोहबे, वहोडा वहाँय ठीक करे दिहे। २७ परमेश्वर इखान काम करिल जसे कि मानुष वहाक पवार तने हस्तेलाय बेराय। मगर सचमुचोत वहाँय हमसार कहारो लिकिन से दूर नी छे। २८ जैसा कि कोय बोलिहे, ‘वहारे इच्छा से हमरा धरतीर पर छी, आर चला-फिरा करछी आर जीवन बिताछी।’ आर तुमसार कुछुलाव कवि बोलिहे, ‘हमरा त वहारे औलाद छी।’ २९ वहीलाते परमेश्वरेर बेटा-बेटी हवार कारण से हमसाक इडा सोचवा

नी चही कि परमेश्वर सोना, चाँदी, या पत्थलेर मूर्तिर मान्दी छे। इला मूर्तिक मानुष अपना हाथ दे आर अपना सोच-समझ मुताबिक बनाहे।
३० पहिलकार युगोत मानुष इला बातेर बारे अनजान छिले। वहीलाते परमेश्वर मानुषेर गलतीर पर ध्यान नी दिले। मगर अला परमेश्वर सबठिनकार सब लोकोक पाप से मन बदली करवार तने हुकूम दिहे
३१ क्याँकि वहाँय एकटा दिन ठीक ठहराहे, जैडा दिनोत वहाँय अपना चुनाल लोकटार जरियाय मानुषेर ठीक-ठीक बिचार करबे। परमेश्वर अपना चुनाल लोकटाक मौत से जिन्दा करे सब लोकेर लिकिन साबित करे दिहे कि परमेश्वर वहाक दुनियाँर बिचारपति बनाबे।” ३२ जैखुना लोकला पौलुसेर मुख से सुनिल कि मुर्दा मानुष जिन्दा हंय उठयेह, त कुछुला लोक वहार मजाक करवा लागिल। मगर कुछुला लोक कोहले,
“इडा बातेर बारे हमरा तोर लिकिन से पीछूत फेर सुनमु।” ३३ यहार बाद पौलुस सभार लिकिन से निकले चले गेल। ३४ कुछुला लोक यीशुर पर विश्वास करिल आर पौलुसेर साथे मिले गेल। इला विश्वासी लोकेर दलोत दियुनुसियुस नामेर एकझन लोक छिले, जहाँय अरिपगुस सभार लोक छिले। वहार अलावा दमरिस नामेर एकझन स्त्री आर कुछुला दोसरा लोक छिले।

पौलुस कुरिनथियुस शहरोत

१८ यहार बाद पौलुस एथेंस शहर छोड़े कुरिनथियुस शहर ओसिल।
२ उठिन वहार मुलाकात अक्विला नामेर एकझन यहूदी लोकेर साथे होल, जहार जनम पुन्तुस नामेर एकटा जिलात होईले। अक्विला अपना पत्नी प्रिसकिल्लाक कुछु दिन पहिले इटली देश से इठिन ले ओसिहिले क्योंकि महाराजा क्लोदियुस सबला यहूदी लोकोक रोम से निकले जवार हुकूम दिहिले। पौलुस मुलाकात करवार तने उसार लिकिन गेल।
३ वरा तम्बू बनवार काम करछिले। पौलुस उसार साथे रहवा आर काम करवा लागिल क्योंकि वहाँव तम्बू बनवार काम जानछिले। ४ वहाँय हर आरामेर दिनोत प्रार्थना-घरोत यहूदी आर गैर-यहूदी लोकेर साथे बहस करछिल, आर उसाक विश्वास दिलवार कोशिश करछिले कि सिरिफ यीशु परमेश्वरेर चुनाल मसीहा छे। ५ जैखुना सीलास आर तिमोथी मकिदोनिया से पौलुसेर लिकिन ओसिल, तब पौलुस अपना पूरा समय परमेश्वरेर वचन प्रचार करवार तने लगाल। वहाँय यहूदी लोकेर लिकिन बताछिले कि सिरिफ यीशु परमेश्वरेर चुनाल मसीहा छे। ६ मगर जैखुना यहूदी लोकला पौलुसेर बिरोध आर बेज्जत करवा लागिल, त पौलुस अपना कपड़ाला झाड़े कोहले, “तुम्हरा खुद अपना सजईर कसूरबार छेन। यहात मोर कोय कसूर नी। अला से मुई गैर-यहूदी लोकलार लिकिन प्रचार करवा जाम।” ७ इडा बोले पौलुस प्रार्थना-घर से निकले

तितुस यूसतुस नामेर एकझन गैर-यहूदी लोकेर घर गेल। वहाँय परमेश्वरेर भक्त छिले आर वहार घर प्रार्थना-घरेर बगलोत छिले। ८ पौलुसेर प्रचार सुने प्रार्थना-घरेर अगुवा क्रिसपुस आर वहार पूरा परिवार प्रभु यीशुर पर विश्वास करिल। कुरिनथियुस शहरेर बहुत लोक पौलुसेर प्रचार सुने विश्वास करिल आर बपतिस्मा लिले। ९ एक दिना एकटा रातोत प्रभु पौलुसोक दर्शन दे कोहले, “तुई ना डोरा, मगर प्रचार करते रोह आर चुप ना रहिस १० क्योंकि मुई तोर साथे छी, आर इडा शहरोत मोर बहुत लोक छे। कोय लोक तोर घेराव करे तोर नुकसान करवा नी पारबे।” ११ प्रभुर इला बात सुने पौलुस कुरिनथियुस शहरोत परमेश्वरेर वचन प्रचार करिल आर डेढ़ साल तक रोहोल। १२ गलियो नामेर एकझन राजपाल छिले। जैडा समय वहाँय आखाया प्रदेशोत शासन करछिले, त वहीडा समय यहूदी लोकला एक साथे मिले पौलुसोक धरिल आर इन्साफेर तने राजपालेर आगुत आनिल। पौलुसेर पर दोष लगाय वरा कोहले, १३ “यहाँय लोकलाक परमेश्वरेर भक्ति करवार तने इकिसम बात सिखाछे, जैडा कि हमसार नियमेर खिलाफ छे।” १४ उसार बात सुने जैखुना पौलुस बोलवार तने तैयार होल, वहीखुना राजपालडा यहूदी लोकलाक कोहले, “हे यहूदी लोकला! अगर यहाँय कोय गलत काम करिलतेन या कोय कसूर करिलतेन, त मुई तुमसार बात सुननुतन। १५ मगर जैडा सवाल ले ओसिहेन, उडा त

तुमसार अपना बात, अपना नाम आर अपना नियमेर बारे छे। वहीलाते तुम्हराय इलार फैसला करो, मुई इला बातेर इन्साफ नी करूम।” १६ इला बात बोले वहाँय उसाक बाहर जवार हुकूम दिले। १७ मगर सबला लोक प्रार्थना-घरेर अगुवा सोस्थिनिसोक राजपालेरा आगुते धरे मारिल। मगर राजपाल गलियो इडा घटनार पर कोय ध्यान नी दिले।

पौलुस अन्तकिया वापस होचे

१८ इला घटनार बाद पौलुस बहुत दिन तक कुरिनथियुस शहरेर विश्वासीलार साथे रोहिल। वहार बाद वहाँय उठिनकार विश्वासीलार लिकिन से बिदा होल, आर किंख्रिया शहरोत गेल। इठिन वहाँय मन्ती पूरा करिल आर तहार बाद वहाँय अपना माथा मुड़ाल। यहार बाद वहाँय सीरिया देशोत जवार तने पानी जहाजोत अपना यात्रा शुरू करिल। वहार साथे प्रिसकिला आर अक्विलाव छिले। १९ वहाँय इफिसुस शहर पहुँचवार बाद दोनोंझनाक छोड़े दिले, आर प्रार्थना-घरोत जाय यहूदी लोकेर साथे यीशुर बारे बहस करवा लागिल। २० लोकला वहाक आढ़ोह कुछु दिन अपनार साथे रहवार तने बिनती करिल, मगर वहाँय रहवार तने राजी नी होल। २१ वहाँय उसार लिकिन से इडा कहय बिदा होल, “अगर परमेश्वरेर इच्छा होबे, त मुई तुमसार लिकिन फेर ओसुम।” यहार बाद वहाँय इफिसुस शहर से जहाजोत चढ़े रवाना हंय गेल। २२ कैसरिया पहुँचवार बाद वहाँय उछिन से यरूशलेम शहर गेल।

उठिनकार मंडलीर हाल-चाल पूछे प्रणाम-पाती करे अन्तकिया शहरोत वापस चले गेल। २३ अन्तकिया शहरोत कुछु दिन रहवार बाद वहाँय उठिन से निकले गलतिया आर फ्रुगिया एलाकार सबला विश्वासीक मजबूत करते गेल।

अपुल्लोसेर जीवन परिवर्तन

२४ यहीडा समय अपुल्लोस नामेर एकझन यहूदी लोक इफिसुस शहरोत ओसिल। वहार जनम सिकन्दरिया शहरोत होयले आर वहाँय शास्त्रेर ज्ञानी आर बहुत अच्छा बोलनेवाला छिले। २५ यहाँय प्रभुर रास्तार बारे अच्छा शिक्षा पाहिले। आर वहाँय लोकोक यीशुर बारे ठीक-ठीक बोलछिल आर सीखाछिले। मगर वहाँय सिरिफ यूहन्नार बपतिस्मार बारे जानछिले। २६ वहाँय हिम्मत से प्रार्थना-घरोत बोलवा शुरू करिल। प्रिसकिला आर अक्विला वहार बात सुने, वहाक एक बगले ले जाय परमेश्वरेर रास्तार बारे आढ़ोह अच्छा करे वहाक समझाय दिले। २७ यहार बाद अपुल्लोस आखाया प्रदेशोत जवा चाहले। इफिसुस शहरेर विश्वासी भईला वहाक हिम्मत दिले आर आखाया प्रदेशेर विश्वासी लोकेर लिकिन एकखान चिट्ठी लिखिल जसे कि वरा अप्पुलोसोक ग्रहण करे। आखाया पहुँचे जवार बाद अपुल्लोस उठिनकार नया विश्वासीलार बहुत मदद करिल, जहाँय प्रभुर दयार कारण से विश्वासी होईले। २८ अप्पुलोस पवित्र शास्त्र से यहूदी लोकेर

साथे खुल्लमखुला जोरदार बहस करे साबित करछिले कि यीशुक छोड़े आर कोय दोसरा मसीहा नी छे।

इफिसुस शहरोत पौलुसेर प्रचार

१९ अपुल्लोस जैखुना कुरिनथियुस शहरोत छिले, पौलुस अलग-अलग एलाका दे जाते-जाते इफिसुस शहर पहुँचिल। उठिन वहार मुलाकात कुछुला विश्वासीर साथे होल आर २ उसाक पूछिल, “तुम्हरा जैखुना विश्वास करिहिलेन, उखुना की पवित्र आत्मा पाहिलेन?” विश्वासीला जवाब दिले, “हमरा त पवित्र आत्मार बारे सुनी करे नी।” ३ पौलुस उसाक पूछिल, “त तुम्हरा बपतिस्मा क्याँ लिहेन?” वरा जवाब दिले, “हमरा मन बदली करवार बपतिस्मा लिही, जैडा बपतिस्मा यूहन्ना सीखाछिले।” ४ पौलुस उसाक समझाय कोहले, “यूहन्ना लोकोक पाप से मन बदली करवार बपतिस्मा दिछिले आर लोकोक कोहचिले, ‘तुम्हरा वहार पर विश्वास करेन, जहाँय मोर बाद ओसबे।’ यानी यूहन्ना यीशुर पर विश्वास करवा कोहचिले।” ५ इडा बात सुने वरा प्रभु यीशुर नामे बपतिस्मा ले साबित करिल कि वरा यीशुर विश्वासी बने गहे। ६ जैखुना पौलुस उसार पर हाथ राखिल, पवित्र आत्मा उसार पर नाभिल, आर वरा अनजान भाषात बोलवा लागिल, आर नबीर मान्दी परमेश्वरेर संवाद लोकोक दुवा लागिल। ७ वरा सबकोय लगभग

बारहझन लोक छिले। ८ यहार बाद पौलुस प्रार्थना-घरोत जाय तीन महीना तक हिम्मत से परमेश्वरेर राजेर बारे लोकलार साथे बहस करते आर उसार अन्दरोत विश्वास जगवार कोशिश करते रोहोल। ९ मगर कुछुला लोकेर मन बहुत कठोर छिले, वरा पौलुसेर बात सुनवा नी चाहचिले। वरा सभारो आगुत इडा रास्ताक खराब कहवा लागिल। इला देखे पौलुस उसाक छोड़े दिले आर विश्वासीलाक साथे ले तुरनुस नामेर एकझन लोकेर पाठशालात चले गेल। आर उठिन वहाँय होर दिन लोकलाक शिक्षा दुवा लागिल। १० दुई साल तक यही मान्दी होते रोहोल। इडा कारण आसिया इलाकार यहूदी आर गैर-यहूदी, सबकोय प्रभुर वचन सुनिल। ११ परमेश्वर पौलुसेर जरियाय बहुत बोड़ो चमत्कारेर काम करवा लागिल। १२ इकिसम कि पौलुसेर इस्तेमाल कराल उरमाल या कपड़ालाक बेमार लोकेर पर राखछिले, आर उसार बेमारीला अच्छा हंय जाछिल आर भूतला उसार भीतर से निकले जाछिले। १३ मगर कुछुला यहूदी ओझा, जैला झाड़-फुक करे बेराछिले, वरा प्रभु यीशुर नामे भूत धरा लोकलाक अच्छा करवार कोशिश करछिले। वरा भूतलाक इडा कहय निकलाछिले, “पौलुस जहार बारे प्रचार करछे, वही यीशुर नामे मुई तुमसाक निकले जवार हुकूम दिछी।” १४ इस्किवा नामेर एकझन बोड़ो यहूदी-पूजारी छिले। वहार सातझन बेटा छिले। वहार बेटालाव ओझालार मान्दी भूतोक निकलुवार हुकूम दिछिले। १५ मगर

एक दिना जैखुना वरा भूतोक निकलुवार हुकूम दिले, भूतटा उसाक जवाब दिले, “मुई यीशुक जानछी आर पौलुसोक जानछी, मगर तुम्हरा के छेन?” १६ आर जैडा लोकेर भीतरोत भूतटा छिले, वहाँय उसार पर कुद्दे पोड़िल आर अपना शक्ति से उसाक अपना कब्जात करे लिले। आर इकिसम उसाक मारिल कि जखम हंय वरा नाँगटे-मुँगटे उखान घर से निकले भागे गेल। १७ इडा खबर इफिसुस शहरोत रहनेवाला सबला यहूदी आर गैर-यहूदी लोकलाक मालूम हंय गेल। वरा सबकोय डोराय गेल आर प्रभु यीशुर नामेर बड़ाई होल। १८ जैला लोक विश्वास करिल, उसार भीतर से बहुतझन लोक अपना बुरा कामेर बारे खुलमखुला कहवा लागिल। १९ बहुतझन जादूगर अपना-अपना किताबला जोड़ो करे सभारो आगुत जलाय दिले। इला किताबेर दाम जोड़े देखाल गेल कि उलार दाम पचास हजार चाँदीर टाकार बराबर छिले। २० इकिसम करे प्रभुर वचन शक्तिर साथे फैलते आर लोकेर दिलोत काम करते गेल। २१ जैखुना इला बात हंय गेल, त पौलुस अपना मनोत तय करिल कि मुई मकिदोनिया आर आखाया प्रदेश दे यरूशलेम शहर जई, आर कोहले, “उठिन जवार बाद मोक रोम नगरोत जाना जरूरी छे।” २२ वहीलाते वहाँय अपना मदद करनेवाला लोकेर भीतर से तिमोथी आर इरास्तुसोक मकिदोनिया पठाय दिले। मगर वहाँय कुछु दिनेर तने आसिया इलाकात रहेंय गेल।

इफिसुस शहरोत दंगा-फसाद

२३ यहीडा समय इडा विश्वासेर चलते इफिसुस शहरोत बहुत हलचल मचे गेल। २४ दमेत्रियुस नामेर एकझन सोनार अरतिमिस देवीर मंदिरेर चानीर छोटो-छोटो मंदिर बनाछिले आर वहार लिकिन बहुतला कारीगर काम करछिले, आर वहार कारीगरलाक बहुत लाभ होचिले। २५ एक दिना देमत्रियुस अपना कारीगरलाक आर वही किसम काम करनेवाला दोसरा कारीगरलाक जोड़ो करिल आर कोहले, “हे कारीगर भईला! तुम्हरा जानेन कि हमरा इखान कामेर जरियाय टका-पैसा कमाछी। २६ तुम्हरा देखछेन आर सुनछेन कि पौलुस लोकलाक समझाछे आर भटकाछे। वहाँय लोकलाक कहय बेराछे, ‘मानुषेर हाथेर बनाल कोय मूर्ति सच्चा परमेश्वर नी छे।’ इडा प्रचार सिरिफ इफिसुस शहरते नी, बल्के लगभग गोटांडा आसिया इलाकात फैले गहे। २७ इडा से सिरिफ यहीडा बातेर भय नी छे कि लोक हमसार धन्धार बारे खराब बात बोलबे, बल्के यहोडा नुकसान छे कि लोक हमसार महान देवी अरतिमिसेर मन्दिरेर कोय सम्मान नी करबे। आर लोकेर बीचोत इडा देवीर बोड़ो नाम खतम हंय जाबे, जहाक पूराडा आसिया आर दुनियाँ पूजेछे।” २८ इडा बात सुने सबकोय गोस्सा से भरे गेल, आर जोर से अरतिमिस देवीर जयजयकार करे बोलते रोहोल, “अरतिमिस माँ की! जय!” २९ यहार बाद गोटांडा शहरोत बहुत हलचल मचे गेल। गयुस आर

अरिस्तरखुरस मकिदोनिया प्रदेशेर दुईझन विश्वासी पौलुसेर साथे जाछिले, लोकला दोनोंझनाक धड़े लिले, आर दौड़े सभात ले गेल।
३० पौलुस लोकलार लिकिन भीतरोत जवा चाहले, मगर विश्वासीला वहाक जवा नी दिले। ३१ आसिया इलाकार हाकिमलार भीतर से पौलुसेर कुछुला दोस्त वहार लिकिन कहय पठाल आर अनुरोध करिल, “सभार बीचोत ना जा आर ना कोय खतरात पोड़ेक।” ३२ सभार भीतरोत बहुत गड़बड़ी चलछिले। कोय कुछु कहय चिल्लाछिले, त कोय दोसरा कुछु कहय चिल्लाछिले। बहुतला लोक यहोडा नी जानछिले कि वरा की करवार तने उठिन जोड़ो होये। ३३ यहार बाद भीड़ेर कुछुला यहूदी लोक सिकन्दर नामेर एकझन लोकोक सभार आगुत पठाल। सिकन्दर अपना हाथ दे इशारा करे लोकलाक चुप करवार कोशिश करिल आर बोलिल, “यहूदी लोकलार कारण से इडा दंगा-फसाद नी होये।” ३४ मगर जैखुना लोकला जानिल कि सिकन्दर एकझन यहूदी लोक छे, त वरा लगातार दुई घंटा तक जोर से अरतिमिस देवीर जयजयकार करे बोलते रोहोल, “अरतिमिस माँ की! जय!” ३५ आखिरोत इफिसुस शहरेर एकझन खास मुंशी उसाक चुप कराय कोहले, “हे इफिसुस शहरेर लोकला! इडा सबकोय जाने कि हमरा महान अरतिमिस देवीर मंदिरेर आर वहार मूर्तिर इफाजत करछी। इडा मूर्तिक ज्युस देवता आसमान से पठाहे। ३६ इडा सच बातोक जब कोय

इन्कार करवा नी पारछे, त तुम्हरा चुप रहव। बिना सोचे-समझे कुछ ना करो, ३७ जैडा कि तुम्हरा करिहेन। तुम्हरा इला लोकोक बिना कोय गलती पाय इठिन ले ओसिहेन। यरा ना त हमसार मन्दिरेर लूट-पाट करिहे आर ना हमसार देवीर नामेर बुराई बोलिहे। ३८ वहीलाते अगर दमेत्रियुस आर वहार साथी कारीगरलार कहारो साथे झगड़ा छे, त उसार तने कचहरी खोलाल छे आर हाकिमलाव छे। वरा मुकदम्मा करवा पारे। ३९ मगर तुम्हरा अगर आढ़ोह कुछ पूछवा चाहचेन, त यहार फैसला पंचायतोत करेलेन। ४० आजकार दंगा-फसादेर कारण हमसाक डोर छे कि रोमी हाकिमला हमसार पर दोष लगाबे क्याँकि इडा दंगा-फसाद बिना कारण होये। आर रोमी हाकिमोक जवाब दुवार तने मोर लिकिन कोय उत्तर नी छे।” ४१ इडा कहय मुंशी सभार लोकलाक पठाय दिले।

पौलुस मकिदोनिया आर यूनान प्रदेशोत

२० जैखुना दंगा-फसाद थमे गेल, त पौलुस विश्वासीलाक जाब दे उसाक हिम्मत दिले। आर उसार लिकिन से भेंट-मुलाकात करे मकिदोनिया प्रदेश जवार तने खाना हंय गेल। १ मकिदोनिया प्रदेश दे जवारखुना वहाँय अलग-अलग जगहोर विश्वासीलाक हिम्मत दिते गेल, आर आखिरोत यूनान प्रदेश पहुँचिल। ३ इठिन वहाँय तीन महीना

रोहिल। वहार बाद जैखुना वहाँय जहाजेर पर चोढ़े सीरिया प्रदेश जवार तने तैयार होल, उखुना वहाक पता चलिल कि यहूदी लोकला वहाक जान से मारे फिकवार साजिश करिहे, त वहाँय घुरे मकिदोनियार एकटा रास्ता दे चले गेल। ४ जवारखुना कुछुला लोक पौलुसेर साथे धरे लिले। वरा छिले: तिमोथी, बिरीया शहरेर पुरुषेर बेटा सोपतरूस, थिसलुनिकी शहरेर अरिसतरखुस आर सिकुन्दुस, दिरबे शहरेर गयुस, आसिया प्रदेशेर तुखिकुस आर तिरफिमुस। ५-६ जैखुना हमरा फिलिप्पी शहर पहुँचनु, इला लोक आगु बढे तरोआस शहरोत हमसार इन्तेजार करवा लागिल। हमरा अखमीरी रूटी परबेर बाद पानी जहाजेर पर चढ़नु, आर पाँच दिन बाद तरोआस शहरोत उसार लिकिन पहुँचनु। उठिन हमरा सात दिन तक रोहनु।

पौलुस मुर्दा लड़काक जिन्दा करछे

७ हप्तार पहिलाडा दिन, जैखुना हमरा विश्वासीलार साथे प्रभु-भोज लुवार तने जोड़ो होनु, पौलुस उसार साथे आधा रात तक बात करिल क्यौँकि वहाँय दोसरा दिन तरोआस से चले जवा चाहचिले। ८ हमरा उपरोत तेमंजिलार पर जोड़ो हंय छिनु आर घरखानोत बहुतला चराक जलछिले। ९ जैखुना पौलुस बात करछिले, उठिन यूतुखुस नामेर एकझन जवान झुड़कीखानेर पर बोठे झूमछिले, जवानडा झूमते-झूमते तेमंजिल से पोड़े गेल आर मोरे गेल। १० मगर पौलुस उपर से नीचानोंत

नाभिल, आर झूके वहाक हाथोत उठाल आर लोकलाक कोहले, “तुम्हरा ना घबराव क्याँकि यहाँय जिन्दा छे।” ११ यहार बाद पौलुस आर सबकोय उपरोत जाय प्रभु-भोज लिले। आर प्रभु-भोज लुवार बाद वहाँय बेहान तक विश्वासीलार साथे बात करिल। वहार बाद पौलुस उछिन से चले गेल। १२ आर लोकला उडा जवानोक जिन्दा पाय खोश होल। १३-१४ हमरा तरोआस से पानी जहाजेर पर असुस शहर पहुँचनु, आर पौलुस उठिन बेराय पहुँचिल। उठिन से हमरा पौलुसोक जहाजेर पर चढ़ाय लिनु आर मितुलेने नगर ओसनु। १५ मितुलेने नगर से जहाजखान चलिल आर खियुस टापूर सामना दे चले तेसरा दिन सामुस टापूत पहुँचिनु। फेर सामुस टापू से चले दोसरा दिन मिलेतुस शहरोत पहुँचिनु। १६ पौलुस इडा निश्चय करिहिले कि वहाँय इफिसुस शहरेर बगल दे जाबे, जसे कि वहाक आसिया प्रदेशोत समय बितवा ना होय क्याँकि वहाँय यरूशलेम शहरोत पिन्तेकुस परब मनवा चाहचिले।

इफिसुस शहरेर मंडलीर अगुवालाक उपदेश

१७ पौलुस जैखुना मिलेतुस शहरोत छिले, वहाँय उठिन इफिसुस मंडलीर अगुवालाक खबर दे बोलाल। १८ आर जैखुना वरा पौलुसेर लिकिन पहुँचिल, वहाँय उसाक कोहले, “तुम्हरा जानेन कि जैखुना मुई आसिया प्रदेशोत ओसनु, पहिलाय दिन से मुई तुमसार लिकिन कुन किसम करे रोहछिनु। १९ मुई बहुत नम्र बने, बहुत लोय बहाय आर दुःख-

तकलीफ सहय प्रभुर सेवा करछिनु। जैला दुःख-तकलीफ मोर पर
यहूदी लोकेर साजिसेर कारण ओसिहिले। २० आर जैला बात तुमसार
फैदार तने छिले, उला बात तुमसाक लोकेर आगुत आर घरे-घरे सिखाते
कोयखुना नी छोड़ी। २१ यहूदी आर गैर-यहूदी लोकोक इडा बात बताते
रोहनु कि पाप से मन बदले परमेश्वरेर लिकिन ओसो आर हमसार प्रभु
यीशु मसीहार पर विश्वास करो। २२ देखो! परमेश्वरेर आत्मार कहना
मुताबिक मुई यरूशलेम जाछी आर मुई नी जानी कि उठिन मोर पर की-
की गुजरिबे? २३ मगर पवित्र आत्मा हरेकटा शहरोत मोक बताछे कि
लोक मोक गिरफ्तार करबे आर मोर पर मुसीबत पोड़बे। २४ मगर मुई
अपना जानडार कोय परवाह नी करछी। प्रभु यीशु मोक इडा खुश-
खबरी प्रचार करवा दिहे कि परमेश्वर लोकेर पर दया करिहे। मुई खाली
चाहची कि प्रभु यीशुर काम पूरा करवा पारी। २५ देखो! मुई जानी कि
तुम्हरा जहाँय मोर लिकिन से परमेश्वरेर राजेर बारे सुनछिलेन, तुम्हरा
कोय आर मोर मुख देखवा नी पारभेन। २६ वहीलाते आज मुई तुमसाक
कोहची कि अगर कोय नाश होय जाछे, त मुई वहार कसूरबार नी छी
२७ क्योंकि मुई तुमसाक परमेश्वरेर योजना पुरा-पुरा बताय दिही।
२८ परमेश्वर मंडलीर लोकलाक अपना बनाहे क्योंकि वहार बेटा उसार
तने अपना खून बहाहे। आर पवित्र आत्मा उसार देखभाल करवार तने
तुमसाक अगुवा बनाहे। वहीलाते तुम्हरा अपना आर मंडलीर हिफाजत

करो। २९ मुई इडा जानी कि मोर जवार बाद झूठा शिक्षक तुमसार बीचोत ओसबे, जैला प्रभुर विश्वासीलाक नाश करबे। ३० तुमसार बीच से इकिसम लोक निकलिबे, जैला लोक विश्वासी लोकोक गलत शिक्षा दे अपना भीति टाने आनबे। ३१ याद करो कुन किसम करे मुई तीन साल तक रात-दिन दुःख उठाय तुमसाक सभाको सिखाही आर हुँसियार करिही। वहीलाते तुम्हरा जागिल रोहेन। ३२ आर आज मुई तुमसाक परमेश्वरेर हाथोत सोंपे दिछी कि परमेश्वर तुमसार देखभाल करे, आर चाहची कि तुम्हरा वहार वचनेर मुताबिक चलेन। इ-वचन तुमसाक विश्वासोत मजबूत करबे आर उला लोकेर साथे तुमसाक स्वर्गेर भागीदार बनाबे, जैला लोकोक परमेश्वर चुने पवित्र करिहे। ३३ मुई कहारो सोना, चाँदी या कपड़ार लालच नी करी। ३४ तुम्हरा खुद जानेन कि अपना यही दोनोंखान हाथ दे काम करे मोर आर मोर साथीलार जरूरतोक मुई पूरा करछी। ३५ मुई तुमसाक सब कुछ करे देखाही जसे कि तुम्हरा मोर मान्दी मेहनत करे गरीब लोकोक मदद करवा पारेन आर प्रभु यीशुर वचन याद रखवा पारेन। प्रभु इडा बात खुद कोहे, ‘लेनेवाला से देनेवाला बेसी आशीष पाछे।’” ३६ इला बात कहवार बाद पौलुस हटुवा पारिल आर उसार सभारो साथे प्रार्थना करिल। ३७ प्रार्थना करवार बाद वरा सबकोय बहुत कानिल आर पौलुसेर गला धरे वहाक चुमवा लागिल। ३८ वरा खास करे बेसी उदास

होल क्योंकि पौलुस उसाक कोहले कि तुम्हरा आर मोर मुख देखवा नी पारभेन। यहार बाद वरा पौलुसोक जहाजेर पर चढ़ाय दुवार तने ले गेल।

पौलुस यरूशलेम शहर जाछे

२१ हमरा इफिसुस मंडलीर विश्वासीला से बिदा ले सीधा रास्ता दे पानी जहाज से कोस पहुँचनु आर दोसरा दिन रूदुस पहुँचनु। आर फेर उठिन से पतरा शहरोत ओसनु। २ उठिन हमसाक एकखान जहाज मिलिल, जैखान जहाज फीनीके जाछिले, हमरा उखानोत चोढ़े उछिन से चले गेनु। ३ जवारखुना हमसाक साइप्रस टापू देखा दिले। हमरा साइप्रस टापूर दक्खिन दे सीरिया प्रदेशेर सूर शहरोत नाभनु, जैठिन जहाजेर माललाक नाभाना छिले। ४ हमरा उठिन छाभते-छाभते कुछुला विश्वासीक पानु। आर उसार साथे हमरा उठिन सात दिन तक रोहनु। पवित्र आत्मा उसाक बताल कि यहूदी लोकला यरूशलेम शहरोत पौलुसोक सताबे। वहीलाते विश्वासीला पौलुसोक यरूशलेम जवा मना करिल। ५ सात दिन रहवार बाद, हमरा उठिन से रवाना हंय गेनु। वरा सबकोय स्त्री आर बच्चाला समेत हमसाक शहर से समुन्द्रेर कछार तक पार करे दिले। उठिन हमरा हटुवा पाड़े प्रार्थना करनु। ६ वहार बाद हमरा उसार लिकिन से बिदाय ले जहाजेर पर चढ़नु। आर वरा घुरे घर चले

गेल। ७ सूर से पानी जहाजेर सफर करे पतुलमियास पहुँचिनु।
उठिनकार विश्वासी भईलाक नमस्कार करनो आर उसार साथे एकटा
दिन रोहनु। ८ दोसरा दिन हमरा उठिन से कैसरिया शहर ओसनो आर
फिलिपेर घर रोहनु, जहाँय प्रभु यीशुर खुश-खबरीर प्रचारक छिले आर
उला सातझन सेवकेर अन्दर से एकझन छिले, जैलाक भोजन बँटवार
तने चुनाल गहिले। ९ वहार चारझन कुमारी बेटी छिले, वरा लोकेर
लिकिन परमेश्वरेर वचनेर भविष्यवाणी करछिले। १० जैखुना हमरा
कैसरिया शहरोत छिनु, बहुत दिन बाद अगबुस नामेर एकझन नबी
यहूदिया प्रदेश से उठिन ओसिल। ११ हमसार लिकिन ओसे वहाँय
पौलुसेर कमरकसखान लिले आर अपना हाथ-पाँवलाक बान्हे बोलिल,
“पवित्र आत्मा कोहचे कि जैडा लोकेर इखान कमरकस छे, वहाक
यरूशलेम शहरोत यहूदी लोकला यही मान्दी करे बाँनभे, आर गैर-यहूदी
लोकेर हाथोत सोंपे दिबे।” १२ जैखुना हमरा इडा बात सुननु, त हमरा
आर उठिनकार लोकला पौलुसोक बिनती करे कोहनु कि वहाँय
यरूशलेम ना जाय। १३ मगर पौलुस जवाब दिले, “तुम्हरा इला की
करछेन? तुम्हरा इकिसम करे काने मोर दिलडाक क्याँ दुख दिछेन? मुई
त प्रभु यीशुर कारण यरूशलेम शहरोत जेल जवार तने आर मोरवारो
तने तैयार छी।” १४ जैखुना वहाँय नी मानिल त हमरा कोहनो, “प्रभुर
इच्छा पूरा होक।” १५ वहार बाद हमरा यरूशलेम जवार तने तैयार हंय

गेनु। १६ कैसरिया शहर से कुछुला विश्वासी हमसार साथे गेल। हमसाक मनासोन नामेर एकइन पुरना विश्वासीर घर रहवार तने ले गेल, जहाँय साइप्रस टापूर रहनेवाला छिले।

याकूबेर साथे पौलुसेर मुलेकात

१७ जैखुना हमरा यरूशलेम पहुँचिनु, त उठिनकार भा-बहिनला बहुत खुशी से हमसाक ग्रहण करिल। १८ दोसरा दिन पौलुस हमसार साथे याकूबोक देखवार तने गेल। मंडलीर सबला अगुवा वहार साथे जोड़ो हंय छिले। १९ उठिन पहुँचे पौलुस उसाक नमस्कार करिल आर खबर-खैरियत लिले। खबर-खैरियत लुवार बाद वहाँय एक-एक करे सबला कामेर बारे बताल, जैला काम परमेश्वर वहार जरियाय गैर-यहूदी लोकेर बीचोत करिहिले। २० इला बात सुने वरा परमेश्वरेर बड़ाई करिल आर वहाक कोहले, “हे भई! तुई देखछिस कि यहूदी लोकेर अन्दर से हजार-हजार लोक प्रभु यीशुर विश्वासी बने गहे। इला लोक अलाव मूसार नियमोक कड़ाई से मानछे। २१ तोर बारे उला विश्वासीक बताल गहे कि जैला यहूदी लोक गैर-यहूदी लोकेर बीचोत रोहचे, तुई उसाक मूसा नबीर नियम मनवा मना करछिस, उसार बेटालारो खतना करवा मना करछिस आर उसाक बाप-दादोर रीति-रेवाजोक मनवा मना करछिस। २२ तुई अला बता की कराल जाबे? लोकला जरूर इडा जाने जाबे कि तुई इठिन ओसिहिस। २३ वहीलाते हमरा तोक जैडा बात कोहची, उडा

करेक। हमसार इठिन चारझन लोक छे, जहाँय मन्ती राखियेह।
२४ उसार साथे अपना-आपोक शुद्ध करेक आर उसार तने खर्चा दे जसे
कि वरा अपना-अपना माथा कमाय दिले। इडा से लोकला जाने जाबे
कि जैला बात तोर बारे उसाक बताल गहे, उलात कोय सच्चाई नी छे।
बल्के लोकला इडा विश्वास करबे कि तुई खुद मूसार नियमोक
मानछिस आर वहार मुताबिक चलछिस। २५ मगर जैला विश्वासी गैर-
यहूदी लोकेर बीच से छे, उसार बारे हमरा इडा फैसला करे लिखे पठाही
कि वरा मूर्तिक चढ़ाल बलिदानेर मांस ना खाय, गला चापे मराल पशुर
मांस ना खाय आर खून ना खाय, आर कुकरम ना करे।” २६ यहार बाद
दोसरा दिन पौलुस चारोझन लोकोक लिले आर उसार साथे शुद्ध हंय
मन्दिरेर भीतरोत गेल। उठिन जाय वहाँय पूजारीलाक बताल कि
हमसार शुद्ध हवार दिन खतम हंय जाछे आर हमसाक हरेकझनार तने
बलिदान चढ़वा होबे।

मंदिरोत पौलुसोक धरे लिया ल जाछे

२७ शुद्ध हवार सात दिन खतम होनेवाला छिले, आसियार यहूदीला
पौलुसोक मंदिरोत देखिल, आर वरा सबला लोकोक उसकाय दिले आर
पौलुसोक धरे लिले २८ आर चिल्लाय कोहले, “हे भईला! मदद करो।
यहाँय त वहीडा लोक छे, जहाँय सब जगहोत यहूदी लोकेर खिलाफ,
मूसा नबीर नियमेर खिलाफ आर मंदिरेर खिलाफ बोलते रोहचे। यहार

अलावा गैर-यहूदी लोकलाको मंदिरोत आने इखान शुद्ध जगहोक अशुद्ध करे दिहे।” २९ यहार पहिले वरा इफिसुस शहरेर रहनेवाला त्रुफिमुसोक पौलुसेर साथे शहरोत देखिहिले आर समझिहिले कि पौलुस वहाक ले मंदिरोत जाबे। ३० इडा देखे पूराडा शहरोत हल्ला मचे गेल आर लोकला दौड़े जोड़ो हंय गेल आर पौलुसोक धरे घिसटाय मंदिर से बाहर आनिल आर जल्दी करे दरवाजाला बन्द करे दिले। ३१ जैखुना वरा पौलुसोक मारे फिकवा चाहचिले, उखुना सैनिकेर एकटा बोड़ो हाकिमोक खबर मिलिल कि पूरा यरूशलेम शहरोत हल्ला मचाल छे। ३२ हाकिमडा कुछु सैनिक आर कुछु छोटो हाकिमोक ले भीड़ेर भीति जल्दी दौड़े गेल। लोकला सैनिकेर बोड़ोडा हाकिमोक आर सैनिकलाक देखे पौलुसोक मरवा छोड़े दिले। ३३ यहार बाद हाकिमडा पौलुसोक धरे लिले, आर दुईखान जंजीर से बन्हवार हुकूम दिले आर पूछवा लागिल, “यहाँय के छे, आर यहाँय की करिहे?” ३४ मगर भीड़ेर लोकला कोय कुछु कहय आर कोय कुछु कहय हल्ला करवा लागिल। हल्लार कारण जैखुना वहाँय ठीक सच्चाईडाक जनवा नी पारिल, त पौलुसोक सैनिक निवासोत ले जवार हुकूम दिले। ३५ जैखुना पौलुस आर सैनिकला सैनिक निवासेर सीढ़ीखानेर लिकिन ओसिल, सैनिकला पौलुसोक उठाय लिले क्याँकि भीड़ेर लोकला वहाक जान से मरवार तने उतावला

हंय गहिले। ३६ लोकला वहार पीछू-पीछू हल्ला करते जाछिल कि वहाक खतम करे दव।

पौलुसेर भाषण

३७ जैखुना वरा पौलुसोक सैनिक निवासेर भीतरो ले जाछिले, उखुना पौलुस बोड़ो हाकिमडाक पूछिल, “अगर तुई मोक बोलवार अनुमति दिस, त मुई तोक कुछु बोलवा चाहची।” हाकिमडा कोहले, “तुई की यूनानी भाषा जानिस? ३८ तुई की मिसर देशेर उडा लोक नी छिस, जहाँय कुछु दिन पहिले बगावत करे चार हजार खूनी लोकोक जंगलोत ले गहिलो।” ३९ पौलुस बोलिल, “मुई त किलिकिया प्रदेशेर नामी तरशीस शहरेर एकझन यहूदी लोक छी। मुई तोक बिनती करे कोहची कि मोक लोकलार साथे बात करवा दे।” ४० जैखुना वहाक सैनिकेर बोड़ोडा हाकिम बोलवार हुकूम दिले, पौलुस सीढ़ीडार पर थाड़ो हंय लोकलाक चुप रहवार तने हाथ से इशारा करिल। जैखुना लोकला चुप हंय गेल, वहाँय इब्रानी भाषात बोलिल,

२२ “हे भईला आर आदरणीय बोड़ो-बुजुर्ग लोकला! मुई बेकसूर छी। इडा साबित करवार तने जैला बात मुई तुमसाक बोलछी, उला बात सुनो।” २ लोकला जैखुना देखिल कि पौलुस इब्रानी भाषात बोलछे, त वरा पूरा खामोश हंय गेल। वहार बाद पौलुस बोलवा लागिल, ३ “मुई त

एकझन यहूदी लोक छी। मोर जनम किलिकिया प्रदेशेर तरशीस शहरोत होये, मगर मोर लालन-पालन इडा शहरोत होय। गुरु गमालिएलेर लिकिन मुई शिक्षा पाही आर बाप-दादोर नियम-कानूनोक कड़ाई से मोक सिखाल गहे। परमेश्वरेर तने मोर वही किसम धुन छिले, जैकिसम धुन आज तुमसार बीचोत देखछी। ४ मुई प्रभु यीशु पर विश्वास करनेवाला सबला स्त्री आर पुरुष लोकोक बान्हें जेलोत दिछिनु। उसाक इकिसम सताछिनु कि उसाक जान से मारे दिछिनु। ५ इला बातेर गवाह खुद महापूजारी आर महासभार नेताला छे। इकिसम कि मुई उसार लिकिन से दमिशक शहरेर यहूदी भईलार नामे चिट्ठी लिहिनु। मुई अधिकार पाय दमिशक शहर जाछिनु जसे कि उठिनकार सबला इसाई लोकोक बान्हें यरूशलेम ले ओसी आर उसाक सजई दी। ६ जाते-जाते मुई जैखुना दमिशक शहरेर बगलोत पहुँचिनु, त इकिसम होल कि करीब दुई पहरेरखुना अचुकाय एकटा बहुत तेज रोशनी आसमान से मोर चारो भीति चमकिल। ७ वहीखुना मुई माटीत पोड़े गेनु आर एकटा आवाज मोक कोहचिले, ‘हे शाऊल! हे शाऊल! तुई मोक क्याँ सताछिस?’ ८ मुई जवाब दिनु, ‘हे प्रभु! तुई के छिस?’ वहाँय मोक कोहले, ‘मुई नासरत शहरेर यीशु छी, जहाक तुई सताछिस।’ ९ मोर साथीलाव रोशनीखानोक देखिल, मगर जहाँय मोर साथे बोलछिले, वरा वहार बोलीडा समझवा नी पारिल। १० यहार बाद मुई पूछनु, ‘हे प्रभु!

मोक की करवा होबे?’ प्रभु मोक कोहले, ‘तुई उठे दमिशक शहरोत जा, आर जैकुछु तोक करवा होबे, उठिन तोक सब कुछु बताल जाबे।’

११ उडा तेज रोशनीर कारण से जैखुना मुई कुछु देखवा नी पारनु, त मोर साथीला मोर हाथ धरे दमिशक शहरोत ले ओसिल। १२ उठिन हनन्याह नामेर एकझन लोक छिले। वहाँय परमेश्वरेर नियम मुताबिक चलछिले आर उठिनकार यहूदी लोकेर बीचोत वहार अच्छा नाम छिले। १३ वहाँय मोर लिकिन ओसिल आर मोर बगलोत थाड़ो हंय कोहले, ‘भई शाऊल! तुई आरमने देखवा लागेक।’ वहीखुना मुई फेर देखवा लागनु आर वहाक देखवा पारनु। १४ वहार बाद हनन्याह मोक कोहले, ‘हमसार बाप-दादोर परमेश्वर तोक चुने लिहे जसे कि तुई परमेश्वरेर इच्छा जानिस आर वहार धर्मी लोक यीशुक देखिस आर वहार मुखेर बातला सुनिस। १५ आर यीशुर बारे जैला बात देखिहीस आर सुनिहीस, उला सबला लोकेर सामनात प्रचार करवा पारे। १६ अला आर देरी ना करेक। उठेक आर वहार पर विश्वास करे पापेर माफी पा आर बपतिस्मा ले।’ १७ मुई यरूशलेम घुरे ओसे मंदिरोत जैखुना प्रार्थना करछिनु, त प्रभु यीशु मोक दर्शन दे १८ कोहले, ‘जल्दी करेक। यरूशलेम से जल्दी जा क्याँकि जैडा बात तुई मोर बारे बोलबो, इठिनकार यहूदी लोकला ग्रहण नी करबे।’ १९ मगर मुई कोहनु, ‘हे प्रभु, वरा ग्रहण करबे क्याँकि वरा मोर पहिलकार जीवनेर बारे जाने। वरा त खुद गवाह छे कि मुई जगह-जगह

प्रार्थना-घरलात जाय तोर विश्वासीलाक धरछिनु-मारछिनु आर जेलोत दे दिछिनु। २० जैखुना इस्तिफनुस तोर बारे लोकेर लिकिन प्रचार करछिल, त लोकला वहाक जान से मारे फिकाल। मोहों वहार मौतोत राजी छिनु आर जैला लोक इस्तिफनुसोक जान से मारछिले, थाड़ो हंय उसार कपड़ालार पहरा दिछिनु।’ २१ मगर प्रभु मोक कोहले, ‘चले जा क्योंकि मुई तोक गैर-यहूदी लोकेर लिकिन दूर-दूर तक प्रचार करवा पठाम।’” २२ लोकला पौलुसेर बात सुनते रोहिल। मगर जैखुना वहाँय बोलिल कि वहाँय गैर-यहूदी लोकेर लिकिन प्रचार करवा गहिले, त वरा बहुत जोर से चिल्लाय कोहले, “इकिसम लोकोक खतम करो, वहार जिन्दा रहना ठीक नी छे।” २३ आर जैखुना वरा चिल्लाछिले आर पौलुसेर पर गोस्सा हंय आसमानेर भीति कपड़ा फेंकछिले आर धुला उड़ाछिले, २४ उखुना सैनिकेर बोड़ो हाकिमडा बोलिल, “यहाक सैनिक निवासोत ले चलो आर कोड़ा मारे पूछो क्योंकि मुई जनवा चाहची कि लोकला कुन कारण से यहार खिलाफ इकिसम करे चिल्लाछे।” २५ जैखुना लोकला वहाक कोड़ा दे मरवार तने बान्हिल, पौलुसेर बगलोत जैडा सैनिकेर हाकिम थाड़ो हंय छिले, पौलुस वहाक कोहले, “बिना कसूरबार रोमी लोकोक की कोड़ा मारना उचित छे?” २६ हाकिमडा इडा बात जानिल कि यहाँय एकझन रोमी लोक छे, त बोड़ो हाकिमडार लिकिन गेल आर वहाक कोहले, “तुई इडा की

करछिस? यहाँय त रोमी लोक छे।” २७ इडा सुने बोड़ोडा हाकिम पौलुसोक पूछिल, “तुई मोक बता, तुई की रोमी लोक छिस?” पौलुस कोहले, “हाँ।” २८ हाकिमडा इडा बात सुने कोहले, “मोक रोमी लोक हवार अधिकार बहुत पैसा खर्च करे मिलिहे।” पौलुस बोलिल, “मुई त जनम से रोमी छी।” २९ इडा बात सुने जैला सैनिक वहाक कोड़ा मारे पूछवा चाहचिले, वरा जल्दी करे वहार लिकिन से दूर हंय गेल। हाकिमडाव इडा जाने कि पौलुस रोमी लोक छे, आर मुई वहाक बानिही, त वहाँय डोराय गेल।

पौलुस महासभार आगुत

३० दोसरा दिन सैनिकेर हाकिमडा ठीक से मालूम करवा चाहचिले कि यहूदी लोकला पौलुसेर पर क्याँ दोष लगाछे? वहीलाते वहाँय पौलुसेर हाथला खोलवार हुकूम दिले, आर बोड़ोला पूजारी आर महासभार सबला लोकोक जोड़ो हवार हुकूम दिले। पौलुसोक ले जाय उसार आगुत थाड़ो करे दिले।

२३ पौलुस महासभार लोकलार भीति टकटकी लगाय देखे बोलिल, “हे भईला! मुई हमेशा परमेश्वरेर सामनात एकदम खाँटी मन से जीवन बिताही।” २ इला बातोक महापूजारी हनन्याह सुनिल आर पौलुसेर बगलोत जैला लोक थाड़ो हंय छिले, उसाक हुकूम दिले, “तुम्हरा

પૌલુસેર મુખોત થપ્પર મારો।” ૩ તબ પૌલુસ વહાક જવાબ દિલે, “એ કપટી! પરમેશ્વર તોક મારબે। તુઈ મૂસા નબીર નિયમ અનુસારે મોર બિચાર કરવા બોઠિહિસ, ત બિના કોય ગલતી પાય નિયમેર ખિલાફ મરવાર હુકૂમ ક્યાં દિછિસ?” ૪ જૈલા લોક પૌલુસેર બગલોત થાડો હંય છિલે, વરા પૌલુસોક બોલિલ, “તુઈ ઇકિસમ બોલે પરમેશ્વરેર મહાપૂજારીર ક્યાં અપમાન કરછિસ?” ૫ પૌલુસ ઉસાક કોહલે, “હે ભઈલા! મોક ની માલૂમ કિ યહાંય મહાપૂજારી છે। પરમેશ્વરેર વચનોત લિખાલ છે કિ હમસાક અપના હાકિમ લોકેર ખિલાફ કોય બુરા બાત બોલવા ની લાગે।” ૬-૯ મહાસભાત કુછુલા લોક સદૂકી દલેર આર કુછુલા લોક ફરીસી દલેર છે। સદૂકી લોક વિશ્વાસ કરછે કિ મુર્દા લોક આરમને જિન્દા ની હોબે, આર યહોડા વિશ્વાસ કરછે કિ કોય ફરીસ્તા આર આત્મા ની છે। મગર ફરીસી લોક ઇલા તીનોડા બાતોક માનછે। પૌલુસ ઇડા જાને મહાસભાત જોર સે બોલિલ, “હે ભઈલા! મુઈ એકઝન ફરીસી છી, મોર બાપ ફરીસી, આર મોર દાદો-પરદાદોલાવ ફરીસી। મોર પર મુકદમા ચલછે ક્યાંકિ મુઈ વિશ્વાસ કરછી કિ પરમેશ્વર મુર્દા લોકોક જિન્દા કરબે।” જૈખુના વહાંય ઇલા બાત બોલિલ, ફરીસી આર સદૂકી લોકેર બીચોત ઝગડા શુરૂ હંય ગેલ આર મહાસભાત ફૂટ પૈદા હંય ગેલ। ઉખુના શાસ્ત્રેર કુછુલા જ્ઞાની જૈલા ફરીસી છિલે, ઉઠે થાડો હંય ગેલ આર બોલવા લાગિલ, “હમરા ઇડા લોકેર કોય કસૂર ની

पाछी। आर अगर कोय आत्मा या स्वर्गेर फरीस्ता वहार साथे बोलिहे, त इडा से कि हरज छे?” १० खोब बहसबाजी देखे सैनिकेर बोड़ो हाकिमडा डोराय गेल आर सोचिल कि कहीं वरा पौलुसेर टुकड़ा-टुकड़ा करे ना दे। हाकिमडा सैनिकलाक हुकूम दिले कि वरा पौलुसोक उसार बीच से निकलाय सैनिक निवासोत ले जाय। ११ वहीडा रातोत प्रभु पौलुसेर सामनात हाजिर होल आर वहाक कोहले, “हे पौलुस! हिम्मत कर। जैकिसम तुई मोर बारे यरूशलेम शहरेर लोकोक बताहिस, वही किसम मोर बारे तुई रोम शहरेर लोकोक बताबो।”

पौलुसोक मारे फिकवार साजिश

१२ बेहाने यहूदी लोकला पौलुसेर खिलाफ साजिश करिल आर कसम खाय कोहले, “जैखुन तक हमरा पौलुसोक मारे नी फिकामु, उखुन तक हमरा कोय खान-पान नी करमु।” १३ जैला लोक कसम चाहिले, वरा चालिसझन से बेसी छिले। १४ वरा बोड़ोला पुजारी आर अगुवालार लिकिन जाय कोहले, “हमरा कसम खाही कि जैखुन तक हमरा पौलुसोक मारे नी फिकाछी, उखुन तक हमरा कोय खान-पान नी करूम। १५ वहीलाते अला तुम्हरा आर महासभार लोकला सैनिकेर बोड़ोडा हाकिमोक बोलो कि आढ़ोह ठीक से जाँच करवार तने पौलुसोक तुमसार सामनात ले ओसे। तुमसार लिकिन पहुँचवार आगुते हमरा वहाक मारे फिकवार तने तैयार रोहमु।” १६ पौलुसेर भगिना इडा

बात सुने लिले आर सैनिक निवासोत जाय पौलुसोक बताय दिले।
१७ पौलुस सैनिकेर एकझन छोटो हाकिमोक अपनार लिकिन जाब दे
कोहले, “इडा जवानोक बोड़ो हाकिमडार लिकिन ले जा, यहाँय वहाक
कुछु कहवा चाहचे।” १८ छोटो हाकिमडा उडा जवानोक बोड़ो
हाकिमलार लिकिन ले गेल आर कोहले, “कैदी पौलुस मोक जाब दे
अनुरोध करिहे कि इडा जवान तोक कुछु कहवा चाहचे।” १९ बोड़ोडा
हाकिम उडा जवानेर हाथ धरे एक बगल ले जाय पूछिल, “तुई मोक की
कहवा चाहचिस?” २० वहाँय कोहले, “यहूदी लोकला साजिश करिहे
आर बहाना बनाहे कि पौलुसेर आढ़ोह ठीक से जाँच कराल जाक।
वहीलाते वरा काल पौलुसोक महासभात अनवार तने तोर लिकिन
बिनती करबे। २१ मगर तुई उसार बात ना मानिस क्याँकि उसार भीतर
से चालिसझन से बेसी लोक पौलुसोक जान से मरवार तने नुकाय
रोहबे। इला लोक कसम खायेह कि जैखुन तक वरा पौलुसोक जान से
मारे नी फिकाछे, उखुन तक वरा कुछु खान-पान नी करबे। वरा अला
तैयार छे आर सिरिफ तोर हुकूमेर इन्तेजार करछे।” २२ तब बोड़ोडा
हाकिम जवानडाक बोलिल, “तुई इठिन से चले जा आर कहाको ना
कोहिस कि तुई मोक इडा बात बताहिस।”

पौलुस कैसरिया शहरोत राजपालेर सामनात

२३ तब बोड़ो हाकिमडा दुईझन छोटो हाकिमोक जाब दे कोहले, “दुई सौझन पैदल-सैनिक, सत्तरझन घुड़-सवार सैनिक आर दुई सौझन बलमधारी सैनिक नौ बजे रातोत कैसरिया शहर जवार तने तैयार राखेक। २४ आर पौलुसेर तने घोड़ा इन्तेजाम करो जसे कि वहाक सुरक्षित फेलिक्स राजपालेर लिकिन ले जाल जाय।” २५ बोड़ोडा हाकिम फेलिक्स राजपालोक एकखान चिट्ठीत लिखिल, २६ आदरणीय महाप्रतापी राजपाल फेलिक्स! मुई कलोदियुस लुसियास तोक नमस्कार करछी। २७ इडा लोकोक यहूदी लोकला धरे जान से मारे दुवा चाहचिले। मगर जैखुना मुई जाननु कि यहाँय एकझन रोमी लोक छे, त मुई सैनिक ले वहाक छुटाय आननु। २८ मुई जानकारी लुवा चाहचिनु कि यहूदी लोकला वहार पर कुन बातेर दोष लगाछे, वहीलाते मुई वहाक महासभात ले गेनु। २९ उखुना मोक मालूम होल कि वरा अपना धर्मेर नियम बारे वहार पर दोष लगाछे। मगर मुई वहाक जान से मरवार या जेलोत दुवार कोय कसूर नी पाछी। ३० जैखुना मोक बताल गेल कि वरा पौलुसोक मारे फिकवा चाहचे, त मुई जल्दी करे वहाक तोर लिकिन पठाय दिनु। आर वहार मुद्दईलाको हुकूम दिनु कि वरा तोर आगुत वहार कसूर बताय। ३१ हाकिमडा जैकिसम सैनिकलाक हुकूम दिहिले, सैनिकलाव वही किसम करिल। पौलुसोक राजपालेर

लिकिन पहुँचवार तने वरा पौलुसोक ले राते-रात अन्तिपत्रिस शहरोत पहुँचिल। ३२ उठिन से दोसरा दिन घुड़-सवार सैनिकला पौलुसोक ले आगु बढे गेल आर बाँकी सैनिकला घुरे अपना निवासोत चले गेल। ३३ घुड़-सवार सैनिकला पौलुसोक ले कैसरिया शहर पहुँचिल आर चिट्ठीखान फेलिक्स राजपालेर हाथोत दिले आर पौलुसोक वहार आगुत हाजिर करिल। ३४ फेलिक्स राजपाल चिट्ठीखान पोढ़े पूछिल, “यहाँय कुन इलाकार लोक छे?” ३५ जैखुना फेलिक्सोक मालूम होल कि पौलुस किलिकिया प्रदेशेर छे, त वहाक कोहले, “जैला लोक तोर पर दोष लगाहे, वरा जैखुना हाजिर होबे, उखुना मुई तोर बातला सुनुम।” यहार बाद फेलिक्स हुकूम दिले कि पौलुसोक राजा हेरोदेशेर महलोत पहरात रखाल जाक।

पौलुस फेलिक्सेर आगुत

२४ पाँच दिन बाद महापूजारी हनन्याह कुछु यहूदी नेताला आर तिरतुलुस नामेर एकझन वकीलोक ले कैसरिया शहर ओसिल। वरा फेलिक्स राजपालेर आगुत पौलुसेर खिलाफ मुकदमा पेस करिल। २ जैखुना पौलुसोक हाजिर कराल गेल, त तिरतुलुस वकील पौलुसेर पर दोष लगाय कहवा लागिल, “हे महा सम्मानित राजपाल फेलिक्स! तोर जरियाय हमसार बीचोत बहुत शांति ओसिहे आर तोर देखभाल से इडा

देशेर बहुत सुधार होते जाछे। ^३ हरेकखान जगोहोत जे तुई इला काम करिहिस, उलार तने हमरा तोर शुकुरिया करछी। ^४ मगर मुई तोक आर तकलीफ दुवा नी चाहची। तोसे बिनती करछी कि दया करे तुई हमसार एकटा बात सुनेक। ^५ हमरा इडा लोकोक गड़बड़ी फैलाते आर दुनियाँर सबला यहूदी लोकेर बीचोत लड़ाई-मार कराते पाही। यहाँय उला सबला लोकेर अगुवा छे, जैला लोक नासरत शहरेर लोकटार शिक्षार पर विश्वास करछे, जबकि इला शिक्षा झूठ छे। ^६ यहाँय मंदिरटाक छुताय दुवा चाहचिले, मगर हमरा वहाक धरे लिनु। [हमरा अपना नियम मुताबिक वहाक सजा दुवा पारनुतन। ^७ मगर सैनिकेर हाकिम लुसियास जबरदस्ती हमसार हाथ से पौलुसोक छुटाय लिले ^८ आर वहार मुद्दईलाक तोर आगुत हाजिर हवार हुकूम दिले।] हमरा वहार पर जैला दोष लगाछी, तुई उलाक खुद जाँच करे जाने लुवा पारिस।” ^९ यहूदी लोकलाव वकीलडार साथे दिले आर कोहले, “इला बात सच छे।”

पौलुस फेलिक्सोक जवाब दिछे

^{१०} जैखुना फेलिक्स पौलुसोक बोलवार तने इशारा करिल, त वहाँय जवाब दिले, “मुई जानी, तुई बहुत साल से यहूदी लोकेर इन्साफ करते ओसछिस। वहीलाते मुई खुशी से तोर सामनात अपना बचाव करछी, जैला बातेर दोष मोर पर लगाल गहे। ^{११} इडा तुई खुद जल्दी करे मालूम करे लिबो कि मुई यरूशलेम मंदिरोत बारह दिन पहिले भक्ति करवा

ओसिहिनु। १२ यरा मोक ना मंदिरोत, ना प्रार्थना-घरोत आर ना शहरोत
कहारो साथे बहस करते या भीड़ जमा करते पाहिले। १३ आर जैला दोष
यरा मोर पर लगाछे, उलार सबूत तोर लिकिन दुवा नी पारबे। १४ मुई
तोक कोहची कि जैडा शिक्षार मुताबिक मुई अपना दादो-परदादोर
परमेश्वरेर भक्ति करछी, उला शिक्षाक यरा गलत शिक्षा कोहचे। मगर
मुई विश्वास करछी कि इला शिक्षा परमेश्वरेर नियम आर नबीलार
लिखाल बात से एकदम मेल खाचे। १५ जैकिसम मुई विश्वास करछी,
वही किसम मोर पर दोष लगानेवालाव विश्वास करछे कि परमेश्वर
धर्मी आर अधर्मी दोनों किसमेर लोकोक मुर्दा से जिन्दा करबे।
१६ वहीलाते मुई परमेश्वरेर आर मानुषेर आगुत हमेशा एकदम खाँटी मन
से जीवन बिताही। १७ बहुत साल बाद मुई अपना गरीब लोकलाक
टाका-पैसा दे मदद करवार तने आर मंदिरोत बलि चढ़वार तने यरूशलेम
ओसिहिनु। १८-१९ आसिया प्रदेशेर कुछुला यहूदी लोक मोक मंदिरोत
इला काम करते देखिले। रीति मुताबिक मुई एकदम शुद्ध छिनु। उठिन
कोय भीड़-भड़ाका आर हल्ला-गुल्ला नी छिले। आसिया प्रदेशेर उला
यहूदी लोकोक मोर पर दोष लगवार तने इठिन ओसवा होलतन, अगर
उसार लिकिन मोर पर दोष लगवार तने कोय बात होलतन। २० नी त,
यरूशलेमेर इला लोक खुद बताय कि जैखुना मुई महासभार आगुत
थाड़ो हंय छिनु, त यरा मोर कुन कसूर पाहिले? २१ मुई इसार बीचोत

थाड़ो हंय जोर से बोलिहिनु कि मुर्दा लोक जिन्दा हंय उठबे। इडा बातोक छोड़े आर मुई कुछु नी करी। यहीडा कारण ले तोर आगुत आज मोर पर मुकदमा चलछे।” २२ फेलिक्स यीशुर शिक्षार बारे अच्छा से जानछिले। वहीलाते वहाँय मुकादमा सुनवा टाले दिले, आर कोहले, “जैखुना बोड़ो हाकिम लुसियास ओसबे, उखुना केसटार फैसला करूम।” २३ इडा कहवार बाद वहाँय एकटा छोटो हाकिमोक हुकूम दिले कि पौलुसोक कुछु आजादी दे दव, आर अगर वहार कोय दोस-बन्धु वहार साथे मुलाकात करे जरूरतेर सामान दुवा चाहाय, त कोय बाधा ना दे।

फेलिक्स आर दुरसिलार आगुत पौलुस

२४ कुछु दिन बाद फेलिक्स अपना यहूदी पत्नी दुरसिलाक साथे ले ओसिल। फेलिक्स पौलुसोक बुलाल आर बोलिल, “हमसाक यीशु मसीहार शिक्षार बारे सुना।” २५ वहार बाद पौलुस बोलवा लागिल कि हमसाक परमेश्वरेर इच्छा मुताबिक जीवन बितवा लागे आर हमसार शरीरेर इच्छार पर काबू रखवा लागे क्योंकि परमेश्वरेर बिचारेर दिन ओसनेवाला छे, जैडा दिनोत वहाँय सब मानुषेर बिचार करबे। इला सुने फेलिक्स डोराय गेल आर पौलुसोक कोहले, “तुई अला चले जा। मौका पाले मुई तोक फेर जाब दुम।” २६-२७ यहूदी लोकलाक खोश करवार तने फेलिक्स पौलुसोक जेलखनात छोड़े दिले। वहाक इडा उम्मेद छिले

कि पौलुस वहाक घुस दिबे, वहीलाते वहाँय पौलुसोक बार-बार बुलाय वहार साथे बात करछिले। दुई साल बाद यहूदिया प्रदेशोत फेलिक्स राजपालेर जगहोत दोसरा राजपाल ओसिल। वहार नाम छिले “पुरकियुस फेस्तुस।”

पौलुस फेस्तुसेर सामनात

२५ फेस्तुस यहूदिया प्रदेशोत राज करवार तने कैसरिया नगरोत पहुँचिल। उठिन तीन दिन रहवार बाद फेस्तुस यरूशलेम शहर चले गेल।
२ यरूशलेमेर बोड़ोला पूजारी आर यहूदी लोकेर अगुवाला वहार लिकिन ओसिल आर पौलुसेर पर दोष लगाल। ३ वरा फेस्तुसेर लिकिन बिनती करिल, “हमसार तने पौलुसोक कैसरिया से यरूशलेम मँगाय ले।” (वरा पौलुसोक रास्ताते मारे फिकवार साजिश करिहिले।) ४ फेस्तुस उसाक जवाब दिले, “पौलुस कैसरिया नगरोत छे आर वहार पर पहरा रखाल गहे। मुई खुद उठिन जल्दी करे जाम।” ५ वहाँय यहोडा कोहले, “तुमसार भीतरोत कुछुला नेता लोक मोर साथे चलो। अगर पौलुस कोय गलत काम करिहे, त वहार पर तुम्हरा दोष लगवा पारेन।” ६ यरूशलेम शहरोत आठ-दस दिन रहवार बाद फेलिक्स कैसरिया शहर घुरे चले गेल। उठिन पहुँचवार बाद दोसरा दिन वहाँय इन्साफ करवार तने गद्दीत बोठिल आर पौलुसोक हाजिर करवार हुकूम दिले।

७ पौलुसोक फेस्तुसेर सामनात हाजिर कराल गेल। जैला यहूदी लोक यरूशलेम से ओसिहिले, वरा पौलुसोक चारो भीति से घेरे वहार पर बहुत बोड़ो-बोड़ो दोष लगाल। मगर वरा कोय सबूत दुवा नी पारिल।
८ मगर पौलुस अपना-आपोक बेकसूर साबित करवार तने बोलिल, “मुई ना त यहूदी लोकेर नियमेर, ना मंदिरेर खिलाफ, आर ना रोम देशेर महाराजार खिलाफ कोय कसूर करिही।” ९ यहार बाद फेस्तुस यहूदी लोकोक खुश करवार तने पौलुसोक कोहले, “तुई की यरूशलेम जवा चाहचिस जसे कि तोर इडा मुकदमार फैसला वहीठिन मोर आगुत कराल जाय?” १०-११ पौलुस जवाब दिले, “नी। क्योंकि मुई रोम देशेर महाराजार बिचार करवार गद्दीर आगुत थाड़ो हंय छी। मोर मुकदमार फैसला यही ठिन हवा चही। जैकिसम तोक अच्छा से मालूम छे कि मुई यहूदी लोकेर खिलाफ कोय कसूर नी करिही। अगर मुई कसूरबार छी, आर मौतेर सजई पवार लायक कोय काम करिही, त मुई मोरवार तने तैयार छी। मगर जैला बातेर दोष वरा मोर पर लगाछे, अगर उला बातेर भीतर से कोयडा बात सच साबित नी होचे, त तुई या कोय मोक उसार हाथोत सोंपे दुवा नी सकोछे। वहीलाते मुई महाराजा से बिनती करछी कि मोर मुकदमार फैसला महाराजा करे।” १२ तब मंत्रीलार साथे सलाह-मसोरा करवार बाद फेस्तुस पौलुसोक कोहले, “क्योंकि तुई

अपना न्याय रोम देशेर महाराजार लिकिन चाहचिस, वहीलाते तोक महाराजार लिकिन ले जाल जाबे।”

पौलुस राजा अग्रिपार आगुत

१३ कुछु दिन बाद राजा अग्रिपा अपना बहिन बिरनीकीर साथे कैसरिया शहरोत ओसिल आर फेस्तुस राजपालोक बधाई दिले। १४ उसार उठिन बहुत दिन बितवार बाद फेस्तुस पौलुसेर बारे राजाक बताल, “राजा साहब! पौलुस नामेर एकझन लोकोक फेलिक्स जेलखानात राखे चले गहे। १५ मुई जैखुना यरूशलेम शहरोत छिनु, त बोड़ोला पूजारी आर यहूदी लोकेर अगुवाला वहार पर मुकदमा करिल। आर वरा चाहचिले कि पौलुसोक सजई देयाल जाक। १६ मगर मुई उसाक जवाब दिनु कि रोमी सरकारेर नियम छे कि जब तक आसामी अपना मुद्देईर आगुत थाड़ो हंय अपना बचाव नी करछे, तब तक वहाक कोय सजई देयाल नी जाबे। १७ जैखुना बोड़ोला पूजारी आर यहूदी लोकेर अगुवाला इठिन जोड़ो होल, त मुई देरी नी करनु, बल्के दोसरा दिन इन्साफ करवार तने इन्साफेर गद्दीत बोठनु, आर कैदीडाक हाजिर करवा कोहनु। १८ जैखुना वहार मुद्देईला थाड़ो होल, वरा इकिसम कोय खराब बातेर दोष वहार पर नी लगाल, जैकिसम मुई सोचेछिनु। १९ मगर वरा अपना धर्मेर कुछु बातेर बारे आर यीशु नामेर एकझन लोकेर बारे बहस करछिले आर बोलछे कि यीशु मोरे गहे। मगर पौलुस यीशुर बारे बताछे कि वहाँय मोरे

जिन्दा हंय उठिहे। २० मुई समझुवा नी पारछिनु कि इला बातेर पता कसे करे लगामु? मुई पौलुसोक पूछनु, ‘तुई की यरूशलेम जाबो जसे कि तोर इला बातेर फैसला हंय जाय?’ २१ मगर पौलुस अनुरोध करिल कि महाराजा वहार मुकादमार फैसला करे। वहीलाते मुई हुकूम दिनु कि जब तक वहाक महाराजार लिकिन पठाल नी जाछे, तब तक वहाक जेलते रखाल जाक।” २२ यहार बाद राजा अग्रिपा फेस्तुस राजपालोक कोहले, “मोहो उडा लोकेर बात सुनवा चाहची।” फेस्तुस राजपाल कोहले, “तुम्हीं वहार बातला काल सुनवा पारभेन।” २३ दोसरा दिन राजा अग्रिपा आर बिरनीके बहुत ठाट-बाटेर साथे ओसिल आर सैनिकेर बहुत बोड़ो हाकिमला आर शहरेर खास-खास लोकलार साथे सभा-घरोत हाजिर होल। तब फेस्तुस पौलुसोक हाजिर करवार हुकूम दिले। २४ फेस्तुस कोहले, “हे राजा अग्रिपा आर इठिन हाजिर लोकला! तुम्हरा इडा लोकोक देखछेन। यहार बारे सब यहूदी लोक यरूशलेम शहरोत आर इठिन यहार खिलाफ दरखास्त करिहे। यरा जोर दे चिल्लाय बोलछे कि इडा लोकेर जिन्दा रहना उचित नी छे। २५ मगर मुई जाने लिनु कि यहाँय इकिसम कुछु नी करे, जहार कारण वहाक जान से मारे देयाल जाय। आर यहाँय महाराजार लिकिन जवार अनुरोध करिहे। वहीलाते मुई वहाक महाराजार लिकिन भेजवार निर्णय करनूँ। २६-२७ मगर महाराजार लिकिन लिखवार तने मुई यहार खिलाफ कोय खास बात नी

पानु, आर कैदीर कसुरेर बारे महाराजाक बिना बताय, कैदीक वहार लिकिन भेजना उचित नी छे। वहीलाते मुई यहाक तुमसार आगुत आर खास करे राजा अग्रिपा तोर आगुत आनिही कि जाँच-पड़ताल करवार बाद महाराजार लिकिन लिखवार तने मोक कोय दोष मिले।”

पौलुस राजा अग्रिपाक जवाब दिछे

२६ सबला बात सुनवार बाद राजा अग्रिपा पौलुसोक कोहले, “तोक अपना बारे बोलवार हुकूम छे।” तब पौलुस हाथ से इशारा करे बोलिल,
२ “हे राजा अग्रिपा! यहूदी लोकला जताला बातेर दोष मोर पर लगाछे, आज तोर लिकिन उला बातेर जवाब दुवार तने मुई बहुत खुश छी।
३ खास करे इडा कारण से कि तुई खुद यहूदी लोकेर सबला चाल-चलन आर उसार धार्मिक मतभेदेर बारे जानिस। वहीलाते मुई तोर लिकिन बिनती करछी कि तुई मोन लगाय मोर बातलाक सुनेक। ४ शुरू से मोर बारे सबला यहूदी लोक जाने कि मोर चाल-चलन अपना यहूदी लोकेर बीचोत आर यरूशलेम शहरोत अच्छा छिले। ५ वरा चाहाय त मोर बारे कहवा पारे कि मुई अपना यहूदी धर्मेर सबसे कट्टर फरीसी दलेर लोक छिनु, आर वहीडा दलेर विश्वास मुताबिक चलछिनु। ६-८ परमेश्वर हमसार बाप-दादोलाक वादा करिहिले कि वहाँय मुर्दा लोकोक जिन्दा करबे। मुर्दा से जिन्दा हवार तने हमसार बारहडा खानदानेर लोक पूरा

दिल से रात-दिन परमेश्वरेर सेवा करते ओसछे। हे राजा अग्रिपा, वहीडा वादार पर विश्वास करवार कारण यहूदी लोकला मोर पर दोष लगाछे। जबकि परमेश्वर मुर्दा लोकोक जिन्दा करछे, त तुमसाक विश्वास क्याँ नी होचे? ९ मोह इडा ठाने लिहिनु कि नासरत शहरेर यीशुर खिलाफ मोक बहुत कुछ करवा होबे। १० आर यरूशलेम शहरोत मुई यही मान्दी करनु। मंदिरेर बोड़ोला पूजारीर लिकिन से अधिकार पाय बहुतला यीशुर विश्वासीक जेलोत दिनु। जैखुना उसाक जान से मारे फिकाल जाछिल, त मोहों उसार खिलाफ अपना सहमति दिछिनु। ११ हरेकखान प्रार्थना-घरोत उसार पर जूलुम करछिनु कि वरा लोकेर सामनात यीशुक इन्कार करे। मुई गुस्सार मारे इकिसम पगला हंय गहिनु कि बाहरकार शहरलातो जाय उसार पर जूलुम करछिनु। १२ यहीखान काम करवार तने मुई बोड़ोला पूजारीर लिकिन से एकखान चिट्ठी लिनु, जैखानोत वरा मोक अधिकार आर हुकूम दिहिले। इखान चिट्ठी ले मुई दमिशक शहर जाछिनु। १३ हे राजा! इकिसम होल कि रास्तात ठीक दुई पोहरेरखुना बेलाडार रोशनी से बड़े एकटा रोशनी आसमान से मोर आर मोर साथीलार चारो भीति चमकते देखनु। १४ यहार बाद हमरा सबकोय माटीत पोड़े गेनु। आर मुई हमसार इब्रानी भाषात मोर साथे बोलते सुननु, ‘हे शाऊल, हे शाऊल, तुई मोक क्याँ सताछिस? तुई मोर खिलाफ लड़े, काँटालात लात मरवार काम करछिस।’ १५ मुई कोहनु, ‘हे

प्रभु! तुई के छिस?’ प्रभु कोहले, ‘मुई यीशु छी, जहाक तुई सताछिस।
१६ मगर अला तुई उठेक आर अपना पाँत थाड़ो हंय जा। मुई तोक दर्शन
दिनु कि तुई प्रचारक बने उला सबलार बारे लोकोक बताबो, जैला तुई
देखछिस आर तोक दर्शन दे बताम। १७ आर मुई तोक तोर अपना
लोकला से आर दोसरा लोक से बचाते रोहमु। मुई उला लोकेर लिकिन
तोक पठाछी १८ जसे कि तुई उसार आँखला खोले दिस, आर वरा
अंधकार से उजालार भीति आर शैतानेर अधिकार से छुटे परमेश्वरेर
भीति घुरे आर पापेर माफी पाय। आर जैला लोक मोर पर विश्वास करे
धर्मी बनिहे, उसार साथे वरा गिना जाबे।’ १९ वहीलाते हे राजा अग्रिपा!
मुई स्वर्गेर उडा दर्शनेर बातोक नी ठोकरानु। २० आर प्रचार करवार तने
चले गेनु। सबसे पहिले दमिशक शहरेर लोकोक प्रचार करनु, फेर
यरूशलेम शहरेर लोकोक आर वहार बाद यहूदिया इलाकार सबला
लोकोक प्रचार करनु आर वहार बाद गैर-यहूदी लोकोक बताते रोहनु कि
वरा पाप से मन बदली करे आर परमेश्वरेर लिकिन घुरे ओसे, आर मन
बदली करवार लायक काम करे। २१ यहीला बातेर चलते यहूदी लोक
मोक मन्दिरोत धरे जान से मारे फिकवार कोशिश करछिले। २२ मगर
परमेश्वरेर मदद से मुई आजतक जिन्दा छी आर छोटो-बोड़ो सभारो
आगुत उला बातोक बोलछी, जैला बातोक पूरा हवार बारे मूसा नबी
आर दोसराला नबीव कोहिले। उला बातोक छोड़े मुई आर कोय दोसरा

बात नी बोलछी। २३ वरा कोहिले कि यीशु मसीहाक दुःख उठवा होबे, आर वहीं सबसे पहिले मुर्दा से जिन्दा हंय उठबे, आर यहूदी आर गैर-यहूदी लोकोक बोलबे कि रोशनी तुमसार बीचोत ओसिहे, आर इडा रोशनी तुमसाक बचाबे।” २४ जैखुना पौलुस इकिसम करे जवाब दिछिले, त फेस्तुस राजपाल जोर से बोलिल, “हे पौलुस! तुई पगला हंय गहिस। बेसी ज्ञान तोक पगला बनाय दिहे।” २५ मगर पौलुस कोहले, “हे श्रीमान फेस्तुस! मुई पगला नी छी। मुई जैला बात बोलछी, उला सच छे आर सोचे-समझे बोलछी। २६ जे राजार आगुत मुई हिम्मत से बोलछी, वहाँव इला बातोक जाने, आर मोक विश्वास छे कि इला बातेर अंदर से कोयला बात वहा से नुकाल नी छे क्योंकि इला घटना कोय कोनात नी घटियेह।” २७ वहार बाद पौलुस राजा अग्रिपार भीति घुरे कोहले, “हे राजा अग्रिपा! तुई की नबी लोकेर बातलाक विश्वास करछिस? हाँ, मुई जानी कि तुई विश्वास करछिस।” २८ राजा अग्रिपा पौलुसोक कोहले, “तुई मोक थोड़केत इसाई बनवा चाहचिस?” २९ पौलुस राजाक जवाब दिले, “थोड़कोत होक या बेसी। मगर परमेश्वरेर लिकिन मोर इडा प्रार्थना छे कि सिरिफ तुहें नी, मगर जताला लोक आज मोर बात सुनछे, वराव मोर मान्दी यीशुर विश्वासी बने जाय। सिरिफ मुई चाहची कि कोय मोर मान्दी कैदी ना बने।” ३० पौलुसेर बोलवार बाद राजा अग्रिपा, बिरनीके आर हाकिमला आर

उसार साथे जतेला लोक बोठे छिले, सबकोय उठे थाड़ी होल, ^{३१} आर बाहर निकले अपना बीचोत कहवा लागिल, “इडा लोक त इकिसम कुछु नी करे, जहार चलते यहाक मौतेर सजई या जेलोत देयाल जाय।” ^{३२} राजा अग्रिपा फेस्तुस राजपालोक कोहले, “अगर इडा लोक महाराजार लिकिन बिनती नी करिलतेन, त छुटे जवा पारिलतेन।”

पौलुस रोम नगर जाछे

२७ यूलियुस नामेर एकइन लोक औगुस्तुस सैनिक दलेर एकइन हाकिम छिले। जैखुना फेस्तुस राजपाल तय करिल कि हमसाक पानी जहाजोत चढ़े इटली देशेर रोम शहरोत जाना छे, त जेलेर हाकिमला पौलुसोक आर दोसराला कैदीक यूलियुस हाकिमेर हाथोत सोंपे दिले। ^२ आर अदरमतियुस शहरेर एकखान जहाज लगाल छिले, जैखान आसिया प्रदेशेर समुन्द्रेर कछारेर शहरला दे जानेवाला छिले। हमरा उखान जहाजोत चोढ़े गेनु। मकिदोनिया प्रदेशेर थिसलुनिकी शहरेर अरिस्तरखुस हमसार साथे छिले। ^३ दोसरा दिन हमसार जहाज सैदा शहरोत थामिल। यूलियुस हाकिम पौलुसेर पर दया करिल आर वहाक वहार दोस-बन्धुलार लिकिन जवार अनुमति दिले जसे कि वरा पौलुसोक वहार जरूरतेर जिनिस दुवा पारे। ^४ हवा उल्टा भीति बहवार कारण से हमरा सैदा से साइप्रस टापूर ओलते-ओलते जवा लागनु।

५ हमरा किलिकिया आर पंफुलिया प्रदेशेर बगलेर समुन्द्र पार करे लुसिया एलाकार मुरा शहरोत पहुँचिनु। ६ इठिन यूलियुस हाकिमोक सिकन्दिरियार एकखान पानी जहाज मिलिल, जैखान इटली देश जाछिले। वहीलाते यूलियुस हाकिम हमसाक उखानोत चढ़ाय दिले। ७ हमरा बहुत दिन तक आस्ते-आस्ते जाते-जाते बहुत तकलीफेर साथे कनिदुस शहरेर बगलोत पहुँचिनु। हवाखान हमसाक आगु बढ़वा नी दिछिले। वहीलाते हमरा सलमोन शहरेर आगुपाके आर क्रेत टापूर ओलते-ओलते गेनु। ८ क्रेत टापूर बगले-बगले बहुत मुशिकल से जाते-जाते एकखान जहाजघाटीत पहुँचनु, जैखान जहाजघाटीर नाम “सुंदर जहाजघाटी।” उठिन से लसया शहर बगलते छिले। ९ जाते-जाते बहुत दिन बिते गेल। यहूदी लोकेर “पाप-माफीर दिनेर” परब खतम हंय गहिले आर जाड़ेर समय शुरू हंय गहिले। जाड़ार समय पानी जहाज दे सफर करना बहुत खतरार काम छिले। वहीलाते पौलुस जहाजेर लोकलाक समझाय-बुझाय कोहले, १० “भईला! सुनो। मोक मालूम होचे कि हमसार इडा सफरोत खोब खतरा आर नोकसान छे। नोकसान सिरिफ सामानलार आर जहाजखानेर नी, मगर हमसार जानेर खतरा छे।” ११ यूलियुस हाकिम पौलुसेर बात नी धरे जहाजेर कप्तानेर आर जहाजेर मालिकेर बात धरिल। १२ “सुन्दर जहाजघाटी” जाड़ार समय कटवार तने अच्छा नी छिले। वहीलाते जहाजेर बहुतला लोकेर बिचार

होल कि उठिन से जहाज खोले कोय मान्दी करे क्रेत टापूर फिनिक्स जहाजघाटीत जाबे आर उठिन जाड़ काटबे। इखान जहाजघाटीर दक्षिण-पश्चिम आर उत्तर-पश्चिम मुखे जहाजेर रास्ता छिले।

समुन्द्रोत बोड़ो दून उठछे

१३ जैखुना हल्का-हल्का दक्षिणा हवा बहवा लागिल, त वरा सोचिल कि वरा अला फिनिक्स पहुँचे जाबे आर उसार योजना पूरा हंय जाबे। वहीलाते वरा इठिन से जहाजखानोक खोले दिले आर क्रेत टापूर बगले-बगले जवा लागिल। १४ मगर थोड़ोक देर बाद क्रेत टापूर भीति से एकखान बोड़ो दून उठिल, जैखानोक “उतर-पूरिया” दून कहाल जाछे। १५ हवाखान अतेक तेज छिले कि हमरा जहाजखान घुरवा नी पारनु। तब हमरा जहाजखान चलवा छोड़े दिनु आर भँसवा दिनु, आर जहाजखान भँसते-भँसते जवा लागिल। १६-१७ एकखान सरगां नाव जहाजखानेर पीछू भीति बन्हाल छिले। तब हमरा कौदा नामेर एकटा छोटो टापूर बगले-बगले गेनु आर बहुत मुशिकल से नावखानोक जहाजेर पर टाने उठानु। यहार बाद लोकला जहाजखानेर नीचानेर हिस्साडाक मजबूत करवार तने रस्सी दे बान्हिल जसे कि जहाजखानेर तख्ताला अलग-अलग नी होय जाय। इडा सोचे वरा डोराय गेल कि कहीं सुरतिस नामेर बालू वाला इलाकात जहाजखान फँसे ना जाय। वहीलाते जहाजेर पालखानोक नीचान करे देयाल गेल। तहार बाद जहाजखान पानीत

बोहते-बोहते जवा लागिल। १८ जैखुना हमरा दूनखानेर बहुत धक्काखानो, त दोसरा दिन वरा जहाजेर माललाक फेकवा लागिल। १९ आर तेसरा दिन वरा अपना हाथ से जहाजेर औजारला फेके दिले। २० आर जैखुना बहुत दिन तक बेला आर तारा देखा नी दिले, आर जोर से दून चलछिले, त हमसाक इकिसम लागिल कि हमसार जान खतम हंय जाबे आर हमरा नी बचुम। २१ बहुत दिन से लोकला कुछु नी खाय। इडा देखे पौलुस उसार बीचोत थाड़ो हंय कोहले, “हे भईला! तुम्हरा अगर मोर बात माने लिलेनतन आर क्रेत टापू से जहाज नी खोललेतन, त इला तकलीफ आर नोकसान उठवा नी होलतेन। २२ मगर अला मुई तुमसाक समझाछी कि तुम्हरा हिम्मत बान्हों क्योंकि तुमसार भीतर से कहारो जान नी जाबे, सिरिफ जहाजखान खतम हंय जाबे। २३ मुई जे परमेश्वरेर लोक छी आर जहार सेवा करछी, वही परमेश्वरेर फरीस्ता रात करे मोर लिकिन ओसे कोहये, २४ ‘हे पौलुस! ना डोरा। तोक महाराजार आगुत थाड़ो होना जरूरी छे। देखेक जताला लोक तोर साथे सफर करछे, परमेश्वर तोर कारण सभाको बचाबे।’ २५ वहीलाते हे भईला! हिम्मत बान्हों। मुई परमेश्वर पर विश्वास करछी कि जैकिसम वहाँय मोक कहय, ठीक वही किसम होबे। २६ मगर हमसार जहाज कोय टापूत जाय थमे जाबे।” २७ चौदह रातेर रातोत हमरा जैखुना आद्रिया समुन्द्रोत भटके बेड़ाछिनो, जहाजेर चालकला आध रातेरखुना

उसाक लागिल कि वरा कोय सुखना जगहोर बगलोत पहुँचनेवाला छे।
२८ वरा पानीखानेर थाह ले १२० फूट गहिरा पानी पाले। कुछ देर बाद
पानीखानोक फेर नापिल त ९० फूट पानी पाले। २९ हमरा इडा समझे
डोराय गेनु कि कहीं हमसार जहाजखान चट्टान से ना टकराय जाय,
वहीलाते जहाजखानेर पीछू भीतकार चारखान लंगर गिराय दिले आर
जल्दी बेहान हवार तने प्रार्थना करवा लागिल। ३० मगर जहाजेर
चालकला जहाजखान छोड़े भगवा चाहचिले, आर इडा सोचे वरा
जहाजखानेर माथार लिकिन जाय लंगर गिरवार बहाना करिल। मगर
वरा जहाजेर पर रखाल सरगां नावखानोक रस्सी से समुन्द्रोत नभाय
दिहिले। ३१ पौलुस इला देखे यूलियुस हाकिम आर सैनिकलाक कोहले,
“अगर जहाजेर चालकला जहाजखानेर पर नी रोहय, त हमरा नी
बचुम।” ३२ वहीलाते सैनिकला नावखानेर रस्सीला काटे नावखानोक
पानीत छोड़े दिले। ३३-३४ भोर पोहरे पौलुस सभाको कुछ खवार तने
बिनती करिल आर कोहले, “तुम्हरा कुछ खाय लव क्योंकि तुम्हरा
चौदह दिन से भूखाय छेन। तुम्हरा कुछ खाय लव जसे कि तुम्हरा बचे
रहेन। तुम्हरा ना घबराव क्योंकि मुई जानी कि तुमसार कुछ नी होबे।”
३५ इडा बात कहय पौलुस रूटी ले सभारो आगुत परमेश्वरेर शुकुरिया
करिल आर भाँगे खवा लागिल। ३६ तब सबकोय वहार बातला से
हिम्मत पाले आर खाले। ३७ हमरा सबकोय जहाजखानोत दुई सौ

छियत्तरङ्गन छिनु। ३८ खाय-दाय सभारो पेट भरे गेल, तब वरा जहाजखानोक हल्का करवार तने गहमलाक जहाजखान से फेकवा लागिल। ३९ बेहाने वरा जगहखानोक चिन्हवा नी पाले। समुन्द्र से सटाल थोड़ोक दूरोत वरा एकटा घाट देखिल। वरा तय करिल कि यहीखान जगहोत जहाजखान लगाय दी। ४० तब वरा लंगरलार रस्सीला काटे समुन्द्रोत छोड़े दिले आर साथे-साथे पतवालेर बानलाक ढील करे दिले। वरा जहाजेर माथाडार भीति पाल बान्हे दिले आर कछारेर भीति जवा लागिल। ४१ मगर जहाजखान बालूत टकराय फँसे गेल आर माथाडा धक्का खाय बालूत गड़े गेल आर हिलडोल करवा नी पारिल। मगर जहाजखानेर पीछूकार हिस्साडा तेज ढ्योँयेर धक्का खाय भाँगवा लागिल। ४२ इला देखे सैनिकला सोचिल कि कैदीलाक जान से मारे देयाल जाक जसे कि वरा हेले भगवा नी पारे। ४३ मगर यूलियुस हाकिम पौलुसोक बचवा चाहचिले। वहीलाते वहाँय उसाक इकिसम करवा नी दिले आर कोहले कि जहाँय हेलवा पारछे, वरा पहिले कुद्दे नाभे जाक। ४४ आर बाँकीला लोक जहाजेर तख्ता नी त कुन्हों कुछु धरे डाँगित उठोक। इकिसम करे सबकोय डाँगित उठे बचे गेल।

पौलुस माल्टा टापूत

२८ जैखुना हमरा सही-सलामत कछारोत पहुँचनु, त हमसाक मालूम होल कि इडा टापूर नाम माल्टा छे। २ उखुना पानी पोरछिले आर हमसाक ठण्डा लागिहिले। उठिनकार लोकला हमसाक स्वागत करे हमसार तने आगिन जलाल। इकिसम करे लोकला हमसार पर बहुत मेहरवानी करिल। ३ जैखुना पौलुस लकड़ीर एकटा बझा आने आगिनखानोत दिले, आगिनेर आँच पाय एकटा जहरीला साँप निकलिल आर पौलुसेर हाथखानोत कमराय धरे लिले। ४ जैखुना उठिनकार लोकला देखिल कि साँपटा वहार हाथखानोत कमराय धरे छे, त अपना बीचोत कोहले, “सचमुच इडा लोक खूनी छे। यहाँय त अला समुन्द्रोत मौत से बचे गेल, मगर यहाँय अपना कसुरे कारण मोरे जाबे।” ५ तब पौलुस साँपटाक आगिनखानोत झिटकाय फेके दिले, आर वहार कोय नुकसान नी होल। ६ मगर लोकला सोचेछिल कि वहार हाथखान फूले जाबे, नी त चकराय पोड़े मोरे जाबे। वरा वहाक बहुतखुन से देखिल, मगर वहार कुछु नी होल। इडा देखे उसार सोच बदले गेल, आर कोहले, “यहाँय कोय देवता छे।” ७ इखान जगहोर बगलोत पुबलियुस नामेर एकझन लोकेर जमीन छिले। यहाँय उडा टापूर लोकलार नेता छिले। वहाँय हमसाक अपना घरोत ले गेल, आर तीन दिन तक हमसाक अपना मेहमानेर मान्दी राखिल। ८ पुबलियुसेर

बाफोक बुखार आर गरम-दस्त हंय गहिले। पौलुस घरेर भीतरोत गेल आर वहार तने प्रार्थना करिल, आर वहार पर अपना हाथ राखे वहाक अच्छा करिल। ९ इडा देखे उडा टापूर दोसराला बेमार लोकलाव वहार लिकिन ओसिल आर पौलुस उसाक अच्छा करिल। १० लोकला हमसार बहुत खातिर-मानिन करिल। जैखुना हमरा जवार तने तैयार छिनु, त लोकला हमसार रास्तार तने जरूरतेर सामान आने जहाजेर पर राखे दिले।

पौलुस माल्टा टापू से रोम शहर जाछे

११ तीन महीना बाद हमरा सिकन्दरिया नगरेर एकखान जहाजोत चढ़े रवाना हंय गेनु। इखान जहाज पूरा जाड़ेर समय यहीडा टापूत छिले। इखान जहाजेर माथाडात दुईझन देवता केस्टर आर पौलुक्सेर मूर्ति छिले। १२ सूरकोसोत पहुँचवार बाद हमरा उठिन तीन दिन रोहनु। १३ इठिन से हमरा रेगियुस नामेर एकखान जगहोत पहुँचनु। आर एक दिन बाद दक्षिणा हवा चलिल आर उठिन से चलनू आर तेसरा दिन हमरा पुतिबुलित ओसनो। १४-१५ उठिन हमसाक कुछु इसाई भईला मिलिल। वरा हमसाक रहवार तने जिद करिल आर हमरा उठिन उसार साथे सात दिन रोहनु। रोम शहरेर विश्वासी भा-बहिनला +हमसार खबर पाय हमसार साथे मुलेकात करवार तने बहुत दूर चले अप्पियुस चौक आर तीन-सराय तक आगु बढ़ान ओसिल। उसाक देखे पौलुस

हिम्मत पाले आर परमेश्वरेर शुकुरिया करिल। आर इकिसम करे हमरा रोम शहरोत पहुँचनु। १६ जैखुना हमरा रोम शहर पहुँचनु, पौलुसोक आखले आपने रहवार अनुमति मिलिल आर वहार पर पहाड़ा दुवार तने एकटा सैनिक तैनात कराल गेल। १७ तीन दिन बाद, पौलुस उठिनकार यहूदी लोकेर अगुवालाक जाब दिले। जैखुना वरा जोड़ो होल, उखुना पौलुस उसाक कोहले, “हे भईला! मुई ना त अपना लोकलार खिलाफ आर ना अपना बाप-दादोर रीति-रेवाजेर खिलाफ कोय कसूर करिही। यहारो पर यरूशलेम से मोक कैदी बनाय रोमी लोकेर हाथोत सोंपे देयाल गहे। १८ रोमी हाकिमला मोक पूछ-ताछ करे छोड़े दुवा चाहचिले, क्याँकि मौतेर सजईर दुवार लायक मोर कोय कसूर नी छिले। १९ मगर यहूदी लोक उसाक मना करे दिले। वहीलाते मुई बिनती करनु कि मोर बिचार महाराजार लिकिन होबे। इडा नी कि मुई अपना लोकलार पर कोय दोष लगवा ओसिही। २० मगर मुई तुमसार साथे मुलाकात करवा चाहचिनु आर तुमसाक बोलवा चाहची कि क्याँ मोक इठिन कैदी बनाय पठाल गहे। कारण, मुई विश्वास करछी कि इजराएल लोकेर मसीहा चले ओसिहे, जहार तने वरा इन्तेजार करछिले।” २१ लोकला पौलुसोक कोहले, “हमरा ना त यहूदिया प्रदेश से तोर बारे कोय चिठ्ठी पाही आर ना उठिनकार यहूदी भईलार भीतर से कोय ओसे कुछु खराब बात बोलिहे। २२ मगर हमरा तोर लिकिन से सुनवा चाहची कि तुई यीशुर

शिक्षार बारे कि कहवा चाहचिस? इडा शिक्षार खिलाफ लोक सबठिन बोलछे।” २३ यहार बाद वरा पौलुसेर साथे बात करवार तने एकटा दिन ठीक करिल। जैठिन वहाँय रोहछिले, उठिन बहुतला लोक जोड़ो होल। आर पौलुस उसाक बतवा शुरू करिल कि कुन किसम करे परमेश्वर अपना लोकलार पर शासन करबे। वहाँय मूसा नबीर नियम आर दोसराला नबीर किताब से यीशु मसीहार बारे बेहान से शाम तक समझाते रोहोल। २४ तब बहुतझन लोक वहार बातला माने विश्वास करिल, मगर कुछला लोक विश्वास नी करिल। २५ उसार बीचोत एक मत नी छिले आर लोकला जवा लागिल। इडा देखे पौलुस बोलवा लागिल, “पवित्र आत्मा यशायाह नबीर जरियाय तुमसार बाप-दादोलाक एकदम सच बताहे, यशायाह! जा आर इला लोकोक बता, २६ ‘तुम्हरा सुनते त रोहभेन, मगर नी समझिभेन, आर देखते त रोहभेन, मगर बुझवा नी पारभेन। २७ क्योंकि इला लोकेर दिल कठोर आर कानला बहिरा हंय गहे, आर वरा अपना आँखला मुने लिहे। जसे कि वरा आँख दे ना देखे आर कान दे ना सुने, आर मन दे ना समझे आर मोर लिकिन घुरे ना ओसे, आर मुई उसाक अच्छा नी करी।’ २८ क्योंकि तुम्हरा इकिसम करे परमेश्वरेर वचनोक इन्कार करछेन, वहीलाते मुई तुमसाक कोहची कि परमेश्वरेर मुक्तिर खुश-खबरी गैर-यहूदी लोकेर लिकिन पठाल गहे, आर वरा इडा ग्रहण करछे।” २९ [जैखुना पौलुस

इडा बात कोहले, त यहूदी लोकला अपनार बीचोत बहुत बहस करवा लागिल, आर उठिन से चले गेल।] ३० पौलुस पूरा दुई साल अपना भारार घरोत रोहिल। आर जैला लोक वहार लिकिन ओसछिले, उसार साथे मुलेकात करते रोहछिले, ३१ आर बिना कोय रोक-टोक बहुत हिम्मत से परमेश्वरेर राजेर प्रचार करते रोहोल, आर प्रभु यीशु मसीहार बारे सिखाते रोहोल।

रोम शहरेर मंडलीक पौलुसेर चिट्ठी

१ ८मुई पौलुस, यीशु मसीहार सेवक छी। मुई इखान चिट्ठीक लिखछी। परमेश्वर मोक मसीहार दूत हवार तने बुलाहे, आर वहार उ-
खुश-खबरीर प्रचार करवार तने चुने लिहे, २ जे खुश-खबरीर बारे परमेश्वर अपना नबीलार जरियाय पवित्र शास्त्रोत आगुते बताहिले।
३ इडा खुश-खबरी परमेश्वरेर बेटा हमसार प्रभु यीशु मसीहार बारे छे। वहाँय मानुष रूपोत दाऊद राजार खानदानेर छिले। ४ मगर पवित्र आत्मा साबित करिल कि यीशु परमेश्वरेर शक्तिशाली बेटा छे क्योंकि वहाँय मौत से जिन्दा हंय उठिल। ५ वहारे जरियाय आर वहार नामेर महिमार तने हमरा परमेश्वरेर दया आर मसीह-दूत हवार पद पाही, जसे कि सब देशेर लोक वहार पर विश्वास करे आर वहार हुकूम माने। ६ आर तुम्हराव उसारे बीच से छेन आर तुमसाक यीशु मसीहार लोक हवार तने बुलाल गहे। ७ रोम शहरेर जैला लोकोक परमेश्वर प्रेम करछे, आर परमेश्वर उसाक अपना पवित्र लोक हवार तने बुलाहे। वहीला लोकेर लिकिन मुई इखान चिट्ठी लिखछी। हमसार पिता परमेश्वर आर प्रभु यीशु मसीहा तुमसार पर दया करोक आर शान्ति दोक।

रोम शहर जवार पौलुसेर इच्छा

८ सबसे पहिले मुई यीशु मसीहार जरियाय तुमसार सभारो तने अपना परमेश्वरेर शुकुरिया करछी, क्योंकि तुमसार विश्वासेर बात दुनियाँर सब जगहोत फैले गहे। ९ मुई परमेश्वरेर सेवा पूरा दिल से करछी। मुई वहार बेटा यीशु मसीहार खुश-खबरीर प्रचार करछी। वही परमेश्वर मोर गवाह छे कि मुई लगातार अपना प्रार्थनात तुमसाक याद करछी। १० मुई परमेश्वरेर लिकिन प्रार्थना करछी। परमेश्वरेर इच्छा होले मुई कोय किसम करे इडा बार तुमसार लिकिन ओसवा पारी। ११ मुई तुमसाक देखवार तने बेचैन छी, क्योंकि मुई तुमसाक कुछ आत्मिक दान दुवा चाहची जसे कि तुमसार विश्वासटाक मजबूत करवा पारी। १२ यहार मकसद इडा छे कि हमरा सबकोय एक-दोसराझनाक विश्वासेर जरियाय हिम्मत दुवा पारी। १३ हे भा-बहिनला! मुई चाहची कि तुम्हरा इडा जाने लव कि तुमसार लिकिन जवार तने बहुत बार इच्छा करनु, मगर बाधा ओसते गेल। दोसराला जगहोत गैर-यहूदी लोकलार बीचोत जैकिसम फल मिलिहे, ठीक वही मान्दी तुमसारो भीतरोत कुछ फल पावार उम्मेद ले मुई तुमसार लिकिन जवा चाहची। १४ मुई यूनानी लोक, आर गैर-यूनानी लोक, पढ़ा-लिखा आर अनपढ़, सभारो लिकिन खुश-खबरीर प्रचार करवार तने कर्जदार छी। १५ वहीलाते तुम्हरा जहाँय रोम

શહરોત છેન, તુમસારો લિકિન યીશુ મસીહાર બારે ખુશ-ખબરીર પ્રચાર કરવાર તને મોર બહુત ઇચ્છા છે।

ખુશ-ખબરીર શક્તિ

૧૬ યીશુ મસીહાર બારે જૈડા ખુશ-ખબરી છે, ઇડા સે મોક કોય શરમ ની છે, ક્યાંકિ ઇડા ખુશ-ખબરી પરમેશ્વરેર શક્તિ છે, જહાર જરિયાય વહાંય સબ વિશ્વાસ કરનેવાલાક પાપ સે આજાદ કરછે। પહિલે યહૂદી લોકોક, આર ફેર ગૈર-યહૂદી લોકોક। ૧૭ પરમેશ્વર કુન કિસમ કરે માનુષોક ધર્મી સમઝે ગ્રહણ કરછે, યહીડા બાતોક ખુશ-ખબરીર જરિયાય બતાલ ગહે। શુરૂ સે આખરી તક સિરિફ વિશ્વાસેર જરિયાય પરમેશ્વર માનુષોક ધર્મી સમઝે ગ્રહણ કરછે। પરમેશ્વરેર વચનોત લિખાલ છે, “જહાંય વિશ્વાસ સે ધર્મી ઠહરિબે, વહાંય જિન્દા રોહબે।”

માનુષેર પાપ

૧૮ માનુષ પરમેશ્વરેર સચ્ચાઈડાક અપના ખરાબ કામ દે ઝાપે રાખછે। વહીલાતે પરમેશ્વરેર ગોસ્સા સ્વર્ગ સે ઉલા માનુષેર પર દખા દિછે, જૈલા પરમેશ્વરેર ભક્તિ ની કરછે આર સબ કિસમેર પાપેર કામ કરછે। ૧૯ ક્યાંકિ જતાલા બાત પરમેશ્વરેર બારે જનાલ ગેલતેન, ઉલા સબલા પરમેશ્વર ઉસાક દેખાય દિહે। ૨૦ જબ સે દુનિયાંડાક પરમેશ્વર બનાહે, તબ સે પરમેશ્વરેર હમેશા રહનેવાલા શક્તિ આર વહાર ગુણ સાફ-સાફ

देखा दिहे, जैलाक आँख दे देखाल नी जाछे। परमेश्वर दुनियाँडात जैला चीज बनाहे, उला से लोक बुझवा पारछे। वहीलाते लोकेर लिकिन बहना बाजी करवार कोय उपाय नी छे। २१ क्याँकि वरा परमेश्वरोक जनवार बादो, परमेश्वरोक परमेश्वर समझे वहार बड़ाई नी करले आर ना वहार शुकुरिया करले। बल्के वरा बेकार सोच-बिचार करवा लागिल आर उसार बुद्धिहीन दिलला अन्हार हंय गेल। २२ वरा अपना-आपोक बुद्धिमान समझे बेकूफ बने गहे। २३ आर वरा अविनाशी परमेश्वरेर महिमाक नाशमान मानुष, चिड़िया, जानवर, आर पेट दे चलनेवाला जीव-जन्तुर मूर्ति बनाय बदले दिहे। २४ वहीलाते परमेश्वर लोकोक उसारे दिलेर लोभ-लालसार मुताबिक गंदा आर खराब काम करवार तने छोड़े दिहे जसे कि वरा आपसोत गंदा काम करे अपना बदनडार बेज्जती करे। २५ परमेश्वरेर सच्चाईक छोड़े दे वरा झूठा बातोत विश्वास करछे। वरा सृजनहार परमेश्वरोक छोड़े दे, परमेश्वरेर बनाल चीजलार भक्ति करछे, मगर परमेश्वरेर नी करछे, जहाँय कि हमेशा धन्यवादेर लायक छे। २६ मानुषेर इला कामेर कारण परमेश्वर उसाक शरमिन्दा हवार कामोत छोड़े दिहे। स्त्रीर जैडा बदनेर रिस्ता पुरुषेर साथे हवा लागे, उडा रिस्ताक छोड़े दे, दोसरा स्त्री लोकेर साथे खराब काम करछे। २७ वही किसम पुरुषेर बदनेर रिस्ता स्त्रीर साथे जैकिसम हवा लागे, उकिसम रिस्ता छोड़े दे, वरा दोसरा पुरुषेर साथे शरमिन्दार खराब काम करछे।

वहीलाते उसार अपना खराब कामेर सजई मिलिहे। २८ इकिसम करे मानुष जब परमेश्वरोक मनवा नी चाहले, परमेश्वरो उसार निकम्मा मनेर इच्छार पर छोड़े दिहे, जसे कि वरा अनर्थ काम करते रहे। २९ सब किसमेर नाजायज, बुराई, लोभ, गंदा काम, हिंसा, हत्या, मारपीट, ठगना, दोसराझनार नुकसान करवार बुरा इच्छा से वरा भराल छे। ३० वरा दोसराझनार शिकायत करछे, आर परमेश्वरेर अपमान करछे। वरा गोस्सावाला, घमंडी आर अपना-आपोक बोड़ो समझनेवाला छे। नियमेर खिलाफ काम करवार तने वरा नाना प्रकारेर उपाय करछे। वरा माँ-बाफेर हुकूम नी मानछे। ३१ अच्छा-खरापेर बारे ज्ञान नी छे। विश्वास करवार लायक नी छे। अपना परिवारेर तने उसार प्रेम नी छे आर उसार दिलोत दया-मया एकदम नी छे। ३२ परमेश्वरेर बिचारेर बारे वरा अच्छा करे जाने कि इकिसम काम करनेवाला मौतेर सजईर लायक छे। इकिसम बात जाने सुनेव, वरा इला काम सिरिफ आपने नी करछे, बल्के दोसराझनाको इकिसम काम करवार तने उसकाछे।

दोष लगानेवालाक चेतावनी

२ भा-बहिनला, तुम्हरा जहाँय लोकेर पर दोष लगाछेन! तुम्हरा कोय भी होव। तुम्हरा नी बचभेन। तुम्हरा दोसरा लोकेर इन्साफ करछेन आर दोष लगाछेन। जैडा बातेर बारे लोकेर पर दोष लगाछेन, तुम्हरा खुद

अपना-आपोक दोषी बनाछेन। कारण, जैडा दोष तुम्हरा दोसराझनार पर लगाछेन, वहीला काम तुम्हराव करछेन। २ हमरा जानी कि इकिसम काम करनेवालार पर परमेश्वरेर सजा ठीक-ठीक पोरेछे। ३ भईला! तुम्हरा जे इकिसम काम करनेवालार पर दोष लगाछेन, तुम्हरा त खुद इकिसम काम करछिस। तुम्हरा इकिसम समझेछेन कि तुम्हरा परमेश्वरेर सजा से बचे जाभेन? नी बचभेन। ४ या तुम्हरा की परमेश्वरेर दया, आर वहार बर्दास्त करवार शक्ति आर सहवार शक्तिक तुच्छ समझेछेन? आर इडा नी समझेछेन कि परमेश्वरेर दया तुमसाक पाप से मन बदली करवार मौका दिछे। ५ मगर अपना सक्कत आर जिद्दी मनेर कारण से तुम्हरा पाप से अपना मन बदली करवा नी चाहचेन। वहीलाते जैदिना परमेश्वरेर गुस्सा प्रकट होबे, उदिनकार तने त तुम्हरा अपना सजा जमा करे राखछेन। वहीडा समय परमेश्वरेर सच्चा इन्साफ जाहिर होबे।

परमेश्वरेर इन्साफ

६ परमेश्वर हरेकझनाक वहार कामेर मुताबिक फल दिबे। ७ जहाँय अच्छा काम करते रोहचे, आर परमेश्वरेर लिकिन से इज्जत, बड़ाई, आर हमेशार जिन्दगी पवा चाहचे, परमेश्वर उसाके हमेशार जिन्दगी दिबे। ८ मगर जहाँय झगड़ा करनेवाला छे आर सच्चाईक नी मानछे, अधर्मोत जीवन बिताछे, परमेश्वर उसार पर खोब गोस्सा करबे आर

उसाक सजई दिबे। ९ आर जैला लोक बुराई करते रोहचे, उसार हरेकझनार पर बिपत्ति आर मुसीबत ओसबे, पहिले यहूदी लोकेर पर, वहार बाद गैर-यहूदी लोकेरो पर। १० आर जैला लोक भलाई करछे, वरा महिमा, इज्जत, आर शान्ति पाबे: पहिले यहूदी लोकेर पर, वहार बाद गैर-यहूदी लोकेरो पर। ११ यहा से मालूम होचे कि परमेश्वरेर नजरोत सबकोय बराबर छे। १२ जैला लोकेर लिकिन मूसा नबीर नियम-कानून नी छे आर पाप करछे, वरा बिना नियम-कानूनेर नाश होबे, मगर जैला लोक नियम-कानून पाहे आर पाप करछे, उसार सजई नियम-कानूनेर मुताबिक होबे। १३ क्याँकि परमेश्वरेर नजरोत नियम-कानूनेर सुननेवाला धर्मी नी ठहरेछे, बल्के नियम-कानूनेर पर चलनेवाला धर्मी ठहरेछे। १४ तब गैर-यहूदी लोक जहार लिकिन नियम-कानून नी छे, वरा अगर अपना दिल से नियम-कानूनेर मुताबिक चलछे, त उसार लिकिन नियम-कानून नी होलेव, वरा खुद अपनार तने नियम-कानून छे। १५ वरा नियम-कानूनेर बातोक अपना दिलोत लिखाल समझेछे, आर उसार दिलडाव यहीडा गवाही दिछे। उसार दिलडा कोयखुना दोषी करछे, आर कोयखुना बेकसूर बताछे। १६ मुई इडा प्रचार करछी कि उडा दिन ओसछे, जब परमेश्वर मसीहा यीशुर जरियाय लोकेर छुपाल सोच-बिचारेर इन्साफ करबे।

नियम-कानून आर यहूदी लोक

१७ तुम्हरा अपना-आपोक यहूदी कोहचेन आर नियम-कानूनेर पर भरोसा राखछेन, आर परमेश्वरेर बारे घमंड करछेन। १८ आर परमेश्वरेर इच्छाक जानेन आर नियम-कानूनेर शिक्षा से सिखाल गहेन। १९ तुम्हरा अपना-आपेर पर भरोसा करछेन कि हमरा काना लोकोक रास्ता दिखानेवाला आर अन्हारोत पोड़े रहनेवाला लोकेर रोशनी छी। २० तुम्हरा समझेछेन कि तुम्हरा बुद्धिहीन लोकोक शिक्षा देनेवाला आर छुवालाक उपदेश देनेवाला छेन, आर कोहचेन कि हमसाक पूरा ज्ञान आर सच्चाई मिले गहे। २१ तुम्हरा दोसरा लोकोक सिखाछेन, मगर अपना-आपोक सिखवा नी पारछेन। तुम्हरा प्रचार करछेन कि चूरी नी करवा लागे, मगर तुम्हरा त खुद चूरी करछेन। २२ तुम्हरा कोहचेन, कुकरम ना करेन, मगर तुम्हरा त खुद कुकरम करछेन। तुम्हरा मूर्तिलाक घिण करछेन, मगर तुम्हरा त उसार मंदिरलाक लूटेछेन। २३ तुम्हरा जहाँय नियम-कानून जनवार कारण से घमंड करछेन, तुम्हरा त खुद नियम-कानूनोक भाँगे परमेश्वरेर अपमान करछेन। २४ परमेश्वरेर शास्त्रोत इडा बात लिखाल छे, “क्योंकि तुमसारे चलते गैर-यहूदी लोक परमेश्वरेर नामेर अपमान करछे।” २५ तुम्हरा अगर नियम-कानून माने चलछेन, त सुन्नत करवार पैदा छे। मगर अगर तुम्हरा नियम-कानून नी मानछेन, त सुन्नत करलेव परमेश्वरेर नजरोत तुम्हरा उला लोकेर मान्दी छेन, जैला लोक सुन्नत नी

કરછે। ૨૬ વહીલાતે અગર કોય લોક સુન્નત કરાલ ની છે આર વહાંય નિયમ-કાનૂન માને ચલછે ત પરમેશ્વર વહાક સુન્નત કરાલ લોકેર માન્દી ગ્રહણ કરબે ૨૭ તુમસાર લિકિન ત લિખાલ નિયમ-કાનૂન છે, આર તુમ્હરા સુન્નત કરાલ લોક છેન, તાહરો પર તુમ્હરા નિયમ-કાનૂન ની માનછેન। મગર જૈલા લોક બિના સુન્નતવાલા છે, આર નિયમ-કાનૂન માને ચલછે, ત વરા તુમસાક દોષી ઠહરાબે। ૨૮ સિરિફ બાહરી દેખાવટીર તને જહાંય યહૂદી છે, વહાંય અસલી યહૂદી ની છે। બાહરી દેખાવટીર તને જહાંય બદનડાર સુન્નત કરછે, ડડા અસલી સુન્નત ની છે। ૨૯ મગર જહાર દિલડાર સુન્નત હંય ગહે, વહીં અસલી યહૂદી છે। અસલી સુન્નતેર કામ દિલેર ખીતરોત હોચે। અસલી સુન્નત સિરિફ નિયમ-કાનૂન માનલે ની હોચે, બલ્કે પરમેશ્વર આત્મા દિલેર ખીતરો અસલી સુન્નત કરછે। અસલી સુન્નતવાલા લોક પરમેશ્વરેર લિકિન સે શાબાસી ચાહચે, કોય માનુષેર લિકિન સે શાબાસી ની ચાહચે।

પરમેશ્વર ખરોસા કરવાર લાયક છે

૩ યહૂદી લોક હવાર કિ લાભ છે? યા સુન્નત કરવાર કિ લાભ છે?
૧ સબ પાકે બહુત લાભ છે। સબસે પહિલે પરમેશ્વર અપના વચનેર કામ યહૂદી લોકોક સૌપિહિલે। ૨ કુછુલા લોક પરમેશ્વરેર વચનેર પર વિશ્વાસ ની કરિલ। ક્યાંકિ વરા પરમેશ્વરેર વચનેર પર વિશ્વાસ ની

करछे, त यहार की इडा मतलब छे कि परमेश्वरेर पर भरोसा कराल नी जाबे। ४ एकदम नी। सब लोक झूठ बोलनेवाला होलोव, परमेश्वर सब समय सच बोलछे। परमेश्वरेर वचनोत लिखाल छे, “तुई अपना बातोत धर्मी ठहरिबो, आर इन्साफेर समय तुई जीत हासिल करबो।” ५ अगर हमसार अधर्मेर काम से साफ-साफ देखाछे कि परमेश्वर हरखुना उचित काम करछे, त यहार बारे हमरा की बोलमु? हमरा इडा कोहमु कि परमेश्वर जैखुना हमसार पर अपना गोस्सा जाहिर करछे, त उखुना वहाँय की हमसार साथे गलत इन्साफ करछे? इडा बातोक मुई एकझन मानुष हिसाबे बोलछी। ६ वहाँय कोय पाके गलत इन्साफ नी करछे। परमेश्वर अगर सही इन्साफ नी करे त वहाँय कसे करे दुनियाँर लोकेर इन्साफ करबे? ७ तुम्हरा कोय कहवा पारेन, हमसार झूठ बोलवार कारण से अगर परमेश्वरेर सच्चाई आढ़ो अच्छा से देखाल जाछे, त यहार तने परमेश्वरेर बड़ाई होक। तब तुम्हरा पूछवा पारेन कि परमेश्वर मोक पापी कहय क्याँ दोषी करछे? ८ तुम्हरा कोय-कोय मोर बारे शिकात करछेन। तुम्हरा बोलछेन कि मुई बोलिही कि चलोव हमरा खराब काम करते रोहई, जसे कि हमसार खराब कामेर जरियाय अच्छा चीज बाहर होय। जैला लोक इला बात बोलछे, वरा सजई पवार लायक छे।

नियम-कानून धर्मी नी ठहराछे

९ अला हमरा की बोलमु? यहूदी हवार कारण से हमरा कि गैर-यहूदी लोक से अच्छा छी? एकदम नी छी! मुई आगुते कहय दिही कि यहूदी आर गैर-यहूदी पापेर शक्तिर अधिकारोत छे। १० परमेश्वरेर वचन इकिसम कोहचे, कोय धर्मी नी छे, एकोझन नी। ११ कोय नी समझेछे, ना कोय परमेश्वरेर खोज करछे। १२ सबकोय परमेश्वरोक छोड़े दिहे। सबकोय एक साथे खराब हंय गहे। अच्छा काम करनेवाला कोय नी छे। एकोझन नी छे। १३ उसार मुखला खोला कबरेर मान्दी छे, जहार भीतर से बदबू निकलेछे। उसार जीभाला झूठ बातचीत से भराल छे। वरा जे कुछु कोहचे, उलार भीतरोत साँपेर विष रोहचे। १४ वरा अपना मुख से लोकोक श्राप दिछे आर उसार सबला बात लोकोक तीतो लागछे। १५ खून करवार तने वरा दौड़े जाछे। १६ वरा जैठिन जाछे, लोकेर बर्बादी आर नाश करछे। १७ वरा शान्तिर रास्ताक नी जाने। १८ वरा परमेश्वर से नी डोराछे। १९ हमरा इडा जानी कि मूसा नबीर नियम-कानून उसार तने छे, जहाँय उला नियम-कानूनेर अधिकारोत रोहचे। वहीलाते चाहे यहूदी होक या गैर-यहूदी, कहारो कुछु बोलवार नी छे, आर परमेश्वर दुनियाँर सब लोकेर इन्साफ करबे। २० वहीलाते नियम-कानूनेर कामेर जरियाय कोय लोक परमेश्वरेर नजरोत धर्मी नी ठहरिबे, मगर नियम-कानूनेर जरियाय पापेर ज्ञान होचे।

विश्वासेर जरियाय धर्मी ठहराल जाछे

२१ मगर अला परमेश्वर प्रकट करिहे कि वहाँय लोकोक नियम-कानून से हटे धर्मी ठहराछे। मूसा नबीर नियम-कानून आर नबीला इडार बारे बताहे। २२ जैला लोक यीशु मसीहार पर विश्वास करछे, परमेश्वर उसाके धर्मी माने लिछे। चाहे वहाँय यहूदी होक या गैर-यहूदी होक, परमेश्वरेर नजरोत कोय फरक नी छे। २३ क्याँकि सबकोय पाप करिहे, आर परमेश्वरेर महिमा से दूर हंय गहे। २४ मगर परमेश्वर हमसाक अपना दया से धर्मी ठहराहे, आर इखान दया दान हिसाबे मिलिहे। परमेश्वर इखान काम मसीहा यीशुर जरियाय करिहे। मसीहा यीशु हमसार पाप दूर करे पाप से आजाद करिहे। २५ परमेश्वर यीशुक पापेर तने बलिदान चढ़ाल। जैखुना मानुष विश्वास करछे कि यीशु अपना-आपोक बलि करे दिहे आर अपना खून बहाहे, त परमेश्वर उसाक धर्मी बनाछे। इडा बलिदान देखाछे कि परमेश्वर मसीहार मौतेर पहिले बर्दास्त करनेवाला छिले क्याँकि परमेश्वर अपना दयार कारण से मानुषेर पाप माफ करिल आर उला पापेर तने सजई नी दिले। २६ परमेश्वर अलकार समय अपना उचित इन्साफ करे इडा देखाहे कि वहाँय खुद धर्मी छे, आर जहाँय यीशु मसीहार पर विश्वास करछे वहाको परमेश्वर धर्मी बनाछे। २७ वहीलाते कहारो घमंड करवार कोय कारण नी छे। मानुष नियम-कानून माने चलले की वहाँय घमंड करबे? इकिसम नी। असली

बात इडा छे विश्वास करले घमंड करवार कोय गुंजाईस नी छे।
२८ वहीलाते हमरा देखछी कि लोकोक नियम-कानून माने चलवार
कारण से नी, बल्के परमेश्वर उसाक विश्वासेर जरियाय धर्मी ठहराछे।
२९ परमेश्वर कि सिरिफ यहूदी लोकेर परमेश्वर छे, गैर-यहूदी लोकेर नी
छे की? हाँ गैर-यहूदी लोकरो तने छे। ३० असल बात इडा छे कि
परमेश्वर एकेझन छे। वहाँय सुन्नत कराल लोकलाको आर बिना
सुन्नत कराल लोकलाको विश्वासेर जरियाय धर्मी ठहराछे। ३१ तब
यहार मतलब इडा छे कि विश्वासेर जरियाय हमरा नियम-कानूनलाक
कि बेकार साबित करछी, एकदम नी। बल्के विश्वासेर जरियाय नियम-
कानूनेर बातोक हमरा पूरा करछी।

इब्राहिम विश्वास से धर्मी बनछे

४ हमसार पूर्व पिता इब्राहिमेर बारे हमरा की बोलमु? परमेश्वरेर
नजरोत वहाँय केनमन करे धर्मी होल। १ कामेर जरियाय अगर
इब्राहिमोक धर्मी समझाल गेलतेन, त वहाँय घमंड करवा पारिलतेन,
मगर परमेश्वरेर आगुत वहार घमंड करवार कोय कारण नी छिले।
३ परमेश्वरेर शास्त्रोत लिखाल छे, इब्राहिम परमेश्वरेर पर विश्वास
करिल, वहीलाते परमेश्वर वहाक धर्मी समझिल। ४ जहाँय काम करे
मजदूरी पाछे, उडाक दान नी कहाल जाछे, बल्के पावना कहाल जाछे।

५ मगर जहाँय अपना कामेर पर भरोसा नी करछे, बल्के परमेश्वरेर पर विश्वास करछे, वहार विश्वासेर कारण परमेश्वर वहाक धर्मी ठहराछे। इकिसम करे परमेश्वर अधर्मी लोकोक धर्मी बनाछे। ६ दाऊद राजा यहीडा बात खुशहाल लोकेर बारे कोहचे कि जहाक परमेश्वर बिना कामेर जरियाय धर्मी ठहराछे। दाऊद राजा यहोडा कोहचे, ७ खुशहाल लोक वहाँय छे जहार कसूरोक परमेश्वर माफ करे दिहे, आर वहार पापोक झाँपे दिहे। ८ खुशहाल उला लोक छे, जहार पापेर हिसाब परमेश्वर नी लिबे। ९ इडा आशीर्वाद की सिरिफ सुन्नत कराल लोकेर बारे बोलाल गहे, ना बिना सुन्नत कराल लोकेरो तने कहाल गहे? हाँ, उसारो तने बोलाल गहे। क्योंकि परमेश्वरेर वचन मुताबिक हमरा कोहची कि इब्राहिम अपना विश्वासेर कारण से धर्मी ठहराल गहिले। १० कुन हालतोत वहाक धर्मी ठहराल गहिले? वहार सुन्नत करवार आगुत या पाछूत? सुन्नत करवार आगुते वहाक धर्मी कहाल गहिले, पाछूत नी। ११ बिना सुन्नतेर हालतोत विश्वास करवार कारण से परमेश्वर वहाक धर्मी ठहराहिले। वहार सुन्नत करना सिरिफ एकटा प्रमाण आर चिन्ह छिले। वहीलाते इब्राहिम उला सबला लोकेर पिता ठहरिबे, जैला बिना सुन्नतेर हालतोत परमेश्वरेर पर विश्वास करछे। आर उसार विश्वासेर कारण से परमेश्वर धर्मी ठहराछे। १२ आर इब्राहिम उसारो पिता छे, जैला सुन्नत कराल छे, सिरिफ सुन्नत नी बल्के जैला

હમસાર પૂર્વ પિતા ઇબ્રાહિમેર વિશ્વાસેર મુતાબિક ચલછે, ઇબ્રાહિમેર જૈડા વિશ્વાસ વહાર સુન્નત સે પહિલે છિલે। ૧૩ ઇબ્રાહિમ આર વહાર ખાનદાનોક પરમેશ્વર વાદા કરિહિલે કિ ઇડા દુનિયાં ઇબ્રાહિમેર હોબે। ઇડા ની કિ મૂસા નબીર નિયમ-કાનૂન મનવાર કારણ સે પરમેશ્વર ઇબ્રાહિમોક ઇડા વાદા દિહિલે, બલ્કે વિશ્વાસ સે ધર્મી હવાર કારણ ઇડા વાદા કરાલ ગહિલે। ૧૪ અગર પરમેશ્વરેર વાદા ખાલી ઉલા લોકેર તને છે, જૈલા મૂસા નબીર નિયમ-કાનૂન માનછે, તબ ત વિશ્વાસ કરના બેકાર હંય જાબે આર પરમેશ્વરેર વાદાર કોય કીમત ની રોહબે। ૧૫ કારણ પરમેશ્વરેર નિયમ-કાનૂન પરમેશ્વરેર સર્જઈડાક બુલાય આનછે। સચ બાત ઇડા છે કિ જૈઠિન નિયમ-કાનૂન ની છે, ઉઠિન નિયમ-કાનૂન ભંગવાર કોય સવાલ ની ઉઠછે। ૧૬ વહીલાતે ઇડા વાદા વિશ્વાસેર જરિયાય ઓસછે, આર પરમેશ્વરેર દયાર પર નિર્ભર કરછે। ઇડા વાદા ઇબ્રાહિમેર ખાનદાનેર સબલા લોકેર તને ગારંટી છે। સિરિફ નિયમ-કાનૂન માનને વાલાર તને ની, બલ્કે ઉલા સબલા લોકેર તને છે, જૈલા ઇબ્રાહિમેર માન્દી પરમેશ્વરેર પર વિશ્વાસ કરછે। ઇબ્રાહિમ હમસાર સભારો પિતા છે। ૧૭ પરમેશ્વરેર વચનોત લિખાલ છે, “મુઈ તોક બહુતલા દેશેર લોકેર પિતા બનાય દિહી।” પરમેશ્વરેર નજરોત ઇબ્રાહિમ હમસાર સભારો પિતા બને ગેલ ક્યાંકિ વહાંય ઉડા પરમેશ્વરેર પર વિશ્વાસ કરિલ, જે પરમેશ્વર મુર્દા લોકોક જિન્દા કરે દિછે, આર ઉલા નયા ચીજોક બનાછે, જૈલા કબી ની

छिले। १८ इब्राहिमोक बाप बनवार कोय उम्मेद नी छिले, तहारो पर वहाँय परमेश्वरेर पर उम्मेद राखिहिले, आर विश्वास करिहिले। आर वहीलाते इब्राहिम बहुतला देशेर बाप बने गहिले, क्योंकि परमेश्वर वहाक कोहिले, “तोर खानदानेर लोकला गेनतीत आसमानेर तारालार मान्दी होबे।” १९ इब्राहिमेर उमर उखुना एक सौ बरस हंय गहिले, आर वहाँय बुझवा पारछिले कि वहार बदनडात ताकत नी छे, आर वहार स्त्री सारा नब्बे सालेर हंय गहिले, आर बच्चा जनम दुवार लायक नी छिले, तहारो पर इब्राहिम विश्वासोत कमजोर नी होय। २० परमेश्वरेर वादार पर वहार दिलोत कोयखुना शक पैदा नी होय, बल्के वहाँय अपना विश्वासोत आढ़ोह मजबूत हंय परमेश्वरेर बड़ाई करछिले। २१ इब्राहिम पूरा दिल से विश्वास करिहिले कि परमेश्वर जैडा वादा करिहे, उडाक पूरा करवारो शक्ति परमेश्वरेर लिकिन छे। २२ वहीलाते इब्राहिमेर विश्वासेर कारण परमेश्वर वहाक धर्मी ठहराल। २३ शास्त्रोत इडा लिखाल छे, परमेश्वर इब्राहिमोक धर्मी ठहराल। सिरिफ इब्राहिमेर तने नी, २४ बल्के हमसारो तने लिखाल गहे। हमसार विश्वासेर कारण परमेश्वर हमसाको धर्मी ठहराहे। कारण परमेश्वर प्रभु यीशुक मौत से जिन्दा करिहिले, आर हमरा वही परमेश्वरेर पर विश्वास करछी। २५ हमसार पापेर खातिर यीशुक मौतेर हाथोत सोंपे देयाल गहिले, आर हमसाक धर्मी बनवार तने परमेश्वर वहाक मौत से जिन्दा करिहिले।

परमेश्वरेर साथे मेल-मिलाप

५ विश्वास से हमसाक धर्मी ठहराल गहे, आर यहीडा कारण से हमसार प्रभु यीशु मसीहार जरियाय परमेश्वर आर हमसार बीचोत मेल-मिलाप होये। २ मसीहार पर विश्वास करवार कारण हमरा परमेश्वरेर दया पाही, आर वहार दयात बनाल छी। परमेश्वरेर महिमात सहभागी हवार उम्मेदोत हमरा खुशी मनाछी। ३ सिरिफ यहीडा नी, बल्के दुःख-तकलीफ मिललेव हमरा खुशी मनाछी, क्योंकि हमरा जानी कि दुःख-तकलीफेर जरियाय बर्दास्त करवार शक्ति मिलछे। ४ बर्दास्त करवार शक्ति से खाँटी चाल-चलन पैदा होचे आर खाँटी चाल-चलन से उम्मेद पैदा होचे। ५ इडा उम्मेद हमसाक निराश नी करबे, क्योंकि जे पवित्र आत्मा वहाँय हमसाक दान करिहे, वही पवित्र आत्मार जरियाय परमेश्वर अपना प्रेम हमसार दिलोत ढालिहे। ६ जैखुना हमसार लिकिन अपना-आपोक बचवार कोय ताकत नी छिले, वहीखुना ठीक समय मसीहा पापी लोकेर तने अपना जान दिले। ७ धर्मी लोकेर तने कोय अपना जान दुवा नी चाहचे। अच्छा लोकेर तने हंय, त कोय लोक हिम्मत करे अपना जान दुवा पारे। ८ मगर परमेश्वर हमसार पर अपना प्रेम इकिसम देखाल कि जैखुना हमरा पापोत पोड़ेछिनु, उखुना मसीहा हमसार तने अपना जान दे दिले। ९ क्योंकि मसीहार खूनेर जरियाय परमेश्वर हमसाक धर्मी ठहराल, त जरूर मसीहा हमसाक परमेश्वरेर

सजई से बचाबे। १० हमरा जैखुना परमेश्वरेर दुश्मन छिनु, उखुना परमेश्वर अपना बेटार मौतेर जरियाय अपना साथे हमसार मेल-मिलाप करे लिहे। जब हमसार मेल-मिलाप हंय गहे, तब मसीहार जिन्दा हंय उठवार कारण हमरा जरूर परमेश्वरेर सजई से बचे जामु। ११ सिरिफ यहीडा नी। अला हमसार प्रभु यीशु मसीहार जरियाय हमरा परमेश्वरेर साथे खुशी मनाछी, क्योंकि यीशु मसीहार जरियाय हमसार मेल-मिलाप वहार साथे हंय गहे।

यीशुर जरियाय जिन्दगी

१२ वहीलाते एकझन मानुषेर कारण से दुनियाँत पाप ओसिल, आर वही पापेर कारण से मौत ओसिल आर मौत सब लोकेर पर फैले गेल, क्योंकि सब लोक पाप करिल १३ मूसा नबीर नियम-कानून मिलवार आगुतो दुनियाँत पाप छिले, मगर नियम-कानून नी रहवार कारण से पापोक पाप बोले धराल नी जाय। १४ तहारो पर आदमेर समय से मूसा नबीर समय तक सभारो उपरोत मौत राज करिल। इकिसम कि परमेश्वरेर हुकूम नी माने जैला लोक आदमेर मान्दी पाप नी करे, उसारो उपरोत मौत राज करिल। आदम यीशु मसीहार नमूना होचे, जे मसीहा आनेवाला छिले। १५ मगर आदमेर पाप आर परमेश्वरेर दानेर बीचोत बहुत अन्तर छे। एकझन मानुषेर पापेर कारण से बहुतझन लोक मोरे गेल। मगर परमेश्वरेर दया बहुत बेसी छिले, आर वहीलाते एकझन

मानुष यानी यीशु मसीहार दयार कारण से बहुतझन लोकोक परमेश्वरेर दान मिलिल। १६ आर परमेश्वरेर दान आर एकझन मानुषेर पापेर बीचोत अन्तर छे। क्याँकि पापेर चलते इन्साफ ओसिल आर मानुषोक सजा मिलिल, मगर बहुत पापेर बाद परमेश्वरेर दान मानुषोक धर्मी ठहराल। १७ अगर एकझन लोकेर पापेर कारण से मौत उडा एकटा मानुषेर जरियाय राज करवा शुरू करिहिले, त जैला लोक परमेश्वरेर बहुत बेसी दया आर धर्मी हवार दान पाछे, वरा एकझन लोक यीशु मसीहार जरियाय हमेशा रहनेवाला जीवनोत बहुत बेसी राज करबे। १८ वहीलाते जैकिसम एकटा पापेर चलते सब लोक सजई पावार लायक बने गेल, वही मान्दी एकटा धर्मेर काम सब लोकेर तने धर्मी बनवार आर जीवन पावार कारण बने गेल। १९ क्याँकि जैकिसम एकझन लोकेर हुकूम नी मनवार कारण से बहुतझन लोक पापी ठहरे गेल, वही मान्दी एकझन लोकेर हुकूम मनवार कारण से बहुतझन लोक धर्मी ठहराल गेल। २० परमेश्वरेर नियम-कानून ओसवार पहिले, मानुष पाप करछिले। परमेश्वर अपना नियम-कानून दिले जसे कि वरा चिन्हवा पारे कि उसार पाप बहुत बेसी छे। आर जब पाप बढ़ते गेल, उठिन परमेश्वरेर दया आढ़ोह बेसी बढ़ते गेल। २१ जैकिसम पाप मानुषेर उपरोत राज करिल आर मौत आनिल, वही मान्दी मानुषोक धर्मी ठहराय परमेश्वरेर दया

राज करवा पारे। आर वहीडा दयार चलते हमसार प्रभु यीशु मसीहार जरियाय हमेशार जिन्दगी मिलछे।

यीशु मसीहार जरियाय जीवन

६ अला हमरा की कोहमु? हमरा की पाप करते रोहमु, जसे कि परमेश्वरेर दया हमसार पर बहुत होय। २ एकदम नी! हमरा त पापेर तने एक बार मोरे गही, त कसे करे फेर पापोत जिन्दगी बितामु? ३ तुम्हरा की जानेन नी कि हमरा जतेला लोक मसीहा यीशुर बपतिस्मा लिही, वहार मौतेर बपतिस्मा लिही? ४ वहीलाते जब हमरा बपतिस्मा लिनु, त मानो हमरा वहार साथे कबरोत गड़ाल गेनु। पिता परमेश्वर अपना महाशक्तिर जरियाय यीशु मसीहाक जैकिसम नया जीवन बितवार तने मुर्दा से जिन्दा करिल, ठीक वही मान्दी नया जीवन बितवार तने हमरा बपतिस्मा लिही। ५ अगर हमरा मसीहार मौतेर जरियाय वहार साथे जुड़े गही, त वहार जिन्दा हंय उठवार कारण से हमराव वहार साथे जरूर जुड़े जामु। ६ हमरा इडा जानी कि हमसार पुरानाडा जिन्दगीक मसीहार साथे क्रुसेर पर चढ़ाय मारे देयाल गहे, जसे कि हमसार पापेर बदन खतम हंय जाय, आर हमरा आगु चले पापेर गोलामीत ना रही। ७ क्योंकि जहाँय मोरे गहे, वहाँय पापेर गोलामी से छुटे गहे। ८ अगर हमरा यीशु मसीहार साथे मोरे गही, त हमसार विश्वास छे कि हमरा वहार साथे

जिन्दा रोहमु। ९ हमरा इडा बात जानी कि यीशु मसीहा मुर्दा से जिन्दा हंय उठिहिले, वहीलाते आर कभी नी मोरबे, आर वहार पर मौतेर कोय अधिकार नी होबे। १० मगर यीशु मसीहा जैखुना मोरिल, त वहाँय पापेर पर जीत हासिल करवार तने हमेशार तने एक बार मोरिल। अला वहाँय जीवित हंय उठे परमेश्वरेर तने जिन्दा छे। ११ ठीक यही किसम तुम्हराव इडा माने लव कि पापेर पर जीत हासिल करवार तने मोरे गहेन आर मसीहा यीशुर जरियाय परमेश्वरेर तने जिन्दा छेन। १२ वहीलाते पापोक तुमसार नाशवान बदनेर पर राज करवा ना दव, आर तब तुम्हरा बदनेर बुरा इच्छार अधिकारोत नी रोहभेन। १३ अपना बदनेर कोयडा अंगोक अधर्मेर हथियार हवार तने ना दव, बल्के अपना-आपोक मुर्दा से जिन्दा समझो, आर अपना बदनेर अंगलाक धर्मेर हथियार हवार तने परमेश्वरोक सोंपे दव। १४ इकिसम करले तुमसार पर पापेर अधिकार नी चलबे, क्योंकि तुम्हरा नियम-कानूनेर अधिकारोत नी छेन, बल्के परमेश्वरेर दयार अधिकारोत छेन।

धर्मी जीवनेर गोलाम

१५ त फेर हमरा की करी? हमरा की पाप करते रोहमु क्योंकि हमरा नियम-कानूनेर अधिकारोत नी छी, बल्के परमेश्वरेर दयार अधिकारोत छी? कभी नी। १६ तुम्हरा की जानेन नी कि जैखुना तुम्हरा कहारो हुकूम मनवार तने अपना-आपोक सोंपे दिछेन, त तुम्हरा वहार गोलाम छेन।

अगर तुम्हरा पापेर गोलाम छेन, तब तुमसार मौत होबे। आर अगर तुम्हरा परमेश्वरेर हुकूम मानछेन, त तुम्हरा धर्मी लोक होभेन। १७ पहिले तुम्हरा पापेर गोलाम छिलेन आर पाप तुमसार उपरोत राज करछिले, मगर परमेश्वरेर शुकुरिया करछी कि तुमसाक जैडा शिक्षा देयाल गहे, तुम्हरा पूरा दिल से उला हुकूम माने लिहेन। १८ पाप से आजाद हंय तुम्हरा धर्मी जीवनेर गोलाम बने गहेन। १९ मुई तुमसार साथे मानुषेर समझदारीर मुताबिक बोलछी क्यौंकि वहा से बेसी समझते कठिन होबे। आगुत तुम्हरा जैकिसम पापेर काम करछिलेन आर अपना बदनडाक गंदा आर पापेर काम करवार तने सोंपे दिहिलेन, ठीक वही मान्दी पवित्र काम करवार तने धर्मी जीवनेर गोलाम बने जाव। २० जैखुना तुम्हरा पापेर गोलाम छिलेन, उखुना तुमसाक धर्मी लोकेर मान्दी जीवन बितवार तने कोय ध्यान नी छिले। २१ उडा समय तुमसाक उला काम से की पैदा होल? अला तुम्हरा उला काम से लज्जित होचेन, कारण उला कामेर परिणाम मौत छे। २२ मगर अला तुम्हरा पापेर हाथ से बचे गहेन, आर परमेश्वरेर गोलाम बने गहेन। यहात यहीडा लाभ होल कि तुम्हरा पवित्र हंय गहेन, आर यहार आखरी फल छे: हमेशार जिन्दगी। २३ पापेर मजदूरी होचे मौत, मगर मसीहा यीशुर जरियाय परमेश्वरेर दान हमेशार जिन्दगी छे।

शादी-सुदा जीवनेर मिसाल

७ हे भा-बहिनला, तुम्हरा त मूसा नबीर नियम-कानूनोक जानेन। तुम्हरा कि नी जानेन कि जते दिन तक लोक जिन्दा रोहचे, तते दिन तक उसार पर नियमेर अधिकार रोहचे। २ जते दिन तक पति जिन्दा रोहचे, तते दिन तक नियम मुताबिक पत्नी अपना पतिर बन्धनोत रोहचे, मगर पति मोरे जवार बाद पत्नी शादी-ब्याहर नियमेर बन्धन से छुटे जाछे। ३ वहीलाते पति जब तक बचे रोहचे, वहार पत्नी कोय दोसरा लोकेर साथे ब्याह करछे, त उडा स्त्रीक कुकरमी कहाल जाबे, मगर अगर वहार पति मोरे जाय, त स्त्री लोकटी नियमेर बन्धन से छुटे जाछे। आर उखुना अगर वहाँय कोय पुरुषेर साथे ब्याह करे लिछे, त वहाक कुकरमी कहाल नी जाबे। ४ मोर भा-बहिनला, ठीक वही मान्दी यीशु मसीहार मौतेर साथे तुम्हरा नियम-कानूनेर नजरोत मोरे गहेन। यहार नतीजा इडा होचे कि जे यीशुक मौत से जिन्दा कराल गहे, तुम्हरा वहारे हंय गहेन, जसे कि परमेश्वरेर तने तुमसार जिन्दगीत बहुत फल देखा जाय। ५ हमरा जैखुना पापोत जिन्दगी बिताछिनु, उखुना मूसार नियम हमसार बदनेर पापोक देखाय दिछिले, आर वहीला खराब इच्छा आर लालसा हमसार बदनोत काम करछिले, आर जहार परिणाम मौत छे। ६ किन्तु जैडार गोलामीत हमरा छिनु, उडार तने हमरा मोरे गही। आर अला हमरा मूसा नबीर नियम से आजाद हंय गही। हमरा अला लिखाल

नियमेर पुराना जिन्दगीर गोलाम नी छी, बल्के पवित्र आत्मार देयाल नया जिन्दगीर गोलाम बने गही।

नियम-कानून आर पाप

७ तब हमरा की बोलमु? नियम-कानून की पाप करवाछे? एकदम नी, बल्के इडा बात सच छे कि अगर नियम-कानून नी होलतेन त मुई इडा जनवा नी पारनुतन कि पाप की छे। अगर नियम इडा नी बतालतेन, “लालच ना करेन” त मोक लालचेर बारे मालूम नी होलतेन। ८ मगर इडा हुकूमेर कारण से पाप मोर भीतरोत सब किसमेर लोभोक देखाय दिछे। कारण नियम-कानून नी रोहले, पाप मुर्दार मान्दी पोड़े रोहचे। ९ मोर जिन्दगीत नियम-कानून ओसवार आगुत, मुई जिन्दा छिनु, मगर हुकूम ओसवार बाद मोक एहसास होल कि मुई पाप करछी, आर मोर आत्मा मराल छे। १० जैडा हुकूमेर कारण से जिन्दगी पवार बात छिले, उडा हुकूम मोर तने मौत ले ओसिल। ११ कारण उडा हुकूमेर मौका ले पाप मोक धोखा दिले, आर वहीडा हुकूमेर जरियाय पाप मोक मारे फिकाले। १२ तब इडा बात ठीक छे कि नियम-कानून पवित्र छे, आर वहार हुकूमलाव पवित्र, सच्चा, आर लोकेर भलाई तने छे। १३ तब त जैडा भलाईर तने छिले, उडा मोर तने मौतेर कारण बने गेल की? बिल्कुल नी, बल्के जैडा से भला होनेवाला छे, वहीडार जरियाय पाप मोर तने मौत ले ओसिल। इडा बुझाल जाय की पाप सचमुचोत पाप

છે। પાપ જે કતેખાન खराब છે, ઇડા બાત નિયમ-કાનૂનેર જરિયાય જનાલ જાછે।

માનુષેર દુર્ઝ કિસમ સ્વભાવ

૧૪ હમરા જાની કિ નિયમ-કાનૂન આત્મા સે જુઝાલ છે, મગર મુર્ઝ પાપી સ્વભાવેર અધીનોત છી, આર મુર્ઝ પાપેર ગોલામ બને ગહી। ૧૫ મુર્ઝ જે કુછુ કરછી, ડા મુર્ઝ ખુદે બુઝવા ની પારછી, ક્યાંકિ મુર્ઝ જે કુછુ કરવા ઇાહચી, ડા મુર્ઝ કરવા ની પારછી, મગર જૈડાક મુર્ઝ ઘિણ કરછી, વહીડા કરછી। ૧૬ જૈડા ની ઇાહચી અગર મુર્ઝ વહીડા કરછી, ત મુર્ઝ ઇડા માને લિછી કિ નિયમ-કાનૂન અછ્છા છે। ૧૭ તબ ઇડા દેખાલ જાછે કિ મુર્ઝ ખુદ ઇલા खराब કામ ની કરછી, બલ્કે મોર ખીતરોત જૈલા પાપ છે, વહીલા પાપ મોર જરિયાય ઇલા કામ કરાછે। ૧૮ મુર્ઝ જાની મોર પાપી સ્વભાવેર ખીતરોત અછ્છા ચીજ બોલે કુછુ ની છે। સચમુચોત અછ્છા કરવાર મોર ઇછ્છા ત છે, મગર મુર્ઝ અછ્છા કરવા ની પારછી। ૧૯ મુર્ઝ જૈલા અછ્છા કામ કરવા ઇાહચી, ડા ની કરછી, ડાર બદલે જૈલા કામ કરવા મુર્ઝ ની ઇાહચી, વહીલા खराब કામ મુર્ઝ કરતે રોહછી ૨૦ જૈલા મુર્ઝ કરવા ની ઇાહચી, અગર વહીલા કરછી, ત ડખુના મુર્ઝ સચમુચોત ડખાન કામ ની કરછી, બલ્કે મોર ખીતરોત જૈડા પાપ-સ્વભાવ છે, વહીડા સ્વભાવ મોર જરિયાય ડા પાપ કરાછે। ૨૧ તબ ત મુર્ઝ દેખવા પારછી કિ મોર ખીતરોત ંકટા નિયમ કામ કરાછે। જૈખુના મુર્ઝ કોય અછ્છા કામ

करवा चाहची, उखुना मुई सिरिफ बुरा काम करवार तने चुने लिछी।
२२ क्याँकि मुई अपना मनेर भीतरोत परमेश्वरेर नियम-कानूनोत खुशी
रोहछी। २३ मगर मुई देखछी कि मोर बदनडात एकटा दोसरा किसमेर
नियम काम करछे। जैडा मोर मनेर नियम-कानूनेर साथे लड़ाई करछे,
आर मोक पापेर नियम-कानूनेर बन्धनोत डाले दिछे। २४ मुई कुन
किसम आभागा लोक छी! मोर भीतरोत जैडा पाप-स्वभाव छे, उडा
मौतोक टाने आनछे। इडा पाप-स्वभावेर हाथ से मोक के बचाबे?
२५ मुई परमेश्वरेर शुकुरिया करछी कि वहाँय हमसार प्रभु यीशु मसीहार
जरियाय हमसाक बचाछे। तब इडा देखाल जाछे कि दिल से मुई
परमेश्वरेर नियम-कानूनेर गोलाम छी, मगर पाप-स्वभावेर कारण से मुई
पापेर गोलाम छी।

पवित्र आत्मार जरियाय जीवन

८ जैला लोक मसीहा यीशुर साथे जुटे गहे, परमेश्वर उसाक आर
सजईर लायक नी समझिबे। २ क्याँकि जिन्दगी देनेवाला पवित्र आत्मार
नियम यीशु मसीहार जरियाय मोक पाप आर मौतेर नियम-कानून से
बचाय लिहे। ३ लोकेर पापी स्वभावेर कारण से मूसा नबीर नियम-
कानून जैखान काम करवा नी पारिल, उखान काम परमेश्वर खुद
करिल। परमेश्वर मानुषोक पापेर माफी दुवार तने अपना बेटा यीशु

मसीहाक पठाल, जहाँय पापी मानुषेर समान मानुषेर बदन ले जनम लिले। आर परमेश्वर हमसार पापेर तने यीशु मसीहाक बलिदान करे दिले, आर पापेर सजईक नाश करे दिले। ४ अला हमरा उला सब कुछ पूरा करवा पारी, जैला परमेश्वर अपना नियम-कानूनेर मुताबिक चाहचे। हमरा अपना पाप-स्वभाव मुताबिक नी चलछी, बल्के हमरा पवित्र आत्मार मुताबिक चलछी। ५ जैला लोक पाप-स्वभाव मुताबिक चलछे, वरा अपना मन पापेर चीजोत लगाछे। मगर जैला लोक परमेश्वरेर आत्मार मुताबिक चलछे, वरा अपना मन आत्मार चीजोत लगाछे। ६ पाप-स्वभावेर मुताबिक चलले, यहार फल होचे मौत, मगर पवित्र आत्मार मुताबिक चलले, यहार फल होचे जिन्दगी आर शान्ति। ७ जहाँय अपना मन पापेर चीजोत लगाछे, वहाँय परमेश्वरेर खिलाफ काम करछे। पापी स्वभाव वाला मानुष परमेश्वरेर नियम-कानूनेर अधीनोत नी रोहचे, आर वहाँय नियमेर मुताबिक चलवाव नी पारबे। ८ वहीलाते जैला लोक पाप-स्वभावेर अधीनोत छे, वरा परमेश्वरोक खुश करवा नी पारबे। ९ मगर परमेश्वरेर आत्मा अगर तुमसार दिलोत छे, त तुम्हरा पाप-स्वभावेर अधीनोत नी छेन, बल्के पवित्र आत्मार अधीनोत छेन। मगर जहार भीतरोत यीशु मसीहार आत्मा नी छे, वहाँय यीशु मसीहार लोक नी छे। १० मगर मसीहा अगर तुमसार दिलोत छे, त पापेर चलते तुमसार बदनडा मोरे गेलोव, तुमसार आत्मा जिन्दा रोहबे,

क्याँकि परमेश्वर तुमसाक धर्मी ठहराहे। ११ जे पिता परमेश्वर यीशुक मौत से जिन्दा करे दिहे, वही परमेश्वरेर आत्मा अगर तुमसार दिलोत रोहचे, त परमेश्वर जे मसीहाक मौत से जिन्दा करिल, वहाँय अपना आत्मार जरियाय तुमसार नाशवान बदनोक नया जिन्दगी दिबे, जे आत्मा तुमसार भीतरोत रोहचे। १२ वहीलाते हे भईला हमरा कर्जदार छी, मगर पाप-स्वभावेर कर्जदार नी छी। पाप-स्वभावेर अधीनोत रहय हमसाक आर चलवार जरूरत नी छे। १३ अगर तुम्हरा पाप-स्वभावेर अधीनोत चलछेन, त तुम्हरा मोरे जाभेन। मगर तुम्हरा अगर पवित्र आत्मार शक्ति से बदनेर सबला गंदा काम खतम करे देन, त हमेशार जिन्दगी पाभेन। १४ क्याँकि जैला लोक परमेश्वरेर आत्मार जरियाय चलछे, वराय परमेश्वरेर बेटा-बेटी छे। १५ क्याँकि परमेश्वर हमसाक इकिसम आत्मा नी दिहे, जैडा हमसाक गोलाम बनाय आर हमरा परमेश्वर से डोराई। बल्के परमेश्वर हमसाक इकिसम आत्मा दिहे, जे आत्मा हमसाक परमेश्वरेर बेटा-बेटी हवार अधिकार दिहे। वहीलाते अला परमेश्वरेर आत्मा हमसाक मदद करछे कि हमरा परमेश्वरोक “पिता, मोर पिता” कहय जाब दुवा पारी। १६ परमेश्वरेर आत्माव खुद हमसार आत्माडार साथे मिले गवाही दिछे कि हमरा परमेश्वरेर बेटा-बेटी छी। १७ हमरा अगर बेटा-बेटी हंय गही त परमेश्वर अपना बेटा-बेटीलाक जे कुछ दुवार वादा करिहे, उला सबला हमरा पामु। मसीहा परमेश्वर

पितार लिकिन से जैला पाबे, आर हमराव वहार साथे उला पामु, कारण हमरा अगर मसीहार साथे तकलीफ उठाही त वहार साथे वहार बड़ाईरो भागीदार होमु।

परमेश्वर चुनाल लोकोक इज्जत दिछे

१८ मुई जानी कि जैडा बड़ाई हमरा पाछूत पामु, उडा बड़ेईर लिकिन हमसार इडा जिन्दगीर दुःख-तकलीफ कुछु नी छे। १९ परमेश्वर देखाबे कि वहार बेटा-बेटीला के छे? इडा देखवार तने परमेश्वरेर बनाल सब कुछु बहुत इच्छार साथे इन्तेजार करछे। २० कारण इडा सृष्टि अपना इच्छा से बेकार नी हंय जाय, बल्के परमेश्वर खुद वहाक बेकार हवार तने छोड़े दिहे। मगर तहातो उम्मेद छे, कि २१ परमेश्वरेर बनाल सब कुछु उडा दिनेर इन्तेजार करछे, जे दिना वरा परमेश्वरेर बेटा-बेटीलार साथे शान-शौकत से भराल आजादीर हकदार हवा पारबे, आर मौत आर सरवा-गलवार बन्धन से आजाद हंय जाबे। २२ हमरा जानी कि इडा सृष्टि बच्चा जनम दुवार तकलीफेर मान्दी अभी तक छटपटाछे। २३ सिरिफ इडा सृष्टि नी, मगर हमराव जहाँय परमेश्वरेर आत्माक पहिला फल हिसाबे पाही, भीतरे भीतर छटपटाछी। यहारे साथे उडा दिनेर तने इन्तेजार करछी, जैखुना परमेश्वर हमसाक अपना बेटा-बेटी बनाबे, आर हमसार बदनडाक मुक्ति दिबे। २४ क्याँकि यहीडा उम्मेद ले हमसाक बचाल गहे। हमरा जैडा चीजेर उम्मेद लगाय छी, उडाक अगर

पाय जई, त इडा उम्मेदोक आर उम्मेद कहाल नी जाबे। कारण जैडा चीज मिले गहे, उखान चीजेर उम्मेद करवार जरुरत नी होचे। २५ मगर जैडा चीजोक हमरा नी पाही, उडार तने अगर हमसार उम्मेद छे, त हमरा सबुर बान्हें इन्तेजार करछी। २६ यहीकिसम हमसार कमजोरीर हालतोत पवित्र आत्मा हमसार मदद करछे क्योंकि हमरा नी जानी कि हमसाक की प्रार्थना करवा लागे, मगर पवित्र आत्मा हमसार तरफ से बहुत कोहरी करे प्रार्थना करछे, जैडा प्रार्थना बोलीर जरियाय बताल नी जाबे। २७ परमेश्वर, जहाँय मानुषेर दिलडाक जाँच करे देखछे, वहाँय जानछे कि आत्मार इच्छा कि छे। क्योंकि पवित्र आत्मा परमेश्वरेर इच्छा मुताबिक हमसार तने बिनती करछे। २८ हमरा जानी कि जहाँय परमेश्वरोक प्रेम करछे, आर परमेश्वर उसाक अपना इच्छा मुताबिक बुलाहे, परमेश्वर सब पाके उसार भलेई करछे। २९ परमेश्वर जहाक आगु से जानछिले, वहाक वहाँय चुनबे। परमेश्वर उसाक अपना बेटार मान्दी हवार तने पहिले से चुने राखिहिले, जसे कि यीशु परमेश्वरेर सबला बेटा-बेटीर भीतरोत सबसे बोड़ो बेटा बने जाय। ३० जैला लोकोक परमेश्वर पहिले से चुने राखिहिले, उसाक वहाँय बुलाहिले, आर जैला लोकोक बुलाहिले, उसाक वहाँय धर्मी समझे ग्रहण करिल, आर जहाक धर्मी समझे ग्रहण करिल, उसाक वहाँय अपना इज्जत आर बड़ाई करिल।

परमेश्वरेर प्रेम

३१ तब हमरा इलार बारे की कोहमु? परमेश्वर जब हमसार भीति छे, त के हमसार खिलाफ हवा पारबे? ३२ परमेश्वर जब अपना बेटाको नी छोड़िल, बल्के वहाक हमसार सभारो तने मौतेर हाथोत सोंपे दिले, त वहाँय अपना बेटार साथे बाँकी सब कुछ हमसाक दान की नी करबे? ३३ परमेश्वर जहाक चुने लिहे, उसार खिलाफ के दोष लगाबे? परमेश्वर त खुद उसाक धर्मी ठहराहे। ३४ फेर के हमसाक कसूरबार बनाबे? कोय नी। क्योंकि मसीहा यीशु हमसार तने मोरिल आर हमसार तने मौत से जिन्दा कराल गेल। वही मसीहा यीशु अला परमेश्वरेर दहिना बगल बोठाल छे, आर हमसार तने प्रार्थना करछे। ३५ वहीलाते अला के हमसाक मसीहार प्रेम से अलग करबे? उडा की बिपत्ति, मुसीबत, सताव, भूखमरी, कपड़ा-लत्तार कमी, बर्बादी, आर ना तलवार? ३६ परमेश्वरेर वचनोत इकिसम लिखाल छे, तोर कारण मुई हर दिन मौतेर सामना करछी, आर हमसार साथे बलि करवार भेड़ालार मान्दी सलूक कराल जाछे। ३७ नी। इला सबला बातोत जहाँय हमसाक प्रेम करछे, वहार जरियाय हमरा जीते जाछी। ३८ मुई इडा बात अच्छा करे जानी कि ना त मौत, ना जिन्दगी, ना स्वर्गेर फरीस्ता, ना नरकेर दूत, ना अलकार समय, ना भविष्येर कोय चीज, ना दोसरा किसमेर शक्ति, ३९ ना ऊँचा, ना नीचान, आर ना पूराडा सृष्टिर कोय चीज हमसाक

परमेश्वरेर प्रेम से अलग करवा सकेछे। परमेश्वरेर इडा प्रेम हमसाक प्रभु यीशु मसीहार जरियाय मिलछे।

परमेश्वर आर वहार चुनाल लोक

९ यीशु मसीहा मोर गवाह छे कि मुई सच-सच बोलछी। मुई झूठ नी बोलछी। मोर विवेक पवित्र आत्मार अधीनोत रहय गवाह दिछे। २-३ मुई सच कोहची कि मोर यहूदी भा-बहिनलार तने मोर दिलडा दुःख आर तकलीफ से भराल छे। अगर मोक परमेश्वरेर श्राप लुवार कारण आर मसीहा से अलग हवार कारण से वरा बचे गेलतन, त मुई खुशी-खुशी उला बातोक करवार तने तैयार हंय गेनुतेन। ४ वरा त इजराएली लोक छे आर परमेश्वर उसाक अपना बेटा-बेटी हवार अधिकार दिहे। परमेश्वर उसाक अपना शक्ति देखाहे, उसार साथे अपना रिस्ता कायम करिहे, आर अपना नियम-कानून दिहे। परमेश्वरेर भक्ति आर सेवा करवार मौका दिहे, आर उसार साथे बहुतला वादाव करिहे। ५ इब्राहिम, इसहाक आर याकूब उसार मूल पिता छिले, यहीडा खानदान से मसीहार जनम होल। मसीहा परमेश्वर छे आर वहाँय सभारो पर राज करछे। वहार बड़ाई युगानुयुग होते रोहोक। आमीन। ६ इकिसम बात नी छे कि परमेश्वर अपना वादा पूरा नी करिल। जताला लोक इजराएलेर खानदानेर छे, सबला परमेश्वरेर लोक नी छे। ७ आर इब्राहिमेर

खानदानेर हवार कारण से सबकोय परमेश्वरेर बेटा-बेटी नी छे। जैकिसम परमेश्वरेर शास्त्रोत लिखाल छे, “इसाहक से इब्राहिमेर खानदान समझाल जाबे।” ८ यहार माने इडा छे, “इब्राहिम से जन्माल सबकोय परमेश्वरेर बेटा-बेटी नी होचे, बल्के परमेश्वरेर वादा कराल बेटा-बेटीलाय इब्राहिमेर खानदानेर समझाल जाबे।” ९ क्यौँकि परमेश्वर इब्राहिमेर साथे वादा करिहिले, “ठीक यहीडा समय अगला साल मुई ओसमु आर तोर पत्नी सारा एकटा बेटाक जनम दिबे।” १० इब्राहिमेर इडा बेटा हमसार पूर्व पिता इसहाक छिले। वहाँय रिबेकाक शादी करिल, आर रिबेका जौठिया बेटाक जनम दिले। ११-१२ दोनोंझन बेटार जन्मेर पहिले, आर उसार बुरा-भला करवार पहिले परमेश्वर रिबेकाक कोहले, “बोड़ोझन बेटा छोटोझनार गोलाम होबे।” इकिसम करे परमेश्वर देखाहिले कि परमेश्वर अपना योजना पूरा करवार तने अपना इच्छा मुताबिक लोकोक चुने लिछे। कहारो कर्मेर कारण से परमेश्वर कहाको नी चुनछे। १३ वहीलाते परमेश्वरेर शास्त्रोत लिखाल छे, “मुई याकूबोक प्रेम करनु, मगर एसाबोक प्रेम नी करनु।” १४ तब हमरा की कोहमु कि परमेश्वर ना इन्साफी छे? बिल्कुल नी। १५ क्यौँकि परमेश्वर मूसा नबीक कोहिले, “मोक जहार पर इच्छा होबे, मुई वहार पर दया करमु, आर मोक जहार पर इच्छा होबे, मुई वहार पर तरस खामु।” १६ वहीलाते इडा ना कहारो इच्छा से आर ना कहारो कोशिश से होचे,

बल्के परमेश्वरेर दया से होचे। १७ क्याँकि प्रभु अपना शास्त्रोत मिसर देशेर राजाक कोहचे, “मुई तोक राजा बनाही जसे कि तुई अपना जीवनोत मोर शक्ति देखवा पारिस, आर इकिसम करे मोर नाम पूराडा दुनियाँत प्रचार हंय जाय।” १८ वहीलाते परमेश्वर जहार पर दया करवा चाहचे, वहार पर दया करछे, आर जहार दिलडाक कठोर बनवा चाहचे, वहार दिलडाक कठोर बनाय दिछे।

परमेश्वरेर गोस्सा आर दया

१९ हवा सकेछे, तुमसार बीच से कोय मोक पूछवा पारे, “तब परमेश्वर लोकेर कसूर क्याँ धरछे? कोय छे, जहाँय परमेश्वरेर इच्छाक रोकवा पाड़े?” २० इडा बातेर जवाब मुई इकिसम करे दुवा चाहची, “तुई मानुष छिस। परमेश्वरेर बातेर पर मुख जोरी करनेवाला तुई के छिस? कोय लोक अगर एकखान चीज बनाछे, त बनाल चीजखान अपना बनानेवालाक इडा बात की पूछवा पारबे, तुई मोक इकिसम करे क्याँ बनालो?” २१ एकेखान माटी दे कुम्हारोक किसम-किसमेर बरतन बनवार अधिकार की नी छे? वहार लिकिन छे। कोयखान बर्तनोक इज्जतेर कामेर तने आर कोय खानोक साधारण कामेर तने बनाल जाछे। २२ वही मान्दी परमेश्वरेर लिकिन अधिकार छे कि वहाँय अपना गोस्सा आर शक्ति लोकोक देखाय। तहारो पर जैला लोकोक बर्बादीर तने रखाल गहे, परमेश्वर अपना गोस्सा उसार पर देखवा चाहचे, मगर

उसाक बहुत धीरजेर साथे सहय लिछे। २३ परमेश्वरेर दया पवार लायक जैला लोक छिले, परमेश्वर अपना शक्ति आर महिमा देखवार तने उसाक आगुते चुने लिहिले। २४ आर हमरा उला लोक छी, जहाक परमेश्वर बुलाहिले। सिरिफ यहूदी लोकेर भीतर से नी, बल्के गैर-यहूदी लोकेरो भीतर से बुलाहिले। २५ परमेश्वर होशे नबीर जरियाय बोलिहे, “जैला लोक मोर लोक नी छिले, उसाक मुई अपना लोक कोहमु, आर जैला लोकोक मुई पहिले प्रेम नी करछिनु, उसाको मुई प्रेम करमु।” २६ “आर जैठिन उसाक कहाल गहिले, ‘तुम्हरा मोर लोक नी छेन।’ वहीठिन उसाक कहाल जाबे, ‘तुम्हरा जिन्दा परमेश्वरेर बेटा-बेटी छेन।’” २७ यशायाह नबी इजराएली लोकलार बारे चिल्लाय कोहचे, “इजराएली लोकेर बेटा-बेटीला गेनतीत अगर समुन्द्रेर बालूर मान्दी होय, तहारो पर उसार भीतर से बहुत कम लोक बचबे। २८ क्याँकि प्रभु अपना वचन दुनियाँत बहुत जल्दी आर जरूर पूरा करबे।” २९ जैकिसम यशायाह नबी पहिले बोलिहिले, “अगर सर्वशक्तिमान प्रभु हमसार तने कोय खानदान नी राखे गेलतेन, त हमसार हालत सदोम आर अमोरा नगरेर मान्दी होलतेन।”

इजराएली लोकेर अविश्वास

३० तब हमरा की कोहमु? गैर-यहूदी लोक त परमेश्वरेर धर्मी लोक बनवार कोशिश नी करछिले, तहारो पर उसार विश्वासेर कारण से परमेश्वर उसाक धर्मी ठहराल। ३१ मगर यहूदी लोकला नियम-कानून पालन करे परमेश्वरेर धर्मी लोक बनवार कोशिश करछिले, मगर वरा धर्मी हवा नी पारिल। ३२ वरा धर्मी क्याँ नी हवा पारिल? क्याँकि वरा विश्वास से धर्मी हवार खोज नी करछिले, बल्के वरा अपना करमेर जरियाय धर्मी हवा चाहचिले। इजराएली लोक वहीखान पत्थलोत ठोकर खाय पोरे गेल, जैखानोत लोक ठोकर खाय पोरे जाछे। ३३ जैकिसम परमेश्वर अपना शास्त्रोत मसीहार बारे कोहचे, “देखो, मुई यरूशलेम शहरोत एकखान पत्थल राखछी आर जैखानोत लोक ठोकर खाय पोरे जाबे, आर जहाँय वहार पर विश्वास करबे, वहाँय शरमिन्दा नी होबे।”

१० मोर भा-बहिनला, मुई दिल से चाहची आर परमेश्वरेर लिकिन प्रार्थना करछी कि इजराएली लोक बचे जाय। २ मुई उसार बारे कोहची कि परमेश्वरेर तने उसार जोश छे, मगर उडा जोश सही ज्ञानेर साथे नी छे। ३ कारण, जैडा धार्मिक जीवन परमेश्वर दिछे, उडार बारे वरा अनजान छे, आर अपना तरीका से धार्मिक जीवन पावार कोशिश

करछे। आर परमेश्वरेर लिकिन से धार्मिक जीवन ग्रहण करवा नी चाहचे। ४ क्यौंकि मसीहा ओसे नियम-कानून पूरा करे दिहे जसे कि हरेकझन वहार पर विश्वास करे धर्मी ठहरे।

विश्वासेर जरियाय सबकोय बचबे

५ नियम-कानूनेर जरियाय जहाँय परमेश्वरेर लिकिन धर्मी हवा चाहचिले, उसार बारे मूसा नबी लिखिहे, “वरा सबला नियम-कानून मनवार जरियाय जिन्दा रोहबे।” ६ मगर जहाँय विश्वासेर जरियाय धर्मी होये, वहाँय अपना दिलोत इडा ना बोलोक, “स्वर्गोत के जाबे आर मसीहाक स्वर्ग से नभाय आनबे? ७ या पातालोत के नाभबे आर मसीहाक जिन्दा करे उपरोत आनबे?” ८ मगर परमेश्वरेर शास्त्रोत लिखाल छे, “वचन तोर लिकिन छे, तोर मुखोत आर तोर दिलोत छे।” इडा वहीडा विश्वासेर बारे छे, जैडाक हमरा प्रचार करछी, ९ कि अगर तुम्हरा अपना मुख दे बोलेन कि यीशु प्रभु छे, आर अपना दिलोत विश्वास करेन कि परमेश्वर वहाक मुर्दा से जिन्दा करिहे, त तुम्हरा बचभेन। १० क्यौंकि हमरा दिल से विश्वास करवार जरियाय धर्मी ठहरेछे, आर मुख से बोलवार जरियाय हमरा बचेछी। ११ क्यौंकि परमेश्वरेर वचनोत कोहचे, “जहाँय वहार पर विश्वास करबे, वहाँय शर्मींदा नी होबे।” १२ यहूदी आर गैर-यहूदीर भीतरोत कोय फरक नी छे। वही प्रभु सभारो प्रभु छे, आर वहाँय सभारो पर अपना आशीष दिछे,

जहाँय वहार नाम लिछे। १३ कारण, लिखाल छे, “जहाँय प्रभुक कोहबे, हे प्रभु मोक बचा, त प्रभु वहाक बचाबे।” १४ मगर जैला लोक वहार पर विश्वास नी करिल, त वहार नाम वरा कसे करे लिबे? आर लोक जहार बारे नी सुने त वहार पर कसे करे विश्वास करबे? आर बिना प्रचारक लोक वहार बारे कसे सुनबे? १५ आर अगर कहाको प्रचार करवार तने पठाल नी जाय, त कसे करे खुश-खबरीर प्रचार होबे? जैकिसम लिखाल छे, “उसार पाँला कत्तेक अच्छा छे, जहाँय खुश-खबरी सुनाछे।” १६ मगर सबकोय उडा खुश-खबरीर पर कान नी लगाल। यशायाह नबी कोहचे, “हे प्रभु! के हमसार खुश-खबरीर पर विश्वास करिल?” १७ वहीलाते विश्वास सुनले होचे आर सुनवार काम मसीहार वचनेर प्रचार करले होचे। १८ मगर मुई कोहची, इजराएली लोकला की नी सुने? हाँ, वरा सुनिहे। जैकिसम परमेश्वरेर शास्त्रोत लिखाल छे, “उसार आवाज धरतीर सब भीति फैले गहे, वचन दुनियाँर आखरी तक पहुँचे गहे।” १९ मुई फेर कोहची, इला बात कि इजराएली लोक नी जानछिले? मूसा नबी त पहिले कहय दिहे, “जैला लोक इजराएली लोक नी छे, मुई उला लोकेर जरियाय तुमसार दिलोत जलन पैदा करूम, मुई एकटा नासमझ देशेर जरियाय तुमसार दिलोत गोस्सा पैदा करमु।” २० फेर यशायाह नबी बहुत हिम्मतेर साथे परमेश्वरेर इडा वचनोक कोहचे, प्रभु इकिसम कोहचे कि, “जहाँय मोक नी छाभछिले,

वरा मोक पाय गेल, आर जहाँय मोर बारे नी पूछेछिले, मुई उसाक देखा दिनु।” २१ मगर इजराएली लोकेर बारे परमेश्वर कोहचे, “मुई पूराडा दिन अपना हाथ उसार भीति बढ़ाय राखनु कि वरा मोर लिकिन चले ओसे, मगर वरा मोर हुकूम नी मानछे आर झगड़ा करते रोहचे।”

परमेश्वर इजराएली लोकलाक नी छोड़िहे

११ वहीलाते मुई कोहची, परमेश्वर कि अपना इजराएली लोकोक छोड़े दिहे? एकदम नी। क्योंकि मोहो एकइन इजराएली लोक छी। मुई इब्राहिमेर बंशेर आर बिन्यामिन खानदानेर लोक छी। २ परमेश्वर अपना लोकोक छोड़े नी दे, आर अपना लोकोक वहाँय जाने। तुम्हरा त जानेन कि परमेश्वरेर वचन एलियाह नबीर बारे की बताछे? एलियाह नबी इजराएली लोकेर खिलाफ परमेश्वरेर लिकिन शिकायत करछे, ३ “हे प्रभु, वरा तोर नबीलाक मारे फिकाहे, आर तोर थानलाक भाँयें दिहे, आर मुई सिरिफ बचाल छी, आर वरा अला मोक जान से मारे फिकवा चाहचे।” ४ मगर परमेश्वर एलियाह नबीक जवाब दिले, “मुई अपनार तने उ-सात हजार लोकोक बचाय राखीही, जैला बाल देवतार आगुत हटुवा पारे पूजा नी करिहे।” ५ वहीलाते वही किसम करे अलाव परमेश्वर अपना दया से इजराएली लोकेर कुछु लोकोक चुने राखियेह। ६ अगर परमेश्वर उसाक अपना दया से बचाय राखियेह, त इडा उसार

कर्मेर कारण से नी होय। अगर कर्मेर जरियाय होलतेन त परमेश्वरेर दयार कोय मतलब नी होलतेन। ७ यहार मतलब इडा छे कि इजराएली लोक जैडा चीजेर खोज करछिले, उडा खाली कुछु चुनाल लोकोक मिलिल, मगर बाँकी लोकेर दिल सक्कत करे देयाल गेल। ८ जैकिसम कि परमेश्वरेर वचनोत लिखाल छे, “परमेश्वर उसाक भारी निनेर आत्मा दे दिहे। इकिसम कि आँख रहते, वरा देखवा नी पारबे, आर कान रहते, वरा सुनवा नी पारबे, उसार दशा आजतक यही किसम बनाल छे।” ९ राजा दाऊद कोहचे, “उसार खाना उसाक जालोत आर फाँसोत फँसाय दोक। वरा पोरे जाक आर मोरे जाक। १० उसार आँखेर आगुत अन्हार छाय जाक, जसे कि वरा देखवा नी पारे आर उसार पीठीला हमेशार तने झूके जाक।”

गैर-यहूदी लोकेर पर परमेश्वरेर दया

११ वहीलाते मुई कोहची, कोय कहवा पारे कि जब यहूदी लोकला यीशुर पर विश्वास नी करे पाप करिल, त यरा कि परमेश्वर से हमेशार तने दूर हंय गहे? बिल्कुल नी, बल्के उसार पाप करवार कारण से गैर-यहूदी लोक बचे जाय जसे कि यहूदी लोकेर दिलोत जलन पैदा होय। १२ यहूदी लोकेर पापेर कारण से अगर दुनियाँर गैर-यहूदी लोक धनी बने गेल, आर उसार गिरे जवार कारण से गैर-यहूदी लोकोक लाभ होल, त जैखुना यहूदी लोकेर पर परमेश्वरेर पूरा आशीर्वाद ओसबे, त उखुना

गैर-यहूदी लोकोक कतेक बेसी लाभ होबे? १३ गैर-यहूदी भा-बहिनला, मुई तुमसाक कोहची, मुई गैर-यहूदी लोकेर लिकिन मसीहार प्रचार करवार तने मसीह-दूत छी, आर वहीलाते मुई इखान कामोक खूब इज्जत दिछी। १४ मुई चाहची कि अपना यहूदी लोकेर दिलोत जलन पैदा करे दी जसे कि उसार बीच से कुछु लोक बचे जाय। १५ जैखुना परमेश्वर यहूदी लोकलाक इन्कार करे दिले, तब दुनियाँर लोकेर साथे परमेश्वरेर मेल-मिलाप हंय गेल। जैखुना परमेश्वर दुनियाँर लोकोक ग्रहण करछे, यहार इडा मतलब होबे कि उसाक मौत से जिन्दा कराल गहे। १६ हमसार पूर्व पिता इब्राहिम आर दोसराला पूर्व पिता पवित्र छिले, उसार खानदानेर लोकलाव पवित्र छिले जैकिसम कि सनाल आँटाखान से बनाल पहिलाडा रूटी जैडा परमेश्वरोक चढ़ाल जाछे, अगर पवित्र छे, त गोटेखान सनाल आँटा पवित्र होबे। गाछेर जड़खान अगर पवित्र हंय त वहार ठल्लीलाव पवित्र होबे। १७ परमेश्वर जैतून गाछेर कुछुला ठल्ली काटे हटाय दिहे, आर उठिन जंगली जैतून गाछेर कुछुला ठल्लीलाक जोड़े दिहे। तुम्हरा गैर-यहूदी लोकला जंगली जैतूनेर गाछेर मान्दी छेन, आर बहुतला यहूदी लोकोक दूर करे परमेश्वर तुमसाक चुने लिहे, आर तुम्हरा अला यहूदी लोकेर आत्मिक जीवनेर बेसी लाभ उठाछेन। १८ तब काटे देयाल ठल्लीला से तुम्हरा अपना-आपोक बोड़ो ना समझेन। आर अगर तुम्हरा अपना-आपोक बोड़ो

समझिभेन, त जाने राखो कि तुम्हरा जड़खानोक धरे नी राखेन, बल्के जड़खान तुमसाक धरे राखिहे। ^{१९} तुम्हरा हंय त कहवा पारेन कि मोक गाछटार साथे जोड़े दुवार तने इ गाछेर ठल्लीलाक काटे फिकाल गहे। ^{२०} उडा ठीक छे। मगर इजराएली लोकोक मसीहार पर विश्वास नी करवार कारण उसाक दूर करे देयाल गहे। आर तुमसार विश्वासेर कारण से तुम्हरा जुड़े गहेन। वहीलाते तुम्हरा घमंड ना करेन, बल्के वहार डर करो। ^{२१} जबकि परमेश्वर असली ठल्लीलाक नी छोड़िल, त तुमसाक कसे करे छोड़े दिबे? ^{२२} वहीलाते सोचे देखो, परमेश्वर कतेखान दया करनेवाला छे, आर कतेखान कड़ा छे। जैला लोक विश्वास नी करछे, उसार तने वहाँय कठोर छे। परमेश्वर तुमसार पर दया करछे। अगर तुम्हरा वहार दयात बनाल नी रोहभेन, त वहाँय तुमसाक दूर करे दिबे। ^{२३} आर अगर यहूदी लोक मसीहार पर विश्वास करे, तब परमेश्वर फेर उसाक अपना लोक बनाय लिबे, जैकिसम कि कटाल ठल्लीलाक गाछटार साथे फेर जोड़े देयाल जाछे, क्योंकि परमेश्वर इकिसम करवा पारे। ^{२४} तुम्हरा गैर-यहूदी त जंगली जैतूनेर कटाल ठल्लीर मान्दी छेन। तुमसाक बगीचार असली जैतून गाछ जे यहूदी लोक छे, उसार साथे तुमसाक जोड़े देयाल गहे, जैडा कि संभव नी छे। जब परमेश्वर जंगली जैतूनेर ठल्लीक असली जैतून गाछेर से

साथे जोड़वा पारे, तब त परमेश्वर असली ठल्लीलाक असली जैतूनेर गाछेर साथे आढोह आसानी से जोड़वा सकेछे।

परमेश्वर इजराएली लोकेर पर दया देखाबे

२५ हे प्रिय भा-बहिनला, मुई तुमसाक कहवा चाहची कि तुम्हरा इडा भेदेर बातोक जानलेनतेन, त तुम्हरा अपना-आपेर पर घमंड नी करलेनतेन। कुछुला यहूदी लोकेर दिल सक्कत छे, मगर उसार दिल तब तक सक्कत रोहबे जब तक गैर-यहूदी लोकेर संख्या प्रभुर लिकिन ओसवार तने पूरा नी होचे। २६ आर वहार बाद इजराएली लोक बचबे। जैकिसम परमेश्वरेर वचनोत लिखाल छे, “यरूशलेम से बचानेवाला ओसबे, वहाँय याकूबेर लोकलार भीतर से बुराई दूर करबे। २७ उसार साथे मोर इडा वादा होबे कि मुई उसार पाप दूर करमु।” २८ खुश-खबरीडाक इन्कार करवार कारण इजराएली लोकला परमेश्वरेर दुश्मन बने गहे, आर इडार पैदा तुम्हरा गैर-यहूदी लोक पाहेन। मगर उसार दादो-परदादोलार कारण से वरा परमेश्वरेर चुनाल आर प्रेमी लोक छे। २९ परमेश्वर जैडा दान दिछे, आर जहाक बुलाछे, उडार बारे वहाँय अपना मन नी बदलेछे। ३० जैकिसम तुम्हरा एक समय हुकूम माननेवाला नी छिलेन, मगर अला यहूदी लोकेर हुकूम नी मनवार कारण से, तुम्हरा परमेश्वरेर दया पाहेन। ३१ अला यहूदी लोक हुकूम नी मानछे। परमेश्वर जैकिसम तुमसार पर दया करिहे, बाद करे वही

किसम परमेश्वर उसारो पर अपना दया देखाबे। ३२ पूरा मानुष जाति परमेश्वर हुकूम भाँगे दिहे, वहीलाते सबकोय परमेश्वरेर गोलाम छे, जसे कि वहाँय सब लोकेर पर अपना दया देखवा पारे। ३३ के परमेश्वरेर धन-दौलत, बुद्धि आर ज्ञानेर पता लगवा पारबे? वहार बिचार आर कामेर बारे के बुझवा पारबे? ३४ प्रभुर मनडाक के जनवा पारिहे? आर के वहाक सलाह-मशवरा दुवा पारे? ३५ परमेश्वरोक के कुछु दान दिहे कि परमेश्वर वहाक घुराय दिबे? ३६ सब कुछु त वहारे लिकिन से आर वहारे जरियाय ओसछे, आर सब कुछु वहारे तने छे। हमेशा वहार महिमा होते रोहोक। आमीन!

परमेश्वरोक जीवन समर्पण

१२ वहीलाते हे भा-बहिनला, परमेश्वर तुमसार पर बहुत बार दया करिहे। वहीलाते मुई तुमसाक बिनती करछी कि तुम्हरा अपना बदनडाक जिन्दा आर पवित्र बलिदान हिसाबे परमेश्वरेर हाथोत सोंपे दव जैडा बलिदानोक परमेश्वर ग्रहण करछे। आर परमेश्वरेर तने यहीडा सच्चा आराधना छे, जैडा तुमसाक करवा लागे। १ तुम्हरा दुनियाँर लोकेर चाल-चलन मुताबिक ना चलो, बल्के परमेश्वरोक तुमसार सोच-बिचारोक नया करवा दव आर तब वहार इच्छाक जनवा पारभेन कि परमेश्वरेर नजरोत की अच्छा छे, कि वहाक खुश करछे आर वहार तने

खाँटी बात की छे। ३ मुई परमेश्वरेर लिकिन से जैडा खास दया पाही, वहीडार कारण से मुई तुमसाक हरेकझनाक बोलछी कि तुमसाक अपना-आपोक जतेखान बोड़ो समझवा लागे, वहा से बेसी बोड़ो अपना-आपोक ना समझेन, बल्के जतेखान उचित छे, अतेखान समझेन। परमेश्वर जहाक जतेखान विश्वास करवार शक्ति दिहे, वहा से बेसी कोय अपना-आपोक ना समझोक। ४ जैकिसम हमसार हरेकझनार बदनोत बहुतला अंग छे, मगर सबला अंग एके किसमेर काम नी करछे। ५ ठीक वही मान्दी हमरा गेनतीत बहुतला होलेव, यीशु मसीहार साथे जुटे जवार कारण से एकटा बदन छी। हमरा सबकोय एक-दोसराझनार साथे जुड़े छी। ६ परमेश्वर अपना दया मुताबिक हमसाक सभाको अलग-अलग दान दिहे। कोय अगर भविष्यवाणी करवार दान पाहे, त वहाँय अपना विश्वासेर मुताबिक परमेश्वरेर वचन बोलोक। ७ अगर कोय सेवा करवार शक्ति पाहे, त वहाँय सेवा करोक। जहाँय सिखवार शक्ति पाहे, त वहाँय सीखाक। ८ जहाँय हौशला दुवार दान पाहे, वहाँय हौशला दोक। जहाँय लोकोक दान करवार दान पाहे, वहाँय सीधा मन से दान दोक। जहाँय मंडलीर तने नेता हवार दान पाहे, वहाँय इखान भार मनचित लगाय उठाक। जहाँय दया करवार दान पाहे, वहाँय खुशी-खुशी लोकेर पर दया करोक।

विश्वासी लोकेर तने निर्देश

१ तुम्हरा लोकोक सच्चा दिल से प्रेम करो। जैला जिनिस बुरा छे, उला से घिण करो। जैला जिनिस अच्छा छे, उलाक मजबूती से धरे रहव।
१० एक-दोसराझनाक विश्वासी भा-बहिन समझे प्रेम करो। अपना से बेसी दोसराझनाक इज्जत दव। ११ आलसी ना बनो। कठिन मेहनत करो आर पूरा भक्तिर साथे प्रभुर सेवा करो। १२ तुमसार उम्मेद तुमसाक खुशी राखोक। बिपत्तिर समय धीरज राखो। सबखुना प्रार्थना करो। १३ परमेश्वरेर लोकोक टाका-पैसार कमी होले, उसार मदद करवार तने तैयार रहव। मेहमानेर मान-खातिर करवार तने हरखुना तैयार रहव। १४ जैला लोक तुमसाक सताछे, उसाक आशीर्वाद दव। परमेश्वरेर लिकिन प्रार्थना करो कि परमेश्वर उसाक श्राप नी दे, बल्के उसाक आशीर्वाद दे। १५ जैला लोक खुशी मनाछे, उसार साथे खुशी मनाव। जैला लोक कानछे, उसार साथे कानो। १६ तुम्हरा आपसोत मिले-जुले रहव। तुम्हरा घमण्डी ना होयेन, बल्के गरीब लोकेर साथे हिले-मिले रहव। अपना-आपोक बुद्धिमान ना समझो। १७ बुराईर बदले कहारो बुराई ना करो। सब लोकेर नजरोत जैला अच्छा छे, वहीला बातेर पर मन लगाव। १८ जतेखान पारेन, सभारो साथे मिले-जुले रहवार कोशिश करो। १९ मोर प्यारा भा-बहिनला, तुम्हरा खुद कहारो बदला ना लेन, बल्के परमेश्वरोक बदला लुवा दव। परमेश्वरेर वचनोत लिखाल छे,

“बदला लुवार काम मोर छे, प्रभु कोहचे, मुहें बदला लुम।” २० वहाँय कोहचे, “अगर तोर दुशमन भूखाय छे, त वहाक खाना खिला। अगर प्यासा छे, त वहाक पानी खिला। क्योंकि अगर इकिसम करिस त वहाँय शर्मोत पोड़े जाबे।” २१ बुराईक जीतवा ना दव, बल्के अपना भलाईर काम से बुराईक जीते लव।

विश्वासी आर सरकारी हाकिम

१३ हरेकइन विश्वासी लोकोक शासन करनेवाला हाकिमेर अधीनोत रहवा लागे। कारण, सबला अधिकार परमेश्वरेर तरफ से ओसछे। दुनियाँत जताला अधिकार वाला हाकिम छे, उला सबला हाकिमोक परमेश्वर ठहराहे। १ वहीलाते जहाँय हाकिमलार खिलाफ थाड़ो होचे, वहाँय परमेश्वरेर जरियाय ठहराल नियमेर खिलाफ थाड़ो होचे। जैला लोक इकिसम काम करछे, वरा अपना उपरोत परमेश्वरेर सजई पाबे। ३ जैला लोक अच्छा काम करछे, उसाक शासन करनेवाला से कोय डोर नी रोहचे, मगर जैला लोक गलत काम करछे, उसाक डोर रोहचे। अगर शासन करनेवाला से तुम्हरा बिना डोर से रहवा चाहचेन, त अच्छा काम करो। इकिसम करले तुम्हरा उसार लिकिन से शाबासी पाभेन। ४ हर एकइन शासन करनेवाला तुमसार भलाई करवार तने परमेश्वरेर नौकर छे। तुम्हरा अगर गलत काम करभेन, त तुम्हरा डोराव। कारण उसार

लिकिन तुमसाक सजा दुवार शक्ति छे। कानूनेर खिलाफ चलनेवाला परमेश्वरेर तरफ से सजई पाबे। वरा परमेश्वरेर नौकर छे आर जैला लोक गलत काम करछे, उसार पर परमेश्वरेर सजाक लागू करछे। ५ वहीलाते तुमसाक शासन करनेवालार लोकेर कहना मनवा होबे। परमेश्वरेर सजई पवार डोर से सिरिफ उसार अधिकारोत ना रोहेन, बल्के तुम्हरा आपने जानेन कि इकिसम करना सही छे। ६ आर वहीलाते तुम्हराव सरकारी खजना दव क्योंकि खजना वसूल करनेवाला अपना कामेर जरियाय परमेश्वरेर सेवा करछे। ७ हाकिमलाक जैडा दुवा लागे उडा दव। हाकिमोक अपना सामान आर जगह-जमीनेर खजना दव। आर उसार सभारो मान-सम्मान करो।

प्रेम

८ प्रेमेर सिवाय कहारो कोय चीजेर कर्जदार ना होयेन। जहाँय अपना पड़ोसीक प्रेम करछे, वहाँय परमेश्वरेर नियम पूरा करछे। ९ परमेश्वरेर हुकूम छे: कुकरम ना करेन, कहाको जान से ना मारेन, चूरी ना करेन, लालच ना करेन। इला हुकूमोक आर दोसरा कोय हुकूमोक एक साथे कहाल जाबे, “अपना पड़ोसीक अपनार मान्दी प्रेम करेन।” १० प्रेम करनेवाला लोक अपना पड़ोसीर खिलाफ कोय गलत काम नी करछे। क्योंकि प्रेमेर जरियाय परमेश्वरेर नियम-कानून पूरा होचे।

विश्वासी लोकोक बुराई से दूर रहवा लागे

११ तुम्हरा इखान जरूर करो क्योंकि तुम्हरा जानेन कि तुमसार निन से जागिल हवार समय चले ओसिहे। आखरी समय चले ओसिहे कि प्रभु यीशु हमसाक इडा दुनियाँर दुख-तखलीफ आर पाप से बचाबे। हमरा जैखुन से विश्वास करिही, उखुन से अला बेसी प्रभुर ओसवार समय बहुत नजदीक चले ओसिहे। १२ रात खतम होनेवाला छे, आर दिन निकलनेवाला छे। वहीलाते हमसाक अंधकारेर बुरा कामलाक छोड़े दुवा लागे, आर रोशनीर हथियारलाक ग्रहण करे लुवा लागे। १३ हमसाक अच्छा व्यवहार करना जरूरी छे। जैला लोक दिनेर उजालात रोहचे, हमसाक उला लोकेर मान्दी व्यवहार करवा लागे। आर जैला लोक नशाबाज छे, बदनेर गंदा काम करछे आर झगड़ा-झंझट करछे आर ईर्ष्या-जलन करनेवाला छे, हमसाक उला लोकेर मान्दी हवा नी लागे। १४ मगर तुम्हरा प्रभु यीशु मसीहार मान्दी बनो, आर तुम्हरा अपना बदनेर पाप करवार इच्छाडाक संतुष्ट करवा छोड़े दव।

विश्वासीर जीवनेर जरियाय प्रभुर महिमा

१४ जैडा लोक विश्वासोत कमजोर छे, वहाक ग्रहण करो, मगर वहार कमजोर विश्वासेर बारे बहसबाजी मत करो। २ एकझन लोक विश्वास करछे कि सब कुछ खाना सही छे, मगर जहाँय विश्वासोत कमजोर छे,

वहाँय सिरिफ साग-पात खाचे। ३ जैडा लोक सब कुछ खाचे, वहाँय साग-पात खानेवाला लोक से घिण ना करोक आर ना साग-पात खानेवाला वहार पर दोष लगाय, जहाँय सब कुछ खाचे, क्योंकि परमेश्वर वहाक ग्रहण करिहे। ४ तुई के छिस जे दोसरा लोकेर नौकरेर पर दोष लगाछिस? नौकरटा ठीक करछे ना गलत करछे, इडा बात वहार अपना मालिक कोहबे। वहाँय ठीक करबे क्योंकि प्रभु वहाक ठीक करवार शक्ति दिछे। ५ कहारो तने कोय एकटा दिन दोसरा दिन से बेसी अच्छा छे। फेर कुछला विश्वासी सबला दिनोक बराबर मानछे। इडार बारे सभाको अपना-अपना मनोत ठाने लुवा लागे कि वहाँय कुनडा दिन अच्छा मानछे। ६ जहाँय एकटा दिनोक बेसी अच्छा मानछे, वहाँय प्रभुक महिमा दुवार तने अच्छा मानछे। जहाँय सब कुछ खाचे, वहाँय प्रभुर तने खाचे। कारण, वहाँय परमेश्वरेर शुकुरिया करछे। जहाँय सब कुछ नी खाचे, वहाँय प्रभुर तने नी खाचे आर परमेश्वरेर शुकुरिया करछे। ७ हमसार भीतरोत कोय अपना-आपेर तने जिन्दा नी रोहचे, आर ना कोय अपना-आपेर तने मोरछे। ८ अगर हमरा जिन्दा छी, त प्रभुर तने जिन्दा छी। आर अगर मोरछी, त प्रभुर तने मोरछी। चाहे हमरा जिन्दा रही या मोरे जई, हमरा प्रभुरे लोक छी। ९ यहीडा कारण मसीहा मोरिल आर जिन्दा हंय उठिहिले, जसे कि वहाँय जिन्दा आर मुर्दा दोनोंझनार प्रभु हवा पारे। १० तुई अपना भा-बहिनेर कसूर क्याँ

देखछिस, आर फेर अपना भा-बहिनोक तुच्छ क्याँ समझेछिस? क्याँकि इन्साफेर दिनोत हमरा सबकोय त परमेश्वरेर गद्दीर आगुत थाड़ो होमु। ११ परमेश्वरेर शास्त्रोत लिखाल छे, “प्रभु कोहचे, मुई अपना नामेर कसम खाय कोहची कि हर एकझन मोर आगुत हटुवा पारबे, आर सब लोक अपना-अपना मुख से मोर बारे कबूल करबे कि यहीं परमेश्वर छे।” १२ वहीलाते हमसाक हर एकझनाक अपनार बारे परमेश्वरेर लिकिन हिसाब दुवा होबे।

एक-दोसराझनार पर दोष नी दुवा लागे

१३ जब हमसाक परमेश्वरोक हिसाब दुवा होबे, त हमरा एक-दोसराझनार पर दोष लगवा छोड़े दी, आर हमसाक इडा मनोत ठाने लुवा होबे कि हमरा कोय भा-बहिनेर तने बाधा दुवार काम ना करी। १४ प्रभु यीशुर साथे मिले जवार कारण से मुई अच्छा करे जानी कि खवार कोय चीज सचमुचोत खराब नी छे। मगर अगर कोय लोक कोयखान खवार चीजोक अशुद्ध समझेछे त उखान चीज वहारे तने अशुद्ध छे। १५ कोयखान खवार चीजेर तने अगर तुई तोर भा-बहिनेर दिलोत दुःख दिछिस, तब तुई अपना भा-बहिनेर साथे प्रेम से बर्ताव नी करछिस, जे भा-बहिनेर तने मसीहा अपना जान दिहिले। तोर खान-पान वहाक बर्बाद हवार कारण ना बने। १६ जैडा खान-पान तुमसाक अच्छा लागछे, उडा तुमसाक बदनाम ना करे। १७ परमेश्वरेर राजोत खान-पान

बोड़ो बात नी छी, मगर पवित्र आत्मार जरियाय परमेश्वरेर इच्छा मुताबिक जीवन बिताना, शांति से रहना, खुशी से रहना, बोड़ो बात छे। १८ जहाँय इकिसम करे यीशु मसीहार सेवा करछे, परमेश्वर वहा से खुश होचे, आर लोकलाव वहाक अच्छा समझेछे। १९ वहीलाते हमसाक उला काम करवार कोशिश करवा लागे, जैला से सभारो बीचोत मेल-मिलाप होचे आर दोसरा लोकोक विश्वासोत मजबूत बनाछे। २० तुम्हरा अपना खान-पानेर जरियाय परमेश्वरेर काम बिगड़ाय ना देन। सबला खवार चीज शुद्ध छे। अगर कोय अपना खानार जरियाय दोसरा लोकोक पाप कराछे, त इडा गलत छे। २१ इडा से अच्छा छे कि मांस नी खाय, अंगुरेर रस नी खाय, या दोसरा कुछु इकिसम ना करे, जैला तुमसार भा-बहिनोक पाप कराछे। २२ यहार बारे तुई अच्छा समझे जैडा विश्वास करछिस, उडा बातोक परमेश्वर आर तोहरे बीचोत राखेक। अच्छा समझे कुछु करवार समय अगर कहारो दिल वहाक दोषी नी करछे, तब वहाँय आशीर्वाद पवार लायक छे। २३ मगर अगर कोय मनोत शक करे कुछु खाचे, तब त वहाँय दोषी छे, क्योंकि वहाँय अपना विश्वासेर मान्दी काम नी करछे। अपना विश्वासेर खिलाफ कुछु करना पाप होचे।

दोसराइनार उन्नतिर बारे सोचो

१५ हमरा जैला लोक विश्वासोत मजबूत छी, कमजोर विश्वासीर कमजोरीक बर्दास्त करी। हमरा अपना-आपोक खुश करवार धुनोत ना रोहई। २ हमसार बीच से हरेकइन अपना पड़ोसी भा-बहिनेर भलाई करी जसे कि वरा प्रभुर शिक्षात आगु बढ़ते जाय ३ क्योंकि यीशु मसीहा अपना-आपोक खुश नी करिल। वहार बारे परमेश्वरेर वचनोत लिखाल छे, “जहाँय तोर बेज्जती करछे, उला सबला बेज्जती मोहरे पर पोड़िहे।” ४ परमेश्वरेर शास्त्रोत जतेला बात पहिले से लिखाल गहे, उला सबला बात हमसाक शिक्षा दुवार तने लिखाल गहे जसे कि हमसाक धीरज आर हौशला मिले। अगर हमरा इडा करी, हमरा प्रभुर वादा पूरा हवार उम्मेद करवा पारी। ५ परमेश्वर जहाँय हमसाक धीरज धरवार शक्ति दिछे आर हौशला दिछे, मुई वहार लिकिन प्रार्थना करछी कि वहाँय तुमसाक एकमन हंय रहवार तने मदद करे, जैडा मसीहार साथे विश्वासी भाई-बहिनेर तने ठीक छे। ६ इकिसम होले तुम्हरा एक मन हंय परमेश्वर आर हमसार प्रभु यीशु मसीहार पितार बड़ाई करवा पारभेन।

खुश-खबरी सभारो तने

७ तुम्हरा एक-दोसराझनाक अपनाय लव जैकिसम कि मसीहा तुमसाक अपनाय लिहे जसे कि परमेश्वरेर बड़ाई होय। ८ वहीलाते मुई कोहची कि मसीहा यहूदी लोकेर सेवक बने गेल। वहाँय इकिसम करे इडा देखाल कि जैला वादा परमेश्वर हमसार बाप-दादोलाक करिहिले, उला वादाक वहाँय पक्का करे। ९ मसीहा ओसिल जसे कि गैर-यहूदीलाव परमेश्वरेर दया पाय वहार बड़ाई करे। इडार बारे परमेश्वरेर शास्त्रोत लिखाल छे, “वहीलाते सब देशेर लोकेर बीचोत मुई तोर बड़ाई करमु, आर तोर नामेर भजन-गीत गामु।” १० फेर यहोडा कहाल गहे, “हे सब देशेर लोकला, तुम्हरा वहार लोकलार साथे परमेश्वरेर बड़ाई करो। ११ सब देशेर लोकला प्रभुर बड़ाई करोक, आर धरतीर सब लोक वहार बड़ाई करो।” १२ यशायाह नबी फेर कोहचे, “यिशैर खानदान से एकझन ओसबे आर सबला देशेर लोकेर पर राज करबे, आर वहार पर सब देशेर लोक उम्मेद करबे।” १३ परमेश्वर जहाँय उम्मेद दिछे, तुमसाक विश्वास करवार तने सब किसमेर खुशी आर शान्ति से भरपूर करोक। तब पवित्र आत्मार शक्ति तुमसार दिलोत उम्मेद से आर शान्ति से भरपूर करे दिबे।

गैर-यहूदी लोकेर बीचोत पौलुसेर काम

१४ मोर भा-बहिनला, मुई तुमसार बारे इडा बात विश्वास करछी कि तुमसार दिलला अच्छा सोच-बिचार से भराल छे। तुमसार लिकिन सब किसमेर ज्ञान छे, आर तुम्हरा एक-दोसराझनाक उपदेश दुवा पारभेन। १५ मुई तुमसाक आरमने कुछुला बात ख्याल करे दुवा चाहची, आर वहीलाते मुई तुमसाक हिम्मत से लिखनु, क्योंकि परमेश्वर मोर पर दया करिहे। १६ परमेश्वर अपना दया से मोक गैर-यहूदी लोकेर तने यीशु मसीहार सेवक बनाहे आर वहार खुश-खबरीर प्रचार करवार तने मोक पूजारी बनाहे। परमेश्वर इकिसम करिल जसे कि पवित्र आत्मा गैर-यहूदी लोकोक परमेश्वरोक खुश करनेवाला बलिदान बनाय दे। १७ मुई परमेश्वरेर तने जैला काम करछी, उलार कारण से यीशु मसीहार जरियाय मुई घमंड करवा पारी। १८ क्योंकि यीशु मसीहा मोर जरियाय जैला काम करिहे, उलाक छोड़े आर कोय बोलवार साहस मुई नी करमु। यीशु मोर वचन आर कामेर जरियाय गैर-यहूदी लोकोक परमेश्वरेर हुकूम माननेवाला बनाहे। १९ वरा मोर जरियाय चिन्ह आर चमत्कारेर काम आर पवित्र आत्मार काम देखे परमेश्वरेर पर विश्वास करिल। इकिसम करे मुई मसीहार खुश-खबरी यरूशलेम शहर से ले ईल्लुरिया इलाकात फैलाय दिनु। २० जैला जगहोत यीशु मसीहार नामे कोयखुना प्रचार कराल नी जाय, वहीला जगहोत खुश-खबरीर प्रचार

करवार इच्छा मोर दिलोत छिले, जसे कि दोसराझनार बनाल नींवेर पर मुई घर ना बनई। २१ परमेश्वरेर शास्त्रोत लिखाल छे, “जहार लिकिन मसीहार बारे बोलाल नी जाय, वरा उडाक देखवा पारबे, आर जहाँय नी सुने, वरा बुझवा पारबे।” २२ तुमसार लिकिन बहुत बार जवा चाहनु, मगर खुश-खबरीर प्रचारेर कामेर कारण से तुमसार लिकिन जाते देरी होचे। २३ मगर इला इलाकात काम करवार तने मोर तने कोय जगह बाँकी नी छे। बहुत साल से तुमसार लिकिन जवार मोर इच्छा छे। २४ वहीलाते अला स्पेन देश जवार रास्तात मुई तुमसार लिकिन जवा चाहची। मुई इडा उम्मेद करछी कि इडा रास्ता दे जवारखुना तुमसार लिकिन जवा पारमु, आर तुमसार साथे कुछु दिन खुशी से रोहमु। यहार बाद तुम्हरा मोक स्पेन देश जल्दी पठाय दिभेन। २५ मगर अला मुई परमेश्वरेर लोकलार मदद करवार तने यरूशलेम शहर जाछी। २६ यरूशलेम शहरोत परमेश्वरेर लोकलार बीचोत जैला गरीब लोक छे, उसार तने मकिदोनिया आर आखाया इलाकार मंडलीर लोकला कुछु चंदा उठाहे। २७ इला चंदा वरा अपना खुशी से उठाहे। इला मंडलीर लोकला यरूशलेम शहरेर परमेश्वरेर लोकलार लिकिन कर्जदार छे क्योंकि यहूदी लोक अपना आत्मिक आर्शीवादेर हिस्सा गैर-यहूदी लोकलाक के दिहे, तब गैर-यहूदी लोकलाक उचित छे कि वरा अपना टाका-पैसा से उसार मदद करे। २८ वहीलाते इखान काम खतम करे

आर उसार हाथोत इला चंदा सोंपे दे, तुमसार लिकिन ओसमु आर तुमसार लिकिन से स्पेन देश चले जामु। २९ आर मुई जानी कि जैखुना मुई तुमसार लिकिन ओसमु त मुई तुमसार तने यीशु मसीहार पूरा आशीर्वाद ले ओसमु। ३० हे मोर भा-बहिनला, मुई तुमसाक प्रभु यीशु मसीहार नामे आर पवित्र आत्मार प्रेम से बिनती करे कोहची कि मोर तने परमेश्वरेर लिकिन प्रार्थना करवार तने मोर साथे लागे रहव। ३१ तुम्हरा प्रार्थना करो कि परमेश्वर मोक यहूदिया प्रदेशेर अविश्वासीला से बचाय राखे, आर यरूशलेम शहरोत परमेश्वरेर लोकला मोर कामोक पसन्द करे। ३२ आर मुई परमेश्वरेर इच्छा मुताबिक तुमसार लिकिन खुशी-खुशी ओसवा पारी जसे कि हमरा एक-दोसराझनाक हौशला दी। ३३ मुई प्रार्थना करछी कि शान्ति देनेवाला परमेश्वर तुमसार साथे रोहोक। आमीन!

पौलुसेर सलाम

१६ मुई हमसार बहिन फीबीर तने बिनती करछी, जहाँय किंखिया शहरोत मंडलीर सेविका छे। १ प्रभुर नामे तुम्हरा बहिन फीबीक ग्रहण करे लव, जैकिसम परमेश्वरेर लोकलाक ग्रहण करवा लागे। आर कोय बातेर तने वहाक अगर तुमसार मददेर जरूरी हंय त तुम्हरा वहार मदद करेन, क्योंकि वहाँय बहुत लोकेर मदद करिहे, इकिसम वहाँय मोहको

मदद करिहे। ३ प्रिस्का आर अक्विलाक मोर सलाम, यरा मसीहा यीशुर कामेर तने मोर साथी छे। ४ दोनोंइन मोर जानडाक बचवार तने अपना-अपना जान खतरात फिकाय दिहिले। खाली मुहें नी, बल्के गैर-यहूदी लोकेर सबला मंडलीयो उसार शुक्रिया करछे। ५ वहार घरोत जैडी मंडली छे, उडी मंडलीको नमस्कार। मोर प्यारा बन्धु इपैनितुसोक नमस्कार, जहाँय आसिया इलाकात मसीहार तने पहिला विश्वासी छे। ६ मरियमक नमस्कार जहाँय तुमसार तने बहुत मेहनत करिहे। ७ अन्द्रोनिकुसोक आर यूनीयासोक नमस्कार, जहाँय मोर रिस्तेदार छे, आर मोर साथे कैद छिले, आर मसीह दूतलार बीचोत नामी छे आर मोसे पहिले मसीह यीशुर विश्वासी होयले। ८ अम्पिलियातुसोक मोर नमस्कार कहेन, यहाँय मोर प्यारा दोस्त छे, जहाँय प्रभु यीशुर पर विश्वास करछे। ९ उरबानुसोक जहाँय यीशु मसीहार कामोत हमसार सहकर्मी छे, आर मोर प्यारा दोस्त इस्तखुसोक नमस्कार। १० अपिलेसोक नमस्कार, वहाँय देखाहे कि वहाँय मसीहा तने बहुत बेसी बफादार छे। अरिस्तुबुलुसेर परिवारोक नमस्कार। ११ मोर रिस्तेदार हेरोदियोनक नमस्कार। नरकिस्सुसेर घरानार, जैला लोक यीशु मसीहाक मानछे, उसाक नमस्कार १२ त्रूफेनाक आर त्रूफास सेविकालाक नमस्कार। यरा प्रभुर कामोत मेहनत करिहे। प्यारा बहिन पिरिसोक नमस्कार, जहाँय प्रभुर कामेर तने बहुत मेहनत करिहे।

१३ रूफुस, जहाक प्रभुर कामेर तने चुनाल गहे। वहाक आर वहार माँक जहाँय मोहरो माँ छे, दोनोंझनाक नमस्कार। १४ असंक्रितुस, फिलगोन, हिरमेस, पत्रुबास, हिर्मास आर वहार साथे भईलाक नमस्कार। १५ पिलुलुगुस आर यूलिया आर भई नेर्युस आर वहार बहिन आर उलुम्पास आर वहार साथे सबला पवित्र लोकोक नमस्कार। १६ अपना बीचोत एक-दोसराझनाक पवित्र मन से नमस्कार करो। यीशु मसीहार सबला मंडलीर तरफ से तुमसाक नमस्कार।

पौलुसेर आखरी निर्देश

१७ हे मोर भा-बहिनला मुई तुमसाक बिनती करछी कि तुम्हरा उला लोक से हुँसियार रहेन जैला लोक तुमसार अन्दरोत फूट पैदा करछे आर तुमसार विश्वासोक डमाडोल करे दिछे, आर हमसार शिक्षार उल्टा शिक्षा दिछे, उसासे दूर रहेन। १८ इकिसम लोक प्रभु यीशु मसीहार तने नी, बल्के अपना पेटेर पूजा करछे, आर मीठा-मीठा चापलुसीर बात बोले सीधा-साधा लोकोक बहकाय दिछे। १९ तुमसार बारे सबकोय जानछे कि तुम्हरा प्रभुर हुकूम मानछेन। वहीलाते मुई तुमसार बात सुने खुशी मनाछी। मगर मुई इडा चाहची कि जैडा अच्छा छे, तुम्हरा उडा करो, आर बुराई से दूर रहव। २० शान्ति देनेवाला परमेश्वर शैतानोक जल्दी करे तुमसार पाँर तोलोत कुचले दिबे। हमसार प्रभु यीशु मसीहार दया तुमसार पर होते रोहोक। २१ मोर साथे काम करनेवाला तिमोथी

तुमसाक नमस्कार कोहचे। मोर रिस्तेदारला लूकियुस, यासोन आर सोसिपत्रुस तुमसाक नमस्कार कोहचे। २२ मुई तिरतियुस, पौलुसेर इखान चिठ्ठी लिखछी। मुई प्रभु यीशु मसीहार नामे तुमसाक नमस्कार कोहची। २३ गयुस जहाँय मोर आर मंडलीर पूरा विश्वासी लोकेर मान-खातिर करछे, वहाँय तुमसाक नमस्कार कोहचे। इरासतुस, जहाँय शहरटार खजाँची छे, वहाँय तुमसाक नमस्कार कोहचे, आर हमसार भई क्वारतुस तुमसाक नमस्कार कोहचे। २४ [हमसार प्रभु यीशु मसीहार दया तुमसार सभारो पर होते रोहोक।]

परमेश्वरेर बड़ाई

२५ परमेश्वरेर महिमा होक। परमेश्वर तुमसाक यीशु मसीहार खुश-खबरीर जरियाय विश्वासोत मजबूत करवा पारे, जे खुश-खबरीर मुई प्रचार करछी। इडा खुश-खबरी उडा भेदेर बात छे, जैडा बहुत युग तक परमेश्वर प्रकट नी करे। २६ मगर अला परमेश्वर अपना नबीलार लिखाल किताबेर जरियाय उडा भेदेर बातोक प्रकट करिहे, आर हमेशा रहनेवाला परमेश्वरेर हुकूमेर जरियाय उडा भेदेर बातोक सब देशेर लोकेर लिकिन प्रकट कराल गहे, जसे कि वरा मसीहार पर विश्वास करे परमेश्वरेर हुकूम माननेवाला बने। २७ यीशु मसीहार जरियाय सिरिफ वही ज्ञानवान परमेश्वरेर महिमा हमेशार तने होते रोहोक! आमीन!

कुरिनथियुस शहरेर मंडलीक पौलुसेर पहिला चिट्ठी

१-२ कुरिनथियुस शहरेर विश्वासी भा-बहिनला, मुई पौलुस छी। परमेश्वर अपना इच्छा मुताबिक मोक यीशु मसीहार दूत हवार तने अलग करिहे। आर मोर साथे भई सोस्थिनेस छे। मुई तुमसार तने इखान चिट्ठी लिखछी। परमेश्वर तुमसाक अपना पवित्र लोक हवार तने चुने लिहे, आर तुमसाक यीशु मसीहार जरियाय पवित्र करिहे। तुम्हरा प्रभुर नाम लिछेन, जैकिसम हमरा आर दोसरा-दोसरा लोक वहाक अपना प्रभु मानछे। ३ हमसार पिता परमेश्वर आर प्रभु यीशु मसीहार तरफ से तुमसाक दया आर शान्ति मिलते रोहोक।

मंडलीर तने परमेश्वरोक शुकुरिया

४ मुई हरखुना तुमसार तने अपना परमेश्वरेर शुकुरिया करछी क्यौंकि परमेश्वर यीशु मसीहार जरियाय तुमसार पर दया करिहे। ५ आर व्हारे जरियाय तुम्हरा सब पाके अपना बोली-वचन आर ज्ञानेर पाके धनी बनाल गहेन। ६ इडा से प्रमाण होचे कि मसीहार बारे हमरा जैडा बताहिनु, उडा सच छे। ७ तुम्हरा प्रभु यीशु मसीहार घुरे ओसवार इन्तेजार करछेन, आर तुमसाक कोय आत्मिक दानेर कमी नी छे।

८ परमेश्वर तुमसाक प्रभु यीशु मसीहार ओसवार समय तक मजबूत राखबे जसे कि तुम्हरा निर्दोष रोहेन। ९ परमेश्वर इडा करबे क्योंकि परमेश्वर जैडा बोलछे, उडा करछे। आर परमेश्वर तुमसाक अपना बेटा यीशु मसीहार साथे संगति करवार तने बुलाहे।

मंडलीत फूट

१० भा-बहिनला! मुई तुमसार लिकिन हमसार प्रभु यीशु मसीहार नामे अनुरोध करछी कि तुम्हरा आपसोत एक मन से रोहेन। तुमसार बीचोत फूट पैदा ना होक, आर तुम्हरा एक मन हंय आपसोत मेल-मिलाप से रोहेन। ११ मोर भा-बहिनला! तुमसार बारे भाई खलोएर परिवारेर लोकलार लिकिन से इडा खबर पानु कि तुमसार बीचोत झगड़ा होचे। १२ मोर बोलवार मतलब छे कि तुमसार बीच से कोय कोहचे, “मुई पौलुसेर चेला छी।” दोसराझन कोहचे, “मुई अपुल्लोसेर चेला छी,” आर कोय कोहचे, “मुई पतरसेर चेला छी” आर कोय कोहचे, “मुई मसीहार चेला छी।” १३ मसीहा की बँटे गहे? पौलुसोक की तुमसार तने क्रुसोत चढ़ाहिले? तुम्हरा की पौलुसेर नामे बपतिस्मा लिहिलेन? १४ मुई परमेश्वरेर शुक्रिया करछी कि क्रिसपुस आर गयुसोक छोड़े तुमसार बीच से मुई आर कहाको बपतिस्मा नी दी। १५ कोय इडा नी कहवा पारबे कि तुम्हरा मोर नामे बपतिस्मा लिहेन। १६ आर हाँ, मुई इस्तिफनुसेर परिवारको बपतिस्मा दिही। यहार सिवाय मोक आर

ख्याल नी होचे कि मुई आर कहाको बपतिस्मा दिही १७ कयाँकि मसीहा मोक बपतिस्मा दुवार तने नी, बल्के खुश-खबरीर प्रचार करवार तने पठाहे। वहाँय मोक ज्ञानी लोकेर भाषात प्रचार करवार तने नी पठाय, अगर मुई इकिसम करी त लोक क्रुसेर पर मसीहार मौतेर शक्तिर पर भरोसा नी करबे।

मसीहा परमेश्वरेर ज्ञान आर शक्ति छे

१८ नाश होनेवालार तने क्रुसेर शिक्षा बेकूफीर बात छे, मगर हमरा जहाँय पाप से मुक्ति पाते जाछी, क्रुसेर शिक्षा हमसार तने परमेश्वरेर शक्ति छे। १९ जैकिसम परमेश्वरेर वचनोत कोहचे, “मुई ज्ञानी लोकेर ज्ञानलाक नाश करे दुम, आर बुद्धिमानेर बुद्धिक बेकार करे दुम।” २० कुनठिन छे ज्ञानी लोक? कुनठिन छे शास्त्रेर जानकार लोक? आर उला लोक कुनठिन छे, जैला लोक कोहचे, “मोर लिकिन सबला बातेर जवाब छे।” परमेश्वर त इडा दुनियाँर ज्ञानोक बेकूफी साबित करे दिहे। २१ आर परमेश्वर अपना ज्ञान से लोकोक बताहे कि इडा दुनियाँर लोक अपना ज्ञानेर जरियाय परमेश्वरोक कभी जनवा नी पारबे। जैखान खुश-खबरीर प्रचार कराल जाछे, लोक उखानोक बेकार समझेछे, मगर परमेश्वरोक अच्छा लागिल कि वहाँय उला लोकोक बचाबे, जहाँय उडा खुश-खबरीर पर विश्वास करबे। २२ यहूदी लोक चमत्कारेर काम देखवा चाहचे, आर यूनानी लोक ज्ञानेर खोज करछे। २३ मगर हमरा यीशु मसीहार प्रचार

करछी, जहाक क्रुसेर पर चढ़ाल गहिले। इडा बातोक यहूदी लोक मनवा
नी चाहचे, आर यूनानी लोक इडा बातोक बेकूफीर बात समझेछे।
२४ मगर जहाक परमेश्वर बुलाहे, चाहे यहूदी होक या यूनानी, सभारो
तने मसीहा परमेश्वरेर शक्ति आर ज्ञान छे। २५ मानुष जैला बातोक
परमेश्वरेर बेकूफी समझेछे, उला बात मानुषेर ज्ञान से बेसी बुद्धिमानीर
बात छे, आर मानुष जैला बातोक परमेश्वरेर कमजोरी समझेछे, उला
बात मानुषेर शक्ति से बेसी शक्तिशाली छे। २६ भा-बहिनला! जैखुना
परमेश्वर तुमसाक बुलाहिले, उखुना तुम्हरा कुन किसमेर लोक छिलेन,
उडा बात सोचे देखो। मानुषेर नजरोत तुमसार भीतर से बहुतझन
बुद्धिमान नी छिलेन, आर बहुतझन नामी-गामी नी छिलेन, आर ना
बहुतझन नामी खानदानोत जनम लिहिलेन। २७ मगर परमेश्वर इ-
दुनियाँत बेकूफ लोकलाक बिछे लिले, जसे कि ज्ञानी लोकला शरमिन्दा
हंय जाय। दुनियाँ जैडाक कमजोर सोचिल परमेश्वर वहीडाक बिछे
लिले, ताकि जहाँय शक्तिशाली छे, वहाँय कमजोर बने जाय।
२८ परमेश्वर दुनियाँर नीच आर बेकार लोकोक बिछे लिले, इकिसम कि
जैलार गिनती लोकेर बीचोत नी छे, परमेश्वर उसाको बिछे लिले, जसे
कि जहाँय अपना-आपोक कुछु समझेछे, उसाक बेकार बनाय दे २९ जसे
कि कोय लोक परमेश्वरेर आगुत घमंड करवा नी पाड़े। ३० परमेश्वरेर
चलते तुम्हरा यीशु मसीहार लोक छेन। परमेश्वर प्रभु यीशु मसीहार

जरियाय हमसाक बुद्धिमान बनाहे, हमसाक धर्मी ठहराहे, हमसाक पवित्र करिहे आर हमसाक पाप से आजाद करिहे। ३१ वहीलाते पवित्र शास्त्रोत इकिसम लिखाल छे, “जहाँय घमंड करवा चाहचे, वहाँय प्रभुर पर घमंड करोक।”

२ प्रिय भा-बहिनला! मुई जैखुना तुमसार लिकिन ओसे परमेश्वरेर वचनोक प्रचार करछिनु, उखुना ज्ञानेर बोड़ो-बोड़ो बात नी बोली। २ क्योंकि मुई इडा ठाने लिहिनु कि तुमसार बीचोत रहवारखुना खाली यीशु मसीहार बारे बोली, जहाक क्रुसेर पर चढ़ाल गहिले, आर कुछु बोलवा नी चाहनु। ३ जैखुना मुई तुमसार बीचोत छिनु, उखुना मुई अपना-आपोक कमजोर सोचेछिनु आर डोरे काँपछिनु। ४ मोर प्रचार आर मोर उपदेशोत ज्ञानेर फूसलुवार बात नी छिले, बल्के पवित्र आत्मार शक्तिर प्रमाण छिले ५ जसे कि तुमसार विश्वास मानुषेर ज्ञान-बुद्धिर पर नी, बल्के परमेश्वरेर शक्तिर उपरोत निर्भर रहय।

पवित्र आत्मार देयाल परमेश्वरेर ज्ञान

६ मजबूत विश्वासीर बीचोत हमरा ज्ञानेर बात बताछी, हमरा इ-युगेर ज्ञान आर इ-युगेर हाकिमलार ज्ञानोक नी बताछी, जैला खतम हंय जाबे। ७ हमरा लोकोक परमेश्वरेर योजनार बारे सिखाछी, जैडा कि छुपाल छिले। शुरुत परमेश्वर अपना योजना बनाल कि हमरा वहार

महिमार भागीदार हवा पारी। ८ इडा दुनियाँर हाकिमला इला बातोक समझुवा नी पारिल। अगर वरा समझिलतेन, त महान प्रभु यीशुक क्रुसेर पर नी चढ़ालतेन। ९ जैकिसम परमेश्वरेर वचनोत लिखाल छे कि, परमेश्वरोक जहाँय प्रेम करछे, उसार तने परमेश्वर कुछु तैयार करे राखिहे। उलाक कोय आँख से नी देखिहे, ना उलार बारे कान से सुनिहे, आर ना उलार बारे अपना दिलोत सोचिहे। १० मगर परमेश्वर अपना आत्मार जरियाय हमसार लिकिन उला बातोक बताहे, क्योंकि परमेश्वरेर आत्मा सब कुछु पता लगाछे। इकिसम कि परमेश्वरेर बहुत गहिरा बातलाको मालूम करे लिछे। ११ मानुषेर बीचोत इकिसम कोय मानुष नी छे जहाँय दोसरा मानुषेर दिलेर बातलाक जनवा पारे। मानुषेर भीतरोत जैडा आत्मा छे, खाली वहाँय अपना दिलेर बातला जाने। वही मान्दी परमेश्वरेर आत्माक छोड़े परमेश्वरेर मोनेर बातलाक दोसरा कोय जनवा नी पारछे। १२ मगर हमरा दुनियाँर आत्मा नी पाही, बल्के उडा आत्मा पाही, जैडा परमेश्वर दिछे, जसे कि परमेश्वर हमसाक जैला दान दिहे, उलाक बुझवा पारी। १३ आर जैला बातोक हमरा तुमसाक बताछी, उला हमरा मानुषेर सिखाल ज्ञानेर बातलाक नी बोलछी, मगर परमेश्वरेर आत्मार जरियाय सिखाल बातलाक बताछी। जैला लोकेर लिकिन परमेश्वरेर आत्मा छे, उसाक हमरा आत्मार जरियाय देयाल बातलाक समझाछी। १४ मगर जैला लोकेर लिकिन परमेश्वरेर आत्मा नी

छे, वरा परमेश्वरेर आत्मार बातोक ग्रहण नी करछे, क्याँकि उला बात उसार नजरोत बेकूफीर बात मालूम होचे। इकिसम लोक उला बातोक जनवा नी पारबे, क्याँकि उला बातेर जाँच आत्मार जरियाय होचे। १५ जहार लिकिन परमेश्वरेर आत्मा छे, वरा सबला बातोक जाँच करछे, मगर वरा खुद कहारो जरियाय जँचाल नी जाछे। १६ जैकिसम परमेश्वरेर वचनोत लिखाल छे, प्रभुर मनडाक के जनवा पारिहे आर वहाक के सीखाबे? मगर हमरा प्रभुर मोनडाक जनवा पारछी क्याँकि हमसार भीतरोत मसीहार सोच-बिचार छे।

मंडलीर लोकेर अन्दरोत फूट

३ हे भा-बहिनला! मुई तुमसाक परमेश्वरेर आत्मार मुताबिक चलनेवाला लोक समझे बात नी करनु, मगर मुई तुमसाक उला लोक समझे बात करनु, जैला लोक पाप-स्वभावेर अधीनोत छे क्याँकि तुम्हरा मसीह विश्वासोत छोटो छुवार मान्दी छेन। २ वहीलाते मुई तुमसाक अनाज खवा नी दी, बल्के दूध खिलाहिनु, क्याँकि तुम्हरा अनाज खवार लायक नी छिलेन, आर अलाव तैयार नी छेन। ३ क्याँकि तुम्हरा अलाव पाप-स्वभावेर मुताबिक चलछेन। तुमसार बीचोत जब जलन आर झगड़ा होते रोहचे, त तुम्हरा की पाप-स्वभावेर अधिकारोत नी छेन? आर तुम्हरा की दुनियाँर लोकेर मान्दी नी चलछेन? ४ तुमसार

बीचोत कोय कोहचे, “मुई पौलुसेर चेला छी,” आर कोय कोहचे, “मुई अपुल्लोसेर चेला छी,” त तुम्हरा की दुनियाँर लोकेर मान्दी नी छेन?

विश्वासी लोकेर कामेर फल

५ अपुल्लोस के छे? आर पौलुस के छे? हमरा त सिरिफ सेवक छी, जहार जरियाय तुम्हरा विश्वास करिहेन। प्रभु हमसाक सभाको अपना काम सोंपे दिहे। ६ जैखुना मुई तुमसार बीचोत खुश-खबरीर प्रचार करनु, त समझे लव कि मुई बिचन बुननु, अपुल्लोस पानी पटाल, मगर परमेश्वर गाछलाक बढ़ाल। ७ वहीलाते ना त बिचन बुननेवाला बोड़ो छे आर ना पानी पटानेवाला बोड़ो छे, मगर बोड़ो त सिरिफ परमेश्वर छे, जहाँय गाछटाक बढ़ाछे। ८ जहाँय बुनछे, आर जहाँय पानी पटाछे, उसार दोनोंझनकार मकसद एक छे, आर हरेकझन अपना मेहनतेर मुताबिक इनाम पाबे। ९ हमरा परमेश्वरेर सेवक छी, तुम्हरा परमेश्वरेर खेत आर परमेश्वरेर बनाल घर छेन। १० परमेश्वरेर दया से जैखुना मुई तुमसार बीचोत खुश-खबरीर प्रचार करनु, त समझे लव कि मुई एकझन बहुत बढ़िया राज मिस्त्रीर मान्दी घरेर नींव दिनु आर दोसरा लोक अपना शिक्षा से इखान नेंवेर पर घर बनाछे। मगर हरेकझन सावधान रोहेन, जे कुन किसम करे इखानेर पर घर बनाछेन। ११ कोय लोक इडा नेंव छोड़े दोसरा नेंव दुवा नी पारबे, जैडा नेंव आगु से देयाल छे, आर उडा नेंव होचे: यीशु मसीहा। १२ आर लोक उडा नेंवेर पर अपना

कामेर जरियाय घर बनाछे, जैला काम सोना, चाँदी, कीमती पत्थल, लकड़ी आर घास-पुवालेर मान्दी छे। १३ परमेश्वरेर इन्साफेर दिन हरेकझनार कामला खुल्लम-खुल्ला प्रकट हंय जाबे, आर आगिनेर जरियाय प्रकट कराल जाबे, आर आगिनखान जाँच करबे कि के कुन किसम काम करिहे। १४ जहार काम नीवेर पर टिकाल रोहबे, वहाँय इनाम पाबे। १५ अगर कोय लोकेर काम आगिनोत जले जाछे, वहार नोकसान होबे, मगर वहाँय बचे जाबे। वहाँय इकिसम बचबे माने लव कि वहाँय आगिनोत जलते-जलते बचे गेल। १६ तुम्हरा की जानेन नी कि तुम्हरा सबकोय मिले परमेश्वरेर मंदिर छेन आर परमेश्वरेर आत्मा तुमसार भीतरोत रोहचे? १७ अगर कोय परमेश्वरेर मंदिरोक बर्बाद करछे, त परमेश्वर वहाक बर्बाद करबे क्यौंकि परमेश्वरेर मंदिर पवित्र छे, आर तुम्हराय उडा मंदिर छेन। १८ तुम्हरा अपना-आपोक धोखा ना दव। तुमसार भीतर से अगर कोय लोकेर नजरोत अपना-आपोक बुद्धिमान समझेछे, त वहाँय बेकूफ बने जाक जसे कि परमेश्वर वहाक बुद्धिमान कहय। १९ इ-दुनियाँर ज्ञान परमेश्वर लिकिन बेकूफी छे क्यौंकि लिखाल छे, “परमेश्वर बुद्धिमान लोकोक वहारे चालाकीर बातोत फँसाछे।” २० आर प्रभु जाने कि “बुद्धिमान लोकेर समझ-बुझ बेकार छे।” २१ वहीलाते कोय लोकेर बारे तुम्हरा घमंड ना करो क्यौंकि सबला कुछ तुमसारे छे। २२ पौलुस होक या अपुल्लोस होक या दुनियाँडा होक

या जिन्दगी होक, या मौत होक, या अलकार युग होक, या आनेवाला युग होक, सबला तुमसारे छे। २३ तुम्हरा मसीहार छेन, आर मसीहा परमेश्वरेर छे।

मसीह-दूतेर काम

४ तुम्हरा हमसाक मसीहार दूत समझो। हमसाक परमेश्वर अपना गुप्त बातेर भण्डारी बनाहे। २ मगर भन्डारीक ईमानदार होना जरूरी छे। ३ मोर नजरोत इडा बहुत छोटो बात छे कि कोय लोक या तुम्हरा मोर इन्साफ करेन। मुई अपना इन्साफ खुद नी करछी। ४ मोर विवेक मोक दोषी नी ठहराछे। मगर इडा से मुई बेकसूर साबित नी होची। मोर बिचार करनेवाला प्रभु छे। ५ वहीलाते जब तक प्रभु दोबारा नी ओसछे, तुम्हरा कोय बातेर इन्साफ ना करेन। प्रभु छे, जहाँय अन्हारोत नुकाल बातलाक रोशनीत ले ओसबे आर मोनेर बातलाक प्रकट करबे। तब वही मुताबिक परमेश्वर सभाको शाबासी दिबे। ६ हे मोर भा-बहिनला! मुई अपना आर अपुल्लोसेर मिसाल दे तुमसाक इला बातोक बताछी जसे कि तुम्हरा अच्छा से समझवा पारेन। तुम्हरा हमसा से सिखवा पारेन कि जैला बात लिखाल छे, उला से बेसी कुछु ना करेन, आर कहारो बड़ाई करवार तने आर कहारो खिलाफ बोलवार तने तुम्हरा घमंड ना करेन। ७ तुमसाक के कोहचे कि तुम्हरा दोसरा लोक से अच्छा

छेन? तुमसार लिकिन अपना जे कुछ छे, उला सबला तुम्हरा परमेश्वरेर लिकिन से पाहेन। तुम्हरा जब सब कुछ परमेश्वरेर लिकिन से पाहेन, त इकिसम घमंड क्याँ करछेन कि तुम्हरा सबला अपना मेहनत से पाहेन।
८ तुम्हरा सोचेछेन कि तुमसाक सब कुछ मिले गहे। तुम्हरा सोचेछेन कि तुम्हरा धनी हंय गहेन। तुम्हरा हमसाक छोड़े राजा बने गहेन, मगर अच्छा होलतेन कि तुम्हरा सचमुचोत राजा बने गेलेनतेन, जसे कि हमरा तुमसार साथे राज करवा पारनुतन। ९ मुई समझेछी कि परमेश्वर हमसाक मसीह-दूतलाक सबसे आखरीत राखियेह। हमरा उला कैदीर मान्दी छी, जैलाक मौतेर तने रखाल गहे। हमरा दुनियाँत स्वर्गेर फरीस्तालार आर लोकलार सामनात खेल-तमाशा बने गही। १० यीशु मसीहार तने हमरा बेकूफ बने गही, मगर मसीहार जरियाय तुम्हरा बुद्धिमान बने गहेन। हमरा कमजोर छी, मगर तुम्हरा मजबूत छेन। तुम्हरा इज्जत पाछेन आर हमसार बेज्जती होचे। ११ हमरा अलाव भूखा-प्यासा रोहछी आर चिरा-फटा कपड़ा पिन्हें रोहछी। हमरा मार खाची आर बेघर हंय घुरे बेराछी। १२ हमरा अपना हाथ से मेहनत करछी। जैखुना लोक हमसाक खराब कोहचे, हमरा आशीर्वाद दिछी। हमरा जैखुना सताल जाछी, हमरा सहय लिछी। १३ जैखुना लोकला हमसार बदनाम करछे, हमरा उसाक अच्छा बात कोहची। आजतक हमरा इ-दुनियाँर गंदगी आर कूड़ा-कचड़ार मान्दी हंय गही।

हुँसियार रहवार बात

१४ मुई तुमसाक शरमिन्दा करवार तने इला बात नी लिखछी। मगर मोर प्यारा भा-बहिन समझे तुमसाक हुँसियार करे दिछी। १५ यीशु मसीहार बारे सिखवार तने तुमसार लिकिन हजार-हजार शिक्षक हवा पारे, मगर तुमसार पिता सिरिफ मुई छी क्योंकि मुई सबसे पहिले मसीहार बारे खुश-खबरी सुनाय तुमसाक अपना बेटा-बेटी बनाही। १६ मुई तुमसासे बिनती करछी कि तुम्हरा मोर मान्दी चलो। १७ वहीलाते मुई तुमसार लिकिन प्रभुर नामे मोर प्यारा आर ईमानदार बेटा तिमुथिक पठाछी। वहाँय तुमसाक याद कराय दिबे कि मुई सबठिन सबला मंडलीत मसीहार नामे कुन किसम करे सिखाछिनु। १८ तुमसार बीच से कुछुला लोक घमण्डी हंय गहे, वरा इकिसम समझेछे कि मुई उसार लिकिन नी ओसमु। १९ प्रभु चाहले, मुई जल्दी से तुमसार लिकिन ओसमु। जैला लोक घमंड करछे, हमरा उसार घमंडेर बातलाक मालूम करवार तने नी ओसमु, मगर उसार शक्ति मालूम करवार तने ओसमु, २० क्योंकि परमेश्वरेर राज बातोत नी, मगर शक्तित टिकाल छे। २१ तुम्हरा की चाहचेन? मुई की तुमसार लिकिन लाठी ले ओसी, ना प्रेम से आर ना नरम दिल से ओसी?

मंडलीर विश्वासीर भीतरोत कुकरम

५ सुनाल जाछे कि तुमसार बीचोत कुकरम होचे। इकिसम कुकरम अविश्वासी लोकलारो बीचोत नी होचे। एकझन विश्वासी अपना सौतेली माँर साथे कुकरम करछे। २ आर तुम्हरा इकिसम कामेर तने घमंड करछेन। बल्के तुमसाक इडार तने दुःख हवा चही। जहाँय इकिसम काम करछे, वहाक तुमसार बीच से दूर करे दुवा होलतेन। ३ मुई तुमसासे दूरोत छी, मगर दिल से तुमसार साथे छी। माने लव कि इकिसम काम करनेवालार बारे मुई अपना फैसला तुमसाक सुनाय दिही। ४ जैखुना प्रभु यीशुर नामे तुम्हरा एक साथे जोड़ो होचेन, त प्रभुर शक्ति तुमसार उपरोत रोहबे, आर मोहों दिल से तुमसार साथे छी। ५ इकिसम कुकरम करनेवाला लोकेर बदनडाक बर्बादीर तने शैतानेर हाथोत सोंपे दव जसे कि प्रभुर ओसवार दिनोत वहार आत्माडा बचे जाय। ६ घमंड करना तुमसार तने अच्छा बात नी छे। तुमसाक की मालूम नी छे कि एकखुदी खमीर गोटाखान सनाल आँटाक फूलाय दिछे? ७ तुम्हरा अपना बीच से पुरना खमीरेर मान्दी इकिसम पापी लोकोक दूर करे दव जसे कि तुम्हरा बिना खमीर वाला नया सनाल आँटार मान्दी बने जायेन आर पवित्र हंय जायेन, जैडा कि तुम्हरा सही मानेछेन। तुमसाक पवित्र कराल गहे क्योंकि मसीहा हमसार तने फसह परबेर भेड़ार मान्दी बलिदान हंय गेल। ८ वहीलाते बुराई आर बदमाशी

रूपी रूटी छोड़े सीधा मन आर इमानदारी रूपी रूटी खाय परब मनाव।
९ मुई अपना चिट्ठीत तुमसाक लिखिही कि कुकरम करनेवालार साथे
नाता ना राखो। १० मोर कहवार मतलब इडा नी कि तुम्हरा इ-दुनियाँर
कुकरम करनेवाला या लोभी या धोखाबाज या मूर्ति पूजा करनेवालार
साथे संगति ना करेन, क्योंकि इकिसम होले त तुमसाक इ-दुनियाँ से
निकले जवा होलतेन। ११ बल्के मुई तुमसाक लिखछी कि अगर कोय
अपना-आपोक विश्वासी कहय, आर वहाँय कुकरम करनेवाला या
लोभी या मूर्ति पूजा या गाली देनेवाला या शराबी या चोर छे, त उसार
साथे नाता ना राखेन, बल्के इकिसम लोकेर साथे खान-पान ना करेन।
१२ अविश्वासी लोकेर इन्साफ करवार काम मोर नी छे। मगर तुम्हराय
छेन, जहाँय मंडलीर लोकेर इन्साफ करभेन। १३ अविश्वासी लोकलार
इन्साफ परमेश्वर करछे। पवित्र शास्त्रोत लिखाल छे, “कुकरम
करनेवाला लोकोक अपना बीच से निकलाय दव।”

विश्वासी लोकेर बीचोत मुकदमा

६ अगर तुमसार बीचोत एकझन विश्वासीर साथे दोसराझन विश्वासीर
झगड़ा छे, त तुम्हरा कुन हिम्मत से इन्साफेर तने अविश्वासी लोकेर
लिकिन जाछेन, जबकि तुमसाक विश्वासीर लोकेर लिकिन जवा लागे।
१ तुम्हरा कि जानेन नी कि एक दिना हमरा विश्वासीला दुनियाँर लोकेर

इन्साफ करमु। जब तुम्हरा इ-दुनियाँर लोकेर इन्साफ करभेन, त तुम्हरा कि अपनार बीचोत छोटो-छोटो बातलार फैसला करवा नी पारछेन।
३ तुम्हरा की जानेन नी, हमरा फरीस्तालारो इन्साफ करमु। अगर इकिसम बात छे त तुम्हरा दुनियाँर छोटो-छोटो बातलार फैसला क्याँ नी करछेन? ४ अगर तुमसार कोय बातेर कानूनी: झगड़ा छे, त फैसलार तने तुम्हरा अविश्वासी लोकलार लिकिन क्याँ जाछेन, जैला लोकेर मंडलीत कोय स्थान नी छे? ५ मुई इला बात तुमसाक शरमिन्दा करवार तने कोहची। पूराडा मंडलीत कि कोय इकिसम बुद्धिमान नी छे, जहाँय इला समस्यार फैसला करवा पारे? ६ एकझन विश्वासी अविश्वासी लोकेर आगुत दोसराझन विश्वासी भईर पर केस करछे। ७ इकिसम एकझन विश्वासी भई दोसराझन विश्वासी भईर खिलाफ केस करले, साबित होचे कि तुम्हरा हारे गहेन। तुम्हरा क्याँ नी अन्याय सहय लिछेन आर उडा झगड़ाक छोड़े दिछेन? आर तुम्हरा क्याँ नी अपना-नुकसान सहय लिछेन। ८ यहार बदले तुम्हरा खुद अन्याय करछेन, आर अपना साथी विश्वासी भईलाक ठगछेन। ९ तुम्हरा कि इडा नी समझेछेन कि जहाँय अन्याय करछे, वहाँय परमेश्वरेर राजेर हकदार नी होबे? तुम्हरा अपना-आपोक धोखा मत दव। जैला लोक कुकरमेर पापोत फँसाल छे या जहाँय मूर्ति पूजा करछे आर जहाँय दोसराझनार माँ-बहन से कुकरम करछे या पुरुष-पुरुषेर साथे कुकरम करछे, १० या चोर छे या लोभी छे

या शराबी छे या गाली देनेवाला छे या ठगनेवाला छे। इकिसम लोक परमेश्वरेर राजेर अधिकारी नी होबे। ११ तुमसार भीतर से कोय-कोय पहिले यही किसम लोक छिले, मगर तुमसाक शुद्ध कराल गहे। तुमसाक पवित्र कराल गहे आर प्रभु यीशु मसीहार नाम लुवार कारण से परमेश्वरेर आत्मार जरियाय तुमसाक पाप से मुक्त कराल गहे।

कुकरमेर पाप से दूर रहवार शिक्षा

१२ कोय-कोय कोहचे, “मोक सब कुछ करवार हक छे।” इडा बात त सच छे, मगर मुई कोहची कि मानुषेर तने सब कुछ करना अच्छा बात नी छे। कोय-कोय कोहचे “मोक सब कुछ करवार हक छे”, मगर मुई कोहची कि मुई कोय भी जिनिसेर गोलाम नी होमु। १३ आर कोय-कोय यहोडा कोहचे कि “खाना पेटेर तने आर पेटोक खानार तने बनाल गहे।” इडा अच्छा बात छे, मगर मुई कोहची कि एक दिन इ-दोनोंखान जिनिसोक परमेश्वर नाश करे दिबे। मगर बदनडाक कुकरम करवार तने नी बनाय बल्के प्रभुर तने बनाल गहे, आर प्रभु हमसार बदनडार तने छे। १४ परमेश्वर जैमान्दी अपना शक्ति से प्रभु यीशुक जीवित करिहिले, वही मान्दी हमसाको जिन्दा करबे। १५ तुम्हरा की जानेन नी, तुमसार बदनडा मसीहार बदनेर अंग छे? त मुई की मसीहार अंगोक ले बेश्यार साथे मिलाय दुम? कभी नी। १६ आर तुम्हरा की जानेन नी, अगर एकझन लोक बेश्यार साथे मिलछे, त वहाँय वहार साथे एकटा बदन

बने जाछे। क्याँकि शास्त्रोत इडा लिखाल छे: वरा दोनोंझन मिले एकेडा बदन होबे। १७ मगर जैडा लोक प्रभुर साथे मिले जाछे, वहाँय प्रभुर साथे मिले एक आत्मा हंय जाछे। १८ कुकरम से दूर भागो। कोय दोसरा किसमेर पाप अगर मानुष करछे त, इ पाप बदन से बाहर छे, मगर जहाँय कुकरम करछे, वहाँय अपना बदनेर खिलाफ पाप करछे। १९ तुम्हरा कि जानेन नी, तुमसार बदनडा पवित्र आत्मार मंदिर छे, पवित्र आत्मा तुमसार भीतरोत रोहचे जैडाक परमेश्वर तुमसाक दिहे, आर तुम्हरा अपना अधिकारोत नी छेन। २० क्याँकि दाम दे तुमसाक किने लिया ल गहे। वहीलाते तुम्हरा अपना बदन से परमेश्वरेर बड़ाई करो।

शादीर बारे सवाल

७ मुई अला तुमसाक तुमसार सवालेर जवाब दिछी, जैला तुम्हरा मोक लिखिहेन। तुम्हरा मोक लिखिहेन: अगर कोय पुरुष शादी नी करछे, त वहाँय अच्छा करछे। २ मगर कुकरमेर पाप से बचवार तने हरेकझन पुरुषेर अपना-अपना पत्नी हवा लागे आर हरेकझन स्त्रीर अपना पति हवा लागे। ३ पतिक अपना पत्नीर हक पूरा करवा लागे, आर पत्नीक अपना पतिर हक पूरा करवा लागे ४ क्याँकि पत्नीक अपना बदनेर पर अधिकार नी छे, बल्के पतिर अधिकार छे, वही मान्दी पतिको अपना

बदनडार पर अधिकार नी छे, बल्के पत्नीर अधिकार छे। ५ वहीलाते तुम्हरा शारीरिक सम्बन्धेर हक ना मारेन। मगर एक मन हंय प्रार्थना करवार तने कुछु समयर तने अलग रहवा पारेन। यहार बाद फेर तुम्हरा पहिलकार मान्दी एक साथे रोहेन। अगर इकिसम नी करभेन, तुम्हरा अपना-आपोक काबूत रखवा नी पारभेन, आर जहार कारण शैतान तुमसाक पापोत गिराय दिबे। ६ इला बात मुई तुमसाक कोहची जसे कि तुमसाक मालूम हंय जाय कि मुई तुमसाक शादी करवार तने मना नी करछी, मगर शादी करवार तने हुकूमो नी दिछी। ७ मोर इच्छा छे कि सबकोय मोहरे मान्दी बिना शादी-सुदा रहय। मगर परमेश्वरेर लिकिन से हरेकझन अलग-अलग वरदान पाहे। एकझनाक एक किसमेर वरदान छे, आर दोसराझनाक दोसरा किसमेर वरदान। ८ बिना शादी-सुदा वालालाक आर राँडीलाक मुई कोहची, उसार तने आखले रहना अच्छा छे, जैकिसम कि मुई छी। ९ अगर वरा अपना-आपोक काबू करे रखवा नी पारे, त उसाक शादी करे लेना अच्छा छे, क्योंकि बदनेर इच्छार तने बेचैन रहना से शादी करना अच्छा छे। १० शादी-सुदा लोकलाक मुई हुकूम दिछी, मुई नी बल्के प्रभु हुकूम दिछे कि पत्नीक अपना पति से अलग हवा नी लागे। ११ अगर वहाँय अलग हंय रहवा चाहचे, त वहाक आर शादी करवा नी लागे, आर नी त फेर अपना पतिर साथे वहाक मिले जवा लागे। आर पतिको अपना पत्नीक तलाक दुवा नी लागे।

१२ बाँकी दोसराला लोकोक प्रभु नी, बल्के मुई कोहची, अगर कोय विश्वासी भईर पत्नी विश्वासी नी छे, आर वहाँय अपना पतिर साथे रहवार तने राजी छे, त उ पतिक अपना पत्नीक तलाक दुवा नी लागे। १३ अगर कोय विश्वासी बहिनेर पति अविश्वासी छे, आर वहाँय अपना पत्नीर साथे रहवार तने राजी छे, त उ पत्नी अपना पतिक तलाक दुवा नी लागे। १४ पति जहाँय अविश्वासी छे, अपना पत्नीर कारण से शुद्ध ठहरेछे। वही किसम पत्नी जहाँय अविश्वासी छे, वहाँय अपना पतिर कारण पवित्र छे। नी त, तुमसार बाल-बच्चाला अशुद्ध होलतेन, मगर वरा शुद्ध छे। १५ अगर अविश्वासी पति या अविश्वासी पत्नी अलग हवा चाहचे, त वहाक अलग हवा दव। तब कोय विश्वासी भई या विश्वासी बहिन शादीर बन्धनोत नी रोहबे। परमेश्वर हमसाक शान्ति से रहवार तने बुलाहे। १६ अगर पति-पत्नी बने रहय, त हवा पारे कि विश्वासी पत्नी अपना पतिक बचाय ले, आर यहोडा हवा सकेछे कि विश्वासी पति अपना पत्नीक बचाय ले।

परमेश्वरेर बुलाहटेर लायक चाल-चलन

१७ प्रभु जहाक जे हालतोत राखियेह आर वहाँय जहाक जे कामेर तने बुलाहे, वहाँय वही मुताबिक चलोक। इडा हुकूम मुई सबला मंडलीत दिछी। १८ प्रभु अगर कहाको सुन्नत कराल हालतोत बुलाहे त वहाँय सुन्नतेर चिन्हडाक ना हटाक। अगर कहाको बिना सुन्नत कराल

हालतोत बुलाल गहे, वहाँय सुन्नत ना करोक। १९ कोय सुन्नत कराल होक या ना होक, यहार कोय फरक नी छे। मगर परमेश्वरेर हुकूमडाक माननाय असली बात छे। २० हरेकझनाक वहीडा हालतोत रहवा लागे, जैडा हालतोत परमेश्वर वहाक बुलाहे। २१ अगर तुई गोलामेर हालतोत बुलाल गहिस, त चिन्ता ना करिस, मगर अगर तुई आजाद हवार मौका पईस त तुई उडाक हाथ से जवा ना दिस, २२ क्योंकि प्रभु जहाक गोलामेर हालतोत बुलाहे, वहाँय प्रभुर जरियाय आजाद हंय गहे। यही मान्दी जहाक आजादेर हालतोत बुलाल गहे, वहाँय मसीहार गोलाम बने गहे। २३ तुमसाक बहुत दाम दे किने लिया ल गहे, वहीलाते मानुषेर गोलाम ना बनेन। २४ हे भईला जहाक जे हालतोत बुलाल गहे, वहाँय परमेश्वरेर नजरोत वही मान्दी रहोक।

बिना शादी-सुदा आर राँडी लोकोक सलाह

२५ कुमारी लड़कीलार बारे प्रभुर लिकिन से मोक कोय हुकूम नी मिले। मगर प्रभु अपना दया से मोक विश्वासयोग्य बनाहे आर वहीलाते मुई तुमसाक अपना सलाह दिछी। २६ जैडा दुःख-मुसीबतेर समय ओसछे, यहार तने मोक लागछे कि तुम्हरा जे मान्दी छेन, तुमसाक वही मान्दी रहना अच्छा छे। २७ तुमसार कहारो अगर पत्नी छे, त वहाक छोड़े दुवार कोशिश ना करेन। अगर तुमसार कहारो पत्नी नी छे, त शादी करवार कोशिश ना करेन। २८ अगर तुम्हरा शादी करे लिछेन, त तुम्हरा पाप नी

करछेन। आर एकझन लड़कीयो शादी करछे, त वहाँय पाप नी करछे। मगर जहाँय शादी करछे, वहाँय दुनियाँत तकलीफ पाबे आर मुई तुमसाक इला तकलीफ से बचवा चाहची। २९ हे भईला! मुई तुमसाक इडा बात बोलवा चाहची कि समय बहुत कम छे। वहीलाते अला से यही मान्दी चलो: जहार पत्नी छे, वहाँय सिरिफ अपना पत्नीर खुशीर बारे ना सोचोक। ३० आर जहाँय कोय चीजेर तने दुःख मनाछे, वहाँय सिरिफ वहीडार बारे ना सोचोक, आर जहाँय खुशी मनाछे, वहाँय सिरिफ वहीडार बारे ना सोचोक, आर जहाँय कुछु किनछे, वहाँय सिरिफ वहीडार बारे ना सोचोक। ३१ जैला लोक दुनियाँर चीजेर साथे जुरे छे, उला लोक सिरिफ वहीलार बारे ना सोचोक क्योंकि इडा दुनियाँ बेसी दिन तक नी रोहबे। ३२ मुई चाहची कि तुम्हरा चिन्ता फिकिर से दूरोत रोहेन। जहाँय शादी-सुदा नी छे, वरा परमेश्वरेर बातेर फिकिर करवा सकेछे। वरा सोचेछे कि परमेश्वरोक कसे करे खुश करबे। ३३ मगर शादी-सुदा लोक दुनियाँर चीजेर तने सोचेछे आर अपना पत्नीक खुश करवा चाहचे। ३४ आर यही मान्दी करे उसार दिल बटे जाछे। बिना शादी-सुदा स्त्री या कुमारी लड़की प्रभुर कामेर तने फिकिर करछे, आर बदन से आर आत्मा से अपना-आपोक शुद्ध रखवार तने फिकिर करछे। मगर शादी-सुदा स्त्रीला दुनियाँर बातेर तने फिकिर करछे कि कसे करे वरा अपना पतिलाक खुश राखबे। ३५ इला बातोक

मुई तुमसार पैदार तने कोहची, कोय बोझ दुवार तने नी कोहची। मुई मदद करवा चाहची जसे कि तुम्हरा मन लगाय प्रभुर सेवा करवा पारेन। ३६ अगर कोय समझेछे कि वहाँय अपना कुमारी बेटीर साथे उचित व्यवहार नी करछे, जहार शादीर उमर खतम हंय जाछे, आर वहाँय वहाक शादी दुवा चाहचे, त वहाँय अपना इच्छा मुताबिक काम करोक। लड़कीडार शादी हंय जाक, यहात कोय पाप नी छे। ३७ मगर अगर कोय लोक अपना बेटीक शादी दुवार इच्छा नी छे आर वहार बेटीक शादी करवार जरूरी नी छे। आर वहाँय ठाने लिहे कि अपना बेटीर शादी नी दिबे। आर वहाँय शादी नी दिछे, त वहाँय अच्छा काम करछे। ३८ वहीलाते जे लोक अपना बेटीर शादी दिछे, वहाँय अच्छा करछे, आर जे अपना बेटीर शादी नी दिछे, वहाँय आढ़ोह बेसी अच्छा करछे। ३९ जब तक कोय पत्नीर पति जिन्दा रोहचे, त वहाँय अपना पतिर साथे बन्हाल रोहचे, अगर वहार पति मोरे जाय, त वहाँय प्रभुर लोकेर साथे शादी करवा पारे। ४० मगर बिना शादी-सुदा रहय, त वहाँय आढ़ोह खुश रोहबे। आर मुई विश्वास करछी कि इला बात मुई परमेश्वरेर आत्मार जरियाय बोलछी।

मूर्तिर आगुत चढ़ाल प्रसादेर बारे

८ तुम्हरा मोक मूर्तिर आगुत चढ़ाल प्रसादेर बारे पूछिहेन। इलार बारे हमरा सबकोय कुछु ना कुछु जानी। मगर जाने राखेन कि ज्ञान घमंड पैदा करवा पारे, आर प्रेम मानुषेर उन्नति करछे। २ अगर कोय सोचेछे कि मुई कुछु जानी, त वहाँय अतेखान नी जाने जतेखान वहाक जानना जरूरी छे। ३ मगर अगर कोय परमेश्वरोक प्रेम करछे, त परमेश्वर वहाक जानछे। ४ अला मुई मूर्तिर आगुत चढ़ाल प्रसाद खवार बारे कोहची। हमरा जानी कि मूर्ति सही माने सच्चा ईश्वर नी छे। परमेश्वरेर सिवाय आर कोय नी छे। ५ आसमानोत आर दुनियाँत बहुतला देवी-देवता कहाल जाछे, जैलाक बहुतला लोक देवता आर प्रभु मानछे। ६ मगर हमसार तने सिरिफ एकझन परमेश्वर छे, जहाँय पिता छे आर जहार लिकिन से सब कुछु मिलछे, आर व्हारे तने हमरा जिन्दा छी। हमसार प्रभु सिरिफ एकझन छे, आर वहाँय छे यीशु मसीहा। व्हारे जरियाय सब कुछु ओसिहे, आर व्हारे जरियाय हमरा जिन्दा छी। ७ तहारो पर सभाको इडा ज्ञान नी छे। कुछुला विश्वासी अलाव विश्वास करछे कि मूर्तिर अन्दरोत जान छे। इडा विश्वास करे वरा मूर्तिर आगुत चढ़ाल प्रसाद खाचे, क्याँकि उसार बुझवार ज्ञान कमजोर छे, वहीलाते उसार विवेक उसाक दोषी ठहराछे। ८ खाना-पीना हमसाक परमेश्वरेर लिकिन नी ले जाछे। अगर हमरा नी खाची त, हमसार कोय नुकसान नी, अगर

खाची त कुछु फैदाव नी छे। ९ मगर हुँसियार रोहेन जैखुना तुम्हरा प्रसाद खाचेन, हवा सकेछे कि प्रसाद खवार तुमसार इडा आजादी कमजोर विश्वासीक विश्वासोत कमजोर करे ना दे। १० तुमसाक त इलार बारे मजबूत ज्ञान छे, मगर जहार ज्ञान कमजोर छे, वहाँय अगर तोक देवतार-मंदिरोत खाते देखे, त वहाँय की मूर्तिर आगुत चढ़ाल प्रसादलाक खवार हिम्मत नी करबे? करबे। ११ इकिसम करे तोर ज्ञानेर कारण से उडा कमजोर भई बर्बाद हंय जाबे, जहार तने मसीहा मोरिल। १२ इकिसम करे विश्वासी भईलार खिलाफ पाप करले आर उसार कमजोर विवेकलाक चोट पहुँचाले, तुम्हरा मसीहार खिलाफ पाप करछेन। १३ वहीलाते मोर कोय खान-पान अगर विश्वासी भईक पापोत गिराय दे, त मुई उला खाना नी खामु, क्योंकि मुई नी चाहची कि मोर कारण मोर भई पापोत पोड़े जाय।

मसीह-दूतेर अधिकार आर काम

९ मुई की आजाद नी छी? मुई की एकझन मसीहार दूत नी छी? मुई की हमसार प्रभु यीशुक नी देखी? प्रभुर तने मुई जैडा काम करिही, तुम्हरा की वहीडा कामेर फल नी छेन? २ अगर दोसरा लोक मोक मसीहार दूत नी मानछे, कम से कम तुम्हरा मोक मसीह-दूत समझो। तुम्हरा प्रभुर लोक बने जवार कारण साबित होचे कि मुई मसीहार दूत

छी। ३ जैला लोक मोर मसीह-दूत हवार बारे सवाल करछे, उसार तने मोर लिकिन इडा जवाब छे: ४ हमसाक की खाना-पीना पवार अधिकार नी छे? ५ हमसाक की अपना स्त्रीलाक ले प्रचार करे बेरवार अधिकार नी छे? जैकिसम कि दोसरा मसीह-दूत आर प्रभु यीशुर भईला, आर पतरस अपना-अपनी स्त्रीलाक साथे ले प्रचार करवा जाछे। ६ बरनाबास आर मोहके की खाली काम करे रोजी-रूटीर उपाय करवा होबे? ७ इकिसम कुन लोक छे, जहाँय अपना पैसा खर्चा करे फौजेर काम करछे? जहाँय अंगुरेर खेती करछे, वहाँय की अंगुरेर फल नी खाचे? जहाँय पशु पालछे, वहाँय की उलार दूध नी खाचे? ८ मुई की साधारण मानुषेर अधिकारोत इला बात बोलछी? मूसा नबीर नियम-कानून की यहीला बात नी बोलछे? ९ वहात इडा लिखाल छे, “जैला बैल दौनी मलछे, उला बैलेर मुखोत जाबी ना लगायेन।” यहार मतलब की? परमेश्वर की सिरिफ बैललारे तने फिकिर करछे? १० वहाँय त हमसारे तने लिखिहे, “क्याँकि जहाँय खेती करछे आर जहाँय अनाज मलछे उसाक अनाजेर हिस्सा पवार उम्मेद ले इला काम करवा लागे।” ११ अगर हमरा तुमसार दिलोत आत्मिक बीज बुनिही, आर तुमसार लिकिन से हमसार सबला खर्चा मिले, त इडा की हमसार हक नी छे? १२ तुमसार पर अगर दोसराला सेवकेर हक छे, त उसासे बेसी हक की हमसार नी छे? मगर तहारो पर हमरा अपना अधिकारेर इस्तेमाल नी

करी, बल्के हमरा सब कुछ सहय लिखी जसे कि हमरा मसीहार खुश-खबरीर कामेर तने रूकावट नी बनी। १३ तुम्हरा कि जानेन नी, जहाँय मंदिरोत काम करछे, वरा मंदिर से खाना-पीना पाछे, आर जहाँय बेदीर काम करछे, वहाँय बेदीर पर चढ़ाल चीजलार हिस्सा पाछे। १४ ठीक यही मान्दी, प्रभु इडा आदेश दिहे कि जहाँय खुश-खबरीर प्रचार करछे, वहाँय खुश-खबरी से रोजी-रूटी आर कपड़ा पाबे। १५ मगर मुई इला अधिकारेर इस्तेमाल नी करी। मुई चिट्ठी लिखे इडा नी कोहची कि तुम्हरा मोर तने यही किसम इन्तेजाम करेन। मोर घमंड करवार बातोक कोय अगर गलत साबित करे दे, त यहा से मोक मोरे जाना अच्छा छे। १६ अगर मुई खुश-खबरी प्रचार करछी, त इडा मोर घमंड करवार कोय कारण नी छे, क्योंकि इखान काम करना मोक जरूरी छे। अगर मुई खुश-खबरी प्रचार नी करी, त मोर पर धिक्कार छे। १७ अगर मुई अपना इच्छा से प्रचार करछी, त मोर तने इनाम रखाल छे। अगर मुई प्रचार करवा नी चाहची, तहारो पर मोक प्रचार करवा होबे क्योंकि मोर उपरोत इडा जिम्मेवारी छे। १८ वहार तने मुई कुन इनाम पामु? बिना मजदूरीर खुश-खबरी प्रचार करना एकटा बहुत अच्छा मौका छे। यहीडा मोर इनाम छे। १९ मुई एकझन आजाद लोक छी। कहारो गोलाम नी छी। तहारो पर मुई हरेकझनार तने गोलाम बने गही जसे कि बहुत लोकोक प्रभुर लिकिन अनवा पारी। २० मुई यहूदी लोकोक प्रभुर लिकिन अनवार

तने यहूदीलार लिकिन यहूदीर मान्दी चलछी। मुई त मूसा नबीर नियमेर अंदरोत नी छी, तहारो पर जैला लोक मूसा नबीर नियम-कानूनोत चलछे, उसाक प्रभुर लिकिन अनवार तने मुई उसारे मान्दी चलछी।^{२१} ठीक यही मान्दी मुई गैर-यहूदी लोकोक प्रभुर लिकिन अनवार तने गैर-यहूदीर मान्दी चलछी। यहार मतलब इडा नी की मुई परमेश्वरेर नियमेर अन्दरोत नी छी। मुई त सचमुचोत मसीहार नियम अनुसार चलछी।^{२२} विश्वासोत जैला लोक कमजोर छे, मुई उसारे मान्दी चलछी जसे कि उसाक जीते लुवा पारी। वहीलाते मुई सब लोकेर लिकिन उसारे मान्दी बने जाछी जसे कि कोय पाके उसार भीतर से कुछुला लोकोक बचाय लुवा पारी।^{२३} मुई इला सबला काम खुश-खबरीर तने करछी जसे कि खुश-खबरीर आशीवदिर भागी हवा पारी।

मसीही दौड़

^{२४} तुम्हरा की जानेन नी, बहुतझन दौड़नेवाला दौड़ोत शामिल होचे, मगर उसार बीच से सिरिफ एकझन इनाम पाछे। वहीलाते इकिसम करे दौड़ो जसे कि इनाम पायेन।^{२५} हरेकझन दौड़नेवाला, जहाँय दौड़ोत शामिल होचे, कठिन मेहनत से अपना-आपोक तैयार करछे। वरा त नाशमान मुकुटेर तने दौड़छे। मगर हमरा उडा इनामेर तने काम करछी, जैडा इनाम कभी खतम नी होबे।^{२६} वहीलाते मुई बिना मतलब नी दौड़ेछी। जैला लोक हवाखानोक घुस्सा मारछे, मुई इकिसम नी करछी।

२७ मुई बल्के अपना बदनडाक दुःख-तकलीफ दे अपना कब्जात राखछी, कहीं इकिसम नी होय कि दोसरा लोकेर लिकिन प्रचार करवार बाद मुई खुदे इनाम पवार लायक ना रही।

मूर्ति पूजा से दूर

१० मोर प्यारा भा-बहिनला! मुई तुमसाक याद दिलाय दुवा चाहची कि हमसार बाप-दादोलार की होल, जैला लोक मूसा नबीर पीछूत चलछिले? वरा सबकोय मेघेर पीछू-पीछू चलिल आर समुन्द्रेर भीतर से सुखा जमीन दे पार हंय गेल। १ इकिसम करे इडा घटनाक बपतिस्मा कहाल जवा पाड़े जैडा मेघेर आर समुन्द्रेर जरियाय होईले। तब वरा मूसाक अपना अगुवा माने, वहार पाछूत चलवा लागिल। २ यहार बाद परमेश्वर उसाक एकटा आश्चर्य कामेर जरियाय जंगलोत खवार तने खाना दिले ४ आर परमेश्वर उसाक पानी दिहिले। आर वरा उखान चट्टान से पानी खाहिले जैखान चट्टान मसीहा खुद छिले। आर वहाँय उसार साथे-साथे चलछिले। ५ मगर तहारो पर परमेश्वर उसार भीतर से बहुतझनार पर खुश नी छिले, वहीलाते उसार लाशला जंगलोत तितर-बितर हंय पोड़े छिले। ६ इला सबला घटना घटिहिले जसे कि हमरा सिखवा पाड़ी कि हमरा उला बुरा चीजेर तने लालच ना करी, जैकिसम हमसार बाप-दादोला करिहिले। ७ उसार भीतर से कुछुला लोक जैमान्दी

मूर्ति पूजा करहिले, तुम्हरा वही मान्दी ना करेन। परमेश्वरेर वचन इडा कोहचे, “लोकला खवार तने बोठिल, आर शराब खाय-दाय मौज-मस्ती आर नाच-गान आर कुकरम करवा लागिल।” ८ हमरा इकिसम कुकरमेर कामोत फँसे ना जई, जैकिसम कि कुछुला लोक कुकरमेर पाप करहिले, आर एके दिनोत तेइस हजार लोक मोरे गहिले। ९ हमसाक प्रभुर जाँच नी करवा चही, जैकिसम कि कुछुला लोक करिहिले आर वहीलाते उसाक साँप कमराय लिहिले आर वरा मोरे गहिले। १० हमसाक कहारो खिलाफ बोलवा नी लागे, जैकिसम कि कुछुला लोक पुराना जमानात करिहिले, आर वरा मौतेर फरीस्तार हाथे मारा गहिले। ११ इला सबला बात उसाक हुँसियार करे दुवार तने कहाल गहिले, आर इला बातोक हमसाक शिक्षा दुवार तने लिखाल गहे। क्याँकि हमरा इकिसम समयोत रोहछी, जबकि कि आखरी समय ओसनेवाला छे। १२ वहीलाते जहाँय सोचेछे कि मुई टिके छी, वहाँय हुँसियार हंय जोक जसे कि वहाँय पोड़े ना जाय। १३ तुम्हरा वही किसम परीक्षात पोड़छेन, जैकिसम कि दोसरा लोक पोड़छे। परमेश्वर विश्वास करवार लायक छे, आर वहाँय तुमसाक इकिसम परीक्षात नी गिराबे, जैडा तुम्हरा सहवार नी पारभेन। बल्के वहार साथे-साथे परीक्षा से बचवार उपाय करे दिबे, जसे कि तुम्हरा उडाक सोहवा पारेन। १४ वहीलाते मोर प्यारा भा-बहिनला! तुम्हरा मूर्ति पूजा से बचे रहव।

१५ मुई तुमसाक बुद्धिमान लोक समझे कोहची, तुम्हरा खुद बिचार करे देखो कि मुई तुमसाक की कोहची। १६ प्रभु-भोजोत जैखुना हमरा कटोरा से शुकुरिया करे खाची, इडा की मसीहार खूनेर साथे हमसार सहभागिता नी छे? आर हमरा जैडा रूटी भाँगछी, उडा की मसीहार बदनेर सहभागिता नी छे? १७ हमरा बहुतझन छी, मगर एकेडा बदनेर हिस्सा छी, आर सिरिफ एकटा रूटी छे, जैडा मसीहार बदनेर नमूना छे, आर हमरा सबकोय वहीडा रूटी से खाची। १८ इजराएली लोकेर बारे सोचो, जैखुना वरा बलिदानेर चीजलाक खाचे, वरा की बेदीडार सहभागी नी होचे? १९ मुई तुमसाक की कोहची? मूर्ति या मूर्तिर आगुत चढ़ाल प्रसाद की कोय चीज छे? २० मुई तुमसाक कोहची कि जैला चीजोक मूर्तिर आगुत थानेर पर बलि कराल जाछे, उला चीजोक परमेश्वरेर तने चढ़ाल नी जाछे, बल्के भूतोक चढ़ाल जाछे। आर मुई नी चाहची कि तुम्हरा भूतेर साथे सहभागिता करभेन। २१ तुम्हरा प्रभुर कटोरा से आर भूतेरो कटोरा से खवा नी सकेछेन, आर तुम्हरा प्रभुर टेबुल से आर भूतेरो टेबुल से खवा नी सकेछेन। २२ हमरा की प्रभुर दिलोत जलन पैदा करवा चाहची? हमरा की सोचेछी, की हमरा प्रभु से बेसी ताकतवर छी?

सब कुछ परमेश्वरेर बड़ाईर तने हवा लागे।

२३ मोक सब कुछ करवार हक छे, मगर सब कुछ से लाभ नी छे। मोक सब कुछ करवार हक छे, मगर सब कुछ से मदद नी मिलछे। २४ कोय लोक सिरिफ अपना-अपनी पैदार तने ना सोचोक, मगर अपना अरोस-परोसेर लोकेर बारे सोचोक। २५ अपना विवेकेर कारण से बिना पूछ-ताछ करे, मांसेर बजारोत जैला मांस बिकाछे, उलाक तुम्हरा खवा पारेन। २६ क्याँकि दुनियाँडा प्रभुर छे आर यहार भीतरोत जताला चीज छे, सबला प्रभुर छे। २७ अगर कोय गैर-विश्वासी तोक खवार तने अपना घरोत निमंत्रण करछे, आर तुई जवार तने तैयार छिस, त जे कुछ वहाँय तोर आगुत खवार तने दिछे, तुई अपना विवेकेर कारण से बिना कुछ पूछ-ताछ करे खाय ले। २८ मगर अगर कोय तोक कोहचे, “इला पूजार चीज छे” त उडा लोकेर कारण से आर विवेकेर कारण से तुई उला ना खईस। २९ मोर कहवार मतलब तोर विवेकर कारण तने नी, मगर वहार विवेक कारण। मोर आजादीडार जाँच दोसराइन क्याँ करबे? ३० अगर मुई प्रभुर शुकुरिया करे कोय चीज खाची, त इडार तने मोर बदनामी क्याँ होबे? ३१ वहीलाते जे कुछ तुम्हरा खाचेन या पीछेन या जे कुछ तुम्हरा करछेन, सब कुछ परमेश्वरेर बड़ाई करवार तने करो। ३२ तुम्हरा यहूदी लोक या गैर-यहूदीर लोकेर या परमेश्वरेर मंडलीर तने ठोकरे कारण ना बनेन। ३३ मुई सब बातोत सभाको खुश करछी

क्याँकि मुई सिरिफ अपना भलाई नी चाहची, बल्के मुई दोसरा लोकेरो भलाईर तने काम करछी जसे कि बहुत लोक बचे जाय।

११ मुई जैकिसम मसीहार मान्दी चलछी, वही किसम तुम्हराव मोहरे मान्दी चलो।

आराधना करवार सही तरीका

२ मुई तुमसार बड़ाई करछी, क्याँकि तुम्हरा मोक हरखुना याद करछेन, आर जैला शिक्षा मुई तुमसाक दिहिनु, उलाक माने चलछेन। ३ मगर मुई तुमसाक समझाय दुवा चाहची कि सब विश्वासी पुरुषेर माथा मसीहा छे। पत्नीर माथा पति छे, आर मसीहार माथा परमेश्वर छे। ४ वहीलाते अगर कोय मर्द अपना माथा ढाके प्रार्थना करछे या भविष्यवाणी करछे, त वहाँय अपना माथार अपमान करछे। ५ मगर कोय स्त्री जहाँय बिना माथा ढके प्रार्थना करछे या भविष्यवाणी करछे, वहाँय अपना माथार अपमान करछे। आर इकिसम कि वहाँय अपना माथा मुड़ाय दिहे। ६ अगर एकझन स्त्री बिना माथा ढके प्रार्थना करछे, त वहाक अपना चूल काटे दुवा लागे, मगर अगर स्त्रीर तने माथार चूल काटना या मुड़ाय देना शरमेर बात छे, त वहाक माथा ढकवा लागे। ७ मगर पुरुषोक अपना माथा ढकवा नी लागे, क्याँकि पुरुषोक परमेश्वरेर रूपोत बनाल गहे जसे कि मानुष जरियाय परमेश्वरेर बड़ाई होय। स्त्री पुरुषेर शान छे

८ क्यौँकि पुरुषोक स्त्री से बनाल नी जाय, बल्के स्त्रीक पुरुष से बनाल गहे। ९ सच बात इडा छे कि पुरुषोक स्त्रीर तने बनाल नी जाय, बल्के स्त्रीक पुरुषेर तने बनाल गहे। १० (वहीलाते स्वर्गेर फरीस्तालार कारण पत्नीर पर पतिर अधिकार समझे, पत्नीक माथा ढके रखवा लागे।) ११ इडा याद राखो कि परमेश्वरेर नियम मुताबिक पुरुष आर स्त्री एक-दोसराझनार पर निर्भर रोहचे। १२ क्यौँकि पहिला स्त्री-पुरुष से बनाल गहे, पुरुष स्त्री से जनम लिछे। आर सब कुछ परमेश्वर बनाहे। १३ तुम्हरा आपने खुद सोचे देखो कि स्त्री लोकोक बिना माथा ढके प्रार्थना करना की उचित छे? १४ तुम्हार त जानेन कि स्वभाविक तरीका से पुरुष अगर लम्बा चूल राखे, त वहार तने अपमानेर बात छे। १५ मगर अगर स्त्री लोक लम्बा चूल राखछे, इडा वहार तने शोभा छे। क्यौँकि वहाक लम्बा चूल माथा ढकवार तने देयाल गहे। १६ अगर कोय लोक इडार बारे बहस करवा चाहचे, त मुई सिरिफ यहीडा कहवा चाहची कि ना त हमसार आर ना परमेश्वरेर मंडलीर बीचोत आराधना करवार कोय दोसरा तरीका छे।

प्रभु-भोजेर बारे शिक्षा

१७ अला मुई जैला बातेर बारे तुमसाक आदेश दिछी, उलार बारे मुई तुमसार बड़ाई नी करछी, क्यौँकि तुम्हरा जैमान्दी करे आराधना करवारखुना मंडलीत जोड़ो होचेन, वहात तुमसार भलाईर बदले

नुकसान होचे। १८ पहिला बात त मुई इडा सुनवा पारछी, जैखुना तुम्हरा मंडली हिसाबे एक साथे जोड़ो होचेन, उखुना तुमसार बीचोत फूट होचे, आर इडा बातोक मुई कुछु हद तक विश्वास करछी। १९ तुमसार बीचोत फूट होना जरूरी छे जसे कि पता चले कि तुमसार बीचोत सही माने विश्वासी के छे। २० मंडली हिसाबे एक साथे जोड़ो हंय जैला तुम्हरा खाचेन, उला सही माने त प्रभु-भोज नी छे। २१ क्याँकि तुम्हरा कोय कहारो तने इन्तेजार नी करछेन, आर खाय लिछेन। कुछुला लोक कुछु खवा नी पाछे, मगर कुछुला लोक खोब खाय-पेय मतवाला हंय जाछे। २२ खान-पान करवार तने की तुमसार अपना घर नी छे? या फेर तुम्हरा की परमेश्वरेर मंडलीर अपमान नी करछेन, आर उला लोकोक शरमिन्दात फिकाय दुवा चाहचेन, जहार लिकिन कुछु नी छे? यहार बारे की मुई तुमसार बड़ाई करी? यहार बारे मुई तुमसार बड़ाई नी करूम। २३ क्याँकि तुम्हरा मोर शिक्षार मुताबिक नी चलछेन, जैडा शिक्षा मोक प्रभुर लिकिन से मिलिहे, आर उडा शिक्षा मुई तुमसाक दिहिनु। प्रभु यीशुक जैडा रातोत धोखाबाजी से धराल गहिले, यीशु उडा रातोत रूटी लिले, २४ आर परमेश्वरेर शुकुरिया करे रूटीडाक भाँगिल आर कोहले, “इडा मोर बदन छे, जैडा तुमसार तने देयाल जाछे। मोक याद करवार तने तुम्हरा यही किसम करेन।” २५ यही मान्दी रूटी खवार बाद वहाँय अंगुरेर रसेर बाटीडा ले कोहले, “इडा बाटीर रस नया रिस्ता कायम

करवार एकटा चिन्ह छे, जैडाक परमेश्वर मोर खूनेर जरियाय कायम करिहे। तुम्हरा जैखुना इडा बाटी से पीबेन, मोक याद करवार तने यही मान्दी करेन।” २६ यही तने जैखुन तक प्रभु दोबारा नी ओसछे, तुम्हरा जैखुना इकिसम करे रूटी खाभेन आर बाटी से पीबेन, उखुना मोर मौतेर बारे प्रचार करभेन। २७ वहीलाते जहाँय अशुद्ध हालतोत इडा रूटी से खाबे आर प्रभुर बाटी से पिबे, वहाँय प्रभुर बदनेर आर वहार खूनेर दोषी होबे। २८ हरेकझन लोक अपना-आपोक जाँच करे लोक, तब वहाँय रूटी से खाक आर बाटी से पीयोक। २९ वहीलाते जहाँय खवारखुना प्रभुर बदनडार बारे बिना बुझे समझे खान-पान करछे, वहाक परमेश्वर सजई दिबे। ३० वहीलाते तुमसार बीचोत बहुतझन लोक कमजोर आर बेमार छे, आर कुछ लोक मोर गहे। ३१ मगर अगर हमरा सही तरीका से अपना-आपोक जाँच करी, त हमसार पर कोय सजई नी ओसबे। ३२ मगर प्रभु जैखुना हमसाक सजा दिछे, उखुना वहाँय हमसाक शासन करछे, जसे कि दुनियाँर सब लोकेर साथे हमसाक दोषी ना करे। ३३ वहीलाते मोर भईला! जैखुना तुम्हरा एक साथे खवार तने जोड़ी होचेन, एक-दोसराझनार तने इन्तेजार करो। ३४ अगर कोय भूखाय छे, वहाँय घरोत खाय ओसोक, जसे कि मंडलीत एक साथे जोड़ी हवार बाद परमेश्वरेर दण्ड तुमसार पर ना पोड़ोक। दोसराला चीजेर बारे मुई जैखुना ओसमु, मुई तुमसाक बताम कि तुमसाक कि करवा होबे।

पवित्र आत्मार बारे शिक्षा

१२ हे भा-बहिनला! पवित्र आत्मा जैला दान हमसाक दिछे, मुई नी चाहची कि तुम्हरा उला दानेर बारे अनजान रहेन। २ जैखुना तुम्हरा सच्चा परमेश्वरेर सेवा नी करछिलेन, उखुना धोखात पोड़े गोंगा मूर्तिरलार पूजा करछिलेन, ३ वहीलाते मुई तुमसाक बताय दुवा चाहची कि अगर कोय परमेश्वरेर आत्मार मदद से बोलछे, त वहाँय कभी नी कोहबे कि यीशुर पर श्राप छे। आर कोय पवित्र आत्मार बिना यहोडा कहवा नी पारबे कि यीशु प्रभु छे। ४ पवित्र आत्मा एकझन छे। वहाँय सब विश्वासी लोकोक सेवा करवार तने अलग-अलग दान दिछे। ५ आर सेवा करवार काम अलग-अलग छे, मगर हमरा एके प्रभुर सेवा करछी। ६ परमेश्वर सभाको अलग-अलग काम दिहे, मगर वही परमेश्वर अलग-अलग काम करवार तने सभाको शक्ति दिछे। ७ सभारो भलाईर तने पवित्र आत्मार काम सब विश्वासीर अन्दरोत देखाल जाछे। ८ परमेश्वर पवित्र आत्मार जरियाय कहाको बुद्धिर बात बोलवार दान दिछे। वही पवित्र आत्मार जरियाय परमेश्वर कहाको ज्ञानेर बात बोलवार दान दिछे। ९ कहाको वही आत्मार जरियाय विश्वास करवार शक्ति दिछे, कहाको बेमार लोकोक ठीक करवार शक्ति दिछे, १० कहाको चमत्कारेर काम करवार दान, कहाको भविष्यवाणी करवार दान, कहाको इडा फरक करवार दान दिछे कि कुनडा वचन परमेश्वर आत्मार जरियाय छे,

आर कुनडा नी छे। कहाको अलग-अलग भाषा बोलवार दान, आर कहाको अनजान भाषार माने समझवार शक्ति दिछे। ११ इला सबला काम एके पवित्र आत्मा करछे। वहाँय अपना इच्छा मुताबिक सभाको अलग-अलग दान दिछे।

एक बदन आर अंग बहुतला

१२ जैकिसम बदन एकटा छे आर बदनडार बहुतला अंग छे, आर बदनडार सबला अंग अलग-अलग हवार बादो एकटाय बदन छे, यही मान्दी मसीहारो बारे छे। १३ ठीक यही मान्दी एकेडा पवित्र आत्मार जरियाय एकटा बदन हवार तने हमसार सभारो बपतिस्मा होय। हमरा चाहे यहूदी होई या गैर-यहूदी, चाहे गोलाम होई या आजाद लोक होई, हमरा सबकोय एकटाय पवित्र आत्मा पाही। १४ क्यौंकि बदनडा सिरिफ एकटा अंग से बनाल नी जाय, मगर बहुतला अंग से बनाल गहे। १५ अगर पाँखान कोहय कि मुई हाथ नी छी, वहीलाते मुई बदनडार हिस्सा नी छी। यहार माने इडा नी छे कि पाँखान बदनडार हिस्सा नी छे। १६ कानडा अगर कोहय, “मुई आँख नी छी, आर मुई बदनडार हिस्सा नी छी।” यहार माने इडा नी छे कि कानडा बदनडार हिस्सा नी छे। १७ अगर पूराडा बदन सिरिफ आँख होलतेन, त सुनाल कसे गेलतेन? अगर पूराडा बदन सिरिफ कान होलतेन, त सुँघाल कसे गेलतेन? १८ परमेश्वर हरेकटा अंगोक वहीठिन राखियेह, जैठिन वहाँय

उलाक रखवा चाहचिले। १९ अगर सबला हिस्सा एकेडा अंग होलतेन, त बदन नी बनीलतेन २० क्यौंकि अंग बहुतला छे, मगर बदन एकटाय छे। २१ वहीलाते आँख हाथखानोक कहवा नी पारबे कि मुई तोक नी चाहची, ना त माथाडा पाँलाक कहवा पारबे कि मुई तोक नी चाहची। २२ यहार अलावा हमरा देखछी कि बदनडार जैला अंग कमजोर छे, उला बहुत कामेर छे। २३ जैला अंगोक हमरा कम इज्जत वाला समझेछी, वहीलाके बेसी इज्जत मिलछे, आर जैला अंगोक बाहरे देखाल नी जाछे, उलाक हमरा अच्छा से झाँपे राखछी, २४ बहुत खुबसूरत अंगोक झाँपे रखवार जरूरत नी होचे। परमेश्वर बदनडाक इकिसम करे बनाहे कि जैला अंगोक इज्जतेर कमी छिले, उलाक बेसी करे इज्जत दे २५ जसे कि बदनडार भीतरोत फूट पैदा नी होय, बल्के बदनडार सबला अंग एक-दोसराझनार तने चिन्ता करे। २६ अगर बदनडार एकटा अंग तकलीफ पाछे, त उडा अंगेर साथे सबला अंग तकलीफ पाछे। अगर एकटा अंगेर बड़ाई होचे, त सबला अंग उडा अंगेर खुशीर भागीदार होचे। २७ तुम्हरा मसीहार बदन छेन आर एक-एकझन तुम्हरा बदनडार अंग छेन। २८ परमेश्वर मंडलीत सबसे पहिला मसीह-दूतोक, दोसरा नबीक, तेसरा सीखानेवालाक, तब चमत्कारेर काम करनेवालाक, तब बेमारीक अच्छा करनेवालाक, तब मदद करनेवालाक, शासन करनेवालाक, आर तब अनजान भाषा बोलनेवालाक नियुक्त करिहे। २९ सबकोय त मसीह-दूत

नी छे, सबकोय त नबी नी छे। सबकोय त सीखानेवाला नी छे। सबकोय त चमत्कारेर काम करवा नी सकेछे। ३० सभाको त बेमारी अच्छा करवार दान नी मिलिहे। सबकोय त अनजान भाषात बात करवा नी सकेछे। सबकोय त भाषार माने नी बताछे। ३१ वहीलाते तुम्हरा अपना मन आढ़ोह बोड़ो दानेर पर लगाव जैला कि बहुत जरूरी छे। मगर मुई तुमसाक जीवन बितवार अच्छा से अच्छा रास्ता बताछी।

प्रेमेर बारे शिक्षा

१३ मुई अगर मानुषेर सबला भाषात आर फरीस्तार भाषात बात करी, मगर मोर भीतरोत प्रेम नी रहय, त मोर बातला ठनठन करे बजनेवाला घंटीर आर झन-झन करे बजनेवाला करतालेर मान्दी छे। १ अगर मोक नबीर मान्दी बात बोलवार ज्ञान रहय, आर सब किसमेर छुपाल बातलाक बुझवार ज्ञान रहे, मोक सब किसमेर ज्ञान रहे, आर अगर पहाड़खानोक एकठिन से उठे दोसरा ठिन सड़काय दुवार विश्वास रहय, मगर मोर भीतरोत प्रेम नी रहय, त मुई कुछु नी छी। ३ मोर लिकिन जतेला चीज छे, उलाक अगर मुई गरीब लोकोक खवार तने दान करे दी। आर अगर मुई अपना बदनडाको बलिदानेर तने दे दी, मगर मोर भीतरोत प्रेम नी रहय, त मोक कोय पैदा नी। ४ जहाँय प्रेम करछे, वहाँय बर्दास्त करछे। जहाँय प्रेम करछे, वहाँय दया करछे। जहाँय प्रेम

करछे, वहाँय ईर्ष्या-जलन नी करछे। जहाँय प्रेम करछे, वहाँय अपना बड़ाई नी चाहचे। जहाँय प्रेम करछे, वहाँय घमंड नी करछे। ५ जहाँय प्रेम करछे, वहाँय बदतमीजी नी करछे। जहाँय प्रेम करछे, वहाँय अपना भलाई नी चाहचे। जहाँय प्रेम करछे, वहाँय जल्दी गोस्सा नी करछे। जहाँय प्रेम करछे, वहाँय कहारो बुरा व्यवहार अपना मनोत नी राखछे। ६ जहाँय प्रेम करछे, वहाँय कुकरम से खुश नी होचे। मगर सच बात से खुश होचे। ७ जहाँय प्रेम करछे, वहाँय सबला बातोक सहय लिछे। जहाँय कहाको प्रेम करछे, वहाँय वहार सबला बातेर पर विश्वास करछे। जहाँय प्रेम करछे, वहाँय सब बातेर उम्मेद राखछे। जहाँय प्रेम करछे, वहाँय सबला बातोक बर्दास्त करछे। ८ प्रेम कभी खतम नी होचे। नबीर बात अगर छे त उडा खतम हंय जाबे। अनजान भाषात बात करना बन्द हंय जाबे। ज्ञानेर बात बोलवार दान छे त उला मिटे जाबे। ९ क्यौंकि हमसार ज्ञान अधुरा छे, आर हमसार भविष्यवाणी अधुरा छे। १० मगर जैखुना सब कुछ पूरा हवार समय ओसे जाबे, उखुना ज्ञानेर बात बोलवार दान आर भविष्यवाणी करवार दान समाप्त हंय जाबे। ११ जैखुना मुई छोटो छिनु, छोटो छुवार मान्दी बात बोलछिनु। छोटो छुवार मान्दी दिल छिले। छोटो छुवार मान्दी बुद्धि छिले। मगर जैखुना जवान हंय गेनु, त छोटो छुवार मान्दी बात बोलवा छोड़े दिनु। १२ अला हमरा ऐयनार आगुत झेपसा देखछी, मगर सब कुछ पूरा हवार समय

हमरा आमना-सामना देखमु। अला मोर ज्ञान अधुरा छे, मगर उखुना इकिसम पुरा-पुरी पहचान करवा पारमु, जैकिसम कि अला परमेश्वर मोक पहचान करिहे। १३ आखिरोत विश्वास, उम्मेद, प्रेम, तीनोंडा टिके छे, मगर तीनोंडार भीतरोत सबसे बोड़ो प्रेम छे।

पवित्र आत्मार दान

१४ तुम्हरा प्रेमेर मुताबिक चलो, आर आत्मार दान पवार तने अपना दिल लगाव, खास करे परमेश्वरेर वचन प्रचार करवार दानेर तने कोशिश करो। १ क्यौँकि जहाँय अनजान भाषात बात बोलछे, वहाँय लोकेर साथे नी, मगर परमेश्वरेर साथे बात करछे, क्यौँकि कोय लोक वहार बातलाक बुझवा नी पारछे। कारण वहाँय पवित्र आत्मार मदद से परमेश्वरेर छुपाल बातलाक बोलछे। ३ मगर जहाँय परमेश्वरेर वचन प्रचार करछे, वहाँय विश्वासी लोकेर आत्मिक उन्नतिर कराछे, उसार हौशला बढ़ाछे आर शान्तिर बात करछे। ४ जहाँय अनजान भाषात बात बोलछे, वहाँय अपना-आपेर तरक्की करछे, मगर जहाँय वचनेर प्रचार करछे वहाँय मंडलीर तरक्की करछे। ५ मुई चाहची कि तुम्हरा सबकोय अनजान भाषात बात करेन, मगर यहा से बेसी इडा चाहची कि तुम्हरा परमेश्वरेर वचनेर प्रचार करेन। क्यौँकि अगर कोय अनजान भाषात बोलछे, आर मंडलीर उन्नतिर तने कोय अगर वहार मानेडा समझाय

दुवा नी पारछे, त जहाँय वचनेर प्रचार करछे, त वहाँय बोड़ो छे।
६ वहीलाते मोर भा-बहिनला! अगर मुई तुमसार बीचोत ओसे अनजान
भाषात बात करी, आर तुमसाक परमेश्वरेर भेदेर बात नी बताई, आर
ना परमेश्वर वचन, ना ज्ञान आर ना शिक्षा दी, त मुई तुमसार कोय
मदद नी करछी। ७ बाँसी या सारंगी जैलार अन्दरोत जान नी छे, जब
उला से साफ-साफ सूर नी निकलेछे, त कोय कसे करे जानबे कि कुन
गान बजेछे? ८ अगर लड़ाईर शंखेर आवाज सही नी होय, त सैनिक
लड़ई तने कसे करे तैयार होबे? ९ यही मान्दी तुम्हराव छेन, अगर तुम्हरा
इकिसम बोलछेन, जैला बुझाल नी जाछे, त कसे करे लोक जानबे कि
तुम्हरा की बोलछेन? तुमसार इकिसम बोलना बेकार छे। १० हमरा जानी
कि दुनियाँत बहुत किसमेर भाषा छे, आर कोयडा भाषा बेमतलबेर नी
छे। ११ आर अगर मुई भाषाडार माने नी जानी, त बोलनेवालार आगुत
मुई एकझन विदेशीर मान्दी समझाल जाम, आर बोलनेवालाडाव मोर
आगुत एकझन विदेशीर मान्दी समझाल जाबे। १२ तुमसारो साथे यही
मान्दी बात छे। तुम्हरा जब पवित्र आत्मार दान पवार तने इच्छा करछेन,
त सबसे बेसी उला दानेर तने कोशिश करो, जैला दान से मंडलीर
उन्नति होय। १३ वहीलाते जैला लोक अनजान भाषात बात बोलछे, वरा
प्रार्थना करोक कि वरा जैडा बोलछे, उडार माने बुझाय दुवा पारे। १४ मुई
अगर कोय अनजान भाषात प्रार्थना करी, त उखुना मोर अपना

आत्माडाय प्रार्थना करछे, मगर मोर दिमागटा कोय काम नी करछे।
१५ मोक अला की करवा लागे? अला मुई आत्मार मदद से प्रार्थना करूम आर साथे-साथे दिमाग से प्रार्थना करूम, मुई आत्मार मदद से भजन गामु, आर साथे-साथे दिमाग से भजन गामु। १६ अगर तुम्हरा अनजान भाषात परमेश्वरेर शुकुरिया करछेन, त दोसरा लोक कसे करे राजी हंय हाँ कोहबे, जबकि वरा तुमसार कहाल बातलाक बुझवा नी पारछे? १७ क्याँकि होय त तुम्हरा ठीक से शुकुरिया करछेन, मगर इडा से दोसरा लोकोक कोय मदद नी मिलछे। १८ मुई परमेश्वरेर शुकुरिया करछी कि मुई तुमसार सभा से बेसी अनजान भाषात बात बोलछी। १९ मगर अनजान भाषात दस हजार बात बोलवार बदले मंडलीत शिक्षा दुवार तने पाँचटा बात बोलना काफी छे, जैला बातोक लोक समझेछे। २० हे भा-बहिनला! अपना सोच-विचारोत छोटो छुवालार मान्दी ना होयेन। बुराईर बारे छोटो छुवालार मान्दी निर्दोष बनो, आर सोच-विचारोत समझदार लोकेर मान्दी बनो। २१ नबीर नियमोत लिखाल छे, “मुई अनजान भाषा आर विदेशी लोकेर भाषा दे इला अविश्वासी लोकेर साथे बात बोलमु, मगर तहारो पर वरा मोर बात नी सुनबे, इडा परमेश्वर कोहचे।” २२ इडा से मालूम होचे कि अनजान भाषा विश्वासी लोकेर तने नी, मगर अविश्वासी लोकेर तने चिन्ह छे। मगर भविष्यवाणी अविश्वासी लोकेर तने नी, बल्के विश्वासी लोकेर तने छे।

२३ वहीलाते अगर पूरा मंडली एक साथे जोड़ो होचे, आर सबकोय अनजान भाषात बात करछे, आर वहीखुना अविश्वासी या दोसरा लोक उठिन ओसछे, त वरा की इडा नी कोहबे कि इला लोक पगला हंय गहे? २४ मगर अगर सबकोय भविष्यवाणी करछे, आर अविश्वासी या दोसरा लोक उठिन ओसछे, त वरा उसार बात सुने, अपना-आपोक दोषी समझिबे, आर वहीला बातेर जरियाय अविश्वासी लोकलार इन्साफ होबे। २५ उसार दिलेर छुपाल बातला सामनात ओसे जाबे, आर वरा माटीत पोड़े परमेश्वरेर बड़ाई करे कोहबे, “सचमुच परमेश्वर तुमसार बीचोत छे।”

मंडलीर उन्नतिर तने सलाह

२६ हे भा-बहिनला! मुई तुमसाक कोहची कि तुम्हरा जैखुना मंडलीत एक साथे जोड़ो होचेन, त तुमसार भीतर से कोय परमेश्वरेर भजन गाछेन। कोय शिक्षा दिछेन, कोय परमेश्वरेर सच्चाईर बारे प्रचार करछेन, कोय अनजान भाषात बात करछेन, आर कोय भाषाडार माने समझाय दिछेन। सब कुछु मंडलीर तरक्कीर तने हवा चही। २७ अगर कोय अनजान भाषात बात करछे, त दुईझन या बेसी से बेसी तीनझन बारी-बारी से बोले, आर कोय दोसरा लोक उलार माने समझाय दे। २८ मगर अगर अनजान भाषात माने समझाय दुवार तने कोय नी रहय, त वरा शांत रहोक। आर वरा शांत हंय परमेश्वरेर साथे बात करोक।

२९ जहाँय भविष्यवाणी करछे, वरा दुईझन या तीनझन करोक आर दोसराला लोक उसार बातलाक जाँच करे देखोक कि उसार बातला परमेश्वरेर लिकिन से छे ना नी छे। ३० अगर एकझन लोक सभात बोठे छे, आर वहाँय परमेश्वरेर वचन पाछे, त जहाँय पहिले से बोलछे, वहाक चुप हंय जवा लागे। ३१ तुम्हरा सबकोय भविष्यवाणी करवा पारेन, मगर बारी-बारी से करवा लागे, जसे कि सबकोय सिखवा पारे आर हिम्मत पाय। ३२ क्याँकि जहाँय भविष्यवाणी करछे, वहार आत्मा वहारे काबूत रोहचे। ३३ क्याँकि परमेश्वर गड़बड़ी पैदा करनेवाला परमेश्वर नी छे, बल्के शांतिर परमेश्वर छे। सबठिन विश्वासीर मंडलीत, ३४ स्त्री लोकोक मंडलीत चुपचाप रहवा लागे, क्याँकि उसाक बोलवार अनुमति नी छे, बल्के अधीनोत रहवा लागे, जैकिसम कि नियम-कानून लिखाल छे। ३५ अगर वरा कुछु सिखवा चाहचे, त वरा अपना पतिलार लिकिन से घरोत सिखे लोक, क्याँकि मंडलीत स्त्री लोकोक बात करना शरमेर बात छे। ३६ खुश-खबरी तुमसार लिकिन से शुरू नी होय, आर सिरिफ तुमसारे लिकिन नी ओसिहिले। ३७ अगर कोय अपना-आपोक एकझन नबी मानछे या आत्मिक लोक समझेछे, वरा समझे लोक कि मोर बातला परमेश्वरेर हुकूम छे। ३८ जैला बात मुई लिखछी, अगर इला बातोक कोय लोक इन्कार करछे, त उला लोकेर पर ध्यान ना देन। ३९ वहीलाते मोर भा-बहिनला, भविष्यवाणी करवार इच्छा करो, आर

अनजान भाषात बोलवार तने कहाको मना ना करो। ४० मगर सबला काम बढ़िया से आर शांतिर साथे करो।

यीशु मसीहार जिन्दा हंय उठवार बारे

१५ मोर भा-बहिनला! मुई तुमसार लिकिन जैडा खुश-खबरी प्रचार करिहिनु, उडा खुश-खबरीर बातलाक तुमसाक ख्याल कराय दिछी, जैडाक तुम्हरा माने लिहेन आर उडार पर तुमसार विश्वास मजबूत छे। १ मुई जैडा खुश-खबरी तुमसार लिकिन प्रचार करिहिनु। अगर तुम्हरा उडाक मजबूती से धरे राखिहेन त तुम्हरा यहीडा खुश-खबरीर जरियाय पाप से मुक्ति पाभेन। अगर तुम्हरा ठीक से धरे नी राखभेन, त जैडा विश्वास करिहेन, उडा बेकार छे। ३ मुई खुद जैडा शिक्षा पाही, उडाक सबसे बेसी जरूरी बात समझे, तुमसाक बताय दिही कि मसीहा हमसार पापेर तने मारा गहे, जहार बारे पवित्र शास्त्रोत पहिले से बताल गहिले। ४ वहाक गड़ाल गहिले, आर परमेश्वरेर वचन मुताबिक तेसरा दिनोत वहाक जिन्दा करे उठाल गहिले। इला सबला बात पहिले से पवित्र शास्त्रोत बताल गहिले। ५ आर वहाँय पहिले पतरसोक दखा दिहिले, आर वहार बाद फेर चेलाक एक साथे दखा दिहिले। ६ यहार बाद वहाँय एक साथे पाँच सौ से बेसी विश्वासी भईलाक देखा दिले। इला लोकेर भीतर से कुछ लोक मोरे गहे, आर बेसीला लोक जिन्दा छे। ७ यहार

बाद वहाँय याकूबोक आर पीछू करे सबला मसीह-दूतलाक देखा दिले।
८ सबसे आखिरोत मोहको देखा दिले। माने लव मुई उकिसम बच्चार
मान्दी छिनु, जहार जनम ठीक समय नी होय। ९ मसीह-दूतेर बीचोत मुई
सबसे छोटो छी। मुई मसीह-दूत हवार लायक नी छी क्योंकि मुई
परमेश्वरेर मंडलीक सताछिनु। १० मगर अला मुई जे कुछ छी, उडा
परमेश्वरेर दयार कारण से छी। वहाँय मोर पर जैडा दया करिहे उडा
बेकार नी होय। मुई सबला मसीह-दूत से बेसी मेहनत करिही। इडा नी
कि मुई अपना ताकत से इला मेहनत करिही, बल्के परमेश्वरेर दयार
कारण से मुई इकिसम मेहनत करिही। ११ वहीलाते चाहे मुई प्रचार करी
या दोसराला मसीह-दूत प्रचार करे, हमरा एकटाय बातेर प्रचार करछी,
आर वहीडार पर तुम्हरा विश्वास करिहेन।

मुर्दा लोक जिन्दा होबे

१२ जब मसीहा मुर्दा से जिन्दा हंय उठिहे आर वहार प्रचार कराल जाछे,
त तुमसार बीच से कुछला लोक कसे कोहचे कि मुर्दा लोक जिन्दा नी
होबे? १३ अगर मुर्दा लोक जिन्दा हंय नी उठबे, त परमेश्वर कसे करे
मसीहाक जिन्दा करिहे। १४ अगर मसीहाक जिन्दा कराल नी गहे, त
हमसार प्रचार करना बेकार छे, आर तुमसार विश्वासो करना बेकार छे।
१५ अगर मुर्दा लोक लोक जिन्दा कराल नी जाबे, त हमरा गलत प्रचार
करछी क्योंकि हमरा गवाह दिछी कि परमेश्वर मसीहाक जिन्दा करे

उठाहे। १६ अगर मुर्दा लोक जिन्दा नी होबे, त मसीहाक जिन्दा कराल नी गहे। १७ अगर मसीहाक जिन्दा कराल नी गहे, त तुमसार विश्वास करना बेकार छे आर तुम्हरा अलाव अपना पापोत पोड़ाल छैन। १८ तब त जैला लोक मसीहार पर विश्वास करे मोर गहे, वरा बिनाश हंय गहे। १९ अगर हमरा इडा दुनियाँत सिरिफ अपना पैदार तने मसीहार पर उम्मेद करिही, त हमरा सब लोक से बेसी दुःखी छी। २० मगर मसीहाक सचमुच मुर्दा से जिन्दा कराल गहे। आर जतेला लोकोक मुर्दा से जिन्दा कराल जाबे, उला लोकेर बीच से मसीहा सबसे पहिले जिन्दा हंय उठिहे। २१ जैमान्दी एकझन लोकेर कारण से मौत ओसिहे, वही मान्दी एकझन लोकेर कारण से लोक मुर्दा से जिन्दा होबे। २२ जैकिसम आदमेर पापेर चलते सब लोक मोरछे, वही किसम मसीहार कारण से सब लोकोक जिन्दा कराल जाबे। २३ सबला मुर्दा लोक अपना-अपनी समय मुताबिक जिन्दा होबे। सबसे पहिले मसीहा जिन्दा हंय उठिहे। जैखुना मसीहा दोबारा ओसबे, वहार सबला लोक जिन्दा हंय उठबे। २४ वहार बाद वहाँय हरेक किसमेर राज, अधिकार आर शक्ति नाश करे दे पिता परमेश्वरेर हाथोत राज सोंपे दिबे, उखुना आखरी समय ओसे जाबे। २५ क्याँकि वहाँय तब तक राज करबे, जब तक वहाँय अपना सबला दुश्मनोक अपना पाँवर तोलोत करे नी लिछे। २६ सबसे आखरी दुश्मन छे “मौत” आर वहाको नाश करे देयाल जाबे। २७ शास्त्रोत इडा

लिखाल छे, “परमेश्वर सबला चीजोक वहार पाँर तोलोत करे दिहे।” मगर जैखुना शास्त्रोत बताछे, “सब कुछु वहार अधीनोत करे दिहे,” त परमेश्वर अपना-आपोक छोड़े सब कुछु वहार अधीन करे दिहे। २८ जब परमेश्वर सबला चीज बेटार अधिकारोत करे दिबे, तब बेटा खुद अपना-आपोक परमेश्वरेर अधिकारोत करे दिबे। आर तब पिता जहाँय सबला चीजोक बेटार अधिकारोत करे दिबे, तब परमेश्वर सब कुछुर मालिक हंय जाबे। २९ अगर मुर्दा लोक जिन्दा नी होबे, त लोकोक मुर्दा लोकेर तने बपतिस्मा लुवार की फायदा छे? वरा मुर्दा लोकेर तने बपतिस्मा क्याँ लिछे? ३० अगर मुर्दा लोक जिन्दा नी होबे, त क्याँ हमरा हरखुना खतरार सामना करवार तने तैयार रोहछी? ३१ हे भा-बहिनला! हमरा हर दिना मौतेर सामना करछी। जैडा काम प्रभु यीशु तुमसार जीवनोत करिहे, वहीडार तने मुई घमंड करछी आर वहीलाते तुमसाक इला बात बताछी। ३२ इफिसुस शहरोत मुई अगर जंगली जानवरलार मान्दी लोकलार साथे लड़ाई करी, त इडा से मोक कोय फायदा नी छे। अगर मुर्दा लोक जिन्दा नी होबे, तब लोक कहवा पारे, ओसो, हमरा खान-पान आर मौज-मस्ती करी, क्योंकि काल हमरा मोरे जाम। ३३ यदि तुमसाक कोय कहय मुर्दा लोक जिन्दा नी होबे, तुम्हरा धोखा ना खायन क्योंकि खराब संगति अच्छा लोकोक खराब करे दिछे। ३४ तुम्हरा

અપના સોચ-બિચાર સહી કરો, આર ફેર પાપ ના કરો। તુમસાર બીચોત કુછુલા લોક પરમેશ્વરોક ની જાને, ઇલા તુમસાર તને શરમેર બાત છે।

જિન્દા હવાર બાદ શરીર બદલે જાબે

૩૫ કોય ઇડા પૂછવા પારે, “મુર્દા લોક કસે કરે જિન્દા હોબે, આર અગર જિન્દા હોબે, ત ઉસાર કુન કિસમેર બદન હોબે?” ૩૬ તુમ્હરા નાસમઝ્ઝ છેન! જૈડા તુમ્હરા બુનછેન, ઉડા જબ તક સડે ની જાછે, તબ તક ઉડા સે ગાછ ની ઉઠેછે। ૩૭ આર જૈડા બીજ તુમ્હરા લગાછેન, ઉડા બીજ સે જૈડા ગાછ ગાજે ઉઠેછે, ઉડા ગાછોક તુમ્હરા ની લગાછેન, બલ્કે તુમ્હરા સિરિફ એકટા બીજોક લગાછેન। ઉડા બીજ ગોહમેર હોક યા કોય દોસરા અનાજેર હોક। ૩૮ પરમેશ્વર હરેકટા બીજોક અપના ઇચ્છા મુતાબિક શરીર દિછે। આર હરેકટા બીજોક પરમેશ્વર એકટા ખાસ શરીર દિછે। ૩૯ ક્યાંકિ સબલા શરીર એક માન્દી ની છે। માનુષેર શરીર દોસરા કિસમ, જાનવરેર શરીર દોસરા કિસમ, ચિઢિયાર શરીર દોસરા કિસમ, આર માછેર શરીરો દોસરા કિસમ છે। ૪૦ આસમાનેર ચીજ અલગ કિસમ આર ધરતીર ચીજ અલગ કિસમ દખા જાછે। આસમાનેર ચીજેર ખુબસૂરતી ધરતીર ચીજેર ખુબસૂરતી સે અલગ છે। ૪૧ સુરજેર રોશનીર ચમક એક કિસમ છે, ચાનેર રોશનીર ચમક એક કિસમ છે। આર હરેકટા તારાર ચમક અલગ-અલગ છે। ૪૨ ઠીક યહી માન્દી મુર્દા લોકેર જિન્દા હવાર બારે છે। જૈડા શરીરોક ગાડે દેયાલ જાછે, ઉડા શરીર નાશ હંય જાછે,

आर जैडा शरीरोक जिन्दा कराल जाबे, उडा शरीर कभी नाश नी होबे।
४३ जैखुना लाशटाक गाड़ाल जाछे, त माटीर तोलोत सड़े जाछे, आर
जैखुना जिन्दा कराल जाबे, देखते सुन्दर लागबे। इडाक कमजोरीर
हालतोत गड़ाल जाछे, मगर जैखुना जिन्दा होबे, शक्तिशाली बने जाबे।
४४ साधारण शरीर छे, आर एकटा आढ़ोह शरीर छे, जैडा आत्मार
जरियाय चलछे। साधारण शरीरटाक गाड़े देयाल जाछे, आर जैखुना
जिन्दा होबे, त उडा शरीर आत्मार जरियाय चलबे। ४५ परमेश्वरेर
वचनोत लिखाल छे, “पहिला मानुष आदम जिन्दा प्राणी बने गेल, आर
आखरी आदम मसीहा जीवन देनेवाला आत्मा बने गेल। ४६ पहिले
आत्मिक शरीर नी होचे, मगर साधारण शरीर होचे, आर यहार बाद
आत्मिक शरीर होचे। ४७ पहिला मानुष आदमोक माटी दे बनाल गहिले,
मगर दोसरा किसमेर मानुष मसीहा स्वर्ग से ओसिहिले। ४८ जैमान्दी
आदमोक माटी से बनाल गहिले, वही मान्दी धरतीर मानुषलाको माटी
से बनाल गहे। आर जहाँय मसीहाक ग्रहण करछे, उसार सभारो
मसीहार मान्दी स्वर्गेर शरीर होबे। ४९ हमरा आदमेर मान्दी छी, जहाक
माटी से बनाल गहिल। जैखुना हमरा जिन्दा हंय उठमु, उखुना हमसारो
शरीर मसीहार मान्दी होबे, जहाँय स्वर्ग से ओसिहिले। ५० हे भा-
बहिनला, मुई तुमसाक इडा कोहची, मांस आर खून से बनाल हमसार
इडा शरीर नाश होनेवाला छे। परमेश्वरेर राज जैडा हमेशार तने

रहनेवाला छे, इडा शरीर ले हमरा परमेश्वरेर राजोत ढुकवा नी पारमु।
५१ मुई तुमसाक एकटा भेदेर आर अजूबा सच बात बताछी, हमरा सबकोय मोरे नी जामो, बल्के बदले जाम। ५२ इला सबला एक पलकेर अन्दरोत होबे। जैखुना आखरी शंख फूँकाल जाबे। आवाज हवार साथे-साथे हमरा सबकोय बदले जामो। उडा शंखेर आवाज जैखुना होबे, उखुना मुर्दाला जिन्दा हंय उठबे, आर वरा कभी नी मोरबे, आर हमराव बदले जाम। ५३ हमसार नाश होनेवाला शरीर इकिसम बनना जरूरी छे कि कभी खतम नी होबे। हमसार मोरनेवाला शरीर इकिसम बनना जरूरी छे कि कभी नी मोरेबे। ५४ जैखुना हमसार नाश होनेवाला शरीर इकिसम बने जाबे कि आर कभी नाश नी होबे। हमसार मोरनेवाला शरीर इकिसम बने जाबे कि आर कभी नी मोरेबे। तब शास्त्रेर इडा बात पूरा हंय जाबे, मौत हारे गेल। ५५ हे मौत, तोर जीतवार शक्ति खतम हंय गेल। हे मौत, तोर कष्ट दुवार शक्ति खतम हंय गेल। ५६ पाप से कष्ट मिलछे, आर पाप हमसार पर अधिकार चलाछे, जब हमरा नियम-कानून नी मानछी। ५७ मगर परमेश्वरेर धन्यवाद होक कि वहाँय हमसाक प्रभु यीशु मसीहार जरियाय जीत हाँसील कराय दिछे। ५८ वहीलाते मोर प्यारा भा-बहिनला! मजबूत होय टिके रोहेन। कोय कारण से तुम्हरा ना हिलेन। सबखुना प्रभुर कामेर तने अपना-आपोक

पुरा-पुरी सोंपे देन क्याँकि तुम्हरा जानेन कि प्रभुर काम करले, तुमसार मेहनत बेकार नी होचे।”

यरूशलेम शहरेर विश्वासीलार तने दान

१६ अला मुई यरूशलेम शहरेर विश्वासीलाक लिकिन दान पठवार बारे कोहची, जैकिसम कि मुई गलतिया प्रदेशेर मंडलीलाक बताहिनु। २ हर सप्ताहार पहिलाडा दिनोत तुम्हरा अपना आमदानी से कुछु अलग करे राखो, जसे कि मुई जैखुना ओसमु, उखुना तुमसाक दान उठवा नी होबे। ३ तुम्हरा जैला लोकोक पठवा चाहचेन, उसाक चुने लव। जैखुना मुई तुमसार लिकिन ओसमु, उसार हाथे मोर चिट्ठी आर जमा कराल दानला दे यरूशलेम शहरेर विश्वासीलार लिकिन पठाय दुम। ४ अगर तुम्हरा चाहचेन कि मोहको जाना जरूरी छे, त मुई जाम। उसाक मोर साथे पठवा पारेन।

पौलुसेर यात्रार योजना

५ तुमसार लिकिन जवार पहिले मोक मकिदोनिया जाना जरूरी छे, मकिदोनिया जवार बाद मुई तुमसार लिकिन ओसुम। ६ हवा पारे कि मुई तुमसार साथे कुछु दिन रोहमु या फेर जाड़ेर समयडा तुमसार साथे काटी। आर उठिन से जैठिन मुई जई, तुम्हरा मोर सफरेर तने मदद करवा पारेन। ७ अला मुई मकिदोनिया जवारखुना तुमसार साथे

मुलाकात करवा नी चाहची। अगर प्रभु चाहे, त मोर इच्छा छे कि मुई पीछू करे तुमसार साथे मुलाकात करी जसे कि मुई कुछु दिन तुमसार साथे रहवा पारी। ८ मगर मुई पित्तेकुस परबेर समय तक यही ठिन इफिसुस शहरोत रोहमु। ९ क्याँकि मोर तने इठिन प्रचारेर आर शिक्षार कामेर तने दरवाजा खोलाल छे, आर बहुत किसमेर काम होचे, मगर बिरोधी लोको बहुत छे। १० अगर तिमोथी तुमसार लिकिन ओसछे, त तुम्हरा देखेन कि वहाँय तुमसार बीचोत निडर हंय रहवा पारे, क्याँकि मुई जैकिसम प्रभुर काम करछी, वहाँय वही मान्दी काम करछे। ११ वहीलाते कोय लोक वहाक नीचा नजर से ना देखेन, तुम्हरा वहाक आशीर्वाद दे पठाय देन जसे कि वहाँय मोर लिकिन ओसवा पारे। मुई इन्तेजार करछी कि वहाँय विश्वासी भईलार साथे मोर लिकिन ओसबे। १२ अला मुई भई अपुल्लोसेर बारे बोलछी। मुई वहाक बहुत बिनती करिहिनु कि वहाँय विश्वासी भईलार साथे तुमसार लिकिन जाय, मगर वहाँय उठिन जवा नी चाहले क्याँकि वहाँय सोचिल कि मोर तने अला उठिन जाना परमेश्वरेर इच्छा नी छे। पीछू करे मौका पाले वहाँय तुमसार लिकिन ओसबे।

आखरी शिक्षा

१३ तुम्हरा हुँसियार रोहेन। अपना विश्वासोत मजबूत रोहेन। साहसी आर ताकतवर बने रहेन। १४ तुम्हरा जे कुछ करभेन, प्रेमेर साथे करो। १५ भा-बहिनला, तुम्हरा त जानेन कि इस्तिफनुसेर परिवारेर लोकला आखया प्रदेशोत सबसे पहिले विश्वासी बनिहिले, आर वरा प्रभुर लोकलार सेवा करवार तने अपना-आपोक सोंपे दिहिले। १६ वहीलाते मुई तुमसासे बिनती करछी कि तुम्हरा इकिसम लोकेर अधीनोत रहव, आर उला लोकेर अधीनोत रहव, जहाँय प्रभुर तने मेहनत करछे। १७ इस्तिफनुस, आर फूरतुनातुस आर अखइकुस मोर लिकिन ओसिहे। वहीलाते मुई बहुत खुश छी, क्योंकि जैखुना तुम्हरा मोर लिकिन नी छिलेन, त एराय मोर देखभाल करिहिले। १८ येराय मोर आर तुमसार दिलोत हौशला दिहे। तुम्हरा इकिसम लोकेर इज्जत करेन।

नमस्कार आर आशीर्वाद

१९ आसिया इलाकार मंडलीलार विश्वासी भईला तुमसाक नमस्कार पठाछे। अक्विला आर प्रिसकिल्ला आर उसार घरेर मंडलीर प्रभुर लोकला तुमसाक अपना दिल से नमस्कार पठाछे। २० सबला भई तुमसाक नमस्कार पठाछे, प्रेमेर साथे तुम्हरा एक-दोसराझनाक नमस्कार कहव। २१ मुई पौलुस, अपना हाथ दे इडा नमस्कारेर बातोक लिखनु। २२ अगर कोय लोक प्रभुक प्रेम नी करछे, त वहार पर श्राप छे।

हे हमसार प्रभु! तुई ओसेक! २३ हमसार प्रभु यीशुर दया तुमसार पर
रोहोक। २४ तुम्हरा जहाँय प्रभुर छेन, मोर प्रेम तुमसार सभारो साथे
रोहोक। आमीन।

कुरिनथियुस शहरेर मंडलीक पौलुसेर दोसरा चिट्ठी

परिचय आर आशीर्वाद

१ कुरिनथियुस शहरोत आर आखाया इलाकात परमेश्वरेर पवित्र लोकला, मुई पौलुस छी। परमेश्वर अपना इच्छा मुताबिक मोक यीशु मसीहार दूत हवार तने अलग करिहे। मुई आर हमसार भई तिमोथी मिले तुमसाक इखान चिट्ठी लिकिन लिखछी। २ हमसार पिता परमेश्वर आर प्रभु यीशु मसीहा तुमसार पर दया करोक आर शान्ति दोक।

पौलुस परमेश्वरेर शुकुरिया करछे

३ ओसो, हमरा परमेश्वरेर आर हमसार प्रभु यीशु मसीहार पितार बड़ाई करी, जहाँय हमसार पर दया करछे आर तसल्ली दिछे। ४ वहाँय हमसाक सब तकलीफोत तसल्ली दिछे, जसे कि हमरा उला लोकोक तसल्ली दुवा पारी, जैला लोक तकलीफोत छे। हमरा लोकोक वही किसम तसल्ली दुवार पारी, जैकिसम हमरा परमेश्वरेर लिकिन से तसल्ली पाही। ५ जतेक बेसी मसीहार तने दुःख उठामु, ततेक बेसी

हमरा मसीहार जरियाय तसल्ली पामु। ६ अगर हमरा तकलीफ उठाछी, त इला तकलीफ तुमसार तसल्लीर आर मुक्तिर तने उठाछी। आर अगर हमरा तसल्ली पाछी, त इला तुमसार तसल्लीर तने पाछी। जैखुना तुम्हरा हमसार मान्दी यही किसमेर तकलीफ उठाभेन, उखुना इडा तसल्ली तुमसाक तकलीफ उठवार तने मदद करबे। ७ तुमसार बारे हमसार इडा पक्का विश्वास छे कि जैकिसम तुम्हरा हमसार तकलीफेर भागी होयेन, वही किसम हमसार तसल्लीर भागी होभेन। ८ भईला, मुई नी चाहची कि तुम्हरा हमसार सतावटेर बारे अनजान रहेन, जे सतावट हमसार पर आसिया प्रदेशोत पोहिले, क्याँकि उठिन हमरा इकिसम बेसी सताल गहिनु कि हमसाक बचवार कोय उम्मेदे नी छिले। ९ हमरा इडा महसूस करिहिनु कि हमसाक मौतेर सजई मिलिहे। इडा सतावट हमसार पर ओसिल जसे कि हमरा अपना-आपेर पर भरोसा ना करी, मगर परमेश्वरेर पर भरोसा करी, जहाँय मुर्दा लोकोक जीवन दान दिछे। १० परमेश्वर हमसाक एकटा भयानक मौतेर मुख से बचाहिले, आर अलाव वहाँय बचाछे। आर हमसाक उम्मेद छे कि वहाँय सबखुना बचाते रोहबे। ११ जैखुना बहुतला लोक प्रार्थना करबे, हमरा आशीर्वाद पामु। तब इडार तने बहुतला लोक खुश होबे आर परमेश्वरेर बड़ाई करबे। वहीलाते तुम्हरा अपना प्रार्थनार जरियाय हमसार मदद करो। १२ हमरा घमंड करछी कि हमरा सब मानुषेर साथे आर खास करे तुमसार साथे

हमरा पवित्र आर सीधा-साधा जीवन बिताही। इकिसमेर जीवन हमरा हमसार ज्ञान मुताबिक नी बिताही, बल्के परमेश्वरेर दयार मुताबिक बिताही। १३ हमरा तुमसाक आर कुछु नी लिखछी, मगर वहीला लिखछी जैला तुम्हरा पोढ़वा आर समझवा पारभेन, आर उम्मेद करछी कि तुम्हरा उला शिक्षाक पूरापूरी समझवा पारभेन, १४ तुम्हरा हमसार बातलाक कुछु हद तक समझे लिहेन। उम्मेद करछी कि जैखुना प्रभु यीशु घुरे ओसबे, त तुम्हरा हमसार पर घमंड करवा पारेन, आर हमरा तुमसार पर घमंड करवा पारमु।

पौलुस अपना योजना बदली करछे

१५ इला बातोक सच समझे, मुई पहिले तुमसार लिकिन ओसवा चाहचिनु, जसे कि मुई तुमसाक दुई बार आशीर्वाद दुवा पारी। १६ तुम्हरा जानछिलेन कि मकिदोनिया ओसवारखुना मुई तुमसार साथे मुलेकात करनुतेन, मगर मुलाकात करवा नी पारनु, आर फेर मकिदोनिया प्रदेश से घुरे ओसवारखुना तुमसार लिकिन ओसमु, जसे कि तुम्हरा मोक यहूदिया प्रदेश पठवार व्यवस्था करे दुवा पारलेनतेन। १७ मगर मोर इडा योजना बदले गेल, आर मुई तुमसार लिकिन ओसवा नी पारनु। मुई उकिसम काम नी करछी, जैकिसम साधारण लोक एकेडा समय “हाँ” आर “ना” दोनोंडा कोहचे। तुम्हरा इडा ना समझेछेन कि मुई इडा योजना बिना सोचे-समझे बनाहिनु। १८ परमेश्वर विश्वास करवार

લાયક છે। ઇડા બાત જૈકિસમ સચ છે, ઠીક વહી માન્દી ઇડાવ સચ છે
કિ તુમસાર સાથે હમસાર બાત એક સાથે “હાँ” આર “ના” ની હોચે।
૧૯ જે યીશુર બારે સીલાસ, તિમોથી આર મુર્ડે તુમસાર લિકિન પ્રચાર
કરિહી, વહી યીશુ મસીહા જહાંય પરમેશ્વરેર બેટા છે, એકેડા સમય વહાંય
“હાँ” આર “ના” ની કોહચે। બલ્કે વહાંય પરમેશ્વરેર તરફ સે હમેશા
“હાँ” કોહચે। ૨૦ ક્યાંકિ પરમેશ્વરેર સબલા વાદા યીશુ મસીહાર
જરિયાય “હાँ” બને જાછે। વહીલાતે હમરા વહાર નામે પરમેશ્વરેર બઢાઈ
કરવાર તને આમીન બોલછી। ૨૧ મગર ઇડા પરમેશ્વર છે, જહાંય હમસાક
આર તુમસાક મસીહાર સાથે જોડે દે મજબૂતી સે ટિકાય રાખિહે। વહી
પરમેશ્વર હમસાક અલગ કરે અપના કામોત લગાય દિહે। ૨૨ વહાંય
હમસાક અપના ધન સમઝે અપના સીલ-મોહર હમસાર પર લગાય દિહે
કિ હમરા વહારે છી। સબસે પહિલે વહાંય અપના આત્મા હમસાક દિહે,
આર દેખાહે કિ વહાંય હમસાક સબ કુછુ દિબે, જૈલા ચીજેર વહાંય વાદા
કરિહે। ૨૩ મુર્ડે પરમેશ્વરોક અપના ગવાહ માને બોલછી। મુર્ડે તુમસાક
ડંટવા આર તકલીફ દુવા ની ચાહચિનુ, વહીલાતે મુર્ડે કુરિનથિયુસ
શહરોત ઘુરે ની ઓસી। ૨૪ ક્યાંકિ તુમ્હરા વિશ્વાસોત મજબૂત છેન,
વહીલાતે હમરા વિશ્વાસેર બારે તુમસાર પોર હુકૂમ ચલવા ની ચાહચી,
મગર તુમસાક ખુશી દુવાર તને તુમસાર સાથે કામ કરછી।

२ मुई तुमसाक तकलीफ दुवा नी चाहचिनु, वहीलाते मुई उखुना तुमसार लिकिन नी ओसनु। २ अगर मुई तुमसाक दुःख दी, त मोक खुश करवार तने के रोहबे। सिरिफ वराय रोहबे, जहाक मुई दुःख दिछी। ३ वहीलाते तुमसार लिकिन जवार बदले मुई तुमसार तने चिट्ठी लिखे पठाहिनु। मुई जैखुना तुमसार लिकिन जाम, मुई तुमसार लिकिन से खुशी चाहची, कोय दुख नी चाहची। तुमसार पर मोर विश्वास छे कि जैडा खुशी मोर छे, वहीडा खुशी तुम्हरा सबकोय पायेन। ४ बहुत दुःखेर साथे आर काने-काने लोय बहाय मुई तुमसाक लिखिहिनु। मुई तुमसाक दुःख दुवार तने नी लिखी, बल्के इडा सोचे लिखिहिनु कि तुम्हरा जनवा पारेन, जे तुमसासे मोक कताखान गहिरा प्रेम छे।

कसूरबार लोकोक माफ करवार बारे

५ अगर कोय मोक दुःख दिहे, खाली मोहके दुःख नी दिहे, बल्के कुछु हद तक तुमसाक सभाको दुःख दिहे। ६ तुमसार बीच से बहुतझन विश्वासी वहाक वहार पापेर तने जताखान डाँटिहे, वहीला सजई वहार तने काफी छे। ७ तुम्हरा बल्के वहाक अला माफ करे दव आर वहाक तसल्ली दव जसे कि दुःखेर कारण से वहाँय हताश ना हंय जाय। ८ यही कारण से मुई तुमसासे बिनती करछी कि इडाक प्रमाण करे देखाव कि वहाक तुम्हरा प्रेम करछेन। ९ मुई यहोडा जाँच करवा

चाहचिनु कि तुम्हरा मोर बात मानछेन ना नी मानछेन, वहीलाते मुई तुमसाक लिखिहिनु। १० अगर तुम्हरा कहारो कसूर माफ करछेन, त मोहो वहाक माफ करछी। अगर कुछ माफ करवार छे, त मुई उला माफ करे दिही, आर तुमसारे कारण से मसीहार सामनात वहाक माफ करे दिही। ११ हमरा जानी कि शैतान बहुत चालाक छे, अगर हमरा एक-दोसराझनाक माफ नी करमु, त शैतान मौका पाय हमसार फायदा उठाबे।

त्रोआस शहरोत तितुसेर तने पौलुसेर चिन्ता

१२ मुई जैखुना मसीहार बारे खुश-खबरी प्रचार करवार तने त्रोआस शहरोत पहुँचिनु, त उठिन प्रभु मोक खुश-खबरी प्रचार करवार मौका दिले। १३ मगर मोर भई तितुसोक उठिन नी पानु, मुई अपना मनोत शान्ति नी पानु, वहीलाते त्रोआस से बिदा ले मकिदोनिया चले गेनु।

यीशु मसीहार जरियाय जीत

१४ मगर परमेश्वरेर शुकुरिया करछी कि परमेश्वर मसीहार जरियाय हमसार अगुवाई करछे, आर हमसाक जीताछे। आर हमसार जरियाय सबठिन लोक यीशुक जानछे, आर यीशुर खुश-खबरी अच्छा मोहकेर मान्दी छे। १५ जैखुना हमरा खुश-खबरीर प्रचार करछी, इडा परमेश्वरेर लिकिन मसीहार चढ़ाल मोहकेर मान्दी छे, जैखान मोहोक बचनेवाला

लोक आर नाश होनेवाला लोकेर बीचोत फैलछे। १६ जहाँय नाश होनेवाला छे, उसार लिकिन इखान मोहोक मौतेर गोंन छे आर जहाँय नया जीवन पाबे, उसार लिकिन इखान मोहोक जिन्दगीर मोहक छे। इकिसम काम करवार लायक के छे? १७ अपना फैदार तने जैला लोक परमेश्वरेर वचनडाक ले पैकारी करछे, हमरा उला लोकेर मान्दी नी छी, बल्के परमेश्वरेर पठाल लोकेर मान्दी छी आर यीशु मसीहार सेवक बने परमेश्वरेर सामनात खाँटी दिल से बोलछी।

विश्वासी लोकेर जीवन

३ हमरा की फेर अपना बड़ाई करवा शुरू करिही? हमसाक की दोसरा लोकेरो मान्दी सिफारिसेर चिट्ठी ले तुमसार लिकिन ओसवा होबे, ना तुमसार लिकिन से सिफारिसेर चिट्ठी लुवार जरूरी छे? हमसाक जरूरी नी छे। २ हमसार चिट्ठी त तुम्हराय छेन, जैखान हमसार दिलोत लिखाल छे। जैखानोक सब लोक पढ़छे आर जानछे। ३ इडा साफ-साफ दखा जाछे कि तुम्हरा मसीहार लिखाल चिट्ठी छेन, जैखानोक हमरा लोकेर लिकिन पहुँचाछी। इखान चिट्ठीक कोय कलम या स्याही से लिखाल नी गहे, मगर जिन्दा परमेश्वरेर पवित्र आत्मार जरियाय लिखाल गहे। इखान कोय पत्थलेर स्लेटेर पर लिखाल नी गहे, मगर मानुषेर दिलोत लिखाल गहे।

परमेश्वरेर नया रिस्तार सेवक

४ हमरा तुमसाक इला बात बोलछी क्यौँकि हमरा मसीहार जरियाय परमेश्वरेर पर भरोसा राखछी। ५ हमरा खुद इकिसम करवार लायक नी छी, बल्के हमसाक सब कुछ करवार शक्ति परमेश्वर दिछे। ६ परमेश्वर अपना लोकेर साथे अपना नया रिस्ता कायम करिहे। आर परमेश्वर हमसाक काम दिहे कि हमरा लोकोक वहार नया रिस्तार बारे बताई। इडा नया रिस्ता परमेश्वरेर पवित्र आत्मार जरियाय ओसिहे, जहाँय मानुषोक जीवन दिछे। इडा नया रिस्ता मूसार लिखाल नियम से नी ओसिहे, जैखान मौतेर सजई सुनाछे। ७ पत्थलेर पर लिखाल नियम-कानून मौतेर सजई दिछिले आर इकिसम चमकते दखा गहिले कि इजराएली लोक मूसार चेहराडा देखे रहवा नी पारछिले। इडा चमक कम होते जाछिले। ८ पवित्र आत्मा जैडा नियम दिहे, उडा नियम आढ़ोह बेसी चमकदार क्यौँ नी होबे? ९ अगर मौत देनेवाला नियम अतेक चमकदार छिले, त धर्मी ठहरानेवाला नियम आढ़ोह बेसी चमकदार क्यौँ नी होबे? १० पुराना नियमेर जगहोत नया नियम ओसिल। नया नियम बेसी शक्तिशाली आर बेसी सुन्दर छे। ११ कुछ समयेर तने जैडा नियम छिले आर उडा अगर सुन्दर छिले, त जैडा नियम हमेशा रोहबे, उडा नियम आढ़ोह बेसी सुन्दर होबे। १२ क्यौँकि नया नियम हमसाक बहुत बेसी उम्मेद दिछे, वहीलाते हमसार बहुत हिम्मत छे। १३ हमरा मूसा

नबीर मान्दी नी छी, जहाँय अपना चेहराडाक पर्दा दे झाँपे राखिहिले जसे कि इजराएली लोक वहार चेहरार चमकटाक घटते नी देखवा पारे। १४ मगर उला इजराएली लोकेर दिल सक्कत हंय गहिले। अला तक पुराना नियम पढ़वारखकुना उसार दिललाव पर्दा दे झाँपाल छे। इखान पर्दा सिरिफ यीशु मसीहार जरियाय हटाल जाछे। १५ जैखुना वरा मूसा नबीर किताबलाक पढ़छे, त आजतक उसार दिललात अन्हार रोहचे। १६ मगर जैखुना उसार बीच से कोय प्रभुर लिकिन ओसछे, उखुना उखान पर्दा हटे जाबे। १७ प्रभु आत्मा छे, आर जैठिन प्रभुर आत्मा छे, उठिन आजादी छे। १८ मगर हमरा अपना चेहरार पर से पर्दा हटाय दिही। अला हमरा देखवा पारछी कि प्रभु कतेक अच्छा छे। हमसार जीवन देखाछे कि प्रभु कतेक अच्छा छे। प्रभु जहाँय आत्मा छे, वहाँय हमसाक अपना मान्दी आढ़ो बेसी अच्छा बनाते जाछे।

४ परमेश्वर हमसार पर दया करिहे आर हमसाक सेवार काम दिहे, वहीलाते हमरा अपना हिम्मत नी हारूम। २ मगर हमरा छुपाल शरमेर कामलाक नी करछी। हमरा कहारो साथे छल नी करछी, आर परमेश्वरेर वचनोत कोय झूठ बात मिलावट नी करछी। परमेश्वरेर नजरोत हमरा सच्चाईक इकिसम प्रचार करछी कि लोक हमसार पर विश्वास करे। ३ अगर हमसार खुश-खबरी झाँपाल छे, त सिरिफ नाश

होनेवाला लोकेर लिकिन झाँपाल छे। ४ जैला लोक खुश-खबरीर पर विश्वास नी करछे, उसार मनलाक शैतान अंधकारोत राखियेह जसे कि शैतान उसाक उडा रोशनी से दूर राखे, जैडा रोशनी खुश-खबरी से ओसछे। इ खुश-खबरी मसीहार महिमार बारे छे, आर मसीहा परमेश्वरेर रूप छे। ५ क्यौँकि जैडा खुश-खबरी हमरा प्रचार करछी, उडा हमसार बारे नी करछी, बल्के इडा सिरिफ यीशु मसीहार बारे छे कि यीशु मसीहा प्रभु छे आर यीशुर तने हमरा तुमसार सेवक छी। ६ क्यौँकि परमेश्वर कोहये, “अंधकारेर पर रोशनी चमके जाक।” वही परमेश्वर हमसार दिलोत उडा रोशनी चमकाय दिले जसे कि हमरा परमेश्वरेर महिमार ज्ञान पाई, आर जे महिमा यीशु मसीहार चेहरार पर देखाल जाछे।

माटीर बर्तनोत रखाल धन-दौलत

७ इडा खुश-खबरीर रोशनी हमसार धन-दौलत आर शक्ति छे, जैखान माटीर बर्तनोत रखाल छे। हमरा उडा माटीर बरतन छी। आर इखान शक्ति हमसार नी छे, बल्के परमेश्वरेर लिकिन से ओसिहे। ८ सब पकाय से हमरा सताल जाछी, मगर पिसाल नी जाछी। हमरा घबराय जाछी, मगर निराश नी होची। ९ हमरा सताल त जाछी, मगर परमेश्वर हमसाक नी छोड़छे। हमसाक गिराय देयाल जाछे। मगर हमरा उठे जाछी आर फेर बेराछी। १० जैकिसम यीशुक मोरवार खतरा रोहछिले,

वही किसम हमसारो मोरवार खतरा बनाल रोहचे। ११ इडा धरतीर पर हमरा हरखुना यीशुर कारण मौतेर सामना करछी जसे कि लोक हमसार जीवनोत यीशुक देखवा पारे। १२ वहीलाते हमसार सेवार कारण से हमरा हरखुना मौतेर सामना करछी, आर इडा सेवार चलते हमेशार जिन्दगी तुमसार भीतरोत देखा दिछे। १३ परमेश्वरेर शास्त्र लिखनेवाला कोहचे, “मुई विश्वास करछी, आर वहीलाते मुई बोलछी।” आर हमराव वही किसम विश्वास करछी आर हमराव बोलछी। १४ हमरा इडा जानछी कि जहाँय प्रभु यीशुक मुर्दा से जिन्दा करे उठाल, वहाँय हमसाको यीशुर साथे उठाबे, आर तुमसार साथे हमसाक अपना आगुत हाजिर करबे। १५ क्योंकि इला सब कुछ तुमसार तने छे। जसे जसे परमेश्वरेर दया लोकेर उपर बढ़ते जाबे, तब लोक परमेश्वरेर शुकुरिया आर महिमा बेसी से बेसी करते जाबे। १६ वहीलाते हमरा निराश नी होची। जबकि हमसार बाहरी बदनडा कमजोर होते जाछे, मगर हमसार आत्मिक जीवन मजबूत होते जाछे। १७ हमसार अभीकार तकलीफ छोटो आर कम दिनेर तने छे। इखान तकलीफ हमसार तने महिमा पैदा करछे, जैडा महिमा कोयखुना नी खतम होबे, आर ना इडा महिमा से बढ़े कोय चीज छे। १८ हमरा उला चीजोक नी देखछी, जैलाक देखाल जाछे, मगर उला चीजोक देखछी, जैलाक देखाल नी जाछे, क्योंकि जैला चीजोक देखाल नी जाछे, उला हमेशार तने रोहबे।

विश्वासीर नया बदन

५ हमरा इडा बात जानी कि इ-दुनियाँत हमसार जैडा बदन छे उडा बदन एकटा डेरार मान्दी छे। आर इडा बदन जैखुना खतम हंय जाबे, त परमेश्वरेर तरफ से हमसाक एकटा इकिसम बदन मिलबे, जैडा कि हाथ दे बनाल नी छे, आर इडा बदन हमेशा रोहबे। २ इडा बदनोत हमरा बहुत छटपटाछी, वहीलाते हमरा स्वर्गेर बदन पवार तने बहुत इन्तेजार करछी, जैडा बदनोक हमरा नया कपड़ार मान्दी पिन्हें लुमु। ३ उडा स्वर्गेर बदन पवार बाद हमसार आत्मा बिना बदनेर नी रोहबे। ४ जब हमरा इडा संसारिक बदनोत रोहछी, हमरा छटपटाते रोहछी। मगर हमरा बिना बदनेर रहवा नी चाहची, हमरा इडा बदनेर जगह एकटा नया बदन चाहची जसे कि हमसार मरनहार बदनडा हमेशा रहनेवाला बदन बने जाय। ५ परमेश्वर यहीडा बदन दुवार तने हमसाक तैयार करिहे, आर बैना हिसाबे हमसाक अपना पवित्र आत्मा दिहे। ६ यही तने हमसाक कोयखुना हिम्मतेर कमी नी होचे, आर हमरा बुझवा पारछी कि हमरा जतेक दिन इडा बदनोत जिन्दा रोहमु, ततेक दिन प्रभु से दूरोत रोहमु। ७ हमरा इलाक देखवा नी पारछी, बल्के विश्वास करछी की इला बात सच छे। ८ हमरा मौत से नी डोराछी बल्के हमरा इडा बदनोक छोड़े प्रभुर साथे रहना अच्छा समझेछी। ९ वहीलाते हमरा इडा बदनोत जिन्दा रोही, या इडा बदन से अलग रही, मगर हमसार मकसद छे प्रभुक खुश

करना। १० जैखुना हमरा यीशु मसीहार सिंहासनेर आगुत थाड़ो होमु, वहाँय हमसार उला सबला अच्छा या बुरा कामेर इन्साफ करबे, जैला काम हमरा इडा शरीरोत करिही।

परमेश्वरेर साथे मेल-मिलाप

११ हमरा प्रभु से डोराछी। वहीलाते हमरा लोकोक बार-बार बताछी कि तुम्हरा परमेश्वरेर लिकिन ओसो। परमेश्वर हमसार दिलेर बारे जाने। मुई उम्मेद करछी कि तुम्हराव दिल से हमसाक जानेन। १२ हमरा अपना बड़ाई नी करछी, मगर हमसार बारे तुम्हरा घमंड करवा पारेन। आर तब तुम्हरा उला बुरा दिलवाला लोकोक जवाब दुवा पारेन, जैला लोक अपना पदेर तने घमंड करछे। १३ अगर हमरा पगला हंय गही, त परमेश्वरेर तने होई। अगर हुँसोत छी त तुमसार तने छी। १४ मसीहार प्रेम हमसाक मजबूर करे दिछे। हमरा जानी कि एकझन लोक सभारो तने मोरिल, त वहार साथे सबकोय मोरे गेल। १५ आर वहाँय सभारो तने मोरिल जसे कि जहाँय जिन्दा छे, वरा सिरिफ अपनार तने जिन्दा नी रहय, बल्के वहार तने जिन्दा रोहय, जहाँय सभारो तने मोरिल आर फेर जिन्दा हंय उठिल।

मसीहार जरियाय सब कुछ नया

१६ वहीलाते अला से हमरा आर कहारो उकिसम इन्साफ नी करछी जैकिसम कि दोसरा लोक इन्साफ करछे। इडा सच छे कि हमरा यीशु मसीहार बारे दोसरा लोकेर मान्दी सोचेछिनु, मगर अला आर उकिसम नी सोचेछी। १७ अगर कोय मसीहार साथे मिलाल छे, त वहाँय नया सृष्टि छे, वहार जीवनोत सबला पुराना बात खतम हंय गहे आर सब कुछ नया हंय गहे। १८ इला सब कुछ परमेश्वरेर तरफ से होचे। परमेश्वर मसीहार जरियाय अपनार साथे हमसार मेल-मिलाप करे लिहे, आर मेल-मिलाप करवार काम हमसाक सोंपे दिहे। १९ मतलब इडा छे कि परमेश्वर यीशु मसीहार जरियाय दुनियाँ लोकेर साथे मेल-मिलाप करे लिले, आर उसार पापेर कसूर उसार पर नी लगाल, आर मेल-मिलाप करवार खबर परमेश्वर हमसाक सोंपे दिहे। २० वहीलाते हमरा यीशु मसीहार राजेर दूत छी। इकिसम मालूम होचे कि परमेश्वर हमसार जरियाय लोकलार लिकिन बिनती करछे। हमरा मसीहार तरफ से तुमसाक बिनती करछी कि तुम्हरा परमेश्वरेर साथे मेल-मिलाप करे लव। २१ मसीहार भीतरोत कोय पाप नी छिले, मगर परमेश्वर मसीहाक हमसार तने इकिसम बनाल कि मसीहा हमसार पाप उठाय लिले, जसे कि मसीहार जरियाय हमरा परमेश्वरेर धर्मी लोक बने जई।

६ कारण, मुई परमेश्वरेर साथे काम करछी, वहीलाते तुमसाक बिनती करछी कि तुम्हरा परमेश्वरेर जैडा दया पाहेन उडाक बेकार हवा ना देन।
२ क्यौंकि परमेश्वर कोहचे, “जरूरतेर समय मुई तुमसार बात सुनिही आर जैखुना तुमसाक मददेर जरूरी छिले, मुई तुमसाक बचवार तने चले ओसनु।” मुई कोहची, तुम्हरा सुनो। अलाय परमेश्वरेर मदद पवार समय छे, आर आझे बचवार दिन छे।

पौलुसेर कठिन मेहनतेर प्रमाण

३ हमरा कहारो रास्तात बाधा दुवा नी चाहची जसे कि कोय हमसार प्रचारेर कामोत कोय दोष ना पाय। ४ मगर हमरा सब पकाय प्रमाण दिछी कि हमरा परमेश्वरेर सच्चा सेवक छी। हमरा धीरज से लोकेर जुलुम-मुसीबत आर तकलीफ सहय लिछी। ५ हमरा लोकेर मार खाची आर जेलोत दे देयाल जाछी। गोस्सावाला खच्चर लोकेर भीड़ेर सामना करिही। हमरा खोब मेहनत करिही आर बहुत बार निनवा नी पाड़ी। बहुत बार बिना खाय समय काटीही। ६ इलार अलावा अपना खाँटी जीवन से, ज्ञान से, धीरज से, दया से आर पवित्र आत्मार सच्चा प्रेम से ७ सच्चा बोली से आर परमेश्वरेर शक्ति से हमरा अपना-आपोक परमेश्वरेर सेवक हवार प्रमाण दिही। अपना दहिना आर बाँया हाथोत हमरा धार्मिक हथियार ले राखीही। ८ लोकला हमसार इज्जत करोक

कि बेज्जत करोक, हमसार बारे अच्छा बात बोलोक या खराब बात बोलोक, मगर हमरा प्रमाण दिछी की हमरा परमेश्वरेर सेवक छी। लोकला हमसाक ठग कोहचे, मगर हमरा सच्चा सेवक छी। ९ लोकला हमसाक ग्रहण करवा नी चाहले, मगर ताहतो हमसाक सबकोय जाने। हमरा मुर्दा लोकेर मान्दी समझाल जाछी, मगर हमरा जिन्दा छी। हमसार साथे मारपीट कराल जाछे, मगर हमरा नी मोरछी। १० हमरा बहुत तकलीफ पाछी, मगर ताहरो पर हमसार दिलोत सब समय खुशी रोहचे। हमरा गरीब छी, मगर बहुतझनाक परमेश्वरेर सामनात पैसावाला बनाय दिछी। हमसार लिकिन कुछु नी छे, ताहरो पर हमसार लिकिन सब कुछु छे। ११ हे कुरिनथियुस मंडलीर भा-बहिनला! तुमसार साथे हमरा खुल्लम-खुल्ला बात करछी आर तुमसार लिकिन हमसार दिल हरखुना खोलाल रोहचे। १२ हमसार प्रेम तुमसार तने कम नी होये, मगर तुमसार प्रेम हमसार तने कम हंय गहे। १३ मुई तुमसाक अपना बेटा-बेटी समझे कोहची, हमरा अपना दिलडा जैमान्दी तुमसार तने खोले राखीही, वही मान्दी तुम्हराव हमसार तने अपना दिलडा खोले राखो।

उजाला आर अन्हारेर बीचोत कोय मेल नी

१४ तुम्हरा अपना-आपोक अविश्वासी लोकेर साथे मत जोड़ो, जैकिसम कि एकेखान जुआलोत दुई किसम जानवर नी जोड़ाल जाछे, जैडा कि बेमेल जोड़ा होबे। क्याँकि धर्मी लोकेर साथे बेधर्मी लोकेर कोय मेल नी छे। उजाला आर अन्हारेर बीचोत कोय मेल नी छे। १५ मसीहार साथे शैतानेर कोय रिस्ता छे? नी छे। विश्वासी लोकेर साथे गैर-विश्वासीर कोय भागीदार छे? नी छे। १६ परमेश्वरेर मंदिरोत मूर्तिर कोय जगह छे? नी छे। हमरा त जिन्दा परमेश्वरेर मंदिर छी। परमेश्वर अपना वचनोत कोहचे, “मुई अपना लोकलार बीचोत रोहमु, आर उसारे साथे चला-फिरा करमु। मुई उसार परमेश्वर होमु आर वरा मोर लोक होबे। १७ वहीलाते परमेश्वर कोहचे, अविश्वासी लोकेर बीच से निकले ओसो आर उसासे अलग रहव आर पापेर कामोत हाथ मत लगाव, तब मुई तुमसाक ग्रहण करूम, आर १८ मुई तुमसार पिता होमु आर तुम्हरा मोर बेटा-बेटी होबेन।”

७ हे प्रिय भा-बहिनला, परमेश्वर हमसार साथे वादा करिहे कि वहाँय हमसार बीचोत चला-फिरा करबे। वहीलाते ओसो। हमरा परमेश्वर से डोराई आर पवित्र जीवन से वहार भक्ति करी। हमरा उला सबला चीज

से अपना-आपोक दूर राखी, जैला चीज हमसार बदन आर आत्माडाक गंदा करछे।

पौलुसेर खुशी

२ तुम्हरा हमसार तने अपना दिल खोले दोव। हमरा कहाको दुःख नी पहुँचाही, हमरा कहाको गलत रास्तात नी ले जई, आर ना हमरा कहाको ठगही। ३ मुई तुमसाक दोषी करवार तने इडा बात नी कोहची। मुई तुमसाक पहिले कहय दिही कि तुम्हरा हमसार दिलोत बोठे गहेन। हमरा तुमसार साथे जिन्दा रहवार तने आर मोरवार तने तैयार छी। ४ मुई तुमसार पर पूरापूरी भरोसा करछी, आर मोक तुमसार पर बहुत घमंड छे। तुम्हरा मोक बहुत हिम्मत दिहेन, आर मोर सबला दुःखेर समय मोक बहुत खुशी दिहेन। ५ जैखुना हमरा इठिन मकिदोनियात ओसनु, वहोखुना हमसार बदनडाक आराम नी मिले, बल्के हमरा चारोह भीति से तकलीफ पाछिनु। बाहरे लड़ाई-झगड़ा आर भीतरोत भयेर सामना करछिनु। ६ परमेश्वर दीन-दुखी लोकोक शान्ति दिछे। वहाँय तितुसेर ओसवार कारण से हमसाक शान्ति दिले। ७ सिरिफ वहारे ओसवार कारण से खुश नी छी, बल्के वहार समाचार से खुश छी, कि केनमान करे तुम्हरा वहाक हिम्मत दिहिलेन। तितुस हमसाक बताले कि मोक देखवार तने तुम्हरा कत्तेक इच्छुक छिलेन। वहाँय बताल कि मोर साथे जैडा व्यवहार करिहिलेन, उडार तने तुमसार मोनडा कत्तेक खराब हंय

गहिले। वहाँय यहोडा बताल कि मोर तने तुमसार कतेक बेसी चिन्ता छे। इला बात सुने मुई आढ़ोह खुश हंय गेनु। ८ मोर पहिलाखान चिठ्ठी से तुमसाक दुःख मिलिहे, इडार तने मोक कोय अफसोस नी छे। मोक एकखुदीर तने अफसोस त होल। मुई इडा देखछी कि उखान दुःख थोड़ेक समयेर तने छिले। ९ तुम्हरा दुःख पाहेन, उडार तने मुई खुश नी छी। मुई खुश छी कि तुम्हरा अपना पाप से मन बदली करे दिलेन। परमेश्वर तुमसाक दुःख दिले कि तुम्हरा परमेश्वरेर लिकिन ओसवा पारलेन। वहीलाते हमरा तुमसार कोय नोकसान नी पहुँचानु। १० परमेश्वर जैडा दुःख दिछे, उडा दुःख से पाप से मन बदली होचे, आर पाप से मुक्ति मिलछे, आर परमेश्वरेर दुख से कोय अफसोस नी होचे। जैखान दुख दुनियाँ से मिलछे, उखान दुख लोकोक परमेश्वरेर लिकिन नी आनछे, मगर मौत ले ओसछे। ११ वहीलाते सोचे देखो, परमेश्वर जैखुना तुमसाक दुःख दिहिले, तुम्हरा बहुत बदले गहिलेन। तुम्हरा उडा करवा चाहचिलेन, जैडा सही छे। तुम्हरा कोय बातोत दोषी हवा नी चाहचिलेन। तुमसार बीचेर पाप देखे तुम्हरा बहुत गोस्सा करछिलेन। परमेश्वर से डोराछिलेन। मोक देखवार तने तुमसार बहुत इच्छा छिले। आर पापेर सजई दुवार तने तुमसार बहुत इच्छा छिले। इकिसम करे सब पाके तुम्हरा साबित करे दिहिलेन कि तुम्हरा दोषी नी छेन। १२ जैखुना मुई तुमसाक उखान चिठ्ठी लिखिहिनु, त मुई उडा लोकेर

खिलाफ नी लिखी, जहाँय गलत करिल, आर ना उडा लोकेर बड़ाई करवार तने लिखिनु, जहाँय जूलुम सहय लिले। मगर मुई तुमसाक बताछी कि मुई तुमसाक क्याँ लिखिनु। मुई लिखिहिनु जसे कि तुमसाक मालूम हंय जाय कि हमसार तने तुम्हरा बहुत चिन्ता करछेन। तुम्हरा परमेश्वरेर सामनात हमसार तने बहुत चिन्ता करछेन। १३ आर इकिसम करे हमसाक तसल्ली मिलिल। इडा तसल्लीर अलावा हमरा तितुसेर खुशी देखे आढ़ोह बेसी खुश होईनु, क्योंकि तुम्हरा वहाक खुशी से भरे दिहेन। १४ मुई तितुसेर आगुत तुमसार बारे कुछ घमंडेर बात बोलिहिनु, उला बातेर कारण मोक शरमिन्दा हवा नी होल। मुई तुमसाक जताला बात बोलिहिनु, उला सबला सच छिले। वही मान्दी तितुसेर आगुत तुमसार बारे हमसार घमंडेर बात सच साबित होल। १५ जब तितुस याद करछे कि तुम्हरा वहाक बहुत डर आर इज्जतेर साथे ग्रहण करिहिलेन, आर तुम्हरा वहार हुकूम माननेवाला बने गहिलेन। इला याद करे तुमसार तने वहार प्रेम आढ़ोह बढ़े गहे। १६ मुई बहुत खुश छी कि मुई तुमसार पर सब बातेर तने भरोसा करवा पारमु।

दिल खोले दान दुवार बारे

८ “हे भा-बहिनला, परमेश्वर जैडा आशीर्वाद मकिदोनिया प्रदेशेर मंडलीलार पर करिहे, हमरा वहीडा आशीर्वादेर बारे तुमसाक खबर

दिछी। २ उसार पर कठिन सतावट ओसिहिले। इला सतावटेर बावजूद वरा खुशी-खुशी दिल खोले दान दिहिले, जबकि वरा गरीब छिले। ३ उसार बारे मुई बोलछी कि वरा अपना इच्छा से आर अपना शक्ति से बेसी दान करिहिले। ४ वरा पूरा मन से हमसार लिकिन बिनती करिहिले कि वरा परमेश्वरेर उला लोकेर सेवा करवा पारे, जैला लोक बहुत जरूरतमंद छे। ५ हमरा जतेखान उम्मेद करिहिनु, वहा से बेसी वरा दान करिहिले। वरा पहिले अपना-आपोक परमेश्वरोक दे दिहिले। यहार बाद परमेश्वरेर इच्छा मुताबिक अपना-आपोक हमसार हाथोत सोंपे दिहिले। ६ तितुस तुमसाक दान दुवार बारे पहिले हौशला दिहिले। वहीलाते हमरा वहार साथे बात करनु कि हमरा कि वहाँय तुमसार लिकिन जाय, आर तुमसाक हौशला दिबे। आर वहाँय तुमसाक दान जमा करवार तने मदद करे। ७ तुम्हरा सब पाके आगु बढ़ते जाछेन। तुम्हरा विश्वासोत, बोलवार पाके आर ज्ञानोत बढ़ते जाछेन। तुम्हरा सेवा करवार तने तैयार छे। तुम्हरा हमसाक प्रेम करछेन। अला तुम्हरा दान दुवार पाके बहुत अच्छा बनो। ८ दान दुवार तने मुई तुमसाक हुकूम नी दिछी। बल्के तुमसाक कहवा चाहची कि दोसराला लोकेर तने जैडा तुमसार चिन्ता छे, उडा साबित करवा पारेन। ९ हमसार प्रभु यीशु मसीहार दयार बारे जानेन कि वहाँय धनी छिले, तहारो पर तुमसार तने कंगाल बने गेल, जसे कि वहार कंगाल बने जवार कारण से तुम्हरा धनी हंय जायेन।

१० एक साल पहिले तुम्हरा दान दुवा शुरू करिहिलेन। आर तुम्हरा दान दिहिलेन क्याँकि तुम्हरा दुवा चाहचिलेन। अला मुई तुमसाक सलाह दिछी कि ११ अला वहीखान दान दुवार काम पूरा करो। जैकिसम कि तुम्हरा दुवार तने इच्छा करिहिलेन, वही मान्दी तुम्हरा अपना टाका-पैसा दे उखान कामोक पूरा करो। १२ अगर तुम्हरा दुवार तने इच्छुक छैन, त परमेश्वर तुमसार दानलाक ग्रहण करबे। जैला तुमसार लिकिन छे, वही हिसाबे ग्रहण करबे। जैला तुमसार लिकिन नी छे उलाक नी माँगबे। १३ मुई नी चाहची कि दोसरा लोक सुखोत रोहय आर तुम्हरा दुःख-मुसीबतोत रोहेन, बल्के मुई चाहची कि तुमसार सभारो हालत एक मान्दी होय। १४ तुमसार लिकिन अगर बेसी छे, त तुम्हरा दोसरा लोकेर जरूरत पूरा करो। वही मान्दी जैखुना उसार लिकिन बेसी होबे, त तुमसार जरूरत पूरा करबे। इकिसम करे सभारो हालत एक समान होबे। १५ परमेश्वरेर पवित्र वचनोत लिखाल छे, जहाँय बेसी जोड़ो करिल, उसार लिकिन बेसी नी होल, आर जहाँय कम जोड़ो करिल, उसार कम नी होल।”

तितुस आर वहार साथीलाक पठाल जाछे

१६ मुई परमेश्वरेर शुकुरिया करछी कि तुमसार तने मोर दिलोत जैडा चिन्ता छे, ठीक वही किसमेर चिन्ता परमेश्वर तितुसेर दिलोत दिहे। १७ तितुस हमसार कहना माने लिहे, आर वहाँय बहुत इच्छा से तुमसार

लिकिन जाछे। १८ हमरा तितुसेर साथे हमसार आर एकझन भईक पठाछी। इडा भई यीशु मसीहार खुश-खबरी प्रचार करछिले। सबला मंडलीर लोक इडा भईर बड़ाई करछे। १९ मंडलीला सिरिफ वहार बड़ाई नी करछे, बल्के वहाक चुने लिहे, जसे कि वहाँय हमसार साथे दान जोड़ो करवार तने जाय। हमरा इखान सेवा करवार काम करछी जसे कि लोक प्रभुर महिमा देखवा पारे, आर देखवा पारे कि हमरा लोकेर मदद करवार तने तैयार छी। २० इडा भई हमसार साथे जाबे। जैखुना हमरा इला दानोक जमा करमु आर बाँटुम, कोय हमसाक बदनाम ना करे। २१ इकिसम करे हमरा जैला काम करछी, उला प्रभुर नजरोत आर मानुषेर नजरोत अच्छा छे। २२ हमरा उसार साथे आर एकझन भईक पठाछी आर वहाँय बहुत बातोत अपना जोश देखाहे। इडाक हमरा परखे देखिही। वहाँय तुमसार पर बहुत बेसी भरोसा करछे। वहीलाते वहाँय आढ़ोह बेसी जोश देखाहे। २३ तितुसेर बारे कोय पूछे, त मुई कहवा चाहची कि वहाँय मोर साथी छे, आर वहाँय तुमसाक मदद करवार तने मोर साथे काम करछे। अगर कोय तितुसेर साथे हमसार भईलार बारे पूछे, मुई कहवा चाहची कि वरा मंडलीर पठाल लोक छे, आर मसीहार बड़ाई करनेवाला छे। २४ वहीलाते मुई कोहची, तुम्हरा मंडलीलार तने अपना प्रेम देखाव, आर तब सबला मंडली जाने लिबे कि हमरा क्याँ तुमसार पर घमंड करछी।

यरूशलेम मंडलीर तने दान

९ यरूशलेम शहरेर विश्वासीलाक मददेर जरूरत छे। उसार बारे तुमसार लिकिन लिखना जरूरी नी छे। २ क्याँकि मुई जानी कि तुम्हरा दान दुवार तने बहुत इच्छुक छेन। मुई तुमसार बारे मकिदोनियाँर भा-बहिनलार लिकिन घमंड से बोलिहिनु कि आखाया प्रदेशोत विश्वासीला एक साल आगु से दान दुवार तने तैयार छिले। तुमसार दान दुवार इच्छा जाने मकिदोनियार बहुतला विश्वासी दान दुवार तने तैयार हंय गहे। ३ मगर मुई इला भईक यही तने पठाछी कि वरा देखे कि तुम्हरा दान दुवार तने तैयार छेन। मुई उसाक बताछिनु कि तुम्हरा दान दुवार तने तैयार छेन। वहीलाते तैयार रहेन जसे कि मुई तुमसार बारे जैडा घमंड करछी, उला गलत साबित ना होय। ४ अगर मकिदोनिया से कोय लोक मोर साथे ओसे आर तुमसाक तैयार नी पाय, त तुमसार पर हमसार जैडा भरोसा छे, भरोसार कारण से हमरा शरमिन्दा हंय जामु, आर तुम्हराव शरमिन्दा होभेन। ५ वहीलाते मुई भईलाक बिनती करनु कि वरा मोसे आगुते तुमसार लिकिन चले जाय। उठिन जाय वरा आगु से उडा दान जमा करे राखे, जैडा दान दुवार वादा तुम्हरा पहिले से करिहेन। मगर इडा दान अपना-अपना इच्छा से हवा लागे, कोय जोर-जबरदस्तीर बात नी छे।

दिल खोले दान दुवा लागे

६ याद राखेन जहाँय कम बुनेछे, वहाँय कम फसल काटबे आर जहाँय बेसी बुनेछे, वहाँय बेसी काटबे। ७ हरेकझन वही मान्दी दान करोक, जैमान्दी वहाँय मनडात तय करिहे, कोय अपना मनोत दुःख राखे दान ना दे, आर ना जबरदस्ती से दे, क्याँकि खुशी से जहाँय दान दिछे, परमेश्वर वहाक प्रेम करछे। ८ परमेश्वर बहुत बेसी करे तुमसाक सब किसमेर आशीष से भरे दुवा पारे जसे कि तुम्हरा सब कुछु से भराल रोहेन आर हर एक अच्छा कामेर तने बेसी से बेसी मदद करवा पारेन। ९ जैकिसम परमेश्वरेर पवित्र शास्त्रोत लिखाल छे, “वहाँय खोला दिल से गरीबोक दान करिल, वहार अच्छा कामला सबखुना याद कराल जाबे।” १० परमेश्वर गृहस्थोक बिच्चन आर खवार तने रूटी दिछे। वही किसम वहाँय तुमसाको तुमसार जरूरतेर चीज दिबे। वहाँय तुमसाक बेसी करे दिबे जसे कि तुम्हरा दोसरा लोकोक मदद करवा पारेन। ११ परमेश्वर तुमसाक सब पाके धनी बनाबे, ताकि तुम्हरा खोला दिल से दान करवा पाड़ैन। जब हमरा तुमसार दानलाक जरूरतमंद लोकोक दुम, तब वरा परमेश्वरेर बड़ाई करबे। १२ तुमसार इडा काम से सिरिफ परमेश्वरेर लोकेर कमी-घटी पूरा नी होचे, बल्के लोकेर मुख से परमेश्वरेरो बहुत बड़ाई होचे। १३ तुमसार यहीला दान इडा प्रमाण दिबे आर इडा दान देखे लोकला परमेश्वरेर बड़ाई करबे। यहा से इडा प्रमाण

होबे कि तुम्हरा मसीहार खुश-खबरीर पर विश्वास करे, वहार हुकूम माने लिहेन। आर अपना खोला दिल से उसाक आर दोसरा लोकोक दान करिहेन। १४ परमेश्वरेर लिकिन से तुम्हरा जैडा अपार दया पाहेन, यहार तने वरा पूरा दिल से तुमसार तने प्रार्थना करबे। १५ परमेश्वरेर शुकुरिया करछी कि वहाँय हमसाक इकिसम एकखान दान दिहे, जैडार बारे पूरापूरी बताना संभव नी छे।

पौलुसेर अधिकार आर काम

१० यीशु मसीहा नरम आर दयालु छिले। मुई पौलुस प्रभु यीशु मसीहार स्वभावेर मान्दी तुमसार लिकिन बिनती करछी। लोकला मोर बारे कोहचे कि जैखुना पौलुस तुमसार बगलोत रोहचे, वहाँय डोराय रोहचे। आर जैखुना पौलुस दूरोत रोहचे, वहाँय तुमसार तने हिम्मतवाला बने जाछे। २ कुछुला लोक हमसार बारे सोचेछे कि हमरा अविश्वासी लोकेर मान्दी जीवन बिताछी। उकिसम लोकेर तने मोक कड़ा हवा होबे। तुम्हरा उसार बात ना सुनेन क्याँकि मुई जैखुना तुमसार लिकिन ओसुम, उखुना मोक कड़ा हवा नी होबे। ३ हमरा यहीडा दुनियाँत रोहछी, मगर दुनियाँर बाँकी लोकलार मान्दी लड़ाई-झगड़ा नी करछी। ४ हमरा जैला हथियार दे लड़ई करछी, उला मानुषेर बनाल हथियार नी छे, बल्के हमरा परमेश्वरेर शक्तिशाली हथियार दे लड़ई करछी। इला

हथियार परमेश्वरेर खिलाफ लोकेर गलत सोच-बिचारोक आर बहशबाजीक नाश करे दिछी। ^५ हमरा परमेश्वरेर ज्ञानेर खिलाफ सोच-बिचार आर बेकूफ लोकेर बहशबाजीक नाश करे दिछी। दिलेर सब किसमेर सोच-बिचारोक धरे यीशु मसीहार अधीनोत करे दिछी। ^६ जैखुना तुम्हरा पुरा-पुरी यीशु मसीहार हुकूम माननेवाला हंय जाभेन, आर बाँकी लोक जैला हुकूम नी मानबे, उसाक हमरा सजई दुम। ^७ तुम्हरा त सिरिफ बाहरी चेहरा देखछेन। अगर तुम्हरा अपना-आपोक मसीहार लोक समझेछेन। तुमसाक यहोडा समझवा लागे कि हमराव मसीहार लोक छी। ^८ प्रभु हमसाक अधिकार दिहे। उडार तने मुई घमंड करवा पारी। आर इडा घमंडेर कारण से मुई शरमिन्दा नी होमु। इडा अधिकारेर मकसद इडा छे कि तुमसार नुकसान ना होय, मगर तुमसार तरक्की होय। ^९ मोर इखान चिट्ठीक पोढ़े इडा ना सोचेन कि मुई तुमसाक डोर देखाछी। ^{१०} कोय-कोय लोक बोलछे, “पौलुसेर चिट्ठीला गहिरा आर दिलोत असर पहुँचानेवाला होचे। मगर पौलुस जैखुना आगुत ओसछे, त उखुना मालूम होचे कि वहाँय कमजोर छे आर वहार बोलीत कोय ताकत नी छे।” ^{११} इकिसम लोकला जाने लोक कि हमरा हाजिर नी रोहलो, हमसार चिट्ठीर जरियाय जैला बात बोलछी, उला बात हमरा हाजिर रोहलेव बोलुम। ^{१२} तुमसार भीतरोत कोय-कोय अपना बड़ाई करछे। हमरा उसार साथे अपना-आपोक तुलना करवा नी

चाहची, आर ना उसार साथे अपना आपोक बराबरी करवार साहस करछी। क्यौँकि वरा अपना बड़ाई खुद करछे, आर अपना-आपोक एक-दोसराझनार साथे तुलना करे, बेकूफ बने जाछे। १३ मगर जतेखान घमंड करना उचित छे, वहा से बेसी घमंड हमरा नी करमु, बल्के परमेश्वर हमसार कामेर जैडा सीमाना ठीक करे दिहे, वही हिसाबे हमरा घमंड करछी, आर इडा सीमानार भीतरोत तुम्हराव छेन। १४ वहीलाते तुमसार बारे बोले हमरा जैखुना घमंड करछी, त हमरा हद से बेसी कुछु नी बोलछी। हमराय पहिले यीशु मसीहार बारे प्रचार करते-करते तुमसार लिकिन गहिनु। १५ हमरा दोसरा लोकेर कामेर पर घमंड नी करछी। हमरा उम्मेद करछी कि जसे जसे तुमसार विश्वास बढ़ते जाबे, हमरा तुमसार बीचोत आढ़ोह बेसी काम करवा पारमु। १६ तब तुमसार लिकिन से जवार बाद हमरा आढ़ोह दूर जगहलात जामु, आर उठिन जाय खुश-खबरी प्रचार करवा पारमु, जैठिन कोय प्रचार नी करे। तब कोय कहवा नी पारबे कि हमरा दोसरा लोकेर कामलार पर घमंड करछी। १७ मगर परमेश्वरेर वचन बोलछे, “जहाँय घमंड करछे, वहाँय प्रभुर नामे घमंड करोक।” १८ क्यौँकि जहाँय अपना-आपोक अच्छा कोहचे, वहाँय अच्छा नी छे। मगर प्रभु जहाक अच्छा कोहचे, वहीं अच्छा छे।

पौलुस आर झूठा दूतला

११ प्रभु जैला बात मोक देखाहे, उलार बारे मोक बोलना जरूरी छे। उला बात मुई जब बोलुम, अगर मोर बातला तुमसाक बेकूफीर मान्दी लागे, त मोर बेकूफी कुछ हद तक बर्दास्त करे लव। हाँ, मोर बातलाक बर्दास्त करो। २ क्योंकि मुई तुमसार बारे अपना दिलोत एकटा तमन्ना राखीही, जैडा परमेश्वर मोक दिहे। वहीलाते मुई एकझन पवित्र कुमारीर मान्दी तुमसार रिस्ता मसीहार साथे पक्का करे दिही। ३ मगर मोक डोर लागछे कि जैमान्दी साँप अपना चालाकी से हव्वाक बहकाय दिहिले। झूठा शिक्षकलाव तुमसाक बहकाय दे आर तुम्हरा सच्चा मन से मसीहार भक्ति करवा छोड़े देन। ४ मुई देखछी कि कोय तुमसार ठिन ओसे कोय दोसरा यीशुर प्रचार करछे, तुम्हरा खुशी से माने लिछेन, जैडा प्रचार हमरा नी करिही। कोय दोसरा आत्माक ग्रहण करे लिछेन, जैडा आत्मा पहिले नी मिले। कोय दोसरा खुश-खबरीक तुम्हरा ग्रहण करे लिछेन, जैडा खुश-खबरी हमरा तुमसाक नी दी। मगर तुमसाक इकिसम करवा नी लागे। ५ मगर मुई समझेछी कि बोड़ो से बोड़ो मसीह दूतला से मुई कोय पाके कम नी छी। ६ इडा हवा पारे कि मुई खूब अच्छा से बात बोलवा नी पारछी, मगर मोर काफी ज्ञान छे, आर मुई अपना बातेर जरियाय अपना ज्ञान तुमसाक देखाय दिही। ७ मुई जैखुना तुमसाक परमेश्वरेर खुश-खबरी दिछिनु, त दोसरा मसीह-दूतलार मान्दी

ની છિનુ। મુઈ તુમસાર લિકિન સે કોય મજદૂરી ની લી। આર અપના-
આપોક છોટો બનાય તુમસાક બોડો બનાનુ। બતાવ ઇકિસમ કરે મુઈ
કોય ગલતી કરિહી કી? ૮ મુઈ દોસરા મંડલીર લિકિન સે મદદ લિહી
જસે કિ તુમસાર સેવા કરવા પારી। ૯ મુઈ જૈઁખુના તુમસાર સાથે છિનુ,
આર મોક કુછુ જરૂરત હોઈલે, ઁખુના મુઈ કહારો લિકિન કુછુ ની
માંગી। કુછુલા ભઈ મકિદોનિયા સે ઓસે મોર કમી-ઘટીક પૂરા કરે
દિહિલે। આર મુઈ કોય બાતોત તુમસાર પર ભાર ની દી, આર ના દુમ।
૧૦ મસીહાર સચ્ચા જ્ઞાન મોર ભીતરોત છે। મુઈ સચ બોલછી કિ મુઈ
કહારો પર બોઝ ની દિછી। આર આખયા ઇલાકાત કોય મોક ઇડાર બારે
ઘમંડ કરતે રોકવા ની પારબે। ૧૧ જૈઁખુના મુઈ બોલછી કિ મુઈ તુમસાર પર
કોય બોઝ ની દુમ, ત તુમ્હરા ઇડા ના સોચેછેન કિ મુઈ તુમસાક પ્રેમ ની
કરછી। પરમેશ્વર જાને કિ મુઈ દિલ સે તુમસાક પ્રેમ કરછી। ૧૨ કુછુલા
લોક ઘમંડ કરછે કિ વરા હમસાર બરાબર છે। મગર મુઈ યહી કિસમ કરે
કામ કરતે રોહમુ જસે કિ વરા ઘમંડ કરવા ની પારે। ૧૩ વરા અપના-
આપોક મસીહાર દૂત કોહચે। સચ બાત ઇડા છે કિ વરા મસીહાર દૂત ની
છે આર ઠગનેવાલા સેવક છે। ૧૪ ઇડા કોય તાજ્જૂબેર બાત ની છે,
ઇકિસમ કિ શૈતાનો ચમકનેવાલા ફરીસ્તા બને જાછે। ૧૫ વહીલાતે
શૈતાનેર કામ કરનેવાલા લોકલાવ ધર્મી સેવકલાર માન્દી રૂપ લે લિછે,
આર વરા અપના કામેર મુતાબિક સજા પાબે।

पौलुसेर दुःख-तकलीफ

१६ मुई फेर तुमसाक कोहची, इकिसम बोलवार कारण कोय मोक बोका ना समझोक। अगर तुम्हरा मोक बोका समझेछेन, त बोकाय समझे मोक ग्रहण करो, जसे कि मुई थोड़ेक घमंड करवा पारी। १७ मुई अला जैला बातेर बारे घमंड करछी, उला प्रभुर हुकूम मुताबिक नी, बल्के मुई एकटा बोकार मान्दी करछी। १८ बहुतला लोक इ-दुनियाँर बातोत घमंड करछे, त मोहो क्याँ नी घमंड करमु? १९ तुम्हरा इकिसम ज्ञानी छेन कि खुशी-खुशी बोका लोकेर बातलाक बर्दास्त करे लिछेन। २० तुम्हरा सिरिफ यहीडा नी करछेन, वहा से बेसी करछेन। अगर कोय तुमसाक अपना गोलाम बनाय लिछे, तुमसार सब कुछ ले लिछे, आर तुमसार पैदा उठाछे, आर तुमसार मालिक बने जाछे, या तुमसार गालोत थप्पर मारछे, त तुम्हरा इला सब कुछ सहय लिछेन। २१ तुम्हरा की इडा सोचेछेन कि मोक शर्मिदा हवा होबे क्याँकि मुई तुमसार साथे उकिसम बुरा सलूक नी करी। अगर इला बातेर तने दोसराला लोक घमंड करवार हिम्मत करछे, मोहो घमंड करवा पारी। मगर इकिसम करना एकटा बेकूफीर बात छे। २२ जैला लोक घमंड करछे, वरा अगर यहूदी लोक छे, त मोहो यहूदी छी। वरा अगर इजराएली लोक छे, त मोहो इजराएली लोक छी। वरा अगर इब्राहिमेर बंशेर लोक छे, त मोहो त वहीडा छी। २३ वरा अगर मसीहार सेवा करनेवाला छे, त मुई त आढ़ो बेसी करे

मसीहार सेवा करछी। इडा ख्याल राखेन कि मुई इला बात एकझन पागल लोकेर मान्दी बोलछी। मसीहार सेवा करवार कारण से मुई एकझन गोलाम से बेसी काम करिही। बहुत बार मार खाही। बहुत बार मौतेर मुखोत पोड़ीही। २४ पाँच बार यहूदी लोकेर हाथे उनतालीस-उनतालीस कोड़ा करे मार खाही २५ तीन बार लाठीर मार खाही। एक बार पत्थलेर मार खाही। तीन बार जहाज भाँगे डुबे गेल, आर मुई उलार पर सवार छिनु। एक रात आर एक दिन समुन्द्रेर पानीत काटनु। २६ मुई बार-बार अपना सफरोत नदीर खतरात, डाकूर खतरात, जात-भई यहूदीलार आर गैर-यहूदी लोकेर हाथोत पोड़िहिनु। नगरेर खतरात, जंगलेर खतरात, समुन्द्रेर खतरात, आर कपटी लोकेर खतरात पोड़िहिनु। २७ मसीह यीशुर सेवा करवार कारण से तकलीफ हवारो पोर मुई कठिन मेहनत करिही। मुई बहुत बार रातोत जागिल रहय रात काटीही, भूखे आर प्यासे रहय तकलीफ उठाही। ठण्डा मौसमोत उघराय छिनु। २८ मुई इला बाहरी दुःख-तकलीफ उठाही। साथे-साथे मोक सबला मंडलीर चिन्ता दबाय राखिहे। २९ कोय अगर कमजोर छे, त वहार तने मोहो कमजोर हंय गहे। कोय अगर पापोत पोड़े जाछे, वहार तने मोक दुःख होचे। ३० अगर मोक घमंड करवा हंय, त मुई अपना कमजोरीर तने घमंड करमु। ३१ हमसार प्रभु यीशु मसीहार परमेश्वर आर पिता जहाँय सबखुना बड़ाई आर महिमा पवार लायक

छे, वहाँय जाने कि मुई झूठ नी बोलछी। ३२ मुई तुमसाक बोलछी। अरितास नामेर एकटा राजा छिले। उडा समय मुई दमिस्क नगरोत छिनु। उठिनकार राजपाल मोक पकड़वार तने नगरेर फाटकलार लिकिन पहाड़ा बोठाय दिहिले। ३३ आर उठिनकार लोकला मोक टोकरीत राखिले आर मोक टोकरीत बोठाय नगरेर देवालेर खिड़की दे पार करे दिहिले। इकिसम करे मुई राजपालेर हाथ से बचे गहिनु।

पौलुसोक स्वर्गोत उठाय लिया ल जाछे

१२ मुई घमंड करना जरूरी समझेछी। इडा से मोक कोय मदद नी मिलछे। मगर मुई उत्तार बारे बतायु, जैला चीज परमेश्वर मोक दर्शनोत देखाहे, आर बताहे। १ मुई एकझन विश्वासीक जानी, जहाँय यीशु मसीहार पर विश्वास करछे। चौदह बरस पहिले वहाक तेसरा स्वर्गोत उठाय लिया ल गहिले, जैखुना वहाँय जिन्दा छिले। उखुना वहाँय अपना बदनडा ले स्वर्गोत गेल ना बिना बदन ले स्वर्गोत गेल, उडा मुई नी जानी, सिरिफ परमेश्वर जाने। ३ मुई जानी उडा लोकोक स्वर्गोत उठाय लिया ल गहिले। उखुना वहाँय अपना बदनडा ले स्वर्गोत गेल ना बिना बदन स्वर्गोत गेल, उडा मुई नी जानी, सिरिफ परमेश्वर जाने। ४ वहाँय स्वर्गोत इकिसम अद्भूत बात सुनिहिले, जैला कहाल नी जाबे, आर मानुषको उला बात बोलना उचित नी छे। ५ उडा लोक मुई छी। उडार

बारे मुई घमंड करवा पारी। मगर मुई अपनार बारे घमंड नी करमु।
सिरिफ मोर कमजोरीर बारे मुई घमंड करमु। ६ इडा सही बात छे, अगर
मुई घमंड करवा चही, तहारो पर इडा मोर बेकूफी नी होबे, कारण मुई
सच बात बोलमु। मगर मुई घमंड नी करमु। लोक मोर बारे वही
मुताबिक सोचे, जैडा वरा मोक बोलते आर करते देखछे। ७ परमेश्वर
मोक बहुत बोड़ो दर्शनोत अद्भूत चीज देखाहे। उडा देखवार कारण से
मोक घमंड नी होय जाय, वहीडा कारण मोर बदनोत एकखान तकलीफ
देयाल गहे। इखान तकलीफ इकिसम छे कि शैतानेर एकझन दूत मोर
बदनोत काँटा गाथे मोक परेशान करछे। ८ इडा तकलीफेर बारे मुई तीन
बार परमेश्वरेर लिकिन प्रार्थना करनु कि मोर लिकिन से इडा तकलीफ
दूर हंय जाय। ९ मगर परमेश्वर मोक कोहले, “मोर दया तोर तने काफी
छे, क्याँकि मोर शक्ति उखुना काम करबे, जैखुना तुई कमजोर होबो।”
वहीलाते जैखुना मुई कमजोर हालतोत छी, मुई बहुत खुशी से घमंड
करमु, जसे कि यीशु मसीहार शक्ति मोर पर बनाल रहय। १० यही
कारण से मुई यीशु मसीहार तने कमजोरी हालतोत, तकलीफोत,
बदनामीत, सतावटोत, आर संकटोत खुश रोहछी, क्याँकि जैखुना मुई
कमजोर होची, वहीखुना मुई ताकतवर होची।

कुरिनथियुस मंडलीर तने पौलुसेर चिन्ता

११ मुई त बोका बने गही, मगर तुम्हराय मोक बोका बनवार तने मजबूर करलेन। जबकि तुमसाक त मोर शाबासी करवा होलतेन। मुई त कुछु नी, तहातो मुई उला बोड़ो दूतला से कोय पाके कम नी छिनु। १२ बहुत धीरज धरे तुमसार बीचोत बहुत किसमेर बोड़ो आर चमत्कारेर काम करनु, आर मुई अपना-आपोक मसीह-दूत हवार प्रमाण दिही। १३ मुई तुमसाक दोसराला मंडली से छोटो नी समझी। सिरिफ एकटा बातोत कि मुई तुमसार पर कोय बोझ नी दी। इडा कसुरेर तने तुम्हरा मोक माफ करो। १४ अला मुई तेसरा बार तुमसार ठिन जवार तने तैयार होनु। मुई तुमसार तने बोझ नी हवा चाहची। कारण मुई तुमसार लिकिन से कुछु पावा नी चाहची, बल्के तुमसाक पवा चाहची। बेटा-बेटीला अपना माँ-बाफेर तने टका-पैसा जमा नी करछे, बल्के बेटा-बेटीलार तने माँ-बाफ टका-पैसा जमा करछे। वही किसम मुई नी चाहची कि तुम्हरा मोर तने खर्चा करेन। १५ मुई बहुत खुशी से तुमसार तने सब कुछु खर्च करे दुम, इकिसम कि मुई अपना-आपोक दे दुम। मुई तुमसाक बहुत प्रेम करछी, यहार बदले तुम्हरा मोक कम प्रेम करभेन की? १६ हवा सकेछे कि मुई तुमसार पर कोय बोझ नी दी। मगर कुछुला लोक मोर पर दोष लगाय कोहचे कि पौलुस चालाक छे आर फूसलाय तुमसार लिकिन से मदद लिछे। १७ मुई जैला लोकोक तुमसार लिकिन पठाहिनु, उसार

कहारो जरियाय कि तुमसाक ठगहिनु? तुमसाक नी ठगीहिनु। १८ मुई तितुसोक तुमसार लिकिन जवार तने बिनती करिहिनु आर वहार साथे मुई आर एकझन भईक पठाहिनु। तितुस की तुमसाक ठगीहे? बिल्कुल नी। मुई आर तितुस एकेडा मकसद से काम करछी। १९ शायद तुम्हरा इडा समझेछेन कि हमरा तुमसार आगुत अपना-आपोक निर्दोष साबित करवार कोशिश करछी। प्रिय भाईला, हमरा यीशु मसीहार विश्वासी छी, आर मुई सबला बात तुमसार तरक्कीर तने बोलछी। २० मगर जैखुना मुई तुमसार लिकिन फेर जाम, मोक डोर लागछे, कहीं मुई तुमसाक उकिसम देखी, जैडा मुई देखवा नी चाहची, आर तुम्हराव मोक उकिसम देखेन, जैडा तुम्हरा देखवा नी चाहचेन। मोक यहोडा बातेर डोर लागछे कि कहीं मुई जाय तुमसार बीचोत, झगड़ा, हिंसा, गोस्सा, दल भेद, दोसराझनार निंदा, दोसराझनार बारे घेमस करना, घमंड आर झगड़ा इला देखी। २१ जैखुना मुई तुमसार लिकिन फेर जाम, यहोडा डोर लागछे, कहीं उखुना तुमसार कारण मुई परमेश्वरेर नजरोत गिरे जई, आर उला लोकेर तने दुख पावा होय, जैला लोक पाप करवा नी छोड़िहे, आर लोभेर काम, आर बदनेर गंदा काम से मन बदली नी करे।

पौलुसेर आखरी बात

१३ मुई तेसरा बार तुमसार ठिन ओसुम। परमेश्वरेर वचनोत लिखाल छे, “हर एक बातेर प्रमाण दुई या तीन लोकेर गवाही से होचे।” २ दोसरा बार जैखुना मुई तुमसार साथे छिनु, उखुना जैला लोक आगुत पाप करिहिले, उसाक सभाको आर दोसराला लोकोक मुई हुँसियार करे दिहिनु। अला मुई तुमसार लिकिन हाजिर नी छी, तहारो पर मुई तुमसाक हुँसियार करे दुवार तने बोलछी कि मुई जैखुना फेर ओसमु, उखुना मुई कहाको नी छोड़ुम। ३ कारण, यीशु मसीहा मोर जरियाय बात बोलछे। आर तुम्हरा इडा बातेर प्रमाण चाहचेन। वहाँय तुमसाक सीधा करबे क्याँकि वहाँय कमजोर नी छे, बल्के शक्तिशाली छे। ४ वहाक कमजोरीर हालतोत क्रुसेर पर चढ़ाल गहिले, मगर परमेश्वरेर शक्ति से वहाँय जिन्दा छे। मसीहा जैकिसम कमजोर हंय गहिले वही किसम हमराव कमजोर हंय गही। मगर जैखुना हमरा तुमसाक सीधा करमु, उखुना हमरा परमेश्वरेर शक्ति से मसीहा साथे जिन्दा रोहमु। ५ तुम्हरा अपना विश्वासेर बारे जाँच करे देखो। तुम्हरा विश्वासोत छेन ना नी छेन? तुम्हरा की जानेन नी कि यीशु मसीहा तुमसार साथे छे? अगर वहाँय तुमसार साथे नी छे, त तुम्हरा विश्वासेर परीक्षात कामयाब हवा नी पारभेन। ६ मगर मुई उम्मेद करछी कि तुम्हरा हमसार बारे जाने लिभेन कि हमरा विश्वासेर परीक्षात कामयाब हंय गही। ७ हमरा

परमेश्वरेर लिकिन प्रार्थना करछी कि तुम्हरा खराब काम ना करेन। हवा सकेछे कोय सोचवा पारे कि हमरा अपना परीक्षा कामयाब हवा नी पारी, मगर हमरा तुमसार तने प्रार्थना करछी कि तुम्हरा वहीडा करो, जैडा अच्छा छे। ८ क्याँकि सच्चाईर खिलाफ हमरा कुछु करवा नी पारमु। मगर सच्चाईर तने कुछु करवा पारमु। ९ जैखुना हमरा कमजोर होची, तुम्हरा शक्तिशाली होचेन। उखुना हमरा खोश होची। हमरा यहीडा प्रार्थना करछी कि तुम्हरा तरक्की करते रोहेन। १० मुई अला तुमसार साथे नी छी। वहीलाते मुई तुमसाक सुधरवार तने इखान चिट्ठी लिखछी जसे कि जैखुना मुई तुमसार लिकिन ओसुम, मोक तुमसार साथ कोय कठिन सलूक करवा नी होय। प्रभु मोक जैडा अधिकार दिहे, उडा अधिकारेर इस्तेमाल तुमसार तरक्की करवार तने करूम, तुमसार कोय नोकसानेर तने नी।

आखरी नमस्कार आर आशीर्वाद

११ मोर भा-बहिनला, आखिरोत मुई तुमसाक कोहची, तुम्हरा खुश रहव। तुम्हरा आपसी सम्बन्ध ठीक करो। एक-दोसराझनाक हिम्मत दव। सबकोय एकमन से रहव। मेल-मिलाप से रहव। मुई प्रार्थना करछी कि प्रेम आर शान्तिर परमेश्वर तुमसार साथे रोहोक। १२ प्रेम से तुम्हरा एक-दोसराझनाक सलाम-नमस्कार करेन। १३ परमेश्वरेर सबला लोक तुमसाक नमस्कार कोहचे। १४ हमसार प्रभु यीशु मसीहार दया,

परमेश्वरेर प्रेम आर पवित्र आत्मार संगति तुमसार सभारो साथे बनाल
रोहोक।

गलतिया शहरेर मंडलीक पौलुसेर चिट्ठी

परिचय

१-२ गलतिया प्रदेशेर विश्वासी भा-बहिनला, मुई पौलुस छी। मुई यीशु मसीहार एकझन दूत छी। मसीह-दूत हवार अधिकार मुई कोय लोकेर लिकिन से नी आर ना कोय लोकेर जरियाय पाही, बल्के यीशु मसीहा आर पिता परमेश्वरेर लिकिन से पाही, जे पिता परमेश्वर यीशु मसीहाक मौत से जिन्दा करिहे। मुई आर मोर साथे जैला भा-बहिन छे, हमरा मिले तुमसाक इखान चिट्ठी लिखछी। ३ हमसार पिता परमेश्वर आर प्रभु यीशु मसीहार तरफ से तुमसाक प्रेम आर शान्ति मिलोक। ४ यीशु मसीहा हमसार पापेर तने अपना जान दे दिहे, जसे कि वहाँय हमसार पिता परमेश्वर इच्छा मुताबिक हमसाक इडा पापी दुनियाँ से आजाद करे। ५ वहार बड़ाई युग-युग तक होते रोहोक। आमीन।

खुश-खबरी सिरिफ एकटाय छे

६ मोक बहुत ताज्जुब होचे कि जे परमेश्वर तुमसार पर दया करिहे आर मसीहार जरियाय तुमसाक बचाहे, मगर तुम्हरा बहुत जल्दी परमेश्वर से दूर हंय गहेन। तुम्हरा अलग किसमेर खुश-खबरीर पर विश्वास करवा

शुरू करिहेन, ७ मगर उकिसम कोय दोसरा खुश-खबरी बिल्कुल नी छे। मगर कुछ लोक तुमसार भीतरोत शक पैदा करे दिछे, आर यीशु मसीहार खुश-खबरीक बिगड़ाय दुवा चाहचे। ८ अगर हमरा या स्वर्गेर कोय फरीस्ताव उडा खुश-खबरीक छोड़े कोय दोसरा किसमेर खुश-खबरीक तुमसाक सुनाय त वहाक श्राप मिलोक। ९ हमरा जैकिसम तुमसाक पहिले कोहिनु, वही मान्दी अलाव हमरा कोहची कि जैडा खुश-खबरीक तुम्हरा माने लिहेन, उडा खुश-खबरीक छोड़े कोय दोसरा किसमेर खुश-खबरी तुमसाक सुनाय त वहार पर परमेश्वरेर श्राप पोड़ोक। १० मुई इला बातेर तने लोकोक खुश करवार कोशिश नी करछी, मगर मुई परमेश्वरोक खुश करवा चाहची। मुई अगर लोकोक खुश करवार कोशिश करी, त मुई यीशु मसीहार सेवक नी छी।

पौलुसेर खुश-खबरी

११ हे मोर भा-बहिनला, मुई तुमसाक बताय दिछी कि जैडा खुश-खबरी मुई तुमसाक सुनाही, उडा खुश-खबरी लोकेर तरफ से नी छे। १२ उडा खुश-खबरी ना त मोक कोय लोक दिहे, आर ना लोक सिखाहे, मगर मुई उडा खुश-खबरी यीशु मसीहार लिकिन से पाही। १३ तुम्हरा सुनिहेन कि यहूदी विश्वासेर मुताबिक मुई कुन किसम छिनु। मुई परमेश्वरेर मंडलीक बहुत बेसी सताछिनु, आर मंडलीलाक बर्बाद करवार कोशिश करछिनु। १४ अपना उमरेर बहुतला यहूदी भाई से मुई विश्वासोत बेसी

अच्छा छिनु। आर अपना बाप-दादोर रीति-रेवाजेर तने मुई बहुत बेसी जोशीला छिनु। १५ मगर परमेश्वर मोक माँर पेट से चुने लिहिले, आर अपना दया से मसीह-दूत हवार तने बुलाय लिहे। १६ परमेश्वर अपना इच्छा मुताबिक अपना बेटा यीशु मसीहाक मोर लिकिन प्रकट करिल कि मुई गैर-यहूदी लोकेर लिकिन वहार खुश-खबरी सुनाई। इखान कामेर तने मुई कोय लोकेर साथे सलाह-मशबरा नी करी। १७ आर मुई यरूशलेम शहरोत उसार लिकिन नी गेनु, जहाँय मोसे पहिले मसीह-दूत छिले, बल्के मुई अरब देश चले गेनु आर उठिन से दमिशक नगर वापस चले गेनु। १८ यहार बाद तीन साल बाद मुई पतरसेर साथे मुलेकात करवार तने यरूशलेम गेनु, आर वहार लिकिन मुई पन्द्रह दिन रोहनु। १९ मगर उठिन प्रभु यीशुर भई याकूबेर अलावा मुई आर कोय दोसरा मसीह-दूतेर साथे मुलेकात नी करी। २० जैला बात मुई तुमसार लिकिन लिखछी, इला बात झूठ नी छे। परमेश्वर इला बातेर गवाह छे। २१ यहार बाद मुई सीरिया आर किलिकिया इलाकात ओसनु। २२ मगर यहूदिया प्रदेशेर जे यहूदी लोक मसीहार विश्वासी छे, वरा मोर मुख कभी नी देखे, २३ मगर इडा सुनिहिले कि जहाँय हमसाक पहिले सताहिले, वहाँय अला वहीडा विश्वासेर प्रचार करछे। २४ आर वहीलाते मोर कारण वरा परमेश्वरेर बड़ाई करछिले।

पौलुस गैर-यहूदी लोकेर तने प्रचारक

२ चौदह साल बाद मुई बरनबासेर साथे फेर यरूशलेम गेनु, आर तितुसको साथे ले गेनु। २ मुई उठिन गेनु क्याँकि परमेश्वर मोक साफ-साफ देखाहिले कि मोक उठिन जाना जरूरी छे। आर जैडा खुश-खबरी मुई गैर-यहूदी लोकेर लिकिन प्रचार करछी, उडा खुश-खबरी मुई उसाक बताय दिनु। मगर मंडलीर जैला लोकोक नेता समझाल जाछिल, उसाक अलग करे बताल गेल। मुई इकिसम करनु जसे कि वरा मोर खिलाफ कुछु नी बोले, आर मोर अलकार मेहनत या आगुकार मेहनत बेकार नी हंय जाय। ३ तितुस मोर साथे यरूशलेम शहरोत छिले। वहाँय गैर-यहूदी छिले, मगर तितुसोक सुन्नत करवार तने कोय जोर जबरदस्ती नी करे। ४ कुछु झूठा विश्वासी चुपचाप से मंडलीत ढुके गहिले। वरा हमसार उडा आजादीर भेद लुवा चाहचिले, जैडा आजादी हमसाक यीशु मसीहार जरियाय मिलिहे। वरा सुन्नतेर बारे सवाल उठाल क्याँकि वरा हमसाक फेर से नियम-कानूनेर गोलाम बनवा चाहचे। ५ हमरा एक पलकेर तनेव उसार कब्जात हवा नी चाहनु, जसे कि खुश-खबरीर सच्चाई तुमसार भीतरोत कायम रहय। ६ मगर लोकेर बीचोत नामी-गामी लोक छे। इला लोक मोक नी बताल कि मोक की प्रचार करवार होबे। उसासे मोक कुछु लेना-देना नी छे, क्याँकि परमेश्वर कहारो मुख देखे काम नी करछे। ७ मगर वरा इडा जाने लोक कि जैकिसम

पतरसोक यहूदी लोकेर लिकिन खुश-खबरी दुवार काम सोंपाल गहिले, वही मान्दी मोहको गैर-यहूदी लोकेर लिकिन खुश-खबरी सुनवार काम सोंपाल गहे। ८ परमेश्वर जैमान्दी पतरसोक सुन्नत कराल लोकलार बीचोत काम करवार जिम्मेवारी सोंपे दिहिले, ठीक वही मान्दी मोहको बिना सुन्नत कराल लोकेर बीचोत काम करवार जिम्मेवारी सोंपे दिहे। ९ याकूब, पतरस, आर यूहन्ना यरूशलेम शहरोत विश्वासीलार नेता छिले। जैखुना वरा मोर पर परमेश्वरेर दया देखिल, त वरा हमसार साथे अपना हाथ मिलाल आर हमसाक अपना सहकर्मी बनाय लिले। वरा राजी होल कि मुई आर बरनबास गैर-यहूदी लोकेर लिकिन जामु आर वरा सुन्नत कराल यहूदी लोकेर लिकिन जाबे। १० वरा सिरिफ इडा कोहले कि हमरा मंडलीर गरीब लोकलार मदद करी, आर यही मान्दी काम मुई दिल से करवा चाहचिनु।

पौलुस पतरसेर गलतीक ठीक करछे

११ मगर जैखुना मुई अंतकिया नगरोत विश्वासीलार साथे छिनु, उखुना पतरसो उठिन ओसिल। मुई वहार मुखेर पर वहार खिलाफ बोलनु, क्योंकि जैखान काम वहाँय करिल, उखान काम करे गलती करिल। १२ पतरस पहिले गैर-यहूदी लोकेर साथे खान-पान करछिले। मगर याकूबेर लिकिन से कुछुला लोक ओसिल। वरा बोलछिले कि विश्वासी लोकोक सुन्नत करना जरूरी छे, आर गैर-यहूदी लोकेर साथे खवा नी

लागे। उसार बात सुने पतरस गैर-यहूदी लोकेर साथ छोड़े अलग हंय गेल। १३ आर बाँकीला यहूदी लोक, जैला विश्वासी छिले, वरा पतरसेर साथे मिले कपटी चाल चलिल। आर इकिसम कि बरनबासो उसार साथे गलत रास्तात चले जाछिले। १४ मगर मुई जैखुना देखनु कि वरा खुश-खबरीर सच्चाईर पर सीधा से नी चलछे, त मुई सभारो आगुत पतरसोक कोहनु, “तुई त यहूदी लोक छिस। यहूदी हंय गैर-यहूदीर मान्दी चलछिस आर यहूदीर मान्दी नी चलछिस, त तुई गैर-यहूदी लोकोक यहूदी लोकेर मान्दी चलवा क्याँ कोहचिस?”

विश्वासेर जरियाय सभारो मुक्ति

१५ हमरा जनम से यहूदी छी आर पापी गैर-यहूदी लोकेर मान्दी नी छी। १६ हमरा जानी कि कोय लोक नियम-कानूनेर जरियाय धर्मी नी ठहरेछे, बल्के यीशु मसीहार पर विश्वास करवार जरियाय धर्मी ठहरेछे। वहीलाते हमरा खुद यीशु मसीहार पर विश्वास करिही कि परमेश्वर हमसाक विश्वासेर जरियाय धर्मी ठहराबे, नियम-कानून माने चलले परमेश्वर धर्मी नी ठहराबे क्याँकि नियम-कानून माने कोय लोक धर्मी हवा नी पारबे। १७ मगर जब हमरा मसीहार पर विश्वासेर जरियाय धर्मी ठहराल जाछी, त नियम-कानून हमसाक पापी ठहराछे। यहार की इडा माने कि मसीहा हमसाक पाप करवाछे? नी, कभी नी। १८ मगर मुई उला पुरना नियम-कानूनोक छोड़े दिही। अला अगर फेर उला पुरना

नियम-कानूनोक अपनाय लिछी, त तब मुई देखाछी कि मुई पाप करछी। ^{१९} क्यौंकि नियम-कानूनेर जरियाय नियम-कानूनेर तने मुई मोरे गही, जसे कि मुई परमेश्वरेर तने जिन्दा रहवा पारी। ^{२०} इडा इकिसम छे कि मुई मसीहा यीशुर साथे क्रुसेर पर चढ़ाल गही, मुई अला जिन्दा नी छी, बल्के यीशु मसीहा मोर भीतरोत जिन्दा छे। मुई जे अला बदनडात जिन्दा छी, त उडा विश्वास से जिन्दा छी, जैडा विश्वास परमेश्वरेर बेटार पर छे, जहाँय मोक प्रेम करिल, आर मोर तने अपना-आपोक दे दिले। ^{२१} मुई परमेश्वरेर दयाक बेकार नी ठहराछी, क्यौंकि अगर नियम-कानूनेर जरियाय धार्मिक बनाल गेलतन, त यीशु मसीहार मरना बेकार होलतन।

३ ऐ नासमझ गलतिया इलाकार भा-बहिनला, इकिसम मानो कि तुमसार पर कोय जादू-मंत्रर करे दिहे। तुमसाक की मालूम नी छे कि मुई तुमसाक साफ-साफ बताहिनु कि कुन किसम करे यीशु मसीहाक क्रुसेर पर चढ़ाल गहिले। ^२ मुई तुमसार लिकिन से एकटा सवाल करवा चाहची। तुम्हरा की परमेश्वरेर आत्मा नियम-कानूनेर मनवार कारण से पाहेन? एकदम नी। तुम्हरा पवित्र आत्मा पाहेन क्यौंकि तुम्हरा जैडा बात मसीहार बारे सुनिहेन, उडार पर विश्वास करिहेन। ^३ तुम्हरा कत्तेक नासमझ छेन। जैखुना तुम्हरा यीशु मसीहार पर विश्वास करिलेन,

उखुना परमेश्वरेर आत्मार जरियाय नया जीवन पाहिलेन। आर अला की तुम्हरा अपना शक्ति मुताबिक अपना जीवनडाक अन्त तक पूरा करवा चाहचेन? ४ तुम्हरा की अतेखान दुःख-तकलीफ बेकारे उठाहिलेन? मुई उम्मेद करछी कि तुमसार दुःख-तकलीफ सहना बेकार नी होय। ५ परमेश्वर तुमसाक अपना आत्मा दान करिहे आर तुमसार भीतरोत आत्मा चमत्कारे काम करछे। परमेश्वर तुमसाक नियम-कानून मनवार कारण अपना आत्मा नी दे, बल्के खुश-खबरीर पर विश्वास करवार कारण वहाँय तुमसाक अपना आत्मा दिहे।

विश्वास से धर्मी ठहराल जाछे

६ इब्राहिम त परमेश्वरेर पर विश्वास करिल, आर वहार विश्वास करवार कारण से वहाँय धर्मी गेनाल गेल। ७ वहीलाते इडा बात जाने लव कि जहाँय विश्वास करछे, सिरिफ वराय इब्राहिमेर औलाद छे। ८ आर परमेश्वरेर शास्त्रोत पहिले से बताहे कि गैर-यहूदी लोकेर विश्वासेर कारण परमेश्वर उसाक धर्मी ठहराबे। इडा खुश-खबरी पहिले से इब्राहिमोक बताय देयाल गहिले, “तोर जरियाय सब देशेर लोक आशीर्वाद पाबे।” ९ इब्राहिम परमेश्वरेर पर विश्वास करिल, आर परमेश्वर वहाक आशीर्वाद दिले, वही किसम जतेला लोक मसीहार पर विश्वास करबे, वरा परमेश्वरेर लिकिन से आशीर्वाद पाबे। १० वहीलाते जतेला लोक नियम-कानूनेर पर भरोसा करे धर्मी हवा चाहचे, उसार पर

श्राप छे, क्याँकि परमेश्वरेर शास्त्रोत लिखाल छे, “जैला लोक नियम-कानूनेर किताबोत लिखाल सबला बातोक नी मानछे, वहार पर श्राप छे।” ११ मगर इडा बात देखाल जाछे कि नियम-कानूनेर जरियाय कोय लोक धर्मी नी ठहरेछे, क्याँकि परमेश्वरेर वचनोत लिखाल छे, “विश्वास से धर्मी लोक जिन्दा रोहबे।” १२ विश्वासेर साथे नियम-कानूनेर कोय लगाव नी छे, क्याँकि परमेश्वरेर शास्त्र बताछे, “जहाँय सही माने नियम-कानूनोक मानबे, वहाँय वहीलार कारण से जिन्दा रोहबे।” १३ यीशु मसीहा हमसार तने श्राप पाले, आर हमसाक किने लिले आर नियम-कानूनेर श्राप से छुटाय लिले, क्याँकि परमेश्वरेर शास्त्रोत लिखाल छे, “जहाँय क्रुसेर पर चढ़ाल जाछे, वहाँय श्राप पाछे।” १४ यीशु इकिसम काम करिल जसे कि गैर-यहूदी लोक इब्राहिमेर आशीर्वादेर भागीदार होय जाय, आर परमेश्वर जे पवित्र आत्मार बारे वादा करिहिले, हमरा विश्वासेर जरियाय उ पवित्र आत्मा पाई।

परमेश्वरेर वादा से आशीर्वाद ओसछे

१५ भाई-बहिनला, मुई हमसार हर दिनकार जीवनेर मिसाल दे कोहची कि लोकेर बीचोत जैखुना एक बार कोय बात मंजूर हंय जाछे, तब उडा चुक्तिक कोय भंगवा नी पारबे, आर ना कोय उडात जोड़ा दुवा पारबे। १६ यही मान्दी परमेश्वर इब्राहिमेर आर वहार छुवाडार साथे वादा करिहिले। पवित्र शास्त्रोत इडा नी कोहचे, “छुवालार साथे” बल्के इडा

कोहचे, “छुवाडार साथे” याने एकझनार साथे आर वहाँय छे: यीशु मसीहा। १७ मोर कहवार इडा मतलब छे कि परमेश्वर जैडा वादा पहिले से इब्राहिमेर साथे पक्का करिहिले, आर वहार चार सौ तीस बर्षेर बाद नियम-कानून देयाल गेल। इडा नियम-कानून परमेश्वरेर उडा वादाक खतम करवा नी पारबे। १८ क्याँकि अगर नियम-कानून मानवार कारण परमेश्वरेर आशीर्वाद मिलछे, तब इडा परमेश्वरेर वादा पर निर्भर नी करछे। मगर परमेश्वर अपना वादार कारण से इब्राहिमोक अपना आशीर्वाद दिहिले।

नियम-कानून आर विश्वास

१९ मूसा नबी परमेश्वर आर मानुषेर बीचोत मेल करानेवाला छिले। परमेश्वर फरीस्तार जरियाय अपना नियम-कानून मूसाक दिले। तब सवाल इडा छे कि परमेश्वर नियम-कानून क्याँ दिहिले? परमेश्वर अपना नियम-कानून दिहिले जसे कि मानुष अपना पाप देखवा पारे। आर परमेश्वर इब्राहिमेर जैडा छुवार साथे वादा करिहले, जैखुना वहाँय ओसे गेल, तब नियम-कानून खतम हंय गेल। २० जैखुना एक से बेसी दल होचे, त मेल करानेवाला होना जरूरी छे। मगर परमेश्वर एकझन छे। मगर वहाँय आपने इब्राहिमेर साथे वादा करिहिले। २१ तब नियम-कानून की परमेश्वरेर वादार खिलाफ काम करछे? एकदम नी। मगर नियम-कानून लोकोक नया जीवन नी दुवा पारिल क्याँकि लोक नियम-

कानून माने परमेश्वरेर लिकिन धर्मी नी बनिल, २२ क्यौंकि परमेश्वरेर पवित्र शास्त्र बताछे, “सबकोय पापेर गोलाम छे, मगर यीशु मसीहार पर विश्वास करवार कारण लोक परमेश्वरेर वादा मुताबिक धर्मी ठहरेछे। २३ इडा विश्वास ओसवार पहिले, नियम-कानून हमसाक अपना अधिकारोत राखिले, आर जते दिन तक विश्वास नी ओसे, तते दिन तक नियम-कानून हमसाक कैदी बनाय राखिहिले।” २४ वहीलाते मसीहार ओसवार समय तक नियम-कानून हमसार तने सीखानेवाला गुरुर मान्दी छिले जसे कि मसीहार ओसवार बाद हमसाक मसीहार पर विश्वासेर जरियाय धर्मी ठहराल जाय। २५ आर विश्वास चले ओसवार बाद हमरा आर नियम-कानूनेर अधिकारोत नी छी।

इब्राहिमेर आशीवदिर हकदार

२६ मसीहा यीशुर पर विश्वास करवार कारण से तुम्हरा परमेश्वरेर बेटा-बेटी छेन। २७ आर तुमसार अन्दर से जतेला लोक मसीहार नामे बपतिस्मा लिहेन, तुम्हरा मसीहार गुणलाक नया कपड़ा मान्दी अपना उपरोत पिन्हें लिहे। २८ अला आर कोय यहूदी नी रोहिल आर ना गैर-यहूदी, ना कोय गोलाम, आर ना कोय आजाद, आर ना कोय पुरुष ना स्त्री, क्यौंकि तुम्हरा सबकोय यीशु मसीहार कारण एक छेन। २९ आर तुम्हरा अगर मसीहार लोक छेन, त तुम्हरा इब्राहिमेर खानदानेर लोक

छेन आर परमेश्वरेर वादा मुताबिक तुम्हरा इब्राहिमेर आशीर्वादेर हकदार छेन।

४ मुई इडा कोहची कि जैडा छुवा बाफेर सब धन-सम्पत्तिर वारिस छे, वहाँय जब तक नाबालिग छे, तब तक वहार आर गोलामेर बीच कोय फरक मालूम नी होचे। २ बाप वहार देखभाल करवार तने लोक राखछे। जते दिन बाप वहाक लोकलार देखभालोत राखछे, तते दिन तक वहाँय उसार देखभालोत रोहबे। ३ वही मान्दी हमराव मसीहार पर विश्वास करवार पहिले छोटो छुवालार मान्दी इ-दुनियाँर शक्तिर गोलाम छिनु। ४ मगर जैखुना परमेश्वरेर ठहराल समय चले ओसिल, परमेश्वर अपना बेटाक दुनियाँत पठाल। वहार जनम स्त्री से आर नियम-कानूनेर भीतरोत होल ५ जसे कि वहाँय नियम-कानूनेर भीतरोत रहनेवाला लोकोक किने ले आर उसाक अपना पोष बेटा हवार पद दे। ६ आर तुम्हरा परमेश्वर बेटा-बेटी छेन। परमेश्वर तुमसार दिलोत अपना बेटा यीशु मसीहार आत्मा दिहे, आर उडा आत्मा परमेश्वरोक हे अब्बा, हे पिता कोहय बुलाछे। ७ तुम्हरा गोलाम नी छेन, बल्के परमेश्वरेर बेटा-बेटी छेन, आर वहीलाते परमेश्वर तुमसाक अपना धन-सम्पत्तिर वारिस बनाहे।

गलतियार विश्वासीर तने पौलुसेर चिन्ता

८ पहिले तुम्हरा परमेश्वरोक नी जानछिलेन, त तुम्हरा उला देवी-देवतार गोलाम छिलेन, जैला परमेश्वर नी छे। ९ मगर अला जब तुम्हरा परमेश्वरोक जाने लिहेन या इडा कहवा पारी कि परमेश्वर तुमसाक जाने लिहे, त फेर कसे करे तुम्हरा बेकार शिक्षार भीति घुरे जाछेन आर दोबारा उलार गोलाम बनवा चाहचेन। १० तुम्हरा खास दिनोक, खास महीनाक आर खास सालोक आर खास समयक परब समझे मानछेन। ११ मोक तुमसार बारे सोचे डोर लागछे कि कहीं इकिसम ना होक कि तुमसार बीचोत मोर मेहनत करना बेकार हंय जाय। १२ भाई-बहिनला, मुई तुमसाक बिनती करे कोहची कि तुम्हरा मोर मान्दी हंय जाव, क्योंकि जैखुना मुई तुमसार साथे छिनु, मोहो तुमसार मान्दी हंय गही। तुम्हरा मोर साथे कोय खराब व्यवहार नी करेन। १३ मगर तुम्हरा ख्याल करो कि मुई बेमार हवार कारण तुमसार बीचोत पहिला बार खुश-खबरीर प्रचार करवार मौका पाहिनु। १४ मोर तबियत खराब रहवार कारण तुम्हरा तकलीफ उठालेन, तुम्हरा मोक तुच्छ नी समछिलेन, ना मोक हटाय दिलेन, बल्के मोक इकिसम ग्रहण करलेन, मानो तुमसार तने मुई परमेश्वरेर एकझन फरीस्ता या खुद यीशु मसीहा छिनु। १५ जैखुना मुई तुमसार साथे छिनु, तुम्हरा उखुना कतेक खुश छिलेन, मगर तुमसार उडा खुशीर की होल? मुई तुमसाक बोलछी कि अगर हवा

पारिलतेन त तुम्हरा अपना आँखलाव निकलाय मोक दे दिलेनतेन।
१६ अला कि सच बात बोलवार चलते मुई की तुमसार दुश्मन बने गेनु?
१७ उला झूठा शिक्षक तुमसार दिल जीतवार कोशिश करछे जसे कि
तुम्हरा उसार बातलार पर बेसी ध्यान दुवा पारेन। मगर उसार मकसद
अच्छा नी छे। वरा तुमसाक मोसे अलग करवा चाहचे। १८ तुमसार तने
इडा अच्छा बात छे कि तुम्हरा अच्छा चीजेर पर ध्यान लगाव। मुई
जैखुना तुमसार साथे छी, सिरिफ वहीखुना ध्यान ना देन, बल्के
वहोखुना ध्यान दव, जैखुना मुई तुमसार साथे नी छी। १९ हे मोर छोटो
छुवाला, मोक लागछे कि मुई तुमसार तने फेर बच्चा जनम दुवार मान्दी
तकलीफ पाछी। जैखुन तक तुमसार भीतरोत यीशु मसीहार स्वभाव नी
देखाल जाछे, इखान तकलीफ मोर भीतरो तब तक रोहबे। २० मोर
इच्छा होचे कि मुई अला तुमसार साथे होनुतेन आर तुमसार साथे
इकिसम बात नी करनुतेन। इठिन तुमसार बारे मोक बहुत चिन्ता होचे।

विश्वासीला असली माँर बेटा-बेटी छे

२१ तुम्हरा जैला लोक मूसार नियम-कानूनेर मुताबिक चलवा चाहचेन,
तुम्हरा त जानेन कि नियम-कानून की कोहचे? २२ परमेश्वरेर पवित्र
शास्त्रोत लिखाल छे, इब्राहिमेर दुईझन बेटा छिले। एकझन इब्राहिमेर
बान्दीर बेटा छिले आर दोसराझन इब्राहिमेर अपना पत्नी सारार बेटा
छिले। २३ बान्दीर नाम हाजिरा छिले। जैकिसम दोसराला छुवा जनम

લિછે, વહી કિસમ હાજિરાર બેટા જનમ લિહિલે। મગર સારાર બેટા પરમેશ્વરેર વાદાર મુતાબિક જનમ લિહિલે। ૨૪ ઇલા સબલાક મિસાલેર રૂપે લિયાલ ગહે। ડુઈડા સ્ત્રીર મિસાલ માનુષેર સાથે પરમેશ્વરેર ડુઈડા સમ્બન્ધોક બતાછે। પહિલાડા સ્ત્રી હાજિરા છે। હાજિરા સિને પહાડોક દર્શાછે। સિને પહાડેર પર લોકોક નિયમ-કાનૂન મિલિહિલે, આર નિયમ-કાનૂનેર ગોલામ બને ગહિલે। ૨૫ અલા યરૂશલેમ શહર અરબ દેશેર સિને પહાડેર માન્દી છે ક્યાંકિ ઉઠિનકાર સબલા યહૂદી લોક નિયમ-કાનૂનેર ગોલામ છે। ૨૬ મગર દોસરાડા સ્ત્રી સારા ઇબ્રાહિમેર પત્ની સ્વર્ગેર યરૂશલેમ શહરેર માન્દી છે। સ્વર્ગ હમસાર રહવાર નગર છે, જૈઠિન હમરા યહૂદી લોકેર નિયમ-કાનૂન સે આજાદ રોહમુ। આર વહીલાતે હમરા ઉડા નગરેર લોક છી। ૨૭ જૈકિસમ પરમેશ્વરેર પવિત્ર શાસ્ત્રોત લિખાલ છે, “હે બાંઝી, તોર જે કબી બચ્ચા ની હોય, તુઈ ખુશી મના તુઈ જે બચ્ચા જનમ ટુવાર દર્દ ની જાનિસ, ગલા ખોલે ગીત ગા, ક્યાંકિ તુઈ બાંઝ છિલે, અલા બચ્ચા વાલી સ્ત્રી સે બેસી તોર બાલ-બચ્ચા હોબે।” ૨૮ હે મોર ભા-બહિનલા, જૈકિસમ ઇસહાક પરમેશ્વરેર વાદાર મુતાબિક પરમેશ્વરેર બેટા છિલે, તુમ્હરા પરમેશ્વરેર વાદાર મુતાબિક બેટા-બેટી છેન। ૨૯ આર જૈકિસમ દોસરાલા છુવા જનમ લિછી, વહી કિસમ ઉડા છુવાર જનમ હોલ। વહાંય પરમેશ્વરેર આત્માર શક્તિ સે જનમાલ બચ્ચાડાર સાથે ઉખુના ખરાબ બર્તાવ કરિલ। અલાવ યહી માન્દી હોચે। જૈલા લોક

नियम-कानूनेर मुताबिक चलछे, वरा उला लोकेर खिलाफ बिरोध करछे, जैला लोक परमेश्वरेर आत्मा मुताबिक चलछे। ३० मगर परमेश्वरेर वचनोत की लिखाल छे? इडा लिखाल छे, “दासी आर वहार बेटाक निकलाय देयाल गेल, कारण दासीर बेटा कोयखुना असली पत्नीर बेटार साथे बाफेर वारिस हवा नी पारबे।” ३१ हे भा-बहिनला तब इडा देखा जाछे कि हमरा बान्दी हगार बेटा-बेटी नी छी, बल्के हमरा सारार बेटा-बेटी छी, जहाँय बान्दी नी छिले।

मसीहा गोलामी से आजाद करछे

५ मसीहा हमसाक आजाद रहवार तने आजाद करिहे। वहीलाते तुम्हरा फेर नियम-कानूनेर गोलाम बनवार तने ना जायन। २ फेर मुई तुमसाक कोहची कि तुम्हरा अगर नियम-कानून माने चलवार तने अपना सुन्नत कराछेन, त मसीहा से तुमसाक कोय पैदा नी मिलबे। ३ फेर मुई तुमसाक कोहची, तुम्हरा अपना सुन्नत कराछेन, वहीलाते तुमसाक सबला नियम-कानून माने चलवा होबे। ४ तुम्हरा अगर नियम-कानूनोक माने धर्मी बनवा चाहचेन, त तुम्हरा परमेश्वरेर दया से दूर चलेगहेन, आर यीशु मसीहा से अलग हंय गहेन। ५ मगर हमरा उम्मेद करछी कि परमेश्वर हमसाक विश्वासेर जरियाय धर्मी ठहराबे। आर वहार आत्मा इडा बातेर इन्तेजार करते मदद करबे। ६ यीशु मसीहार नजरोत ना त

सुन्नत से लाभ छे, आर ना बिना सुन्नत से कोय लाभ छे, बल्के लाभ सिरिफ विश्वासोत छे, जैडा प्रेमेर जरियाय काम करछे। ७ तुम्हरा त अच्छा से दौड़छिलेन, के तुमसाक सच्चाईडाक मानते बाधा दिले? ८ परमेश्वर जहाँय तुमसाक बुलाहे, वहाँय बाधा नी दिहे। ९ झूठा शिक्षा तुमसाक बर्बाद करे दिहे, जैकिसम “एकखुदी खमीर गोटेखान सनाल आटाँक फूलाय दिछे।” १० मोक प्रभुर पर विश्वास छे कि तुम्हरा कोय दोसरा शिक्षा ग्रहण नी करभेन। जैला लोक तुमसाक तकलीफ दिछे, वरा सजई पाबे। ११ मगर मोर भा-बहिनला, मुई प्रचार करछी कि सुन्नत करना जरूरी नी छे। वहीलाते कुछुला लोक मोक सताछे। मगर अगर मुई प्रचार करी कि सुन्नत करना जरूरी छे, तब लोकला सोचबे कि परमेश्वर हमसाक हमसार कामेर कारण बचाछे, हमसाक अपना दया से नी बचाछे। तब यहूदी लोकोक क्रुसेर पर यीशुर मौतेर प्रचारोक ग्रहण करते कोय दिक्कत नी होलतेन। १२ जैला लोक तुमसाक सुन्नत करवार तने परेशान करछे, मुई चाहची कि वरा अपना-आपोक खोजा बनाय लोक।

पवित्र आत्मार काम

१३ “भा-बहिनला, तुमसाक आजाद हवार तने बुलाल गहे। इडा आजादीक तुम्हरा अपना बदनेर पापेर इच्छा पूरा करवार तने इस्तेमाल ना करो, बल्के प्रेम से एकझन एक-दोसराझनार सेवा करनेवाला दास

बने जा। १४ परमेश्वरेर एकटा हुकूम छे जैडा कोहचे कि तुई अपना पड़ोसीक अपना मान्दी प्रेम करेक। जहाँय इडा हुकूम मानछे, वहाँय मूसा नबीर सबला नियम-कानूनोक पूरा करछे। १५ मगर तुम्हरा अगर आपसोत झगड़ा-झंझट करछेन, त हुँसियार रहेन। इकिसम नी होय कि तुम्हरा एक-दोसराझना नाश करे देन। १६ मगर मुई तुमसाक कोहची, पवित्र आत्मार मदद से चलो आर पाप करवार बदनेर इच्छालाक पूरा ना करो। १७ क्योंकि पाप करवार बदनेर इच्छा पवित्र आत्मार खिलाफ छे, आर पवित्र आत्मार इच्छा पाप करवार बदनेर इच्छार खिलाफ छे। दोनों किसमेर इच्छा एकटा-दोसराडार खिलाफ छे। वहीलाते तुम्हरा जैला काम करवा चाहचेन, उला काम करवा नी पारछेन। १८ अगर तुम्हरा आत्मार जरियाय चलछेन, त तुम्हरा नियम-कानूनेर अधिकारोत नी छेन। १९ पाप करवार बदनेर इच्छा इला छे: कुकरम, बुरा बिचार, लुच्चागिरी, २० मूर्ति पूजा, जादुगिरी, दुश्मनी, लड़ाई-झगड़ा, हिंस्सा, गोस्सा, स्वार्थ, मन-मोटाव, दलबन्दी, २१ नफरत, शराबखोरी, आर भोग-बिलास आर यही मान्दी आढ़ोह दोसरा-दोसरा कुछ छे। मुई तुमसाक चेताय दिछी, जैमान्दी मुई पहिले तुमसाक चेताय दिहिनु, कि जहाँय इकिसम काम करछे, वरा परमेश्वरेर राजोत जवा नी पारबे। २२ मगर आत्मार फल छे: प्रेम, खुशी, शांति, दया, धीरज, भलाई, २३ विश्वास, भद्रता, अपना-आपेर पर काबू रखना। इलार खिलाफ

कोय नियम-कानून नी छे। २४ आर जहाँय यीशु मसीहार लोक छे, वरा अपना बदनडाक आर बदनेर पापेर इच्छा समेत क्रुसेर पर चढ़ाय दिहे। २५ अगर हमरा आत्मार मदद से जिन्दा छी, त हमसाक आत्मार मुताबिक चलवा लागे। २६ हमसाक घमंडी बने एक-दोसराझनार साथे झगड़ा नी करवा लागे, आर ना एक-दोसराझनार साथे हिंसा करवा लागे।”

एक-दोसराझनाक मदद

६ हे मोर भा-बहिनला, अगर कोय मसीह भाई कोय गलत काम करते धरा पोड़े जाय, त तुम्हरा जैला लोक आत्मार मदद से चलछेन, त तुम्हरा नरम बने इकिसम लोकोक संभलायलेन आर अपना-आपोक हुँसियार राखेन आर तुम्हरा पापोत ना पोड़ैन। १ तुम्हरा एक-दोसराझनार बोझ ढोय ले जाव, आर यही मान्दी करे यीशु मसीहार नियम-कानूनोक पूरा करो। २ क्योंकि अगर कोय लोक कुछु नी हवार बादो अपना-आपोक कुछु समझेछे, त वरा अपना-आपोक धोखा दिछे। ३ तुम्हरा अपना-आपोक दोसरा लोक से बोड़ो ना समझो। तुम्हरा अपना-आपोक जाँच करे देखो कि तुमसार काम अच्छा छे की नी। अगर तुम्हरा अच्छा काम करछेन, तब तुम्हरा घमंड करवा सकेछेन। ४ क्योंकि हरेकझनाक अपना-अपना काम करवा होबे। ५ जहाँय

तुमसाक परमेश्वरेर वचन सिखाछे, तुम्हरा अपना सबला अच्छा चीजलार भीतर से उसाको दव। ७ तुम्हरा धोखा ना खायेन। परमेश्वरेर साथे हँसी-मजाकेर बात नी होचे। लोक जे कुछु लगाछे, वहीला काटबे। ८ क्याँकि जैला लोक बदनेर पापेर इच्छाक खुश करवार कोशिश करछे, परमेश्वर उसाक सजा दिबे। मगर जैला लोक परमेश्वरेर आत्मा मुताबिक जीवन बिताबे, परमेश्वर उसाक हमेशार जीवन दिबे। ९ हमसाक अच्छा काम करते थकवा नी लागे, क्याँकि अगर हमरा हिम्मत नी हारी, त ठीक समय हमरा परमेश्वरेर लिकिन से इनाम पामु। १० वहीलाते जब जब मौका मिलछे, हमसाक सभारो साथे भलाई करते रहवा लागे, आर खास करे विश्वासी भा-बहिनलार साथे बेसी करे भलाई करवा लागे।

आखरी उपदेश

११ देखो, मुई अपना हाथ से बोड़ो-बोड़ो अक्षर दे लिखछी। १२ जैला लोक तुमसाक सुन्नत करवार तने मजबूर करछे, वरा इकिसम करछे जसे कि दोसराला यहूदी लोक उसाक अच्छा कहय। आर तब जैखुना वरा क्रुसेर पर मसीहार मौतेर प्रचार करे त उसाक दुःख-तकलीफ उठवा नी होबे। क्रुसेर पर मसीहार मौत लोकोक बचाछे। १३ क्याँकि सुन्नत करनेवाला खुद नियम-कानूनेर मुताबिक नी चलछे, मगर तुमसार सुन्नत करवा चाहचे कि तुमसार सुन्नतेर कारण से घमंड करवा पारे। १४ मगर

इकिसम ना होक कि मुई कोय दोसरा बातेर घमंड करी, बल्के सिरिफ यीशु मसीहार क्रुसेर घमंड करी। यहीडा क्रुसेर कारण दुनियाँर बुराई मोर नजरोत कोय कीमत नी छे, इकिसम कि मोरे गहे आर यहोडा कि मुई इडा बुरा दुनियाँडार नजरोत मोरे गही। १५ चाहे सुन्नत कराल लोक होक या बिना सुन्नत कराल लोक होक, उडा खास बात नी छे। मगर नया जीवन पाना सबसे बोड़ो बात छे। १६ जतेला लोक परमेश्वरेर नया नियम मुताबिक चलछे, वराय परमेश्वरेर असली लोक छे, जैकिसम इजराएली लोक पहिले परमेश्वरेर लोक छिले। परमेश्वर अपना असली लोकलाक पर अपना शान्ति दोक आर दया करोक। १७ आखरीत कोहची, कोय मोक आर तकलीफ ना दोक, क्योंकि यीशु मसीहार मौतेर दाग मुई अपना बदनडात ले बेराछी। १८ मोर भा-बहिनला, तुमसार आत्मार साथे हमसार प्रभु यीशु मसीहार दया बनाल रहोक।
आमीन!

इफिसुस शहरेर मंडलीक पौलुसेर चिट्ठी

परिचय

१ इफिसुस शहरेर परमेश्वरेर पवित्र लोक, तुम्हरा यीशु मसीहार बफादार सेवक छेन। मुई पौलुस छी। यीशु मसीहार आर २ हमसार पिता परमेश्वर आर प्रभु यीशु मसीहा तुमसार पर दया करोक आर शान्ति दोक!

यीशु मसीहात आत्मिक आशीर्वाद

३ हमसार प्रभु यीशु मसीहार पिता परमेश्वरेर बड़ाई होक, क्याँकि वहाँय हमसाक यीशु मसीहार जरियाय स्वर्गेर सब किसमेर आशीर्वाद दिहे। ४ दुनियाँडा बनवार आगुते परमेश्वर अपना इच्छा मुताबिक हमसाक चुने लिहे क्याँकि हमरा यीशु मसीहार साथे जुड़े एक हंय गही जसे कि हमरा वहार नजरोत पवित्र आर निर्दोष बनी, आर वहाक प्रेम करनेवाला हवा पारी। ५ वहाक इडा अच्छा लागिले। वहीलाते वहाँय हमसाक अपनार तने पहिले चुने राखिये, जसे कि यीशु मसीहार जरियाय हमरा वहार पोष बेटा-बेटी बने जई। ६ वहीलाते ओसो हमरा परमेश्वरेर बड़ाई

करई क्यौँकि वहाँय हमसाक अपना प्यारा बेटार जरियाय अपना दया दान करिहे, जैडा दया पवार लायक हमरा नी छिनु। ७ परमेश्वरेर दया अतेक बेसी छे कि वहाँय हमसाक यीशु मसीहार खूनेर जरियाय आजाद करिहे आर हमसार पाप माफ करिहे। ८ परमेश्वर अपना ज्ञान आर समझदारीर साथे हमसार पर इकिसम दया करिहे। ९ परमेश्वर जैकिसम चाहचिले, ठीक वही मान्दी वहाँय यीशु मसीहार जरियाय अपना भेदेर बातलाक हमसाक बताल। १० परमेश्वर जैखुना अपना योजना ठीक समय पूरा करबे, उखुना परमेश्वर दुनियाँर चीज आर स्वर्गेर चीज, सब कुछ वहार साथे जुड़े जाबे। ११ परमेश्वर अपना सोच, अपना बुद्धि आर अपना इच्छा मुताबिक सब काम करछे। वहाँय हमसाक अपना लोक बनवार तने यीशु मसीहार जरियाय बहुत पहिले से चुने लिहिले। १२ परमेश्वरेर मकसद इडा छिले कि हमरा यहूदी लोकला मसीहार पर विश्वास करनेवाला पहिला लोक होनुतेन, आर हमसार जरियाय परमेश्वरेर महिमा आर बढ़ाई होलतेन। १३ तुम्हरा परमेश्वरेर सच्चा खबर याने खुश-खबरीक सुने बचे गहेन। जैखुना तुम्हरा यीशु मसीहार पर विश्वास करिहिलेन, उखुना तुमसार पर पवित्र आत्मार मोहर लागे गहे, जे पवित्र आत्मार वादा परमेश्वर तुमसार साथे करिहिले। १४ परमेश्वर अपना पवित्र आत्मा हमसाक दिहे जसे कि परमेश्वरेर वादा पक्का छे।

वही वादा मुताबिक हमरा पामु। वहाँय अपना वादा मुताबिक लोकलाक पूरापूरी आजादी दिबे। वहार बड़ाई आर जय जय कार होक।

पौलुसेर प्रार्थना

१५ मुई जैखुना सुननु कि तुम्हरा प्रभु यीशुर पर विश्वास करछेन आर परमेश्वरेर लोकलाक प्रेम करछेन, १६ यही तने वहीखुन से मुई तुमसार तने परमेश्वरेर बड़ाई करवा नी छोड़ी, आर प्रार्थना करवारखुना मुई तुमसार तने प्रार्थना करते रोहछी। १७ प्रार्थना करछी कि हमसार प्रभु यीशु मसीहार परमेश्वर अपना आत्मा दान करे जसे कि आत्मा तुमसाक परमेश्वरेर बारे जनवार ज्ञान आर बुझवार शक्ति दे। १८ मुई यहीडा प्रार्थना करछी कि तुमसार भीतरी आँखला खोले जाय, आर तुम्हरा इडा जनवा पारेन कि जैखुना परमेश्वर तुमसाक वहार अपना लोक हवार तने चुने लिहे, त वहाँय तुमसाक की उम्मेद दिहिले? आर तुम्हरा यहोडा जनवा पारेन कि परमेश्वर अपना लोकलाक जैला आशीवदिर वादा करिहे, उला आशीर्वाद बहुत बेसी बोड़ो आर समझ से बाहर छे। १९ आर मुई यहोडा प्रार्थना करछी कि तुम्हरा इडा बुझवा पारेन कि हमरा जैला लोक मसीहार पर विश्वास करछी, हमसार तने परमेश्वर अपना महाशक्ति से काम करछे। २० परमेश्वर यहीडा महाशक्तिर जरियाय यीशु मसीहाक मौत से जिन्दा करे उठाहे, आर स्वर्गोत अपना दहिना भीति बठाहे। २१ यीशु मसीहा सब किसमेर

प्रधानेर पर, सब किसमेर शक्तिर पर, अधिकार रखनेवालार पर आर शासन करनेवाला पर आर सबला नामेर उपरोत राज करछे। सिरिफ इडा दुनियाँत नी, बल्के ओसनेवाला दुनियाँतो राज करबे। २२ आर परमेश्वर सब कुछ वहार पाँर तोलोत करे दिहे, आर वहीं यीशुक विश्वासी लोकेर उपरोत प्रभु बनाहे। २३ विश्वासीर मंडली मसीहार बदन छे। आर मसीहा सब पकाय विश्वासी लोकलाक भरे दिछे।

मौत से जिन्दगी

२ तुम्हरा अपना कसूर आर पापेर कारण से मराल छिलेन। १ दुनियाँर रीति-नीतिर मुताबिक तुम्हराव पहिले आसमानेर शक्तिलार राजार मुताबिक चलछिलेन। जैला परमेश्वरेर कहना नी मानछे, अलाव तुम्हरा उसार बीचोत काम करछेन। ३ हमरा सबकोय पहिले पाप-स्वभावेर इच्छात दिन काटछिनु, आर बदनेर आर दिलेर इच्छा पूरा करछिनु, आर दोसरा लोकेर मान्दी परमेश्वरेर सजई पवार लायक छिनु। ४ मगर परमेश्वर जहाँय दया करवार पाके प्रेम करनेवाला छे, वहाँय अपना महान प्रेम से हमसाक प्रेम करिहे। ५ इकिसम कि जैखुना हमरा अपना पापोत मराल छिनु, परमेश्वर हमसाक यीशु मसीहार साथे जिन्दा करिल। वहार दयार कारण से तुम्हरा बचाल गहेन। ६ आर परमेश्वर मसीहार साथे हमसाक जिन्दा करिहे आर वहार साथे स्वर्गोत बठाहे

क्याँकि हमरा यीशु मसीहार साथे जुटे गही ७ जसे कि आनेवाला दिनोत सबकोय देखवा पारे कि परमेश्वर यीशु मसीहार कारण हमसार पर कतेक बेसी दया करिहे। ८ क्याँकि तुमसार विश्वास करवार कारण से आर परमेश्वरेर दया से तुम्हरा पापेर माफी पाहेन, आर इडा माफी तुमसार कामेर जरियाय नी होय, बल्के परमेश्वरेर दान छे। ९ तुमसार पापेर माफी तुमसार अच्छा कामेर कारण नी छे, नीते तुम्हरा घमंड करलेनतेन। १० क्याँकि हमरा वहार हाथेर बनाल लोक छी, आर यीशु मसीहार जरियाय अच्छा काम करवार तने बनाल गही। इकिसम योजना परमेश्वर आगु से बनाय राखिहिले, जसे कि हमरा वही मान्दी काम करी।

यीशु मसीहात सबकोय एक

११ इडा ना भूलो कि तुम्हरा बदन से गैर-यहूदी छेन, आर यहूदी लोकला अपना-आपोक सुन्नतवाला लोक बोले घमंड करछे, आर वरा तुमसाक बिना सुन्नतवाला लोक कोहचे। १२ याद करो तुम्हरा एक समय यीशु मसीहा से दूर छिलेन। तुम्हरा यहूदी लोकेर मान्दी परमेश्वरेर लोक नी छिलेन। तुम्हरा परमेश्वरेर वादार भागीदार नी छिलेन। तुमसार कोय उम्मेद नी छिले आर तुम्हरा सच्चा परमेश्वरोक नी जानछिलेन। १३ अला तुम्हरा यीशु मसीहार लोक छेन। तुम्हरा एक समय परमेश्वर से दूर छिलेन, मगर तुम्हरा यीशु मसीहार खून बहवार जरियाय वहार बगलोत

अनाल गहेन। १४ क्यौंकि यीशु मसीहा हमसार मेल-मिलाप करानेवाला छे। वहाँय यहूदी आर गैर-यहूदी लोकोक मिलाय एक करे दिहे। यहूदी आर गैर-यहूदी लोकेर बीचेर दुश्मनीर दिवालखानोक गिराय दिहे। १५ वहाँय क्रुसेर पर अपना मौतेर जरियाय मूसा नबीर नियमेर विधि-विधानोक खतम करे दिहे जसे कि मसीहार साथे जुड़े जवार कारण से मसीहा यहूदी आर गैर-यहूदी दोनोंझनाक मिलाय एक नया किसमेर लोक बनाय आर उसार बीचोत शांति आने। १६ वहाँय क्रुसेर पर अपना मौतेर जरियाय यहूदी आर गैर-यहूदी लोकेर बीचेर दुश्मनी खतम करे दिले, आर परमेश्वरेर साथे आरमने मेल-मिलाप कराय दिले। १७ वहीलाते यीशु मसीहा ओसे, गैर-यहूदीला जैला परमेश्वर से दूरोत छिले, आर यहूदी लोकला जैला परमेश्वरेर बगलोत छिले, दोनों किसमेर लोकोक खुश-खबरीर प्रचार करिहिले। १८ आर यीशु मसीहार जरियाय हमरा यहूदी आर गैर-यहूदी लोक मिले एक मन हंय पिता परमेश्वरेर लिकिन जवा पारछी। १९ वहीलाते तुम्हरा अला विदेशी आर मुसाफिर नी छेन, बल्के तुम्हरा परमेश्वरेर लोकेर साथे मिले गहेन आर परमेश्वरेर परिवारेर लोक हंय गहेन। २० हमरा सबकोय मिले परमेश्वरेर घरेर लोक छी, जैखान घरेर नींव मसीह दूतलार आर नबीला दिहे। खुद मसीहा इखान घरेर नीवेर कोनार पत्थल छे। २१ यीशु मसीहा हमसाक एक साथे

बान्हे राखछे, आर हमसाक प्रभुर तने पवित्र मंदिर बनाते जाछे २२ जसे कि तुम्हरा जिन्दा घर बने जायन, जैठिन परमेश्वरेर आत्मा रोहचे।

गैर-यहूदी लोकेर बीचोत पौलुसेर काम

३ यही तने मुई, पौलुस गैर-यहूदी लोकेर फायदार तने मसीहा यीशुर कैदी छी। २ परमेश्वर अपना दया से मोक तुमसार तने एक खास काम सोंपिहे। उखान कामेर बारे तुम्हरा जरूर सुनिहेन। ३ इडा भेदर बातोक परमेश्वर मोर लिकिन जाहिर करिहे, जहार बारे मुई तुमसार लिकिन आगु से लिखे दिही ४ जसे कि तुम्हरा उखान चिट्ठी पढ़े जाने लुवा पारेन कि मुई यीशु मसीहार उडा भेदेर बातोक कतेक बेसी साफ-साफ बुझवा पारछी। ५ इडा छुपाल बातोक पहिले लोकेर लिकिन इकिसम करे बताल नी जाय, जैकिसम करे अला आत्मार जरियाय परमेश्वरेर पवित्र मसीह-दूतलार आर नबीलार ठिन खोले बताल गहे। ६ मतलब इडा छे कि यीशु मसीहार खुश-खबरीर जरियाय गैर-यहूदी लोक परमेश्वरेर आशीर्वादेर हकदार, आर मसीहार बदनेर हिस्सा आर परमेश्वरेर वादार हकदार हंय जाय। ७ परमेश्वरेर दया आर वहार दानेर मुताबिक मुई खुश-खबरीर प्रचारक बने गही। परमेश्वर अपना शक्ति से मोक इडा दान दिहे। ८ मुई त परमेश्वरेर सबला लोक से छोटो छी, मगर परमेश्वर मोर पर दया करिल कि मुई गैर-यहूदी लोकेर ठिन यीशु

मसीहार अपार धनेर खुश-खबरी सुनाही। ९ आर परमेश्वर जहाँय सबला चीजोक बनाहे, वहाँय मोक चुने लिहे कि मुई परमेश्वर छुपाल योजनाक लोकोक साफ-साफ बतवा पारी। परमेश्वर अपना इडा योजनाक बहुत साल से छुपाय राखिहिले। १० परमेश्वर इकिसम करिल जसे कि मंडलीर जरियाय आसमानेर सबला ताकतेर आर शासन करनेवालार लिकिन खुले जाय कि परमेश्वर लिकिन हर किसमेर ज्ञान छे। ११ परमेश्वर अनन्त काल से जैडा इच्छा अपना दिलोत राखिहिले, उडाक हमसार प्रभु यीशु मसीहार जरियाय पूरा करिल। १२ यीशु मसीहार साथे मिले जवार कारण आर वहार पर विश्वास करवार कारण हमरा हिम्मत पाही कि हमरा परमेश्वरेर आगुत हाजिर हवा पारी। १३ वहीलाते मुई तुमसाक बिनती करे कोहची कि तुम्हरा मोर दुःख-तकलीफेर कारण हिम्मत ना हारेन, बल्के घमंड करेन।

यीशु मसीहात प्रेम

१४ यहीडा कारण से मुई परमेश्वरेर आगुत हटुवा पारे प्रार्थना करछी। १५ वहाँय हमसार पिता छे। स्वर्गेर आर धरतीर हर एकटा परिवार वहारे लिकिन से ओसछे। १६ परमेश्वर बहुत शक्तिशाली छे। मुई वहार लिकिन प्रार्थना करछी कि वहाँय तुमसाक अपना आत्मार शक्ति से तुमसार दिलडाक मजबूत बनाय। १७ आर तुमसार विश्वासेर कारण यीशु मसीहा तुमसार दिलोत जगह पाय, आर वहार प्रेम तुमसाक

मजबूत बनाय। १८ आर परमेश्वरेर सबला लोकेर साथे-साथे तुम्हराव बुझवा पारेन कि यीशु मसीहार प्रेम कतेखान लम्बा, चौड़ा, ऊँचा आर गहीड़ा छे। १९ तुम्हरा यीशु मसीहार प्रेमोक जनवा पारभेन, जैडा प्रेम हमसार समझ से बाहर छे। मुई प्रार्थना करछी कि तुम्हरा परमेश्वरेर मान्दी सब कुछ से भरे जायेन। २० परमेश्वर अपना शक्ति से हमसार बीचोत काम करछे। परमेश्वरेर जैला कामेर बारे हमरा सोचेछी या हमरा परमेश्वरोक करवा कोहची, वहा से बढ़े वहाँय काम करछे। २१ अला मंडली आर यीशु मसीहार जरियाय परमेश्वरेर बड़ाई पीढ़ी से पीढ़ी आर युग-युग तक होते रहोक।

विश्वासी लोकेर एकजुट

४ वहीलाते मुई जे प्रभु यीशुर तने कैदी छी, तुमसार ठिन बिनती करछी कि जैडा मकसद से परमेश्वर तुमसाक अपना लोक हवार तने बुलाहे, वही मकसद मुताबिक जीवन बिताव। २ तुम्हरा नरम दिलवाला आर भद्र बनो। आर धीरज धरे प्रेम से एक-दोसराझनार सहय लव। ३ पवित्र आत्मा तुमसाक जोड़े एक करे दिहे। एक-दोसराझनार साथे मिले एक हंय रहवार कोशिश करो। ४ एकटा बदन छे, एकटा आत्मा छे, एकटा उम्मेद छे, जहार तने परमेश्वर तुमसाक बुलाहे। ५ एकझन प्रभु छे, एकटा विश्वास छे, एकटा बपतिस्मा, ६ आर सिरिफ एकझन परमेश्वर

छे, आर वहाँय सभारो पिता छे। वहाँय सभारो मालिक छे आर हमसार जरियाय काम करछे, आर सभारो दिलोत रोहचे।

विश्वासी लोकोक आत्मिक दान

७ मगर यीशु मसीहा दिल खोले हमसाक हरेकझनाक वही किसम दान दिहे, जैकिसम वहाँय दुवा चाहचिले। ८ जैकिसम कि परमेश्वरेर शास्त्रोत लिखाल छे, “जैखुना वहाँय उपरोत उठिल, वहाँय अपना साथे बहुतला कैदीक ले गेल, लोकोक बहुत दान दिले।” ९ “वहाँय उपरोत उठिल” यहार की मतलब छे? इडार मतलब छे कि वहाँय धरतीर नीचानोत नाभिले। १० वहाँय नीचानोत नाभिले, वहीं सब कुछ पूरा करवार तने आसमानेर आढ़ो उपरोत चले गेल, जसे कि पूराडा आसमान आर पूराडा दुनियाँ वहार शक्ति से भरे जाय। ११ आर वहाँय कुछ लोकोक मसीह-दूत हवार दान दिले, कहाको कहाको नबी हवार दान दिले, कहाको खुश-खबरीर प्रचारक हवार दान दिले, आर कुछ लोकोक मंडलीर पादरी हवार दान दिले, आर कुछ लोकोक वचनेर शिक्षक हवार दान दिले। १२ वहाँय इकिसम करिल जसे कि परमेश्वरेर लोक खाँटी बने आर प्रभुर काम करवार तने तैयार हंय जाय, जसे कि मंडलीर तरक्की होय। १३ परमेश्वर चाहचे कि हमरा विश्वासोत आर वहार बेटार ज्ञानोत एक हंय जई, आर पूरा पक्का हंय जई। आर यीशु मसीहा जैकिसम छे, हमरा वही किसम बने जई। १४ मगर हमसाक

छोटो छुवार मान्दी कमजोर नी हवा लागे। हमसाक लोकेर हर किसमेर गलत शिक्षा से इधर-उधर बहके जवा नी लागे। जैखुना लोक अपना गलत शिक्षा से हमसाक फँसवार कोशिश करे त हमसाक फँसवा नी लागे। १५ हमरा बल्के प्रेम से यीशु मसीहार बारे सच्चा बात बोलमु। आर सब बातोत बढ़ते-बढ़ते यीशु मसीहार मान्दी होमु। क्योंकि वहीं बदनडार यानी मंडलीर माथा छे। १६ मसीहार लोकला वहार बदन छे आर वहाँय उसार माथा छे। आर वहाँय सभाको मजबूती से बान्हें राखिहे। माथार जरियाय हर एकटा अंग जैखुना ठीक से काम करछे, उखुना गोटेंडा बदन बढ़छे आर प्रेमोत अपना-आपोक तैयार करछे।

विश्वासी लोकेर नया स्वभाव

१७ वहीलाते मुई तुमसाक कोहची आर मसीहार तरफ से बेसी जोर दे कोहची, गैर-यहूदीला जैकिसम बेकार सोच बिचारोत अपना जीवन बिताछे, तुम्हरा आर उकिसम जीवन ना बितायेन। १८ आर उसार मनला अन्हारोत पोड़े छे। उसार मनला पत्थलेर मान्दी सक्कत हंय जवार कारण से वरा परमेश्वरेर बारे कुछु नी जाने, वहीलाते परमेश्वरेर देयाल जीवन से वरा बहुत दूरोत छे। १९ उसार विवेक भ्रष्ट हंय जवार कारण से वरा लुच्चागिरीत लागे गहे, जसे कि वरा गंदा सोच-बिचार से सब किसमेर गंदा काम करवा पारे। २० मगर जैखुना तुम्हरा मसीहार बारे सीखीलेन, तुम्हरा इकिसम खराब जीवन बितवार तने नी सीखेन।

२१ तुम्हरा मसीहार बारे जरूर सुनिहेन, आर वहार साथे मिले जवार
कारण वहार बारे जैडा शिक्षा पाहेन, उडा शिक्षा की यीशुर सच्चाई
मुताबिक छे। २२ तुम्हरा पुराना स्वभाव छोड़े दव, जैडा स्वभाव तुमसार
पुरानाडा जिन्दगीत छिले। २३ नया स्वभावोक कपड़ार मान्दी पिन्हें लव।
२४ आर अला तुमसाक एक नया किसमेर जीवन बितवा लागे। तुमसाक
परमेश्वरेर मान्दी हवार तने बनाल गहे, आर वहीलाते तुम्हरा
परमेश्वरोक खुश करो आर सच्चा रूप से पवित्र बनो। २५ वहीलाते
तुम्हरा झूठ बोलवा छोड़े दव। हर एकइन अपना पड़ोसीर साथे सच
बात बोलो, क्योंकि हमरा सबकोय एकेडा बदनेर साथे जोड़ाल छी।
२६ तुम्हरा गोस्सा करवा पारेन, मगर पाप ना करेन। बेलाडा डुबवार
पहिले तुमसार गोस्सा खतम हंय जवा लागे। २७ तुम्हरा शैतानोक कोय
मौका ना देन। २८ चूरी करनेवाला आर चूरी ना करोक, बल्के भला काम
करवार तने अपना हाथ दे मेहनत करो, जसे कि जरूरतमंद लोकेर मदद
करवा पारेन। २९ कोय गंदा बात तुमसार मुख से ना निकलोक, मगर
जरूरत मुताबिक वहीला बात बोलो, जैला से लोकेर तरक्की होय आर
सुननेवालार पैदा होय। ३० परमेश्वरेर पवित्र आत्माक दुःख ना दव
क्योंकि पवित्र आत्मा तुमसार पर अपना मोहर लगाहे कि परमेश्वर एक
दिना हमसाक इडा बुरा दुनियाँ से आजाद करबे। ३१ सब किसमेर
नफरत, गोस्सा, झगड़ा, गाली-गलोज आर सब किसमेर हिंसा तुमसार

लिकिन से दूर हंय जाय। ३२ एकझन-दोसराझनार पर दया करो आर मेहरबान बनो। आर जैकिसम परमेश्वर यीशु मसीहार जरियाय तुमसार कसूर माफ करे दिहे, वही मान्दी तुम्हराव एक-दोसराझनार कसूर माफ करे दोव।

रोशनीर बेटा-बेटी

५ वहीलाते तुम्हरा परमेश्वरेर पीछू-पीछू चलो क्याँकि तुम्हरा परमेश्वरेर बेटा-बेटी छेन। परमेश्वर तुमसाक प्रेम करछे। २ मसीहार मान्दी तुम्हरा प्रेम से जीवन बिताव। मसीहा हमसाक प्रेम करिल, आर हमसार तने परमेश्वरेर लिकिन मोहकाल बलिदान बने गेल आर परमेश्वरोक खुश करे दिले। ३ तुमसार बीचोत व्यभिचारेर बात आर कोय किसमेर गन्दा कामेर बात, या लालचेर बात एकदम नी हवा लागे क्याँकि व्यभिचार, गंदा काम आर लालच करना परमेश्वरेर लोकेर तने उचित बात नी छे। ४ आर ना बेशरमेर आर ना मुखेरेर बातचीत, ना हँसी-मजाकेर बातचीत होक क्याँकि इकिसमेर बातचीत तुमसाक नी छजोछे, बल्के इलार बदले तुमसार मुख से परमेश्वरेर बड़ाई सुनाल जाक। ५ तुम्हरा जानेन कि व्यभिचार करनेवाला, या अशुद्ध लोक या लोभी लोक, जैला मूर्ति पूजा करनेवालार मान्दी छे, वरा मसीहार आर परमेश्वरेर राजोत ठुक्वा नी पारबे। ६ कोय तुमसाक इकिसम खराब काम करवार तने बहकाय

ना दे, क्योंकि यहीलार कारण परमेश्वरेर हुकूम नी माननेवाला लोकेर पर परमेश्वरेर कहर पोड़छे। ७ वहीलाते तुम्हरा उकिसम लोकेर साथे उठा-बठा ना करेन, ८ क्योंकि एक समय तुम्हरा अन्हारोत छिलेन, मगर अला प्रभुर यीशु मसीहार पर विश्वास करवार कारण से रोशनीत छेन। वहीलाते रोशनीर बेटा-बेटीर मान्दी चाल चलो। ९ क्योंकि रोशनीर फल लोकेर भलाई करना, परमेश्वरेर मुताबिक चलना आर सच्चाई से जीवन बिताना छे। १० आर जैला बात से प्रभु खुश होचे, वहीला सिखवार कोशिश करो। ११ अन्हारेर जैला काम छे, उला कामोत हिस्सा ना लेन, बल्के उला कामेर बारे लोकेर लिकिन खोले कोहय दव कि उला काम बेकार छे। १२ क्योंकि जैला काम वरा छुपाय करछे, उला बात बोलवार लायक नी छे आर शरमेर बात छे। १३ जब सबला चीजोक रोशनीर सामनात अनाल जाछे, तब चीजखानेर सच्चाईडार बारे मालूम हंय जाछे। १४ यही तने प्रभु कोहचे, “तुम्हरा जैला लोक निनाय छेन, तुम्हरा जागे जाव, आर मुर्दा से जिन्दा हंय जाव, तब यीशु मसीहार उजाला तुमसार पर चमकिबे।” १५ वहीलाते ध्यान से देखो कि तुम्हरा कुन किसम चाल चलछेन। बोका लोकेर मान्दी ना चलेन, बल्के बुद्धिमान लोकेर मान्दी चलो। १६ हरेकटा मौकार सही इस्तेमाल करो, क्योंकि समय बहुत खराब छे। १७ वहीलाते बोका ना होयेन, बल्के मन लगाय समझे लव कि प्रभुर इच्छा की छे। १८ मोद खाय मतवाला ना होयेन,

क्याँकि इडा से लुच्चागिरी होचे, बल्के तुम्हरा परमेश्वरेर आत्मा से भरपूर हंय जाव। १९ तुम्हरा अपना बीचोत भजन-कीर्तन आर परमेश्वरेर आत्मार देयाल गीत गाते रोहेन, आर पूरा दिल से प्रभुर आगुत हरखुना गाते आर कीर्तन करते रोहेन। २० आर सब चीजेर तने प्रभुर यीशु मसीहार नामे पिता परमेश्वरेर शुकुरिया करते रहव। २१ यीशु मसीहाक इज्जत करवार कारण से एक-दोसराझनार अधीनोत रहव।

पति आर पत्नी

२२ पत्नीला, तुम्हरा अपना-अपना पतिर बशोत रहव, जैमान्दी प्रभुर बशोत रोहचेन। २३ क्याँकि पति पत्नीर मालिक छे, जैमान्दी यीशु मसीहा मंडलीर मालिक छे, आर उडा मंडली यीशु मसीहार बदन छे। आर वही मंडलीर बचानेवाला छे। २४ मगर जे मान्दी मंडली यीशु मसीहार अधिकारोत छे, वही मान्दी पत्नीलाको हर एकटा बातोत अपना-अपना पतिर अधिकारोत रहवा लागे। २५ मुई पतिलाको कोहची कि तुम्हरा अपना-अपना पत्नीक प्रेम करो, जैमान्दी मसीहा मंडलीक प्रेम करिहे। आर मसीहा अपना-आपोक मंडलीर तने दे दिहे २६ जसे कि जैकिसम लोक पानी से गंदगी धोय दिछे, वही किसम वहाँय मंडलीक वचन से धोय पवित्र आर शुद्ध करे दे। २७ आर मंडलीक इकिसम चमकदार मंडली बनाबे, जैडात ना कोय दाग, ना कलंक या ना कोय खराबी रोहबे, बल्के उडा पवित्र आर निर्दोष होबे। २८ ठीक यही मान्दी

इडा उचित छे कि पति लोकलाक अपना-अपना पत्नीलाक अपना बदनडार मान्दी प्रेम करो। जहाँय अपना पत्नीक प्रेम करछे, वहाँय अपना-आपोक प्रेम करछे। २९ क्योंकि कोय अपना बदनडा से दुश्मनी नी करछे, बल्के उडार देखभाल करछे, जैकिसम यीशु मसीहा मंडलीर साथे प्रेम करछे। ३० कारण हमरा वहार बदनेर अंग छी। ३१ परमेश्वरेर शास्त्र बताछे, “यही तने लोक अपना माता-पिताक छोड़े अपना पत्नीर साथे मिलाल रोहबे, आर वरा दोनोंइन मिले एकटा बदनेर मान्दी होबे।” ३२ इडा कठिन बात छे आर समझते दिक्कत छे। मगर मुई तुमसाक बताछी कि इडा यीशु मसीहार आर वहार लोकेर सम्बन्धेर बारे बोलछे। ३३ वहीलाते तुम्हरा हर एकइन अपना पत्नीक अपना बदनेर मान्दी प्रेम करेन, आर पत्नीलाव अपना पतिक इज्जत करेन।

माँ-बाप आर बाल-बच्चा

६ हे मोर छुवाला, क्योंकि तुम्हरा प्रभु यीशु मसीहार पर विश्वास करछेन, वहीलाते तुम्हरा अपना माँ-बाफेर हुकूम मानेन, क्योंकि इकिसम करना तुमसार तने उचित छे। १ क्योंकि परमेश्वरेर वचनोत लिखाल छे, “तुम्हरा अपना माँ-बाफेर इज्जत करेन, इडा पहिला हुकूम छे, जैडार साथे परमेश्वरेर वादा जुड़ाल छे ३ जसे कि तुमसार भला हंय, आर तुम्हरा दुनियाँत बहुत दिन तक जिन्दा रहवा पारेन।” ४ हे मोर भा-

बहिनला, तुम्हरा जहाँय बाल-बच्चा वाला छेन, तुम्हरा अपना छुवालाक गुस्सा ना दिलायेन, मगर प्रभु जैकिसम चाहचे वही मुताबिक छुवालार शासन करेन, आर प्रभुर शिक्षा मुताबिक उसार लालन-पालन करेन।

मालिक आर सेवक

५ हे भा-बहिनला, तुम्हरा जहाँय लोकेर गोलाम छेन, इडा दुनियाँत तुमसार मालिक छे। जैमान्दी तुम्हरा सीधा दिल से यीशु मसीहार हुकूम मानछेन, वही मान्दी अपना मालिकलारो हुकूम मानो। ६ सिरिफ लोकोक खुश करवार तने सेवा ना करेन, बल्के अपना-आपोक यीशु मसीहार गोलाम समझे, पूरा दिल से काम करो जसे कि तुम्हरा परमेश्वरेर इच्छा पूरा करवा पारेन। ७ आर अपना सेवार काम खुशी मन से करो, इडा समझे कि तुम्हरा मानुषेर तने नी करछेन, बल्के प्रभुर तने करछेन। ८ क्याँकि तुम्हरा जानेन कि जहाँय अच्छा काम करबे, वहाँय चाहे गोलाम होक, या आजाद होक, प्रभु उसाक इनाम दिबे। ९ हे भा-बहिनला, तुम्हरा जहाँय मालिक छेन, तुम्हराव धमकी दुवा छोड़े दव, आर अपना गोलामेर साथे अच्छा सलूक करो, क्याँकि तुम्हरा जानेन कि गोलामलार आर तुमसार दोनोंझनार मालिक स्वर्गोत छे, आर वहाँय कहारो मुख देखे बिचार नी करछे।

शैतानेर साथे लड़ाई करवार हथियार

१० आखिरोत मुई कोहची कि तुम्हरा प्रभुर साथे मिले रहव, आर वहार महाशक्ति से अपना-आपोक ताकतवर बनाते जाव। ११ परमेश्वरेर देयाल लड़ाईर सबला चीजोक पिन्हें लव, जसे कि तुम्हरा शैतानेर सबला चालाकीर आगुत टिके रहवा पारेन। १२ क्योंकि हमसार लड़ाई मानुषेर साथे नी छे, बल्के हमसार लड़ाई हमसा से छुपाल आसमानेर सब बुराई करनेवाला शक्ति आर सब दुष्ट आत्मार शक्तिर साथे छे। १३ वहीलाते तुम्हरा परमेश्वरेर देयाल लड़ाईर सबला चीज पिन्हें अपना-आपोक तैयार करे लव, जसे कि तुम्हरा तकलीफेर दिनोत मुकाबिला करवा पारेन। आर आखिर तक लड़ाई करे टिके रहवा पारेन। १४ वहीलाते कमरोत पिन्हवार बेल्टेर मान्दी सच्चाईक पिन्हें लव, बुक पट्टार मान्दी सच्चा धर्मी जीवनोक पिन्हें लव। १५ जैकिसम सैनिकला जूता पिन्हें तैयार रोहचे, वही मान्दी तुम्हराव शान्तिर खुश-खबरीक प्रचार करवार तने तैयार रहव। १६ इलार साथे-साथे प्रभुर पर अपना-अपना विश्वास राखो। जैकिसम ढाल सैनिकोक खतरनाक तीर से बचाछे, वही किसम तुमसार विश्वास तुमसाक दुष्ट शैतानेर तेज आगिनवाला तीर से बचाबे। १७ विश्वास राखो कि परमेश्वर तुमसाक बचाहे आर बचाबे, जैकिसम हेलमेट सैनिकेर माथाक बचाछे। परमेश्वरेर वचनोक अपनाय लव, जैडा कि पवित्र आत्मार तलवार छे। १८ हरखुना

आत्मार मदद से प्रार्थना आर बिनती करते रोहेन। प्रार्थना करवार तने तैयार रोहेन कि तुम्हरा सबला विश्वासी लोकेर तने लगातार प्रार्थना करवा पारेन। १९ आर मोहरो तने प्रार्थना करेन कि परमेश्वर मोक बोलवार इकिसम शक्तिशाली वचन दे कि मुई हिम्मत से खुश-खबरीर भेदेर बातलाक प्रचार करवा पारी। २० यही कारण से मुई जंजीर से बन्हाल एकझन परमेश्वरेर राजदूत छी। मुई यहीडा चाहची कि मोक जैकिसम बोलवा लागे, वही किसम बोलवा पारी।

आखरी सलाह आर नमस्कार

२१ तुखिकुस, जहाँय मोर प्यारा भई आर प्रभुर तने एकझन विश्वासेर लायक प्रभुर सेवक छे, तुमसाक सबला बात बताबे, जसे कि तुम्हरा मोर बारे जनवा पारेन कि मुई कुन किसम करे रोहछी। २२ वहाक मुई तुमसार लिकिन पठानु जसे कि तुमसाक हमसार हालतेर बारे बताय दे, आर वहाँय तुमसार दिलोत शान्ति दे। २३ मुई प्रार्थना करछी कि पिता परमेश्वर आर प्रभु यीशु मसीहा हमसार सबला विश्वासीक शांति, प्रेम आर विश्वास दे। २४ अला प्रार्थना करछी कि जतेला लोक हमसार प्रभु यीशु मसीहाक सच्चा दिल से प्रेम करछे, उसार सभारो पर परमेश्वरेर दया होते रोहोक।

फिलिप्पी शहरेर मंडलीक पौलुसेर चिट्ठी

१ फिलिप्पी शहरेर मसीहा यीशुर पवित्र लोकला, मंडलीर नेताला आर मंडलीर सेवकला, मुई पौलुस छी आर मोर साथे तिमोथी छे। हमरा यीशु मसीहार सेवक छी। हमरा तुमसाक इखान चिट्ठी लिखछी।
२ हमसार पिता परमेश्वर आर प्रभु यीशु मसीहार तरफ से तुमसाक दया आर शान्ति मिलते रोहोक।

पौलुसेर प्रार्थना आर शुकुरिया

३ मुई जैखुना-जैखुना तुमसाक याद करछी, उखुना मुई तुमसार तने परमेश्वरेर शुकुरिया करछी। ४ आर जैखुना भी मुई तुमसार तने प्रार्थना करछी, त हरखुना खुशीर साथे प्रार्थना करछी ५ क्याँकि पहिला दिन से ले आजतक तुम्हरा खुश-खबरीर प्रचारेर कामोत मोर साथी छिलेन। ६ मोक इडा बातेर विश्वास छे कि परमेश्वर जहाँय तुमसार बीचोत जैखान अच्छा कामोक शुरू करिहे, वहीं उखान कामोक यीशु मसीहार घुरे ओसवार दिन तक पूरा करबे। ७ इडा उचित छे कि मुई तुमसार बारे यही मान्दी सोच-बिचार राखी क्याँकि तुम्हरा मोर बहुत प्यारा छेन।

जैखुना मुई जेलोत छिनु, जैखुना खुश-खबरीर सच्चाईडाक लोकोक बताछिनु, आर खुश-खबरीर प्रमाण दिछिनु, तुम्हरा हरखुना मोर साथे परमेश्वरेर दयार भागी छिलेन। ८ परमेश्वर मोर गवाह छे कि जैकिसम प्रभु यीशु मसीहा तुमसाक प्रेम करछे, वही किसम मुई तुमसाक प्रेम करछी, आर तुमसाक देखवार तने मुई बेचैन छिनु। ९ मुई प्रार्थना करछी कि तुमसार भीतरोत प्रेम, ज्ञान आर सब किसमेर समझ-बुझेर बात बढ़ते जाय, १० आर तब तुम्हरा अच्छा बातोक चुनवा पारभेन, आर यीशु मसीहार घुरे ओसवार दिन तक तुम्हरा बेकसूर आर पवित्र जीवन बितवा पारेन। ११ तुमसार जीवनडा अच्छा गुण से भरे जाक, जैडा गुण सिरिफ यीशु मसीहा दुवा पारे, जसे कि परमेश्वरेर बढ़ाई आर तारीफ होय।

पौलुसेर कैद से खुश-खबरीर तरक्की

१२ भा-बहिनला, मुई चाहची कि तुम्हरा इडा बात जाने लेन कि मोर पर जे कुछ गुजरिल, उलार जरियाय खुश-खबरीर प्रचारेर काम बढ़े गेल। १३ यहार चलते रोम देशेर महाराजार महलेर सबला फौज आर बाँकी सबला लोकोक मालूम हंय गेल कि मुई यीशु मसीहार प्रचार करवार कारण से कैदी छी। १४ आर जैखुना मोक कैद करे जेलोत दे दिले, त उखुना बेसी से बेसी भा-बहिनला प्रभुर पर भरोसा करिल, आर बिना डोर-भय आर हिम्मत से परमेश्वरेर वचन सुनाल। १५ कुछुला लोक यीशु

मसीहार प्रचार जलन-हिंसा आर झगड़ा करवार मकसद से करिल,
मगर कुछुला लोक अच्छा नियत से करिल। १६ वरा अच्छा नियत से
प्रचार करछे क्योंकि वरा मोक प्रेम करछे आर जाने कि मोक खुश-
खबरीर बचाव करवार तने रखाल गहे। १७ आर जैला लोक अच्छा नियत
से प्रचार नी करछे, वरा जलन-हिंसा आर झगड़ा करवार मकसद से
प्रचार करछे क्योंकि वरा मोक जेलखानात बेसी तकलीफ दुवा चाहचे।
१८ इडा से मोक कोय फरक नी पोरछे। कीमती बात इडा छे चाहे त
बहना से होक, चाहे सच्चा दिल से होक, सब पाके वरा मसीहार बारे
प्रचार करछे आर वहीडार कारण से मुई खुशी मनाछी। १९ क्योंकि मुई
जानी की तुमसार प्रार्थना आर यीशु मसीहार मदद से, मुई कैद से छुटे
जामु। २० मुई मोर पूरा दिल से उम्मेद करछी कि मसीहार इज्जत करते
मुई बिल्कुल शरमिन्दा नी होई। जैकिसम पहिले मसीहार इज्जत
करछिनु, अलाव वही मान्दी पूरा हिम्मतेर साथे मसीहार इज्जत करछी,
चाहे मुई मोरी या चाहे जिन्दा रोही। २१ क्योंकि मोर तने जिन्दा रहना
मसीह छे, आर मोरे जाना लाभ छे। २२ अगर मुई जिन्दा रही, त मुई
अपना मेहनत से मसीहार तने फल आनमु। मगर मुई कुनडाक चुनुम?
जिन्दगी ना मौत, मुई कहवा नी पारछी। २३ क्योंकि मुई दोनोंडार बीचोत
लटकाल छी। दिलडा चाहचे कि मुई दुनियाँ से चले जई, आर मसीहार
साथे रही, क्योंकि इडा बात अच्छा छे। २४ मगर बदनडात मोक जिन्दा

रहना तुमसार फैदार तने बेसी जरूरी छे। ^{२५} इडा बातेर पर पूरा विश्वास छे, आर मुई जानछी कि मुई जिन्दा रोहमु आर तुमसार साथे रोहमु जसे कि तुम्हरा परमेश्वरेर पर बेसी से बेसी विश्वासोत मजबूत होते रहेन, आर वहार पर भरोसा करवार कारण खुशी मनायन। ^{२६} आर जैखुना मुई तुमसार लिकिन घुरे ओसमु, तुम्हरा मोर कामेर कारण मसीहा यीशु पर बेसी से बेसी घमंड करभेन। ^{२७} सबसे खास बात इडा छे कि तुमसार चाल-चलन यीशु मसीहार खुश-खबरीर मुताबिक होय। मुई तुमसार लिकिन जई या नी जई, मगर तुमसार बारे सुनवा पारी कि तुम्हरा एकटा आत्मात टिके छेन, आर एक मन हंय खुश-खबरीर विश्वासेर तने मेहनत करछेन। ^{२८} यहीडा सुनवा पारी कि तुम्हरा बिरोध करनेवाला से नी डोराछेन। इडा से उसाक मालूम होबे कि वरा बर्बाद हंय जाबे, मगर तुम्हरा बचे जाभेन। परमेश्वर छे, जहाँय इला सबला करबे। ^{२९} क्योंकि यीशु मसीहार कारण तुमसार पर इडा दया होये कि तुम्हरा मसीहार पर सिरिफ विश्वासे ना करेन, बल्के वहार तने दुःखो उठायेन। ^{३०} आर तुमसाक वही मान्दी मेहनत करवा होबे, जैकिसम कि तुम्हरा मोक करते देखिहेन आर सुनछेन कि मुई वही मान्दी मेहनत करछी।

विश्वासी लोकेर स्वभाव

२ मसीहार साथे जुड़े जवार कारण अगर तुमसाक कुछ शांति मिलछे, आर वहार प्रेम से तसल्ली मिलछे, पवित्र आत्मार साथे संगति छे, आर परमेश्वरेर दया मिलछे आर परमेश्वर तरस खाचे, २ त तुम्हरा मोर इडा खुशीक पूरा करे दोव कि तुम्हरा एक मन से रहव, एक प्रेमोत चलो, एके किसमेर सोच-बिचार आर एके किसमेर मनसुबा राखे चलो। ३ कोय काम स्वार्थेर आर झूठा बड़ाईर तने ना करेन, मगर अपना-आपोक छोटा बनाय दोसराझनाक अपना से बोड़ो समझेन। ४ तुम्हरा हर एकझन सिरिफ अपनारे फैदारे तने ना सोचेन, बल्के दोसराझनारो फैदार तने सोचेन। ५ मसीहा यीशुर स्वभाव जैकिसम छिले, वही किसम स्वभाव तुमसारो होक। ६ वहाँय परमेश्वरेर मान्दी छिले, ताहरो पर वहाँय अपना हाथोत उडा अधिकारोक नी राखिल। ७ मगर अपना-आपोक खाली करे दिले, आर वहाँय मानुष बने नौकरेर मान्दी हंय गेल। ८ आर मानुष बने अपना-आपोक छोटो बनाय दिले, आर वहाँय इकिसम हुकूम माननेवाला बने गेल कि वहाँय क्रुसेर मौतो सहय लिले। ९ यही तने परमेश्वर वहाक बहुत महान बनाय दिले, आर वहाक इकिसम नाम दिले, जैडा नाम सब नाम से बोड़ो छे, १० जसे कि जैला लोक स्वर्गोत आर दुनियाँत आर दुनियाँर नीचानोत छे, सबकोय यीशु मसीहार नाम सुने हटुवा पारे वहाक प्रणाम करे। ११ आर पिता परमेश्वरेर बड़ाई

करवार तने हर एकटा जीभा सभारो सामनात इडा कोहबे कि सिरिफ यीशु मसीहा प्रभु छे।

दुनियाँत तारार मान्दी चमको

१२ वहीलाते मोर प्यारा भा-बहिनला, तुम्हरा जैकिसम सबखुना हुकूम माने ओसिहेन, वही मान्दी अलाव सिरिफ मोर आगुत नी बल्के मोर गैर-हाजरीत आढ़ो बेसी से हुकूम मानो। परमेश्वर तुमसाक बचाहे, वहीलाते तुम्हरा डोराय आर काँपते-काँपते उला काम करो, जैला परमेश्वरेर नजरोत अच्छा छे। १३ क्याँकि परमेश्वर तुमसार बीचोत अपना खुशीर तने अच्छा आर खुशीर काम शुरू करिहे। १४ सबला काम बिना शिकायत करे आर बिना बहस बाजीर साथे करो, १५ जसे कि तुम्हरा बेकसूर आर खाँटी हवा पारेन, आर टेढ़ा आर जिद्दी लोकेर बीचोत परमेश्वरेर बेदाग बेटा-बेटी हवा पारेन, आर उसार बीचोत तारार मान्दी चमकेन। १६ जीवन देनेवाला वचनोक उसाक सुनाते रहव, आर तब यीशु मसीहार घुरे ओसवार दिनोत मुई घमंड करवा पारी कि तुमसार बीचोत मोर मेहनत करना बेकार नी होय। १७ अगर तुमसार विश्वासेर बलिदान आर सेवार साथे मोक अपना खूनो बहवा होय, तहारो पर मुई खुश छी, आर तुमसार साथे खुशी मनाछी। १८ आर यही मान्दी तुम्हराव खुश रहेन, आर मोर साथे खुशी मनाव।

प्रभुर दुईइन सेवक, तिमोथी आर इपफ्रुदीतुस

१९ यीशु मसीहार मदद से मोक इडा उम्मेद छे कि मुई तिमोथीक तुमसार ठिन जल्दी पठाय दुम, आर तब तुमसार खबर सुने मुई खुशी हवा पारी।
२० मोर साथे वहार मान्दी आर कोय लोक नी छे, जहाँय खाँटी दिल से तुमसार चिन्ता करे। २१ क्याँकि सबकोय अपना पैदार फिकिरोत रोहचे, यीशु मसीहार फिकिरोत नी। २२ मगर तुम्हरा त वहाक जाँच करे देखे लिहेन कि जैमान्दी एकइन बेटा अपना बाफेर साथे मिले चलछे, वही मान्दी तिमोथी खुश-खबरीर प्रचारेर कामोत मोर साथे मेहनत करिहे।
२३ वहीलाते मुई उम्मेद करछी कि जतेक जल्दी मोक मालूम होबे कि मोर की दशा होबे, तत्तेक जल्दी मुई तिमोथीक पठाय दुम। २४ आर प्रभु मसीहार नामे मोक उम्मेद छे कि मुई खुद जल्दी करे तुमसार ठिन ओसे जाम। २५ भई इपफ्रुदीतुसोक तुमसार लिकिन पठाना जरूरी समझेछी। वहाँय मोर सहकर्मी आर इखान कामेर तने लड़नेवाला फौजेर मान्दी मोर साथी छे। वहाँय तुमसार तरफ से मोर तने एकइन दूत छे, जहाक तुम्हरा मोर जरूरतेर समय मोक मदद करवार तने पठाहिलेन। २६ क्याँकि तुमसाक देखवार तने वहार मोनडा उठाल छिले, आर बहुत बेचैन छिले, क्याँकि तुम्हरा वहार बेमारीर खबर पाहिलेन।
२७ हाँ, वहाँय सचमुचोत बेमार छिले, इकिसम कि मोरवार मान्दी हंय गहिले। मगर परमेश्वर वहार पर दया करिहिले, आर खाली वहारे पर

नी, बल्के मोहरो पर करिहिले। नीते मोर पर दुःखेर पर दुःख होते रोहिलतेन। २८ मुई वहाक पठवार तने मोर बेसी इच्छा छिले, जसे कि तुम्हरा वहाक आरमने देखे खुशी मनवा पारेन आर मोर दुःख कम हंय जाय। २९ वहीलाते वहाक प्रभुर नामे बहुत खुशीर साथे ग्रहण करेन, आर इकिसम लोकेर इज्जत करवा लागे। ३० क्याँकि यीशु मसीहार कामेर चलते भई इफ्रुदीतुस लगभग मोरे गहिले। वहाँय मोर तने उखान काम पूरा करिल, जैखान तुम्हरा करवा नी पाहिलेन।

परमेश्वरेर सच्चा लोक

३ आखिरोत, हे मोर प्यारा भा-बहिनला, मुई कोहची कि प्रभुर नामे खुशी मनाव। तुमसार लिकिन इला बात लिखते मोक कोय तकलीफ नी होचे, आर तुमसाक हुँसियार करे दुवार तने इडा अच्छा छे। २ जैला लोक विश्वासीलाक सुन्नत करवार तने जोर-दबरदस्ती करछे, उला कुत्ता से हुँसियार रहेन। उला खराब काम करनेवाला लोक छे। ३ क्याँकि हमराय त परमेश्वरेर सच्चा लोक छी। हमरा परमेश्वरेर आत्मार मुताबिक परमेश्वरेर भक्ति करछी आर यीशु मसीहार नामे घमंड करछी, मगर बदनडार पर घमंड नी करछी। ४ मगर मुई त बदनडारो पर घमंड करवा पारी। अगर कहाको अपना बदनडार पर भरोसा करवार बिचार छे, त मुई वहा से बढे अपना बदनडार पर भरोसा

करवा पारी। ५ जन्मेर आठवाँ दिनोत मोर सुन्नत होल, इजराएली लोकेर बिन्यामिन वंशोत मोर जनम होल। इब्रानी लोकेर भीतरोत मुई इब्रानी छी। अगर नियम-कानूनेर बारे पूछे, त मुई फरीसी पंथेर छी। ६ अगर जोशेर बारे कोय बोले, त मुई मंडलीक सतानेवाला छिनु, आर नियम-कानूनेर मुताबिक धर्म पालन करवार बारे पूछे त मुई बेकसूर छिनु। ७ तहारो पर जैला बात मोर फैदार तने छिले, उला सबला बातोक मुई यीशु मसीहार पर विश्वास करवार कारण से नुकसान समझेछी। ८ यहार बदले मुई यीशु मसीहाक चिन्हे लुवार कारण से सबला चीजोक छोड़े दिनु आर उलाक मुई कूड़ा-कचड़ार मान्दी समझेछी, जसे कि मुई यीशु मसीहाक हासिल करवा पारी, ९ आर जसे कि मुई पूरापूरी यीशु मसीहार साथे जुड़े जई। इडा नी कि नियम-कानून मुताबिक चलवार कारण परमेश्वर मोक धर्मी बनाय दिले, मगर यीशु मसीहार पर विश्वास करवार कारण परमेश्वर मोक धर्मी बनाहे। १० मुई मसीहाक आढ़ोह बेसी जनवा चाहची, आर मुई परमेश्वरेर उ-शक्तिक जनवा चाहची जे शक्ति से वहाँय मसीहाक मुर्दा से जिन्दा करिल। मुई दुःख-तकलीफ सहवार जरियाय वहार साथे सहभागिता करवा चाहची, क्योंकि वहाँय मोर तने दुःख उठाहे। मुई अपना मौतेर जरियाय वहार मान्दी हवा चाहची। ११ मुई उम्मेद करछी, परमेश्वर जैला लोकोक जिन्दा करबे, उसार बीच से मुई एकझन होमु।

इनाम पवार तने दौड़ो

१२ यहार इडा मतलब नी छे कि मुई पाय गही, या खाँटी बने गही, बल्के उखान चीजोक धोड़वार तने दौड़े जले जाछी, जैखान चीजेर तने यीशु मसीहा मोक अपना बनाय लिहे। १३ हे मोर भा-बहिनला मोर मतलब इडा नी छे कि मुई पाय गही, मगर सिरिफ एकखान काम करछी कि जैला बात बिते गहे, उला बातोक भूले जाछी, आर ओसनेवाला बातेर भीति बढ़ते जाछी। १४ आर निशानार भीति दौड़े चले जाछी, जसे कि मोक उडा इनाम मिले जाय, जैडाक लुवार तने परमेश्वर मोक मसीहार जरियाय स्वर्गोत बुलाहे। १५ हमसार बीचोत जैला लोक खाँटी छे, उसाक यही मान्दी सोच-बिचार रखवा लागे, आर अगर कहारो कोय चीजेर बारे दोसरा किसमेर बिचार छे, त परमेश्वर उडार बारे तुमसाक बताबे। १६ वहीलाते ओसो, जैडा नियम मुताबिक अभी तक हमरा चलते ओसिही, वहीडा नियम मुताबिक हमरा आगु बढ़ते रहई। १७ हे मोर भा-बहिनला, तुम्हरा सबकोय मिले मोर मान्दी चलो। मुई तुमसार सामनात एकटा नमूना दिही। वही नमूना मुताबिक जैला लोक चलछे, उसार लिकिन से सीखो। १८ मुई तुमसाक बार-बार बताही, आर अलाव कानते-कानते कोहची। बहुतझन लोक अपना खराब चाल-चलनेर जरियाय देखाछे कि यीशु मसीहा उसार तने क्रुसेर पर नी मोरे, आर वरा दुश्मन बने गहे। १९ उसार आखरी दशा बर्बादी छे। परमेश्वरेर तने उसार

कोय भक्ति नी छे, वरा सिरिफ अपना शरीरे इच्छाक पूरा करवार तने रोहचे। आर अपना शरमेर बातलार पर घमंड करछे आर दुनियाँर बातेर पर मन लगाछे। २० मगर हमसार अपना घर स्वर्गोत छे, आर हमरा अपना मुक्तिदाता प्रभु यीशु मसीहार स्वर्ग से ओसवार इन्तेजार करछी। २१ वहाँय अपना शक्तिर जरियाय सबला चीजोक अपना कब्जात करे लिछे। वही शक्ति से वहाँय हमसार कमजोर बदनडाक बदले अपना महिमा वाला बदनेर मान्दी बनाय दिबे।

४ वहीलाते मोर प्यारा भा-बहिनला, तुमसार पर मोर दिलडा लगाल रोहचे, क्याँकि तुम्हराय मोर माथार मुकुट छेन। तुम्हरा प्रभुर साथे जुड़े टिके रहव।

संसारोत चलवार निर्देश

२ मुई यूओदियाको समझाछी आर सुन्तुखेको समझाछी कि वरा आपसोत एक मन से रोहय। ३ हे मोर सच्चा सहकर्मी, तोहको बिनती करछी कि तुई यूओदिया आर सुन्तुखे स्त्री लोकेर मदद करेक, क्याँकि वरा मोर साथे खुश-खबरीर प्रचारेर कामोत क्लेमेंस आर दोसराला सहकर्मीर साथे मेहनत करिहे। इसार नाम जीवनेर किताबोत लिखाल छे। ४ तुम्हरा प्रभुर साथे मिलाल छेन, वहीलाते खुशी मनाव, मुई फेर कोहची खुशी मनाव। ५ लोकेर साथे इकिसम व्यवहार करो कि लोक

देखे बोले कि तुम्हरा भद्र लोक छेन। प्रभुर ओसवार समय नजदीक छे।
६ कोय बातेर फिकिर ना करो, मगर हर हलतोत परमेश्वरेर लिकिन
प्रार्थना करो। परमेश्वरोक बताव कि तुमसार की जरूरी छे। वहार
लिकिन से मददेर तने प्रार्थना करो, आर परमेश्वरेर शुकुरिया करो।
७ तब परमेश्वरेर शान्ति जैडार बारे समझना कठिन छे, उडा शान्ति
मुसीबतेर खुना तुमसाक हिम्मत दिबे आर चिन्ता करवा नी दिबे क्योंकि
तुम्हरा मसीहा यीशुर लोक छेन। ८ वहीलाते हे मोर भा-बहिनला, जैला-
जैला बात सच छे, आर जैला-जैला बात अच्छा छे, आर जैला-जैला
बात उचित छे, आर जैला-जैला बात पवित्र छे, आर जैला-जैला बात
मन पसंद छे, आर जैला-जैला बात सभारो नजरोत ठीक छे, जैला
अच्छा गुण आर शाबासीर बात छे, उलार पर मन लगाव। ९ जैला बात
तुम्हरा मोर लिकिन से सीखिहेन आर ग्रहण करिहेन, आर सुनिहेन, आर
मोर भीतरोत देखिहेन, वहीलाके माने चलो। तब शान्ति देनेवाला
परमेश्वर तुमसार साथे रोहबे।

दानेर तने शुकुरिया

१० मुई बहुत खुश छी आर प्रभुर शुकुरिया करछी कि अला अते दिन
बाद तुम्हरा मोर तने चिन्ता करिहेन। सचमुचोत तुमसार दिलोत मोर बारे
चिन्ता आगु से छिले, मगर इकिसम करवार तने तुमसाक मौका नी
मिले। ११ मोर घटी-कमीर कारण मुई इला बात नी बोलछी क्योंकि मुई

इडा सीखिही कि मोर जैडा दशा छे, वहीडात संतोष करी। १२ मुई जानी कि तंगी हालतोत कुन किसम करे रहवा लागे, आर मुई जानी कि जैखुना सब कुछ छे, उखुना कुन किसम करे रहवा लागे। हर एकटा बातोत आर हर हालतोत मुई संतोष रहवा पारी। भूखाय रहवा आर भरपेट खाय रहवा सीखिही, आर तंगी हालतोत आर खुशहाल हालतोत रहवा सीखिही। १३ जहाँय मोक शक्ति दिछे, वहार जरियाय मुई सब कुछ करवा पारमु। १४ तुम्हरा अच्छा करलेन कि तुम्हरा मोर तकलीफेर समय मोर मददगार बनलेन। १५ हे फिलिप्पी नगरेर मोर भा-बहिनला, तुम्हरा खुद जानेन कि खुश-खबरीर प्रचारेर शुरू-शुरूत, जैखुना मुई मकिदोनिया से बिदाय लिहिनु, उखुना तुमसाक छोड़े आर कोय मंडली मोक दान नी दे। १६ ठीक यही मान्दी जैखुना मुई थिसलुनिकी शहरोत छिनु, उखुना तुम्हरा मोर घटी-कमीक पूरा करवार तने बहुत बार मदद करिहिलेन। १७ मोर इडा मतलब नी छे कि मुई दान चाहची, मगर मुई देखवा चाहची कि मोक मदद करवार कारण से परमेश्वर तुमसाक बेसी से बेसी आशीर्वाद दे। १८ मोर लिकिन सब कुछ छे, इकिसम कि बहुत बेसी छे। जैला चीजोक तुम्हरा इपफ्रुदीतुसेर हाथे पठाहिलेन, उलाक पाय मुई संतुष्ट हंय गही। उला चीजोत परमेश्वरोक चढ़ाल सुगन्धीर मान्दी छे, जैलाक परमेश्वर पसन्द करछे। १९ मोर परमेश्वरेर लिकिन अपार धन छे। अपना धन से यीशु मसीहार जरियाय वहाँय तुमसार हर

एकटा घटी-कमीक पूरा करबे। २० हमसार पिता परमेश्वरेर बड़ाई युग-युग तक होते रोहोक।

आखरी प्रणाम

२१ जैला भा-बहिन मोर साथे छे, तुमसाक सभाको नमस्कार कोहचे।
२२ खास करे जैला भा-बहिन रोम देशेर महाराजार महलोत काम करछे,
वरा सबकोय तुमसाक सभाको नमस्कार कोहचे। २३ हमसार प्रभु यीशु
मसीहार दया तुमसार आत्मार साथे रोहोक।

कुलुसी शहरेर मंडलीक पौलुसेर चिट्ठी

१-२ कुलुसी शहरेर परमेश्वरेर बफादार विश्वासी भा-बहिनला, मुई पौलुस छी, आर मुई परमेश्वरेर इच्छा से यीशु मसीहार दूत छी। मोर साथे भई तिमोथी छे, आर मुई तुमसार तने इखान चिट्ठी लिखछी। मुई प्रार्थना करछी कि हमसार पिता परमेश्वर तुमसार पर दया करे आर तुमसाक शान्ति दे।

परमेश्वरेर शुकुरिया आर प्रार्थना

३ परमेश्वर हमसार प्रभु यीशु मसीहार पिता छे। जैखुना हमरा तुमसार तने परमेश्वरेर लिकिन प्रार्थना करछी, त हरखुना हमरा परमेश्वरेर शुकुरिया करछी। ४ हमरा परमेश्वरेर शुकुरिया करछी क्योंकि हमरा तुमसार बारे सुनिही कि तुम्हरा यीशु मसीहार पर विश्वास करछेन, आर परमेश्वरेर लोकलाक प्रेम करछेन। ५ तुमसार इडा विश्वास आर इडा प्रेम तुमसार उम्मेदेर पर निर्भर करछे, यानी तुमसाक उला बात पावार उम्मेद छे, जैला बात तुमसार तने स्वर्गोत रखाल छे। जैखुना खुश-खबरी सुनिहिलेने, उखुना तुमसाक इला बातेर बारे बताल गहिले। तुम्हरा उडा उम्मेदर बारे सच्चा खबर यानी खुश-खबरीर जरियाय

सुनिहेन। ६ आर उडा खुश-खबरी तुमसार लिकिन पहुँचे गहे, आर दुनियाँत फैले गहे आर फल आनछे, आर बढ़ते जाछे। इडा खुश-खबरी तुमसार बीचोत उ-दिन से काम करछे, जे दिन से तुम्हरा इडा खुश-खबरीक सुनिहेन। आर तुम्हरा परमेश्वरेर दयार बात समझे लिहेन। ७ आर इडा खुश-खबरीर बात तुम्हरा हमसार प्यारा भई इपफ्रासेर लिकिन से पाहेन। इपफ्रास हमसार तरफ से यीशु मसीहार एकझन ईमानदार सेवक छे, ८ आर यहाँय हमसाक बताहे कि तुम्हरा विश्वासी भा-बहिनलाक प्रेम करछेन, आर इडा प्रेम करवार गुण तुमसाक पवित्र आत्मा दिहे। ९ वहीलाते जे दिन से हमरा तुमसार बारे सुनिही, हमरा तुमसार तने परमेश्वरेर लिकिन प्रार्थना आर बिनती करछी कि परमेश्वर तुमसाक अपना आत्मिक ज्ञान आर समझ से भरे दे जसे कि तुम्हरा परमेश्वरेर इच्छाक जनवा पारेन। १० हमरा प्रार्थना करछी कि तुमसार चाल-चलन प्रभुर नजरोत ठीक हंय जाय, आर परमेश्वर सब बातोत तुमसासे खुश हंय जाय, आर तुमसार भीतरोत हर किसमेर अच्छा कामेर फल देखाल जाय, आर परमेश्वरेर ज्ञान तुमसार अन्दरोत बढ़ते जाय। ११ हमरा प्रार्थना करछी कि परमेश्वर अपना महान अद्भूत शक्ति से तुमसाक मजबूत करते जाछे जसे कि तुम्हरा हरखुना सब कुछ सहय लुवा पारेन। १२ आर खुशी-खुशी पिता परमेश्वरेर शुकुरिया करो क्योंकि परमेश्वर हमसाक उडा राजेर भागीदार बनाहे, जैडा राजेर वारिस वहार

लोकला छे, आर उडा राज रोशनी से भराल छे। १३ परमेश्वर हमसाक अन्हारेर अधिकार से बचाय अपना प्यारा बेटा यीशु मसीहार राजोत आनिहे। १४ परमेश्वर अपना बेटार जरियाय हमसाक आजाद करिहे आर हमसार पाप माफ करिहे।

यीशु मसीहार बड़प्पन आर काम

१५ परमेश्वर, जहाक हमरा देखवा नी पाछी, यीशु मसीहा परमेश्वरेर असली रूप छे। परमेश्वर जताला चीजोक बनाहे, इला सबला से पहिले यीशु मसीहा छिले। १६ वहारे जरियाय सबला चीजोक बनाल गहे, चाहे आसमानेर होक, या धरतीर होक, देखाल चीज होक, या अनदेखा चीज, राजगद्दी होक, या शासन करनेवाला होक, या हाकिम होक। सब कुछ वहारे जरियाय आर वहारे तने बनाल गहे। १७ वहीं सब कुछर भीतरोत पहिला छे, आर सब कुछ वहारे जरियाय कायम छे। १८ विश्वासी लोकेर मंडली एकटा बदनेर मान्दी छे। यीशु मसीहा मंडलीर माथा छे, वहीं शुरूवात छे, आर मुर्दा से जिन्दा होनेवालार बीचोत पहिला छे, जसे कि सबला बातोत वहीं सबसे बोड़ो होय। १९ क्योंकि परमेश्वरोक अच्छा लागिल कि वहार पूरापूरी गुण यीशु मसीहार भीतरोत मौजूद रहय। २० आर मसीहा जैखान खून क्रुसोत बहाईले, उखान खूनेर जरियाय परमेश्वर अपना साथे सब कुछर मेल-मिलाप करे दिले, चाहे उला चीज दुनियाँर होक या फेर स्वर्गेर होक। २१ एक समय

तुम्हरा मंडलीर लोक नी छिलेन आर अपना बुरा सोच-बिचारेर कारण परमेश्वरेर दुश्मन छिलेन, २२ अला वहाँय मसीहार मौतेर जरियाय तुमसार साथे मेल-मिलाप करे लिहे, जसे कि तुमसाक पवित्र, निर्दोष आर बेदाग बनाय परमेश्वरेर आगुत हाजिर करवा पारे। २३ मगर तुम्हरा विश्वासोत मजबूत बनाल रोहेन आर टिके रोहेन। जैखुना तुम्हरा खुश-खबरीक सुनिहिलेन, तुम्हरा उम्मेद पाहिलेन, उडा उम्मेदोक ना छोड़ेन। इडा खुश-खबरीर प्रचार आसमानेर नीचानोत पूराडा दुनियाँत कराल गेल। आर मुई पौलुस उडा खुश-खबरीर प्रचारक बने गही। २४ मुई तुमसार तने जैला दुःख उठाही, उलार तने मुई अला खुशी मनाछी। यीशु मसीहार दुःखोत जे कुछु कमी छिले, उडा दुःख मुई अला मसीहार बदन यानी मंडलीर तने पूरा करछी। २५ आर परमेश्वर अपना वचनोक पूरापूरी प्रचार करवार भार मोक सोंपे दिहे, वहीलाते मुई एकझन प्रचारक बने गही। २६ इडा वचन युग-युग से आर पीढ़ी से पीढ़ी तक छुपाय रखाल गहिले, अला विश्वासी लोकोक बताल गहे। २७ परमेश्वर विश्वासी लोकेर लिकिन इला भेदेर बातोक बताल जसे कि विश्वासी लोकोक मालूम हंय जाय कि परमेश्वरेर योजना गैर-यहूदी लोकलारो तने कतेक कीमती छे। भेदेर बात इडा छे कि मसीहा तुमसार बीचोत रोहचे, आर तुमसाक उम्मेद दिछे कि तुम्हरा परमेश्वरेर महिमार भागीदार होभेन। २८ आर हमरा मसीहार बारे प्रचार करछी। हमरा हर

एकटा लोकोक चेताँय दिछी। आर हमरा बुद्धि-ज्ञानेर साथे हर एकटा लोकोक सिखाछी जसे कि जैला लोक मसीहार साथे जुड़े छे, उसाक खाँटी बनाय परमेश्वरेर लिकिन हाजिर करवा पारी। २९ यहीडार तने मसीहार शक्ति जैडा मोर भीतरोत काम करछे, वही शक्ति मुताबिक मुई मेहनत करछी।

२ मुई चाहची कि तुम्हरा इडा जाने लव कि मुई तुमसार तने लौदीकिया शहरेर भा-बहिनलार तने आर जैला भा-बहिन मोक नी देखिहे, उसार सभारो तने मुई बहुत मेहनत करछी। ३ मोर मेहनत करवा मकसद छे कि उसार दिलोत शांति होय आर आपसोत प्रेम-भाव से रोहय। मुई यहोडा चाहची कि तुम्हरा सही-सही परमेश्वरेर वचनोक समझुवा पारेन। तब तुमसाक परमेश्वरेर अद्भूत आशीष मिलबे। आर तब तुम्हरा परमेश्वरेर भेद जैडा कि मसीहा छे, वहार बारे जनवा पारभेन। ३ मसीहार भीतरोत सबला ज्ञान आर बुद्धिर भंडार छुपाल छे। ४ मुई तुमसाक इडा बात कोहची जसे कि लोकेर जैला तर्क सुनते अच्छा लागछे, मगर गलत छे, उला तर्क से बचे रोहेन, आर धोखा ना खायन। ५ मुई बदन से तुमसार बीचोत हाजिर नी छी, मगर मुई मन से तुमसार साथे छी। आर इडा सुने मोक खुशी होचे कि जैसा तुमसाक रहवा लागे,

वही किसम तुम्हरा रोहचेन। आर मुई खुश छी कि मसीहार पर तुमसार विश्वास बहुत मजबूत छे।

दुनियाँर नियम-कानून से आजादी

६ क्योंकि तुम्हरा मसीहा यीशुक अपना प्रभु माने लिहेन, वहीलाते व्हारे पर विश्वास करे अपना जीवन बिताव। ७ आर मसीहार पर अपना विश्वासोक मजबूत करते जाव आर व्हार बारे बेसी से बेसी सीखते जाव। जैकिसम शिक्षा तुमसाक देयाल गहे, वही मुताबिक विश्वासोत मजबूत होते जाव। आर लगातार परमेश्वरेर शुकुरिया करते रहव। ८ तुम्हरा हुँसियार रोहेन। कोय तुमसाक छल आर बेकार ज्ञानेर बातोत धोखा ना दे। क्योंकि उसार ज्ञान मसीहार शिक्षा अनुसार नी छे, बल्के इला शिक्षा लोकेर रीति-रेवाज आर लोकेर ज्ञान से ओसछे। ९ जैखुना यीशु मसीहा धरतीर पर छिले, व्हार भीतरोत परमेश्वरेर सबला गुण मौजूद छिले। १० मसीहार साथे जुड़े जवार कारण परमेश्वर तुमसाक जैडा जीवन दिहे, उडा जीवनोत कोय कमी नी छे। सब किसमेर शक्ति आर अधिकार मसीहार अधीनोत छे। ११ यहार अलावा तुम्हरा मसीहार साथे जुड़े जवार कारण तुमसार सुन्नत हंय गहे। इडा सुन्नत मानुषेर हाथ से नी होये, बल्के मसीहार जरियाय होये, जैडा से तुमसार पाप-स्वभाव दूर कराल गहे। १२ आर बपतिस्मा लुवारखुना तुम्हरा मसीहा यीशुर साथे कबरोत गेलेन। तुमसार पुराना पाप तुम्हरा पानीर अन्दरोत

गाड़े दिलेन। जैखुना पानी से बाहर निकलिलेन, मसीहार साथे तुमसाक नया जीवन दे बाहर कराल गेल क्योंकि तुम्हरा परमेश्वरेर शक्तिर पर विश्वास करलेन। १३ जैखुना तुम्हरा अपना पाप आर पाप करवार गुणेर कारण मराल हालतोत छिलेन, परमेश्वर तुमसाक मसीहार पर विश्वास करवार कारण जिन्दा करिल, आर तुमसार सबला पाप माफ करे दिले। १४ आर जैला नियम-कानून हमसार खिलाफ छिले, मसीहा क्रुसेर पर चढ़े उला नियम-कानूनेर सजईडाक हटाय दिले। १५ आर इकिसम करे वहाँय आसमानेर दुष्ट हाकिमलार शक्तिक खतम करे दिहे आर सभारो आगुत उसार तमाशा बनाय दिहे, आर क्रुसेर जरियाय उसार पर जीत हासिल करिल। १६ वहीलाते तुमसाक कोहची यदि कोय तुमसाक खावा-पीवार बारे दोषी ठहराय, या नया चाँदिर परब आर आरामेर दिनोक नी मनवार कारण तुमसाक दोषी ठहराय, त उसार बातलार पर ध्यान ना देन। १७ क्योंकि इला नियम उडा सच्चाईर छाया छे, जैडा ओसनेवाला छिले। आर खुद मसीहा उडा सच्चाई छे। १८ जैला लोक अपना-आपोक बनावटी नरम देखाछे, कोहचे कि हमरा फरीस्तार पूजा करछी, आर कोहचे कि हमरा दर्शन पाही, आर वरा घमंड करे कोहचे कि हमसार लिकिन समझ-बुझ छे। तुम्हरा उला लोक से बचे रहेन। पवित्र आत्मा जैडा दान दिछे, वरा तुमसाक उडा दान से रोके दिबे। १९ मसीहा जहाँय मंडलीर माथा छे, इला लोक मसीहार साथे रिस्ता नी

राखछे। मसीहा अपना शक्ति से हड्डी आर मांसोक जोड़े राखछे। परमेश्वर पूराडा बदनेर देखभाल करछे, आर बढ़ते जाछे।

मसीहार साथे जीवन

२० जब मसीहा मोरिल, त तुम्हराव वहार साथे मोरे गेलेन आर दुनियाँर बुरा शिक्षा से आजाद हंय गेलेन, त क्याँ आरमाने दुनियाँर शिक्षार मुताबिक जीवन बिताछेन? २१ दुनियाँर शिक्षा बोलछे कि तुम्हरा इखान ना धोरेन, इखान ना खायेन, आर उखानोक हाथ ना लगायेन। २२ इला चीज इस्तेमाल होते-होते एक दिन बर्बाद हंय जाबे। इला सबला लोकेर हुकूम छे, जैला लोकेर शिक्षार मुताबिक छे। २३ इला नियम-कानूनोक मानुष अपना इच्छा मुताबिक बनाहे, आर इला नियम-कानूनोत कुछु ज्ञानेर बात देखाल जाछे कि कुन किसम करे उपासना कराल जाय, कुन किसम करे अपना-आपोक नीचान कराल जाय, कुन किसम करे अपना बदनडाक तकलीफ देयाल जाय, मगर पाप करवार स्वभावडाक काबू करवार तने इला नियम-कानूनेर कोय दाम नी छे।

स्वर्गेर चीजेर पर मन लगाव

३ वहीलाते जब तुम्हरा मसीहार साथे जिन्दा हंय गहेन, त तुम्हरा स्वर्गेर चीजेर पर मन लगाव, जैठिन मसीहा परमेश्वरेर दहिना बगल बोठाल छे। २ स्वर्गेर चीजेर पर ध्यान लगाव, धरतीर चीजेर पर नी। ३ क्याँकि

તુમ્હરા ત તુમસાર પુરાનાડા જીવનેર તને મોરે ગહેન, આર અલા તુમસાર જીવન મસીહાર સાથે પરમેશ્વરેર ભીતરોત છુપાલ છે. ૪ મસીહા હમસાક જીવન દિછે. જૈખુના વહાંય ઓસબે, ડખુના તુમ્હરાવ વહાર મહિમાર ભાગીદાર હોબેન આર વહાર સાથે દખા દિબેન. ૫ વહીલાતે તુમસાર ભીતરોત દુનિયાંર જૈલા પાપેર ચીજ છે, ડલા ચીજોક દૂર કરે દવ. જૈલા ચીજ માનુષોક બર્બાદ કરછે, ડ બર્બાદ કરનેવાલા ચીજ હોચે: કુકરમ, ખરાબ બિચાર, શરીરેર તને બુરા ડચ્છા, આર લાલચ. લાલચ મૂર્તિ પૂજાર બરાબર છે. ૬ યહીલા પાપેર કારણ પરમેશ્વરેર કહર પડછે. ૭ જૈખુના તુમ્હરા પહિલકાર હાલતોત જીવન બિતાછિલેન, ત તુમ્હરા ડકિસમ પાપ કરછિલેન. ૮ મગર અલા તુમસાક ગોસ્સા, ક્રોધ, દુશ્મની, બુરાઈ બોલના, આર મુખ સે ગાલી બકના, ડલા સબલા બાતોક છોડે દવ. ૯ ઇક-દોસરાઝનાર સાથે ડૂઠ ના બોલેન, ક્યાંકિ તુમ્હરા અપના પુરાના સ્વભાવ આર શરીરેર બુરા કામોક હટાય દિહેન, ૧૦ આર નયા સ્વભાવોક કપડાર માન્દી પિન્હેં લિહેન. પરમેશ્વર તુમસાક નયા બનાય દિહે, આર વહાંય તુમસાક અપનાર માન્દી બેસી સે બેસી બનાતે જાછે, આર તબ તુમ્હરા વહાક ઠીક-ઠીક જનવા પારબેન. ૧૧ ડ નયા જીવનોત યહૂદી આર ગૈર-યહૂદીર બીચોત કોય ફરક ની છે, સુન્નતવાલા આર બિના સુન્નતવાલાર બીચોત કોય ફરક ની છે, કોય વિદેશી ની છે, કોય જંગલી ની છે. કોય ગોલામ ની છે, આર કોય આજાદ ની છે. ડડા જીવનોત યીશુ સબ

कुछु छे आर वहाँय सब विश्वासीर लोकेर दिलोत रोहचे। १२ वहीलाते जब तुम्हरा परमेश्वरेर चुनाल पवित्र आर प्यारा लोक छेन, त तुम्हरा लोकेर पर तरस खानेवाला बनो, दयालु बनो, घमंडी ना बनो, कहारो साथे कड़ा व्यवहार ना करो, आर धीरज धरे सहनेवाला बनो। १३ एक-दोसराझनार कसूरलाक सहय लव। अगर कहाको कहारो पर कोय शिकायत छे, त, एक-दोसराझनाक माफ करे दव। जैकिसम प्रभु तुमसाक माफ करिहे, वही मान्दी तुम्हराव माफ करे दव। १४ इला सबला बातेर बीचोत सबसे खास बात इडा छे कि अपना बीचोत प्रेम-भाव से रहव। प्रेम सभाको एक साथे बान्हें एक बनाय राखछे। १५ तुम्हरा मसीहार बदनेर अलग-अलग भाग छेन। वहीलाते यीशु मसीहार शान्तिक तुमसार दिलोत राज करवा दव, क्योंकि तुमसाक एक साथे शांति से रहवार तने बुलाल गहे। आर तुम्हरा हरखुना परमेश्वरेर शुकुरिया करते रोहेन। १६ यीशु मसीहार वचनोक बेसी से बेसी अपना दिलोत राखो, आर पूरा ज्ञानेर साथे एक-दोसराझनाक सिखाते आर चेताते रहव, आर अपना-अपना दिलोत परमेश्वरेर तने भजन-कीर्तन गाँव, आर परमेश्वरेर आत्मार देयाल आत्मार गीत गाते रोहेन, आर परमेश्वरेर शुकुरिया करते रहव। १७ तुम्हरा जे कुछु बोलो या जे कुछु करो, सब कुछु प्रभु यीशुर नामे करो, आर यीशुर जरियाय पिता परमेश्वरेर शुकुरिया करो।

विश्वासी लोकेर परिवार

१८ पत्नीला, तुम्हरा अपना-अपना पतिर बशोत रहव क्योंकि प्रभुर नजरोत इडा ठीक छे। १९ मुई पतिलाको कोहची कि तुम्हरा अपना-अपना पत्नीक प्रेम करो, आर वहार साथे कठोर व्यवहार ना करो। २० छुवाला, मुई तुमसाक कोहची कि तुम्हरा सब बातोत अपना माँ-बाफेर हुकूम मानो, क्योंकि प्रभु इडा से खुश होचे। २१ मुई माँ-बाफोक कोहची कि तुम्हरा अपना-अपना छुवा-पुवार साथे कठोर बर्ताव ना करो। इकिसम करले उसार दिल छोटो हंय जाबे। २२ मुई गोलामलाक कोहची कि इडा दुनियाँत जहाँय तुमसार मालिक छे, तुम्हरा सब बातोत अपना मालिकेर हुकूम मानो। जैखुना वरा तुमसाक देखछे, उसाक खुश करवार तने सिरिफ वहीखुना हुकूम ना मानेन, बल्के साफ दिल से आर परमेश्वरेर भय राखे हरखुना उसार हुकूम मानो। २३ जे कुछु तुम्हरा करछेन, पूरा जी-जान से करो। इडा समझे कि हमरा जे कुछु करछी, उला मानुषेर तने नी, बल्के परमेश्वरेर तने करछी। २४ तुम्हरा जानेन कि इला कामेर बदले तुमसाक प्रभुर लिकिन से इनाम मिलबे, क्योंकि तुम्हरा यीशु मसीहार काम करछेन। २५ जहाँय बुरा काम करछे, वहाँय अपना बुरा कामेर फल पाबे। परमेश्वर कहारो मुख देखे बिचार नी करछे।

४ मालिकला, मुई तुमसाक कोहची कि तुम्हरा अपना-अपना गोलामलार साथे उचित आर ठीक व्यवहार करो, क्योंकि स्वर्गोत तुमसारो एकझन मालिक छे।

प्रार्थनार तने हौशला

२ तुम्हरा सबखुना प्रार्थना करते रोहेन आर प्रार्थना करवार तने लापरवाही ना करेन। आर परमेश्वरेर शुकुरिया करते रोहेन। ३ आर हमसार तने प्रार्थना करते रहेन कि परमेश्वर अपना वचनेर प्रचार करवार तने हमसाक मौका दे जसे कि यीशु मसीहार बारे छुपाल बातलार प्रचार करवा पारी, जैडार तने मोक जेलोत डाले देयाल गहे। ४ आर प्रार्थना करो कि मुई उडा छुपाल बातोक साफ-साफ प्रचार करवा पारी, जैकिसम कि मोक करवा लागे। ५ जैला लोक विश्वासी नी छे, उसार साथे बुद्धिर साथे व्यवहार करेन। हरेकटा मौकार सही इस्तेमाल करो। ६ तुमसार बातचीत हमेशा नरम हवा लागे आर सोचे-समझे बोलो जसे कि तुम्हरा लोकोक सही तरीका से जवाब दुवा पारेन।

आखरी सलाम

७ तुकिसुस हमसार एकझन प्यारा भई छे। वहाँय प्रभुर विश्वासयोग्य सेवक छे, आर मोर साथे सेवा करछे। वहाँय मोर बारे तुमसाक सबला बात बताय दिबे। ८ वहाक मुई तुमसार लिकिन पठानु जसे कि तुमसाक

हमसार हालतेर बारे बताय दे, आर वहाँय तुमसार दिलोत शान्ति दे।
९ उनेसिमुस, जहाँय तुमसार बीच से एकझन छे, वहाँय हमसार एकझन
प्यारा आर विश्वासयोग्य भई छे। मुई वहाक तुकिसुसेर साथे पठानु।
यरा दोनोंझन हमसार इठिनकार बारे सब बात तुमसाक बताय दिबे।
१० अरिस्तरुस जहाँय मोर साथे जेलोत छे, आर मरकुस जहाँय रिस्तात
बरनाबासेर भई लागछे, वरा दोनोंझन तुमसाक नमस्कार कोहचे।
मरकुसेर बारे तुमसाक कहाल गहिल कि अगर वहाँय तुमसार लिकिन
ओसे त तुम्हरा वहार खातिरदारी करेन। ११ आर यीशु, जहाक यूस्तुस
कहाल जाछे, वहाँय तुमसाक नमस्कार कोहचे। सुन्नत कराल लोकलार
भीतर से सिरिफ यही तीनझन परमेश्वरेर राजेर तने मोर साथी आर
मोक शान्ति देनेवाला छे। १२ इपफ्रास तुमसार भीतर से मसीहा यीशुर
एकझन सेवक छे। वहाँय तुमसाक नमस्कार करछे, आर हरखुना
तुमसार तने प्रार्थना करछे। वहाँय प्रार्थना करछे कि तुम्हरा विश्वासोत
मजबूत बनाल रहेन, आर परमेश्वरेर इच्छा मुताबिक मजबूत आर
परमेश्वरेर पर पूरा भरोसा राखो। १३ मुई वहार बारे बोलछी, कि वहाँय
तुमसार तने आर लौदीकिया आर हियरापुलिसेर विश्वासीलार तने बहुत
मेहनत करछे। १४ प्यारा डाक्टर लूका आर देमास तुमसाक नमस्कार।
१५ लोदिकियार भईलाक, नुम्फासोक आर मंडलीर सबला लोकोक,
जैला वहार घरोत जमा होचे, सभाको नमस्कार। १६ जैखुना मोर इखान

चिठ्ठी तुमसार लिकिन पढ़े लियाँल जाबे, तब इखानोक लोदिकियार
मंडलीत पठाल जाक, आर जैखान चिठ्ठी लौदीकिया से ओसबे,
उखानोक तोहों पोढ़े लिस। १७ आर अखिप्पुसोक कोहय दिस कि
जैखान काम प्रभुर तने तोक देयाँल गहे, उखानोक हुँसियार बने पूरा
करिस। १८ मुई पौलुस अपना हाथ दे लिखे तुमसाक नमस्कार कोहची।
मुई अला जेलोत छी, इडा बातेर ख्याँल राखेन। तुमसार पर प्रभुर दया
होते रोहोक।

थिसलुनिकी मंडलीर लोकोक पौलुसेर पहिला चिट्ठी

१ थिसलुनिकी मंडलीर प्रिय भा-बहिनला! तुम्हरा जहाँय पिता परमेश्वर आर प्रभु यीशु मसीहार पर विश्वास करछेन! मुई पौलुस छी। सिलवानुस आर तिमोथी मोर साथी छे। हमरा तुमसाक इखान चिट्ठी लिखछी। परमेश्वर तुमसार पर दया करोक आर शांति दोक।

मंडलीर तने परमेश्वरेर शुकुरिया

२ हमरा तुमसार सभारो तने हरखुना प्रार्थना करछी आर परमेश्वरेर शुकुरिया करछी। ३ हमरा तुमसार विश्वासेर काम आर प्रेमेर मेहनतेर बारे जानी। आर यहोडा जानी कि तुम्हरा प्रभु यीशुर पर लगातार उम्मेद लगाय छेन। इला सबला बातेर तने हमरा हरखुना परमेश्वरेर शुकुरिया करछी। ४ हे परमेश्वरेर प्यारा लोकला! हमरा जानी कि परमेश्वर तुमसाक बिछे लिहे। ५ यीशु मसीहार खुश-खबरी खाली बात से तुमसार लिकिन नी, मगर पवित्र आत्मार शक्ति से ओसिल। आर इडा खुश-खबरीर पर कोय शक नी छे। इला कारण से हमरा जानी कि परमेश्वर तुमसाक बिछे लिहे। याद करो कि तुमसार भलाईर तने हमरा कतेक

अच्छा व्यवहार करछिनु। ६ तुम्हरा परमेश्वरेर वचनोक पाय दुःख उठाछेन। तहारो पर तुम्हरा खुश छेन क्याँकि पवित्र आत्मा तुमसार दिलोत खुशी भरे दिहे। इकिसम प्रभुरो आर हमसारो साथे होईले आर तुमसारो साथे यही किसम होचे। ७ मकिदोनिया आर आखया देशेर सबला इसाई तुमसार अच्छा व्यवहारेर बारे सुनिहे आर तुमसारे मान्दी चलवा चाहचे। ८ तुमसार व्यवहारेर कारण परमेश्वरेर वचन खाली इ-दुईडा देशते नी, मगर अगलेर-बगलेर जगहोलातो फैलते जाछे। सबठिनकार लोकला जाने गहे कि तुम्हरा परमेश्वरेर पर विश्वास करछेन। दोसरा लोकोक तुमसार बारे बताना जरूरी नी छे क्याँकि खुद लोकलाय ओसे हमसाक तुम्हार बारे बताछे। ९ वरा बताछे कि हमरा जैखुना तुमसार लिकिन गहिनु त तुम्हरा मूर्ति पूजा छोड़े परमेश्वरेर भक्त बने गहेन, जहाँय जिन्दा आर सच्चा परमेश्वर छे। १० तुम्हरा जाने लिहेन कि यीशु परमेश्वरेर बेटा छे आर परमेश्वर वहाक मुर्दा से जिन्दा करिहे। आर तुम्हरा इन्तेजारो करछेन कि यीशु स्वर्ग से घुरे ओसबे। आर वहीं हमसाक आनेवाला कहर से बचाबे।

थिसलुनिकी शहरोत पौलुसेर काम

२ हे हमसार प्रिय भा-बहिनला! तुम्हरा खुद जानेन कि थिसलुनिकी शहरोत तुमसार लिकिन हमसार ओसना बेकार नी होय। २ तुम्हरा इडा

बात जानेन कि तुमसार लिकिन ओसवार पहिले फिलिप्पी शहरोत हमरा अत्याचार आर बेज्जती उठाहिनु। आर जैखुना थिसलुनिकी शहरोत तुमसार लिकिन पहुँचनु त वहोठिन लोक बिरोध करिल। तहारो पर हमरा परमेश्वरेर लिकिन से हिम्मत पाय, वहार खुश-खबरी तुमसार लिकिन प्रचार करिहिनु। ^३ वहीलाते तुम्हरा इडा विश्वास करवा पारेन कि हमसार प्रचार गलत या झूठ या छल-कपटेर मकसद से नी छिले। ^४ मगर परमेश्वर हमसाक खुश-खबरी प्रचार करवार लायक समझे, प्रचार करवार जिम्मेदारी सोंपे दिहे आर वहीलाते हमरा वहार खुश-खबरी प्रचार करछी। लोकोक खुश करवार तने हमरा प्रचार नी करछी, मगर परमेश्वरोक खोश करवार तने करछी, जहाँय हमसार दिलेर बातला जाने। ^५ तुम्हरा जानेन कि जैखुना हमरा तुमसार लिकिन प्रचार करिहिनु त हमरा ना त कोय चापलुसीर बात करछिनु आर ना हमसाक तुमसार कोय जिनिसेर लालच छिले। इलार बारे परमेश्वर गवाह छे। ^६ ना हमरा लोकेर, ना तुमसार आर ना कहारो चाबाशी पावार फिकिर करिहिनु। ^७ हमरा मसीहार दूत छी क्योंकि वहाँय हमसाक पठाहे। मसीहार दूत हवार कारण से हमसाक हक छे। वहीलाते तुमसार पर अपना हक चलवा पारनुतन। मगर हमरा उकिसम नी करनु, यहार बदले तुमसार साथे नरम बर्ताव करनु जैकिसम कि माँ अपना बाल-बच्चार देखभाल करते नरम बर्ताव करछे। ^८ हमरा तुमसाक बहुत प्रेम करछी।

आर वहीलाते तुमसार लिकिन खुशी से परमेश्वरेर खुश-खबरी प्रचार करनु। खाली प्रचारे नी करनु, मगर तुमसार तने अपना दिलडाव दे दिहिनु। ९ प्रिय भा-बहिनला! तुम्हरा हमसार कठिन मेहनतेर बारे याद करो, जैखुना हमरा परमेश्वरेर खुश-खबरी तुमसार लिकिन प्रचार करछिनु। हमरा अपना खर्चा चलवार तने दिन-रात खोब मेहनत करछिनु जसे कि हमरा कहारो पर बोझ ना होई। १० तुम्हरा आपने गवाह छेन आर परमेश्वरो गवाह छे, कि इसाई भा-बहिनलार बीचोत हमरा कतेक पवित्र, धर्मी आर बेकसूर छिनु। ११ तुम्हरा जानेन कि जैमान्दी एकझन बाप अपना बाल-बच्चार साथे व्यवहार करछे, वही मान्दी हमराव तुमसार साथे व्यवहार करिहिनु। १२ तुमसाक सभाको उपदेश दे हौशला बढ़ाछिनु आर शांति दिछिनु आर अनुरोध करछिनु, जसे कि तुमसार व्यवहार परमेश्वरेर लोकेर मान्दी होय। आर परमेश्वर तुमसाक अपना महिमा से भराल राजोत रहवार तने जाब दिहे। १३ आर हमरा हरखुना तुमसार तने परमेश्वरेर शुकुरिया करछी, क्योंकि तुम्हरा वहार वचनोक माने लिहेन, जैखुना हमरा तुमसार लिकिन प्रचार करिहिनु। इडा लोकेर नी, मगर सचमुच परमेश्वरेर वचन समझे माने लिहेन। तुम्हरा जहाँय वचनडात विश्वास करछेन, उडा वचन तुमसार जीवनोत हरखुना काम करते रहबे। १४ प्रिय भा-बहिनला! वचनोक माने लुवार बाद तुम्हरा दुःख-तकलीफ उठाहेन। आर इकिसम करे तुम्हरा यहूदिया देशेर

परमेश्वरेर मंडलीलार मान्दी बने गहेन। तुम्हराव त अपना लोकला से वही मान्दी दुःख-तकलीफ पाहेन, जैमान्दी यहूदियार इसाईला अपना यहूदी लोकलार लिकिन से पाहिले। १५ उला यहूदी लोक खाली नबीलाके नी, मगर प्रभु यीशुको मारे फिकाहिल आर हमसाको भगाय दिहिले। इकिसम करे वरा परमेश्वरोक खुश नी करछे आर सब लोकेर बिरोध करछे १६ क्यौंकि वरा गैर-यहूदी लोकेर लिकिन प्रचार करवा मना करछे। इकिसम करे वरा अपना पापेर घड़ा हरखुना भरते रोहचे। वहीलाते आखरीत परमेश्वर उसार पर अपना कहर बरसाबे।

मंडलीर साथे मुलाकात करवार पौलुसेर इच्छा

१७ प्रिय भा-बहिनला! तुमसार बीच से हमरा कुछु समयेर तने त अलग होईनु, मगर दिल से अलग नी होई। वहीखुना से हमसार बहुत इच्छा छिले कि हमरा तुमसाक देखवा पारी। १८ वहीलाते हमरा, विशेष करे मुई पौलुस, तुमसार लिकिन एक बार नी, बार-बार ओसवार कोशिश करनु। मगर शैतान हमसाक रोके दिले। १९ जैखुना प्रभु यीशु ओसबे, उखुना वहार आगुत हमसार उम्मेद, खुशी आर मुकुट तुम्हराय छेन आर तुमसार पर हमसाक नाज होबे। २० सचमुच तुम्हराय हमसार नाज आर खुशीर कारण छेन।

३ वहीलाते हमसाक जैखुना आर इन्तेजार कराल नी गेल, त हमरा ठानेलिनु कि भई तिमोथीक तुमसार लिकिन पठामु आर तिमोथीर बिना एथेन्स शहरोत रहय जाम। २ तिमोथी परमेश्वरेर सेवक छे, आर हमसार साथे यीशु मसीहार खुश-खबरी प्रचार करछे। वहाक हमरा तुमसार लिकिन पठानु कि तुमसार विश्वासोक आढ़ोह मजबूत करे, आर तुमसाक तसल्ली दे, ३ जसे कि इला दुःख-मुसीबतेर कारण कोय कमजोर ना हंय जाय। तुम्हरा इडा अच्छा से जानेन कि हमसाक इकिसम दुःख सहवा होबे। ४ यहार पहिले जैखुना हमरा तुमसार लिकिन छिनु, त बताहिनु कि हमसाक दुःख-मुसीबत उठवा होबे, आर ठीक यही मान्दी होल। आर इडा तुम्हरा खुद जानेन। ५ मोक चिन्ता होचिले कि शैतान तुमसाक पापोत गिरवार कोशिश करे आर विश्वास से हटाय दे, आर हमसार मेहनत करना बेकार हंय जाय। जैखुना मुई आर इन्तेजार करवा नी पारनु, त तुमसार विश्वासेर जानकारी लुवार तने तिमोथीक पठानु। ६ मगर तिमोथी तुमसार लिकिन से घुरे ओसयेह आर तुमसार प्रेम आर विश्वासेर बारे हमसाक अच्छा खबर दिहे। वहाँय बताछे कि तुमसार दिलोत हमसार तने प्रेम भराल छे आर तुम्हरा हमसाक हरखुना ख्याल करछेन। आर हमरा जैमान्दी तुमसाक देखवा चाहची, वही मान्दी तुम्हराव हमसाक देखवा चाहचेन। ७ प्रिय भा-बहिनला! वहीलाते तिमोथीर मुखे तुमसार विश्वासेर बात सुने, हमरा

सब किसमेर दुःख-मुसीबतोत तसल्ली पाही। ८ प्रभुर पर तुमसार विश्वास कायम छे। इडा सुने हमसार जानोत जान चले ओसिल। ९ तुमसार कारण हमरा बहुत खोश छी आर तुमसार तने परमेश्वरेर शुकुरिया आर बड़ाई करछी १० हमरा रात-दिन तुमसार तने दिलो-जान से प्रार्थना करते रोहछी कि तुमसार मुख देखवा पारी। अगर तुमसाक विश्वासोत कोय बातेर कमी छे, त उडा पूरा करवा पारी। ११ हमरा परमेश्वर से इडा प्रार्थना करछी कि खुद पिता परमेश्वर आर प्रभु यीशु हमसाक रास्ता देखाक, जसे कि तुमसार लिकिन ओसवा पारी। १२ परमेश्वर इडा करे कि जैमान्दी हमसार प्रेम तुम्हार तने बढ़ते जाछे, ठीक वही मान्दी तुमसारो प्रेम आपसोत बढ़ते जाय आर दोसरा लोकेरो तने बढ़ते जाय। १३ आर परमेश्वर तुम्हार मोनडाक इकिसम मजबूत करे कि जैखुना हमसार प्रभु यीशु अपना सब पवित्र लोकेर साथे ओसबे, त तुम्हरा हमसार पिता परमेश्वरेर आगुत पवित्र आर बेकसूर ठहरेन। आमीन!

अच्छा जिन्दगीर तने सलाह

४ प्रिय भा-बहिनला! जैखुना हमरा तुमसार लिकिन छिनु त तुमसाक उला व्यवहारेर बारे सिखाहिनु जैला से परमेश्वर खोश होचे। आर वही किसम तुम्हरा व्यवहार करछेनको। हमरा प्रभु यीशुर नामे अनुरोध

करछी कि वही मान्दी व्यवहार आढ़ोह बेसी करते रहव। २ तुम्हरा हमसार हुकूमलाक याद करो जैला हमरा यीशु मसीहार लिकिन से अधिकार पाय तुमसाक दिही। ३ परमेश्वरेर इच्छा इडा छे कि तुम्हरा पवित्र बनेन, मतलब तुम्हरा नाजायज जिस्मानी रिस्ता से दूर रहेन। ४ तुम्हरा हर एकइन अपना-अपना बदनडाक इज्जतेर साथे पवित्र राखो। ५ जैला लोक परमेश्वरोक नी जाने, वरा अपना बदनेर अभिलाषा पूरा करछे, मगर तुमसाक उकिसम करवा नी लागे। ६ कोय अपना दोसरा भई-बहिनेर खिलाफ इकिसम गलत काम ना करोक क्योंकि प्रभु इला सबला बातेर बिचार करबे आर सजा दिबे, जैडा कि हमरा आगु से तुमसाक चेताय दिही। ७ परमेश्वर चाहचे कि हमरा अशुद्ध ना रही, मगर शुद्ध रही। ८ वहीलाते जहाँय इला बातोक इन्कार करछे, वहाँय मानुषोक नी, मगर परमेश्वरोक इन्कार करछे, जे परमेश्वर अपना पवित्र आत्मा तुमसाक दान दिछे। ९ भाई-चारार प्रेमेर बारे तुमसाक अला लिखना जरूरी नी छे क्योंकि अपना बीचोत प्रेम करवा तुम्हरा खुद परमेश्वरेर लिकिन से सीखिहेन। १० पूरा मकिदोनियार सबला इसाई भा-बहिनलार साथेव तुम्हरा यही मान्दी करछेन। मगर प्रिय भा-बहिनला! हमरा तुमसार हौशला बढ़ाछी कि तुम्हरा आढ़ोह बढ़ते जाव। ११ जैखुना हमरा तुमसार लिकिन छिनु, त तुमसाक इला बात बताहिनु कि तुम्हरा शांति से रहवार लक्ष्य बनाव। अपना काम-

धंधार पर ध्यान दव आर अपना काम आपने करो। १२ इकिसम करले गैर-इसाई लोकला तुमसाक इज्जत दिबे आर अपना खान-पानेर तने तुम्हरा कहारो पर भरोसा नी करभेन।

विश्वासीलाक मेघोत उठाल जाबे

१३ प्रिय भा-बहिनला! हमरा जानी कि तुम्हरा उला इसाई लोकेर बारे चिन्ता करछेन, जैला मोरे गहे। तुम्हरा चिन्ता करछेन कि उसार कि होबे? हमरा तुमसाक उसार बारे बताछी जसे कि तुम्हरा दोसरा लोकेर मान्दी उदास ना रहेन। उला लोकोक उम्मेद नी छे कि मोरवार बाद कोय जीवन छे। १४ हमरा विश्वास करछी कि यीशु मोरिहिले आर आरमने जिन्दा हंय उठिहे। वहीलाते हमरा विश्वास करछी कि परमेश्वर मराल इसाई लोकोक यीशुर जरियाय जिन्दा करबे। १५ प्रभु जैमान्दी सिखाहे, वही मान्दी हमरा तुमसाक कोहची कि जैखुना प्रभु यीशु घुरे ओसबे। उखुना जैला इसाई लोक जिन्दा रहबे, कोय हालतोत मराल इसाई लोकला से पहिले प्रभु साथे मुलाकात करवा नी पारबे। १६ उखुना इकिसम होबे कि जोर से आवाज होबे। आर सबसे बोड़ो फरीस्तार आवाज सुनाल जाबे। परमेश्वरेर शंख फूकाल जाबे। उखुना प्रभु खुद स्वर्ग से नाभे ओसबे। आर मसीहार विश्वासी जैला मोरे गहे, वरा जिन्दा हंय उठबे। १७ वहार बाद हमरा जैला लोक जिन्दा आर बचे रोहमु, उसार साथे मेघोत उठाय लिया ल जामु जसे कि आसमानोत प्रभुर साथे

मुलाकात करी। आर हमरा हमेशार तने प्रभुर साथे रही। १८ इला बात कहय, तुम्हरा एक-दोसराझनाक तसल्ली दव।

५ प्रिय भा-बहिनला! यीशु मसीहा कोद आर केनमान्दी करे दोबारा ओसबे, इडार बारे तुम्हार लिकिन कुछ लिखना जरूरी नी छे। २ तुम्हरा खुद अच्छा करे जानेन कि प्रभुर दिन कहाको बताय नी ओसबे, जैकिसम चोर कहाको बताय रात करे नी ओसछे। ३ जैखुना लोकला कोहबे, “सब कुछ ठीक-ठाक छे आर कोय खतरा नी छे।” उखुना ओचकाय बर्बादी चले ओसबे जैकिसम ओचकाय गर्भवती स्त्रीर दरद शुरू हंय जाछे। उखुना लोक भगवार कोशिश करबे, मगर नी पारबे। ४ प्रिय भा-बहिनला! तुम्हरा उडा दिनेर बारे त अन्हारोत नी छेन। उडा दिन अचुकाय चोरेर मान्दी ओसलेव, तुमसाक ताज्जुब नी हवा चही, ५ क्याँकि तुम्हरा सबकोय त रोशनीर आर दिनेर लोक छेन। हमरा ना त रातेर आर ना अन्हारेर लोक छी। ६ वहीलाते हमरा दोसरा लोकेर मान्दी बेफिकिर हंय निनाय ना रहई, मगर जागिल आर हुँसियार रही। ७ क्याँकि जहाँय निनाछे, वरा रात करे निनाछे आर जहाँय मतवाला होचे, वरा रात करे मतवाला होचे। ८ हमरा त दिनेर लोक छी। वहीलाते हमराव अपना-आपोक फौजेर मान्दी हुँसियार आर तैयार राखी, जैकिसम फौज अपना सिना ढक्वार कवच आर माथात टोप पिन्हें

तैयार रहछे। विश्वास आर प्रेम हमसार सिनार कवच छे। मुक्तिर उम्मेद हमसार माथार टोप छे। इला पिन्हें हमरा तैयार रही। ९ परमेश्वर हमसार पर अपना कहर बरस्वार तने नी, मगर हमसाक प्रभु यीशु मसीहार जरियाय मुक्ति दुवार तने चुने लिहे। १० हमरा मोरे जई या जिन्दा रहई, जैखुना यीशु मसीहा ओसबे, हमरा वहार साथे हमेशार तने रोहमु क्याँकि वहाँय हमसार तने मोरिहे। ११ वहीलाते तुम्हरा आपोसोत हौशला बढ़ाते रहेन आर आपसेर उन्नतिर बारे सोचेन, जैडा कि अला तुम्हरा करछेन।

मंडलीक पौलुसेर आखरी उपदेश

१२ प्रिय भा-बहिनला! हमरा तुमसाक अनुरोध करछी कि तुम्हरा उला अगुवार इज्जत करो, जैला अगुवा प्रभुर कामोत छे। तुमसाक प्रभुर रास्तात चलाछे आर तुमसाक प्रभुर बारे सिखाछे। १३ उसार कामलार वजह से तुम्हरा उसाक प्रेम करो आर बहुत इज्जत दव। तुम्हरा अपना बीचोत शान्ति रहव। १४ प्रिय भा-बहिनला! हमरा तुमसाक इडा उपदेश दिछी कि जैला लोक आलसी छे, उसाक हुँसियार करे दव। जहाँय डरपोक छे, उसाक हिम्मत दव। जहाँय कमजोर छे, उसाक मदद करो। आर सबुर बान्हे सभारो व्यवहार बर्दास्त करो। १५ अगर तुमसार कोय बुराई करे त बदला लुवार तने तुम्हरा वहार बुराई ना करो, मगर भलाई करो। अपना बीचोत आर सभारो साथे भलाई करवार कोशिश करो।

१६ सबखुना खोश रहव। १७ सबखुना प्रार्थना करते रहव। १८ सब बातेर तने तुम्हरा परमेश्वरेर शुकुरिया करो, क्याँकि जैला लोक यीशु मसीहार पर विश्वास करछे, उसार तने परमेश्वरेर यहीडा इच्छा छे। १९ परमेश्वरेर पवित्र आत्मार कामोत बाधा ना दव। २० भविष्यवाणीक अनसुनी ना करो। २१ सबला भविष्यवाणीर बातोक जाँच करे देखो, जैला अच्छा छे उलाक अपनाय लव। २२ सब किसमेर बुराई से बचे रहव। २३ शांतिदाता परमेश्वर खुद तुमसाक पुरा-पुरी पवित्र करोक। जैदिना प्रभु यीशु मसीहा ओसबे, उ-दिन तक परमेश्वर तुम्हार आत्माडाक, जानडाक आर बदनडाक बुराई से बचाय राखे। २४ परमेश्वर विश्वासयोग्य छे, जहाँय तुमसाक चुने लिहे। वहीलाते वहाँय इडा करबे। २५ प्रिय भा-बहिनला! तुम्हरा हमसार तने प्रार्थना करो। २६ प्रेम से सभाको नमस्कार करो। २७ मुई प्रभुर नामे तुमसाक हुकूम दिछी कि तुम्हरा इखान चिट्ठी सबला भा-बहिनोक पढ़े सुनाय दव। २८ हमसार प्रभु यीशु मसीहा तुमसार सभारो पर दया करते रहोक।

थिसलुनिकी मंडलीर लोकोक पौलुसेर दोसरा चिट्ठी

१ थिसलुनिकी मंडलीर प्रिय भा-बहिनला! तुम्हरा जहाँय हमसार पिता परमेश्वर आर प्रभु यीशु मसीहार पर विश्वास करछेन! मुई पौलुस छी। सिलवानुस आर तिमोथी मोर साथी छे। हमरा तुमसाक इखान चिट्ठी लिखछी। २ हमसार पिता परमेश्वर आर प्रभु यीशु मसीहा तुमसार पर दया करोक आर शांति दोक। ३ हे भा-बहिनला! हमरा तुमसार तने हरखुना परमेश्वरेर शुकुरिया करछी क्योंकि तुमसार विश्वास आर आपसी प्रेम बहुत बढ़ते जाछे। ४ वहीलाते हमरा परमेश्वरेर मंडलीलात तुमसार बारे घमंड करछी क्योंकि सबला दुःख आर मुसीबतेर बादो तुम्हरा अपना विश्वास आर भरोसा प्रभु यीशु पर राखिहेन।

इन्साफेर दिन

५ परमेश्वर इला दुःख आर मुसीबतेर जरियाय अपना सही इन्साफेर प्रमाण दिछे कि वहाँय तुमसाक अपना राजेर तने लायक ठहराबे। आर यहारे तने तुम्हरा दुःख उठाछेन। ६ परमेश्वरेर लिकिन इडा बिचार छे कि जहाँय तुमसाक दुःख दिछे, वहाँय उसाक दुःख दिबे। ७ आर तुम्हरा

जहाँय दुःख उठाछेन, हमसार साथे तुमसाक आराम दिबे। इला उखुना होबे जैखुना प्रभु यीशु स्वर्ग से अपना शक्तिशाली फरीस्तालार साथे नाभे ओसबे। ८ आर जैला लोक परमेश्वरोक इन्कार करछे आर प्रभु यीशुर खुश खबरीडाक नी मानछे, परमेश्वर उला लोकोक धधगाल आगिन दे सजा दिबे। ९ उसाक प्रभु आर वहार महान शक्ति से दूर कराल जाबे आर हमेशार तने बिनाश हवार सजा काटबे। १० इडा घटना उदिना घटबे, जैदिना प्रभु यीशु अपना पवित्र लोकलार बीचोत बड़ाई पावार तने ओसबे। आर तुम्हरा उला पवित्र लोकेर साथे गेनाल जाभेन, क्योंकि तुम्हरा हमसार गवाहीर पर विश्वास करलेन। ११ इला बात जाने हमरा तुमसार तने हरखुना प्रार्थना करछी। इडा प्रार्थना करछी कि परमेश्वर अपना मरजी मुताबिक तुमसाक चलते मदद करे। आर अपना शक्तिर जरियाय तुमसाक सब किसमेर अच्छा काम करवार इच्छा दे आर तुमसार विश्वासेर सब काम पूरा करे। १२ वहार बाद तुमसार जीवनेर जरियाय प्रभु यीशुर बड़ाई होबे। आर वहार बदले प्रभु यीशु तुमसार बड़ाई करबे। इला सब कुछु हमसार परमेश्वर आर प्रभु यीशुर दया से होबे।

प्रभु यीशु घुरे ओसवार आगुर घटना

२ हे भा-बहिनला! हमरा जानी कि प्रभु यीशु मसीहा फेर घुरे ओसबे आर हमरा वहार साथे मिलमु। अला हमरा तुमसाक यहारे बारे बताछी, २ कोय अगर कहय प्रभुर दिन ओसे गहे त घबराय ना जायेन। आर कहय कि हमरा दर्शन पाही या यहोडा कहय कि हमरा पौलुस आर वहार साथी से खबर या चिट्ठी पाही, त विश्वास ना करेन। ३ कोय मान्दी से कहारो धोखात ना पोड़ैन। प्रभु यीशु उखुन तक नी ओसबे, जैखुन तक लोक परमेश्वरेर खिलाफ नी बोलछे। आर जैडा दुष्ट लोकोक नाश करवार तने रखाल गहे, वहाँय हाजिर नी हंय जाछे। ४ मानुष जैलार भक्ति करछे। उडा दुष्ट लोक उला सबलार बिरोध करबे आर अपना-आपोक उला सबला से बोड़ो कोहबे। इकिसम कि वहाँय परमेश्वरेर मंदिरोत बोठे अपना-आपोक परमेश्वर कोहबे। ५ तुम्हरा याद करो। जैखुना मुई तुमसार साथे छिनु त इला बात तुमसाक बताछिनु। ६ तुम्हरा इडा जानेन कि कुन शक्ति उडा दुष्टोक रोके राखियेह। मगर उडा दुष्ट सही समय हाजिर होबे। ७ इडा दुष्ट चुपचाप पापेर काम अलाव करछे। जैडा शक्ति उडा दुष्टोक रोके राखियेह, जैखुन तक उडा शक्ति हटे नी जाछे, उडा दुष्ट रोकाल रोहबे। ८ वहार बादे उडा दुष्ट हाजिर होबे। आर प्रभु यीशु ओसे वहाक अपना मुखेर फूक दे मारे फिकाबे आर अपना तेज से खतम करबे। ९ जैखुना उडा दुष्ट ओसबे,

उखुना वहाँय शैतानी हरकत करबे। वहाँय हर किसमेर ताकत, चिन्ह आर चमत्कार दखाबे, जैला कि झूठ। १० नाश होनेवाला लोकोक सब किसमेर बुरा कामेर जरियाय धोखा दिबे। इला लोक सच्चाईक प्रेम नी करबे, जैडा सच्चाई उसाक बचालतेन। ११ वहीलाते परमेश्वर उसार बीचोत धोखा देनेवाला एकटा शक्तिक बढ़ाबे जसे कि वरा झूठ बातेर पर विश्वास करे। १२ जताला लोक सच्चाईर पर विश्वास नी करछे, मगर पाप करते खोश होचे, वरा सबकोय सजा पाबे।

मजबूत हंय रहवार सलाह

१३ हे भा-बहिनला! प्रभुर प्यारा लोक! हमरा चाहची कि तुमसार तने हरखुना परमेश्वरेर शुकुरिया करते रहई क्यौंकि परमेश्वर तुमसाक शुरूते बिछे लिहे। आर वहाँय तुमसाक अपना आत्मार जरियाय बचाहे आर पवित्र करियेह क्यौंकि तुम्हरा सच्चाईर पर विश्वास करिहेन। १४ हमरा जैडा खुश-खबरी प्रचार करछी, वहीडार जरियाय परमेश्वर तुमसाक बुलाहे जसे कि प्रभु यीशु मसीहार साथे-साथे तुम्हराव सम्मान पायेन। १५ वहीलाते, हे भा-बहिनला! तुम्हरा विश्वासोत मजबूत बने रहव। वचन या चिट्ठीर जरियाय जैला-जैला बात तुम्हरा हमसार लिकिन से सीखिहेन, उलात मजबूत बने रहव। १६-१७ आर हमरा जानी कि प्रभु यीशु मसीहा आर पिता परमेश्वर हमसाक प्रेम आर दया करिहे। अपना प्रेम आर दयार जरियाय प्रभु यीशु आर परमेश्वर हमेशार

तने तसल्ली आर खोब अच्छा उम्मेद दिहे। हमरा प्रार्थना करछी कि खुद प्रभु यीशु आर पिता परमेश्वर तुमसाक तसल्ली दे आर शक्ति दे कि तुम्हरा हरेकखान अच्छा कामोत या बोलीत बने रहेन।

प्रार्थना करवार तने पौलुसेर अनुरोध

३ हे भा-बहिनला! मुई आखरीत कोहची कि तुम्हरा हमसार तने प्रार्थना करेन। इडा प्रार्थना करेन कि प्रभुर वचन जल्दी करे फैले जाय आर लोक प्रभुर वचनोक सम्मान दे, जैकिसम कि तुम्हरा प्रभुर वचनोक सम्मान दिहेन। २ आर यहोडा प्रार्थना करेन कि हमरा बदमाश आर कुकरमी लोकेर हाथ से बचे रहई क्यौंकि सबकोय विश्वास नी करछे। ३ मगर प्रभु विश्वासयोग्य छे। वहाँय तुमसाक शक्ति दिबे आर शैतान से बचाय राखबे। ४ हमरा भरोसा करछी कि प्रभुर मदद से तुम्हरा हमसार कहना मुताबिक चलभेन आर इकिसम चलते रोहभेन। ५ प्रभु तुमसाक इडा समझुवार शक्ति दे कि परमेश्वर तुमसाक कतेक प्रेम करछे आर मसीहा कतेक दुःख उठाहे।

काम करते रहवार सलाह

६ हे प्रिय भा-बहिनला! मुई तुमसाक प्रभु यीशु मसीहार नामे हुकूम दिछी कि तुम्हरा उला इसाई से दूरोत रहेन, जैला कोय काम करवा नी चाहचे आर हमसार शिक्षा मुताबिक नी चलछे। ७ तुम्हरा खुद जानेन कि

हमरा जैखुना तुमसार बीचोत छिनु त हमरा आलसी नी छिनु। वहीलाते तुमसाक हमसार मान्दी चलवा लागे। ८ हमरा कहारो लिकिन से फोकटिया खाना नी खई, मगर रात-दिन कठिन मेहनत करछिनु जसे कि हमरा तुमसार कहारो पर बोझ ना बनी। ९ हमरा तुमसार पर अपना खाना-पीनार तने हुकूम चलवा पारनुतन, मगर उकिसम नी करी। हमरा तुमसार तने एकटा नमूना बने गेनु जसे कि तुम्हरा हमसार मान्दी चलेन। १० हमरा जैखुना तुमसार बीचोत छिनु, त तुमसाक सिखाछिनु कि अगर कोय काम करवा नी चाहचे त वहाक खावारो हक नी छे। ११ हमरा सुनवा पारछी कि तुमसार बीचोत कुछ लोक आलसी छे आर कोय काम-धन्धा नी करछे, मगर दोसरा लोकेर कामोत बाधा डालछे। १२ इकिसम लोकोक प्रभु यीशु मसीहार नामे हमरा हुकूम दिछी आर समझाछी कि वरा चुपचाप अपना काम-धन्धा करे आर अपना रोजी-रूटीर जोगार करे। १३ मगर तुम्हरा अच्छा काम करते हिम्मत ना हारेन। १४ अगर कोय हमसार इखान चिट्ठीर बातलाक नी माने त वहार पर नजर राखेन। वहार साथे उठा-बोठा ना करेन जसे कि वहाँय शरमिन्दा हंय जाय। १५ वहाक दुश्मन ना समझेन, मगर एकझन भई या बहिन समझे चेताय देन।

पौलुसेर आशीष-वचन

१६ शांतिदाता प्रभु खुद तुमसाक हर समय आर हर परिस्थितित शांति दोक। प्रभु तुमसार सभारो साथे रहोक। १७ मुई पौलुस, अपना हाथे तुमसाक आशीष-वचन लिखछी। आर इकिसम मुई अपना हरेकखान चिट्ठीत लिखछी। इडार जरियाय तुम्हरा जानभेन कि इखान चिट्ठी मोर छे। १८ हमसार प्रभु यीशु मसीहार दया तुमसार सभारो पर होते रहोक।

तिमोथीक पौलुसेर पहिला चिट्ठी

१-२ प्रिय तिमोथी, तुई मोर बेटार मान्दी छिस क्याँकि मोहरे मान्दी तुई यीशुर पर विश्वास करछिस। मुई पौलुस छी आर इखान चिट्ठी लिखछी। हमरा जानी कि परमेश्वर हमसार मुक्तिदाता छे आर यीशु मसीहा हमसार उम्मेद छे। परमेश्वर आर यीशु मसीहार कहना मुताबिक मुई यीशु मसीहार दूत छी। मुई प्रार्थना करछी कि पिता परमेश्वर आर हमसार यीशु मसीहा तोक दया करे आर शान्ति दिते रहय।

गलत शिक्षा से सावधान

३ मकिदोनिया एलाका जवारखुना मुई तोक समझाय-बुझाय कोहिनु कि तुई इफिसुस शहरोत रहय जा आर कुछु लोकोक हुकूम दे कि वरा गलत शिक्षा ना दे। ४ आर ना गलत किस्सा-कहानी आर ना लम्बा-चौरा खानदानी ब्योरार पर मन लगाय क्याँकि इला से बहसबाजी होचे। परमेश्वर केनमन करे काम करछे, इला गलत शिक्षा लोकोक परमेश्वरेर कामेर बारे बुझते कोय मदद नी करछे। परमेश्वरेर कामेर बारे विश्वास करले समझाल जाछे। ५ हुकूम दुवार मकसद इडा छे कि विश्वासी लोकेर बीचोत प्रेम पैदा होय, जैडा प्रेम साफ दिल से, खाँटी मन से आर

सच्चा विश्वास से हवा लागे। ६ इला बातोक छोड़े कुछुला लोक बेकार बातोत लगाल छे। ७ वरा परमेश्वरेर नियम-कानूनेर शिक्षक हवा चाहचे, मगर जैला बातोक वरा सही समझे बोलछे, उलार बारे उसाक खुद मालूम नी छे। ८ हमरा जानी कि परमेश्वरेर नियम-कानून अच्छा छे, मगर परमेश्वरेर नियम-कानून सही ढंग से कामोत अनुवा लागे। ९ यहोडा जानी कि परमेश्वरेर नियम-कानून धर्मी लोकोक काबूत करवार तने नी छे, मगर पापी, बेलगाम, अधर्मी लोकोक काबूत करवार तने छे। उला लोकेर तने छे जैला अपवित्र आर गंदा छे। आर उसार तने छे जहाँय माँ-बाफोक जान से मारछे आर जहाँय खूनी छे। १० परमेश्वरेर नियम-कानून उला लोकेर तने छे, जहाँय स्त्री आर पुरुषेर साथे कुकरम करछे, मानुषोक बेचे दिछे, झूठ बोलछे, झूठा कसम खाचे आर जहाँय सच्चा शिक्षार खिलाफ कोय गलत काम करछे। ११ इडा सच्चा शिक्षा खुश-खबरी से मिलछे। सर्वशक्तिमान परमेश्वर खुश-खबरी प्रचार करवार भार मोक सोंपे दिहे।

परमेश्वरोक शुकुरिया

१२ मुई हमसार प्रभु यीशु मसीहार शुकुरिया करछी, जहाँय मोक शक्ति दिछे आर वहाँय मोक विश्वासयोग्य समझिल आर अपना कामेर तने बिछे लिहे। १३ मुई त पहिले यीशुर बिरोध बोलछिनु, प्रभुर लोकोक सताछिनु आर प्रभुर लोकोक बेज्जत करछिनु। तहारो पर परमेश्वर मोर

पर दया करिल, क्योंकि मुई अनजान हालतोत उकिसम काम करिहिनु आर विश्वास नी करछिनु। १४ हमसार परमेश्वर मोर पर बहुत बेसी दया करिल। वहाँय मोक प्रेम आर विश्वास दिहे, जैडा कि यीशु मसीहार लिकिन से मिलछे। १५ इडा बात सच छे आर पूरापूरी विश्वास करवार बात छे कि यीशु मसीहा पापी लोकोक बचवार तने दुनियाँत ओसिहिले। आर पापी लोकेर बीचोत मुई सबसे बोड़ो पापी छी क्योंकि मुई यीशु मसीहार विश्वासीलाक सताछिनु। १६ मगर परमेश्वर मोर पर दया करिल। मुई त सबसे बोड़ो पापी छिनु, मगर यीशु मसीहा मोर गलतीलाक बर्दास्त करिल आर जैला लोक मुक्ति पाहे, उसार तने मोक एकटा नमूना बनाल। वहाँय इडा करिल जसे कि दोसरा लोक मसीहार पर विश्वास करे अनन्त जिन्दगी पाय। १७ आखिरोत मुई प्रार्थना करछी कि सब इज्जत आर बड़ाई परमेश्वरोक मिले, जहाक हमरा देखवा नी पारछी, आर जहाँय हमेशा से छे आर हमेशा से राज करछे। आमीन! १८ हे मोर प्यारा बेटा! तिमोथी! कुछुला नबी जैला भविष्यवाणी तोर बारे करिहे, उलार मुताबिक मुई तोक हुकूम दिछी कि तुई वहीलार मुताबिक जी-जान लगाय अपना विश्वासेर तने लड़ते रह। १९ इकिसम लड़ेक कि अपना विश्वासोत मजबूत रहवा पारिस आर अपना दिल अच्छा रखवा पारिस। बहुतझन अपना दिल अच्छा नी रखवा पारिल आर विश्वास से दूर हंय गेल। २० इकिसम लोकेर अन्दरोत हमिनस आर सिकन्दर छे।

उसाक विश्वासी लोकेर दल से दूर कराल गहे, माने ले कि उसाक शैतानेर हाथोत सोंपे दिही। आर तब इडा से वरा सिखवा पारबे कि परमेश्वरेर खिलाफ बुरा बात बोले हमरा गलती करिहे।

सब लोकेर तने प्रार्थना

२ तिमोथी! सबसे पहिले मुई तोक समझाय-बुझाय कोहची कि तुम्हरा सब लोकेर तने प्रार्थना करो। आर प्रार्थना करो कि परमेश्वर सभारो मदद करे। परमेश्वरेर शुकुरिया अदा करो। २ तुम्हरा राजालार तने आर हाकिमलार तने प्रार्थना करो जसे कि हमरा चैन आर शान्ति से रहवा पारी आर परमेश्वरेर इच्छा मुताबिक चलवा पारी आर अच्छा व्यवहार करवा पारी। ३ इला सबला बात अच्छा छे आर परमेश्वर, जहाँय हमसार मुक्तिदाता छे, वहाँय उला से खोश होचे। ४ परमेश्वर चाहचे कि सबला लोक बचे जाय आर वहार वचनेर सच्चाईडाक जाने जाय। ५ क्योंकि सच्चा परमेश्वर खाली एकझन छे आर परमेश्वरोक आर मानुषोक मिलाने वाला सिरिफ एकझन मानुष छे, आर वहाँय छे: यीशु मसीहा। ६ यीशु मसीहा सभाको बचवार तने अपना जानडा दे दाम चुकाले। आर इडा खबर सही समय देयाल गेल। ७ आर परमेश्वर मोक प्रचारक आर दूत बनाहे जसे कि मुई गैर-यहूदी लोकेर लिकिन इडा विश्वास आर सच्चाईर बारे प्रचार करवा पाड़ी। मुई सच कोहची, झूठ नी बोलछी।

८ मुई चाहची कि जैला पुरुष लोक परमेश्वरेर तने पवित्र जीवन बिताछे, वरा सबठिन अपना हाथोक उठाय प्रार्थना करे, आर वरा अपना दिलोत कोय गोस्सा ना राखे आर ना झगड़ा करे। ९-१० आर स्त्रीलाको मुई कोहची कि वरा अपना-आपोक चुलेर चुत्थी गुथे, सोना-रूपा से, मोती से आर ना बहुत दामी कपड़ा से सजाय, मगर वरा अच्छा काम से अपना-आपोक सजाय आर साधारण कपड़ा पिन्हें जसे कि लोकोक अच्छा लागे। जैला स्त्री कोहचे कि हमरा परमेश्वरेर भक्ति करछी, त उसाक यही किसम करना उचित छे। ११ जैखुना कोय वचन सिखाछे त स्त्रीलाक शांत रहवा चही आर सम्मान दे वचनोक सिखवा लागे। १२ मुई कोहची कि स्त्री-पुरुष लोकेर पर हुकूम ना चलाय आर ना उपदेश दे, मगर चुपचाप हंय परमेश्वरेर वचनोक सुने। १३ हमरा जानी कि परमेश्वर पहिले आदमोक बनाले आर वहार बाद हव्वाक बनाल। १४ आदम धोखा नी खाय, मगर हव्वा धोखा खाले आर परमेश्वरेर हुकूम तोड़े पाप करिल। १५ तब इडा छे कि स्त्रीक बचाल जाबे, जैखुना वहाँय अपना बच्चाक जनम दिबे, यदि वरा प्रभु यीशुर पर विश्वास करते रोहय, लोकोक प्रेम करे, आर अपना-आपोक काबूत राखे।

मंडलीर नेता हवार गुण

३ इडा बात सच छे कि जहाँय विश्वासी लोकेर मंडलीर नेता हवा चाहचे, वहाँय अच्छा कामेर इच्छा करछे। २ वहीलाते वहाँय बेकसूर, एकझन पत्नी वाला, अपना-आपोक काबूत रखनेवाला, सम्मानित व्यक्ति, सरीफ, मेहमानोक अपना घरोत ग्रहण करे खातिरदारी करनेवाला हवा चही आर अच्छा से परमेश्वरेर वचन सीखानेवाला हंय। ३ वहाक शराबेर नशा नी हवा चही। आर ना मारपीट करनेवाला आर ना झगड़ा करनेवाला हवा लागे। वहाक नरम हवा लागे। आर ना वहाक धनेर लोभ हवा चही। ४ अपना परिवारोक ठीक से चलानेवाला आर अपना बाल-बच्चाक अच्छा से अपना अधिकारोत रखनेवाला हवा लागे। ५ क्यौँकि अगर कोय लोक अपनाय घरेर ठीक से देखभाल करवा नी जानछे, त वहाँय परमेश्वरेर मंडलीर देखभाल कसे करे करवा पारबे। ६ वहाक नया विश्वासी हवा नी चही। इकिसम ना होय कि वहाँय घमंडी हंय जाय आर शैतानेर मान्दी सजा पाय। ७ आर बाहरी लोकेर बीचोत वहार नामडा अच्छा होय जसे कि वहाँय बदनाम हंय शैतानेर जालोत फँसे ना जाय।

मंडलीर सेवक हवार गुण

८ यही मान्दी मंडलीर सेवकलाक इकिसम हवा लागे कि लोक उसार इज्जत करे। उसाक दोघला आर शराबी नी हवा चही। आर उसाक बेईमानीर कमाईर लोभ नी हवा चही। ९ विश्वासेर बारे जैडा बात जानाल नी छिले, उडा बात परमेश्वर अला बताय दिहे। वहीडा बातोक वरा खाँटी मन से धरे राखे। १० आर इकिसम लोकोक मंडली पहिले जाँच करे देखोक। अगर वरा बेकसूर हंय त मंडलीर सेवक हवा पाड़े। ११ यही किसम उसार पत्नीलाक इज्जतदार हवा चही। उसाक कहारो चुगली नी करवा चही। अपना-आपोक काबूत रखवा चही जसे कि उसार सब बातोत लोक विश्वास करे। १२ जहाँय सेवक होबे वहार सिरिफ एकझन पत्नी हवा लागे। आर अपना घरेर अच्छा से देखभाल करवा पारे। १३ आर यीशु मसीहार पर अपना विश्वासेर बारे हिम्मत से बोलवा पारे। जहाँय अच्छा सेवा करछे, त वहाँय सम्मान पाछे। १४ उम्मेद करछी कि मुई बहुत जल्दी तोर लिकिन जवा पारूम। मगर मुई तोक इला बात लिखछी, १५ अगर कोय कारण से जाते देरी हंय, तोक जानकारी हवा चही कि परमेश्वरेर घरानार लोकेर चाल-चलन कुन किसम हवा लागे। परमेश्वरेर घराना जीवित परमेश्वरेर मंडली छे। आर इडा मंडली परमेश्वरेर सच्चाईडाक नींव आर खम्मार मान्दी थामे राखछे। १६ हमरा इडा बातोत राजी छी कि हमसार विश्वासेर बोड़ो भेद

छुपाल छिले, मगर परमेश्वर अला हमसाक उडा भेद बताय दिहे कि, यीशु मसीहा मानुष बने ओसिल, पवित्र आत्मा वहाक धर्मी ठहराल, फरीस्ताला वहाक देखिल, दुनियाँर सब जातेर लिकिन वहार प्रचार कराल गेल, दुनियाँत लोकला वहार पर विश्वास करले आर वहाक महिमार साथे स्वर्गोत उठाय लिया ल गेल।

आखरी दिन

४ पवित्र आत्मा बहुत साफ-साफ बताछे कि यीशु मसीहार ओसवार पहिले बहुत लोक वहार पर से अपना विश्वास हटाय दिबे। आर वरा उला लोकेर झूठ शिक्षार पर विश्वास करबे, जैला शिक्षा कि शैतान चाहचे। २ इकिसम लोक कपटी आर बेईमान छे, अच्छा आर खराब बात मालूम करवार उसार बुद्धिडा खतम हंय गहे। ३ इला कपटी शिक्षक ब्याह करवा मना करबे आर कुछुला खवार जिनिसोक खवा मना करबे। मगर परमेश्वर इला सबला खवार जिनिसोक बनाहे। वहीलाते विश्वासीला जहाँय सच्चाईक जानछे, परमेश्वरोक शुकुरिया करे सब जिनिसोक खवा पारे। ४ परमेश्वर जताला जिनिसोक बनाहे, वहार नजरोत सबला जिनिस अच्छा छे। परमेश्वरोक शुकुरिया करे तुम्हरा सब कुछु खवा पारेन ५ क्याँकि उला परमेश्वरेर वचन आर प्रार्थनार जरियाय शुद्ध हंय जाछे।

अच्छा सेवक

६ अगर तुई मंडलीर भा-बहिनलाक इला बात बताते रोहिस त तुई यीशु मसीहार एकझन अच्छा सेवक होबो। जैकिसम तुई खुद उला विश्वासेर बातोक आर अच्छा शिक्षाक सीखिहिस आर तुई उलाक मानते ओसछिस। ७ तुई मानुषेर बनाल बेकार आर झूठ किस्सा-कहानी से दूरोत रह। मगर परमेश्वर जैकिसम चाहचे, वही किसम करवार तने तुई अपना-आपोक तैयार करेक। ८ कसरत से कुछु फायदा जरूर होचे, मगर परमेश्वरेर इच्छा मुताबिक चलले अलकार जिन्दगीत आर आनेवाला जिन्दगीत बहुत फायदा छे। ९ इला बात सच छे आर पूरापूरी विश्वास करवार बात छे। १० वहीलाते हमरा मेहनत आर कोशिश करछी क्योंकि हमसार उम्मेद जिन्दा परमेश्वरेर पर छे, जहाँय सब लोकेर आर खास करे विश्वासी लोकेर मुक्तिदाता छे। ११ तिमोथी! तुई इला बातोक सिखाते रह आर लोकोक बता कि वरा तोर शिक्षा मुताबिक चले। १२ तुई त एकटा जवान लड़का छिस। मगर कोय तोक इडा नी कहवा पारे कि तुई कुछु नी जानिस। तुई अपना बोली, चाल-चलन, प्रेम, विश्वास आर पवित्र जीवनेर जरियाय सबला विश्वासीर तने नमूना बने जा। १३ जैखुन तक मुई नी ओसछी, उखुन तक तुई लोकेर सामनात वचन पढ़ते रह, उपदेश दिते रह आर वचन सिखाते रह। १४ परमेश्वर विश्वासीलाक मदद करवार तने जैडा दान तोक दिहे, उडार बारे

लापरवाही ना करिस। इडा दान तोक उखुना मिलिहिले, जैखुना मंडलीर नेता तोर पर अपना हाथ राखे भविष्यवाणी करिहिले। १५ तुई यहीलार पर अपना मनडा लगाय राख आर इलाक करते रोह जसे कि सबकोय तोक देखवा पारे कि तुई अच्छा काम करछिस। १६ अपना जीवन आर अपना उपदेशेर बारे बहुत हुँसियार रोहबो। इला बातोक मजबूती से धरे राखेक, क्योंकि अगर तुई यही मान्दी करते रहबो, त तुई अपना-आपोक बचवा पारबो आर तोर सुननेवालाव बचबे।

विश्वासीलार साथे तिमोथीर व्यवहार

५ “तुई कोय बूढ़ा लोकोक ना डाँटिस, मगर वहाक बाप समझे वहार साथे नरम से बात करिस। जहाँय-जहाँय तोसे छोटो छे, वहाक छोटो भई समझिस। २ बूढ़ीलाक माँ समझिस आर जवान लड़कीलाक एकदम साफ मन से बहिन समझिस। ३ जैला राँडीर कोय देखभाल करनेवाला नी छे, उसार सम्मान करिस आर देखभाल करिस। ४ मगर कोय राँडीर अगर बेटा-बेटी या नाती-पोता रहे त परिवारेर सबला लोकोक पहिले सिखवा लागे कि परमेश्वर उसाक अपना परिवारेर तने कि करवा कोहचे। आर उला बेटा-बेटी आर नाती-पोताक अपना माँ-बाप आर दादो-दादीर हक पूरा करवा लागे, क्योंकि परमेश्वर इला से खोश होचे। ५ आर जैडा राँडीर कोय नी छे, आर वहाँय परमेश्वरेर पर

भरोसा राखछे, आर रात-दिन प्रार्थनात लगाल रोहचे, त तुम्हरा वहार मदद करेन। ६ मगर उडा राँडीर मदद ना करेन, जहाँय खाली अपना सुख-सुविधार बारे सोचेछे। इकिसम राँडी जिन्दा रोहतौ मोरे गहे। ७ इला बातेर बारे सबला विश्वासीक सीखा जसे कि उसाक कोय दोषी ना ठहराय। ८ अगर कोय लोक अपना रिस्तेदारेर आर खास करे अपना घरानार देखभाल नी करछे, त समझाल जाबे कि वहाँय विश्वास से हटे गहे, आर अविश्वासी लोक से बेसी खराब हंय गहे। ९ राँडीर गेनतीत वहीला राँडीक राखिस, जहार उमर कम से कम सैठ साल छे, आर एकझन पतिर पत्नी छे। १० आर अच्छा काम करवार बारे वहार अच्छा नाम छे कि वहाँय अपना बाल-बच्चार लालन-पालन अच्छा से करियेह, मेहमानेर अच्छा से खातिर करियेह, प्रभुर पवित्र लोकलार पाँव धोय दिहे, दुःखी लोकेर मदद करियेह। ११ मगर जवान राँडीलार गेनती राँडीलार साथे ना करिस क्योंकि वरा अपना शरीरेर इच्छा पूरा करवार तने यीशु मसीहार सेवा करवा छोड़े दिछे आर शादी करे लिछे। १२ इकिसम करे वरा अपना पहिलकार वचन तोड़े दिछे आर दोषी बने जाछे। १३ खाली यहीलाय नी, बल्के वरा असकतिया बने घरे-घरे बेड़ाछे आर फालतू बात करे समय बिताछे, आर लोकेर कामोत बाधा दिछे। १४ वहीलाते मुई चहाची कि जवान राँडीला ब्याह करे बाल-बच्चा जनम दोक आर अपना परिवारेर देखभाल करोक जसे कि कोय लोक उसाक

बदनाम करवा ना पारे १५ क्यौँकि कुछुला राँड़ी बहके गहे आर शैतानेर पीछूत चले गहे। १६ अगर कोय विश्वासीर परिवारोत कोय राँड़ी छे, त वहीडा विश्वासी राँड़ीडार मदद करोक जसे कि मंडलीर पर बोझ ना पोड़े। आर मंडली उला राँड़ीर मदद आर सेवा करवा पारे, जैला राँड़ी मजबूर छे। १७ मंडलीर अगुवाला जैला अच्छा करे मंडलीर देखभाल करछे आर खास करे जैला अगुवा परमेश्वरेर वचन मेहनत से सुनाछे आर सिखाछे, उसाक सम्मान आर मजदूरी देयाल जोक। १८ क्यौँकि परमेश्वरेर वचन कोहचे, ‘जैला बैल दौनी मलछे, उला बैलेर मुखोत जाबी ना लगायेन’ आर यहोडा कहाल गहे, ‘मजदूरोक अपना मजदूरी पवार हक छे।’ १९ दुई या तीनझन लोकेर गवाही नी होले, मंडलीर कोय अगुवार खिलाफ कुछु ना सुनिस। २० यदि कोय अगुवा पाप करछे, वहाक विश्वासीलार सामनात बताय दे कि तुई गलती करिहिस जसे कि दोसराला विश्वासी डोराय जाय। २१ परमेश्वरोक आर मसीह यीशुक आर चुनाल फरीस्ताक गवाह समझे मुई तोक हुँसियार करे दिछी कि तुई पूरा दिल से इला बातोक मानेक आर कोय काम कहारो मुख देखे ना करिस। २२ बहुत जल्दी बाजी करे कहारो माथार पर हाथ राखे वहाक कोय सेवा करवार काम ना दिस जसे कि तुई दोसरा लोकेर पापेर काम से बचे रहिस आर अपना-आपोक पवित्र रखवा पारिस। २३ बेमारीरखुना खाली पानी खाने नी खाबो, बल्के अपना पेटोक ठीक

रखवार तने आर बार-बार बेमारी से दूर रहवार तने थोड़ेक करे अंगुरेर रसखानो खाबो। २४ कुछुला लोकेर पाप मालूम हंय जाछे, आर वहार इन्साफ पहिले हाजिर हंय जाछे। आर कुछुला लोकेर पाप पीछू करे मालूम होचे। २५ वही मान्दी कुछुला अच्छा कामेर बारे अच्छा से मालूम होचे, आर जैला कामेर बारे साफ से मालूम नी होचे, उलाव नुकाल नी रोहचे।”

मालिक आर गोलाम

६ सबला गोलामोक चही कि वरा अपना-अपना मालिकलाक पूरा इज्जत करे जसे कि कोय परमेश्वरेर नामेर आर हमसार शिक्षार बदनामी नी करवा पारे। १ अगर मालिक विश्वासी छे, त नौकर अपना मालिकोक अपना विश्वासी भई समझे वहार इज्जत करते कमी ना करे, बल्के वहार अच्छा से सेवा करे। क्योंकि जैला मालिकोक अपना नौकरेर सेवा से फायदा होचे, उला मालिक विश्वासी छे आर वरा प्रेम पाछे। इलार बारे तुई सिखाते रह आर प्रचार करते रह।

झूठा शिक्षा आर धनेर लोभ

३ कोय अगर दोसरा किसमेर शिक्षा दिछे आर यीशु मसीहार सच्चा वचनेर शिक्षा नी दिछे आर परमेश्वरेर भक्तिर शिक्षा नी मानछे, ४ त वहाँय घमंडी छे आर वहाँय कुछु नी जाने, बल्के वहाक झगड़ा करवार

आर बहसबाजी करवार बेमारी हंय गहे। इलार कारण से हिंसा, झगड़ा, निन्दा आर शक पैदा होचे। ५ आर उसार बुद्धि भ्रष्ट गहे, उसार बीचोत फालतू झगड़ा-झमेला होचे आर वरा सच्चाईक छोड़े दिहे। वरा समझेछे कि परमेश्वरेर भक्ति कमाई करवार एकटा जरियाय छे। ६ मगर सबुरे साथे भक्ति करना एकटा बोड़ो कमाई छे। ७ क्याँकि हमरा ना त इ-दुनियाँत कुछु आनिही आर ना साथे कुछु ले जामु। ८ अगर हमसार लिकिन खवार आर पिन्हवार छे, त यहीलाते सबुर करवा लागे। ९ मगर जहाँय पैसावाला हवा चहाचे, वरा पापोत पोड़े जवा पारे, बहुत किसमेर बेकार आर नोकसान करनेवाला फंदात फँसे जवा पारे, आर बर्बाद आर नाश हंय जवा पारे। १० क्याँकि टका-पैसार लोभ सब किसमेर बुराईर जड़ छे। कुछुला लोक टका-पैसार लोभोत पोड़े सच्चा विश्वास से भटके गहे, आर बहुत किसमेर दुःख से अपना जीवनडाक भरे दिहे।

तिमोथीक पौलुसेर आखरी सलाह

११ तिमोथी! तुई त परमेश्वरेर लोक छिस। वहीलाते तुई उला सबला गलत बात से दूर रहिस। आर जैडा सिरिफ सही छे, वहीडा करवार कोशिश करिस। परमेश्वर जैकिसम तोसे चहाचे वही किसम व्यवहार करिस। यीशु मसीहार पर भरोसा कर। दोसरा लोकोक प्रेम कर। परमेश्वरेर हुकूम मनवा ना छोड़ आर लोकेर पर गोस्सा ना कर। १२ जैमान्दी एकटा अच्छा फौज लड़ाई करवा नी छोड़छे। वहार मान्दी

तोहों अपना विश्वासेर तने लड़ते रहिस। हमेशार जिन्दगी जैडार तने परमेश्वर तोक जाब दिहे, उडाक पकड़े राख। इडा जिन्दगीर बारे तुई बहुत लोकेर आगुत विश्वासेर एकटा अच्छा गवाही दिहिस कि तुई यीशु मसीहार पर भरोसा करिहिस। १३ परमेश्वर जहाँय सभाको जिन्दगी दिछे आर मसीह यीशु जहाँय पुन्तियुस पिलातुसेर आगुत अपनार बारे सच बोलिल, उसार दोनोंझनार आगुत तोक इडा हुकूम दिछी कि १४ यीशु मसीहार घुरे ओसवार समय तक तुई उला हुकूम निर्दोष हंय ठीक से माने चल। १५ परमेश्वर सिरिफ एकटा राजा छे, जहाँय बड़ाई करवार लायक छे। वहाँय सबला राजार बीचोत सबसे बोड़ो राजा छे आर मालिकलार बीचतो सबसे बोड़ो मालिक छे। वहीडा परमेश्वरेर ठहराल दिनोत मसीह यीशु ओसबे। १६ वही परमेश्वर छे, जहाँय हमेशा रोहचे आर वहाँय कोयखुना नी मोरछे। वहाँय इकिसम रोशनीर बीचोत रोहचे, जहार तेज रोशनीर कारण से कोय वहार बगलोत जवा नी पारछे। वहाक कोय लोक कोयखुना नी देखे, आर ना अला कोय देखवा पारछे। वहार सम्मान आर राज हमेशा होक। १७ इडा दुनियाँत जहाँय पैसावाला छे, उसाक बता कि वरा दोसरा लोक से अपना-आपोक बेहतर ना समझे, आर उसाक यहोवडा बता कि वरा अपना धन-दौलतेर पर भरोसा न करे क्यौँकि धन-दौलत जल्दी खतम हंय जाबे। यहार बदले उसाक परमेश्वर पर भरोसा करवा कह, जहाँय हमसार सुखी

जीवनेर तने सब कुछ बेसी करे दिछे। १८ उसाक अच्छा काम करवा कोह आर जरूरत-मन्द लोकेर दिल खोले मदद करवा कह, आर उसार लिकिन जैला चीज छे, उला से दोसराझनाक मदद करवा कह। १९ इला काम करवार जरियाय पैसावाला लोकला अपना आगुकार जिन्दगीर तने एकटा मजबूत गराट बनाय ले जसे कि वरा असली जिन्दगीडाक पाय जाय।

तिमोथीक पौलुसेर आखरी सलाह

२० तिमोथी! परमेश्वर तोक जैखान काम करवार जिम्मेवारी सोपिहे, उखानोक इमानदारी से करेक। जैला बात परमेश्वरेर नजरोत ठीक नी छे आर झूठा ज्ञानेर बात छे, उला से दूर रह। २१ कोय-कोय लोक इला गलत शिक्षाक माने लिहे, आर वरा यीशु मसीहार बारे सही शिक्षाक मनवा छोड़े दिहे। परमेश्वर तुम्हाक आशीर्वाद करेक!

तिमोथीक पौलुसेर दोसरा चिट्ठी

अभिवादन

१-२ मोर प्यारा बेटा तिमोथी! मुई पौलुस छी। आर मुई यीशु मसीहार आर परमेश्वरेर इच्छा मुताबिक यीशु मसीहार दूत छी। परमेश्वर मसीह यीशुर जरियाय जैडा जिन्दगीर वादा करिहे, वहीडा वादाक लोकेर लिकिन बोलवार तने मोक पठाल गहे। वहीलाते मुई तोक इखान चिट्ठी लिखछी। मुई प्रार्थना करछी कि पिता परमेश्वर आर हमसार प्रभु यीशु मसीहा तोर पर दया करे आर शान्ति देते रहय।

शाबासी आर हौशला

३ मुई खाँटी मन से परमेश्वरेर भक्ति करछी, जैडा परमेश्वरेर भक्ति मोर बाप-दादोला करछिले। मुई रात-दिन तोर तने वहार शुकुरिया करछी। मुई तोक अपना प्रार्थनात हरखुना ख्याल करछी। ४ मुई तोर कानोनडाक ख्याल करछी आर तोक देखवार तने मुई छटपटाछी। तोक देखले मोर दिलडा खुशी से भरे जाबे। ५ मोक पूरा भरोसा छे कि तोर नानी लोइस आर तोर माँ यूनिकेर मान्दी तोहरो विश्वासटा मजबूत छे। ६ वहीलाते मुई तोक ख्याल कराय दिछी कि तुई अपना वरदानडाक

बढ़ाते रह, जैडा कि परमेश्वर तोक दिहे जैखुना मुई तोर पर अपना हाथ राखिहीनु। ७ क्याँकि परमेश्वर हमसाक डरवार आत्मा नी दे, मगर शक्ति, प्रेम, आर अपना-आपोक काबू रखवार आत्मा दिहे। ८ वहीलाते प्रभुर बारे लोकोक बताते ना शरमा। आर मोहरो कारण तुई ना शरमा क्याँकि मुई प्रभुर तने जेलेर सजा काटछी। मगर परमेश्वर जैखान शक्ति तोक दिहे, उ-शक्तिर मुताबिक मोर साथे खुश-खबरीर तने दुःख उठा। ९ वही परमेश्वर हमसाक पाप से मुक्ति दिहे, आर पवित्र जीवन बितवार तने हमसाक जाब दिहे। इडा ना समझेक कि कोय अच्छा काम करवार कारण वहाँय हमसाक चुने लिहे, बल्के परमेश्वर अपना मकसद पूरा करवार तने आर हमसार पर दया करवार कारण से चुने लिहे। दुनियाँडार बनवार पहिलेई परमेश्वर मसीह यीशुर जरियाय हमसार पर दया करिहे। १० आर अला हमसार यीशु मसीहार ओसवार बाद उडा दया देखा दिहे। वहाँय मौतोक हराय दिले आर हमसाक हमेशार जिन्दगी दिले, आर उडा जिन्दगीर बारे खुश-खबरी जरियाय हमसाक बताल गेल, जैडा कि कोयखुना खतम नी होबे। ११ यहीडा खुश-खबरीर तने परमेश्वर मोक प्रचारक, दूत आर शिक्षक बनाहे। १२ यहीलार कारण से मुई जेलेर सजा काटछी आर दुःख उठाछी। मगर मुई खुश-खबरी दुवार तने नी शरमाछी क्याँकि मुई जहाक विश्वास करिही, वहाक जानी। मुई इडा पक्का जानी कि वहाँय जैडा जिम्मेवारी मोक सोपिहे, उखानेर

वहाँय हिफाजत करबे, जैखुन तक वहाँय नी ओसछे। १३ जैला सटीक बात तुई मोर लिकिन से सुनिहीस, उलाक यीशु मसीहार प्रेम आर विश्वासेर साथे धरे राख। १४ आर पवित्र आत्मा जहाँय हमसार साथे रहछे, वहार मदद से उला सबलार हिफाजत कर, जैला तोक सोपाल गहे। १५ तुई अच्छा करे जानिस कि आसिया प्रदेशेर सबला लोक मोक छोड़े दिहे, इकिसम कि फुगीलुस आर हिरमुगिनेसो मोक छोड़े दिहे। १६ मुई प्रार्थना करछी कि परमेश्वर उनेसिफिरूसेर परिवारेर पर दया करे, क्यौंकि वहाँय बहुत बार मोर लिकिन ओसे मोर हिम्मत बढ़ाय मोर दिलडाक ठंढा करिहे आर जेलोत मोर साथे मुलाकात करते नी शरमाय। १७ जैखुना वहाँय रोम नगरोत ओसिल, त वहाँय बहुत मेहनत करे मोक छाभे निकलाल आर मोर साथे मुलाकात करिल। १८ जैडा काम वहाँय इफिसुस नगरोत करिहे, उलाक तुई अच्छा करे जानिस। प्रार्थना करछी कि जैखुना प्रभु यीशु दुनियाँत घुरे ओसबे, प्रभु वहार पर दया करे।

यीशु मसीहार एकइन ईमानदार सैनिक

२ वहीलाते मोर बेटा तिमोथी! मुई तोक कोहची कि तुई यीशु मसीहार दया से ताकतवर बने जा। २ आर बहुतला लोकेर आगुत यीशु मसीहार बारे जैला बात तुई मोर लिकिन से सुनिहीस, उला बातोक विश्वासी

लोकोक सोंपे दे जसे कि विश्वासी लोकला दोसरा लोकोक सिखवा पारे। ३ यीशु मसीहार अच्छा सैनिकेर मान्दी तुई हमसार साथे दुःख उठा। ४ एकझन अच्छा सैनिक जैखुना लड़ाई करवा जाछे त वहाँय दुनियाँर कोय दोसरा कामोत ध्यान नी दिछे क्योंकि वहाँय अपना हाकिमोक खुश करवा चाहचे। ५ वही मान्दी जहाँय खेलोत दौड़वार तने हिस्सा लिछे, वहाँय अगर ठीक नियम मुताबिक ना दौड़े त वहाँय इनाम नी पाछे। ६ आर जैडा गृहस्थ मेहनत करछे, फसलेर पहिला हिस्सा वहाके मिलवा लागे। ७ मुई जैडा हुकूम तोक दिछी, तुई इडा समझे देखेक। परमेश्वर तोक इला सबला बात बुझवार शक्ति दोक! ८ मसीह यीशुक याद करते रोह, जहाँय दाऊद राजार खानदान से छिले आर वहाँय मुर्दा से जिन्दा हंय उठिहे। मुई यहीडा खुश-खबरी लोकेर लिकिन प्रचार करछी। ९ आर यहार कारण से मुई दुःख सोहछी। इकिसम कि एकझन दोषी लोकेर मान्दी मोक जेलोत बान्हे रखाल गहे, मगर परमेश्वरेर वचन बन्हाल नी छी। १० वहीलाते मुई परमेश्वरेर चुनाल लोकलार तने सब किसमेर दुःख सहय लिछी, जसे कि यीशु मसीहा उसाको बचाय आर हमेशार जिन्दगी दे आर वहार महिमार भागी होय। ११ इडा बात सच छे कि अगर हमरा वहार साथे मोरे जामु, त वहार साथे जिन्दा रोहमु। १२ अगर हमरा वहार साथे दुःख उठामु त वहार साथे राजो करमु। अगर हमरा वहाक इन्कार करमु त वहाँव हमसाक इन्कार करबे।

१३ अगर हमरा वहार इच्छा पूरा नंहियो करवा पारी ताहरो पर प्रभु अपना वादा पूरा करबे। क्योंकि प्रभु जैडा वादा करछे, उडा पूरा करछे।

एकइन अच्छा कारीगर

१४ विश्वासी लोकोक इला बात ख्याल कराते रहिस। आर परमेश्वरेर आगुत उसाक हुँसियार करे दिस जसे कि वरा बेकार बात ले बहसबाजी ना करे। इला से कोय पैदा नी होचे, बल्के सुननेवाला लोकोक बर्बाद करे दिछे। १५ कठिन मेहनत कर जसे कि तुई परमेश्वरेर नजरोत काबिल बने रहिस। इकिसम कारीगर बनेक कि कोय लोक तोक शरमिन्दा करवा ना पारे। आर परमेश्वरेर सच्चा वचनडाक सही तरीका से इस्तेमाल करवा पारिस। १६ तुई लोकेर बेकार बातोत पोड़े ना रहिस क्योंकि इकिसम बात लोकोक परमेश्वर से दूर करते जाछे। १७ आर उसार शिक्षाला कैसरेर मान्दी फैलते जाबे आर लोकोक बर्बाद करे दिबे। इकिसम लोकेर दलोत हुमिनयूस आर फिलेतुस छे। १८ आर वरा सच्चाई से दूर चले गहे। इकिसम लोक मौत से जिन्दा हंय उठवार बारे सिखाछे कि विश्वासी लोकला पहिले से जिन्दा हंय उठिहे। इकिसम सिखाय यरा बहुतझनार विश्वासोक खतम करे दिहे। १९ मगर परमेश्वरेर वचन घरेर मजबूत नीवेर मान्दी छे आर वहात लिखाल छे, प्रभु परमेश्वर अपना लोकलाक चिन्हछे। जहाँय प्रभुर नाम लिछे, उसाक पाप से दूर रहवा चही। २० बड़ो लोकेर घरोत सिरिफ सोना आर रूपाड़े नी, बल्के

लकड़ीर आर माटीरो बरतन रोहचे। कुछु बरतन लोकेर सम्मानेर तने आर कुछु बरतन हर दिन घरोत इस्तेमाल हवार तने होचे। २१ अगर कोय लोक अपना-आपोक इला बात से शुद्ध राखबे त वहाँय इज्जतेर बरतन आर शुद्ध ठहरिबे आर अपना मालिकेर कामोत ओसबे, आर सब किसमेर भला कामेर तने तैयार रोहबे। २२ दोसराला जवान लोकेर मान्दी बुरा बिचारोत पोड़े ना रहिस, बल्के उला से दूर रहिस। जैला बात अच्छा छे, उलार मुताबिक चलेक। जहाँय-जहाँय साफ दिल से प्रभुर नाम लिछे, उसार साथे प्रेम, मेल-मिलाप आर विश्वासोत बने रह। २३ मगर बेकूफ लोकेर मान्दी बहसबाजी ना करिस, क्योंकि तुई इडा जानिस कि इला से झगड़ा होचे। २४ प्रभुर सेवकोक झगड़ा करनेवाला नी हवा लागे, मगर वहाक सभारो साथे दयालु हवा लागे। लोकोक सीखानेवला आर बरदास्त करनेवाला हवा लागे। २५ जैला लोक प्रभुर सेवकेर खिलाफ बात बोलछे, उला लोकोक वहाँय नरमभाव से समझाक। इकिसम हवा पारे कि इकिसम व्यवहार से परमेश्वर उसार मन बदले दे आर वरा सच्चाईडाक जाने ले। २६ तब जैला लोक शैतानेर इच्छा पूरा करवार तने सेवकर खिलाफ बोलछिले, वरा शैतानेर चंगुल से बचे जाय।

आखरी युगेर अधर्म

३ तिमोथी! तुई इडा बात याद राखिस कि आखरी युगोत बहुत कठिन समय ओसबे। २ क्याँकि लोक दोसरा लोकेर मदद नी करबे, खाली अपना भलाईर बारे सोचबे। लोभी होबे, बोड़ो-बोड़ो डींग मारनेवाला होबे, घमंडी, शिकायत करनेवाला होबे, माँ-बाफेर हुकूम नी मानबे, नमक हराम होबे, परमेश्वरेर खिलाफ पाप करबे, ३ दया नी करबे, माफ नी करबे, झूठा इलजाम लगाबे, अपना-आपोक काबूत नी राखबे, कठोर व्यवहार करबे, भलाई कामेर दुश्मन होबे, ४ कान मटीयाय बोठे रहबे, अपना बड़ाई करबे आर परमेश्वरोक प्रेम नी करबे, बल्के भोग-विलासोत मन लगाबे, ५ बाहरी रूप-रंग देखले इडा मालूम होबे कि वरा परमेश्वरेर बहुत भक्ति करछे, मगर परमेश्वरोक भक्ति करवार शक्तिडाक नी चाहचे। इकिसम लोक से तुई दूरोत रहिस। ६ यही मान्दी लोकेर भीतर से कुछुला लोक दोसरा लोकेर घरोत ढुके जाछे आर कमजोर स्त्रीलाक अपना बशोत करे लिछे। इला स्त्री पाप से दबाल छे आर उसार बुरा बिचार उसाक अपना बशोत करे राखियेह। ७ इकिसम स्त्रीला हरखुना नया बात सीखते रोहचे, मगर वरा परमेश्वरेर सच्चा शिक्षाक पहचान करवा नी पारछे। ८ यन्नेस आर यम्ब्रेस नामेर दुईइन जादूगर छिले आर वरा मूसा नबीर खिलाफ करिहिले। उसारे मान्दी यहोला लोक सच्चाईर बिरोध करछे आर उसार बुद्धि बिगड़े गहे। बाहरी

रूप से त वरा विश्वासी लागछे, मगर सही माने त नी छे। ९ मगर इला लोक आर आगु बढवा नी पारबे, क्याँकि जैकिसम लोक यन्नेस आर यम्ब्रेसेर बेकूफी जाने गहिले, वही किसम इसारो बेकूफी लोक जाने लिबे।

तिमोथीक पौलुसेर खास-सुझाव

१० मगर तुई मोर उपदेश, चाल-चलन, मकसद, विश्वास, प्यार आर दुःख सहवार शक्तिर बारे जानिस। आर तुई मोर बारे जानिस कि मुई केनमन करे अपना काम लगातार करते रोहछी। ११ तुई यहोडा जानिस कि मोर पर कतेक दुःख-मुसीबत ओसिल आर लोकला मोक कतेक सताहे। यहार अलावा तुई जानिस कि अन्तकिया, इकोनियम आर लुस्त्रा शहरोत मोर पर कतेक दुःख-मुसीबत ओसिहिले, मगर प्रभु इला सबला से मोक बचाहे। १२ जतेला लोक मसीह यीशुत भक्तिर साथे जिन्दगी बितवा चाहचे, वरा सबकोय सताल जाबे। १३ बदमाश आर धोखाबाज लोक बिगरिते जाबे। वरा खुद धोखा खाबे आर लोकलाको धोखा दिबे। १४ जैला बातोक तुई सीखिहिस, उलाक अमल करते रह आर पूरापूरी विश्वासी करेक क्याँकि तुई जानिस कि तुई कहार लिकिन से सीखिहिस। १५ तुई छोटय से परमेश्वरेर वचन सीखते ओसछिस। इला शिक्षा तोक बुझवार तने मदद करबे कि यीशु मसीहार पर विश्वास करले परमेश्वर तोक पाप से मुक्ति दिबे। १६ पूराखान पवित्र शास्त्र

परमेश्वरेर वचन छे, जैखान सही शिक्षा दुवार तने, गलत शिक्षाक ठीक करवार तने, गलत व्यवहारोक ठीक करवार तने आर सिखवार तने कि केनमान्दी परमेश्वरेर इच्छा मुताबिक चलवा लागे, १७ जसे कि परमेश्वरेर लोकला हर किसमेर अच्छा काम करवार तने तैयार रहे।

पौलुसेर आखरी बात

४ मसीह यीशु जहाँय जिन्दा आर मुर्दा लोकेर बिचार करबे आर धरतीर पर राज करवा ओसबे, मुई वहार आर परमेश्वरेर आगुत तोक निर्देश दिछी २ कि सब कुछ बरदास्त करे तुई परमेश्वरेर वचन प्रचार कर। मौका-बेमौका सबखुना तैयार रह। आर विश्वासी लोकोक ठीक कर जैखुना वरा कोय गलती करे। यदि कोय गलती करे त डाँटिक आर हौशला बढ़ा। ३ क्योंकि इकिसम दिन ओसबे, जैखुना लोकला सच्चा शिक्षा सुनवा नी चाहबे। मगर जैला बुरा काम करवा चाहचे, वहीला करबे आर मन मुताबिक सुनवार तने शिक्षकलाक छाभबे। ४ वरा अपना कान सच्चा शिक्षा से हटाय किस्सा-कहानीर पर लगाबे। ५ मगर तुई इला सबला बात से हुँसियार रह, दुःख-मुसीबत उठा, खुश-खबरीर प्रचार कर आर अपना सेवा करवार कामडा पूरा कर। ६ मोर मौतेर समय नजदीक चले ओसिहे आर मोर जिन्दगीडा पानीर मान्दी परमेश्वरोक चढ़ाय देयाल गहे। ७ मुई पूरा शक्ति लगाय लड़िही। मुई

अपना दौड़ पूरा करे दिही आर अपना विश्वासोत मजबूत बने छी।
८ भविष्योत परमेश्वर मोर तने स्वर्गोत एकटा मुकुट राखियेह, जैडा बताबे कि परमेश्वर मोक धर्मी बनाहे। प्रभु यीशु, जहाँय ठीक-ठीक इन्साफ करछे, इडा मुकुट वहाँय मोक उदिना दिबे, जैदिना वहाँय सब लोकेर इन्साफ करबे। इडा इनाम खाली मोहके नी दिबे, मगर उसाको दिबे, जैला वहार घुरे ओसवार इन्तेजार करछे।

पौलुस तिमोथीक जल्दी ओसवा कोहचे

९ तिमोथी! तुई मोर लिकिन जतेक जल्दी ओसवा पारिस, ओसेक।
१० देमास भई इडा दुनियाँर जिनिमोक प्रेम करे मोक छोड़े दिहे आर थिसलेनिका शहर चले गहे। क्रेसकेंस भई गलतिया शहर आर तितुस भई दलमतिया शहर चले गहे। ११ सिरिफ लूका मोर साथे छे। तुई मरकुसोक साथे ले चले ओसेक क्यौँकि प्रचारेर कामेर तने वहाँय मोर बहुत मदद करवा पारबे। १२ तुखिकुस भईक मुई इफिसुस शहरोत पठाही। १३ मुई अपना पोशाकलाक तरोआस शहरोत करपुस भईर घरोत छोड़े ओसिही। मोर पोशाकलाक, किताबलाक, खास करे बहि-खातालाक, ओसवारखुना साथे ले ओसिस। १४ सिकन्दर कम्हार मोर कामोत बहुत दुःख दिहे। प्रभु वहार कामेर तने बदला लिबे। १५ तोहों वहा से हुँसियार रहिस क्यौँकि वहाँय हमसार प्रचारेर बहुत बिरोध करिहील। १६ रोम शहरोत जैखुना मोक पहिला बार इन्साफेर तने

हाकिमेर आगुत थाड़ो कराल गहिले, उखुना कोय मोर तरफ से नी बोले, मगर सबकोय मोक छोड़े दिहिले। मुई प्रार्थना करछी कि परमेश्वर उसाक माफ कर दे। १७ मगर प्रभु मोर मददगार छिले आर मोक शक्ति दिहिले जसे कि मोर जरियाय प्रचारेर काम पूरा होय आर सबला गैर-यहूदी लोक यीशु मसीहार बारे सुने। प्रभु मोक बाघेर मुख से बचाय लिले, जैखुना लोक मोक अपना मसीही विश्वासेर कारण जान से मारनेवाला छिले। १८ आर प्रभु मोक हरेकटा बुरा काम से बचाबे आर अपना स्वर्ग-राजोत हिफाजत करे पहुँचाय दिबे। व्हारे सबाशी आर बड़ाई युग-युग तक होते रहोक। आमीन्!

आखरी नमस्कार

१९ प्रिस्का आर वहार पति अक्विला आर उनेसिफूरूस भईर परिवारोक मोर नमस्कार। २० इरासतुस भई कुरिनथियुस शहरोत ठहरे गेल आर त्रुफिमुस भई बेमार छिले आर मुई वहाक मिलेतुस शहरोत छोड़े ओसिही। २१ जाड़ेर मौसम शुरू हवार आगुते चले ओसवार कोशिश करिस। यूबूलुस, पुदेस, लिनुस, कलोदिया आर सबला विश्वासी भा-बहिनोक नमस्कार। २२ मुई प्रभुर लिकिन प्रार्थना करछी कि वहाँय तोर साथे रहे आर तोर पर अपना दया करते रहय।

तितुसोक पौलुसेर चिट्ठी

१ प्रिय तितुस, मुई पौलुस छी। मुई परमेश्वरेर सेवक आर यीशु मसीहार दूत छी। परमेश्वर मोक पठाहे कि मुई वहार चुनाल लोकलार विश्वासोक मजबूत करी, आर सच्चा ज्ञान सीखाई कि वरा परमेश्वरेर रास्तात जिन्दगी बिताय। २ इला ज्ञान विश्वासीलाक भरोसा दिछे कि परमेश्वर उसाक अनन्त जीवन दिहे। परमेश्वर जहाँय झूठ नी बोलछे, दुनियाँडा बनवार आगुते परमेश्वर अनन्त जीवनेर बारे वादा दिहिले। ३ आर परमेश्वर ठीक समय खुश-खबरीर जरियाय अनन्त जीवनेर बारे बताहे। मुक्तिदाता परमेश्वरेर हुकूम मुताबिक इडा खुश-खबरी प्रचारेर काम मोक सोंपाल गहे। ४ तितुस, तुई मोर सच्चा बेटा छिस क्योंकि तोर विश्वास मोहरे मान्दी छे। पिता परमेश्वर आर हमसार मुक्तिदाता यीशु मसीहा तोर पर दया करे आर शान्ति दे।

क्रेते टापूत तितुसेर काम

५ मुई क्रेते टापूत तोक छोड़े ओसिहिनु जसे कि जैला बाँकी काम पूरा कराल नी जाय, उलाक पूरा करिस आर मोर हुकूम मुताबिक नगर-नगर

जाय मंडलीर नेता बहाली करिस। ६ मुई तोक बताछी कि वहाक निर्दोष आर एकझन पत्नीर पति हवा चही, आर वहार बाल-बच्चा यीशु मसीहार पर विश्वास करनेवाला हवा चही। आर कोय इडा कहवा नी पारे कि वहार छुवाला बदचलन आर बेकाबू छे। ७ जहाँय मंडलीर अगुवा होबे, वहाक निर्दोष हवा चही क्योंकि वहाक परमेश्वरेर मंडलीर जिम्मेवारी देयाल गहे। वहाक घमंडी, गोस्सावाला, शराबी, मारपीट करनेवाला हवा नी चही आर ना वहाक बेईमानीर कमाईर लोभ हवा चही। ८ मगर वहाक मेहमानेर इज्जत करनेवाला हवा चही आर वहाक इकिसम हवा चही कि अच्छा काम करते वहाक अच्छा लागे। आर वहाक बुद्धिवाला, अच्छा इन्साफी, पवित्र आर अपना-आपोक काबूत रखनेवाला हवा चही। ९ जहाँय अगुवा होबे, वहाक जैडा वचन सिखाल गहे, उडार पर मजबूत से विश्वास करे आर वहात बने रहय जसे कि वहाँय दोसरा विश्वासीक सिखवा पारे आर बिरोध करनेवाला लोकेर मुख बन्द करवा पारे। १० बहुतला बेकाबू लोक छे, जैला बेकार बात करछे आर लोकोक धोखा दिछे। आर इकिसम लोकेर बीच से बेसी उला यहूदी लोक दल छे, जैला खतना करवार पर बेसी जोर दिछे। ११ इसार मुख बन्द करना जरूरी छे, इला लोक नीच कमाईर तने बेकार बात सिखाछे आर घर परिवारेर लोकोक बिगड़ाय दिछे। १२ उसारे एकझन नबी बताहिल, “क्रेतेर लोक हमेशा झूठ बोलछे, दुष्ट जानवरेर

मान्दी छे, आर आलसी आर पेटू छे।” १३ उसार बारे गवाही सच छे। वहाते उसाक कड़ाई से चेताय दे कि वरा विश्वासोत पक्का हंय जाय। १४ आर उसाक बता कि वरा यहूदी लोकेर झूठा किस्सा-कहानी पर मन ना लगाय आर ना उला लोकेर हुकूमेर पर मन लगाय, जैला लोक सच बातोक छोड़े दिहे। १५ शुद्ध लोकेर तने सब कुछ शुद्ध छे, मगर खराब आर अविश्वासी लोकेर तने सब कुछ अशुद्ध छे। खराब आर अविश्वासी लोकेर बुद्धि आर सोच-बिचार दोनोंडा खराब हंय गहे क्योंकि वरा अच्छा चीज आर खराब चीजेर बीचोत फरक करवा नी पाछे। १६ उला खराब आर अविश्वासी लोक कोहचे कि हमरा परमेश्वरोक जानी, मगर अपना काम से परमेश्वरोक इन्कार करछे। परमेश्वर उसासे घिण करछे। वरा परमेश्वरेर हुकूम नी मानछे आर कोय अच्छा काम करवार लायक नी छे।

अच्छा चाल-चलनेर तने खाँटी शिक्षा

२ मगर बेटा तितुस! तुरई हरखुना सही बातोक सीखा। १ बुढ़ालाक सीखा कि वरा अपना-आपोक काबूत राखे, लोक उसाक सम्मान दे आर वरा बुद्धिमान बने आर पक्का विश्वासी बने आर लोकोक प्रेम करनेवाला बने आर बर्दास्त करनेवाला बने। ३ आर यही किसम बूढ़ियालाक सीखा कि उसार चाल-चलन पवित्र लोकेर मान्दी होक।

वरा कहारो चुगली ना करे आर ना शराबी बने, ४ मगर अच्छा बातोक सीखानेवाला होक। आर वरा जवान स्त्रीलाक सावधान करे कि वरा अपना-अपना पतिक आर बच्चालाक प्रेम करे। ५ आर अपना-आपोक काबूत राखे, पवित्र बने आर घरेर काम-काजोत मन लगाय, लोकेर पर दया करे आर अपना पतिर बात माने जसे कि परमेश्वरेर वचनेर निन्दा नी होय। ६ यही किसम करे जवान लड़काक सीखा कि वरा सब बातोत अपना-आपोक काबूत राखे। ७ तितुस! तुई अच्छा काम कर जसे कि वरा तोक देखे सिखवा पाड़े। तुई लोकोक अच्छा बिचार से इकिसम सीखा कि लोक तोर सम्मान करे। ८ आर सच्चाईक सीखा कि तोर शिक्षाक कोय बुरा कहवा नी पाड़े आर तोर बिरोधीला शरमोत पोड़े जाय क्योंकि वरा हमसार बारे कोय खराब बात कहवा नी पारे। ९ आर गोलामलाक सीखा कि वरा अपना मालिकेर हरेकटा बातोक माने आर उसाक खुश राखे आर उल्टा-पुल्टी जवाब ना दे। १० आर मालिकलार कोय जिनिस चुरी ना करे, मगर ईमानदार आर विश्वासयोग्य बने काम करे जसे कि वरा हमसार मुक्तिदाता परमेश्वरेर शिक्षार सोभाक बढ़ाय। ११ परमेश्वर लोकेर पर अपना दया देखाहे, आर वहाँय चाहचे कि सब लोक बचे जाय। १२ आर परमेश्वरेर दया हमसाक सिखाछे कि हमसाक गलत आदतोक आर संसारेर भोग विलासोक छोड़े दुवा लागे, आर अपना-आपोक काबूत राखे, धर्मी बने आर भक्ति करे इडा युगोत

जीवन बितवा लागे। १३ हमसार लिकिन एकटा खुशीर उम्मेद छे कि हमसार महान परमेश्वर आर मुक्तिदाता यीशु मसीहा अपना महान शक्तिर साथे हमसाक दखा दिबे। १४ यीशु हमसार तने अपना जानडा दे हमसाक पाप से आजाद करिल आर हमसार मनडाक पवित्र करिल जसे कि हमरा वहार अपना लोक बने जई आर अच्छा काम करवार तने हरखुना इच्छा राखी। १५ इला सबला बातोक पूरा अधिकार से लोकोक समझा आर सीखा, जसे कि कोय लोक कहवा नी पारे जे तुई कुछु नी जानिस।

विश्वासी लोकेर व्यवहार

३ विश्वासी लोकोक याद दिलाते रह कि वरा राजार आर हाकिमेर हुकूम माने। हरखुना अच्छा काम करवार तने तैयार रहय। २ ना कहाको बदनाम करे आर ना झगड़ा करे, बल्के लोकेर साथे नरम व्यवहार करे आर कहाको छोटे ना समझे। ३ मोक इला बातोक बोलवार कारण छे क्याँकि हमराव पहिले बेकूफ छिनु। कहना नी मानछिनु। गलत फहमीत पोरे रहनेवाला आर हर किसमेर भोग-विलासेर गोलाम बने छिनु। आर हमरा बुरा छिनु आर दोसरा लोकोक देखे जलछिनु। लोक हमसासे नफरत करछिले, आर हमरा उसाक नफरत करछिनु। दोसरा लोकोक दुश्मन समझेछिनु। ४ मगर हमसार मुक्तिदाता परमेश्वर मानुषेर पर दया

करे आर अपना प्रेम देखाय, ५ हमसाक बचाल। परमेश्वर हमसाक हमसार धर्मेर काम देखे नी, बल्के दयार कारण से बचाल आर पवित्र आत्मार जरियाय हमसार पाप धोय हमसाक नया जनम आर नया जिन्दगी दिहे। ६ आर परमेश्वर हमसार मुक्तिदाता यीशु मसीहार जरियाय हमसार पर पवित्र आत्मार शक्ति पूरापूरी ढाले दिहे। ७ इकिसम करे परमेश्वर अपना दयार कारण से धर्मी ठहराल आर हमसाक अपना वारिस बनाल, आर अनन्त जीवनेर उम्मेद दिले। ८ आर इला बात सच छे आर पूरापूरी विश्वास करवार बात छे। मुई चाहची कि तुई इला बातेर बारे जोर लगाय आर भरोसा दिलाय बोलिस, जसे कि परमेश्वरेर पर विश्वास करनेवाला लोक अच्छा काम करते मन लगाय। इला सबला बात अच्छा आर लोकेर भलाईर तने छे। ९ जैला लोक खानदानेर बारे बेकार बहसबाजी करछे, उला बहसबाजी से दूर रहिस। आर यहूदी लोकेर नियम-कानून ले जैला लोक झगड़ा आर मतभेदेर बात करछे, उला बात से दूर रहिस। इला से विश्वासी लोकोक कोय पैदा नी छे आर बेकार छे। १० अगर कोय फूट पैदा करछे, त उसाक कम से कम दुई बार चेताय दे, अगर वरा नी माने, त वहार बाद उसासे अलग हंय जा। ११ क्योंकि तुई खुद जानिस कि इकिसम लोक प्रभुर रास्ता से भटके गहे। आर वरा पाप करे अपना-आपोक दोषी बनाछे।

सलाह आर बिनती

१२ मुई तोर लिकिन जैखुना अरतिमास या तुखिकुसोक पठामु, त तुई मोर लिकिन निकुपुलिस शहर ओसवार भरसक कोशिश करिस क्याँकि वहीठिन जाड़ार मौसम बितवार ख्याल राखीही। १३ वकील जैनास आर अप्पुलोसोक उसार रास्तार तने जे कुछु जरूरत होबे, उसार तने पूरापूरी मदद करिस जसे कि उसाक कोय चीजेर घटी-कमी ना होय। १४ विश्वासीलाक दोसराझनार जरूरतलाक पूरा करवार तने अच्छा कामोत लागे रहवा लागे जसे कि अपना-अपना जीवनोत फल आने। १५ तितुस! हमसार सभारो तरफ से तोक आशीर्वाद आर प्रेम। आर सबला विश्वासीक हमसार प्रणाम, जहाँय हमसाक प्रेम करछे। परमेश्वर तुमसार पर दया करते रोहोक।

फिलेमोनोक पौलुसेर चिट्ठी

परिचय आर आशीर्वाद

१-२ हमसार सहकर्मी फिलेमोन, बहिन अपफियाक, हमसार साथी प्रचारक अरखिप्पुस आर फिलेमोनेर घरेर सबला विश्वासी, मुई पौलुस छी। यीशु मसीहार बारे प्रचार करवार कारण मुई अला जेलोत छी। हमसार भई तिमोथी इठिन हमसार साथे छे। मुई इखान चिट्ठी तुमसार तने लिखछी। ३ हमसार पिता परमेश्वर आर प्रभु यीशु मसीहार तरफ से तुमसाक दया आर शान्ति मिलते रोहोक।

फिलेमोनेर प्रेम आर विश्वास

४ जैखुना मुई प्रार्थना करछी, मुई हरखुना तोर तने परमेश्वरेर बड़ाई करछी। ५ कारण, मुई सुनछी कि तुई प्रभु यीशुर पर विश्वास करछिस, आर परमेश्वरेर लोकलाक प्रेम करछिस। ६ जैखुना तुई अपना विश्वासेर बारे लोकोक बताछिस, त मुई प्रार्थना करछी कि वरा तोर उला सबला आशीवदिर बारे जाने, जैला तोक मसीहा दिहे। ७ भई फिलेमोन, तोर प्रेम देखे मोक बहुत खुशी आर शान्ति मिलिहे, क्याँकि तोर जरियाय सबला विश्वासीर मनोत नया जोश ओसे गहे।

उनेसिमुसेर तने पौलुसेर अनुरोध

८ वहीलाते मसीहा मोक हिम्मत दिहे कि मुई तोक हुकूम दुवा पारी कि तोक की करना छे। ९ मुई पौलुस, एकझन बूढ़ा लोक आर मसीह यीशुर कैदी छी। मुई तोर पर हुकूम चलवा नी चाहची, मगर मुई तोक प्रेम से बिनती करे कोहची। १० जैखुना मुई जेलोत छिनु, उखुना उनेसिमुस मोर बेटा बने गहिले क्योंकि वहाँय मोर जरियाय यीशुर पर विश्वास करिल। मुई वहारे तने तोर लिकिन बिनती करछी। ११ वहाँय पहिले तोर तने कोय कामेर नी छिले, मगर अला मोर तने आर तोर तने बहुत बेसी कामेर बने गहे। १२ मुई वहाक तोर लिकिन पठाछी। वहाँय मोर केलजार टुकड़ा छे। १३ यीशु मसीहार खुश-खबरी प्रचार करवार कारण से मुई जेलखानात छी। वहाक मुई खुद अपनार लिकिन रखवा चाहचिनु जसे कि वहाँय तोर बदले इखान जेलोत मोर सेवा करे। १४ मगर मुई तोर इच्छा बिना वहाक रखवा नी चाहनु। मुई चाहची कि तुई मोर मदद खुशी-खुशी करिस, कोय जोर जबरदस्ती से नी। १५ मोक इकिसम लागछे कि परमेश्वर उनेसिमुसोक कुछु दिनेर तने तोसे अलग हवा दिले, जसे कि वहाँय हरखुना तोर बगलोत रोहये। १६ मगर अला से उनेसिमुसोक गोलाम ना समझिस, बल्के गोलाम से बढ़े समझेक। वहाक अपना भई समझे राखेक। वहाँय मोर तने त बहुत प्यारा छे। अला वहाँय गोलाम हिसाबे आर विश्वासी भई हिसाबे तोर तने आढ़ो

बेसी प्यारा होबे। १७ वहीलाते तुई अगर मोक परमेश्वरेर कामोत अपना साथी समझेछिस, त वहाक इकिसम करे ग्रहण करेक जैकिसम कि तुई मोक ग्रहण करिहिस। १८ अगर वहाँय तोर कुछु नोकसान करे दिहे या वहार लिकिन तुई कुछु पाछिस, त मोर नामे लिखे राख। १९ मुई पौलुस खुद अपना हाथ से लिखछी कि मुई उडाक खुद चुकाय दुम। मगर मुई तोक कहवा चाहची कि तोर पूराडा जीवनेर पर कर्जा छे, आर जैडा कर्जा तोर पर मोर छे। २० हे मोर भई, प्रभुर नामे मोर तने इकिसम काम करो कि मोर दिलडात सुकुन मिले। २१ मोर भरोसा छे कि तुई मोर हुकूमडाक मानबो। वहीलाते तोक लिखछी, आर इडा जानी कि जे कुछु मुई त कोहची, तुई वहा से बेसी करबो। २२ आर यहोडा लिखछी कि तुई मोर रहवार तने जगह ठीक करे राखबो। मोक उम्मेद छे कि परमेश्वर सबला प्रार्थना सुनबे आर तुम्हरा मोक पाय जाभेन। २३ इपफ्रास जहाँय यीशु मसीहार कारण से मोर साथे जेलोत छे, तोक नमस्कार पठाछे। २४ आर मरकुस आर अरिस्तखुर्स आर दोमास आर लूका, जैला मोर साथे काम करछे, सबकोय तोक नमस्कार पठाछे। २५ हमसार प्रभु यीशु मसीहार दया तुमसार आत्मार पर होते रोहोक।

इब्रानी

यीशु परमेश्वरेर बेटा छे

१ पुराना जमानात परमेश्वर हमसार खानदानेर लोकलार साथे थोड़ेक-थोड़ेक करे बात करिल आर नबीलार जरियाय अलग-अलग तरीका से बात करिहे। २ मगर इडा आखरी दिनोत हमसार साथे अपना बेटार जरियाय बात करिहे। आर व्हारे जरियाय परमेश्वर पूराडा दुनियाँक बनाहे। यही बेटाक परमेश्वर सबला चीजेर पर वारिस हवार तने चुने लिहे। ३ यहाँय परमेश्वरेर रोशनी आर एकदम परमेश्वरेर रूप छे। आर अपना शक्तिशाली वचनेर जरियाय सबला चीजोक संभलाय राखिहे। आर वहाँय हमसार पाप धोय दिहे, आर स्वर्गोत महान परमेश्वरेर दहिना बगल बोठे गहे। ४ आर परमेश्वर अपना बेटाक फरीस्ताला से बोड़ो बनाहे, आर उसासे बोड़ो नाम दिहे।

परमेश्वरेर बेटा फरीस्ताला से बोड़ो छे

५ परमेश्वर यीशुक कोहये, “तुई मोर बेटा छिस, आज मुई तोर पिता बने गही।” आर यहोडा कोहये “मुई व्हार पिता होमु, आर वहाँय मोर बेटा

होबे।” मगर परमेश्वर कोय फरीस्ताक कोयखुना इकिसम बात नी कोहये। ६ जैखुना परमेश्वर अपना प्यारा बेटाक दुनियाँत पठाले, त वहाँय अपना सबला फरीस्तालाक कोहले, “तुम्हरा माटीत पोड़े वहार भक्ति करो।” ७ परमेश्वरेर शास्त्रोत फरीस्तालार बारे कहाल गहे, “परमेश्वर अपना फरीस्तालाक हवा बनाहे, आर अपना सेवकलाक धधकाल आगिन बनाहे।” ८ मगर वहाँय अपना बेटार बारे कोहचे, “हे परमेश्वर, तोर राजगद्दी युग-युग तक रोहबे, आर तोर शासन सच्चा आर सही छे। ९ तुई सही चीज से प्रेम करछिस आर बुरा चीज से घिण करछिस। यही तने परमेश्वर जहाँय तोर परमेश्वर छे, वहाँय तोर साथीला से बेसी तोक सम्मान दिहे।” १० आर यहोडा कोहये “प्रभु, सबसे पहिले तुई इडा दुनियाँर नींव दिहिलो आर आसमान तोर हाथेर कारीगिरी छे। ११ इला सबला खतम हंय जाबे, मगर तुई हमेशा रोहबो। इला सबला कपड़ार मान्दी पुराना हंय जाबे, १२ आर तुई इलाक चादरेर मान्दी लेपटे लिबो, आर इलाक कपड़ार मान्दी बदले देयाल जाबे, मगर तुई एके किसम रोहबो, तोर जिन्दगीर साल कभी खतम नी होबे।” १३ आर परमेश्वर अपना बेटाक कोहये, “तुई मोर दहिना बगल बोठेक, जब तक कि मुई तोर दुश्मनलाक तोर पाँर नीचानेर पीढ़ा बनाय नी दिछी।” मगर इकिसम बात स्वर्गेर फरीस्तालार अन्दर से परमेश्वर

कहाको नी कोहये। १४ तब फरीस्ताला की छे? फरीस्ताला सेवक छे जैलाक परमेश्वरेर लोकलार सेवा करवार तने पठाल गहे।

परमेश्वर से दूर हवार चेतावनी

२ यही तने हमसाक उला बातेर पर आढ़ो बेसी ध्यान दुवा लागे, जैला हमरा सुनिही जसे कि हमरा भटके ना जई। २ आर जैला नियम-कानून फरीस्तालार जरियाय कहाल गहिले, उला बात लोकेर लिकिन सच्चा साबित होल। जैला लोक इलाक नी मानिल, उसाक सजई मिलिल। ३-४ मुक्ति पवार बारे सबसे पहिले प्रभु यीशु बताहिले, आर जैला लोक प्रभुर बातला सुनिहिले, इला बातोक हमसार लिकिन सच साबित करिल। आर परमेश्वरो जैखुना चाहले, वहाँय चिन्ह आर चमत्कारेर जरियाय आर पवित्र आत्मार बरदानेर जरियाय इला बातेर बारे बताते रोहोल। अगर हमरा इडा कीमती बातोक ठुकराय दी, त कसे करे बचमु?

परमेश्वर यीशुक महिमा आर इज्जत दिहे

५ जैडा ओसनेवाला दुनियाँर बारे हमरा बोलछी, परमेश्वर उडा दुनियाँक फरीस्तालार अधिकारोत नी करे। ६ परमेश्वरेर पवित्र वचनोत इकिसम लिखाल गहे, “मानुष के छे? जे तुई उसार चिन्ता करछिस? मानुष के छे? जे तुई उसार बारे सोचेछिस? ७ तुई उसाक स्वर्गेर फरीस्ताला से

थोड़ेके छोटे करिहिस, तुई उसाक बड़ाई आर इज्जत दिहिस, जैकिसम राजाक मुकुट पिन्हाल जाछे। ८ तुई सब चीजोक उसार पाँर नीचानोत करे दिहिस।” वहीलाते परमेश्वर जब सब कुछ मानुषेर अधिकारोत करे दिहे, त आर कुछ बाँकी नी रोहिल, जैला उसार अधिकारोत नी होल। मगर हमरा अभी तक सब कुछ उसार अधिकारोत नी देखछी। ९ मगर हमरा देखछी कि यीशुक, कुछ समयेर तने फरीस्ताला से थोड़ेक छोटे कराल गहिले। मगर अला वहाक महिमा आर इज्जतेर मुकुट पिन्हाल गहे, क्याँकि वहाँय मौतेर तकलीफ उठाहिले, आर परमेश्वरेर दया से हर एकटा लोकेर तने मौतेर स्वाद चाखिहिले। १० सब कुछ परमेश्वरेर तने आर परमेश्वरेर जरियाय होयेह। वहीलाते परमेश्वर चाहचे कि वहाँय बहुत लोकोक अपना बेटा-बेटी बनाय, आर अपना महिमार भागीदार बनाय। वहीलाते वहाँय उपाय बनाल कि यीशुक क्रुसेर दुःख उठाना जरूरी छे। इडा उपाय परमेश्वरोक बहुत अच्छा लागिल, आर इकिसम करे यीशु लोकेर मुक्तिदाता बने गेल। ११ यीशु लोकोक पवित्र करछे। यीशु आर वहार पवित्र लोकेर पिता एकेझन छे। वहीलाते यीशु पवित्र कराल लोकलाक भा-बहिन कोहते लाज नी करछे। १२ जैकिसम कि परमेश्वरेर पवित्र शास्त्रोत लिखाल छे, “मुई तोर नाम अपना भा-बहिनलाक सुनामु, सभार बीचोत मुई तोर नामेर भजन गान करमु” १३ आर यहोडा लिखाल छे, “मुई व्हारे पर भरोसा राखमु” आर

“देखेक, जैला छुवाक परमेश्वर मोक दिहे, मुई उला छुवार साथे इठिन छी।” १४ परमेश्वरेर उला छुवा मांस आर खूनेर लोक छे, वहीलाते यीशु उसारे मान्दी मांस आर खूनेर मानुष बने गेल जसे कि वहार मौतेर जरियाय शैतानेर शक्तिक खतम करे दे। १५ आर जतेला लोक मौतेर डर से पूरा जिनदगी गोलामेर मान्दी बिताछिले, यीशु उसाक आजाद करे। १६ क्याँकि यीशु फरीस्तालाक मदद करवार तने नी ओसे, बल्के इब्राहिमेर खानदानोक मदद करवार तने ओसिहिले। १७ वहीलाते यीशु सब पाके अपना भा-बहिनलार मान्दी बने गेल जसे कि वहाँय एकझन दयालु महापूजारी बने परमेश्वरेर सेवा करवा पारे, आर लोक वहार पर भरोसा करवा पारे, आर वहाँय लोकेर पापेर क्षमार तने बलिदान चढ़ाय। १८ वहाँय परीक्षार समय दुःख उठाले, वहीलाते जैला लोक परीक्षात पोरछे, वहाँय उसाक मदद करवा पारे।

यीशु मूसा नबी से बोड़ो छे

३ वहीलाते हे पवित्र भा-बहिनला, तुमसाक परमेश्वर बुलाहे आर तुमसाक स्वर्गेर भागीदार बनाहे। तुम्हरा अपना ध्यान यीशु पर लगाव। वहाँय हमसार तने परमेश्वरेर दूत आर महापूजारी छे। २ जैकिसम मूसा नबी परमेश्वरेर घरेर काम इमानदारी से करिल, वही किसम यीशु वहार काम इमानदारी से करिल, जहाँय वहाक पठाहिले। ३ जैमान्दी

घरखानोक बनानेवाला घरखान से बेसी इज्जत पाछे, वही मान्दी यीशु मूसा नबी से बढे बड़ाई पवार लायक समझाल गहे। ४ हर एकखान घरेर कोय ना कोय बनानेवाला होचे, मगर जहाँय सब कुछ बनाहे, वहाँय परमेश्वर छे। ५ मूसा नबी परमेश्वरेर पूरा घरानात एकझन ईमानदार सेवक छिले। आगु चले परमेश्वरेर जैला बातोक बतानेवाला छिले, परमेश्वरेर उला बातेर बारे मूसा नबी गवाही दुवा पारे। ६ मगर मसीहा बेटा हंय परमेश्वरेर घरेर अधिकारी छे। आर अगर हमरा साहसेर साथे यीशुर पर हमेशार तने उम्मेद आर भरोसा राखी, त हमरा परमेश्वरेर घरेर लोक छी।

परमेश्वरेर लोकेर तने आरामेर जगह

७ वहीलाते जैकिसम पवित्र आत्मा कोहचे, तुम्हरा आज अगर वहार आवाज सुनछेन, ८ त अपना-अपना मनडाक कठोर ना करेन, जैकिसम कि इजराएली लोकला परमेश्वरेर खिलाफ करिहिले, जैखुना वरा रास्तात परमेश्वरेर परीक्षा लिहिले। ९ सुनसान रास्तात चालीस साल तक तुमसार बाप-दादोला मोर चमत्कारेर कामलाक देखिल, मगर तहातो मोक जाँच करिल। १० वहीलाते मुई उखुनकार लोकेर पर गोस्सा हंय कोहनु, इला लोकेर दिलला भटकिते रोहचे, आर यरा मोर रास्ताडाक चिन्हवा नी पारिल। ११ तब मुई गोस्सा करे कसम खाय कोहनु, वरा मोर आरामेर जगोहोत ढुकवा नी पारबे। १२ हे मोर भा-

बहिनला, तुम्हरा हुँसियार रोहेन कि तुमसार बीच से कोय खराब आर अविश्वासी मनवाला ना बनेन। इकिसम अविश्वासी मन तुमसाक जिन्दा परमेश्वर से दूर हटाय दिबे। १३ जते दिन तक “आज” कहाल जाछे, हर दिन एकझन दोसराझनाक हिमन्त देते रहव। इकिसम ना होक कि तुमसार भीतर से कोय लोक पापोत पोड़े कठोर हंय जाय। १४ क्याँकि हमरा मसीहार साथे वहार सबला चीजेर भागीदार होई, अगर हमरा पहिला विश्वासोत आखरी तक मजबूती से टिके रोही। १५ जैकिसम कि कहाल जाछे, “तुम्हरा आज अगर वहार आवाज सुनछेन, त अपना-अपना मनडाक कठोर ना करेन, जैकिसम कि इजराएली लोकला परमेश्वरेर खिलाफ करिहिले, जैखुना वरा रास्तात परमेश्वरेर परीक्षा लिहिले।” १६ कुन लोक परमेश्वरेर बात सुने परमेश्वरेर खिलाफ काम करिहिले? वरा उला लोक छिले, जैलाक मूसा नबी मिसर देश से निकलाय आनिहिले। १७ आर वहाँय चालीस साल तक कुनला लोकेर पर गोस्सा करे रोहिल? वहाँय उला लोकेर पर गोस्सा करिहिले, जैला लोक परमेश्वरेर खिलाफ पाप करिहिले, आर उसार लाशला जंगलोत पोड़े रोहिल। १८ आर परमेश्वर कुनला लोकेर बारे कसम खाहिले कि तुम्हरा मोर आरामेर जगोहोत ढुकवा नी पारभेन? सिरिफ उला लोकोक कोहिले, जैला लोक हुकूम नी माने।

१९ वहीलाते हमरा देखछी कि वरा विश्वास नी करवार कारण से आरामेर जगहोत ढुकवा नी पारिल।

४ परमेश्वर वादा करिहे कि लोक वहार आरामेर जगहोत ढुकवा पारबे। वहार आरामेर जगहोत घुसवार दरवाजा अला तक खोलाल छे। वहीलाते हमसाक सावधान हवा लागे। अगर तुम्हरा सावधान नी होचेन, तुमसार भीतर से कोय-कोय लोक उडा आरामेर जगहोत ढुकवा नी पारबे। २ इजराएली लोकोक जैमान्दी खुश-खबरी सुनाल गहिले, वही मान्दी हमसाको सुनाल गहिले। मगर उडा खुश-खबरी से इजराएली लोकोक कोय लाभ नी होल, क्योंकि वरा इडा खुश-खबरीक विश्वास नी करिल। ३ मगर हमरा विश्वास करिही, आर उखान आरामेर जगहोत ढुकछी, मगर अविश्वासी लोकेर बारे परमेश्वर कोहचे, “मुई अपना गोस्सार कारण से कसम खाही कि वरा मोर आरामेर जगहोत ढुकवा नी पारबे।” दुनियाँडा सृष्टि हवार बाद वहार आरामेर जगहोत घुसवार दरवाजा आजतक खोलाल छे। ४ क्योंकि सातवाँ दिनेर बारे इकिसम लिखाल छे कि, “परमेश्वर अपना सृष्टि काम पूरा करे सातवाँ दिनोत आराम करिल।” ५ परमेश्वर आढ़ोह कोहचे, “वरा मोर आरामेर जगहोत ढुकवा नी पारबे।” ६ जैला लोकोक वहार खुश-खबरी पहिले से सुनाल गहिले, वरा हुकूम नी मनवार कारण से उडा आरामेर जगहोत ढुकवा नी

पारिल। मगर इडा बात सच छे कि कुछुला लोकेर तने आरामेर जगहोत ढुकवार दरवाजा अलाव खोलाल छे। ७ वहीलाते परमेश्वर एकटा खास दिनोक ठीक करे राखिहे। उडा दिनेर नाम “आज” छे। बहुत दिन बाद परमेश्वर राजा दाऊदेर जरियाय बताल कि, “अगर आज तुम्हरा वहार आवाज सुनछेन, त अपना-अपना मनडाक कठोर ना करेन।” ८ यहोशु इजराएली लोकोक परमेश्वरेर वादार जगहोत ले गहिले। मगर उसाक उठिन पूरापूरी आराम नी मिले। अगर यहोशु उसाक पूरापूरी आराम दिलतेन, त परमेश्वर इडा दोसरा दिनेर बात नी बोलिलतेन। ९ वहीलाते इडा जाने लव कि परमेश्वरेर लोकलार तने एकटा खास आरामेर दिन रखाल छे। १० जहाँय वहार आरामेर जगहोत ढुके गहे, वहाँय परमेश्वरेर मान्दी अपना कामोक पूरा करे आराम करिहे। ११ वहीलाते हमराव आरामेर जगहोत ढुकवार पूरा कोशिश करी। इकिसम नी होय कि हमसार बीच से कोय लोक इजराएली लोकेर मान्दी हुकूम नी माने आर बेकार हंय जाय। १२ कारण, परमेश्वरेर वचन जिन्दा, ताकतवर, आर दुई धारवाला तरवालर से बेसी तेज छे। वचन हमसार दिल आर आत्माक छेद करछे, आर बदनेर हर एकटा हड्डी-मांस आर जोड़ोक छेद करे अलग करे दिछे, आर हमसार दिलेर सोच-बिचारोक जाँच करछे। १३ दुनियाँत जताला चीज बनिहे, कोय चीज परमेश्वर से छुपाल नी छे।

वहार आँखेर आगुत सब कुछ खोलाल आर बेपर्दा छे। वहार लिकिन हमसाक हिसाब दुवा होबे।

यीशु सबसे बोड़ो महापूजारी छे

१४ हमसार साथे अतेक बोड़ो महापूजारी छे, याने परमेश्वरेर बेटा यीशु, जहाँय स्वर्गोत गहे। वहीलाते हमरा विश्वासोत मजबूत बने रोही।
१५ क्योंकि हमसार इकिसम महापूजारी छे, जहाँय हमसार कमजोरी देखे हमसार पर तरस खवा पारे। हमसार मान्दी वहाक सबला बातोत जाँच कराल गेल, मगर वहार भीतरोत कोय पाप नी मिलिल।
१६ वहीलाते ओसो हमरा हिम्मत से दयालु परमेश्वरेर सिंहासनेर आगुत जई, जसे कि हमरा जरूरतेर समय दया आर माया पाई आर हमसार मदद होय।

५ हर एकइन महापूजारी लोकेर बीच से चुने लिया ल जाछिले, कि लोकलार तरफ से वहाँय परमेश्वरेर सेवा करे आर लोकेर पापेर तने परमेश्वरोक दान आर बलिदान चढ़ाय। २ महापूजारी लोकेर तरफ से काम करछिले। लोकला अनजान आर भूल-चुक से पाप करवा सकेछिले। आर वहाँय उसार साथे नरम व्यवहार करवा पारे, क्योंकि वहारो भीतरोत कमजोरी रोहछिले। ३ वहीलाते वहाक अपना पापेर तने आर दोसरा लोकेर पापेर तने बलिदान चढ़वा होचिले। ४ कोय लोक

आपने से इडा इज्जतेर पद नी लिछिले। मगर वहाक हारूण महापूजारीर मान्दी परमेश्वरेर तरफ से चुने लिया ल जाछिले। ५ ठीक यही मान्दी यीशु मसीहाव महापूजारी हवार पद खुद नी ले, बल्के परमेश्वर दिहे, आर कोहये तुई मोर बेटा छिस, आज मुई तोर पिता बने गेनु। ६ यही मान्दी वहाँय दोसरा ठिन कोहचे, तुई मलकिसिदीकेर मान्दी हमेशार तने पूजारी छिस। ७ यीशु जैखुना दुनियाँत छिले, उखुना वहाँय कानते-कानते परमेश्वरेर लिकिन प्रार्थना करिल, जहाँय वहाक मौत से बचवा पारिलतेन। वहार भक्तिर कारण से परमेश्वर वहार प्रार्थना सुनिल, आर वहाक मौत से जिन्दा करिल। ८ यीशु परमेश्वरेर बेटा छिले, तहातो वहाँय दुःख सहय परमेश्वरेर हुकूम मनवा सिखिल। ९ आर दुःख सहय अपना-आपोक खाँटी बनाल, आर जहाँय वहार कहना मानबे, वहाँय उसाक बचवा पारबे। १० आर वहाक परमेश्वरेर तरफ से मलकिसिदीकेर रेवाज मुताबिक महापूजारीर पद मिलिल।

मजबूत विश्वासी

११ यहार बारे मोक बहुतला बात कहना छे, जैलाक तुम्हरा अला समझुवा नी पारभेन, क्योंकि तुम्हरा समझुवार पाके कमजोर हंय गहेन। १२ अते दिनोत तुमसाक ज्ञानी बने जवा होलतन, मगर अला इडा जरूरी हंय गहे कि कोय तुमसाक परमेश्वरेर वचनेर शिक्षा शुरू से सिखाय। अला तुमसाक अनाज खवा होलतेन, मगर तुम्हरा छोटा छुवार

मान्दी हंय गहेन, आर अला तक दूध खाचेन। १३ दूध खानेवाला छुवालाक धर्मी बने जीवन बितवार समझ नी होचे, क्यौंकि वरा छुवा छे। १४ मगर अनाज उमरदार लोकेर तने छे। उसार लिकिन भला-बुरार ज्ञान छे क्यौंकि वरा मेहनत करे अपना-आपोक ज्ञानवान बनाहे।

६ यही तने हमरा यीशु मसीहार बारे शुरूर शिक्षार साथे-साथे मसीहार बारे गहरा शिक्षा सीखते जई। हमसाक उला शिक्षार पर सिरिफ ध्यान दुवा नी लागे, जैला शिक्षा हमरा शुरूत सीखिनु। इला शिक्षा इकिसम छे: मौतेर तरफ ले जानेवाला काम से मन बदली करवार बात, परमेश्वरेर पर विश्वास करवार बात, २ बपतिस्मार शिक्षा, माथार पर हाथ रखवार विधिर बारे, आर मुर्दा लोकेर जिन्दा हंय उठवार बारे, आर परमेश्वरेर आखरी फैसलार बारे। हमसाक आर कोय शिक्षार जरूरी नी छे। ३ अगर परमेश्वरेर इच्छा होले, त हमरा मसीहार बारे गहरा शिक्षा देते जाम। ४ जहाँय एक बार रोशनी पाहे, आर स्वर्गेर दानेर मजा चाखे लिहे आर पवित्र आत्मार भागी हंय गहे, ५ आर परमेश्वरेर कीमती वचनेर मजा चाखे लिहे, आर ओसनेवाला शक्तिशाली युगेर मजा पाय गहे, ६ आर वरा अगर विश्वास से भटके जाय, त उसाक दोबारा मन बदली कराना एकदम सम्भव नी छे। इकिसम लोक परमेश्वरेर बेटा यीशु मसीहाक दोबारा क्रुसोत चढ़ाछे आर सभारो आगुत वहार अपमान

करछे। ७ जैखान खेत बरसातेर पानीखानोक बार-बार खाचे, उखान खेत अगर गृहस्थलार तने फसल पैदा करछे, त उखान खेत परमेश्वरेर आशीर्वाद पाछे। ८ अगर उखान खेत झाड़-जंगल आर काँटा पैदा करे, त उखान खेत बेकार आर श्राप पोड़वार लायक समझाल जाछे, आर इला झाड़-जंगल सहित खेतखानोक आगिनोत जलाय देयाल जाछे। ९ हे प्यारा भा-बहिनला, मुई तुमसाक इकिसम कोहची। मगर तहारो पर तुमसार पर मोक भरोसा छे। मोक विश्वास छे कि तुमसार जीवनडा फायदामंद खेतेर मान्दी छे, जहाक बचाल जाबे। १० परमेश्वर बेइन्साफी नी छे। जैखान काम तुम्हरा प्रभुर नामे प्रभुर लोकेर तने करिहेन, वहाँय तुमसार उखान कामोक आर प्रेमोक नी भूलबे। ११ हमसार इच्छा छे कि जब तक तुम्हरा जिन्दा छेन, तब तक तुम्हरा एक-दोसराझनाक प्रेम करो। अगर तुम्हरा इकिसम करभेन, त तुम्हरा तुमसार उम्मेद मुताबिक पाभेन। १२ तुम्हरा आलसी बने ना रोहेन। जैला लोक दुःख सहछिले आर विश्वासोत टिके परमेश्वरेर वादार हकदार हंय गहिले, तुम्हरा उला लोकेर मान्दी बनो। १३ परमेश्वर इब्राहिमेर साथे वादा करवारखुना कसम खवार तने अपना-आप से बढे जैखुना कहाको नी पाले, त वहाँय अपना कसम खाय कोहले, १४ “मुई सचमुच तोक बहुत आशीर्वाद दुम, आर तोर औलादोक बढ़ाते जामु।” १५ आर यही मान्दी करे इब्राहिम बहुत धीरज धरे वादा कराल चीजलाक हासिल करिल। १६ लोकला त अपना

से बोड़ो लोकेर कसम खाचे आर उसार हर एकटा झगड़ार फैसला कसम से होचे, तब कसम उसार झगड़ार आखरी फैसलार दुवार प्रमाण छे। १७ वहीलाते परमेश्वर अपना लोकोक प्रमाण दुवा चाहले कि वहार वादा वहार लोकलार साथे बनाल रोहबे, त इडा प्रमाण दुवार तने वहाँय अपना-आपेर कसम खाले। १८ इठिन दुईडा बात छे: एकटा परमेश्वरेर वादा आर दोसरा वहार कसम। इ-दुई चीज कभी नी बदलवा सकेछे आर इडार तने परमेश्वर कभी झूठ नी बोलवा सकेछे। वहीलाते हमरा जैला लोक परमेश्वर लिकिन बचवार तने ओसिही, हमसाक बचवार तने परमेश्वर जैडा उम्मेद हमसाक दिहे, उडा उम्मेदक हमरा धरे छी, आर हमरा बहुत खुश छी। १९ इडा उम्मेद पानी जहाजेर लंगरेर मान्दी मजबूत आर टिकाल छे। आर इडा उम्मेद परमेश्वरेर महापवित्र जगहोर पदार् पीछूत हाजिर छे। २० यीशु हमसार तरफ से हमसार पहिले उखान जगहोत पहुँचे गहे। वहाँय हमेशार तने मलकिसिदीकेर मान्दी हमसार महापूजारी छे।

७ मलकिसिदीक शालेम नगरेर राजा छिले, आर महान परमेश्वरेर महापूजारी छिले। इब्राहिम जैखुना राजालाक मारे घुरे अपना घर जाछिले, उखुना यही मलकिसिदीक इब्राहिमेर साथे मुलेकात करिल, आर वहाक आशीवाद दिले। २ इब्राहिम जैला चीज राजालार लिकिन से

जीतिहिले, अपना उला सबला चीजेर दसवाँ हिस्सा मलकिसिदीकोक दिले। मलकिसिदीक नामेर माने होचे: न्याय करनेवाला राजा। क्योंकि वहाँय शालेम राजा छिले। आर शालेमेर मतलब शान्ति। वहीलाते वहाँय शान्ति देनेवाला राजा। ३ मलकिसिदीकेर माँ-बाफेर आर वहार खानदानेर बारे कुछ लिखाल नी छे। यहार जीवनेर कोय शुरूवात आर कोय अन्तेर बारे कुछ मालूम नी छे। आर वहाँय परमेश्वरेर बेटार मान्दी हमेशार तने पूजारी ठहरील। ४ अला इडा बातेर पर ध्यान दव कि वहाँय कुन किसम महापूजारी छिले, कि वहाक हमसार पिता इब्राहिम जीताल चीजलार दसवाँ हिस्सा दिले। ५ लेवी बंशेर लोकला पूजारी होचिले। मूसार नबीर नियम मुताबिक उसार लोकला उसाक अपना दसवाँ हिस्सा दिछिले, जबकि वरा इब्राहिमेर खानदानेर लोक छिले। ६ मलकिसिदीक लेवी बंशेर नी छिले। परमेश्वर इब्राहिमोक अपना वादा दिहिले, मगर इब्राहिम मलकिसिदीकोक अपना सबला चीजेर दसवाँ हिस्सा दिले, आर वहार लिकिन आशीर्वाद पाले। ७ इडा बात सच छे कि छोटी बोड़ोर लिकिन से आशीर्वाद पाछे। वहीलाते वहाँय पूजारीला से बोड़ो छे। ८ आर इठिन लेवी बंशेर नियम मुताबिक पूजारी, जहाँय दसवाँ हिस्सा पाछे, वहाँय मोरबे। मगर मलकिसिदीक जिन्दा छे। ९ लेवी बंशेर लोकला दसवाँ हिस्सा पाछिले। कोय यहोडा कहवा पारे कि वराव इब्राहिमेर साथे-साथे मलकिसिदीकोक दसवाँ हिस्सा दिहे। १० क्योंकि

जैखुना मलकिसिदीक इब्राहिमेर साथे मुलाकात करिल, लेवीर जनम नी होय आर वहाँय इब्राहिमेर बदनोत छिले।

यीशु मलकिसिदीकेर मान्दी छे

११ पूजारीलाक जे कामेर तने रखाल गहिले, वरा अगर उला काम पूरा ठीक से करिलतेन, त हारूण महापूजारीर काम हमसार तने ठीक होलतेन। आर तब हमसाक मलकिसिदीकेर मान्दी कोय दोसरा महापूजारीर जरूरी नी होलतेन। १२ क्याँकि जैखुना नया किसमेर पूजारी चुना जाछे, तब पूजारीर तने नया नियम-कानूनेर होना जरूरी छे। १३ हमरा इला बात प्रभु यीशुर बारे बोलछी। वहाँय लेवी बंशेर नी छिले, आर लेवी बंशेर लोक छोड़े कोय प्रभुर बेदीर तने काम नी करे। १४ हमसार प्रभु यहूदार बंशेर छिले। इडा बंश से कोय पूजारी होबे, इडार बारे मूसा नबी कभी कुछु नी बोलिहे। १५ अगर मलकिसिदीकेर मान्दी एकझन पूजारी पैदा हंय जाछे, त हमरा जैडा बात बोलिहे, उडा आढ़ोह साफ-साफ प्रमाण हंय जाछे। १६ यीशु मसीहाक खानदानी नियम मुताबिक पूजारी बनाल नी जाय, मगर परमेश्वर वहाक पूजारी बनाल क्याँकि वहार लिकिन हमेशा तने जिन्दा रहवार शक्ति छिले। १७ वहार बारे परमेश्वरेर वचनोत कहाल गहे, “तुई मलकिसिदीकेर मान्दी हमेशार तने पूजारी छिस।” १८ इकिसम करे पुरानाडा विधि कमजोर आर बेकार हवा कारण से खतम हंय गहे। १९ क्याँकि नियम-कानून कोय बातोक

खाँटी बनवा नी पारिल। आर वहार बदले, इकिसम एकटा बढिया उम्मेद छे, जहार जरियाय हमरा परमेश्वरेर नजदीक जवा पारी। २० नया विधि मुताबिक परमेश्वर कसम खाय मसीहाक पूजारी बनाहे। २१ क्याँकि आगुकार पूजारीलार तने परमेश्वर कोय कसम नी खाछिले, मगर यहाक कसमेर साथे बहाल आर परमेश्वरेर तरफ से बहाल कराल गहे। परमेश्वर अपना पवित्र शास्त्रोत कोहचे, “प्रभु कसम खाले, आर वहाँय अपना बिचार नी बदलिबे, कि वहाँय युग-युगेर तने पूजारी छे।” २२ इकिसम करे यीशु मसीहा पहिले से बढिया परमेश्वरेर साथे रिस्ता कायम करिल। २३ लेवीर बंशेर बहुतला लोक पूजारी बनिल, मगर उसार मौतेर कारण वरा पूजारी हंय रहवा नी पारिल। २४ मगर यीशु युग-युगेर तने जिन्दा छे, यही तने वहाँय हमेशा पूजारी बनाल रोहबे। २५ वहीलाते जैला लोक वहार जरियाय परमेश्वरेर लिकिन ओसछे, वहाँय उसाक पूरापूरी बचाबे, क्याँकि वहाँय उसारे तने प्रार्थना करवार तने हमेशा जिन्दा छे। २६ वहीलाते हमसाक यही किसम महापूजारीर जरूरी छिले, क्याँकि यहाँय पवित्र, निर्दोष छे आर वहार भीतरो कोय पाप नी छिले। वहाक पापी लोक से अलग करे स्वर्गोत सबसे बेसी सम्मान देयाल गहे। २७ यहाक दोसराला महापूजारीर मान्दी बलिदान चढ़वा नी होछिल। दोसराला महापूजारीक हर दिना पहिले अपना पापेर तने आर फेर लोकलार पापेर तने बलिदान चढ़वा होचिले। मगर मसीहा अपना-

आपोक एक बार बलिदान करे बलिदानेर कामोक पूरा करे दिहे।
२८ लोकला बहुत पाके कमजोर होचे, तहातो नियम-कानून त लोकोक
महापूजारी बनाहिले, मगर परमेश्वर कसम खाय अपना बेटाक युग-
युगेर तने खाँटी महापूजारी बनाहे।

८ अला जैला बात बोलछी, उलार भीतर से सबसे बोड़ो बात इडा छे
कि हमसार इकिसम महापूजारी छे, जहाँय सर्वशक्तिमान परमेश्वरेर
सिंहासनेर दहिना बगल बोठे छे। १ आर उठिन वहाँय पवित्र जगोहर
सेवक बने गहे, आर उखान पवित्र स्थान परमेश्वरेर सच्चा तम्बू छे,
जैखानोक कोय मानुष नी, बल्के परमेश्वर बनाहे। ३ हरेकटा
महापूजारीक चुनाल जाछिले कि वहाँय परमेश्वरोक दान आर बलिदान
चढ़ाय। वही किसम हमसार महापूजारीरो लिकिन परमेश्वरोक दान आर
बलिदान चढ़वार तने कुछु हवा लागे। ४ अगर वहाँय दुनियाँत होलतेन,
त कभी पूजारी नी होलतेन, क्योंकि मूसार नियम मुताबिक दान चढ़वार
तने पूजारी छिले। ५ इला पूजारी धरतीर पर जे पवित्र जगहोर सेवा
करछिले, उखान जगह स्वर्गेर पवित्र जगहोर रूप आर छाया छिले।
वहीलाते मूसा नबी जैखुना परमेश्वरेर तने तम्बू बनानेवाला छिले,
परमेश्वर वहाक चेताय कोहले, “पहाड़ेर पर मुई तोक तम्बूर जैडा नमूना
देखाहिनु, वही मान्दी तुई सब कुछु करिस।” ६ मगर मसीहाक जैखान

पूजारीर काम मिलिल, उखान काम पहिलकार पूजारीर काम से बेसी अच्छा छे। वहाँय जैडा समझौतार तने वकील बनिल, उडा समझौता पहिलाडा समझौता से बढे छे, क्योंकि इडा समझौता आढ़ो अच्छा वादा पर टिकाल छे। ७ अगर पहिलाडा समझौता बेदाग होलतेन, त उठिन आर दोसरा समझौता करवार जरूरत नी होलतेन। ८ मगर परमेश्वर इजराएली लोकेर घराना आर यहूदार घरानार पर दोष लगाय कोहये, “प्रभु कोहचे, देखेक, उला दिन ओसछे, जैला दिनोत मुई इजराएली लोकेर घरानार साथे आर यहूदार घरानार साथे एकटा नया समझौता करूम। ९ याद करो, जैखुना मुई तुमसार खानदानेर लोकलाक हाथ धरे मिसर देश से निकलाय ले ओसिहिनु, मुई उसार साथे समझौता करिहिनु, आर मोर उडा समझौता वरा नी मानिल। वहीलाते मुई उसार पर तरस नी खानु। प्रभु यहीडा कोहले। इडा नया समझौता पहिला समझौतार मान्दी नी होबे। १० प्रभु कोहचे, मुई इजराएली लोकेर साथे एकटा नया समझौता बनाम, मुई अपना नियम-कानूनोक उसार मोनोत ढुकाय दुम आर उसार दिलोत लिखे दुम, आर मुई उसार परमेश्वर होमु आर वरा मोर लोक होबे। ११ वहार बाद कोय लोक अपना पड़ोसीक आर अपना भईलाक नी बताबे कि तोक प्रभुक जानना जरूरी छे, क्योंकि उखुना छोटो से बोड़ो सबकोय मोक जाने लिबे। १२ मुई उसार सबला पाप माफ करूम, आर उसार पापलाक कभी याद नी करूम।

१३ अला इडा समझौता परमेश्वर नया बोलिहे, त पहिडा समझौता पुराना हंय गहे, आर जे चीज पुराना आर बेकार हंय जाछे, उला जल्दी खतम हंय जाबे।”

पहिला समझौता

९ पहिलाडा समझौता परमेश्वरेर भक्ति करवार नियम छिले, आर भक्ति करवार तने धरतीर पर एकखान पवित्र तम्बू छिले। २ आर तम्बूखानेर दुईडा भाग छिले। पहिलाडा भागोक पवित्र जगह कहाल जाछिले। इठिन चराकदानी आर टेबुल छिले, आर टेबुलखानेर पर रूटी चढ़ाल रोहछिल। ३ आर दोसराखान भाग, जैखान पर्दार पाछूत छिले, इखानोक महापवित्र जगह कहाल जाछिले। ४ उठिन धुमना जलवार तने सोनार थान आर समझौतार सन्दूक छिले, जैडा चारो पाके सोना दे ढकाल छिले, आर सन्दूकटार भीतरोत मन्ना से भराल सोनार घड़ा आर हारूणेर लाठी छिले, जे लाठी से फूल निकलाल छिले, आर समझौतार पत्थलेर सिलेट छिले। ५ आर इडा सन्दूकेर उपरोत दुईडा चमकदार प्राणी अपना डेना फैलाय बोठे छिले, इडा से पता चलछिल कि परमेश्वर उठिन छे, आर जैठिन लोकेर पाप क्षमा होचिले। इला सबला चीजेर बारे बतवार अला समय नी छे। ६ जैखुना इला सबला चीज इकिसम बनाल गहिले, तम्बूर पहिलाखान भागोत पूजारीला हर दिना

सेवार काम पूरा करछिले। ७ मगर तम्बूर दोसराखान भागोत सिरिफ महापूजारी सालोत एके बार जाछिले, आर खून ले जाछिले। इखान खूनोक वहाँय अपनार तने आर लोकलार पापेर तने छिटाछिले, जैला पाप लोकला अनजान हालतोत करछिले। ८ इडा से पवित्र आत्मा यहीडा बताछे कि जब तक धरतीर पर पहिलाखान तम्बू थाड़ो छे, तब तक सब लोकेर तने महापवित्र जगहोत जवार रास्ता खोलाल नी छे। ९ इडा से हमसाक मालूम होचे कि पूजारीला जैला दान आर बलिदान तम्बूत परमेश्वरेर तने चढ़ाछिले, उला दान आर बलिदान लोकेर मनडाक खाँटी नी बनाछिले। १० क्याँकि इला पुरना नियम सिरिफ खान-पान करवार आर सिनान-धिनान करे शुद्ध हवार बाहरी नियम छिले। आर इला नियम परमेश्वरेर नया नियम ओसवार समय तक टिकाल छिले। ११ मगर यीशु मसीहा ओसनेवाला अच्छा चीजेर महापूजारी बने गहे। वहाँय आढ़ोह बोड़ो आर खाँटी तम्बूर भीतरोत ढुकिल, जैखान हाथ दे बनाल तम्बू नी छिले। १२ वहाँय बकरार आर जानवरेर खूनेर जरियाय महापवित्र जगहोत नी ढुकिल, मगर वहाँय एक बार अपना खून बहाय ढुकिल आर हमेशार तने हमसाक आजाद करे दिहे। १३ पूजारीला बकरा आर जानवरेर खून, आर जानवरेर जलाल मुस ले पापी लोकेर पर छिटाय दिछिले, आर उसार शरीर बाहरी रूप से शुद्ध होचिले, १४ त यीशु मसीहार खून आढ़ोह कतेक बेसी शक्तिशाली छे!

वहाँय परमेश्वरेर आगुत निर्दोष हंय पवित्र आत्मार जरियाय अपना-
आपोक बलिदान करे दिले। वहार खून हमसार मनलाक खाँटी करे दिबे,
आर हमरा मौतेर काम दूर हंय जामु जसे कि हमरा परमेश्वरेर सेवा
करवा पारी। १५ यहीडा कारण यीशु परमेश्वर आर मानुषेर जोड़वार नया
समझौतार वकील बने गहे, कि परमेश्वर जैडा वादा करिहे, वहार बुलाल
लोकला हमेशार तने उडा वादार वारिस बने जाय। जैला लोक पहिला
समझौतार समय पाप करिहिले, यीशु मसीहा उसाक आजाद करवार
तने अपना जान दिले। १६ नया समझौता इकिसम छे माने लव कि
वहाँय अपना सम्पतिर अधिकार दुवार तने वसीयतनामा लिखे दिहे,
आर जहाँय वसीयतनामा लिखे दिहे, वहार मौतेर प्रमाण देना जरूरी छे।
१७ क्योंकि वसीयतनामा करनेवालार मौतेर बादे, वहार वसीयतनामा
कामोत अनाल जाछे। जैखुन तक वसीयतनामा लिखनेवाला जिन्दा छे,
उखुन तक ले वहार वसीयतनामा कामोत लगाल नी जाछे। १८ ठीक
यही मान्दी पहिलाडा समझौता बिना खून बहाय कायम नी होय।
१९ जैखुना मूसा नबी सबला लोकोक नियम-कानूनेर हर एकटा हुकूम
सुनाल, त वहाँय बलि कराल बछड़ा आर बकरार खून लिले, आर यहार
साथे पानी मिलाय दिले, आर लाल रंगेर ऊन आर जुफा गाछेर ठल्ली
लिले, आर ठल्ली दे खूनखानोक नियम-कानूनेर किताबखानेर उपरोत
आर लोकलार उपरोत छिटाय दिले। २० इखान काम करवारखुना वहाँय

કોહિલે, “ઇઁખાન ઁૂનેર સમઙ્ઙૌતા છે, જૈઁખાન સમઙ્ઙૌતા પરમેશ્વર તુમસાર સાથે કરિહે।” ૨૧ ભક્તિ કરવાર તમ્બૂ આર ભક્તિર કામ કરવાર સબલા ઁીજેર પર મૂસા નબી ઠીક યહી માન્દી ઁૂન છિટાય દિહિલે। ૨૨ મૂસા નબીર નિયમ-કાનૂનેર મુતાબિક સહી માને સબ ઁીજ ઁૂન દે શુદ્ધ કરાલ જાછે, આર ઁૂન ની બહાલે પાપેર માફી પાવા ની જાબે। ૨૩ ધરતીર ઁીજલા જૈલા સ્વર્ગેર ઁીજેર સિરિફ નમૂના છિલે, ઉલાક પશુર બલિદાનેર જરિયાય શુદ્ધ કરવાર જરૂરત છિલે, મગર સહી ઁીજ જૈલા સ્વર્ગોત છે, ઉલાક શુદ્ધ કરવાર તને આઢોહ બેસી અઁ્છા બલિદાનેર જરૂરત છિલે। ૨૪ યીશુ મસીહા હાથેર બનાલ પવિત્ર જગહોત ની ઢુકિલ। હાથેર બનાલ પવિત્ર જગહ સઁ્ઁવા પવિત્ર જગહોર સિરિફ નમૂના છિલે। બલ્કે યીશુ મસીહા સ્વર્ગોત ઢુકિલ, આર અલા વહાંય હમસાર તને પરમેશ્વરેર આગુત હાજિર છે। ૨૫ મહાપૂજારી જાનવરેર ઁૂન લે હર સાલ મહાપવિત્ર જગહોત ઢુકછિલે, મગર મસીહાક બાર-બાર બલિદાન હવાર જરૂરી ની હોલ। ૨૬ ની ત ઢુનિયાંર સૃષ્ટિ સે લે આજતક વહાક બાર-બાર ઢુઃઁહ ઉઠવા હોલતેન, મગર અલા યુગેર આઁરીત વહાંય ઁક બાર હાજિર હોલ, આર અપના બલિદાનેર જરિયાય પાપોક ઢૂર કરે દિલે। ૨૭ સબલા લોક ઁક બાર મોરબે આર યહાર બાદ પરમેશ્વર ઉસાર ઇન્સાફ કરબે। ૨૘ યીશુ જૈઁખુના ઢોસરા બાર ઓસબે, ઉઁખુના લોકેર પાપેર

तने मोरवा नी ओसबे, बल्के वहार जैला लोक वहार ओसवार इन्तेजार करछे, उसाक सभाको बचवार तने ओसबे।

यीशु अन्तिम बलिदान

१० मूसार नियम-कानूनेर भीतरोत आगु से ओसनेवाला अच्छा-अच्छा चीजोक देखाल गहे, मगर इला सिरिफ नमूनार मान्दी छे। उलार असली रूप नी छे। वहीलाते एके किसम बलिदान जैलाक हर एक साल चढ़ाल जाछिले। जैला लोक इला बलिदान चढ़ाछिले, उसाक इला बलिदान पूरापूरी पवित्र करवा नी पारिल। २ अगर पवित्र करवा पारिलतेन त इलार चढ़वार काम बन हंय गेलतेन। यही तने अगर चढ़ानेवाला एके बार बलिदान चढ़ाय शुद्ध हंय गेलतेन, त उसार दिल उसाक पापी नी कोहलतेन। ३ मगर इला बलिदान हर एक साल पापलाक ख्याल कराछिले, ४ क्योंकि बैलेर आर बकड़ार खून पापेर माफी करबे, इडा बात संभव नी छिले। ५ यही तने मसीहा दुनियाँत ओसवारखुना परमेश्वरोक कोहचे, “बलिदान आर दान तुई नी चाहलो, मगर मोर तने तुई एकटा बदन तैयार करलो। ६ तुई जानवरेर बलि आर पाप-बलि से खुश नी होचिस।” ७ तब मुई कोहनु, “जैकिसम कि मोर बारे पवित्र शास्त्रोत लिखाल छे देखेक, मुई तोर इच्छा पूरा करवार तने ओसे गही।” ८ इठिन यीशु कोहचे, तुई बलिदान, दान आर जानवरेर बलि आर

पाप-बलि नी चाहलो, जबकि इला बलिदान मूसा नबीर नियम-कानूनेर मुताबिक चढ़ाल जाछिल। ९ वहाँय फेर यहोडा कोहचे, “देखेक, मुई चले ओसिही, जसे कि मुई तोर इच्छा पूरा करवा पारी।” वहीलाते वहाँय पहिला समझौता हटाय दिछे, जसे कि नया किसमेर समझौता कायम करवा पारे। १० परमेश्वरेर इच्छा से एक बार यीशु मसीहार बदनेर बलिदानेर जरियाय हमरा हमेशार तने पवित्र कराल गही। ११ हर एकइन पूजारी थाड़ो हंय हर दिन काम करछिले आर एके किसमेर बलिदान बार-बार चढ़ाछिले, आर बलिदान पापोक कभी दूर करवा नी पारछिले। १२ मगर इडा पूजारी यीशु पापेर तने एकटाय बलिदान हमेशार तने चढ़ाय दिले, आर परमेश्वरेर दहिना बगल जाउ बोठे गेल। १३ आर वहीडा समय से इडा इन्तेजार करछे कि वहार दुश्मनला कुन समय वहार पाँव रखवार पीढ़ा बने जाबे। १४ क्याँकि वहाँय एकटा बलिदानेर जरियाय जैला लोकोक पवित्र करछे, उसाक हमेशार तने खाँटी करे दिछे। १५ आर पवित्र आत्माव हमसाक यहीडा कोहचे, वहाँय पहिलेव कोहिले, १६ “प्रभु कोहचे, कि जैडा समझौता मुई उला दिनेर बाद उसार साथे बनामू, मुई अपना नियमोक उसार दिलोत लिखुम आर उसार मोनोत ढुकाय दुम।” १७ वहाँय आढ़ोह कोहचे, “मुई उसार पापोक आर गलत कामलाक कोयखुना ख्याल नी करूम।” १८ आर जैखुना उसाक माफी मिले जाबे, त उसाक आर पापेर तने बलिदानेर जरूरी नी होबे।

परमेश्वरेर नजदीक

१९ हे भा-बहिनला, यीशु मसीहार खूनेर जरियाय हमरा उखान महापवित्र जगहोत ढुकवार हिम्मत पाय गही। २० मसीहा हमसार तने अपना बदनेर जरियाय एकटा नया आर जीवन देनेवाला रास्ता खोले दिहे जसे कि हमरा पर्दार भीतर दे परमेश्वरेर आगुत हाजिर हवा पारी। २१ यहार अलावा हमसार एकझन महान महापूजारी छे, जहाक परमेश्वरेर परिवारेर लोकलार जिम्मेदारी देयाल गहे। २२ त ओसो, हमरा सच्चा मन से, पूरा विश्वासेर साथे, दोषी मनडाक शुद्ध करे आर बदनडाक साफ पानी से धोय परमेश्वरेर नजदीक जई। २३ हमरा जैडा उम्मेदेर पर विश्वास करछी, ओसो, उडाक मजबूती से हमरा थामे राखी, क्योंकि जहाँय वादा करिहे, वहाँय अपना वादात पक्का छे। २४ अला ओसो हमरा एक-दोसराझनार चिन्ता करी। हमरा एक-दोसराझनाक प्रेम करवार तने आर अच्छा काम करवार तने हौशला बढ़ाते रहई। २५ आर एक-दोसराझनार साथे जमा हवा नी छोड़ी, जैकिसम कि जोड़ो नी हवार आदत कहारो-कहारो छे। मगर एक-दोसराझनाक हिम्मत दिते रोही, आर मसीहार ओसवार दिन जत्तेक बगलोत ओसछे, तत्तेक बेसी हमरा एक-दोसराझनाक हिम्मत दिते रोही। २६ सच्चाईडाक जाने लुवार बाद अगर हमरा जाने-सुने पाप करते रोही, त पापेर तने कोय बलिदान बचाल नी छे। २७ यहार बदले सिरिफ कठिन सजई आर आगिनेर तेज

बाँकी छे, जैडा परमेश्वरेर सबला बिरोध करनेवालाक लोकोक जलाय भष्म करे दिबे। २८ जैखुना कोय लोक मूसा नबीर नियमोक मानते इन्कार करछिले, त वहाक दुई या तीन लोक गवाह ले बेरहमीर साथे जान से मारे देयाल जाछिले। २९ सोचे लव कि जैला लोक परमेश्वरेर बेटाक पाँ दे कुचले दिले, आर समझौतार तने जैखान पवित्र खून बहाल गहिले, उखान खूनोक पवित्र नी समझिले, आर परमेश्वरेर आत्मा जैखान दया देखाहिले, वहार अपमान करिल, उला लोक कतेखान बेसी सजईर लायक समझाल जाबे। ३० क्याँकि हमरा वहाक जानी, जहाँय कोहचे, “बदला लेना मोर काम छे, मुहें बदला लुम।” फेर यहोडा कोहचे, कि “प्रभु अपना लोकेर इन्साफ करबे।” ३१ मुई कोहची कि जिन्दा परमेश्वरेर हाथोत पोड़ना भयनाक बात छे। ३२ तुम्हरा पहिलकार दिनोक ख्याल करो, जैखुना तुम्हरा रोशनीक पाहिलेन, उखुना तुम्हरा कताखान दुःख सहय लिहिलेन आर विश्वासोत मजबूत छिलेन। ३३ कभी कभी लोक तुमसाक बेज्जत करिल। लोकला तुमसाक सताहिले। लोक तुमसार मजाक उड़ाछिले। आर कभी कभी दुःखोत पड़ाल लोकलाक मदद करवार कारण दुःख उठालेन। ३४ तुम्हरा कैदी लोकेर दुःखोत दुःखी होयलेन, आर अपना धन-सम्पति खुशी से लूटे जवा दिलेन। इडा समझे कि तुमसार लिकिन एकटा दोसरा सम्पति छे। ३५ वहीलाते तुम्हरा विश्वासोत हिम्मत ना हारेन, क्याँकि यहार इनाम

बहुत बोड़ो छे। ३६ तुमसाक लगातार हिम्मत करे रहना जरूरी छे, जसे कि तुम्हरा परमेश्वरेर इच्छाक पूरा करवा पारेन आर परमेश्वर जैडा चीजेर वादा दिहे, उडा तुम्हरा पाभेन। ३७ जैकिसम परमेश्वरेर शास्त्र बताछे, “वहाँय ओसनेवाला छे आर वहाँय देरी नी करबे। ३८ आर मोर धर्मी लोक विश्वास से जिन्दा रोहबे, अगर कोय विश्वास से पीछू हटे जाय, त मुई वहा से खुश नी होमु।” ३९ हमरा पाछू हटनेवाला आर नाश होनेवाला लोकेर मान्दी नी छी, मगर हमरा त उला लोकेर मान्दी छी, जैला लोक विश्वास करछे आर बचाल छे।

परमेश्वरेर महान विश्वासी लोक

११ अला विश्वासेर बारे बोलछी। हमरा जैला चीजेर उम्मेद करछी, विश्वास उला चीजेर बारे भरोसा दिछे, आर जैला चीजोक हमरा देखवा नी पारछी, विश्वास उला चीजेर प्रमाण दिछे कि उला छे। २ विश्वासेर कारण पुराना युगेर अगुवाला परमेश्वरेर लिकिन से शाबसी पाहिले। ३ विश्वासेर जरियाय हमरा जाने जाछी कि दुनियाँडा परमेश्वरेर वचनेर जरियाय बनिहे। आर इडा नी कि जे कुछु देखाल जाछे, उला देखाल चीज से बनाल गहे। ४ हाबिल अपना बोड़ो भई कैन से बेसी अच्छा बलिदान परमेश्वरेर तने चढ़ाल। इखान काम हाबिल विश्वास से करिल, आर परमेश्वर वहाक धर्मी ठहराल। हाबिल त मोरे गहे, मगर अला तक

हमरा विश्वासेर बारे वहार लिकिन से सिखवा पारछी। ५ हनोक एकटा लोक छिले, जहाँय परमेश्वरेर पर विश्वास करछिले। वहाक मौतेर मुख देखवा नी होल। वहाँय परमेश्वरोक खुश करिल, आर वहीलाते परमेश्वर वहाक स्वर्गोत उठाय लिहिले। आर वहार बदनडार पता नी चलिल। ६ विश्वासेर बिना परमेश्वरोक खोश करा नी जाबे, क्योंकि परमेश्वरेर लिकिन जहाँय जाबे, वहाक इडा विश्वास करवा होबे कि परमेश्वर छे। जहाँय परमेश्वरोक छाभछे, परमेश्वर वहाक इनाम दिबे। ७ परमेश्वर नूहोका उला बातेर बारे हुँसियार करे दिहिले, जैला चीजोका नूह नी देखे। मगर उला बातेर पर विश्वास करे नूह अपना परिवारोका बचवार तने एकखान बोड़ो जहाज बनाल, आर वहार भीतरोत अपना परिवारेर साथे ठुके गेल। आर इखान कामेर जरियाय वहाँय दुनियाँर लोकोक दोषी ठहराल, आर परमेश्वर वहाक वहार विश्वासेर कारण से धर्मी ठहराल। ८ परमेश्वर इब्राहिमोका जैखुना बुलाहिले, वहाँय परमेश्वरेर हुकूम माने इकिसम जगहोत निकले चले गेल, जैखान जगहोका परमेश्वर वहाक देनेवाला छिले। वहाँय इडा नी जानछिले कि वहाँय कुनठिन जाछे, तहारो पर वहाँय घर से निकले गेल। ९ परमेश्वर जैडा देशेर वादा इब्राहिमोका दिहिले, विश्वास करे इब्राहिम उडा देशोत परदेशीर मान्दी तम्बू बनाय रोहिल। वहार बेटा इसहाक आर वहार पोता याकूबो इठिन रोहिल। इ-दोनोंझनाको परमेश्वर बाद करे अपना वादा दिहिले।

१० इब्राहिम हमेशा अटल रहनेवाला एकटा नगरेर इन्तेजार करछिले, जैडा नगरेर इंजीनीयर आर राजमिस्त्री खुद परमेश्वर छे। ११ इब्राहिमेर पत्नी सारा बाँझी छिले आर बुढ़ी हंय गहिले। वहाँय विश्वास से बुढ़ी वयसोत एकटा लड़का जनम दिले, क्योंकि वहाँय जानछिले कि जहाँय वहार साथे वादा करिहे, वहाँय सच्चा छे। १२ आर इकिसम करे इब्राहिम एकटा बूढ़ा कमजोर आदमी से आसमानेर तारा आर समुन्द्रेर बालूर मान्दी बेगेनती बेटा-बेटी पैदा होल। १३ परमेश्वर जैडा चीजेर वादा इला लोकेर साथे करिहिले, यरा उला चीजोक नी पाले। मगर यरा उलार पर विश्वास राखे मोरे गेल, आर उला चीजोक दूर से देखे खुश होल। आर इडा माने लिले कि हमरा दुनियाँत परदेशी आर मुसाफिर छी। १४ जहाँय इकिसम बात करछे, वरा इडा देखाछे कि वरा अपना देशोक छाभछे। १५ आर जैडा देश से वरा निकले ओसिहिले, अगर उडा देशेर ख्याल करिलतेन त उसाक वापस चले जवार मौका मिलिलतेन। १६ मगर वरा एकटा आढ़ो बढ़िया देशेर इच्छा करछिले, जैडा कि स्वर्गोत छे। वहीलाते परमेश्वर अपना-आपोक उसार परमेश्वर कोहते नी शरमाछे। आर उसार तने एकटा नगर तैयार कर राखिहे। १७ इब्राहिम परमेश्वरेर पर विश्वास करछिले। वहीलाते परमेश्वर इब्राहिमेर विश्वासोक जाँच करवार तने बोलिल कि मोर तने तुई अपना एकलौता बेटा इसाहकोक बलिदान करे दे। परमेश्वरेर लिकिन से वादा पावार बादो इब्राहिम

परमेश्वरेर तने अपना बेटाक बलिदान करवार तने तैयार छिले।
१८ वहाक कहाल गहिले, “इसहाक से तोर खानदान समझाल जाबे।”
१९ इब्राहिम इडा माने लिहिले कि परमेश्वर शक्तिमान छे, आर वहाँय
इसहाकोक जिन्दा करबे। कहवार मतलब कि इब्राहिम इसहाकोक
आरमने जिन्दा पाले। २० इसहाक परमेश्वरेर पर विश्वास करे अपना
दोनोंझन बेटा याकूबोक आर एसाबोक आशीर्वाद दिले कि आगु चले
परमेश्वर उसाक आशीर्वाद दिबे। २१ याकूबेर बारह बेटा भीतर से
एकझन बेटा यूसुफ छिले। वहार दुईझन बेटा छिले। बाद करे जैखुना
याकूब मोरवार मान्दी हंय गहिले, अपना चलवार लाठीखानेर सहारा ले
परमेश्वरेर भक्ति करिल। वहाँय परमेश्वरेर पर विश्वास करे वहाँय
अपना दुईझन पोताक आशीर्वाद दिले। २२ यूसुफेर जैखुना मरवार समय
बगलोत चले ओसिहिले, त वहाँय परमेश्वरेर पर विश्वास करे कोहिले
कि परमेश्वर इजराएली लोकलाक मिसर देशेर गोलामी से निकलाय ले
जाबे, आर जैखुना तुम्हरा निकलिभेन, मोर हड्डीलाक मिसर देश से ले
चले जायन। २३ मूसा नबीर जैखुना जनम होईले, वहार माँ-बाप वहार
जन्मेर बाद तीन महीना तक वहाक नुकाय राखिल, क्योंकि वरा देखिल
कि बच्चाडा खुबसूरत छे। वरा राजार हुकूम से नी डोराल। वहार माँ-
बाप इला सबला परमेश्वरेर पर विश्वास करे करिल। २४ मूसा जवान
हवार बाद, परमेश्वरेर पर विश्वास करे वहाँय अपना-आपोक मिसर

देशेर राजार बेटीर बेटा बोलते इन्कार करे दिले। २५ मूसा पापोत रहय थोड़ेक दिनकार सुखेर जिन्दगी बितवा नी चाहचिले, बल्के वहाँय परमेश्वरेर लोकलार साथे दुःख उठाय रहवा चाहले। २६ वहाँय मिसर देशेर धन-दौलतोक बेकार समझिल। वहार बदले वहाँय मसीहार तने बदनामी उठाना पसंद करिल क्यौंकि वहाँय अपना इनाम पवार इन्तेजार करछिले। २७ वहाँय राजार गोस्सा से नी डोराल, आर परमेश्वरेर पर विश्वास करे मिसर देश छोड़े दिले, क्यौंकि वहाँय अनदेखा चीजोक देखवार मान्दी समझे मजबूत रोहोल। २८ विश्वास से मूसा इजराएली लोकोक फसह परब मनवार हुकूम दिले, आर सभाको अपना-अपना घरेर दरवाजार उपरोत खून लगवा कोहले, जसे कि मौतेर फरीस्ता उसार हरेकझनार पहिला बेटाक जान से नी मारे। २९ लोक जैकिसम सुखना जमीनोत बेराछे, वही किसम विश्वास से इजराएली लोक बेराय लाल समुन्द्र पार करिल। मगर जैखुना मिसर देशेर लोकला वही किसम पार करवार कोशिश करिल, त वरा डुबे मोरे गेल। ३० विश्वास से इजराएली लोकला यरीहो नगरेर देवालडार चारोह भीति सात दिन तक चक्कर लगाल, आर यरीहो नगरेर देवालडा पोड़े गेल। ३१ राहब नामेर एकझन बेश्या छिले। जैला लोक परमेश्वरोक नी मानछिले, वहाँय उसार बीचोत रोहछिले। इजराएली लोक जैला भेदिया बने ओहिले, विश्वास से वहाँय उसाक नुकाय सही-सलामत से

राखिहिले। आर बाँकी लोकलाक मारे देयाल गहिले, मगर वहाक छोड़े देयाल गहिले। ३२ अला मुई आर कहार कहार बारे कोहमु? क्योंकि समय नी छे कि मुई गीदोनेर, बाराकेर शिमशोनेर, यिफताहर, दाऊदेर, शमूएलेर, आर दोसरा नबीलार बारे बोली। ३३ कुछुला लोक विश्वास से देशलाक जीते लिहिले। कुछुला लोक इमानदारी से काम करिल आर उला चीजोक पाले, जैलार बारे वादा कराल गहिले। आर कोय सिंह-बाघेर मुख बन करिल। ३४ कोय धधकाल आगिनोक बुझाय दिले। कोय-कोय धारवाला तरवाल से बचे गेल। कमजोर लोक शक्तिशाली बने गेल, आर कोय विदेशी लोकेर फौजोक मारे भगाय दिहिले। ३५ कोय-कोय स्त्रीला अपना मराल लोकलाक जिन्दा होते देखिल। कतेला लोक त मार खाते-खाते मोरे गेल, मगर बचवा नी चाहले, क्योंकि वरा मौत से जिन्दा हवार अच्छा मौका पावा चाहचिले। ३६ बहुतझनार मजाक उड़ाल गेल। बहुतझन कोड़ार मार खाले, आर बहुतझनाक बन्हाल गेल, आर जेलोत डाले देयाल गेल। ३७ बहुतझनाक पत्थल दे मराल गेल। आड़ी दे चीरे देयाल गेल। जाँच कराल गेल। तरवाल दे मराल गेल। वरा गरीब छिले, दुःख आर तकलीफोत रहवार कारण भेड़ार आर बकरीर खाल उढ़े इधर-उधर भटकते रोहोल। ३८ दुनियाँडा इला लोकेर रहवार लायक नी छिले। वरा कोयखुना जंगलोत, कोयखुना पहाड़ोत, कोयखुना गड्ढालात आर कोयखुना

धरतीर फटाल जगहलात छिपे रोहछिले। ३९ उसार विश्वासेर कारण उसार बड़ाई कराल गहे। तहारो पर उसाक परमेश्वरेर वादा कराल चीज नी मिलिल, ४० क्याँकि परमेश्वरेर पहिले से एकटा सबसे अच्छा योजना छिले कि हमसाक छोड़े परमेश्वर उसाक पूरापूरी खाँटी नी करबे।

परमेश्वरेर शासन

१२ इला सबला लोकेर जीवन हमसाक बताछे कि वरा केनमन करे परमेश्वरेर पर विश्वास करिल। जैला बात हमसाक विश्वासोत बाधा दिछे, ओसो हमरा उला सब बातोक दूर करे दी। जैला पाप हमसाक उलझाय दिछे, उला पाप से दूर रही। आर जैडा दौड़ हमसाक दौड़वा लागे, उडा दौड़ोक मोनोत ठाने दौड़ी। २ आर यीशु हमसार विश्वासेर नेंव छे, आर हमसाक विश्वासोत खाँटी बनाछे। वहारे भीति देखते रोही। वहाँय अपना ओसनेवाला खुशी देखे, शरमिन्दा हवार कुछु चिन्ता नी करिल, बल्के क्रुसेर दुःख सहय लिले, आर परमेश्वरेर सिंहासनेर दहिना बगल बोठे गहे। ३ वहार बारे सोचो कि वहाँय कतेक दुःख उठाहिले। पापी लोक वहार खिलाफ बोलछिले, तहारो पर वहाँय लोकेर बात सहय लिले। आर वहीलाते तुम्हरा थके ना जायन, आर ना हिम्मत हारेन। ४ तुम्हरा पापेर खिलाफ इकिसम कोय लड़ाई नी लड़िहेन कि

तुमसाक अपना खून बहवा होये। ५ आर जैडा उपदेश परमेश्वर तुमसाक अपना बेटा समझे हिम्मत दुवार तने दिहिले, तुम्हरा उडा उपदेशोक भूले गहेन। परमेश्वर कोहचे, हे मोर बेटा, प्रभुर शासनोक हलका बात ना समझेन, आर जैखुना वहाँय तुमसाक धमकाय, त हिम्मत ना हारेन, आर घबराय ना जायन। ६ क्योंकि प्रभु जहाक प्रेम करछे, वहाक शासन करछे आर जहाक बेटा बनाय लिछे, वहाक सजई दिछे। ७ अनुशासन वाला लोक हवार तने तुम्हरा दुःख उठाव। परमेश्वर तुमसाक बेटा समझे तुमसार साथे सलूक करछे। इकिसम कोय बेटा नी छे जहार पर वहार बाप शासन नी करछे। ८ आर परमेश्वरेर शासनेर भागी सबकोय होचे। अगर तुमसार पर शासन नी होचे, त तुम्हरा नाजायज औलाद समझाल जाभेन, आर तुम्हरा परमेश्वरेर बेटा-बेटी नी छेन। ९ जैकिसम इडा दुनियाँत हमसाक जनम देनेवाला पिता हमसार पर शासन करछे, आर हमरा वहार इज्जत करछी, त वही किसम परमेश्वर जहाँय हमसार आत्मिक पिता छे, वहार अधीनोत कतेक बेसी रहवा लागे जसे कि हमरा जिन्दा रहवा पारी। १० इ-दुनियाँर पिता त अपना-अपना समझेर मुताबिक थोड़ेक दिनेर तने शासन करछे, मगर परमेश्वर त हमसार फायदार तने करछे, जसे कि जैकिसम वहाँय पवित्र छे, वही किसम वहाँय हमसाक पवित्र लोक बनाय। ११ जैखुना कहारो पर शासन कराल जाछे, उखुना वहाक उडा शासन खुशी नी दिछे, मगर दुःख दिछे। बाद

करे इडा शासनोत पक्का हंय जवार बाद, त इडा से वहाक शांतिदायक आर धार्मिक जीवन मिलछे। १२ वहीलाते तुमसार कमजोर हाथलाक आर कमजोर हटुवालाक मजबूत करो, १३ आर अपना पाँलार तने सीधा रास्ता तैयार करो, जसे कि नेंगरा लोकेर कमजोर हटुवा अलग नी हंय जाय, बल्के अच्छा हंय जाय।

परमेश्वरोक छोड़वार चेतावनी

१४ सभारो साथे मिले-जुले रहेन, आर पवित्र जीवन बितवार तने कोशिश करो। पवित्र जीवनेर बिना कोय लोक प्रभुक देखवा नी पारबे। १५ सावधान! तुमसार बीच से कोय विश्वासी परमेश्वरेर दया से दूर ना हंय जाय। बुरा लोक से सावधान रहेन। इला लोक तीतो जड़ वाला गाछ बने दोसरा लोकोक तकलीफ दिछे आर अशुद्ध करछे। १६ सावधान! कोय तुमसार बीच से कोय याकूबेर बोड़ो बेटा एसाबेर मान्दी बने नी जाय। एसाव जहार जीवनोत परमेश्वरेर कोय डोर नी छिले, आर कुकरमी बने गहिले। वहाँय एक वक्तेर खानार तने बोड़ो बेटा हवार अधिकारोक छोटो भईर लिकिन बेचे दिहिले। १७ तुम्हरा जानेन कि बाद करे जैखुना एसाव अपना बाफेर लिकिन से आर्शीवाद पवा चाहले, त वहाक नालायक समझाल गेल, वहाँय आँखेर लोयला बहाय-बहाय कनवार बादो अपना बाफेर मन बदली करवा नी पाले। १८ तुम्हरा त उखान पहाड़ेर लिकिन नी जायन, जैखानेर पर आगिन धधकेछिले,

कालो मेघ आर अन्हार छिले आर बोड़ो दून चलछिले। आर इखान पहाड़ेर लिकिन इजराएली लोकला छिले। १९ आर उठिन वरा इकिसम शंखेर बोड़ो आवाज सुनिल आर साथे-साथे परमेश्वरेर आवाज सुनिल कि वरा डोराय गेल आर परमेश्वरेर लिकिन बिनती करवा लागिल, “हे परमेश्वर! तुई हमसार साथे आर बात ना कर।” २० परमेश्वर जैडा हुकूम उसाक दिले, वरा उडाक सहवा नी पारछिले, क्याँकि परमेश्वरेर हुकूम छिले: अगर कोय जानवरो उखान पहाड़ोक लाड़बे, त उडाक पत्थल दे मारे खतम कराल जाबे। २१ आर उडा दर्शन इकिसम छिले कि मूसाव बहुत डोराय गहिले आर कोहचिले, “मोक बहुत डोर लागिहे आर मुई काँपछी।” २२ मगर तुम्हरा सिय्योन पहाड़ेर बगलोत पहुँचे गहेन, जैडा कि परमेश्वरेर नगर यरूशलेम छे। स्वर्गोत तुम्हरा लाखो-लाख फरीस्तार साथे खुशी मनाछेन। २३ आर तुम्हरा जैडा मंडलीर लिकिन ओसिहेन, उडा मंडलीर हर एकझन लोक परमेश्वरेर पहिला बेटा-बेटी छेन। उसार नाम स्वर्गोत लिखाल छे। तुम्हरा परमेश्वरेर लिकिन ओसिहेन, जहाँय सभारो इन्साफ करछे। आर तुम्हरा प्रभुर धर्मी लोकेर आत्मार लिकिन ओसिहेन, जैलाक खाँटी बनाल गहे। २४ तुम्हरा यीशुर लिकिन ओसिहेन, जहाँय नया नियमेर वकील छे, जहाँय मानुषोक परमेश्वरेर साथे मेल कराछे। आर उखान छिटाल खूनेर बगलोत ओसिहेन, जैखान खून हाबिलेखून से बेसी अच्छा छे। २५ हुँसियार

रहेन। जहाँय तुमसार साथे बात करछे, वहार बात सुनते इन्कार ना करेन। धरतीर पर मूसा इजराएली लोकलार साथे बात करछिले। वरा बात सुनते इन्कार करिल, आर वरा नी बचील। मगर परमेश्वर जहाँय हमसार साथे स्वर्ग से बात करछे, आर अगर हमरा वहार बात सुनते इन्कार करी, त हमरा कोय पाके नी बचमु। २६ जैखुना परमेश्वर सिय्योन पहाड़ेर पर से बोलिल, त धरतीखान हिले गहिले। मगर अला परमेश्वर वादा करिहे, “एक बार फेर मुई ना सिरिफ धरतीखानोक बल्के आसमानडाको हिलाय दुम।” २७ आर इडा वचन “एक बार फेर” इडा बातोक बताछे, कि जैला चीजोक हिलाय देयाल जाछे, उला चीजोक हटाय दिबे आर जैला नी हिलबे, वहार बाद सिरिफ उला चीज रोहबे। २८ वहीलाते जैडा राज कोयखुना नी हिलबे, हमसाक उडा राज मिलबे। जैडा से वहाँय खुश हंय जाय। ओसो, हमरा उडार तने परमेश्वरोक धन्यवाद दी आर आदर-सम्मान करी, आर डोरेर साथे परमेश्वरेर भक्ति करी, २९ क्यौंकि हमसार परमेश्वर जलाय मुस करनेवाला आगिन छे।

आखरी सलाह-मसोरा

१३ तुमसार बीचोत भाईचरार प्रेम बनाल रहोक। ^१ मेहमानेर इज्जत आर मान-सम्मान करवा ना भूलेन, क्यौंकि मेहमानेर इज्जत आर

सम्मान करे कुछुला लोक अनजानोत फरीस्तालार इज्जत आर मान-सम्मान करिहे। ३ जैला लोक जेलोत छे, उसार ख्याल राखो आर उसार मदद करो, समझो कि तुम्हराव उसार साथे जेलोत छेन। जैला लोकोक सताल जाछे, उसार ख्याल करो। समझो कि तुम्हरा खुद तकलीफोत छेन। ४ ब्याह-शादी सब लोकेर तने इज्जतेर बात समझाल जाक। आर पति-पत्नीर रिस्ताक ठीक राखो। कुकरम ना करेन। परमेश्वर कुकरम करनेवालार इन्साफ करबे। ५ तुम्हरा अपना-आपोक टका-पैसार लालच से दूर राखो, आर जे कुछु तुमसार लिकिन छे, वहीलाते संतोष करो, क्योंकि प्रभु खुद कोहचे, “मुई हरखुना तोर साथे रोहमु आर कोयखुना नी छोड़ुम।” ६ वहीलाते हमरा हिम्मत करे कोहची, “प्रभु हमसार मददगार छे, हमरा नी डोराम, लोक हमसार की करवा पारे?” ७ तुम्हरा अपना अगुवालार ख्याल करेन, जहाँय तुमसाक परमेश्वरेर वचन सुनाहे। उसार अच्छा जीवनडाक याद करो आर उसार विश्वासेर मान्दी चलवार कोशिश करो। ८ यीशु मसीहा काल जैकिसम छिले, आर आझो वही किसम छे आर युग-युग तक एके मान्दी रोहबे। ९ लोकेर नया-नया किसमेर उपदेश, जैला कि यीशुर बारे नी छे, उला सुने भटके ना जायेन। तुमसार तने इडा अच्छा छे कि तुमसार भीतरी शक्ति परमेश्वरेर दया से बढ़वा लागे, इडा नी कि खान-पानेर नियम से। खान-पानेर नियम से लोकोक कोय फायदा नी होचे। १० मूसा नबीर नियम

मुताबिक पूजारी लोकोक तम्बूर थान से खवार अधिकार छिले। मगर हमसार इकिसम एकटा थान छे, जैडार पर से खवार अधिकार पूजारीलाक नी छे। ११ महापूजारी बलि कराल जानवरेर खून पापेर माफीर तने महापवित्र जगहोत ले जाछिले। तहार बाद बलि कराल जानवरेर बदनडाक उसार डेरार बाहरे जलाल जाछिले। १२ यही तने यीशु मसीहाव लोकलाक अपना खूनेर जरियाय पवित्र करवार तने फाटकेर बाहरे दुःख उठाल। १३ प्रभुर जैडा बेज्जती सहिले, ओसो, उडा बेज्जती हमरा अपना उपरोत ले डेरार बाहरे निकले वहार ठिन चले जई। १४ क्योंकि इठिन हमसाक हमेशार तने रहवार कोय नगर नी छे, बल्के हमरा एकटा ओसनेवाला नगरेर इन्तेजार करछी। १५ वहीलाते हमरा यीशुर जरियाय परमेश्वरेर बड़ाई करवार तने बलिदान चढ़ई यानी अपना मुख से परमेश्वरेर बड़ाई करी। १६ लोकेर भलाई करो आर अपना चीजला से दोसरा लोकेर मदद करो। परमेश्वर इकिसम बलिदान से खोश होचे। १७ अपना अगुवाला लोकेर हुकूम मानेन आर उसार अधीनोत रहेन। वरा तुमसार पर हमेशा ध्यान दिते रोहचे, क्योंकि उसाक तुमसार तने परमेश्वरेर लिकिन हिसाब दुवा होबे। अगुवालार कहना मानो जसे कि वरा खुशी-खुशी काम करवा पारे, आर वरा अपना कामोक बोझ समझे नी करे। वरा अगर बोझ समझे काम करबे, त तुमसाक कोय पैदा नी छे। १८ हमसार तने प्रार्थना करो। हमसाक

विश्वास छे कि हमसार मनडा साफ छे, आर हमरा सब बातोत अच्छा चाल चलछी। १९ मुई तुमसाक खास करे प्रार्थना करवा कोहची कि मुई बहुत जल्दी तुमसार लिकिन ओसवा पारी। २० हमसार प्रभु यीशु भेड़ार रखवाल छे। शान्तिदाता परमेश्वर वहाक हमेशा रहनेवाला समझौतार खून से जिन्दा करिल। २१ मुई तुमसार तने परमेश्वरेर लिकिन प्रार्थना करछी कि परमेश्वर तुमसाक हरेकटा अच्छा बातोत खाँटी बनाय, जसे कि तुम्हराव वहार इच्छा पूरा करवा पारेन। मुई प्रार्थना करछी कि जैला बात परमेश्वरोक अच्छा लागछे, वहाँय उला चीज यीशु मसीहार जरियाय हमसार भीतरोत पैदा करे। वहार बड़ाई युग-युग तक होते रहोक। आमीन। २२ हे मोर भा-बहिनला, मुई तुमसाक बहुत छोटो कर लिखनु। तुमसाक बिनती करे कोहची कि तुम्हरा इला उपदेशोक माने लव। २३ तुमसाक इडा मालूम होक कि हमसार भई तिमोथी जेल से निकले गहे, मगर अला साथे नी छे। आर अगर वहाँय जल्दी ओसे जाय, त मुई वहाक अपना साथे ले ओसुम आर तुमसार साथे मुलेकात करूम। २४ अपना सबला अगुवा आर सबला मसीही भईलाक हमसार तरफ सभाको सलाम कहय देन। इटली देशेर भा-बहिनला, तुमसाक नमस्कार कोहचे। २५ तुमसार सभारो पर परमेश्वरेर दया होते रहोक।

याकूबेर चिट्ठी

सहवार शक्ति आर विश्वास

१ प्रिय भा-बहिनला! मुई परमेश्वरेर आर प्रभु यीशु मसीहार सेवक याकूब छी। परमेश्वरेर लोकला जैला बारह खानदानेर छेन, आर दुनियाँत छितराल छेन, तुमसाक मोर नमस्कार। २ भा-बहिनला! जैखुना तुम्हरा बहुत किसमेर परीक्षात पोड़ेन, त उखुना तुम्हरा इलाक खुशीर बात समझेन ३ क्योंकि तुम्हरा मालूम करवा पारभेन कि तुमसार विश्वासेर जाँच से तुमसार सहवार शक्ति बढ़ते जाबे। ४ तुमसार अन्दरोत सहवार शक्तिक पूरापूरी काम करवा दव जसे कि तुम्हरा एकदम खाँटी बने जायेन आर तुमसार अन्दरोत कोय चीजेर कमी ना रहय। ५ तुमसार भीतरोत अगर कहारो बुद्धिर कमी रहय, त वहाँय परमेश्वरेर लिकिन से माँगे लोक। वहाक देयाल जाबे क्योंकि परमेश्वर बिना धमकाय सभाको पूरा दिल से दिछे। ६ मगर मँगवारखुना कोय किसमेर शक ना करेन। विश्वास करे मँगवा होबे। क्योंकि जहाँय शक करछे, वहाँय समुन्द्रेर पानीर मान्दी छे, जैखान पानी हवा से बोहते आर उछलते रोहचे। ७ इकिसम लोक इडा ना समझोक कि वहाँय प्रभुर

लिकिन से कुछ पाबे। ८ इकिसम लोक दुई मनवाला होचे, कोयखुना विश्वास करबे, त कोयखुना शक करबे, आर वहाँय अपना बातलात टिके नी रोहचे।

गरीब आर पैसावाला

९ गरीब भा-बहिनला, तुमसाक घमंड करवा लागे क्योंकि परमेश्वर तुमसाक इज्जत दिहे। १० मगर पैसावालाला तुमसाक वहीखुना घमंड करवा लागे, जब परमेश्वर उसाक छोटी बनाछे। पैसावाला घासेर फूलेर मानी सुखाय जाबे। ११ जैकिसम बेलाडा उठवार साथे-साथे तेज धूप पोड़छे, आर घासलाक सुखाय दिछे, आर फूललाव झड़े जाछे। उसार सुन्दर रूप खतम हंय जाछे। वही किसम करे पैसावाला लोक भाग दौड़ करते-करते खतम हंय जाछे।

परीक्षा आर पाप

१२ खुशहाल वहाँय छे, जैखुना वहार परीक्षार समय दुःख-तकलीफ उठाछे, आर विश्वासोत बनाल रोहचे। परमेश्वर वहाक एकटा मुकुट दिबे, आर इडा मुकुट वहार हमेशार जिन्दगी होबे। आर परमेश्वर इडा हमेशार जिन्दगीर वादा उसार साथे करिहे, जहाँय परमेश्वरोक प्रेम करछे। १३ जैखुना कोय परीक्षात पोड़छे, त वहाँय इडा ना सोचोक कि परमेश्वर वहार परीक्षा लिछे। परमेश्वर कहाको पाप करवार तने परीक्षा

नी लिछे, आर ना कभी पाप करवार तने परमेश्वरेर परीक्षा लियाळ जाछे। १४ मगर हर एकझन अपना खराब इच्छार कारण से पापेर भीति टनाळ जाछे, आर फँसे जाछे। १५ फेर उडा खराब इच्छा जैखुना बेसी मजबूत हंय जाछे, त वहा से पापेर जनम होचे, आर पाप जैखुना बढ़े जाछे त मौतोक आनछे। १६ हे मोर प्यारा भा-बहिनला, तुम्हरा धोखात ना पोड़ेन, १७ क्योंकि हर एकटा अच्छा आर खाँटी दान परमेश्वरेर लिकिन से स्वर्ग से नाभे ओसछे। परमेश्वर छे जहाँय आसमानोत रोशनी बनाहे। वहाँय कभी नी बदलेछे। १८ परमेश्वर अपना इच्छा से आर सच्चा वचनेर जरियाय, हमसाक अपना बेटा-बेटी बनाहे, जसे कि हमरा वहार बनाळ सबला चीजेर भीतरोत पहिला फलेर मान्दी हवा पारी।

वचन सीखना आर वचन मुताबिक चलना

१९ हे मोर भा-बहिनला, तुम्हरा मोर इडा बातेर पर ध्यान दव। तुम्हरा हर एकझन सुनवार तने हरखुना तैयार रहेन। मगर जैखुना बोलछेन, त बोलवार पाके जल्दी बाजी ना करेन, आर ना जल्दी गोस्सा करेन। २० गोस्सा करे हमरा परमेश्वरेर इच्छा मुताबिक चलवा नी पामु। आर परमेश्वर हमसा से चाहचे कि हमरा वहार इच्छा मुताबिक चली। २१ यही तने सब किसमेर घिणेर बात आर बुराई छोड़े दव। नरम दिलवाला बने वचनोक ग्रहण करो, जैडा वचन तुमसार आत्माक बचवा पारे।

२२ सिरिफ वचनडा सुनो मत, मगर वचन मुताबिक करो। जहाँय सिरिफ सुनछे, आर वही मुताबिक नी करछे, वहाँय अपना-आपोक धोखा दिछे। २३ जहाँय सिरिफ वचन सुनछे, मगर वचनेर मुताबिक काम नी करछे, वहाँय उडा मानुषेर मान्दी छे, जहाँय अपना चेहरा अईनात देखिल। २४ उठिन से चले जवार बाद वहाँय बहुत जल्दी अपना चेहराडा भूले जाछे। २५ मगर जे लोक खाँटी नियम-कानूनेर पर मन लगाय राखछे, वहाँय अपना कामोत आशीवाद पाबे। क्याँकि, वहाँय सुने नी भूलछे, बल्के वही मान्दी काम करछे। २६ अगर कोय अपना-आपोक प्रभुर भक्त समझेछे, आर अपना जीभाडार पर लगाम नी लगाय, त वहाँय अपना-आपोक धोखा दिछे, आर परमेश्वर तने वहार भक्ति झूठ छे। २७ जहाँय राँड़ी आर मोर्या बच्चाक दुःख-तकलीफोत मदद करछे, आर अपना-आपोक दुनियाँर सब किसमेर गंदा काम से दूर राखछे, वहार भक्ति परमेश्वर नजरोत साफ आर पवित्र मनवाला भक्ति छे।

२ हे मोर भा-बहिनला, तुम्हरा जब हमसार महान प्रभु यीशु मसीहार पर विश्वास करछेन, त तुम्हरा दुई नजर से लोकोक ना देखेन। १ माने लव एकझन लोक अच्छा पौशाक आर सोनार आंठी पिन्हें तुमसार प्रार्थनार घरोत ओसिल, आर एकझन गरीब लोको गंदा कपड़ा पिन्हें ओसिल। ३ अगर तुम्हरा अच्छा कपड़ा पिन्हाल लोकटाक बेसी इज्जतेर

साथे कोहिस, “तुई इठिन ओस, आर इखान कुसीर पर बोठेक”, आर गरीब लोकटीक कोहिस, “तुई उठिन थाड़ो हने रोह, नी त तुई इठिन मोर पाँलार बगलोत बोठेक,” ४ त इकिसम करे तुम्हरा अपनार बीचोत बोड़ो-छोटोर भेद करछेन, आर बुरा बिचार राखे खराब इन्साफी बने गेलेन। ५ हे मोर प्यारा भा-बहिनला, तुम्हरा सुनोव। परमेश्वर इडा दुनियाँर गरीब लोकलाक बिछे लिहे कि उसाक विश्वासोत धनी बनाय। आर जैडा राजेर वादा परमेश्वर उसार साथे करिहिले, उडा राजेर हकदार बनाय। ६ मगर तुम्हरा उडा गरीब लोकेर बेज्जती करलेन। धनी लोकला की तुमसार पर जूलुम नी करछे? आर वरा की तुमसाक कचहरीत नी ले जाछे? ७ इकिसम लोक प्रभुर नामेर बदनामी करछे। ८ तुम्हरा अच्छा करछेन, अगर तुम्हरा मसीहा यीशुर राजेर नियमोक माने चलछेन, जैकिसम कि परमेश्वरेर शास्त्रोत बताछे, “तुई अपना पड़ोसीक अपनार मान्दी प्रेम करेक।” ९ तुम्हरा अगर बोड़ो-छोटो समझे मुख देखे बिचार करछेन, त पाप करछेन, आर परमेश्वरेर नियम मुताबिक तुम्हरा कसूरबार छेन। १० क्याँकि अगर तुम्हरा पूरा नियम-कानूनोक मानछे आर सिरिफ एकेडा बातोत गलती करछेन, त तुम्हरा सबला बातोत दोषी बने जाछेन। ११ अगर तुम्हरा कुकरम नी करलेन, मगर खून करलेन, त तुम्हरा नियम-कानूनोक भाँगे दिलेन, क्याँकि परमेश्वर अपना शास्त्रोत बोलिहे, “तुम्हरा कुकरम ना करेन, आर ना तुम्हरा खून

करेन।” १२ तुम्हरा परमेश्वरेर लोकेर मान्दी बात करो आर काम करो, क्योंकि तुमसार इन्साफ नियम-कानूनेर जरियाय होबे। इडा नियम-कानून लोकोक आजाद करछे। १३ जहाँय दया नी करिहे, इन्साफेर दिनोत वहारो पर दया कराल नी जाबे। मगर दया करनेवाला इन्साफेर दिन जीतबे।

विश्वासेर साथे-साथे अच्छा काम

१४ मोर भा-बहिनला अगर कोय कोहचे, मोर विश्वास छे, मगर अच्छा कामेर जरियाय विश्वासोक नी देखाछे, त यहा से कोय पैदा नी छे। इकिसम विश्वास वहाक बचवा नी पारबे। १५ अगर कोय भाई या बहिन उघारे या नांगटे छे, आर वहार लिकिन उदिना खवार तने कुछु नी छे, १६ उखुना तुमसार भीतर से अगर कोय वहाक कोहय, “सही सलामती से चले जा आर अच्छा से खईस आर बदनडाक गरम राखिस, मगर वहार बदनडार तने जैला कपड़ा-लत्तार जरूरत छे, वहाक अगर उला नी देन, त वहाक की लाभ होबे?” १७ ठीक वही मान्दी विश्वासो छे। अगर विश्वासेर साथे-साथे अच्छा काम नी करे, त विश्वास मराल छे। १८ कोय इडा कहवा पारे, “तुई विश्वास करछी, आर मुई काम करछी।” तुई मोक अपना विश्वासोक बिना अच्छा कामेर जरियाय देखा, आर मुई तोक अपना अच्छा कामेर जरियाय अपना सही विश्वासोक देखाम। १९ तोक विश्वास छे कि एक परमेश्वर छे, त तुई अच्छा बात कोहचिस।

भूतलाव इडा विश्वास करछे कि एक परमेश्वर छे आर डोरे थरथराछे।
२० मगर ऐ बेकूफ लोक, तुई की यहोडा नी जानिस कि अच्छा करम
बिना विश्वास बेकार छे? २१ जैखुना हमसार पिता इब्राहिम अपना बेटा
इसाहकोक थानडार पर राखे बलि करवार तने तैयार छिले, त वहाँय कि
करमेर साथे धर्मी नी ठहरील? २२ तुम्हरा देखलेन कि इब्राहिमेर अच्छा
कामेर साथे-साथे वहार विश्वास काम करछिले, आर अच्छा करमेर
जरियाय वहार विश्वास पूरा होल। २३ इकिसम करे शास्त्रेर बात पूरा
हंय गेल, जैठिन लिखाल छे, “इब्राहिम परमेश्वरेर पर विश्वास करिल,
आर परमेश्वर वहाक धर्मी ठहराल”, आर वहाक परमेश्वरेर दोस्त
कहाल गेल। २४ वहीलाते तुम्हरा देखछेन कि मानुषोक अच्छा कामेर
जरियाय धर्मी ठहराल जाछे, सिरिफ विश्वासेर जरियाय नी। २५ राहब
बेश्या जहाँय अपना बदनेर सौदा करछिले, ठीक यही मान्दी वहाँव
अपना अच्छा कामेर साथे धर्मी ठहरील, जैखुना वहाँय परमेश्वरेर
दूतलाक अपना घरोत नुकाय राखिले आर उसाक दोसरा रास्ता दे
पठाय दिले। २६ वहीलाते जैकिसम आत्मा बिना हमसार शरीरटा मराल
छे, वही किसम अच्छा कामेर बिना हमसार विश्वास मराल छे।

जीभाडार पर काबू

३ हे मोर भा-बहिनला, तुमसार भीतर से बहुतझन शिक्षक ना बनोक, क्याँकि हमरा जानी कि हमरा जैला लोक शिक्षक छी, हमसार इन्साफ बहुत कड़ाई से होबे। २ हमरा बहुत बार गलती करते रोहछी। जहाँय अपना बोली-वचनोत गलती नी करछे, वहाँय खाँटी लोक छे, आर वहाँय पूराडा बदनेर पर काबू राखछे। ३ हमरा घोड़ाक काबू करवार तने घोड़ार मुखोत लगाम लगाछी, आर लगामेर जरियाय घोड़ाडाक जैधर चाहची, उधर घोड़ाडाक घुरवा पारछी। ४ तुम्हरा जानेन कि पानी जहाज बहुत बोड़ो होचे, बहुत तेज हवा से चलाल जाछे, मगर एकखान छोटो पतवालेर जरियाय एकझन चलानेवला घटवाल अपना इच्छा मुताबिक जहाजखानोक घुराछे। ५ वही मान्दी जीभाडा पतवालखानेर मान्दी बदनडार एकखान छोटो हिस्सा छे, मगर उडा बोड़ो-बोड़ो बात बोलछे। तुम्हरा जानेन कि थोड़ेक आगिन दे बहुत बोड़ो जंगलोत आगिन लागे जाछे। ६ जीभाडाव एकखान आगिनेर मान्दी छे, आर जैठिन से बुराई ओसवा पारे, आर पूरा बदनडाक गंदा करे दिछे आर पूराडा जीवनोत आगिन लगाय दिछे, आर इखान आगिन नरक से ओसछे। ७ हर किसमेर जंगली जानवर, चिड़िया, पेटेर पर चलनेवाला जीव-जन्तु आर समुन्द्रेर जानवरोक लोक अपना काबूत रखवा पारछे, ८ मगर कोय लोक जीभाडाक अपना काबूत रखवा नी पारछे। जीभाडा इकिसम

बुराई छे, जैडाक काबू कराल नी जाछे, आर जहर से भराल छे। ९ हमरा यहीडा जीभाडा दे प्रभु यीशुर आर परमेश्वर पितार स्तुति बड़ाई करछी, आर यहीडा जीभा दे मानुषोक श्राप दिछी, जे मानुषोक परमेश्वर अपना रूपोत बनाहे। १० एकेखान मुख दे बड़ाई-श्राप दोनोंइन किसमेर बात निकलोछे। हे मोर भा-बहिनला, हमसाक इकिसम हवा नी लागे। ११ पानीर एके सोता से मीठा आर नमकीन दोनों किसमेर पानी की निकलोछे? नी निकलिछे। १२ हे मोर भा-बहिनला, डुमरेर गाछोत की जैतून फल होचे या अंगुरेर गाछोत डुमरेर फल होचे? नी होचे। नमकीन पानीर सोता से मीठा पानी निकलुवा पारे की? नी।

दुनियाँर बुद्धि आर परमेश्वरेर बुद्धि

१३ तुमसार बीच से बुद्धिमान आर समझदार लोक के छे? यदि कोय बुद्धिमान छेन, त वहाँय अपना अच्छा चाल-चलन देखाक, आर जैला काम वहाँय करछे, उला काम नरम हंय बुद्धि साथे करोक। १४ अगर तुमसार दिलला हिंसा से भराल छे आर सिरिफ अपना भलाईर बारे सोचेछेन, त तुम्हरा अपना बड़ाई ना करेन, आर सच वचनेर खिलाफ झूठ ना बोलेन। १५ इकिसम सोच-बिचार स्वर्ग से नाभे नी ओसछे, बल्के इकिसम सोच-बिचार दुनियाँर लोकेर सोच-बिचार से आर शैतान से ओसछे। १६ कारण जैठिन हिंसा आर सिरिफ अपना भलाईर बात होचे, वहीठिन झगड़ा आर सब किसमेर बुराई होचे। १७ मगर जैडा बुद्धि

स्वर्ग से ओसछे, उडा खाँटी, मिलनसार, नरम, मीठा, दया, आर अच्छा फल से भरपूर होचे, आर बोड़ो-छोटोर भेदभाव आर कपट से दूर रोहचे। १८ मेल-मिलाप कराछे, वरा शांतिर बिच्चन बुनबे आर भलाईर कटनी काटबे।

बुराई से दूर आर परमेश्वरेर नजदीक

४ तुमसार बीचोत लड़ई आर झगड़ा कुनठिन से ओसिल? तुमसार ऐश-मौजेर कारण तुमसार भीतरोत लड़ाई-झगड़ा होचे। २ तुम्हरा इच्छा करछेन। मगर तुम्हरा जैला चीज चाहचेन, उला नी पाछेन। जैखुना तुम्हरा नी पाछेन, त तुम्हरा खून करछेन। तुम्हरा हिंसा करछेन, आर झगड़ा करछेन। तुम्हरा नी पाछेन क्योंकि तुम्हरा परमेश्वरेर लिकिन नी माँगछेन। ३ तुम्हरा त माँगछेन, मगर नी पाछेन क्योंकि तुम्हरा बुरा नियत से माँगछेन, जसे कि अपना ऐश-मौज करे उड़ाये देन। ४ तुम्हरा जहाँय परमेश्वरोक धोखा दिछेन! तुम्हरा की जानेन नी कि जहाँय दुनियाँर बुराईर साथे दोस्ती करछे, वहाँय परमेश्वरेर साथे दुश्मनी करछे। वहीलाते जहाँय दुनियाँर साथे दोस्ती करवा चाहचे, वहाँय अपना-आपोक परमेश्वरेर दुश्मन बनाछे। ५ परमेश्वरेर पवित्र शास्त्रेर इडा बात बहुत कीमती छे, जैडा कोहचे, “परमेश्वर उडा आत्मार तने बहुत चिन्ता करछे, जैडा आत्मा वहाँय हमसार दिलोत दिहे। परमेश्वर

चाहचे कि उडा आत्मा वहारे रह्य। ६ वहाँय हमसार पर बहुत दया करछे।” वहीलाते इडा लिखाल छे, परमेश्वर घमंडी लोकेर बिरोध करछे, मगर नम्र लोकेर पर दया करछे। ७ वहीलाते तुम्हरा अपना-आपोक परमेश्वरेर अधीन करे दव। आर शैतानेर मुकाबला करो, त शैतान तुमसार लिकिन से भागे जाबे। ८ परमेश्वरेर बगलोत ओसो त वहाँय तुमसारो बगलोत ओसबे। हे पापी लोकला, तुम्हरा अपना हाथलाक शुद्ध करो। आर हे कपटी लोकला, तुम्हरा अपना-अपना दिलोक शुद्ध करो। ९ तुम्हरा दुःख मनाव, आर कानो आर शोक करो। तुम्हरा जहाँय हाँसेछेन, अला कानो। आर तुम्हरा जहाँय खुशीत छेन, अला मायूस हंय जाव। १० प्रभुर आगुत नरम दिलवाला बने जाव, त वहाँय तुमसाक बोड़ो बनाबे। ११ हे मोर भा-बहिनला, एक-दोसराझनार बदनामी मत करेन। जब कोय लोक अपना भईक बदनाम करछे, या वहार पर दोष लगाछे, इकिसम लोक मूसा नबीर नियम-कानूनोक बदनाम करछे। वहाँय नियम-कानूनेर मुताबिक नी चलछेन, बल्के हाकिम बने गहेन। १२ परमेश्वर नियम-कानून देनेवाला आर हाकिम छे, जहार लिकिन बचवार आर बर्बाद करवार शक्ति छे। तुम्हरा के छेन जे अपना पड़ोसीर पर दोष लगाछेन? १३ तुम्हरा जे कोहचेन कि आज या काल हमरा कोय दोसरा शहरोत जाय एक साल रोहमु, आर कारोबार करे नफा कमामु। १४ मगर तुम्हरा इडा नी जानेन कि काल की होबे?

तुम्हरा सुने लव, तुम्हरा नी जानेन कि तुमसार जीवनडार की होबे? तुम्हरा भाँपेर मान्दी छेन, जैखान सिरिफ कुछु समयर तने देखा जाछे, वहार बाद मिछे जाछे। १५ यहार उल्टा तुमसाक इडा कहवा लागे, अगर प्रभुर इच्छा होले, हमरा जिन्दा रोहमु, तब इखान या उखान कामो करमु। १६ मगर जैला काम तुम्हरा करवा चाहचेन, उलार बारे घमंड करछेन। इकिसम घमंडेर बात बोलना खराब बात छे। १७ अगर कोय जाने कि कुन काम करना अच्छा छे, मगर नी करछे, त वहार तने इडा पाप छे।

५ तुम्हरा जहाँय पैसावाला छेन! तुम्हरा सुनो। तुमसार पर जैला दुःख पोड़नेवाला छे, उलार कारण कानो आर शोक करो। २ तुमसार धन-दौलत सड़े गहे, आर तुमसार कपड़ा-लत्तात पिलु धरे लिहे। ३ तुमसार सोना चानीत मरछा पकड़े लिहे, आर उखान मरछा तुमसार खिलाफ गवाही दिबे, आर आग्निनेर मान्दी तुमसार मांस खाय लिबे। तुम्हरा त आखरी युगेर तने धन-दौलत जमा करिहेन। ४ देखो, जैला जन-मजदूर तुमसार फसल काटिहे, उसार जैला मजदूरी तुम्हरा नी दिहेन, उला तुमसार खिलाफ जोर से आवाज दे बोलछे, आर उला मजदूरेर कानोन परमेश्वरेर लिकिन पहुँचोछे। ५ तुम्हरा दुनियाँर ऐश-मौजोत लागे छिलेन, आर अच्छा से अच्छा खाना खाय मनेर इच्छा पूरा करलेन। मौतेर दिनेर

तने तुम्हरा अपना बदनडाक मोटो करलेन। ६ तुम्हरा निर्दोष लोकोक दोषी ठहराय मारे फिकाहेन, जबकि वरा तुमसार खिलाफ काम नी करे। ७ मोर भा-बहिनला, प्रभु यीशुर घुरे ओसवार समय तक सबुर करो। गृहस्थ लोकलार बारे सोचो। वरा कीमती फलेर उम्मेद राखछे, आर पहिला आर आखरी बर्षा हवार समय तक सबुर बान्हे रोहचे। ८ तुम्हरा सबुर करो, आर हिम्मत ना हारेन, क्याँकि प्रभु यीशु जल्दी दोबारा ओसनेवाला छे। ९ हे भा-बहिनला एक-दोसराझनार खिलाफ मत बोलो, नीते तुमसाक दोषी ठहराल जाबे। देखो, इन्साफ करनेवाला हाकिम तुमसार दरवाजार लिकिन थाड़ो हंय छे। १० हे भा-बहिनला, तुम्हरा नबी लोकलार जीवनलाक देखे चलो। वरा प्रभुर बारे बोलिहील आर दुःख उठवार समय वरा सबुर बान्हे छिले। ११ जैला लोक धीरज धरे दुख सहय लिछे, वरा खुशहाल लोक छे। तुम्हरा त अय्यूब नामेर लोकेर बारे सुनिहेन, वहाँय कतेक बेसी धीरज धरे दुख सहय लिहिले। प्रभु वहाक जैडा आशीवाद दिहिले, उडार बारे तुम्हरा जानेन। प्रभु लोकेर पर बहुत दया करछे, आर लोकेर पर तरस खाचे। १२ मोर भा-बहिनला, सबसे बोड़ो बात इडा छे कि तुम्हरा ना स्वर्गेर कसम खायन, ना इडा दुनियाँर, ना कोय चीजेर कसम खायन, मगर तुमसार बात हाँ त हाँ या ना त ना हवा लागे। नी त तुम्हरा दोषी बनभेन। १३ तुमसार बीचोत अगर कोय दुःखोत छे, त वहाँय प्रार्थना करोक। अगर खुश छे, वहाँय गीत

गाय परमेश्वरेर बड़ाई करोक। १४ अगर तुमसार बीचोत कोय बीमार छे, त मंडलीर अगुवालाक खबर दोक। आर अगुवाला ओसे प्रभुर नामे वहार पर तेल लगाय। १५ आर विश्वासेर साथे प्रार्थना करले, रोगीर बेमारी ठीक हंय जाबे, आर प्रभु वहाक उठाय थाड़ो करे दिबे। आर अगर वहाँय कोय पाप करिहे, त वहार पाप माफ हंय जाबे। १६ वहीलाते तुम्हरा अपना बीचोत एक-दोसराझनार आगुत अपना-अपना पाप माने लव, आर एक-दोसराझनार तने प्रार्थना करो, जसे कि तुम्हरा अच्छा हंय जायेन। धर्मी लोकेर प्रार्थनात बहुत शक्ति छे, आर इडा से बहुत चमत्कारेर काम हवा पारे। १७ एलियाह नामेर एकझन परमेश्वरेर नबीक याद करो। वहाँय त हमसारे मान्दी दुःख-तकलीफ सहनेवाला मानुष छिले, मगर वहाँय जैखुना परमेश्वरेर लिकिन जोर से प्रार्थना करिल कि पानी नी बरसे, त साढ़े तीन साल तक धरतीर पर वर्षा नी होल। १८ फेर जैखुना एलियाह प्रार्थना करिल कि आसमान से पानी बरसे जाक, त आसमान से पानी बरसील, आर खेतोत फसल पैदा हवा लागिल। १९ हे मोर भा-बहिनला, अगर कोय लोक प्रभुर सच्चाई से दूर चले जाछे, आर कोय तुम्हरा वहाक प्रभुर लिकिन घुराय ले ओसछेन, २० त वहाँय एकटा भटकाल पापीक वापस ले ओसछे, आर वहाँय उडा लोकोक मौत से बचाबे, आर लोकटार बहुतला पाप क्षमा होबे।

पतरसेर पहिला चिट्ठी

पतरसेर नमस्कार

१ प्रिय परमेश्वरेर चुनाल लोकला, तुम्हरा पुन्तुस, गलतिया, कप्पदुकिया, आसिया आर बितुनियाँ इलाकात परदेशी हंय छितराल छेन। मुई पतरस, यीशु मसीहार दूत छी। मुई तुमसाक इखान चिट्ठी लिखछी। २ पिता परमेश्वर अपना मकसद मुताबिक तुमसाक चुने लिहे, आर पवित्र आत्मार जरियाय तुमसाक पवित्र लोक बनाहे, क्योंकि तुम्हरा यीशु मसीहार कहना माने लिहेन, आर वहार खून से तुमसाक पापेर माफी मिलिहे। परमेश्वर तुमसार पर बहुत बेसी दया करोक आर शान्ति दोक।

हमेशार जिन्दगीर उम्मेद

३ हमसार प्रभु यीशु मसीहार पिता आर परमेश्वरेर बड़ाई होक। परमेश्वर प्रभु यीशुक मौत से जिन्दा करिहे आर अपना दया से हमसाक नया जीवन दिहे, आर जिन्दा उम्मेद दिहे कि ४ हमरा स्वर्गोत इकिसम सम्पति पामु, जैडा सम्पति कोयखुना खतम नी होबे, ना बर्बाद होबे

आर ना पुरना होबे। ५ परमेश्वर अपना शक्ति से हमसार विश्वासेर कारण हमसाक आखरी समय तक बचाय राखबे जसे कि दुनियाँर सब लोक परमेश्वरेर इखान काम देखे। ६ अला अगर तुम्हरा कुछ दिन तक बहुत किसमेर दुःखोत पोड़छेन, त तुमसाक आनेवाला खुशी देखे तुमसाक खुश हवा लागे। ७ अला इला दुःख-तकलीफ तुमसार जीवनोत ओसछे जसे कि साबित हंय जाय कि तुमसार विश्वास सच्चा छे। सोना त नाशवान चीज छे, मगर आगिनोत तपाय जँचाल जाछे। मगर तुमसार विश्वास त सोना से बेसी कीमती छे। जैखुना यीशु मसीहा ओसबे, तुमसार असली विश्वासेर कारण तुम्हरा शाबसी आर बड़ाई आर इज्जत पाभेन। ८ तुम्हरा यीशु मसीहाक नी देखेन, आर बिना देखे वहाक प्रेम करछेन, आर अला तुम्हरा वहाक बिना देखे विश्वास करछेन, आर इकिसम खुश होचेन, जैडार बारे बताना मुश्किल छे। ९ आर तुमसार विश्वासेर फल इडा छे कि परमेश्वर तुमसार आत्माका बचाबे। १० परमेश्वर अपना दया से विश्वासी लोकला कुन किसम करे बचाबे, इडार बारे परमेश्वरेर नबीला बोलिहिले आर जाँच-पड़ताल करिहिले। ११ उला नबीर दिलोत मसीहार आत्मा छिले आर वरा बताहिले कि मसीहाक दुःख उठवा होबे, आर पीछूत वहार बड़ाई होबे। नबीला इडा बातेर खोज करिल कि मसीहार आत्मा कुन समय आर कुन हालतेर बारे बताछे। १२ नबी लोकोक बताल गहिले कि इडा खुश-खबरी

उसार तने नी, मगर अला तुमसार तने छे। आर इडा खुश-खबरी तुमसाक अला मिलिहे। जैला लोक इडा खुश-खबरी तुमसाक दिहिले, वरा पवित्र आत्मार शक्ति से तुमसाक इला बातोक सुनाहिले, जे पवित्र आत्माक परमेश्वर स्वर्ग से पठाहिले। इला बातोक स्वर्गेर फरीस्तालाको ध्यान दे देखवार मन करछे।

साफ जीवन बितवार तने बुलाहट

१३ वहीलाते तुम्हरा बुद्धिमान बने तैयार रहेन। अपना-आपोक काबूत राखेन। तुम्हरा यीशु मसीहार दया पावार पूरा उम्मेद राखेन कि जैखुना वहाँय दोबारा ओसबे, तुम्हरा वहार लिकिन से दया पाभेन। १४ परमेश्वरेर हुकूम माननेवाला छुवालार मान्दी चाल चलो। तुम्हरा पहिलकार मान्दी अपना जीवनडा ना बिताव। पहिले तुम्हरा सच्चाईक नी जानछिलेन आर अपना इच्छा पूरा करवार तने जीवन बिताछिलेन। १५ मगर जैकिसम तुमसार बुलानेवाला पवित्र छे, वही किसम तुम्हराव पवित्र बनो। १६ परमेश्वर अपना शास्त्रोत बोलछे, “पवित्र बनो क्योंकि मुई पवित्र छी।” १७ तुम्हरा परमेश्वरोक पिता कहय वहार लिकिन प्रार्थना करछेन। वहाँय बिना मुख देखे हर एकइन मानुषेर इन्साफ उसार काम मुताबिक करछे। जब तुम्हरा इडा दुनियाँत परदेशी हंय छेन, त तुम्हरा परमेश्वरेर पूरा आदर करो आर अपना जीवन बिताव। १८ तुम्हरा जानेन कि तुमसार निकम्मा चाल-चलन, जैला तुमसार बाप-

दादोलार लिकिन से सीखिहेन, उला से तुमसार छुटकारा एकटा दाम दे कराल गहे। इडा दाम सोना-रूपा नाशमान चीज नी छे, ^{१९} बल्के मसीहार कीमती खून छे। मसीहा परमेश्वरेर बेकसूर आर बेदाग भेड़ार बच्चा छे। ^{२०} तुमसाक छुटकारा दुवार तने परमेश्वर दुनियाँडा बनवार पहिले से मसीहाक चुने लिहिले, मगर आखरी दिनोत परमेश्वर तुमसार तने मसीहाक हाजिर करिहे। ^{२१} मसीहार जरियाय तुम्हरा परमेश्वरेर पर विश्वास करिहेन। परमेश्वर मसीहाक मुर्दा से जिन्दा करिहिले आर वहाक महिमा दिहिले, जसे कि तुमसार विश्वास आर भरोसा परमेश्वरेर पर होय। ^{२२} तुम्हरा सच्चाईक माने लिहेन, आर तुमसार आत्मा पवित्र हंय गहे। वहीलाते तुम्हरा एक-दोसराझनाक भाई-बहन समझे सच्चा मन आर पूरा दिल से प्रेम करो। ^{२३} क्योंकि तुम्हरा नया जीवन पाहेन, आर इडा जीवन खतम नी होबे। तुमसार नया जीवन हमेशार तने बनाल रोहबे क्योंकि इडा जीवन परमेश्वरेर जिन्दा आर हमेशा रहनेवाला वचन से मिलिहे, ^{२४} परमेश्वरेर शास्त्रोत लिखाल छे, “सबला लोक घासेर मान्दी छे, आर उसार सुन्दर रूप घासेर फूलेर मान्दी छे। घास सुखाय जाछे, आर फूल झड़े जाछे। ^{२५} मगर प्रभुर वचन हमेशा कायम रोहचे। आर यहीडा वचन खुश-खबरी छे, जैडा तुमसाक सुनाल गहिले।”

२ वहीलाते सब किसमेर बुराई, छल-कपट आर हिंसा से दूर रहो।
पाखण्डी मत बनो आर दोसरा लोकेर खिलाफ खराब बात ना बोलो।
२ आर जैकिसम नया जन्माल छुवाला दूधेर इच्छा करछे, वही मान्दी
तुम्हरा खाँटी आत्मिक दूधेर इच्छा करो, जसे कि तुम्हरा मजबूत होते
जायेन। ३ तुम्हरा प्रभुर दयार मजा पाय गहेन।

मसीहा परमेश्वरेर घरेर सबसे कीमती पत्थल

४ तुम्हरा मसीहार लिकिन ओसो, जहाँय घरेर गराट दुवार तने सबसे
खास पत्थल छे। वहाक लोकला बेकम्मा समझे इन्कार करे दिहिले,
मगर परमेश्वर वहाक चुने लिले, आर परमेश्वरेर नजरोत वहाँय बेसी
कीमती बने गेल। ५ तुम्हराव जिन्दा पत्थललार मान्दी छेन आर परमेश्वर
तुमसासे एकखान आत्मिक घर बनाते जाछे। वहीलाते पूजारी हवार तने
परमेश्वर तुमसाक चुने लिहे, जसे कि तुम्हरा यीशु मसीहार जरियाय
परमेश्वरेर तने आत्मिक बलिदान चढ़ायेन। ६ परमेश्वरेर शास्त्रोत
लिखाल छे, “मुई एकखान खूब दामी पत्थलोक बिछे लिही, आर उखान
पत्थल यरूशलेम शहरेर कोनार पत्थल बने गहे, वहार पर जहाँय
विश्वास करछे, वहाँय कोय हालतोत उदास नी होबे।” ७ वहीलाते
तुम्हरा जहाँय विश्वास करछेन, तुमसार तने वहाँय बेसी कीमती छे,
मगर जैला लोक विश्वास नी करछे, उसार तने शास्त्रोत लिखाल छे,

“जैखान पत्थलोक राजमिस्त्रीला बेकम्मा ठहराय दिहिले, वहीखान पत्थल सबसे बेसी जरूरी पत्थल बने गेल। ८ आर शास्त्रोत यहोडा लिखाल छे, उखान इकिसम पत्थल छे, जैखानोत लोक ठोकर खाबे, क्याँकि वरा परमेश्वरेर वचनोक नी मनवार कारण से ठोकर खाचे, आर यहीखान पत्थल लोकोक गिराबे।” ९ मगर तुम्हरा एकटा चुनाल खानदान आर पूजारीर समाज, पवित्र लोक आर परमेश्वरेर अपना लोक छेन। वहीलाते परमेश्वर तुमसाक अन्हार से निकलाय अपना उजालात ले ओसिहे जसे कि तुम्हरा वहार बोड़ो-बोड़ो कामेर बारे बोलवा पारेन। १० “तुम्हरा त पहिले कुछु नी छिलेन, मगर अला तुम्हरा परमेश्वरेर प्रजा बने गहेन। पहिले तुमसार पर दया कराल नी जाय, मगर अला तुमसार पर दया कराल गहे।”

विश्वासी लोकेर जिम्मेदारी

११ हे मोर प्रिय भा-बहिनला, मुई तुमसार लिकिन बिनती करछी कि तुम्हरा अपना-आपोक परदेशी आर मुसाफिर समझो। आर दुनियाँर गंदा लालच से बचे रहव। इला तुमसार आत्मार साथे लड़ई करछे। १२ अविश्वासी लोकेर बीचोत तुमसार चाल-चलन अच्छा हवा लागे। जैला लोक तुमसाक कुकरम करनेवाला कोहय बदनाम करछिले, वहीला लोक तुमसार अच्छा कामोक देखे बिचारेर दिनोत परमेश्वरेर बड़ाई करे। १३ प्रभुर तने तुम्हरा हर एकटा हाकिमेर अधीनोत रहव।

राजार अधीनोत रहव क्यौँकि वहाँय सभा से बोड़ो छे। १४ राजपालेर अधीनोत रहव क्यौँकि वहाँय कुकरम करनेवालालाक सजई दिछे, आर अच्छा काम करनेवालालार बड़ाई करछे, क्यौँकि उसाक यहीला कामेर तने ठहराल गहे। १५ परमेश्वरेर इच्छा इडा छे कि तुम्हरा अच्छा कामेर जरियाय बेकूफ लोकेर नासमझ बोलीक बन करवा पारेन। १६ अपना-आपोक आजाद समझो आर जीवन बिताव। मगर इडा आजादीक बुरा काम करवार तने इस्तेमाल ना करो। मगर अपना-आपोक परमेश्वरेर सेवक समझो जीवन बिताव। १७ सभारो इज्जत करो। सब विश्वासी लोकोक प्रेम करो। अपना दिलोत परमेश्वरेर डोर राखो। आर राजालार इज्जत करो।

मसीहार मुताबिक जीवन

१८ तुम्हरा जहाँय मालिकेर गोलाम छेन, तुम्हरा अपना मालिकेर इज्जत करो आर वहार अधीनोत रहव। सिरिफ उसार नी जहाँय अच्छा आर नरम छे, मगर उसारो इज्जत करो जहाँय बहुत कठोर छे। १९ अगर कोय अपना मनोत ठाने लिछे कि हमसाक परमेश्वरेर इच्छा मुताबिक जीवन बितवा होबे, आर बिना कसुरेर दुःख उठाय, त वहाँय परमेश्वरेर लिकिन से इज्जत पाबे। २० अगर तुम्हरा कोय कसूर करे मारे खाचेन आर धीरज धरे बर्दास्त करे लिछेन, त यहात बड़ाई करवार कोय बात नी छे। मगर अच्छा काम करछेन आर धीरज धरे दुःख उठाछेन, त इडा से

परमेश्वर खोश होचे। २१ क्यौँकि तुमसाक यहीडार तने बुलाल गहे। यीशु मसीहाव तुमसार तने दुःख उठाल आर तुमसार तने एकटा नमूना दे गहे, जसे कि तुम्हराव वहार मान्दी चलवा पारेन। २२ वहाँय ना त कोय पाप करिहिले, आर ना वहार मुख से छल-कपटेर कोय बात निकलिहिले। २३ लोकला जैखुना वहार अपमान करछिले, वहाँय घुरे कहारो अपमान नी करछिले। आर जैखुना वहाक लोक सताछिले, वहाँय कहाको धमकी नी दिछिले। वहाँय अपना-आपोक परमेश्वरेर हाथोत सोंपे दिहिले, परमेश्वर जहाँय उचित इन्साफ करछे। २४ वहाँय खुद हमसार पापलाक अपना बदनेर पर ले क्रुसेर पर चढ़े गेल, जसे कि हमरा पापेर तने मोरे जई, आर धर्मी जीवन बितवा पारी। वहार मार खवार कारण से तुम्हरा बेमारी से अच्छा हंय गहेन। २५ तुम्हरा पहिले भटकाल भेड़ार मान्दी छिलेन, मगर अला तुम्हरा तुमसार देखभाल करनेवाला रखवालेर लिकिन घुरे ओसिहेन।

पति आर पत्नीर तने शिक्षा

१-२ हे पत्नीला, तुम्हरा अपना-अपना पतिर बशोत रहव। तुमसार बीचोत अगर कहारो पति परमेश्वरेर वचनेर माननेवाला नी छे, जैखुना वहाँय अपना पत्नीर पवित्र जीवन देखबे आर पतिर तने पत्नीर इज्जत देखबे, उखुना वहार दिल बदले जवा पारे आर वहाँय प्रभु यीशुर पर विश्वास करवा पारे। कहारो कहवार कारण से वहाँय विश्वास नी करबे, बल्के

अपना पत्नीर अच्छा चाल-चलन देखे प्रभुर पर विश्वास करबे।
३ तुमसार सजावट चुलेर चुत्थी गुथे, सोनार गहना आर बढिया-बढिया
कपड़ा पिन्हें नी हवा लागे, ४ बल्के तुमसार सजावट तुमसार दिलोत
छुपाल नरम आर शांत स्वभाव दे हवा लागे। इकिसम सजावट हरखुना
कायम रोहचे आर परमेश्वरेर नजरोत बेसी दामी चीज छे। ५ पुराना
जमानात पवित्र पत्नीला जैला परमेश्वरेर पर भरोसा राखछिले, यही
मान्दी करे अपना-आपोक सजाछिले, आर अपना-अपना पतिर बशोत
रोहछिले। ६ सारा नामेर एकइन स्त्री छिले, जहाँय इब्राहिमेर पत्नी
छिले। वहाँय अपना पति इब्राहिमेर हुकूम मानछिले, आर वहाक प्रभु
कोहचिले। ठीक यही मान्दी तुम्हरा अगर भलाई करेन, आर कोय चीजेर
डर नी राखेन, त तुम्हराव सारार बेटी ठहरिभेन। ७ यही मान्दी हे
पतिला, तुम्हराव अपना पत्नीलार साथे समझदारी से जीवन बिताव,
आर पत्नीलाक कमजोर समझे उसार इज्जत करो। इडा जाने कि पति-
पत्नी दोनोंइनाक परमेश्वर हमेशार जीवनेर हकदार बनाहे, जैडा जीवन
परमेश्वर अपना दया से दिछे। अगर तुम्हरा एक साथे मिले नी रोहभेन,
त तुम्हरा अच्छा से प्रार्थना करवा नी पारभेन।

बुराईर बदले भलाई

८ वहीलाते सबकोय एक मन हंय रहव। आर दयावान बनो, आर आपसोत भाई-चारार प्रेम राखो। एक-दोसराझनार भलाई करनेवाला आर नरम स्वभाव वाला लोक बनो। ९ बुराईर बदले बुराई ना करेन। आर गालीर बदले गाली ना देन, बल्के यहार बदले कोय गाली दे वहाक आशीर्वाद देन, क्योंकि तुम्हरा आशीर्वाद पावार तने बोलाल गहेन। १० जैकिसम परमेश्वरेर वचनोत लिखाल छे, तुम्हरा जहाँय जीवन पावार इच्छा करछेन, आर अच्छा दिन देखवा चाहचेन, वहाँय अपना जीवनडाक बुराई से आर अपना होठलाक छल-कपट से अलग राखेन। ११ वहाँय बुराई से दूर रहव, आर भलाई करते रहव, मिले-जुले रहव, आर यही किसम करते रहव। १२ क्योंकि प्रभुर धर्मी लोकेर देखभाल करछे, आर वहार कानला उसार प्रार्थनार भीति लगाल रोहचे। मगर प्रभु बुराई करनेवालार खिलाफ छे। १३ अगर तुम्हरा अच्छा काम करवा चाहचेन, त कोय तुमसार नोकसान नी पहुँचाबे। १४ मगर तुम्हरा अच्छा काम करछेन आर दुःख उठाछेन, त परमेश्वर तुमसाक इनाम दिबे। तुमसाक कोय डोर देखाय, त तुम्हरा ना डोरायन, आर ना घबरायेन। १५ मगर मसीहाक प्रभु माने अपना-अपना दिलोत जगह देन। तुमसार लिकिन जैडा उम्मेद छे, उडार बारे तुमसाक कोय सवाल करे, त उसाक जवाब दुवार तने सबखुना तैयार रहेन, मगर नरम हंय इज्जतेर साथे

જવાબ દેન। ૧૬ તુમ્હરા અપના દિલ આર મનોક સાફ રાખેન, જસે કિ તુમ્હરા ઉલા લોકોક શરમિન્દા કરવાર પારેન, જૈલા લોક તુમસાર બદનામી કરછે ક્યાંકિ મસીહાર પર વિશ્વાસ કરવાર કારણ તુમ્હરા અચ્છા કામ કરછેન। ૧૭ અગર પરમેશ્વરેર ઇચ્છા છે કિ તુમસાક દુઃખ ઉઠવા હોય, ત ઇડા બેહતર છે કિ તુમ્હરા અચ્છા કામેર તને દુઃખ ઉઠાવ, खराब કામ કરવાર કારણ દુઃખ ના ઉઠાવ। ૧૮ યહી તને મસીહા લોકેર પાપેર તને હમેશાર તને એક બાર બલિદાન હંય ગેલ। એકઝન ધર્મી લોક અધર્મી લોકેર તને અપના જાન દિલે જસે કિ વહાંય હમસાક પરમેશ્વરેર લિકિન પહુંચાય દે। વહાંય શરીર હિસાબે મારા ગેલ, મગર પવિત્ર આત્માર શક્તિ સે વહાક જિન્દા કરાલ ગેલ। ૧૯ આર પવિત્ર આત્મા શક્તિર સે વહાંય खराब આત્માલાર લિકિન પ્રચાર કરિલ, જૈલાક પરમેશ્વર બન્ધક બનાય રાખિહે। ૨૦ ઇલા ઉલા લોકેર આત્મા છિલે, જૈલા નૂહેર સમય પરમેશ્વર હુકૂમ ની માનિલ, જૈખુના નૂહ જહાજખાન બનાછિલે, મગર પરમેશ્વર સબુર બાન્હેં છિલે। આઠઝન લોક ઉખાન જહાજોત ઘુસે બાનેર પાની સે બચે ગેલ। ૨૧ ઉખાન બાનેર પાની અલકાર બપતિસ્માક દેખાછે। જે બપતિસ્મા તુમસાક યીશુ મસીહાર જિન્દા હંય ઉઠવાર શક્તિર જરિયાય બચાછે। બપતિસ્મા સે શરીરેર ગંદા ધુવાર માને ની છે, બલ્કે મગર શુદ્ધ દિલ સે પરમેશ્વરેર બશોત હંય જવાર મતલબ છે। ૨૨ મસીહા સ્વર્ગોત જાય પરમેશ્વરેર દહિના બગલ બોઠે ગેલ, આર સ્વર્ગેર ફરીસ્તાલાક, સબ

किसमेर हाकिमोक आर सब किसमेर शक्तिक वहार बशोत करे देयाल गेल।

परमेश्वरेर तने विश्वासीलार जीवन

४ वहीलाते जैकिसम मसीहा अपना बदनोत दुःख उठाले, तुम्हराव वहारे मान्दी दुःख उठवार तने तैयार रहव। जहाँय अपना बदनडार पर दुःख उठाछे, वहाँय पहिलकार मान्दी पाप करते नी रोहबे, २ आर वहाँय आगु चले अपना बाकीडा जीवनोत पापी मानुषेर मान्दी काम नी करबे। आर इकिसम करे वहाँय परमेश्वरेर इच्छा मुताबिक अपना जीवन बिताबे। ३ पहिले तुम्हरा दोसराला लोकेर मान्दी बहुत खराब जीवन बिताछिलेन। तुम्हरा उसारे मान्दी लुच्चा छिलेन। तुम्हरा बुरा इच्छा राखछिलेन। तुम्हरा मतवाला बने रोहछिलेन। तुम्हरा मौज-मस्ती करछिलेन। तुम्हरा शराबी बने, आर खान-पान करे जीवन बिताछिलेन। आर तुम्हरा मूर्ति पूजा वाला घिणेर काम करे जीवन बिताहिलेन। ४ मगर अला तुमसार पहिलकार दोस्त बन्धुला ताज्जुब करछे कि तुम्हरा अला उसार गलत रास्तात साथ नी दिछेन, आर वहीलाते वरा तुमसाक गाली दिछे। ५ मगर परमेश्वर उसार लिकिन से हिसाब लिबे क्याँकि परमेश्वर जिन्दा आर मराल लोकेर बिचार करबे। ६ मराल लोकलाको खुश-खबरी

सुनाल गहे, कि दोसरा लोकेर मान्दी उसार बिचार होबे, मगर उसार आत्माला परमेश्वरेर साथे रोहबे।

परमेश्वरेर सच्चा सेवक

७ सबला चीज जल्दी खतम होनेवाला छे। वहीलाते हरखुना तैयार रहव कि तुम्हरा प्रार्थना करवा पारेन। ८ सबसे बोड़ो बात इडा छे कि तुम्हरा एक-दोसराझनार साथे बेसी करे प्रेम करो, क्योंकि प्रेम बहुतला गलतीक माफ करे दिछे। ९ खुशी दिल से अपना-अपना घरोत एक-दोसराझनार खातिरदारी करो। १० परमेश्वर हर एकझन विश्वासीक अलग-अलग किसमेर दान दिछे। सबकोय इला दानेर इस्तेमाल एक-दोसराझनार सेवा करवार तने करो। ११ अगर कहारो लिकिन बोलवार दान छे, त वहाँय इकिसम बोलोक, मानो कि वहाँय परमेश्वरेर वचन बोलछे। अगर कहारो लिकिन सेवा करवार दान छे, त वहाँय इकिसम सेवा करोक, मानो कि वहाँय परमेश्वरेर देयाल शक्ति से सेवा करछे। इकिसम करे यीशु मसीहार जरियाय सब बातोत परमेश्वरेर बड़ाई होक। वहार महिमा आर शक्ति युगानुयुग तक बनाल रोहोक! आमीन।

विश्वासी लोक मसीहार साथे दुःख उठाछे

१२ हे प्रिय भा-बहिनला, तुमसाक ताज्जुब करवा नी लागे कि तुमसार अला परीक्षा होचे। माने लव कि इडा परीक्षा आगिनेर उपर से पार हवार

मान्दी छे। ताज्जूब ना करेन कि तुमसार पर कोय अजीब किसमेर घटना घटेछे। १३ मगर अला तुम्हरा यीशु मसीहार दुःखोत भागीदार होचेन जसे कि जैखुना मसीहा अपना महिमात ओसबे, उखुना तुम्हरा बेसी से बेसी खुशी हवा पारेन। १४ आर अगर यीशु मसीहार नामेर तने तुमसार बदनामी उठवा होचे, त तुम्हरा खुशहाल छेन, क्योंकि शक्तिशाली परमेश्वरेर आत्मा तुमसार साथे रोहचे। १५ अगर कोय दुःख उठाछे त खूनी या चोर, या कुकरमी बने आर दोसराझनार कामोत बाधा देनेवाला बने दुःख ना उठायेन। १६ मगर मसीहार विश्वासी हवार कारण से कोय दुःख पाछेन त शरमिन्दा ना होयेन, बल्के मसीहार विश्वासी हवार कारण परमेश्वरेर बड़ाई करो। १७ समय ओसे गहे कि परमेश्वर पहिले अपना लोकेर बिचार करबे। जब परमेश्वर अपना लोकलार बिचार करबे, त उसार की हाल होबे, जहाँय परमेश्वरेर खुश-खबरीक नी मानछे। १८ परमेश्वरेर पवित्र शास्त्र लिखाल छे, “अगर धर्मी लोकलाय मुश्किल से बचबे, परमेश्वरेर भक्ति नी करनेवालाला आर पापी लोकलार की हाल होबे?” १९ वहीलाते तुम्हरा जहाँय परमेश्वरेर इच्छा मुताबिक दुःख उठाछेन, तुम्हरा ठीक काम करो आर अपना-आपोक अपना परमेश्वरेर हाथोत सोंपे दव, जहाँय तुमसाक बनाहे आर अपना वादा पूरा करछे। आमीन!

मंडलीर नेता आर जवान लोकोक उपदेश

५ मंडलीर नेताला, मुई तुमसार हौशला बढवार तने लिखछी। मोहो तुमसार मान्दी एकटा मंडलीर नेता छी, आर मुई मसीहार दुःखेर बारे लोकोक बताछी। जैखुना मसीहा अपना महिमार साथे ओसबे, मुई वहार महिमार भागीदार होमु। २ परमेश्वरेर जैडा मंडली तुमसार बीचोत छे, तुम्हरा उडा मंडलीर देखभाल करो। इडा देखभालेर काम जबरदस्ती से नी, मगर खुशी से करो। लाभ कमवार तने देखभाल ना करो, मगर सेवा करवार इच्छा राखे देखभाल करो। ३ जैला लोकोक तुमसार हाथोत सोंपे देयाल गहे, उसार पर अधिकार ना चलाव, बल्के उसार तने नमूना बनो। ४ जैखुना सबसे बोड़ो रखवाल ओसबे, उखुना तुमसाक एकटा मुकुट मिलबे, जैडार चमक कभी खतम नी होबे। ५ यही मान्दी जवान लोकला कोहची, तुम्हराव मंडलीर नेतालार बशोत रहव। तुम्हरा सबकोय नरम बने एक-दोसराझनार सेवा करो, क्योंकि “परमेश्वर घमंडी लोकेर बिरोध करछे, मगर नरम लोकेर पर दया करछे।” ६ यहीलाते परमेश्वरेर शक्तिशाली हाथोत नरम बने रहव, जसे कि वहाँय तुमसाक ठीक समय बोड़ो करे। ७ अपना सबला फिकिर व्हारे पर लादे दव, क्योंकि वहाँय तुमसार चिन्ता करछे। ८ हुँसियार हंय जाव आर तैयार रहव, क्योंकि शैतान जहाँय तुमसार दुश्मन छे, वहाँय गरजनेवाला बाघेर मान्दी छाभछे कि वहाँय तुमसाक नाश करे दे।

९ विश्वासोत मजबूत हंय शैतानेर मुकाबला करो आर याद राखो कि तुमसार भा-बहिनला जैला दुनियाँत छे, यही मान्दी दुःख उठाछे। १० परमेश्वर सभारो पर पूरापूरी दया करछे। वहीलाते वहाँय तुमसाक यीशु मसीहार महिमात सहभागी हवार तने बुलाहे। अला थोड़ेक समयेर तने तुम्हरा दुःख उठाछेन। वहार बाद परमेश्वर तुमसाक खाँटी बनाबे। तुमसाक टिकाय राखबे आर शक्तिशाली बनाबे। ११ वहार राज हमेशा-हमेशा तने रहोक। आमीन!

आखरी नमस्कार

१२ सिलवानुसेर मदद से मुई तुमसार तने इखान छोटो चिट्ठी लिखिही। सिलवानुस हमसार एकझन सच्चा विश्वासी भई छे। मुई तुमसार हौशला बढ़ाछी आर बताछी कि परमेश्वरेर सच्चा दया यहीडा छे, आर तुम्हरा यहाते बनाल रहेन। १३ बाबूल मंडलीर विश्वासीला, जैलाको परमेश्वर चुने लिहे, वरा आर मोर बेटा मरकुस तुमसाक नमस्कार कोहचे। १४ पूरा दिल से आर प्रेम से एक-दोसराझनाक नमस्कार कर। आखरीत मुई प्रार्थना करछी कि परमेश्वर सबला विश्वासी भाई-बहनोक शांति दोक।

पतरसेर दोसरा चिट्ठी

१ प्रिय भा-बहिनला, मुई शिमोन पतरस छी। मुई यीशु मसीहार सेवक आर दूत छी। मुई इखान चिट्ठी तुमसार तने लिखछी क्यौंकि मसीहार पर हमसार जैकिसम कीमती विश्वासी छे, वही किसम कीमती विश्वास तुमसारो मसीहार पर छे। इडा कीमती विश्वास तुमसाक देयाल गहे क्यौंकि यीशु मसीहा हमसार परमेश्वर आर मुक्तिदाता छे, जहाँय सब कुछ अच्छा करछे। २ परमेश्वरोक आर हमसार प्रभु यीशुक जाने जवार कारण तुमसार पर परमेश्वरेर दया आर शान्ति मिलते रोहोक।

सच्चा विश्वासीर गुण

३ परमेश्वर अपना महिमार भागीदार हवार तने हमसाक बुलाहे। वहाँय अपना शक्ति से हमसाक उला सबला चीज दिहे, जैला हमसार जीवनेर तने आर परमेश्वरेर भक्ति करवार तने जरूरी छे। वहाँय इला सबला चीज दिहे क्यौंकि हमरा वहाक जानी। ४ वहाँय अपना महिमार जरियाय हमसाक बेसी कीमती आर बहुत बोड़ो वादा दिहे जसे कि हमसार

भीतरोत परमेश्वरेर गुण चले ओसे, आर हमरा बुरा इच्छा आर दुनियाँर गंदगी से बचे जई। ५ वहीलाते तुम्हरा पूरा कोशिश करो आर अपना विश्वासोत अच्छा चाल-चलन देखाव आर अच्छा चाल-चलनेर साथे समझदारी राखो। ६ आर समझदारीर साथे अपना-आपेर पर काबू राखो, आर काबूर साथे धीरज धरो आर धीरजेर साथे भक्ति करो, ७ आर भक्तिर साथे भैयारी-प्रेम राखो, आर भैयारी प्रेमेर साथे प्रेमोत बढ़ते जाव। ८ अगर इला सबला चीज तुमसार जीवनोत रहय, त तुम्हरा आगु बढ़ते जाभेन, आर तुमसार जीवडात कोय चीजेर कमी नी होबे। इकिसम करे तुम्हरा यीशु मसीहार ज्ञानोत बेसी से बेसी कामयाब होभेन। ९ जहार भीतरोत इला बात नी छे, वहाँय काना छे आर साफ से देखवा नी पारछे, आर वहाँय भूले गहे कि वहाँय पीछूकार पाप से साफ आर शुद्ध गहे। १० यही तने हे भा-बहिनला, तुम्हरा कठिन मेहनत करो आर साबित करो कि परमेश्वर तुमसाक बुलाहे आर चुने लिहे। अगर तुम्हरा इकिसम करभेन, त कोयखुना ठोकर नी खाभेन। ११ इकिसम करले तुम्हरा हमसार प्रभु आर मुक्तिदाता यीशु मसीहार राजोत बहुत इज्जतेर साथे ढुकवा पारभेन, जैडा राज हमेशार तने रोहबे।

पतरसेर आखरी समय

१२ मुई तुमसाक इला बातेर बारे सबखुना ख्याल कराते रोहमु। तुम्हरा इला बातोक पहिले से जानेन आर जैडा सच्चाईर शिक्षा तुमसाक देयाल गहे, उडात तुम्हरा मजबूती से बनाल छेन। १३ मुई इडा ठीक समझेछी कि जब तक मुई जिन्दा छी, तबतक तुमसाक ख्याल कराते रोही १४ क्योंकि प्रभु यीशु मसीहा मोक बताहे कि मोक इडा बदन जल्दी छोड़े चले जवा होबे। १५ वहीलाते मुई खोब कोशिश करछी जसे कि जैखुना मुई दुनियाँ से चले जाम, तुम्हरा इला सबला बातोक हमेशा ख्याल करवा पारेन।

यीशु मसीहार बड़ाई

१६ जैखुना हमरा तुमसाक खबर दिहिनु कि प्रभु यीशु मसीहा शक्तिर साथे घुरे ओसबे, त इडा कोय बनाल किस्सार मान्दी नी छिले, बल्के हमरा खुद वहार महान शक्तिर गवाह छिनु। १७ जैखुना यीशु मसीहा पिता परमेश्वरेर लिकिन से इज्जत आर बड़ाई पाले, उखुना सर्वशक्तिमान परमेश्वर आवाज दे बोलिल, “यहाँय मोर प्यारा बेटा छे, यहा से मुई बहुत खोश छी।” १८ हमरा जैखुना वहार साथे पवित्र पहाड़ेर पर छिनु, वहीखुना स्वर्ग से यहीडा आवाज ओसते सुनिहिनु। १९ नबी लोकला जैला बात हमसाक बोलिहे, उला घटना से साबित होचे कि उसार बातला सच छे। तुम्हरा नबीलार बातलार पर ध्यान दे अच्छा

करछेन क्याँकि उसार बातला एकटा चराकेर मान्दी छे। इडा अन्हार जगहोत बेहान तक रोशनी दिते रोहचे, आर भोरवा तारार रोशनी तुमसार दिलोत चमकेछे। २० मगर सबसे कीमती बात इडा छे कि पवित्र शास्त्रोत नबी लोक परमेश्वरेर बात अपना बिचार मुताबिक कभी नी बोले। २१ क्याँकि नबी लोक परमेश्वरेर बात कोय मानुषेर इच्छा से कभी नी बोलछिले, मगर नबीला परमेश्वरेर बात उखुना बोलछिले, जैखुना वरा पवित्र आत्मार वशोत छिले।

झूठा शिक्षक

२ बहुत पहिले जैकिसम परमेश्वरेर लोकेर बीचोत झूठा नबीला देखाल जाछिले, ठीक वही मान्दी तुमसारो बीचोत झूठा नबी देखाल जाबे। वरा लोकलार बीचोत चुपचाप करे गलत शिक्षा शुरू करबे, आर हमसार मालिकोक इन्कार करबे, जहाँय उसाक आजाद करिहे। इकिसम करे वरा जल्दी बर्बाद हंय जाबे। ३ बहुतइन उला झूठा शिक्षकेर कुकरमेर काम करबे, उसार चलते सच्चा रास्तार बदनामी होबे। ४ वरा लोभी लोक छे आर अपना बनावटी बातला से तुमसार लिकिन से धन जोड़ो करबे। उसार सजई परमेश्वर बहुत पहिले से तय करे राखिहे। वरा बर्बाद हंय जाबे आर उसार बर्बाद हवार समय बगलोत चले ओसिहे। ५ परमेश्वर पाप करनेवाला फरीस्तालाको नी छोड़े, आर उसाक नरकोत

फिकाय दिले कि बिचारेर दिन तक वरा अन्हारोत पोड़े रहय।
५ परमेश्वर नूहेर समयेर दुनियाँर लोकलाको नी छोड़िल आर परमेश्वर
बोड़ो बान आनिल आर लोकला डूब मोर गेल, मगर परमेश्वर नूह आर
सातझन लोकोक बचाय लिले। नूह सच्चाईर बारे प्रचार करछिले।
६ परमेश्वर सदोम आर अमोरा नगरलाक सजा दिले। आर इकिसम
सजा दिले कि उला नगरोक जलाय मुस करे दिले। इकिसम करे
परमेश्वर उला लोकेर तने चेतावनी दिले जैला लोक पापोत जीवन
बिताछे। ७ मगर उठिन परमेश्वर लूतोक बचाय लिले, जहाँय धर्मी छिले।
वहाँय सदोम लोकेर बुरा चाल-चलन से दुःखी रोहछिले। ८ लूत धर्मी
लोक छिले। वहाँय उसार बीचोत रोहछिले आर हर दिन वहाँय जैला
देखछिले आर सुनछिले, सदोम आर अमोरा लोकेर बुरा कामेर कारण
से वहार शुद्ध आत्माडा छटपटाते रोहछिले। ९ वहीलाते प्रभु जाने कि
वहार सेवा करनेवाला लोकोक वहाँय बिचारेर दिन तक कुन किसम करे
बचाय राखछे, आर दुष्ट लोकोक सजई दुवार तने कुन किसम करे
राखछे। १० खास करे उला लोकोक सजा दिबे, जैला लोक अपना गंदा
इच्छा मुताबिक चलछे, आर प्रभुर अधिकारोक नफरत करछे। इला
लोक अपना बारे घमंड करछे। आर परमेश्वरेर फरीस्तालार बदनामी
करछे ११ स्वर्गेर फरीस्ताला इला लोक से बेसी शक्तिशाली छे, तहारो
पर वरा प्रभुर आगुत इला लोकेर खिलाफ बुरा बात बोले उसाक

बदनाम नी करछे। १२ मगर इला लोक नासमझ आर साधारण बुद्धिवाला जानवर छे, आर इला जानवरोक धरे मारे फिकवार तने बनाल गहे। इला लोक उला बातेर खिलाफ बोलछे, जैलार बारे वरा कुछु नी जानछे। जैकिसम जानवरलाक मारे फिकाल जाछे, वही मान्दी इसाको खतम करे देयाल जाबे। १३ वरा बुरा काम करिहे, वहीलाते उसार हानि होबे। दिनेर उजालात इसाक गंदा काम करे मौत-मस्ती करना अच्छा लागछे। इकिसम करना शर्म आर कलंकेर बात छे। इला लोक जैखुना तुमसार साथे परब मनाछे, त यरा हरखुना स्त्रीलार पीछूत पोड़े रोहचे जसे कि उसार साथे कुकरम करवा पारे। १४ इकिसम करे उसार आँखला कुकरम से भराल रोहचे। इसार आँखला पापेर काम से दूर नी रोहचे। इला लोक विश्वासोत कमजोर लोकोक पाप करवार तने फूसलाय लिछे। इसार मनलात हरखुना लालच रोहचे। इसार पर परमेश्वरेर श्राप छे। १५ यरा सीधा आर सहज रास्ता छोड़े भटके गहे। यरा बओरेर बेटा बिलामेर रास्तात आगु बढ़े गहे, जे बिलाम गलत तरीका से कमाई करना पसंद करछिले। १६ बिलामेर बुरा कामलार खिलाफ वहार गधाडा मानुषेर आवाजोत बोलिल, आर बिलामोक धमकाल, आर उडा नबीक बेकूफेर मान्दी काम करते रोकिल। १७ इला झूठा शिक्षक सुखना कुआँर मान्दी छे, आर बिना पानीवाला बदलीर मान्दी छे, जैखानोक दून उड़ाय ले जाछे। इसार तने सबसे अन्हार जगह रखाल गहे। १८ कारण, इला

लोक घमंडेर बात बोलछे। आर जैला लोक कुकरमेर रास्ता से निकले ओसिहे, इसार भीतरोत इला झूठा शिक्षक दुनियाँर बुरा इच्छालाक जगाय दिछे आर उसाक उला बुरा कामोत फँसाय दिछे। १९ इला झूठा शिक्षक लोकोक आजाद करवार वादा दिछे, जबकि यरा खुद खराब जिन्दगीर गोलाम बनाल छे। क्योंकि जैखान चीज लोकेर पर हावी होचे, लोक उखानेर गोलाम हंय जाछे। २० वहीलाते अगर यरा हमसार प्रभु आर मुक्तिदाता यीशु मसीहाक जाने लुवार बादो आर दुनियाँर बुराई से बचे निकलवार बादो आरमने वहीला बुराईत फँसे गहे, त उसार अलकार दशा पहिलकार दशा से बदतर छे। २१ क्योंकि उसार तने यहीडा अच्छा छिले कि वरा इडा सही रास्ताक नी जानिलतेन आर जैडा पवित्र हुकूम वरा पाहे, बाद करे उडार इन्कार नी करिलतेन। २२ उला झूठा शिक्षकेर पर इडा कहावत सच बोठोछे कि, “कुत्ता अपना उल्टीर लिकिन घुरे जाछे आर चाटे खाचे, आर एकटा सिनान कराल सोर आरमने कादोखानोत जाछे।”

प्रभु यीशुर घुरे ओसवार दिन

३ हे प्यारा भा-बहिनला, मुई तुमसाक पहिले एकखान चिट्ठी लिखिहिनु। अला मुई तुमसार लिकिन इखान दोसरा चिट्ठी लिखछी, आर दोनोंखानोत तुमसाक ख्याल कराछी आर तुमसार दिलोत हौशला

दिछी, ^२ जसे कि तुम्हरा हमसार प्रभु आर मुक्तिदातार हुकूमोक ख्याल करेन। इला हुकूमेर बारे नबीला बोलिहिले। अला उलाक मसीह-दूतला तुमसाक बताछे। ^३ पहिले इडा जाने लव कि आखरी दिनोत इकिसम खराब लोक ओसबे, जैला परमेश्वरेर मजाक उड़ाबे। वरा अपना मनेर इच्छा मुताबिक काम करबे। ^४ आर कोहबे, “तुमसार प्रभु ओसवार वादा करिहिले। उडार कि होल? क्याँकि जब से बाप-दादोला मोरिहे, उखुन से त वही मान्दी छे, जैकिसम कि दुनियाँर शुरू से छिले।” ^५ वरा इला जाने-बुझे कोहबे क्याँकि वरा इन्कार करे कोहबे कि बहुत पहिले परमेश्वर अपना वचनेर जरियाय आसमानडा नी बनाहे, आर परमेश्वर धरतीखानोक पानी से घेरे नी राखिहे आर पानी से अलग नी करिहे। ^६ बाद करे पानी से उडा युगेर धरतीखान पानीत डुबे बर्बाद हंय गहिल। ^७ मगर इडा युगेर आसमान आर धरतीखानो वहीडा परमेश्वरेर वचनेर जरियाय रखाल छे जसे कि उलाक जलाय देयाल जाय, आर जैला लोक परमेश्वरेर भक्ति नी करछे, यही मान्दी उसाक बिचारेर दिन तक बर्बाद हवार तने रखाल गहे। ^८ प्यारा भाई-बहिनला, तुमसासे इला बात छुपाल नी रोहय कि प्रभुर लिकिन एक दिन हजार सालेर बरिबोर आर हजार साल एक दिनेर बरिबोर छे। ^९ प्रभु अपना वादाक पूरा करते देरी नी करछे, जैकिसम कुछुला लोक देरी समझे। पर तुमसार बारे वहाँय सबुर धरे छे, आर नी चाहचे कि कोय लोक बर्बाद हंय जाय। मगर

परमेश्वर इडा चाहचे कि सभाको मन बदली करवार मौका मिले।
१० मगर प्रभुर दिन चोर ओसवार दिनेर मान्दी ओसबे। उडा दिनोत
आसमान बहुत गरजनेर आवाजेर साथे गायब हंय जाबे आर बेलाडा,
चाँनडा आर ताराला बहुत धीपे जाबे आर गले जाबे। दुनियाँ आर
दुनियाँर कामला जले जाबे। ११ जबकि इला सबला चीज खतम
होनेवाला छे, त तुमसाक कुन किसम लोक हवा लागे? तुमसाक पवित्र
आर परमेश्वरेर भक्तिवाला लोक हवा लागे। १२ आर परमेश्वरेर उडा
दिनेर जल्दी ओसवार इन्तेजार करवा लागे। उडा दिनोत आसमानडा
आगिनोत जले खतम हंय जाबे, आर सबला चीज गले जाबे। १३ मगर
परमेश्वरेर वादा मुताबिक हमरा एकटा नया आसमान आर नया दुनियाँर
इन्तेजार करछी, जहार भीतरोत सब कुछ परमेश्वरेर इच्छा मुताबिक
चलबे।

जागिल रहव आर तैयार रहव

१४ वहीलाते हे मोर प्यारा भा-बहिनला, जबकि तुम्हरा इला बातेर उम्मेद
करछेन, त कोशिश करो कि तुम्हरा शांतिर साथे वहार नजरोत बेदाग
आर बेकसूर रहवा पारेन। १५ लोक पाप से मुक्ति पाय, यहार तने
हमसार प्रभु धीरज धरे छे। पौलुस जहाँय हमसार प्यारा भई छे, वहाँव
यहीला बात परमेश्वरेर बुद्धिर मुताबिक तुमसार लिकिन लिखिहे।
१६ वहाँय यही मान्दी करे अपना सबला चिट्ठीत इला बातेर चर्चा करिहे,

जैलार भीतरोत कुछुला बात इकिसम छे कि उलाक समझना मुशिकल छे, आर प्रभुर वचनेर कम जानकार लोक आर जैला लोक अपना बातोत टिके नी रोहचे, वरा उलार मतलबोक समझवा नी पाछे आर उलार गलत माने लगाछे। पवित्र शास्त्रेर दोसराला बातेर साथेव यरा यही किसम करछे। इकिसम करे वरा अपना पाँत कुल्हरी मारछे। १७ वहीलाते हे मोर प्यारा भा-बहिनला, तुम्हरा पहिले से उला बातोक जाने हुँसियार रहव, जसे कि अधर्मी लोकेर धोखात ना पोढ़ेन आर अपना विश्वासोत टिके रोहेन। १८ मगर हमसार प्रभु आर मुक्तिदाता यीशु मसीहार दया आर वहार ज्ञानोत बढ़ते जाव। वहारे बड़ाई अलाव होक आर युग-युग तक होते रोहोक। आमीन!

यूहन्नार पहिला चिट्ठी

जीवनेर बात

१ मुई तुमसाक वहार बारे लिखछी, जहार मुख से हमरा सुनिही। जहाक हमरा अपना आँख दे देखिही। जहाक हमरा हाथ दे लाड़े देखिही। वहाँय शुरू से छिले, आर वहाँय जीवन देनेवाला वचन छे। २ वहाँय मानुषोक जीवन दिछे। वहाँय हमसार आगुत देखा दिले आर हमरा वहाक देखनु। आर हमरा वहार बारे लोकोक बताछी। आर हमरा तुमसाक वहार बारे बताछी कि वहाँय हमेशार जीवन दिछे। वहाँय पितार साथे छिले। ३ जे कुछु हमरा देखनु आर सुननु, वहार खबर हमरा तुमसाको दिछी, जसे कि तुम्हराव हमसार साथे संगति करवा पारेन। आर हमसार इडा संगति पितार साथे आर वहार बेटा यीशु मसीहार साथे छे। ४ आर इला बात हमरा यही तने लिखछी कि हमसार खुशीडा भरपूर हंय जाय।

परमेश्वर रोशनी छे

५ हमरा जैडा खबर यीशुर लिकिन से सुनिही, उडा तुमसाक सुनाछी। उडा खबर छे कि परमेश्वर रोशनी छे आर वहार भीतरोत एकदम अन्हार नी छे। ६ अगर हमरा बोली कि वहार साथे हमसार संगति छे, आर हमरा अन्हारोत बेराछी, त हमरा झूठा लोक छी, आर सच्चाईर पर नी चलछी। ७ मगर जैकिसम वहाँय रोशनी छे, हमरा अगर वही किसम रोशनीत चली, त एक-दोसराझनार साथे संगति राखीही, आर वहार बेटा प्रभु यीशुर खून हमसाक सबला पाप से शुद्ध करछे, ८ अगर हमरा बोली कि हमसार भीतरोत कोय पाप नी छे, त हमरा अपना-आपोक धोखा दिछी, आर हमसार भीतरोत सच्चाई नी छे। ९ परमेश्वर जैडा बोलछे उडा करछे, वहाँय हमेशार सही करछे। वहीलाते अगर हमरा अपना-अपना पापोक कबूल करे ली, त वहाँय हमसार पापलाक माफ करबे, आर वहाँय हमसाक सब किसमेर बुरा काम से शुद्ध करबे। १० अगर हमरा बोली कि हमरा पाप नी करछी, त हमरा परमेश्वरोक झूठा बनाछी, आर वहार वचन हमसार भीतरोत नी छे।

यीशु मसीहा हमसार मददगार

२ हे मोर छुवाला, मुई तुमसार लिकिन इला बात लिखछी जसे कि तुम्हरा पाप ना करेन। अगर कोय पाप करे, त पितार लिकिन हमसार

तरफ से बोलवार तने एकझन वकील छे। आर वहाँय यीशु मसीहा छे, जहाँय ठीक न्याय करछे। २ वहीं हमसार पापेर बलिदान छे, जहाँय हमसार पाप दूर करछे। सिरिफ हमसारे पाप दूर नी करछे, बल्के पूरा दुनियाँर लोकेर पाप दूर करछे। ३ अगर हमरा परमेश्वरेर हुकूम मानी, त इडा से हमरा जाने लुम कि हमरा वहाक जाने गही। ४ जहाँय इडा कोहचे, “मुई परमेश्वरोक जाने गही”, आर वहार हुकूमलाक नी मानछे, त वहाँय झूठ बोलछे, आर वहार दिलोत झूठ भराल छे। ५ मगर जहाँय परमेश्वरेर बात माने चलछे, वहार भीतरोत सचमुच परमेश्वरेर प्रेम पूरापूरी से बसे गहे। यहीडा से हमरा जानछी कि हमरा वहार लोक छी। ६ जहाँय इडा कोहचे कि मुई वहार साथे छी, त वहाक इडा चही कि वहाँय खुद वही मान्दी चले, जैकिसम कि यीशु चलछिले।

नया हुकूम

७ हे मोर प्यारा छुवाला, मुई तुमसाक कोय नया हुकूम नी लिखछी, मगर वहीडा पुरना हुकूम लिखछी, जैडा तुमसाक शुरूत मिलिहिले। इडा पुराना हुकूम उडा वचन छे, जैडाक तुम्हरा सुनिहेन। ८ ताहरो पर मुई तुमसाक नया हुकूम लिखछी, आर इडा हुकूमेर सच्चाई यीशुर जीवनोत आर तुमसार जीवनोत देखा दिहे। अन्हार खतम होते जाछे, आर सच्चाईर रोशनी अला चमकुवा लागिहे। ९ जहाँय इडा कोहचे कि मुई उजालात छी, आर अपना भईर साथे दुश्मनी करछे, वहाँय अभी तक

અન્હારોત છે। ૧૦ જહાંય અપના ભઈક પ્રેમ કરછે, વહાંય ડજાલાત રોહચે, આર વહાંય ઠોકર ની ખાબે। ૧૧ મગર જહાંય અપના ભઈ સે દુશ્મની કરછે, વહાંય અન્હારોત છે, આર અન્હારોત ચલછે, આર ડડા ની જાનછે કિ કુનઠિન જાછે, ક્યાંકિ અન્હારખાન વહાર આંખલાક કાના કરે દિહે। ૧૨ હે મોર છુવાલા, મુઈ તુમસાક લિખછી ક્યાંકિ વહાર નામે તુમસાક પાપેર માફી મિલે ગહે। ૧૩ તુમ્હરા જહાંય માં-બાપ છેન, મુઈ તુમસાક લિખછી ક્યાંકિ તુમ્હરા યીશુ મસીહાક જાનેન જહાંય શુરુ સે છે। તુમ્હરા જહાંય જવાન લોક છેન, મુઈ તુમસાક લિખછી ક્યાંકિ તુમ્હરા ડડા દુષ્ટ શૈતાનેર પર જીત પાય ગહેન। મોર છુવાલા, મુઈ તુમસાક લિખછી ક્યાંકિ તુમ્હરા પિતા પરમેશ્વરોક જાનેન। ૧૪ તુમ્હરા જહાંય માં-બાપ છેન, મુઈ તુમસાક લિખછી ક્યાંકિ તુમ્હરા યીશુ મસીહાક જાનેન, જહાંય શુરુ સે છે। હે જવાનલા, મુઈ તુમસાક લિખછી ક્યાંકિ તુમ્હરા તાકતવર છેન, આર પરમેશ્વરેર વચન તુમસાર દિલોત કાયમ છે। તુમ્હરા ડડા દુષ્ટ શૈતાનેર પર જીત હાસિલ કરિહેન।

દુનિયાંર સાથે પ્રેમ ના કરેન

૧૫ તુમ્હરા દુનિયાંર પર આર દુનિયાંર ચીજલા પર અપના મન મત લગાવ। અગર કોય દુનિયાં પર મન લગાછે, ત વહાર બીતરોત પિતાર પ્રેમ ની છે। ૧૬ ક્યાંકિ બદનેર ગલત ડચ્છા, આંખેર ગલત ડચ્છા આર ધન-સમ્પત્તિર ઘમંડ, ડલા દુનિયાંર ચીજ છે। ડલા ચીજ પિતા પરમેશ્વરેર તરફ સે ની

ओसछे, बल्के दुनियाँर तरफ से ओसछे। १७ दुनियाँडार चीज आर दुनियाँर चीजेर इच्छा दोनोंखान खतम होते जाछे, मगर जहाँय परमेश्वरेर इच्छा मुताबिक चलछे, वहाँय हमेशार तने रोहबे।

मसीहार दुश्मनला से सावधान

१८ हे छुवाला, इडा आखरी समय छे। तुम्हरा सुनिहेन कि एकझन मसीहार बिरोधी ओसबे। मगर मुई तुमसाक कोहची कि अलाय बहुतला मसीहार बिरोधी ओसे गहे। वहीलाते हमरा जानी कि दुनियाँडार खतम हवार आखरी समय बगलोत चले ओसिहे। १९ मसीहार उला बिरोधी लोक हमसार साथे छिले, मगर वरा हमसार लोक नी छिले। अगर हमसार लोक होलतेन, त वरा हमसार साथे रोहिलतेन। मगर वरा हमसार लिकिन से निकले चले गहे जसे कि मालूम हंय जाय कि वरा हमसार लोक नी छिले। २० मगर तुम्हरा परमेश्वरेर लिकिन से पवित्र आत्मा पाहेन, आर तुम्हरा सब कुछु जानेन। २१ मुई तुमसाक लिखनु क्याँकि तुम्हरा सच्चाईक जानेन। आर तुम्हरा यहोडा जानेन कि कोय झूठ सच्चाईर भीतर से नी ओसछे। २२ झूठा के छे? सिरिफ वहाँय छे, जहाँय प्रभु यीशुक मसीहा नी मानछे। वहाँय मसीहार बिरोधी छे। वहाँय पिता परमेश्वर आर बेटा यीशु मसीहार इन्कार करछे। २३ जहाँय बेटा यीशु मसीहाक इन्कार करछे, वहार लिकिन पिता परमेश्वर नी छे। जहाँय बेटाक माने लिछे, वहार लिकिन पिता परमेश्वर छे। २४ जे कुछु

तुम्हरा शुरू से सुनिहेन, वहीला तुमसार दिलोत मौजूद रोहोक। अगर उला तुमसार दिलोत मौजूद रोहय, त तुम्हरा बेटार साथे आर पितार साथे मिले रोहभेन। २५ आर वहाँय हमेशार जीवन दुवार वादा करिहे। २६ मुई इला बातोक उला लोकेर बारे लिखनु, जैला लोक तुमसाक भटकाछे, २७ मगर मसीहा तुमसाक पवित्र आत्मा दिहे। पवित्र आत्मा तुमसार दिलोत रोहचे। यही तने तुमसाक कोय लोकेर जरूरी नी छे कि वरा तुमसाक सिखाय। बल्के पवित्र आत्मा तुमसाक सबला बात सिखाछे। वहाँय सच छे, झूठ नी छे। वहीलाते पवित्र आत्मा जैकिसम तुमसाक मसीहार साथे रहवार तने सिखाछे, वही मान्दी मसीहार साथे जुड़े रहव।

परमेश्वरेर बेटा-बेटी

२८ छुवाला, वहीलाते मुई तुमसाक कोहची, तुम्हरा यीशु मसीहार साथे जुड़े रहव जसे कि जैखुना वहाँय ओसबे, उखुना हमसाक हिम्मत होबे आर हमरा शरमिन्दा नी होमु। २९ अगर तुम्हरा जानछेन कि मसीहा धर्मी छे, तुम्हरा यहोडा जानो कि जहाँय-जहाँय सही-सही काम करछे, वरा परमेश्वरेर बेटा-बेटी छे।

३ सोचे देखो, पिता परमेश्वर हमसाक कतेक बेसी प्रेम करिहे। वहार प्रेम हमसार तने इकिसम बेसी छे कि हमरा वहार बेटा-बेटी कहाल

जाछी, आर सही माने हमरा वहार बेटा-बेटी छिको। मगर दुनियाँर लोक हमसाक परमेश्वरेर बेटा-बेटी नी समझेछे क्यौँकि वरा परमेश्वरोक नी जाने। १ हे मोर प्रिय लोकला, हमरा परमेश्वरेर बेटा-बेटी छी, आर अला तक परमेश्वर नी देखाहे कि हमरा कि होमु? सिरिफ इडा जानी कि जैखुना मसीहा ओसबे, त हमरा वहारे मान्दी हंय जामु, क्यौँकि हमरा वहाक वही किसम देखमु, जैकिसम वहाँय छे। २ आर जहाँय मसीहार पर उम्मेद लगाय छे, वहाँय अपना-आपोक वही मान्दी पवित्र राखछे, जैकिसम मसीहा पवित्र छे। ३ जहाँय पाप करछे, वहाँय परमेश्वरेर नियमेर खिलाफ काम करछे, आर परमेश्वरेर नियमेर खिलाफ काम करना पाप होचे। ४ तुम्हरा जानेन कि मसीहा पापोक दूर करवार तने ओसिहिले, आर वहार भीतरोत कोय पाप नी छिले। ५ जहाँय मसीहार साथे जुड़े रोहचे, वहाँय पापोत पोड़े नी रोहचे। मगर जहाँय पापोत पोड़े रोहचे, वहाँय या त मसीहाक नी देख, आर ना वहाक जाने। ६ मोर छोटो छुवाला, कोय तुमसाक गलत रास्तात ना ले जाय। जहाँय-जहाँय सही काम करछे, वरा धर्मी छे, आर वरा यीशुर मान्दी धर्मी छे। ७ जहाँय पाप करछे, वहाँय शैतानेर लोक छे, क्यौँकि शैतान शुरू से पाप करते ओसिहे। परमेश्वरेर बेटा दुनियाँत ओसिल, जसे कि शैतानेर कामलाक नाश करे दे। ८ जहाँय परमेश्वरेर बेटा-बेटी छे, वरा पाप करते नी रोहबे, क्यौँकि परमेश्वरेर गुण उसार दिलोत रोहचे। वहीलाते वरा पाप करते

नी रोहबे, क्याँकि वरा परमेश्वरेर घरानार लोक छे। १० आर तुम्हरा परमेश्वरेर बेटा-बेटी आर शैतानेर बेटा-बेटीर पहचान करवा पारभेन। जैला लोक सही काम नी करछे, आर अपना भा-बहिनलाक प्रेम नी करछे, वरा परमेश्वरेर लोक नी छे।

आपसोत प्रेम

११ तुम्हरा शुरू से सुनिहेन कि हमसाक एक-दोसराझनाक प्रेम करवा लागे। १२ आर हमसाक कैनेर मान्दी हवा नी लागे। वहाँय दुष्ट शैतानेर लोक छिले। वहाँय अपना भईक मारे फिकालहिले। तुम्हरा त जानेन, वहाँय अपना भईक क्याँ मारे फिकाहिले? क्याँकि वहार कामला बुरा छिले, आर वहार भईर कामला अच्छा छिले। १३ हे मोर भा-बहिनला, अगर दुनियाँर लोक तुमसार साथे दुश्मनी करछे, यहात चकित ना होयेन। १४ हमरा जानी कि हमरा मौतोक पार करे जीवनोत पहुँचे गही, क्याँकि हमरा अपना भा-बहिनला से प्रेम करछी। जहाँय प्रेम नी करछे, वहाँय मौतेर दशात रोहचे। १५ जहाँय अपना भा-बहिन से दुश्मनी करछे, वहाँय खूनी छे, आर तुम्हरा जानेन कि कोय खूनी लोकेर भीतरोत हमेशार जीवन नी छे। १६ हमसाक अपना भा-बहिनोक कुन किसम करे प्रेम करवा लागे। इडा बात हमरा प्रभु यीशुर लिकिन से सीखिही क्याँकि वहाँय हमसार तने अपना जानडाक दे दिले। आर वही मान्दी हमसाको अपना भा-बहिनलार तने जान दुवा लागे। १७ मगर जहार

लिकिन जिन्दा रहवार तने सब कुछ छे, आर वहाँय अपना भा-बहिनोक बहुत गरीबी हालतोत देखछे, आर वहार पर तरस नी खाय, त वहार दिलोत परमेश्वरेर प्रेम नी छे।

परमेश्वरेर आगुत साहस

१८ हे मोर छोटो छुवाला, हमरा सिरिफ मुकखाने प्रेम ना करी, बल्के सच्चा दिल से कामेर जरियाय प्रेम करी। १९ हमरा यहीडा से जनवा पारमु कि हमरा सच्चाईर लोक छी। आर इकिसम करे हमरा परमेश्वरेर सामनात निर्दोष रोहमु। २० आर अगर कोयखुना हमसार मन हमसाक दोषी बताछे, त हमसाक घबरवार जरूरी नी छे, क्योंकि परमेश्वर हमसार मनडा से बोड़ो छे, आर वहाँय सब कुछ जाने। २१ हे प्यारा भा-बहिनला, अगर हमसार मनडा हमसाक दोषी नी करे, त परमेश्वरेर आगुत हमरा हिम्मत से ओसवा पारी। २२ आर जे कुछ हमरा माँगछी, वहाँय हमसाक उला दिछे, क्योंकि हमरा वहार हुकूम मानछी, आर वहाक जैडा अच्छा लागछे, हमरा वहीडा करछी। २३ परमेश्वरेर हुकूम इडा छे कि हमरा वहार बेटा यीशु मसीहार नामोत विश्वास करी, आर जैकिसम वहाँय हमसाक हुकूम दिहे, वही मुताबिक अपना बीचोत प्रेम करी। २४ जहाँय वहार हुकूमोक मानछे, वहाँय वहार साथे आर परमेश्वर उसार साथे रोहचे। जे पवित्र आत्मा परमेश्वर हमसाक दिहे, उडा से हमरा जानी कि परमेश्वर हमसार साथे-साथे रोहचे।

परमेश्वरेर आत्मा आर झूठा आत्मा

४ हे मोर प्यारा भा-बहिनला, हरेकझन जहाँय कोहचे कि मोर लिकिन परमेश्वरेर आत्मा छे, त विश्वास ना करेन, बल्के उसाक जाँच करे देखो कि उला आत्मा परमेश्वरेर तरफ से छे, ना नी छे, क्योंकि बहुतला झूठा नबी दुनियाँत हाजिर छे। २ जहार भीतरोत परमेश्वरेर आत्मा छे, त वहाक तुम्हरा चिन्हवा पारभेन। वहाँय इडा माने लिबे कि यीशु मसीहा मानुषेर बदन ले दुनियाँत ओसिहे, आर वहार भीतरोत परमेश्वरेर आत्मा छे। ३ आर जहाँय यीशुर बारे सच-सच नी बताछे, वहार भीतरोत परमेश्वरेर आत्मा नी छे। आर उडा मसीहार बिरोध करनेवालार आत्मा छे। जहार बारे तुम्हरा सुने लिहेन कि मसीहार बिरोधी ओसनेवाला छे, आर अलाव दुनियाँत छे। ४ मोर छोटो छुवाला, तुम्हरा परमेश्वर लोक छेन, आर तुम्हरा मसीहार बिरोधीलार पर जीत पाय गहेन, क्योंकि जे आत्मा तुमसार साथे छे, उडा आत्मा दुनियाँर आत्मा से बोड़ो छे। ५ मसीहार बिरोधीला दुनियाँरे लोक छे। वहीलाते वरा दुनियाँर सोच-बिचारेर मान्दी बात करछे, आर जैला लोक परमेश्वरेर पर विश्वास नी करछे, वरा उसार बातला सुनछे। ६ हमरा परमेश्वरेर लोक छी। जहाँय-जहाँय परमेश्वरोक जाने, वरा हमसार बात सुनछे। जहाँय परमेश्वरेर लोक नी छे, वहाँय हमसार बात नी सुनछे। यही मान्दी करे हमरा सच्चाईर आत्मा आर भटकानेवाला आत्माक चिन्हे लिछी।

परमेश्वर प्रेम

७ हे मोर प्यारा भा-बहिनला, हमरा आपसोत प्रेम करी, क्याँकि प्रेम परमेश्वरेर लिकिन से ओसछे। जहाँय प्रेम करछे, वरा परमेश्वरेर बेटा-बेटी छे, आर वहाँय परमेश्वरोक जाने। ८ परमेश्वर प्रेम छे। जहाँय प्रेम नी करछे, वहाँय परमेश्वरोक नी जाने। ९ परमेश्वर अपना प्रेम हमसार पर इकिसम देखाल कि परमेश्वर अपना एकलौता बेटा यीशु मसीहाक दुनियाँत पठाहे, जसे कि वहार जरियाय हमरा हमेशार तने जिन्दा रही। १० इकिसम नी कि हमरा पहिले परमेश्वरोक प्रेम करिहिनु, बल्के वहाँय हमसाक प्रेम करिल, आर हमसाक प्रेम करवार कारण हमसार पाप माफ दुवार तने अपना बेटाक पठाल। ११ हे भा-बहिनला, जबकि परमेश्वर हमसाक प्रेम करिल, त हमसाको एक-दोसराझनार साथे प्रेम करवा लागे। १२ परमेश्वरोक कोय कभी नी देखिहे। अगर हमरा आपसोत प्रेम राखी, त परमेश्वर हमसार साथे रोहचे, आर वहार प्रेम हमसार भीतरोत पूरा हंय जाछे। १३ परमेश्वर अपना आत्मा हमसाक दिहे। वहीलाते हमरा जानी कि हमरा वहार साथे जुड़ाल छी, आर वहाँय हमसार साथे जुड़े छे। १४ हमरा देखे लिही, आर गवाही दिछी कि पिता परमेश्वर अपना बेटाक दुनियाँर लोकेर मुक्तिदाता बनाय पठाहे। १५ जहाँय इडा बातोक माने लिछे कि यीशु परमेश्वरेर बेटा छे, त परमेश्वर वहार साथे जुड़े छे, आर वहाँय परमेश्वरेर साथे जुड़ाल छे।

१६ जैखान प्रेम परमेश्वर हमसार साथे करछे, हमरा उखानोक जाने गही। परमेश्वर प्रेम छे। आर जहाँय दोसरा लोकोक प्रेम करते रोहचे, वहाँय परमेश्वरेर साथे जुड़ाल रोहचे, आर परमेश्वर वहार साथे जुड़े रोहचे। १७ हमसाक एक-दोसराझनाक पूरा दिल से प्रेम करवा लागे। जैकिसम यीशुर जीवन दुनियाँत छिले, वही मान्दी हमसारो जीवन अगर इडा दुनियाँत रहय, त हमरा परमेश्वरेर बिचारेर दिनोत हिम्मत से थाड़ो हवा पामु। १८ जहाँय परमेश्वरोक प्रेम करछे, वहाँय परमेश्वरेर सजा से नी डोराबे। प्रेम डोर दूर करछे। आर जहाँय सजा से डोराछे, वहाँय पूरा दिल से प्रेम नी करछे। १९ परमेश्वर हमसाक पहिले प्रेम करिहे। वहीलाते हमरा प्रेम करछी। २० अगर कोय इडा कोहय, “मुई परमेश्वरोक प्रेम करछी”, आर अपना भा-बहिन से दुश्मनी राखे, त वहाँय झूठ बोलछे। क्याँकि जहाँय अपना भा-बहिनोक प्रेम नी करछे, जहाक वहाँय देखछे, त वहाँय परमेश्वरोक कसे करे प्रेम करबे, जहाक देखाल नी जाछे। २१ वहाँय हमसाक इडा हुकूम दिहे कि जहाँय परमेश्वरेर साथे प्रेम राखछे, वहाँय अपना भा-बहिन से प्रेम राखोक।

५ जहाँय इडा विश्वास करछे कि यीशु मसीहा छे, त वहाँय परमेश्वरेर बेटा या बेटी छे। जहाँय पिता से प्रेम करछे, वहाँय वहार बेटा-बेटीला से प्रेम करछे। २ जब हमरा परमेश्वरोक प्रेम करछी, आर वहार हुकूमलाक

मानछी, त हमरा जाने लिछी कि हमरा परमेश्वरेर बेटा-बेटीला से प्रेम करछी। ३ परमेश्वरोक प्रेम करवार मतलब छे कि वहार हुकूमलाक माने चलना आर वहार हुकूमला माने चलना कठिन नी छे। ४ जहाँय परमेश्वरेर बेटा या बेटी छे, वहाँय दुनियाँर बुरा सोच-बिचारेर पर जीत हासिल करछे। हमरा दुनियाँर बुरा सोच-बिचारेर पर जीत हासिल करछी क्योंकि हमरा यीशु पर विश्वास करछी। ५ दुनियाँर बुरा सोच-बिचारेर पर के जीत हासिल करछे? सिरिफ वहाँय, जहाँय विश्वास करछे कि यीशु परमेश्वरेर बेटा छे।

यीशु मसीहार बारे गवाही देना

६ यीशु मसीहा जैखुना दुनियाँत ओसिल, पानीत वहार बपतिस्मा होल आर क्रुसेर पर अपना खून बहाल। इकिसम करे पानी आर खूनेर जरियाय वहाँय देखाल कि वहाँय परमेश्वर बेटा छे। ७ पवित्र आत्मा वहार बारे बताछे, क्योंकि पवित्र आत्मा सच्चा छे। ८ पवित्र आत्मा, पानीर बपतिस्मा आर क्रुसेर पर बहाल खून यीशुर बारे बताछे। इ तीनोंडा यीशु बारे एके किसम बताछे। ९ हमरा लोकेर बात माने लिछी। जब परमेश्वर अपना बेटार बारे बताछे, त हमसाक बेसी करे माने लुवा होबे, क्योंकि मानुषेर बातला से परमेश्वरेर बातला बेसी ताकत छे। १० जहाँय परमेश्वरेर बेटार पर विश्वास करछे, वहाँय जानछे कि परमेश्वर अपना बेटार बारे सच-सच बोलछे। मगर परमेश्वर अपना

बेटार बारे जैडा बात बोलछे, अगर कोय विश्वास नी करछे, वहाँय परमेश्वरोक झूठा बनाछे। ११ परमेश्वर बोलछे कि वहाँय हमसाक हमेशार जीवन दिहे, आर इडा जीवन वहार बेटार भीतरोत छे। १२ जहार लिकिन बेटा छे, वहार लिकिन हमेशार जीवन छे, आर जहार लिकिन परमेश्वरेर बेटा नी छे, वहार लिकिन हमेशार जीवन नी छे।

हमेशार जीवन

१३ तुम्हरा जहाँय परमेश्वरेर बेटार पर विश्वास करछेन, मुई तुमसार लिकिन यही तने लिखनु कि तुमसाक मालूम हंय जाय कि तुम्हरा हमेशार जीवन पाहेन, जैडा कभी खतम नी होबे। १४ आर परमेश्वरेर आगुत हमसार जैडा भरोसा छे कि अगर हमरा वहार इच्छा मुताबिक कुछु माँगछी, त वहाँय हमसार बात सुनछे। १५ जब हमरा इडा जानी कि जे कुछु हमरा माँगछी, वहाँय सुनछे। हमरा यहोडा जानी कि हमरा जे कुछु माँगी, उला सबला हमसाक दिछे। १६ अगर कोय भा-बहिन पाप करछे, आर उडा पाप से वहार मौत नी होबे, त वहाँय वहार तने परमेश्वरेर लिकिन प्रार्थना करोक, आर परमेश्वरेर वहाक जीवन दिबे। पाप यहो किसम होचे, जैडा पाप से मौत होचे। इकिसम पापेर बारे मुई तुमसाक बिनती करवा नी कोहची। १७ सब किसमेर गलत काम पाप होचे, मगर यहोमान्दी पाप छे, जैला से लोकेर मौत नी होचे। १८ हमरा जानी कि जहाँय परमेश्वरेर बेटा या बेटी छे, वहाँय पाप करते नी रोहबे।

मगर यीशु परमेश्वरेर बेटा बचाय राखछे, आर शैतान वहार पर हाथ लगवा नी पारबे। १९ हमरा यहोडा जानछी कि हमरा परमेश्वरेर लोक छी, आर पूराडा दुनियाँ उडा दुष्ट शैतानेर कब्जात छे। २० हमरा जानी कि परमेश्वरेर बेटा ओसे गहे, आर अला हमरा सच्चा परमेश्वरोक जनवा पारमु। आर हमरा सच्चा परमेश्वर आर वहार बेटा यीशु मसीहा साथे जुड़े छी। वहार बेटा सच्चा परमेश्वर छे, आर वहाँय हमेशार जीवन दिछे। २१ हे छुवाला, तुम्हरा अपना-आपोक मूर्ति पूजा से दूर राखो।

यूहन्नार दोसरा चिट्ठी

परिचय आर आशीर्वाद

१ मुई परमेश्वरेर लोकेर नेता छी। मुई परमेश्वरेर चुनाल उडा स्त्रीक आर वहार छुवालार लिकिन इखान चिट्ठी लिखछी, जैलाक मुई दिल से प्रेम करछी। सिरिफ मुहें नी, बल्के वरा सबकोय उसाक प्रेम करछे, जहाँय सच्चाईक जानछे। २ इडा सच्चाई हमसार भीतरोत रोहचे, आर हमेशार तने हमसार साथे बनाल रोहबे। ३ मुई प्रार्थना करछी कि पिता परमेश्वर आर बेटा यीशु मसीहा हमसार पर दया करे, आर हमसाक शांति दे जसे कि हमरा सच्चाईत टिके रहई आर एक-दोसराझनाक प्रेम करी।

सच्चाई आर प्रेम

४ पिता परमेश्वर हमसाक जैडा हुकूम दिहे, वही मुताबिक तोर कुछुला बेटा-बेटी परमेश्वरेर सच्चाईर रास्तात चलछे। इडा देखे मोक बहुत खुशी होये। ५ प्यारा बहिन, मुई तोक कोय नया हुकूम नी दिछी, बल्के जैडा हुकूम शुरू से हमसार लिकिन छिले, वहीडा लिखछी, आर तोर

लिकिन बिनती करछी कि तुम्हरा एक-दोसराझनाक प्रेम करो। ६ हमरा जैखुना एक-दोसराझनाक प्रेम करछी, त हमरा वहार हुकूम मानछी। परमेश्वर हमसाक एक-दोसराझनाक प्रेम करवार हुकूम दिहे। इडा हुकूम तुम्हरा शुरूत सुनिहेन, जैखुना तुम्हरा खुश-खबरीर पर विश्वास करिहिलेन। ७ मुई तुमसाक इला कोहची क्याँकि बहुतला इकिसम भटकानेवाला दुनियाँत निकलिहे, वरा बोलछे कि यीशु मसीहा मानुषेर बदन ले दुनियाँत नी ओसिहिले। वरा भटकानेवाला आर मसीहार बिरोधी लोक छे। ८ वहीलाते तुम्हरा हुँसियार रोहेन जसे कि हमसार मेहनत तुमसार बीचोत बेकार ना हंय जाय। तुम्हरा विश्वासोत बनाल रहेन जसे कि तुम्हरा इनाम पायेन। ९ जहाँय यीशु मसीहार शिक्षाक छोड़े दोसरा किसमेर बात माने चलछे, वहार साथे परमेश्वर नी रोहचे। आर जहाँय मसीहार शिक्षात टिके रोहचे, वहाँय पितार साथे आर बेटार साथे जुड़ाल होचे। १० अगर तुमसार लिकिन कोय ओसे, आर मसीहार शिक्षा नी दिछे, त वहाक घरोत ओसवा ना देन आर ना वहाक प्रणाम-पाती करेन। ११ क्याँकि जे लोक इकिसम लोकोक प्रणाम-पाती करछे, वहाँय इकिसम लोकेर खराब कामेर सरिकदार होचे।

आखरी नमस्कार

१२ मोर लिकिन लिखवार तने बहुतला बात छे, मगर मुई कागज आर स्याही दे लिखवा नी चाहची। मगर उम्मेद छे कि मुई तोर लिकिन ओसमु, आर सामना-सामनी बातचीत करमु, तब हमरा बहुत खुश होमु। १३ परमेश्वरेर चुनाल बहिनेर छुवालार तरफ से तुमसाक नमस्कार।

यूहन्नार तेसरा चिट्ठी

परिचय आर आशीर्वाद

१ मुई परमेश्वरेर लोकेर एकझन नेता छी। मुई मोर बहुत प्यारा गयुसोक इखान चिट्ठी लिखछी, जहाक मुई दिल से प्रेम करछी। २ हे मोर प्यारा गयुस, मोर इडा प्रार्थना छे कि जे मान्दी तोर आत्मा तरक्की करते जाछे, वही मान्दी तोर बदन अच्छा होते जाय, आर तुई सब बातोत तरक्की करते जईस। ३ जैखुना विश्वासी भईला ओसे तोर बारे बताछे कि तुई परमेश्वरेर सच्चाईत टिके छिस आर वही मुताबिक चलछिस। इला सुने मुई बहुत खुश होनु, ४ कि मोर छुवाला परमेश्वरेर सच्चाईर पर चलछे। यहा से बढ़े आर मोर तने कोय खुशीर बात नी छे। ५ हे प्यारा गयुस, तुई अनजान विश्वासी भईर मदद करे परमेश्वरेर सेवा इमानदारी से करछिस। ६ जैडा मदद तुई उला विश्वासीर तने करिहिस, वरा मंडलीर आगुत तोर प्रेमेर बारे बताहे। आर इकिसम करे उसार सफरेर तने मदद करबो, त परमेश्वरोक अच्छा लागबे। ७ क्यौंकि उला अनजान भई प्रभु यीशुर तने निकलिहे, आर वरा कोय अविश्वासी लोकेर लिकिन से कुछु नी लिहे। ८ वहीलाते, हमसाक इकिसम लोकेर

मदद करवा लागे, जसे कि हमराव परमेश्वरेर सच्चाईर प्रचारेर भागीदार हवा पारी।

दियुत्रिफेसेर आर दिमेत्रियुसेर बारे

९ मुई मंडलीर लिकिन कुछ लिखिहिनु, मगर दियुत्रिफेस मंडलीत बोड़ो होवा चाहचे, वहीलाते वहाँय हमसाक ग्रहण नी करछे। १० वहाँय हमसार बारे खराब-खराब बात बोलछे, आर यहोडा से खुश नी होचे। आर वहाँय खुद विश्वासी भईलाक ग्रहण नी करछे। आर जहाँय विश्वासी भईलाक ग्रहण करवा चाहचे, उसाक मना करछे, आर उसाक मंडली से निकलाय दिछे। मुई जैखुना ओसुम, त वहाँय जैला काम करछे, उला कामेर बारे सभाको बताम। ११ हे प्यारा गयुस, तुई बुरा करनेवाला नी, मगर भला करनेवाला बनेक। जहाँय भला करछे, वहाँय परमेश्वरेर लोक छे। आर जहाँय बुरा करछे, वहाँय परमेश्वरोक नी जाने। १२ सबकोय दिमेत्रियुसेर बड़ाई करछे कि परमेश्वरेर साथे वहार व्यवहारटार अच्छा छे। आर हमराव वहार बड़ाई करछी। तुई त जानिस कि हमरा जैला बोलछी, उला सच बात बोलछी।

आखरी नमस्कार

१३ मुई तोर लिकिन बहुत कुछ लिखवा चाहचिनु, मगर स्याही आर कलम दे लिखवा नी चाहची। १४ मुई उम्मेद करछी कि तोर साथे जल्दी

मुलाकात करमु, आर सामना-सामनी तोर साथे बात करमु। १५ अला
मुई परमेश्वरेर लिकिन प्रार्थना करछी कि परमेश्वर तोक अपना शांति
दिते रोहय। इठिनकार सबला दोस-बन्धु तोक नमस्कार पठाछे। तोर
उठिनकार सबला दोस-बन्धुक हमसार नमस्कार कोहय दिस।

यहूदार चिट्ठी

परिचय आर आशीर्वाद

१ मुई यहूदा छी। मुई यीशु मसीहार सेवक आर याकूबेर भई छी। मुई इखान चिट्ठीक तुमसार तने लिखछी। तुमसाक बुलाल गहे आर तुम्हरा परमेश्वरेर प्यारा लोक छेन। आर परमेश्वर यीशु मसीहार तने तुमसाक हिफाजतोत राखिहे। २ मुई प्रार्थना करछी कि परमेश्वर तुमसार पर बेसी से बेसी दया करो, शान्ति दोक, आर तुमसाक प्रेम करोक।

झूठा शिक्षक से हुँसियार

३ प्रिय भा-बहिनला, मुई तुमसाक इडार बारे लिखवा चाहचिनु कि परमेश्वर हमसाक केनमन करे बचाहे। मगर मुई अला लिखना जरूरी समझिनु, आर बिनती करछी कि तुम्हरा अपना विश्वासेर हिफाजत करो। इडा विश्वास प्रभु अपना पवित्र लोकोक हमेशार तने दिहे। ४ मुई तुमसाक इला बताछी क्योंकि कुछुला लोक चुपचाप हमसार साथे मिले गहे। उसार सजईर बारे बहुत पहिले से लिखाल गहिले। वरा दिल से परमेश्वरेर भक्ति नी करछे, आर परमेश्वरेर दयार बारे जे शिक्षा छे, उडा

शिक्षाक बदले दिहे, आर विश्वासी लोकोक कुकरम करवार शिक्षा दिछे। यीशु मसीहा जहाँय हमसार मालिक, इला लोक प्रभु यीशु मसीहाक इन्कार करछे। ५ मगर तुम्हरा त सबला बातोक पहिले से जाने लिहेन, तहारो पर मुई तुमसाक इला सबला बातेर बारे ख्याल कराय दुवा चाहची, कि प्रभु इजराएली लोकोक मिसर देश से आजाद करे बाहर करिल। बाद करे जैला लोक वहार पर विश्वास नी करिल, उसाक सभाको खतम करे दिहिले। ६ तुम्हरा फरीस्तालार बारे याद करो। जैखुना स्वर्गेर कुछुला फरीस्ता परमेश्वरेर अधिकारोत नी रोहिल, आर अपना रहवार जगह छोड़े दिले। परमेश्वर उला फरीस्ताक झिंजिर दे बान्हे महाबिचारेर दिनेर तने जेलखानार अन्हारोत राखे दिहे। ७ तुम्हरा सदोम आर अमोरा शहरेर लोकोक याद करे, जैला लोक यही किसम करिहिले। जैखुना सदोम आर अमोरा, आर सदोम आर अमोरार बगलेर शहरेर लोकला कुकरम करनेवाला बने गहिले, आर दोसराझनार बदनेर लोभी बने गहिले, उखुना परमेश्वर उसाक खतम नी होनेवाला आगिन दे सजा दिहिले। आर इकिसम करे इला शहर सभारो तने एकटा मिसाल बने गेल कि जहाँय-जहाँय बुरा काम करबे, वराव नाश हंय जाबे। ८ उला झूठा शिक्षक यही किसम छे। वरा सपना देखछे, आर अपना सपना मुताबिक अपना-अपना बदनलाक गंदा करछे आर प्रभुर अधिकारोक नी रोहचे, आर फरीस्तालार बदनामी करछे। ९ मगर स्वर्गेर सबसे बोड़ो

फरीस्ता मिकाईल इकिसम नी करिल। जैखुना मिकाईल मूसा नबीर लाशटार बारे शैतानेर साथे वाद-विवाद करछिले, त मिकाईल शैतानेर पर दोष लगवार हिम्मत नी करिल, बल्के वहाँय बोलिल कि प्रभु तोक डाँटोक। १० मगर इला लोक जैला बातोक नी जाने, उसार खिलाफ बोलछे। जानवर जैकिसम बिना सोचे-समझे करछे, वही मान्दी इला लोको करछे। आर वरा अपना-आपोक नाश करछे। ११ इला झूठा शिक्षकेर पर कतेखान दुख पोड़बे क्यौँकि वरा कैनेर मान्दी चाल चलछे। आर गलत कमाईर तने वरा बिलाम नबीर मान्दी बर्बाद हंय गहे, आर कोरह जैकिसम करिहिले, वही मान्दी इला लोक गलत काम करछे आर नाश हंय गहे। १२ इला लोक बेशरम छे, आर वरा प्रभु-भोजेर तने छुपाल खतरा छे। यरा सिरिफ अपनार तने चिन्ता करछे। यरा बिना पानीवाला बदलीर मान्दी छे, आर हवात उड़ाय बेराछे। यरा उला गाछेर मान्दी छे, जैला फल दुवार समय फल नी दिछे। यरा जड़ समेत उठाल गाछेर मान्दी दुई बार मोरे गहे। १३ इला लोक समुन्द्रेर शक्तिशाली पानीर मान्दी छे। उसार शरमेर कामला समुन्द्रेर पानीर गाजोर मान्दी छे। यरा उला तारार मान्दी छे, जैला आसमानोत घुरे बेड़ाछे। इला लोकेर तने परमेश्वर खोब अन्हार जगह राखिहे, जैठिन वरा हमेशा हमेशार तने रोहबे। १४ तुम्हरा त हनोकेर बारे जाने। वहाँय आदमेर पीढ़ीर भीतरोत सातवाँ पीढ़ीर लोक छिले। हनोक इला झूठा शिक्षकलार सजार बारे

बहुत आगुते बोलिहिले, “देखो, प्रभु अपना लाखो-लाख पवित्र फरीस्तार साथे ओसबे। १५ प्रभु सभारो बिचार करबे। आर सबला पापी लोकोक उसार पापेर कामेर तने उसाक दोषी ठहराबे, आर प्रभुर खिलाफ बोलवार कारण उसाक दोषी ठहराबे।” १६ यरा हरखुना दोसरा लोकेर खिलाफ बोलछे, आर लोकेर गलती देखे बेड़ाछे। यरा घमंडेर बात बोलछे। आर यरा अपना गंदा इच्छा मुताबिक चलछे। आर अपना बड़ाई खुद करछे। यरा अपना फैदार तने लोकेर साथे मीठा-मीठा बात बोलछे।

विश्वासोत मजबूत रहवार सुझाव

१७ मगर हे मोर प्यारा भा-बहिनला, ख्याल करो हमसार प्रभु यीशु मसीहार दूतला पहिले की बोलिहे। १८ वरा तुमसाक कोहिले, “आखरी दिनोत इकिसम खराब लोक होबे, जैला परमेश्वरेर कामेर बारे मजाक उड़ाबे, आर वरा अपना गंदा इच्छा मुताबिक चलबे।” १९ इला लोक झूठा शिक्षक छे, जैला फूट पैदा करछे। वरा दुनियाँर बातलार पर मन लगाछे, आर उसार भीतरोत परमेश्वरेर आत्मा नी छे। २० मगर हे प्रिय भा-बहिनला, तुम्हरा अपना पवित्र विश्वासोत एक-दोसराझनार मदद करो कि सभारो तरक्की होय, आर पवित्र आत्मार जरियाय प्रार्थना करते रहव, २१ परमेश्वरेर प्रेमोत बने रहव, आर हमसार प्रभु यीशु मसीहार दयार इन्तेजार करो। वहाँय तुमसाक हमेशार जीवन दिछे।

२२ जैला लोक विश्वासोत डगमगाय जाछे, उसार पर दया करो। २३ आर बहुतझनाक आगिनेर भीतर से खींचे निकलाय लव। आर कुछ लोक इकिसम छे, जैलार पर दया करवारखुना हुँसियार होवा होबे। आर उसार कपड़ाला से घिण करो, जैला कपड़ा बदनेर पापेर काम से गंदा हंय गहे।

परमेश्वर

२४ परमेश्वरेर बड़ाई होक। परमेश्वर जहाँय तुमसाक विश्वासोत बचाय रखवा पारे, वहाँय तुमसाक अपना सामनात निर्दोष आर खुशी-खुशी हाजिर करबे। २५ हमसार प्रभु यीशु मसीहार जरियाय हमसार मुक्तिदाता परमेश्वरेर बड़ाई होक। परमेश्वर जहाँय शुरू से छे, वहार शक्ति, अधिकार आर राज अला से ले युग-युग तक बना रहोक।
आमीन!

प्रकाशितवाक्य

यूहन्नार लिकिन यीशुर संवाद

१ जैला घटना जल्दी घटनेवाला छे, उलार बारे परमेश्वर यीशु मसीहाक देखाल जसे यीशु मसीहा अपना सेवकलाक बताय। यीशु फरीस्तार जरियाय अपना सेवक यूहन्नार लिकिन खबर भेजिल, २ जसे कि वहाँय जैला चीज परमेश्वरेर वचनेर बारे आर यीशु मसीहार बारे देखिल, उलार बारे गवाही दे। ३ खुशहाल वहाँय छे, जहाँय इला भविष्यवाणीर बातलाक पढ़छे, जहाँय सुनछे आर जहाँय इला बातोक मानछे, क्योंकि इला सबला बातेर पूरा हवार समय बगलोत चले ओसिहे। ४ मुई यूहन्ना तुमसाक लिखछी। तुम्हरा जहाँय आसिया प्रदेशेर सातटा मंडलीर लोक छेन। मुई परमेश्वरेर लिकिन तुमसार तने प्रार्थना करछी कि परमेश्वर, जहाँय शुरू से छिले आर छे, आर फेर ओसनेवाला छे, वहाँय तुमसाक शांति दोक आर तुमसार पर दया करोक। आर उ सातटा आत्मारो लिकिन प्रार्थना करछी कि उ सातटा आत्माव तुमसाक शांति दोक आर तुमसार पर दया करोक, जैला परमेश्वरेर सिंहासनेर आगुत हाजिर छे। ५ आर यीशु मसीहा जहाँय विश्वासी गवाह छे, आर मुर्दा से जिन्दा

होनेवाला सबला लोकेर बीचोत पहिला लोक छे, आर दुनियाँर राजालार उपरोत महाराजा छे, मुई प्रार्थना करछी कि वहाँव तुमसाक शांति दोक आर तुमसार पर दया करोक। ६ आर यीशु मसीहा हमसाक एकटा राज दिहे आर अपना पिता परमेश्वरेर तने पूजारी बनाय दिहे। व्हारे बड़ाई आर शक्ति हमेशार तने होते रोहोक। आमीन! ७ देखो, वहाँय बदलीर पर ओसनेवाला छे, आर हरेकझन लोक वहाक देखबे। इकिसम कि जैला लोक वहाक बल्लम दे गाथिहिले, वराव वहाक देखबे, आर दुनियाँर सब देशेर लोक वहार कारण कानबे। आर यही किसम होबे। आमीन! ८ प्रभु परमेश्वर, जहाँय सर्वशक्तिमान छे, जहाँय शुरू से छिले, आर छे आर रोहबे, वहाँय कोहचे कि मुहें शुरूवात छी आर मुहें आखरी छी। ९ मुई यूहन्ना तुमसार भई छी। यीशु मसीहार पर विश्वास करवार कारण मुई तुमसार साथे दुःख उठाछी, तुमसार साथे वहार राजेर भागीदार छी, आर तुमसार मान्दी धीरज धरे दुःख सहय लिछी। परमेश्वरेर वचन आर यीशु मसीहार बारे बोलवार कारण से मुई पतमुस टापूत सजा काटछी। १० प्रभुर दिनोत परमेश्वरेर आत्मा मोक अपना बशोत करिल। आर मुई अपना पीछू भीति शंखेर आवाजेर मान्दी एकटा आवाज सुननु। आवाजडार भीतर से मोक कोहचिले, ११ “जैला तुई देखछिस, उलाक लिखे आर सातोडा मंडलीर लिकिन पठाय दे, जैला कि इफिसुस आर स्मरना, आर पिरगमुन, आर युआतीरा, आर सरदीस,

फिलादेलफिया आर लौदीकिया शहरोत छे।” १२ जहाँय मोर साथे बात करछिले, वहाक देखवार तने मुई पीछू भीति घुरनु, त सातटा सोनार चराकदानीक देखनु। १३ आर उला चराकदानीर बीचोत मानुषेर बेटार मान्दी एकइन लोकोक देखनु, जहाँय पाँ तक लम्बा कपड़ा पिन्हाल छिले, आर बुकखानोत सोनार बेल्ट पिन्हाल छिले। १४ वहार माथार चूलला सप्फा ऊनेर मान्दी आर बरफेर मान्दी सादा छिले, आर वहार आँखला आगिनेर मान्दी तेज छिले। १५ वहार पाँला आगिनेर भट्ठीत साफ कराल पीतलेर मान्दी चमकेछिले, आर वहार आवाजडा बहुत जोर से बहवार पानीर मान्दी छिले। १६ वहार दहिना हाथोत सातटा तारा छिले आर वहार मुख से दुईधारी तलवार निकलेछिले। आर वहार मुखखान बेलाडार मान्दी चमकेछिले। १७ जैखुना मुई वहाक देखनु, त वहार पाँलार पर पोड़े गेनु, आर मुर्दार मान्दी पोरे छिनु। आर वहाँय मोर पर अपना दहिनाखान हाथ राखे इडा कोहले, “ना डोरा। मुई पहिला आर आखरी छी, १८ आर जिन्दा छी। मुई मोरे गहिनु, आर अला देखेक, मुई युग-युग तक जिन्दा छी। आर मोर लिकिन ‘मौत’ आर ‘पातालेर’ जाभी छे। १९ वहीलाते जैला चीजोक तुई देखलो, आर जैला बात अला होचे, आर जैला बात यहार बाद होनेवाला छे, उला सबला बातोक लिखेक। २० जे सातटा तारार तुई मोर दहिना हाथोत देखलो, उ सातटा तारार भेद

छे: सातटा मंडलीर दूत, आर उ सातटा चराकदानीर भेद छे: सातटा मंडली।”

इफिसुस मंडलीर दूतोक चिट्ठी

२ “इफिसुस मंडलीर दूतोक इकिसम लिखेक: जहाँय सातटा ताराक अपना दाहिना हाथोत राखिहे, आर सोनार सातटा चराकदानीर बीचोत बेराछे, वहाँय इडा कोहचे कि १ ‘मुई तोर कामोक आर तोर कठिन मेहनतोक आर तोर धीरज धरे दुःख सहवार शक्ति जानी। आर यहोडा जानी कि तुई खराब लोकोक बरदास्त करवा नी पारछिस। जैला लोक अपना-आपोक मसीह दूत कोहचे, मगर वरा मसीह-दूत नी छे। जाँच करवार बाद उसाक तुई झूठा पालो। ३ तोर लिकिन धीरज धरे दुःख सहवार शक्ति छे आर मोर नामेर कारण से दुःख-मुसीबत सहय लिहिस आर नी थकछिस। ४ तहारो पर तोर खिलाफ मोक इडा कहना छे कि तुई पहिलकार मान्दी प्रेम करवा छोड़े दिहिस। ५ अला तुम्हरा सोचे देखो, तुम्हरा कताखान उँचाई से गिरे गहेन। वहीलाते अपना मन बदली करेक आर पहिलकार मान्दी काम करो। अगर तुई मन बदली नी करबो, त मुई तोर लिकिन ओसुम, तोर चराकदानीडाक अपना जगह से हटाय दुम। ६ मगर हाँ, तोर बारे एकटा अच्छा बात छे कि तुई निकोलस पंथेर लोकेर कामला से नफरत करछिस, जैला से मोहो नफरत करछी।

७ तुम्हरा ध्यान दे सुनो कि परमेश्वरेर आत्मा मंडलीलाक की कोहचे। जहाँय जीत हासिल करबे, मुई वहाक उडा जीवन देनेवाला गाछेर फल खवा दुम, जैडा गाछ परमेश्वरेर स्वर्ग पुरीत छे।”

स्मुरना मंडलीर दूतोक चिट्ठी

८ “स्मुरना मंडलीर दूतोक इकिसम लिखेक: कि जहाँय पहिला आर आखरी छे, जहाँय मोरे गहिले, मगर अला जिन्दा छे। वहाँय इडा कोहचे, कि ९ ‘मुई तोर बिपत्तिक आर गरीबीक जानी, मगर तुई विश्वासोत धनी छिस। जैला लोक यहूदी नी छे, आर अपना-आपोक यहूदी कोहचे, वरा शैतानेर सभा छे, आर परमेश्वरेर लोकेर खिलाफ बोलछे, इडार बारे मुई जानी। १० जैडा तकलीफ तोक उठवा होबे, उडा से ना डोरा। शैतान तुमसार बीच से कुछुला लोकोक जेलखानात देनेवाला छे, जसे कि तुमसार विश्वासेर जाँच होय। तुमसाक दस दिन तक बिपत्ति उठवा होबे। आर अगर तोक अपना जानडा दुवा होबे, आर जानडा दुवार समय तक तुई विश्वासोत बने रोहबो, त मुई तोक जीवनेर मुकुट दान करमु। ११ तुम्हरा ध्यान दे सुनो कि परमेश्वरेर आत्मा मंडलीलाक की कोहचे, जहाँय जीत हासिल करबे, वहाँय दोसरा मौत से बचे जाबे।”

पिरगमुन मंडलीर दूतोक चिट्ठी

१२ “पिरगमुन मंडलीर दूतोक इकिसम लिखेकः जहार ठिन दोनों भीति धारवाला तरवाल छे, वहाँय इडा कोहचे, १३ ‘मुई इडा जानी कि तुई उठिन रोहछिस, जैठिन शैतानेर राज चलछे। मगर तुई मोर पर मजबूती से विश्वास करे छिस। तुम्हरा अपना विश्वास वोहोखुना नी छोड़ैन, जैखुना तुमसार नगरोत मोर बफादार सेवक अन्तिपास मारा गहिल, जैठिन शैतान रोहचे। १४ मगर तोर खिलाफ मोक कुछु बात कहना छे। तोर उठिन कुछुला लोक इकिसम छे, जैला लोक बिलामेर शिक्षाक मानछे। इ बिलाम इजराएली लोकेर खिलाफ राजा बालाकोक सिखाहिले कि इजराएली लोक मूर्तिर आगुत चढ़ाल बलिदानेर मांस खाय आर कुकरम करे। १५ वही मान्दी तुमसार ठिन कुछुला इकिसम लोक छे, जैला नीकुलाईर शिक्षालाक मानछे। १६ वहीलाते मन बदली करो। मन बदली नी करले, मुई तोर ठिन जल्दी करे ओसमु आर अपना मुखेर तरवाल दे उला कुकरमी लोकेर साथे लड़ई करमु। १७ तुम्हरा ध्यान दे सुनो कि परमेश्वरेर आत्मा मंडलीलाक की कोहचे। जहाँय जीत हासिल करबे, वहाक मुई छुपाल मन्ना आर एकखान सादा रंगेर पत्थल दुम, आर उखान पत्थलेर पर एकटा नया नाम लिखाल रोहबे, जैडा नामोक सिरिफ पत्थलखानोक पानेवाला जानबे।”

थुआथिरा मंडलीर दूतोक चिट्ठी

१८ “थुआथिरा मंडलीर दूतोक इकिसम लिखेक: परमेश्वरेर बेटा जहार आँखला खोब तेज आग्निनेर मान्दी छे, जहार पाँला चकचक पित्तलेर मान्दी छे, वहाँय इडा कोहचे, १९ ‘मुई तोर काम, प्रेम, विश्वास, सेवा, आर धीरज धरे दुःख सहवार शक्तिक जानी, आर यहोडा जानी कि तोर अलकार कामला पहिलकार कामला से बढे छे। २० मगर तोर खिलाफ मोक इडा कहना छे, कि तुई इजेबेल नामेर स्त्रीक अपना बीचोत रहवा दिहिस। इडा स्त्री अपना-आपोक नबिया कोहचे, आर मोर विश्वासी लोकोक कुकरम करवार आर मूर्तिर आगुत चढ़ाल चीजलाक खवार तने सिखाछे आर उसाक भटकाछे। २१ मुई वहाक मन बदली करवार मौका दिनु, मगर वहाँय अपना कुकरम से मन बदली करवा नी चाहचे। २२ देखेक, मुई वहाक भारी बेमारीत गिराय दिमु, आर जहाँय वहार साथे कुकरम करछे, वराव अगर मन बदली नी करबे, त उसाक मुई बोड़ो बिपत्तित डाले दुम। २३ मुई उसार छुवालाक महामारी दे मारे फिकाम। तब सबला मंडली जाने लिबे कि दिल आर दिमागोक जाँच करनेवाला मुहें छी। आर मुई तुमसाक हरेकझनाक तुमसार कामेर मुताबिक सजा दुम। २४ इजेबेलेर शिक्षाक कुछुला लोक शैतानेर गहरा बात कोहचे, मुई थुआथिरा मंडलीर बाँकीला विश्वासी लोक जैला इजेबेलेर शिक्षाक नी मानछे आर नी जानछे, उसाक मुई कोहची कि मुई तुमसार पर आर

बोझ नी दुम। २५ मगर हाँ जे कुछु तोर लिकिन छे, उलाक मोर घुरे ओसवार समय तक पकड़े रोहबो। २६ जहाँय जीत हासिल करबे, आर मोर वचन मुताबिक आखरी तक चलते रोहबे, मुई वहाक सब देशेर लोकेर पर अधिकार दुम। २७ आर वहाँय बहुत शक्तिर साथे उसार पर राज करबे। जैकिसम माटीर बरतन आसानी से टूटे जाछे, वही किसम वहाँय अपना दुश्मनलाक चकनाचूर करे दिबे, जैकिसम कि मुई अपना पितार लिकिन से अधिकार पाही। २८ आर मुई वहाक भोरेर तारा दुम। २९ ध्यान दे सुनो कि परमेश्वरेर आत्मा मंडलीलाक की कोहचे।”

सरदीस मंडलीर दूतोक चिट्ठी

३ “सरदीस मंडलीर दूतोक इकिसम लिखेक: जहार लिकिन परमेश्वरेर सातटा आत्मा आर सात तारा छे, वहाँय इडा कोहचे कि ‘मुई तोर कामलाक जानछी। तुई अपना-आपोक पक्का विश्वासी देखाछिस, मगर सही माने तुई इकिसम नी छिस। १ जागिल रोह। तुई अपना-आपोक मजबूत कर क्याँकि तुई बेसी मजबूत नी छिस आर तोर शक्ति खतम होनेवाला छे। मुई तोर कोयला कामोक मोर परमेश्वरेर नजरोत पूरा नी पाछी। २ वहीलाते ख्याल करेक कि तुई की सिखीहिलो आर की सुनिहिलो। अपना पापेर काम से मन बदली करो, आर उला शिक्षार मुताबिक चलो। अगर तुई जागिल नी रोहबो, त जैकिसम चोरेर

ओसवार समय कोय नी जाने, वही किसम मुई अचुकाय तोर लिकिन ओसे जाम। आर तुई कोय हालतोत जनवा नी पारबो, कि कुनखुना तोर लिकिन ओसे जाम। ४ मगर हाँ, सरदीस मंडलीत कुछुला इकिसम लोक छे, जैला लोक अपना कपड़ा गंदा नी करे, वरा सादा कपड़ा पिन्हें मोर साथे घुरा-फिरा करबे, क्याँकि वरा इडार लायक छे। ५ जहाँय जीत हासिल करबे, उसाक उसार मान्दी सादा धक-धक कपड़ा पिन्हाल जाबे। आर मुई वहार नाम जीवनेर किताब से कोय हालतोत नी काटुम, बल्के वहार नाम अपना पिता आर वहार स्वर्गेर फरीस्तार आगुत माने लुम। ६ तुम्हरा ध्यान दे सुनो कि परमेश्वरेर आत्मा मंडलीलाक की कोहचे।”

फिलादिलफियार मंडलीर दूतोक चिट्ठी

७ “फिलादिलफियार मंडलीर दूतोक इकिसम लिखेक: प्रभु यीशु जहाँय पवित्र आर सच्चा छे, आर जहार हाथोत दाऊद राजार राजेर चाभी छे, जहार खोलाल चीजोक कोय बन्द करवा नी पारबे, आर जहार बन कराल चीजोक कोय खोलवा नी पारबे। वहाँय इकिसम कोहचे, ८ कि ‘मुई तोर कामलाक जानछी, देखेक मुई तोर आगुत एकखान दरवाजा खोले राखीही, जैखानोक कोय बन करवा नी पारबे। तोर शक्ति बहुत कम छे, मगर तुई मोर बातोक माने लिहिस। आर मोर नामेर इन्कार नी करिस। ९ देखेक, जैला लोक यहूदी नी होलोव, वरा अपना-आपोक

यहूदी बोलछे, आर झूठ बोलछे। शैतानेर सभार उला लोकोक मुई तोर बशोत करे दुम। वरा ओसे तोर पाँलात पोखे, आर वरा जाने लिबे कि मुई तोक प्रेम करिही। १० तुई धीरज धरे दुःख सहय मोर वचनडाक माने चलछिस। वहीलाते मुसीबतेर जैडा समय ओसनेवाला छे, उला समय से तोक बचाय राखुम, जैडा परीक्षार समय दुनियाँर सब लोकेर पर ओसनेवाला छे। ११ मुई जल्दी ओसनेवाला छी, जे कुछु तोर लिकिन छे, उलाक मजबूती से धरे राखेक जसे कि कोय तोर मुकुटा छिराय ना ले। १२ जहाँय जीत हासिल करबे, वहाक मुई अपना परमेश्वरेर मंदिरोत एकटा खम्मा बनाम। वहाँय आर कोयखुना बाहरे नी जाबे। आर मुई वहार पर अपना परमेश्वरेर नाम आर अपना परमेश्वरेर नगर नया यरूशलेमेर नाम लिखुम, जे नगर मोर परमेश्वरेर लिकिन से स्वर्ग से नाभबे। आर वहार पर मुई अपना नया नाम लिखुम। १३ तुम्हरा ध्यान दे सुनो कि परमेश्वरेर आत्मा मंडलीलाक की कोहचे।”

लौदीकिया मंडलीर दूतोक चिट्ठी

१४ “लौदीकिया मंडलीर दूतोक इकिसम लिखेक: प्रभु यीशु जहाँय आमीन छे, जहाँय विश्वास करवार लायक छे आर परमेश्वरेर सच्चा गवाह छे, आर जहार जरियाय परमेश्वर सब कुछु बनाहे, वहाँय इडा कोहचे कि १५ ‘मुई तोर कामलाक जानछी कि तुई ना त ठंडा छिस आर ना गरम छिस। अच्छा होलतेन अगर तुई ठंडा या गरम होलोतेन।

१६ क्यौँकि तुई उसुम-उसुम छिस- ना त ठंडा छिस ना त गरम छिस, मुई तोक अपना मुख से उगलाय फेके दुम। १७ तुई जे कोहचिस कि मुई अमीर छी, आर अमीर बने गही, आर मोक कोय चीजेर कमी नी छे। मगर तुई इडा नी जानिस कि तोर दशा कतेक खराब छे। तुई दुःखी, बेसहारा गरीब, काना आर नंगा छिस। १८ यही तने मुई तोक सलाह दिछी कि आगिनोत साफ कराल सोना मोर लिकिन से किने ले जसे कि अमीर हंय जईस, आर मोर लिकिन से सादा धक-धक कपड़ा ले ले कि उलाक पिन्हें तुई आर नंगा ना रोहिस, आर तोक लाजोत रहवा ना होय। अपना आँखोत लगवार तने दवा ले ले जसे कि तुई साफ-साफ देखवा पारिस। १९ मुई जहाक-जहाक प्रेम करछी, उसाक सभाको धमकाछी आर सजई दिछी। वहीलाते बहुत मेहनत करेक आर अपना मन बदली करेक। २० देखेक, मुई दरवाजात थाड़ो हंय खटखटाछी। अगर कोय मोर आवाज सुने दरवाजा खोले दिछे, त मुई वहार ठिन भीतरोत ओसुम आर वहार साथे खान-पान करूम, आर वहाँव मोर साथे। २१ जहाँय जीत हासिल करबे, वहाक मुई मोर साथे अपना राजगद्दीत बठाम, जैमान्दी मोह जीत हासिल करे पितार साथे वहार राजगद्दीत बोठे गही। २२ जहार कान छे वहाँय सुने लोक कि परमेश्वरेर आत्मा मंडलीलाक की कोहचे?”

૪ ઇલા ઘટનાર બાદ મુઈ સ્વર્ગોત એકખાન યોલાલ દરવાજા દેખનુ। આર તુરહીર આવાજેર માન્દી બોડો આવાજ જૈડા મુઈ પહિલે સુનિનુ, ડકિસમ આવાજોત વહાંય મોક બોલિલ, “તુઈ ઇઠિન ડપરોત ઓસ। મુઈ તોક ડલા ઘટનાક દેખામ, જૈલા ઘટના ઇલા ઘટનાર બાદ ઘટનેવાલા છે।”

૨ આર વહીખુના મોક પવિત્ર આત્મા અપના બશોત કરિલ, આર મુઈ દેખછી કિ સ્વર્ગોત એકખાન ગદ્દી રખાલ છે, આર એકઙ્ગન ગદ્દીર પર બોઠે છે, ૩ જહાંય ગદ્દીત બોઠે છિલે, વહાર રૂપ યશબ આર માણિક પત્થલેર માન્દી ચમકેછિલે। આર ગદ્દીર ચારો ધીતિ મરકત પત્થલેર માન્દી મેઘ-ધનુષ ચમકેછિલે। ૪ ડડા ગદ્દીર ચારો ધીતિ ચૌબીસટા ગદ્દી છિલે। ઇલા ગદ્દીર પર ચૌબીસઙ્ગન અગુવા સાદા ધક-ધક કપડા પિન્હેં બોઠે છિલે, આર ડસાર માથાર પર સોનાર મુકુટ છિલે। ૫ આર ડડા રાજગદ્દી સે બિજલી ચમકિલ, આવાજ હોલ આર ગરજન હોલ। આર રાજગદ્દીર આગુત આગિનેર સાતટા ચરાક જલછે, આર ઇલા પરમેશ્વરેર સાતટા આત્મા છે। ૬ આર ડડા રાજગદ્દીર આગુત શીશાર સમુન્દ્ર છિલે, જૈડા કિ ચમકેછિલે, આર રાજગદ્દીર બીચોત આર રાજગદ્દીર ચારો ધીતિ ચારટા પ્રાણી છે, જૈલાર આગુ ધીતિ આર પાછૂ ધીતિ બહુતલા આંખ છે। ૭ પહિલાડા પ્રાણી શેરેર માન્દી છે, દોસરાડા પ્રાણી બૈલેર માન્દી છે, તેસરાડા પ્રાણીર મુખ માનુષેર માન્દી છે, આર ચૌથાડા પ્રાણી બાજેર માન્દી છે, જૈડા ડડાય બેરાછે। ૮ આર ચારોડા પ્રાણીર છૌ-છૌખાન ડેના છે, આર

चारोह भीति आर भीतरी भागोत सिरिफ आँखे आँख छे। आर इडा प्राणी रात आर दिन, बिना थामे इडा कोहते रोहचे, “पवित्र-पवित्र प्रभु परमेश्वर सर्वशक्तिमान, जहाँय छिले, जहाँय छे, आर जहाँय आनेवाला छे।” ९ परमेश्वर जहाँय युग-युग तक जिन्दा छे, आर राजगद्दीर पर बोठाल छे, जैखुना इ-चारोडा प्राणी परमेश्वरेर बड़ाई, इज्जत, आर शाबासी करबे, १० उखुना चौबीसझन अगुवा लोक राजगद्दीर पर बोठाल परमेश्वरेर आगुत पोड़े जाबे, आर वहाक भक्ति करबे, जहाँय युग-युग तक जिन्दा छे। आर वरा अपना-अपना माथार मुकुट वहार राजगद्दीर आगुत राखे दिबे, आर कोहबे, ११ “हे हमसार प्रभु परमेश्वर तुहें बड़ाई आर इज्जत पवार लायक छिस। लोक तोक कोहय कि तुई शक्तिशाली छिस क्योंकि तुहें सब कुछ बनाहिस, आर उला तोहरे इच्छा से छिले, आर बनाल गहिल।”

सील-मोहर लगाल किताब

५ जहाँय राजगद्दीत बोठे छिले, वहार दहिना हाथोत एकखान किताब देखनु, जैखानेर भीतर-बहार दोनों भीति लिखाल छिले, आर उखान सातटा सील-मोहर मारे बन कराल छिले। २ फेर मुई एकझन स्वर्गेर ताकतवर फरीस्ताक देखनु, जहाँय जोर से बोलछिले, “के इडा सील-मोहरोक तोड़े इखान किताबोक खोलवार लायक छे? ३ इखान

किताबोक खोलवार या इखानोक देखवार लायक ना त कोय स्वर्गोत,
ना दुनियाँत आर ना धरतीर नीचानोत छे।” ४ वहार बाद मुई बहुत जोर
से कनवा लागनु क्याँकि इकिसम कोय नी छिले, जहाँय इखान
किताबोक खोलवार आर पढ़वार लायक छे। ५ उला अगुवा लोकेर
भीतर से एकझन मोक कोहले, “ना कानेक। देखेक, जहाक यहूदा
बंशेर शेर कहाल जाछे, आर दाऊद राजार असली वारिस छे, वहाँय
उखान किताबोक खोलवार आर उखानेर सातोडा सील-मोहरोक
तोड़वार जीत हासिल करिहे।” ६ वहार बाद मुई राजगद्दी, चारोडा
प्राणी आर अगुवालार बीचोत एकटा भेड़ार बच्चा देखनु। इकिसम कि
यहाक एक बार जान से मारे देयाल गहिले। भेड़ार बच्चाडार सातटा
सिंग छिले, आर सातटा आँख छिले, आर इला आँख परमेश्वरेर सातटा
आत्मा छे, जैलाक पूरा दुनियाँत पठाल गहे। ७ भेड़ार बच्चाडा ओसिल
आर वहार हाथ से किताबखानोक लिले, जहाँय राजगद्दीत बोठे छिले।
८ जैखुना वहाँय किताबखान लिले, उखुना उ-चारोडा प्राणी आर
चौबीसझन अगुवा उडा भेड़ार बच्चार आगुत पोड़े गेल, आर उसार हर
एकझनार हाथोत बजवार तने एकटा करे वीणा आर धुमना से जलाल
सोनार बाटी छिले, आर इला धुमना विश्वासी लोकेर प्रार्थना छे। ९ वरा
इडा नया गीत गवा लागिल, “तुई इखान किताबोक लुवार आर वहार
मोहरलाक खोलवार लायक छिस, क्याँकि तुई तोक मारा गहिलो आर

अपना खून से हरेकटा बंश, हरेकटा भाषा, दुनियाँर लोक आर हरेकटा देशेर लोकेर भीतर से परमेश्वरेर तने लोकलाक किने लिहिस। १० आर उसासे एकटा देश बनाहिस, आर हमसार परमेश्वर तने उसाक पूजारी बनाहिस आर वरा दुनियाँर लोकेर पर राज करबे।” ११ आर मुई उडा सिंहासन, उला प्राणी आर उला अगुवा लोकेर चारोह भीति बहुतला फरीस्तार आवाज सुननु, जैलार गिनती लाखो-लाख आर करोड़ो-करोड़ छिले। १२ आर वरा जोर से आवाज दे कोहचिले, “भेड़ार बच्चाडा, जहाक बलि कराल गहिले, वहीं बड़ाई, इज्जत आर महिमा पावार लायक छे। लोक वहार बारे कोहये कि वहाँय बहुत शक्तिशाली, मजबूत, धन-दौलतवाला, आर ज्ञानी छे।” १३ आर फेर मुई स्वर्गेर, दुनियाँत, दुनियाँर नीचानोत, समुन्द्र आर समुन्द्रेर सबला चीजोक कोहते सुननु, “भेड़ार बच्चाडा आर जहाँय सिंहासनेर पर बोठे छे, लोक उसार बड़ाई, इज्जत आर महिमा करोक आर कोहय कि उसार शक्ति हमेशा हमेशार तने बनाल रहोक।” १४ आर चारोडा प्राणी कोहले, “आमीन”, आर अगुवाला वहार आगुत पोड़े भक्ति करिल।

परमेश्वरेर मोहरेर भेद

६ यहार बाद मुई देखनु कि भेड़ार बच्चाडा सातटा मोहरेर भीतर से पहिलाडा सीलोक खोले दिले, आर उ-चारटा प्राणीर भीतर से पहिलाडा

प्राणी मेघेर गरजनेर मान्दी बहुत जोर से कोहले, “तुई ओसेक।” २ तब मुई देखनु कि एकटा सादा रंगेर घोड़ा निकलिल। घोड़ाडार पर एकझन बठाल छिले, आर वहार हाथोत तीर आर धनुक छिले, आर वहाक एकटा मुकुट देयाल गहिले, आर वहाँय लड़ाई जीताल छिले, आर आढ़ोह बहुतला लड़ाई जीतवार तने आगु बढते गेल। ३ वहार बाद भेड़ार बच्चाडा दोसराडा सीलोक खोलिल, त मुई दोसराडा प्राणीक कोहते सुनने, “तुई ओसेक।” ४ तब एकटा लाल रंगेर घोड़ा निकलिल। घोड़ार पर एकझन बठाल छिले, आर वहाक एकखान बोड़ो तेरवाल देयाल गहिल। आर वहाक इकिसम अधिकार देयाल गहिल कि वहाँय दुनियाडात लोकेर बीचोत शांति खतम करे दे जसे कि लोक एक-दोसराझनाक जान से मारे दे। ५ फेर वहाँय तेसराडा सीलोक खोलिल, त मुई तेसराडा जिन्दाडा प्राणीक कोहते सुननु, “तुई ओसेक।” तब एकटा काला रंगेर घोड़ा निकलिल। घोड़ाडार पर एकझन बोठाल छिले, जहार हाथोत एकखान डाँरी छिले। ६ आर मुई उ-चारोडा प्राणीर बीचोत एकटा आवाज सुननु, जैडा कोहचिले, “चार कप गोहमेर आँटार दाम एक दिनेर मजदूरीर बराबर आर १२ कप जौर आँटार दाम एक दिनेर मजदूरीर बराबर तय कर। मगर तेल आर अंगुरेर रसोक बर्बाद ना करिस।” ७ जैखुना भेड़ार बच्चाडा चौथाडा सीलोक खोलिल, त मुई चौथाडा प्राणीक कोहते सुननु, “ओसेक।” ८ तब एकटा हलदिया रंगेर

घोड़ा निकललिल। घोड़ाडार पर जहाँय बठाल छिले, वहार नाम छिले, “मौत”, आर “पाताल” वहार पीछू-पीछू जाछिले। ९ आर भेड़ार बच्चाडा जैखुना पाँचवाँडा सीलोक खोलिल, त मुई थानडार नीचान से उला लोकेर आत्माक देखनु, जैला लोक परमेश्वरेर वचनेर कारण आर परमेश्वरेर बारे बोलवार कारण से मराल गहिले। १० आर उसार आत्माला बहुत जोर से कोहले, “हे प्रभु, हे पवित्र सच्चा प्रभु, कतेक दिन तक तुई दुनियाँर लोकेर इन्साफ नी करबो आर हमसार खूनेर बदला नी लिबो?” ११ आर उसार बीच से एक-एकझनाक सादा धकधक पौशाक देयाल गेल, आर उसाक कहाल गेल कि आढ़ो कुछु दिन तक बर्दास्त करो। तुमसार साथी सेवकला आर भईला, जैला तुमसार मान्दी प्राण देनेवाला छे, जब तक उसार गिनती पूरा नी हंय जाछे, तब तक तुमसाक बर्दास्त करवा होबे। १२ आर वहाँय जैखुना छठवाँडा सीलोक खोलिल, त मुई देखनु कि एकखान बहुत भयंकर भूचाल होल, आर बेलाडा कालो कम्बलेर मान्दी कालो कुटकुट हंय गेल, आर चाँदडा खूनेर मान्दी लाल हंय गेल। १३ आर आसमानेर ताराला दुनियाँर माटीखानेर पर पोड़े गेल, जैकिसम कि बहुत बोड़ो दूनोत डुमरेर गाछ से कच्वाला फल गिरे जाछे। १४ आर आसमानडा अपना जगह से इकिसम लेपटाल गेल, जैकिसम कि कागजोक लेपटाल जाछे। आर हर एकखान पहाड़ आर टापू अपना-अपना जगह से हटे गेल। १५ आर दुनियाँर

राजाला, हाकिमला, सरदारला, ताकतवर लोकला, धनी लोकला, हरेकझन गोलाम आर हरेकझन आजाद लोक पहाड़ेर गुफालात आर पहाड़ेर चट्टानोत जाय नुकाय गेल। १६ आर पहाड़ आर चट्टानलाक जाब दे कोहबे, “हमसार पर पोड़े जाव। हमसाक वहार मुख से बचाय लव, जहाँय सिंहासनेर पर बोठाल छे, आर उडा भेड़ार बच्चार क्रोध से हमसाक नुकाय राखो। १७ क्योंकि उसार क्रोधेर भयंकर दिन ओसे गहे, आर अला उसार आगुत कोय टिकवा नी पारबो।”

परमेश्वरेर लोकेर पर परमेश्वरेर छाप

७ यहार बाद मुई फरीस्तालाक दुनियाँडार चारोडा कोनात थाड़ो रोहते देखनु। वरा चारो भीतकार हवाखानोक रोके राखिहिले जसे कि हवाखान ना त दुनियाडात, ना समुन्द्रोत आर ना कोय गाछोक नोकसान पहुँचाय। २ यहार बाद मुई आर एकटा फरीस्ताक देखनु, जहाँय परमेश्वरेर मोहर ले पूरब भीति से उठे ओसछिले, वहाँय उ-चारोझन फरीस्ताक, जैलाक दुनियाँडाक आर समुन्द्रोक नाश करवार अधिकार देयाल गहिले, उसाक जोर आवाज दे कोहले, ३ “जैखुन तक हमरा परमेश्वरेर भक्ति करनेवाला सबला लोकेर कपालोत मोहर मारे नी दिछी, उखुन तक दुनियाँर, आर समुन्द्रेर, आर गाछलार नुकसान ना करेन।” ४ आर जहार माथार पर मोहर मराल गेल, मुई उला लोकेर

गेनती सुननु, कि इजराएलेर सबला लोकेर गेनती एक लाख चौव्वालीस हजार होल। ५ यहूदार खानदानेर बारह हजार लोकेर पर मोहर मारिल। रूबेनेर खानदानेर बारह हजार लोकेर पर मोहर मारिल। गादेर खानदानेर बारह हजार लोकेर पर मोहर मारिल। ६ आशरेर खानदानेर बारह हजार लोकेर पर मोहर मारिल। नपतालीर खानदानेर बारह हजार लोकेर पर मोहर मारिल। मनश्शहरेर खानदानेर बारह हजार लोकेर पर मोहर मारिल। ७ शिमोनेर खानदानेर बारह हजार लोकेर पर मोहर मारिल। लेवी खानदानेर बारह हजार लोकेर पर मोहर मारिल। इस्साकर खानदानेर बारह हजार लोकेर पर मोहर मारिल। ८ जबूलूनेर खानदानेर बारह हजार लोकेर पर मोहर मारिल। यूसुफेर खानदानेर बारह हजार लोकेर पर मोहर मारिल। बिन्यामिन खानदानेर बारह हजार लोकेर पर मोहर मराल गेल।

बोड़ो भीड़ेर जरियाय परमेश्वरेर महिमा

९ यहार बाद मुई देखनु कि सबला देशेर, सबला खानदानेर, पूराडा दुनियाँर लोकेर आर सबला भाषार लोकेर भीतर से एकटा बोड़ो भीड़ देखा गेल, जैडाक कोय गेनवा नी पारबे। वरा सादा धकधक कपड़ा पिन्हें, आर अपना हाथोत खजूरेर ढल्ली ले राजगद्दीर आगुत आर भेड़ार बच्चाडार आगुत थाड़ो हंय छिले। १० वरा परमेश्वरेर आर भेड़ार बच्चाडार जय जय कार करे कोहचिले, “हमसार परमेश्वर जहाँय

राजगद्दीर पर बोठे छे, वहाँय आर भेड़ार बच्चाडा हमसाक बचाहे।”

११ आर सबला फरीस्ता राजगद्दीर, अगुवालार आर चारोडा प्राणीर चारोह भीति थाड़ो हंय छे। वरा राजगद्दीडार आगुत माटीत पोड़े परमेश्वरोक भक्ति करिल आर कोहले, १२ “ओसो, हमरा हमसार परमेश्वरेर बड़ाई, इज्जत, महिमा, शुकुरिया हमेशा हमेशार तने करी, आर बोली कि वहाँय हमेशा हमेशार तने शक्तिशाली, मजबूत आर ज्ञानी बने रहय। आमीन!” १३ इला बातेर बाद अगुवा लोकेर भीतर से एकझन मोक पूछिल, “सादा धकधक कपड़ा पिन्हाल इला कुन लोक छे, यरा कुनठिन से ओसिहे?” १४ मुई वहाक कोहनु, “हे मालिक तुई जानिस।” वहाँय मोक कोहले, “यरा उला लोक छे, जैला महा बिपत्ति सहवार बाद बचे ओसिहे। यरा अपना-अपना कपड़ा भेड़ार बच्चा यीशु मसीहार खून से धोय सादा करे लिहे। १५ यही तने यरा परमेश्वरेर राजगद्दीर आगुत हाजिर छे, आर हमेशा रात-दिन परमेश्वरेर मंदिरोत परमेश्वरेर सेवा करछे। आर जहाँय राजगद्दीर पर बोठाल छिले, वहाँय उसार बीचोत रोहबे आर उसाक दुश्मन से बचाबे। १६ वरा भूखा आर प्यासा नी रोहबे, आर बेलाडार तेज धूप उसार पर नी पोरेबे, आर ना गरम से उसार बदन झलसिबे। १७ क्योंकि भेड़ार बच्चा मसीहा यीशु जहाँय राजगद्दीर बीचोत छे, वहाँय उसार रखवाल होबे, आर उसार

देखभाल करबे, आर उसाक उठिन ले जाबे, जैठिन जीवन देनेवाला पानी निकलेछे, आर परमेश्वर उसार आँखेर सबला लोय मुछे दिबे।”

सातवाँडा सील

८ जैखुना भेड़ार बच्चाडा सातवाँडा सीलोक खोलिल, त स्वर्गोत आधा घंटा कोय आवाज सुनाल नी गेल, आर एकदम शान्त हंय गेल। २ वहार बाद मुई सातटा फरीस्ताक देखनु, जैला फरीस्ता परमेश्वरेर आगुत थाड़ो हंय छिले। आर उसाक सातटा शंख देयाल गेल। ३ उखुना एकटा फरीस्ता सोनार धूपदान ले ओसिल आर थानडार आगु भीति थाड़ो हंय गेल। आर वहाक बहुतला धुमना देयाल गेल, कि सबला पवित्र लोकेर प्रार्थनार साथे मिलाय सोनार थानडात चढ़ाय, जैडा थान परमेश्वरेर राजगद्दीर आगु भीति छिले। ४ फरीस्तार हाथ से धूमनार धुआँ परमेश्वरेर सबला पवित्र लोकेर प्रार्थनार साथे परमेश्वरेर सामनात उपरोत उठछिले। ५ तहार बाद फरीस्ताडा थान से आगिन ले धूपदानीडाक आगिन से भरे दिले आर धरतीर पर फेके दिले। यहार बाद मेघेर गरजन आर आवाज होल, बिजली चमकिल आर भीचाल होल। ६ आर उ सातोडा फरीस्ता जहार लिकिन सातटा शंख छिले, वरा फूँकवार तने तैयार हंय गेल। ७ पहिलाडा फरीस्ता शंख फूँकिल, आर आसमान से पत्थल आर खून मिलाल आगिन धरतीर पर पोरवा

लागिल। आर इडा से धरतीर एक तिहाई हिस्सा जले गेल, आर एक तिहाई धरतीर गाछ जले गेल, आर हरा-भरा घास-पात जले गेल।
८ दोसराडा फरीस्ता जैखुना शंख फूँकिल, त इकिसम होल कि आगिन से जलाल एकखान बहुत बोड़ो पहाड़ समुन्द्रोत फेके देयाल गेल, आर समुन्द्रेर एक तिहाई हिस्सा खून बने गेल। ९ आर समुन्द्रेर एक तिहाई जीव-जन्तु मोरे गेल, आर एक तिहाई पानी जहाज खतम हंय गेल।
१० तेसराडा फरीस्ता जैखुना शंख फूँकिल, त एकटा बहुत बोड़ो तारा जैडा कि मशालेर मान्दी जलछिले, आसमान से टूटे पोड़े गेल, आर नदीर एक तिहाई हिस्सात आर पानीर एक तिहाई सोतार पर ओसे पोड़े गेल। ११ उडा तारार नाम नागदोना छे, आर एक तिहाई पानीर हिस्सा तीतो हंय गेल, आर पानीखान तीतो हवार कारण से बहुतला लोक मोरे गेल। १२ चौथाडा फरीस्ता जैखुना शंख फूँकिल, त बेलाडार एक तिहाई हिस्सा, आर चानडार एक तिहाई हिस्सा आर तारालार एक तिहाईर पर मार पोरिल, आर बेलाडार, चानडार आर तारालार एक तिहाई हिस्सा अन्हार हंय गेल, आर दिनेर एक तिहाई हिस्सा अन्हार हंय गेल, आर दिनेर एक तिहाई हिस्सात, आर रातेर एक तिहाई हिस्सात प्रकाश नी रोहल। १३ जैखुना फेर मुई आकाशेर बीचोत बाज उड़ते देखनु, आर बहुत जोर से आवाजोत कोहते सुननु, “उ तीनडा फरीस्तार शंखेर

आवाजेर कारण, जहार फूँकना अला बाँकी छे, इ धरतीर पर रहवार लोकलार पर हाय! हाय!”

९ आर पाँचवाँडा फरीस्ता अपना शंख फूँकिल, आर मुई एकटा ताराक स्वर्ग से जमीनोत पोड़ते देखनु, आर वहाक अथाह कुआँर चाभी देयाल गेल। २ वहाँय अथाह कुआँडाक खोलिल, आर कुआँ से बहुत बोड़ो भट्ठीर मान्दी धुआँ उठिल, आर कुआँर धुआँ से बेलाडा आर आसमानडा अन्हार कुटकुट हंय गेल। ३ उखान धुआँ से दुनियाँडार पर फरींगला निकलिल, आर इला फरींगोक बिच्छुलार मान्दी शक्ति देयाल गेल। ४ उसाक कहाल गेल कि वरा दुनियाँर घासलाक नोकसान ना करे, आर ना दुनियाँर कोय हरा-भरा छोटो-बोड़ो गाछोक नोकसान करे, बल्के सिरिफ उला लोकेर नोकसान करे, जहार कपालोत परमेश्वरेर मोहर मराल नी छे। ५ उसाक उला लोकेर पर पाँच महीना तक तकलीफ दुवार अधिकार देयाल गेल, मगर उसाक जान से मरवार तने नी, बल्के उसाक तकलीफ दे। उसार तकलीफ इकिसम छिले, जैकिसम कि बिच्छु डंक मारछे। ६ आर उला दिनोत लोक मौतोक छाभबे, मगर जल्दी से मौत नी होबे, आर लोकला मोरे जवा चाहबे, मगर मौत उसार लिकिन से भागे जाबे। ७ इला फरींगेर रूप उकिसम छिले, जैकिसम कि लड़ाईर मैदानोत लड़ाई करवार तने घोड़ालाक ले जाछे। इला फरींगलार

माथालात सोनार मुकुट छिले। इसार मुखला मानुषेर मुखालार मान्दी छिले। ८ इसार चूलला स्त्रीलार चूललार मान्दी छिले। इसार दाँतला शेरेर दाँतेर मान्दी छिले। ९ वरा सिनात लोहार मान्दी मजबूत कपड़ा पिन्हें छिले, आर उसार डेनालार आवाज इकिसम छिले, जैकिसम कि लड़ाईर मैदानोत जानेवाला बहुतला रथेर आर घोड़ार आवाज होचे। १० इलार नेंगरला बिच्छुर नेंगरेर मान्दी छिले, आर नेंगरलात डंक मरवार शक्ति छिले, आर इला नेंगरोत लोकोक पाँच महीना तक कष्ट दुवार शक्ति छिले। ११ फरीस्ता जहार लिकिन अथाह कुआँर चाभी छे, वहाँय फरींगलार राजा छिले, जहाक इब्रानी भाषात अबद्दोन, आर यूनानी भाषात अपुल्लयोन कहाल जाछे। १२ पहिलाडा मुसीबत बिते गेल, आर देखेक आढ़ो दुईडा मुसीबत ओसनेवाला छे। १३ तब छटवाँडा फरीस्ता अपना शंख फूकिल, आर परमेश्वरेर आगुत जैडा सोनार थान छे, आर थानडार उ-चारोडा कोना से एकटा आवाज सुननु। १४ आवाजडा शंखवाला छटवाँडा फरीस्ताक कोहचिले, “उला चारटा फरीस्ताक छोड़े दे, जैला फरीस्ता फरात नदीर बगलोत बन्हाल छे।” १५ वहीलाते चारोझन फरीस्ताक छोड़े देयाल गेल कि वरा तीन हिस्सा लोकेर भीतर से एक हिस्साक मारे फिकाबे क्यौँकि उसाक उडा घंटार उडा दिनेर, उडा महीनार आर उडा सालेर तने रखाल गहिले। १६ मुई फौजेर गिनती सुननु। उसार घुड़सवारलार गेनती बीस करोड़ छिले। १७ आर अपना

दर्शनीत मुई घोड़ालाक आर उलार सवारलाक देखनु। सवार फौजला आगिनेर मान्दी लाल, गहरा नील रंग आर बारूदेर मान्दी पीला बुक पट्टा पिन्हाल देखनु। उलार माथाला शेरेर मान्दी छिले, आर उसार मुख से आगिन, धुआँ आर बारूद बाहर होचिले। १८ इ तीनडा मुसीबत आगिन, धुआँ आर बारूद, जैला उसार मुख से निकलेछिले, उलार कारण लोकेर तीन हिस्सार भीतर से एक हिस्सा लोक मोरे गेल। १९ घोड़ालार शक्ति उसार नेंगर आर मुखोत छिले। उसार नेंगरला माथावाला साँपेर मान्दी छिले, यहीलार जरियाय घोड़ाला लोकलाक नोकसान करछिले। २० बाँकीला लोक जैला इला मुसीबतोत नी मोरिल, वरा अपना हाथेर काम से मन बदली नी करिल, आर वरा भूतेर पूजा आर सोना, चाँदी, पीतल, पत्थल आर लकड़ीर मूर्ति पूजा करवा नी छोड़िल, जैला ना त देखछे, ना सुनछे, आर ना बेराछे। २१ वरा ना त खून करवार पाप से मन बदली करिल, ना जादू-टोन्हा, ना चुरी करवार पाप से आर ना कुकरम से मन बदली करिल।

१० यहार बाद मुई एकझन शक्तिशाली फरीस्ताक स्वर्ग से नाभते देखनु। वहाँय बदली से घेराल छिले। आर वहार माथार पर मेघ-धनुष छिले। वहार मुखखान बेलाडार मान्दी चमकेछिले आर वहार पाँला आगिनेर खम्मालार मान्दी छिले। २ वहार हाथोत एकखान छोटो किताब

छिले, जैखान खोलाल छिले। आर वहाँय अपना दहिनाखान पाँ समुन्द्रेर उपरोत राखिल आर बाँयाखान पाँ धरतीर पर राखिल। ३ जैकिसम शेर जोर से गरजेछे, वही मान्दी वहाँय जोर से आवाज दिले। वहार आवाजेर बाद मेघेर सातटा गरजन होल। ४ जैखुना मेघेर सातटा गरजन होल, उखुना मुई उला बात लिखवा चाहनु, मगर स्वर्ग से एकटा आवाजोक बोलते सुननु, “मेघेर उ सातटा गरजन से जैला बात निकलिल, उला बातोक ना लिख, आर कहाको ना बता।” ५ आर जैडा फरीस्ताक मुई समुन्द्रेर आर धरती पर अपना पाँव राखे थाड़ो देखनु, वहाँय अपना दहिनाखान हाथ स्वर्गेर भीति उठाल ६ आर बोलिल, जहाँय युग-युग तक जिन्दा छे, जहाँय स्वर्ग आर स्वर्गेर चीजलाक बनाहे, जहाँय धरती आर धरतीर चीजलाक बनाहे, जहाँय समुन्द्र आर समुन्द्रेर चीजलाक बनाहे, वहार नामे मुई कसम खाय बोलछी कि परमेश्वरेर योजना पूरा होते कोय देरी नी होबे। ७ मगर जैखुना सातवाँडा फरीस्ता शंख फूँकबे, परमेश्वरेर भेदेर बात पूरा हंय जाबे, जैकिसम कि परमेश्वर अपना सेवक नबीलाक बोलिहिले। ८ वहार बाद जैडा स्वर्ग से आवाज मुई पहिले सुनिहिनु, मोक फेर बोलिल, “जैडा फरीस्ता समुन्द्रेर आर धरती पर अपना पाँला राखे थाड़ो हंय छे, वहार हाथोत एकखान किताब खोलाल छे। तुई जा आर किताबखान ले।” ९ वहीलाते मुई फरीस्ताडार लिकिन गेनु आर उखान छोटो किताब माँगनु। फरीस्ताडा मोक कोहले,

“ले आर खा। तोक इखान किताब खवारखुना शहदेर मान्दी मीठा लागबे, मगर खवार बाद तोर पेटोत तीतो हंय जाबे।” १० मुई फरीस्ताडार हाथखान से किताबखान लिनु आर खाय लिनु। मोर मुखोत इखान शहदेर मान्दी मीठा लागिल, मगर खवार बाद मोर पेटोत तीतो हंय गेल। ११ तब मोक कहाल गेल, “तुई अलग-अलग देशेर लोकोक, अलग-अलग भाषा बोलनेवाला लोकोक, दुनियाँर लोकोक आर राजालाक जरूरी बात बता कि, की की होनेवाला छे।”

११ तहार बाद मोक एकखान लग्गा देयाल गेल। आर कोय मोक कोहले, “परमेश्वरेर मन्दिर आर मंदिरेर थानडाक नापे ले, आर भक्ति करनेवालाला सबला लोकेर गेनती करे ले। २ आर मन्दिरेर बाहरी हिस्सा छोड़े दे, उखानोक मत नाप, क्यौँकि उखान जगहोक गैर-यहूदीलाक देयाल गहे। इला गैर-यहूदी लोक बयालीस महीना तक पवित्र नगरटाक कुचलिबे। ३ मुई अपना दुईझन गवाहाक अधिकार दुम, आर वरा धोकड़ा उढ़े एक हजार दुई सौ साठ दिन तक भविष्यवाणी करबे। ४ इ-दुईझन गवाह दुईडा जैतूनेर गाछ आर दुईडा चराकदानी छे। वरा धरतीर प्रभुर सामनात थाड़ो हंय रोहचे। ५ अगर कोय उसाक हानि पहुँचवा चाहचे, त उसार मुख से आगिन निकलिबे आर उसार दुश्मनलाक भष्म करे दिबे। अगर कोय लोक उसाक हानि करवार चाहचे, त उसार मौत

यही किसम होबे।” ६ उ-दुईझन गवाहाक इकिसम अधिकार छिले कि जब तक वरा परमेश्वरेर खबर लोकोक बताबे, तब तक वरा आसमान से पानी बरसवा बन करे राखे। आर उसाक पानीखानोक खून बनवार शक्ति छिले। उसाक मन मुताबिक धरतीर पर मुसीबत अनवार शक्ति छिले। ७ जैखुना वरा सब कुछ बताय दिबे, तब उडा जानवर जैडा अथाह कुआँ से निकलिबे, आर उ-दोनोँझन गवाहर साथे लड़ी करबे, आर जानवरटा उसाक हराय दिबे आर उसाक जान से मारे दिबे। ८ उ-दोनोँझनार लाश उडा महानगरेर सड़केर पर पोड़े रोहबे। उडा नगरोक जैठिन प्रभु यीशुक क्रुसेर पर चढ़ाल गहिले, उडा नगरोक आत्मिक रूप से सदोम आर मिसर कहाल जाछे। ९ सारे तीन दिन तक हरेकटा देशेर लोक, हरेकटा भाषार लोक, आर हरेकटा खानदानेर लोक आर दुनियाँर लोक उ-दोनोँझनार लाशटाक देखते रोहबे, आर उ-दोनोँझनार लाशोक कब्रोत रखवा नी दिबे। १० धरतीर लोकला उसार मौत से खुशी मनाबे, आर एक-दोसराझनाक दान भेजबे, क्योंकि इ-दोनोँझन नबी धरतीर लोकलाक बहुत तकलीफ दिछिले। ११ साढ़े तीन दिन बाद परमेश्वरेर तरफ से साँस उसार अन्दरोत ढुकिल, आर वरा जिन्दा हंय गेल। वरा दोनोँझन गवाह थाड़ो हंय गेल, आर देखनेवाला लोकला बहुत डोराय गेल। १२ वहार बाद उसाक स्वर्ग से एकटा बहुत जोर से आवाज सुनाल गेल, आर कहाल गेल, “इठिन उपर ओसो, आर वरा दोनोँझन अपना

दुश्मनेर आगुत बादलेर साथे स्वर्ग चले गेल।” १३ उखुना एकटा बहुत बोड़ो भूचाल होल, आर नगरटार दसवाँ हिस्सा गिरे गेल। आर सात हजार आदमी मोरे गेल, आर बाँकीला लोक डोराय गेल, आर स्वर्गेर परमेश्वरेर बड़ाई करिल। १४ दोसरा मुसीबत बिते गेल, आर तेसराडा ओसनेवाला छे। १५ सातवाँडा शंख फूकाल गेल, आर स्वर्गोत बहुत जोर से आवाज हवा लागिल, आर इडा कोहचिले, “संसारेर सबला देशेर पर हमसार प्रभु आर वहार मसीहार अधिकार हंय गेल, आर वहाँय हमेशार-हमेशार तने राज करबे।” १६ आर चौबीसझन अगुवा परमेश्वरेर सामनात अपना-अपना गद्दीलात बोठे छिले, वरा हटुवा पाड़े परमेश्वरेर लिकिन भक्ति करे बोलवा लागिल, १७ “हे सर्वशक्तिमान प्रभु परमेश्वर, तुई जे छिस, आर जे छिलो, मुई तोर शुक्रिया करछी कि तुई अपना महान शक्ति से राज करवा लागलो। १८ सबला देशेर लोक गोस्सा करिल, आर उसार पर तोर क्रोध ओसे गेल। आर उडा समय ओसे गेल, कि अब मुर्दा लोकेर इन्साफ होबे, आर तोर सेवा करनेवाला नबीला, आर पवित्र लोकला इनाम पाबे आर जैला छोटो-बोड़ो लोक तोर नामेर डर करछे, वरा इनाम पाबे, आर धरतीक नाश करनेवालालाक नाश कराल जाबे।” १९ तहार बाद स्वर्गोत परमेश्वरेर मंदिरटाक खोलाल गेल, आर मन्दिरोत प्रतिज्ञार संदुक देखा दिले, आर बिजली चमकेछिले। मेघ

गरजनेर आवाज हवा लागिल। आर भूचाल होल, आर आसमान से बहुत बेसी पत्थल पोड़वा लागिल।

एकझन स्त्री आर बहुत बड़का अजगर

१२ वहार बाद स्वर्गोत एकटा बोड़ो चिन्ह देखाल गेल। एकझन स्त्रीक देखाल गेल, जहार कपड़ा बेलाडार मान्दी चमकेछिले, आर चानडा वहार पाँलार नीचानोत छिले। वहार माथात बारहडा तारार मुकुट छिले। २ आर इडा स्त्री गर्भवती छिले, आर बच्चा जनम दुवार समय हंय गहिले आर दरद से छटपटाछिले। ३ एकटा आढ़ो चिन्ह स्वर्गोत देखाल गेल। एकटा लाल रंगेर बोड़ो अजगर साँप देखनु, जहार सातटा माथा आर दसखान सिंग छिले, आर वहार माथालात सातटा मुकुट छिले। ४ वहाँय अपना नेंगरखान ने आसमानेर तारालार तीन हिस्सार अन्दर से एक हिस्सा ताराक टाने इडा दुनियाँर पर फिकाय दिले। आर उडा अजगर साँप उडा गर्भवती स्त्रीर आगुत ओसिल आर बच्चाडाक गिले लुवार तने थाड़ो होल, जैखुना स्त्री लोकटी बच्चा जनम दुवार समय होय, त उडा अजगर साँप बच्चाडाक खाय जाय। ५ स्त्री लोकटी बेटा जनम दिले, आर उडा बच्चा बहुत शक्तिर साथे सब देशेर पर राज करनेवाला छिले। ओचकाय उडा बच्चाक तुरंत उठाय स्वर्गोत परमेश्वर आर वहार राजगद्दीर आगुत पहुँचाय देयाल गेल। ६ आर उडा स्त्री सुनसान

इलाकात भागे चले गेल, आर उठिन परमेश्वरेर तरफ से वहार तने एकखान जगह तैयार कराल छिले, जसे कि एक हजार दुई सौ सैठ दिन तक वहार देखभाल कराल जाय। ७ वहार बाद स्वर्गोत लड़ाई होल। मिकाईल आर वहार फरीस्ताला अजगर साँपटार साथे लड़ाई करवार तने बाहरे गेल, आर अजगर साँपटा आर वहार फौजला मिकाईलेर साथे लड़ाई करिल। ८ मगर मिकाईल, आर वहार फरीस्ता उसाक हराय दिले, आर परमेश्वर, अजगर आर वहार सैनिकलाक स्वर्ग से निकलाय दिले। ९ तब उडा बोड़ो अजगर साँप जैडा कि पुराना साँप, दोष लगानेवाला आर शैतान कहाल जाछे, आर जहाँय पूराडा दुनियाँर लोकोक भटकाछे, वहाक आर वहार दूतलाक धरतीत गिराय देयाल गेल। १० मुई फेर स्वर्गोत जोर से बोलते सुननु, “अला हमसार परमेश्वर लोकोक बचवार तने अपना शक्ति देखाहे, आर वहाँय राज करवा चले ओसिहे, आर वहार मसीहार अधिकार प्रकट हंय गहे, क्योंकि हमसार मसीही भईलार पर रात-दिन दोष लगानेवालाक गिराय देयाल गहे। ११ परमेश्वरेर वचन जैडा वरा प्रचार करछिले, उडार जरियाय आर भेड़ार बच्चाडार खूनेर जरियाय वरा उडा साँपेर पर जय हासिल करिहे, आर इकिसम कि वरा अपना जानडाको प्यारा नी समझील, आर अपना जानडा दुवार तने तैयार छिले।” १२ यही तने स्वर्गोत रहनेवालाला! तुम्हरा खुशी मनाव। मगर हाय दुनियाँ आर समुन्द्रेर पर, क्योंकि शैतान बहुत गुस्सार साथे

तुमसार ठिन उपर से ओसिहे क्याँकि शैतान जानछे कि वहार समय बहुत कम छे। १३ जैखुना अजगर साँपटा देखिल कि “मोक दुनियाँर पर फेके देयाल गहे”, त वहाँय उडा स्त्रीडाक सतवा लागिल, जहाँय बेटाक जनम दिहिले। १४ मगर उडा स्त्रीक बाजेर बोड़ो-बोड़ो दुईखान डेना देयाल गेल, जसे कि साँपटार आगु से उड़ाय जाय आर सुनसान इलाकात पहुँचे जाय, जैठिन वहार साढ़े तीन साल तक देखभाल कराल जाबे। १५ आर अजगर साँपटा उडा स्त्रीर पीछू भीति अपना मुख से एकटा नदीर मान्दी पानी बहाल, जसे कि स्त्रीडा उखान पानीत भाँसे जाय। १६ मगर धरतीखान स्त्री लोकटीक मदद करिल। धरतीखान अपना मुखखान खोले अजगरेर मुख से बहाल पानीखानोक चुसे लिले। १७ तब अजगरटा स्त्रीडार पर गोस्सा हंय गेल, आर वहार बाँकी छुवाला जैला परमेश्वरेर हुकूम मानछिले, आर यीशुर शिक्षाक माने चलछिले, उसार साथे लड़ाई करवा गेल। १८ आर अजगरटा समुन्द्रेर बालूर पर जाय थाड़ो हंय गेल।

दुईडा जानवर

१३ आर मुई एकटा जानवरोक समुन्द्र से बाहर ओसते देखनु। उडा जानवरेर दसखान सिंग आर सातटा माथा छिले। वहार सिंगलार पर दसटा मुकुट आर उ सातोडा माथालार पर नाम लिखाल छिले, जैला

नाम से परमेश्वरेर अपमान होचिले। ^२ उडा जानवर देखते शेरेर मान्दी छिले। वहार पाँला भालूर पाँर मान्दी छिले आर मुखखान शेरेर मुखखानेर मान्दी छिले। आर अजगरटा उडा जानवरोक लोकेर पर शासन करवार तने ताकत आर अधिकार दिले। ^३ मुई देखनु कि वहार माथालार भीतर से एकटा माथार पर वहार जान लेनेवाला एकटा बोड़ो घाव छिले, मगर उडा जान लेनेवाला घाव ठीक हंय गेल। इडा देखे दुनियाँर सबला लोक आश्चर्य करवा लागिल आर जानवरटार मुताबिक चलवा लागिल। ^४ लोकला अजगरटार भक्ति करिल क्यौंकि वहाँय जानवरटाक लोकेर पर शासन करवार अधिकार दिले। आर वरा जानवरटारो भक्ति करिल आर कोहले, “इडा जानवरेर मान्दी शक्तिशाली के छे? कोय नी छे। के यहार साथे लड़ई करवा पारबे? कोय नी पारबे।” ^५ जानवरटार मुखखानोक खोले देयाल गेल जसे कि वहाँय घमंडेर बात बोले, परमेश्वरेर खिलाफ बोले आर बयालीस महीना तक लोकेर पर अपना अधिकारेर इस्तेमाल करवा पारे। ^६ वहाँय अपना मुखखान खोलिल जसे कि वहाँय परमेश्वरेर खिलाफ, परमेश्वरेर नामेर खिलाफ, परमेश्वरेर निवास जगोहर खिलाफ आर उला लोकेर खिलाफ बोले जैला स्वर्गोत रोहचे। ^७ जानवारटाक परमेश्वरेर लोकलार साथे लड़ई करवार आर उसाक हराय दुवार अधिकार देयाल गेल। आर वहाक हरेकटा खानदानेर, दुनियाँर लोकेर, हरेकटा भाषार लोकेर आर

हरेकटा देशेर लोकेर पर अधिकार देयाल गेल। ८ दुनियाँर उला लोक,
जहार नाम बलि कराल भेड़ार बच्चार जीवनेर किताबोत दुनियाँडा
बनवार समय से पहिले लिखाल नी छे, वरा उडा जानवरेर भक्ति करबे।
९ मुई तुमसाक उला बात कोहची, ध्यान दे सुनो। १० जहार तने जेलेर
सजई ठहराल गहे, वहाँय जेलोत डालाल जाबे। जहार तने तलवारेर
मौत ठहराल गहे, वहार मौत तेलवार दे होबे। वहीलाते प्रभुर लोकोक
धीरज धरे मुसीबत सहय विश्वासोत बने रहवा होबे। ११ मुई आढ़ोह एक
जानवरोक धरती से निकलिते देखनु। वहार भेड़ार सिंगेर मान्दी दुईखान
सिंग छिले, आर अजगर साँपेर मान्दी बोलछिले। १२ वहाँय पहिलाडा
जानवरेर पूरा अधिकार ले वहार बदले काम करछिले, आर दुनियाँर
लोकोक पहिलाडा जानवरेर भक्ति करवाछिले, जैडा जान लेनेवाला
घाव से अच्छा हंय गहिले। १३ वहाँय बोड़ो-बोड़ो चमत्कारेर काम
करछिले। इकिसम कि लोकेर सामनात वहाँय आसमान से आगिन
बरसाछिले। १४ उला चमत्कारेर कामेर कारण वहाक पहिला जानवरेर
बदले काम करवार तने शक्ति दिले। वहाँय दुनियाँर लोकलाक
भटकाछिले, आर कोहचिले कि जैडा जानवरोक चोट लागिहिले आर
मोरवार मान्दी हंय गहिले, वहाँय जिन्दा हंय गहे, वहार मूर्ति बनाव।
१५ दोसराडा जानवरोक पहिला जानवरेर मूर्तिडाक जिन्दा करवार
अधिकार देयाल गहिल कि उडा मूर्ति बोलवा लागे, आर जताला लोक

उडा जानवरेर मूर्तिडाक पूजा नी करबे, उसाक मारे देयाल जाबे।
१६ वहाँय छोटो-बोड़ो, धनी-कंगाल, मालिक-नौकर सभारो दहिना
हाथोत या कपालेर पर एक-एकटा छाप लुवार तने मजबूर करिल।
१७ आर जहार पर उडा जानवरेर नाम या वहार नामेर संख्यार छाप नी
रोहबे, वहाँय खरीद-बिकरी नी करवा पारबे। १८ यहीडा बातोत बुद्धि
देखा जाबे। जहार बुद्धि छे, वहाँय इडा जानवरेर संख्या गिने लोक,
क्याँकि इडा आदमीर संख्या छे। वहार संख्या ६६६ छे।

१,४४,००० लोक **१४** वहार बाद मुई देखनु कि मोर सामनात भेड़ार
बच्चा सिय्योन पहाड़ेर पर थाड़ो हंय छे, आर वहार साथे १,४४,०००
लोक छे। उसार कपालेर पर वहार नाम आर वहार पितार नाम लिखाल
छे। २ आर मुई स्वर्ग से एकटा आवाज सुननु, जैडा कि बाढ़ेर पानीर
मान्दी आर मेघेर गरजनेर मान्दी छिले। आवाज इकिसम छिले माने लव
सितार बजानेवाला बहुतला लोक एक साथ बोठे अपना-अपना सितार
बजाछे। ३ आर परमेश्वरेर सिंहासनेर सामनात, उ-चार जिन्दा प्राणीर
सामनात आर अगुवालार सामनात, वरा एकटा नया गीत गाले।
१,४४,००० लोकोक, जैलाक धरतीर लोकेर भीतर से दाम दे किनाल
गहे, उसाक छोड़े आर कोय उडा गानाक सिखवा नी पाले। ४ वरा उला
लोक छे जैला अपना-अपना जीवनडाक स्त्रीर साथे कोय गंदा काम नी

करिहे, मगर अपना-आपोक पवित्र करे राखिहे। वरा भेड़ार बच्चार पीछू-पीछू चलछिले, जैठिन-जैठिन परमेश्वरेर भेड़ा जाछिले। उसाक लोकेर बीच से किनाल गहे कि वरा परमेश्वर आर भेड़ार तने पहिलाडा फलेर मान्दी बने जाय। ५ वरा कोय किसमेर झूठ नी बोले आर उसार जीवन बेदाग छिले।

तीनडा फरीस्तार खबर

६ आर मुई एकटा फरीस्ताक आसमानेर बीचोत उड़ते देखनु, आर वहार लिकिन हमेशा हमेशार तने रहनेवालार खुश-खबरी छिले, आर वहाँय दुनियाँर हरेकटा देश, हरेकटा खानदान, हरेकटा भाषा आर दुनियाँर लोकेर लिकिन इडा खुश-खबरीर प्रचार करछिले। ७ वहाँय जोर से कोहले, “परमेश्वर से डोराव, आर वहार बड़ाई करो क्यौंकि समय चले ओसिहे कि वहाँय मानुषेर इन्साफ करबे। तुम्हरा परमेश्वरेर भक्ति करो, जहाँय आसमान, धरती, समुन्द्र आर उला जगहोक बनाहे, जैठिन से पानीर धार बोहछे।” ८ वहार बाद मुई एकटा दोसरा फरीस्ताक देखनु आर वहाँय बोलछिले, “खतम हंय गेल! महान नगर बाबूल खतम हंय गेल, जे बाबूल अपना कुकरमेर काम से दुनियाँर सबला देशेर लोकोक बर्बाद करे दिहे, माने लव कि वहाँय अपना नशावाला अंगुर-रस सभाको खिलाय दिहे। आर इला देखे परमेश्वर गोस्सा हंय गेल।” ९ वहार बाद फेर एकटा तेसरा फरीस्ता देखनु, जहाँय जोर से आवाज दिछिले,

“कोय भी अगर इडा जानवरेर भक्ति करछे, आर वहार मूर्तिर भक्ति करछे, आर अपना हाथ या कपालेर पर इडा जानवरेर छाप लिछे, १० उसार परमेश्वरेर गोस्सार मार पोरबे, माने लव कि परमेश्वर उसाक नशावाला अंगुर-रस खिलाहे, जैखान गोस्सा परमेश्वर पूरा शक्ति से कहरेर बाटीत डाले देयाल गहे। वरा परमेश्वरेर पवित्र फरीस्तालार आर भेड़ार बच्चार सामनात बारूद आर आगिनोत तरपिते रोहबे। ११ आर आगिनखानेर धुआँ जैखान उसाक तरपाछे, हमेशा हमेशार तने उठते रोहबे। जैला लोक उडा जानवरेर आर वहार मूर्तिर पूजा करिल, आर उडा जानवरेर नामेर छाप जहाँय लिछे, उसाक रात-दिन कोयखुना नी आराम मिलबे।” १२ वहीलाते परमेश्वरेर लोकोक धीरज धरे दुःख सहवा लागे, आर परमेश्वरेर हुकूमलाक माने चलवा लागे, आर यीशुर पर अपना विश्वास बनाय रखवा लागे। १३ वहार बाद मुई स्वर्ग से एकटा आवाज सुननु, “लिखे कि खुशहाल उला लोक छे, जैला लोक अला से प्रभुर पर विश्वास करे मोर गहे।” हाँ। पवित्र आत्मा कोहचे, “वरा अपना-अपना मेहनत से आराम पाबे। उसार अच्छा कामेर फल उसार साथे जाबे।”

परमेश्वरेर क्रोधेर दिन

१४ फेर मुई देखनु कि मोर सामनात एकखान सप्फा बदली छे, आर मानुषेर बेटार मान्दी एकझन सप्फा बदलीखानेर पर बोठे छे, वहार माथात सोनार मुकुट छे आर हाथोत तेज धारवाला एकखान कचिया छे। १५ एकटा आर फरीस्ता स्वर्गोत मंदिरखान से निकलिल। जहाँय बदलीखानेर पर बोठे छिले, वहाक जोर से आवाज दे कोहले, “अपना कचियाखान ले आर धरतीर पर जाय कटनी कर क्योंकि फसलला पाके गहे, आर कटनीर समय चले ओसिहे।” १६ वहीलाते जहाँय बदलीर पर बोठे छिले, वहाँय अपना कजियाखान धरतीर पर चलाल आर धरतीर पर कटनी खतम करे दिले। १७ आर फेर एकटा फरीस्ता स्वर्गोत मंदिरखान से निकलिल आर वहारो लिकिन तेज धारवाला कचिया छिले। १८ वहार बाद आर एकटा फरीस्ता थानडा से निकले ओसिल, जहार अधिकारोत आगिन छिले। जे फरीस्तार हाथोत तेज धारवाला कचिया छिले, वहाक जोर से आवाज दे कोहले, “अपना कचियाखान ले आर धरतीर पर से अंगुरेर थोकालाक काट क्योंकि यहार अंगुरला पके गहे।” १९ फरीस्ताडा अपना कचियाखान धरतीर पर चलाल आर अंगुरेर थोकालाक काटे जमा करिल, आर रस निकलुवार खादडात फेके दिले, आर इडा परमेश्वरेर कहरोक देखाछे। २० उडा खाद नगर से बाहरे छिले, वहीडात अंगुरलाक पिसाल गेल, आर जैखान खून खाद से

बहय निकलिल, उखानेर उँचाई लगभग डेढ़ मीटर छिले आर लगभग ३०० किलोमीटर बहय चले गेल।

धरतीर पर परमेश्वरेर कहर

१५ फेर मुई स्वर्गोत एकटा बोड़ो चिन्ह देखनु। मुई देखनु कि परमेश्वरेर सातटा फरीस्ता लोकोक आखरी सात मुसीबत दुवार तने तैयार छे, आर उला मुसीबतेर दुवार बाद परमेश्वरेर कहर खतम हंय जाबे। २ वहार बाद मुई शीशार एकटा समुन्द्र देखनु, जैडा आगिन से भराल छिले। जैला लोक उडा जानवरेर पर, आर जानवरटार मूर्तिर पर आर जानवरटार नामेर संख्यार पर जीत हासिल करिहिले, वरा उडा समुन्द्रेर बगलोत थाड़ो हंय छिले। उसार हाथोत वीणा छिले, जैला कि परमेश्वर उसाक दिहिले। ३ वरा परमेश्वरेर सेवक मूसा नबीर आर भेड़ार बच्चार गीत गाछिले, “हे सर्वशक्तिमान प्रभु परमेश्वर तोर काम बोड़ो आर अद्भूत छे। तुई जे युग-युग राज करछिस, तोर रास्ता सही आर सच्चा छे। ४ प्रभु! सब लोक तोसे डोराछे, आर तोर नामेर बड़ाई करबे, क्योंकि खाली तुहें पवित्र छिस। सब देशेर लोक तोर लिकिन ओसे तोर भक्ति करबे क्योंकि तोर इन्साफेर काम सब देशेर लोक देखे लिहे।” ५ वहार बाद मुई देखनु कि स्वर्गोत परमेश्वरेर मंदिरेर पवित्र जगह खोलाल छे। ६ आर देखनु कि परमेश्वरेर सातटा फरीस्ता लोकोक आखरी सात

मुसीबत दुवार तने तैयार छिले, वरा साफ आर चमकीला मखमल कपड़ा पिन्हें आर बुकोत सोनार पट्टी बान्हें पवित्र जगह से निकलिल, ७ आर उ-चारोझन जिन्दा प्राणीर बीच से एकझन उ सातोझन फरीस्ताक एक-एकटा सोनार बाटी दिले, उला बाटी युग-युग तक रहनेवाला परमेश्वरेर कहर से भराल छिले। ८ आर पवित्र जगह परमेश्वरेर महिमा आर शक्तिर कारण से धुआँ से भरे गेल। आर जब तक उ सातोझन फरीस्ता लोकेर पर उ सातोडा मुसीबत दे खतम नी करिल, तब कोय पवित्र जगहोत ढुकवा नी पारिल।

१६ फेर मुई पवित्र जगह से एकझनाक सातोडा फरीस्ताक जोर आवाज से कहते सुननु, “जाव आर परमेश्वरेर कहर से भराल सातोडा बाटीक धरतीर पर उलटाय दव।” २ इडा सुने पहिलाडा फरीस्ता अपना बाटीडाक धरतीर पर उलटाय दिले। आर जैला मानुषेर पर जानवरटार छाप छिले, आर जैला लोक जानवरटार मूर्तिडार पूजा करछिले, उसार बदनडा से एक किसमेर बहुत खराब आर तकलीफ देनेवाला फोला निकले गेल। ३ दोसराडा फरीस्ता अपना बाटीक समुन्द्रेर पर उलटाय दिले, आर पानीखान मुर्दा लोकेर खूनेर मान्दी बने गेल, आर समुन्द्रेर हरेकटा प्राणी मोरे गेल। ४ आर तेसराडा फरीस्ता अपना बाटीडाक नदीलात आर पानीर सोतार पर उलटाय दिले, आर सबला पानी खून

बने गेल। ५ जैडा फरीस्ताक, पानीर पर अधिकार छिले, उडा फरीस्ताक कहते सुननु, “हे पवित्र परमेश्वर! तुई जहाँय छिस, आर छिलो। तुई ठीक बिचार करछिस, आर तुई इडा ठीक बिचार करिहिस ६ क्योंकि इला लोक परमेश्वरेर लोकलार आर नबीलार खून बहाहिले, आर तुई उसाक खवार तने खून दिलो, क्योंकि यरा यहीडार लायक छे।” ७ यहार बाद मुई थानडा से इडा आवाज सुननु, “हाँ, हे सर्वशक्तिमान प्रभु परमेश्वर तोर फैसला ठीक आर सच्चा छे।” ८ चौथाइन फरीस्ता अपना बाटीडाक बेलाडार पर उलटाय दिले, आर बेलाडाक अधिकार देयाल गेल कि बेलाडा अपना गरम से लोकलाक झलसाय दे। ९ आर लोकला बेलाडार गरम से झलसे गेल, आर वरा परमेश्वरेर नामेर खिलाफ बोलिल, जे परमेश्वरेर लिकिन इला सबला मुसीबतेर अधिकार छे। आर वरा ना त अपना मन बदली करिल, आर ना परमेश्वरेर नामेर बड़ाई करिल। १० आर पाँचवाँडा फरीस्ता अपना बाटीडाक उडा जानवरेर गद्दीर पर उलटाय दिले, आर जानवरटार राजोत अन्हार छाय गेल, आर वहार लोकला तकलीफेर मारे जोर से अपना जीभाडा कमरवा लागिल। ११ आर घाव आर दरदेर कारण वरा स्वर्गेर परमेश्वरेर खिलाफ बोलिल, आर वरा अपना बुराईर काम से मन नी बदलील। १२ छटवाँडा फरीस्ता अपना बाटीडाक बहुत बोड़ो फरात नदीर पर उलटाय दिले, आर नदीडार पानीखान सुखाय गेल, आर पूरब भीतकार

राजालार तने रास्ता बने गेल। १३ आर मुई उडा अजगर साँपेर मुख से, आर उडा जानवरेर मुख से आर उडा झूठा नबीर मुख से तीनडा बुरा आत्माक बेंगलार मान्दी निकलिते देखनु। १४ उला आत्मा चमत्कारेर काम करछिले, आर पूराडा दुनियाँर राजालार लिकिन जाय, उसाक जोड़ो करछिले कि वरा सर्वशक्तिमान परमेश्वरेर महान बिचारेर दिनोत परमेश्वर खिलाफ लड़ाई करे। १५ “देखो, जैकिसम चोर बिना बताय ओसछे, वही किसम मुई तुमसार लिकिन ओसमु। खुशहाल वरा छे, जहाँय जागिल रोहबे, आर अपना कपड़ाला तैयार राखबे, जसे कि वहाँय नांगटे ना बेराय आर शरमोत नी पोड़े।” १६ आर उला आत्मा राजालाक उखान जगहोत जोड़ो करबे, जैखान जगहोक इब्रानी भाषात हरमोगिदोन कहाल जाछे। १७ आर सातवाँडा फरीस्ता अपना बाटीडाक हवाखानोत उलटाय दिले, आर मंदिरेर राजगद्दी से जोर से एकटा आवाज दे कहते सुनाल गेल, “पूरा हंय गेल।” १८ तहार बाद मेघेर गरजन आर आवाज होल, बिजली चमकिल आर बहुत बड़का भीचाल होल। जते दिन से मानुष दुनियाँर पर रोहचे, इकिसम बोड़ो भीचाल दुनियाँत कभी नी होय। १९ बोड़ो शहर बाबूलेर तीनडा हिस्सा हंय गेल, आर हरेकटा देशेर नगरला पोरे गेल, आर परमेश्वर उ बोड़ो बाबूल नगरेर बुरा कामलाक ख्याल करिल आर वहार पर अपना गोस्सार मार मारिल, माने लव कि परमेश्वर नशावाला अंगुर-रस से बाबूलोक खिलाय दिले,

२० आर हर एकटा टापू गायब हंय गेल, आर पहाड़लार पता नी चलिल।
२१ आर आसमान से लोकेर पर एक-एक मनेर पत्थलला पोड़िल। आर
इडा मुसीबत बहुत भयंकर छिले। वहीलाते लोकला पत्थलेर कारण से
परमेश्वरेर खिलाफ बोलिल।

१७ जे सातझन फरीस्तार लिकिन उ सातटा बाटी छिले, उसार बीच से
एकझन मोर लिकिन ओसिल आर कोहले, “ओस। मुई तोक उडा बोड़ो
बेश्यार सजई देखामु, जहाँय समुन्द्रेर पर बोठे रोहचे। २ यहार साथे
दुनियाँर राजाला कुकरम करिल, आर दुनियाँर लोकला वहार साथे
इकिसम कुकरम करिहे, माने लव कि वहाँय लोकलाक अपना
नशावाला अंगुर-रस खिलाय नशाखोर बनाय दिहे।” ३ तब फरीस्ताडा
मोक एकखान सुनसान इलाकात ले ओसिल। उखुना मुई पवित्र
आत्मार वशोत छिनु। आर मुई देखनु कि एकटा स्त्री एकटा खोब लाल
रंगेर जानवरेर पर बठाल छे। जानवरटार सातटा माथा आर दसखान
सिंग छिले, आर जानवरटार पूराडा बदनोत बहुतला नाम लिखाल छिले,
जैला नाम से परमेश्वरेर अपमान होचिले। ४ उडा स्त्री बैगनी आर खोब
लाल रंगेर कपड़ा पिन्हाल छिले। आर वहाँय सोना, कीमती पत्थल आर
मोती से सजाल छिले। वहार हाथोत एकटा सोनार बाटी छिले, जैडा
घिणवाला काम से आर कुकरमेर गंदा काम से भराल छिले। ५ वहार

कपालोत एकटा नाम लिखाल छिले, जहार भेद कहाको पता नी। जैडा नाम छिले, “मुई शक्तिशाली बाबूल छी। मुई पूरा दुनियाँर बेश्यालार माँ, आर सब घिणवाला जिनिसेर माँ छी।” ६ मुई देखनु कि उडा स्त्री परमेश्वरेर लोकलार खून, आर जैला लोक यीशुर बारे बताछिले, उसार खून खाय मतवाली हंय गहे। जैखुना मुई वहाक देखनु, मुई ताज्जुब करवा लागनु। ७ यहार बाद उडा फरीस्ता मोक कोहले, “तुई क्याँ ताज्जुबोत पोड़े गेलो? मुई तोक इडा स्त्रीर, आर उडा सात माथावाला आर दस सिंगवाला जानवरेर भेदेर बारे बताछी। ८ आर जैडा जानवरोक तुई देखलो, जहाँय पहिले जिन्दा छिले, अला नी छे, मगर वहाँय अथाह कुआँ से निकलिबे आर नाश हंय जाबे। आर दुनियाँर उला लोक, जहार नाम दुनियाँडा बनवार समय से जीवनेर किताबोत लिखाल नी छे, वरा इडा जानवरोक ओसते देखबे, त चकित हंय जाबे क्याँकि जानवरटा पहिले छिले, आर अला नी छे, फेर ओसबे। ९ अला जैला बात बोलाल जाबे, इला बातोक बुझवार तने बुद्धिर जरूरी छे। उ सातटा माथा सातखान पहाड़ छे, जैलार पर उडा स्त्री बोठे छे। १० उ सातटा माथा सातझन राजाव छे, उलार भीतर से पाँचझन राजा खतम हंय गहे आर एकझन अला राज करछे, आर एकझन राज करवार तने अभी तक नी ओसे, आर जैखुना वहाँय ओसबे, त वहाँय बेसी समय राज नी करबे। ११ जैडा जानवर पहिले छिले आर अला नी छे, यहाँय आठवाँ राजा छे,

मगर यहाँय उला सातोझनार भीतर से निकलिहे, यहारो नाश निश्चित छे। १२ जे दसखान सिंग देखलो। उला दसझन राजा छे, जैला अभी तक राज करवार अधिकार नी पाय, मगर इसाक अधिकार मिलनेवाला छे, आर यरा इडा जानवरेर साथे सिरिफ एक घंटार तने राज करवार अधिकार पाबे। १३ यरा सबकोय एक मन हंय जाबे, अपना-अपना शक्ति आर अधिकार उडा जानवरोक दिबे। १४ वरा भेड़ार बच्चाडार साथे लड़ाई करबे, मगर भेड़ार बच्चाडा उसार पर जीत हासिल करबे, क्योंकि वहाँय सबला मालिकेर बीचोत सबसे बोड़ो मालिक छे, आर सबला राजार बीचोत सबसे बोड़ो राजा छे, आर जैला लोकोक बुलाल गहे, आर चुनाल गहे, आर जैला लोक प्रभुर पर अपना विश्वास बनाय राखिहे, वरा भेड़ार बच्चाडार साथे छे, आर वराव जीत हासिल करबे।” १५ फेर फरीस्ताडा मोक कोहले, “जैला समुन्द्र तुई देखलो। जहार पर बेश्याडा बोठे छे, उला दुनियाँर लोक, हर देशेर लोकेर आर हर भाषार लोकेर भीड़ छे। १६ जे दसखान सिंग तुई देखलो, उला आर जानवरटा उडा बेश्या से घिण करबे, वहार सब कुछ खतम करे दिबे, वरा वहाक नंगा करे दिबे, आर वहार मांस खाय जाबे, आर वहाक आगिनोत जलाय दिबे। १७ आर जब तक परमेश्वरेर वचन पूरा नी होचे, परमेश्वर अपना मकसद पूरा करवार तने उ दस राजार मनोत इच्छा दिहे कि वरा एक मन हंय अपना-अपना अधिकार उडा जानवरोक दे दे। १८ उडा स्त्री

जहाक तुई देखलो। उडा एकटा बहुत बोड़ो नगर छे, जहाँय इडा धरतीर राजालार पर राज करछे।”

१८ वहार बाद मुई आर एकटा फरीस्ताक स्वर्ग से नाभते देखनु। वहार लिकिन बहुत अधिकार छिले। वहार चमक से धरती चमकेछिले।
२ फरीस्ताडा जोर से आवाज दे कोहले, “खतम हंय गेल! महान नगर बाबूल खतम हंय गेल, उडा नगर भूत-प्रेतेर अड्डा बने गेल आर सब किसमेर नापाक आर घिणवाला चिड़ियार बसेरा बने गेल ३ आर दुनियाँर सब देशेर लोकला वहार साथे कुकरम करिहे। माने लव कि वरा वहार नशावाला अंगुर-रस खाय मतवाला हंय गहे आर इला देखे परमेश्वर गोस्सा हंय गेल। सब देशेर राजाला वहार साथे कुकरम करिहे, धरतीर सौदागरला वहार भोग-विलासेर जिन्दगीर कारण धनी बने गहे।”
४ वहार बाद मुई फेर स्वर्ग से एकटा आवाज सुननु, “मोर लोकला तुम्हरा बाबूल से बाहर निकले ओसे, जसे कि तुम्हरा वहार पापेर भागी ना बनेन आर ना तुम्हरा वहार कोय मुसीबतेर भागी बनेन ५ क्योंकि वहार पाप जमा होते-होते स्वर्ग पहुँचे गहे आर परमेश्वर वहार हरेकटा बुराई देखिहे। ६ वहार साथे वही किसम व्यवहार कराल जाबे, जैकिसम वहाँय करिहे वहार बुराईर कामेर तने वहाक दुईगुना सजा मिलबे। अपना बाटी से जैखान मोद लोकोक खिलाहिले, वहार अपना बाटी से

वहाक दुईगुना मोद खिलाल जाबे। ७ वहाँय जताखान अपनार तने बड़ाई आर भोग-बिलास करिल, वहाक अताखान दुःख-तकलीफ देयाल जाबे क्यौँकि वहाँय अपना मनोत घमंड करे कोहचे, ‘मुई कोय राँरी नी छी आर ना मोक कोय बातेर दुःख छे। मुई त रानी बने लोकेर पर शासन करछी। ८ मगर वहार पर एक दिनोत मुसीबत पोड़बे आर मौत, शोक आर आकाल पोरबे, वहाक आगिनोत जलाय देयाल जाबे, क्यौँकि वहार बिचार करनेवाला प्रभु परमेश्वर सर्वशक्तिमान छे।’” ९ वहार बाद दुनियाँर राजाला जैला वहार साथे कुकरम करछिले, आर वहार साथे भोग-बिलास आर मजा उठाछिले, जैखुना देखबे कि वहाक जलाय देयाल जाछे, त वरा वहार तने कानबे आर बहुत दुःख मनाबे। १० राजाला वहार तकलीफ देखे डोराबे आर दूरोत थाड़ो हंय बोलबे, “हे शक्तिशाली बाबूल! हाय तोर पर! एक पलकोत तोक सजा मिले गेल।” ११ दुनियाँर सौदागरला वहार तने कानबे आर दुःख मनाबे, क्यौँकि कोय लोक उसार समानलाक नी किनछिले। १२ जैला जिनिसेर वरा व्यापार करछिले, उला जिनिस छिले: सोनार, चानीर, कीमती पत्थरेर, मोतीर, मखमलेर कपड़ा, बैगनी रंगेर कपड़ार, गहरा लाल रंगेर कपड़ा, रेशमी कपड़ा, हर किसमेर मोहकाल लकड़ी, हाथीर दाँतेर जिनिस, कीमती लकड़ीर सामान, पीतलेर सामान, लोहार सामान आर संगमरमेर बनाल सामान, १३ दालचीनी, मसाला, अगरबत्ती, मोहकाल

तेल, धुमना, मोद, तेल, अच्छा आँटा, गोहम, गाय, बैल, भेड़, घोड़ा, रथ
आर गोलाम लोकला। १४ सौदागरला बोलबे, “जैला अच्छा-अच्छा
जिनिस तुई चाहचिलो, उला सबला जिनिस तोसे दूर हंय गहे। तोर सब
किसमेर भोग-बिलास तोर लिकिन से हमेशार तने खतम हंय गहे, आर
कोयखुना उला तुई नी पाबो।” १५ आर उला जिनिसेर सबला सौदागर,
जैला बाबूलेर कारण धनी हंय गहिले, वरा वहार तकलीफ देखे डोराबे
आर डोरे दूरोत थाड़ो हंय कानबे, आर शोक करबे आर बोलबे, १६ “हे
शक्तिशाली बाबूल शहर! हाय तोर पर! तुई बैगनी रंगेर कपड़ा, खोब
लाल रंगेर कपड़ा आर मखमल कपड़ा पिन्हछिलो, तुई सोना, कीमती
पत्थल आर मोती से सजाल रोहछिले। १७ एक पलकोत तोर अपार
धन-सम्पति बर्बाद हंय गेल। हर एकझन कप्तान आर सफर करनेवाला
आर जहाजोत काम करनेवाला घटवाल आर समुन्द्रेर व्यापारीला
सबकोय दूरोत थाड़ो हंय रोहबे, १८ आर नगरटार जोलवार धुआँखान
देखे चिल्लाय कोहबे, ‘कुनडा नगर इडा बोड़ो नगरेर मान्दी छे?’ १९ इडा
देखे वरा अपना-अपना माथात धुला दिबे, आर कानबे, आर शोक करबे
आर कोहबे, ‘हाय! हाय! इडा बोड़ो नगर जहार धन-सम्पति से समुन्द्रेर
सबला जहाजवाला धनवान बने गहिले, मगर वरा एक पलकोत बर्बाद
हंय गेल।” २० हे स्वर्ग आर हे परमेश्वरेर लोकला आर मसीह-दूतला
आर नबीला तुम्हरा वहाक देखे खुशी मनाव, क्योंकि परमेश्वर वहार

बिचार करे वहार लिकिन से तुमसार बदलालिहे। २१ फेर एकटा फरीस्ता एकटा बोड़ो जाँतार चक्कीडार मान्दी एकखान पत्थलोक उठाल, आर समुन्द्रोत फेके कोहले, “यही किसम बोड़ो नगर बाबूल बोड़ो शक्तिर जरियाय गिराय देयाल जाबे आर वहार आर कोय पता नी चलबे। २२ वीणा बजानेवालालार आर बाँसी बजानेवालार आर शंख फूँकनेवालार आवाज आर कभी तोर भीतरोत फेर सुनाल नी जाबे। कोय कारीगर तोर भीतरोत फेर नी मिलबे। कोय चक्की मीलेर आवाज तोर भीतरोत फेर सुनाल नी जाबे। २३ आर चराकेर रोशनी तोर भीतरोत आर कोयखुना फेर नी जलबे। आर दूल्हा आर कैनार आवाज तोर भीतरोत कोयखुना फेर सुनाल नी जाबे। तोर सौदागरला दुनियाँर भीतरोत नामी छिले। तोर जादूगरला सब देशेर लोकोक ठगेछिले। २४ नबी आर परमेश्वरेर लोकलाक आर दुनियाँर जातेर लोकोक मारे देयाल गहे, उसार खून वहारे भीतरोत पाल जाबे।”

स्वर्गोत परमेश्वरेर बड़ाई

१९ यहार बाद मुई स्वर्गोत एकटा बोड़ो भीड़ोक जोर से बोलते सुननु, “परमेश्वरेर बड़ाई होक। परमेश्वर बचानेवाला छे आर वहाँय सर्वशक्तिमान छे, वहार बड़ाई होक। २ क्योंकि परमेश्वरेर फैसला सच्चा आर ठीक छे। वहाँय उडा बोड़ो बेश्यार बिचार करिल, क्योंकि

वहाँय अपना कुकरम से दुनियाँर लोकोक पाप कराछिले। वहीलाते परमेश्वर वहार लिकिन से अपना भक्तेर खूनेर बदला लिले।” ३ फेर दोसरा बार वरा जोर से बोलिल, “परमेश्वरेर बड़ाई होक। बाबूल शहरेर जलवार धुआँ हमेशार तने उठते रोहबे।” ४ उखुना चौबीसझन अगुवा आर चारोडा जीवित प्राणी हटुआ पारे परमेश्वरेर भक्ति करिल, जहाँय सिंहासनेर पर बोठे छिले, आर कोहले, “हे प्रभु! तोर बड़ाई होक।” आमीन। ५ यहार बाद राजगद्दीडा से एकटा आवाज निकलिल, “तुम्हरा जहाँय परमेश्वरेर सेवा करछेन आर परमेश्वर से डोराछेन, छोटो कि बोड़ो, तुम्हरा सबकोय परमेश्वरेर बड़ाई करो।” ६ फेर मुई एकटा बोड़ो भीड़ेर आवाजेर मान्दी एकटा आवाज सुननु, जैडा आवाज बहुत जोर से बहनेवाला नदीर पानीर मान्दी आर मेघेर गरजनेर मान्दी छिले। आवाजडा से सुनाल जाछिले, “परमेश्वरेर बड़ाई होक, क्योंकि सर्वशक्तिमान प्रभु परमेश्वर लोकेर पर राज करछे। ७ ओसो, हमरा सबकोय खुशी मनाई आर खुशी से वहार बड़ाई करी, क्योंकि भेड़ार बच्चार ब्याहर समय ओसे गहे, आर वहार कैना अपना-आपोक सजाय लिहे। ८ वहाक साफ आर चमकीला महीन मखमलेर कपड़ा पिन्हवार अधिकार देयाल गहे।” क्योंकि उखान महीन मखमलेर मतलब छे, परमेश्वरेर लोकेर धर्मेर काम। ९ यहार बाद स्वर्गेर फरीस्ता मोक कोहले, “इडा बात लिखेक। खुशहाल वरा छे, जहाँय भेड़ार बच्चार ब्याह खवार

तने निमंत्रण पाहे।” वहाँय फेर मोक कोहले, “इला वचन परमेश्वरेर सच्चा बात छे।” १० यहार बाद वहाक भक्ति करवार तने मुई वहार पाँलात पोड़े गेनु। वहाँय मोक कोहले, “देखेक, तुई इकिसम ना करेक। मुई तुमसार मान्दी आर तुमसार भईलार मान्दी परमेश्वरेर सेवक छी, जैला यीशुर बारे लोकोक बताछे। तुई सिरिफ परमेश्वरोक भक्ति करेक।” क्यौँकि जे आत्मार जरियाय नबीला भविष्यवाणी करछिले, वही आत्मार जरियाय यीशु मसीहार बारे लोकोक बताल जाछे।

यीशु सबसे बोड़ो राजा

११ मुई फेर देखनु कि स्वर्ग खोलाल छे, आर एकटा सादा रंगेर घोड़ा छे, आर घोड़ाडार पर एकझन बठाल छे, वहार नाम विश्वासयोग्य आर सच्चा छे। आर यहाँय सही-सही इन्साफ करछे आर लड़ई करछे। १२ वहार आँखला आगिनेर मान्दी धधकेछिले, आर वहार माथार पर बहुतला मुकुट छिले। वहार पर एकटा नाम लिखाल छे, जैडा नामोक वहार अलावा आर कोय जनवा नी पारबे। १३ वहार कपड़ाला खूनोत डुबाल छिले। आर वहार नाम परमेश्वरेर वचन छे। १४ स्वर्गेर सेनाला सादा रंगेर घोड़ार पर बोठे सादा आर साफ मखमलेर कपड़ा पिन्हें वहार पीछू-पीछू जाछे। १५ देश-देशेर लोकोक पर जीत हासिल करवार तने वहार मुख से एकखान धारवाला तेरवाल निकलेछे। वहाँय बहुत शक्तिर साथे उसार पर राज करबे। वहाँय खादोत अंगुरलाक खीचे-खीचे लोकेर

पर सर्वशक्तिमान परमेश्वर भयानक क्रोधोक देखाबे। १६ जांघेर पर वहार कपड़ाखानोत लिखाल छे, सबला राजार बीचोत सबसे बोड़ो राजा छे आर मालिकलार बीचतो सबसे बोड़ो मालिक छे। १७ वहार बाद मुई देखनु कि एकटा फरीस्ता बेलाडार पर थाड़ो हंय छे। आर बहुत उपरोत आसमानोत चिड़ियाला उड़ाछिले। फरीस्ताडा चिड़ियालाक जोर से आवाज दे कोहले, “तुम्हरा परमेश्वरेर बोड़ो भोज खवार तने ओसो १८ जसे कि तुम्हरा राजालार, हाकिमलार, सरदारलार, घोड़ालार आर घुड़सवारलार, सब लोकेर, आजाद आर गोलाम लोकेर, छोटो आर बोड़ो लोकेर सभारो मांस खवा पारेन।” १९ मुई फेर उडा जानवरोक, दुनियाँर राजालाक आर उसार फौजलाक उडा घोड़ार सवार आर वहार फौजलार साथे लड़ई करवार तने जोड़ो होते देखनु। २० उडा जानवर आर वहार साथे उडा झूठा नबीक धराल गेल, जहाँय जानवरटार तने इकिसम चमत्कार देखाहिले कि उलार जरियाय उला लोकोक भटकाय दिले, जहार पर उडा जानवरेर छाप छिले आर वरा वहार मूर्तिर पूजा करछिले। यरा दोनोंझनाक जिन्दा हालतोत उडा आगिनेर समुन्द्रोत फेके देयाल जाबे, जैडा बारूद से जलते रोहचे। २१ बाँकीला फौजोक घुड़सवारेर मुख से निकलाल तेरवाल दे मारे देयाल गेल। उला लोकेर मांसला खाय चिड़ियालार पेट भरे खाले।

एक हजार साल तक राज

२० तहार बाद मुई एकटा फरीस्ताक स्वर्ग से नाभते देखनु, वहार हाथोत अथाह कुआँर चाभी आर एकखान बोड़ो जंजीर छिले। २ उडा अजगर जहाक पुराना साँप, दोष लगानेवाला आर शैतान कहाल जाछे, फरीस्ताडा वहाक धरिल, आर एक हजार सालेर तने जंजीर दे बान्हे दिले, ३ आर वहाक अथाह कुआँत गिराय दिले, आर कुआँडार मुखखानोक बन करे दिले। आर उडार पर मोहर लगाय दिले जसे कि दोष लगानेवाला हजार साल तक देश-देशेर लोकोक ना भटकाय। हजार सालेर बाद वहाक कुछु समयर तने छोड़ना जरूरी छे। ४ वहार बाद मुई राजगद्दीर पर लोकलाक बोठाल देखनु, आर उसाक फैसला करवार अधिकार देयाल गेल। मुई उसार आत्मालाक देखनु, इसार माथालाक यीशु मसीहार बारे बतवार कारण से आर परमेश्वरेर वचन बतवार कारण से काटे देयाल गहिले। यरा ना त उडा जानवरेर आर ना वहार मूर्तिडार पूजा करिहिले, आर ना त वहार छापटा अपना कपालोत आर ना हाथोत लगाहिले। वरा जिन्दा हंय मसीहार साथे एक हजार साल तक राज करते रोहोल। ५ इडा पहिला बार छे जब मुर्दा लोक जिन्दा हंय उठिहे। आर जब तक एक हजार साल पूरा नी होल, तब तक बाँकी मराल लोकला जिन्दा हंय नी उठबे। ६ खुशहाल आर पवित्र वरा छे, जहाँय पहिला बार जिन्दा हंय उठनेवाला लोकलार साथे भागीदार

होबे। इकिसम लोकेर पर दोसरा मौतेर कोय अधिकार नी होबे। मगर वरा परमेश्वर आर मसीहार पूजारी होबे, आर मसीहार साथे एक हजार साल तक राज करबे।

शैतानेर हार

७ जैखुना एक हजार साल पूरा हंय जाबे, त शैतानोक कैद से छोड़े देयाल जाबे। ८ शैतान दुनियाँर चारो भीतकार देशेर लोकोक भटकाबे। जैला देशोक गोग आर मागोक कहाल जाछे। उला लोकेर गेनती समुन्द्रेर बालूर मान्दी छे। शैतान उसाक लड़ाई करवार तने एकठिन जोड़ो करबे। ९ वरा पूराडा दुनियाँत फैले जाबे। वरा प्रिय नगरोक घेरे लिबे, जैठिन परमेश्वरेर लोकला रोहचे। तब परमेश्वर स्वर्ग से आगिन बरसाय उसाक भष्म करे दिबे। १० आर लोकोक भटकानेवाला शैतानोक आगिन आर बारूदेर समुन्द्रोत फेके देयाल गेल, जैडा समुन्द्रोत उडा जानवर आर झूठा नबीडा रोहबे। वरा युग-युग तक रात आर दिन तकलीफ से छटपटाते रोहबे।

सब मुर्दा लोकेर बिचार

११ वहार बाद मुई देखनु कि सादा रंगेर एकटा बोड़ो सिंहासनेर पर एकझन बठाल छे। वहार आगु भीति से दुनियाँडा आर आसमानडा भागे गेल आर गायब हंय गेल। १२ मुई फेर देखनु कि छोटो-बोड़ो सबला

मराल लोक जिन्दा हंय सिंहासनेर आगु भीति थाड़ो हंय छे, आर कुछुला किताब खोलाल गेल। आर फेर एकखान किताब खोलाल गेल, जैखान कि “जीवनेर किताब” छे। इला किताबोत जैमान्दी लिखाल छिले, वही मान्दी उसार कामेर मुताबिक मोराल लोकलार इन्साफ कराल गेल।
१३ समुन्द्र से मराल लोक सिंहासनेर आगुत ओसिल। “मौत आर पाताल” से मराल लोक सिंहासनेर आगु भीति थाड़ो होल आर उसार कामेर मुताबिक उसार इन्साफ होल। १४-१५ आर जहार जहार नाम जीवनेर किताबोत लिखाल नी मिलिल, उसाक आगिनेर समुन्द्रोत फेके देयाल गेल, इडा आगिनेर समुन्द्र दोसरा मौत छे। बहार बाद मौत आर पातालोक आगिनेर समुन्द्रोत फेके देयाल गेल।

नया यरूशलेम

२१ फेर मुई नया आसमान आर नया धरती देखनु, क्याँकि पहिलाडा आसमान आर पहिलाडा धरती खतम हंय गेल, आर समुन्द्रो नी रोहिल।
२ मुई पवित्र नगर यरूशलेमोक परमेश्वरेर लिकिन स्वर्ग से नाभते देखनु। आर यरूशलेम शहर कैनार मान्दी सजाल छिले, जहाँय अपना दूल्हार तने साजे-पाटे तैयार हंय छिले। ३ मुई फेर राजगद्दी से कहाको जोर से कोहते सुननु, “देखेक, अला परमेश्वरेर घर मानुषेर बीचोत छे। परमेश्वर उसार साथे छे, आर वरा परमेश्वरेर लोक होबे, आर परमेश्वर

खुद उसार साथे रोहबे, आर वहाँय उसार परमेश्वर होबे। ४ परमेश्वर उसार आँखेर लोयला मुछे दिबे, आर यहार बाद आर मौत नी रोहबे। आर ना कोय शोक करबे, ना कोय कानबे, आर ना तकलीफ रोहबे। पहिलकार सबला बात खतम हंय जाबे।” ५ जहाँय राजगद्दीर पर बोठे छिले, वहाँय कोहले, “देखेक, मुई सब कुछ नया करे दिछी।” वहाँय फेर कोहले, “लिख क्याँकि इला बात सच छे, आर विश्वास करवार लायक छे।” ६ वहाँय फेर मोक कोहले, “इला बात पूरा हंय गहे। मुई अलफा आर ओमेगा, याने शुरू आर आखरी छी। मुई प्यासा लोकोक जीवन देनेवाला पानीर सोता से पानी खिलाम, जैखान पानीर तने उसाक कोय दाम दुवा नी होबे। ७ जहाँय जीत हासिल करबे, वहीं इला चीजेर हकदार होबे, आर मुई उसार परमेश्वर होमु, आर वरा मोर बेटा-बेटी होबे। ८ मगर डरपोक, अविश्वासी, गंदा काम करनेवाला, जान मारनेवाला, कुकरम करनेवाला, जादू-टोना करनेवाला, मूर्ति पूजा करनेवाला आर सब किसमेर झूठ बोलनेवालार रहवार जगह आगिन आर बारूद से जलनेवाला समुन्द्र छे। आर इडा दोसरा मौत छे।” ९ फेर जैला सातटा फरीस्तार लिकिन सात किसमेर मुसीबत से भराल सातटा बाटी छिले, उसार बीच से एकझन फरीस्ता मोर लिकिन ओसिल, आर मोर साथे बात करे कोहले, “इधर ओसेक मुई तोक एकझन कैनाक देखाछी, जहाँय भेड़ार बच्चाडार पत्नी छे।” १० तब उडा फरीस्ता मोक

आत्मार जरियाय एकखान बोड़ो आर ऊँचा पहाड़ेर पर ले गेल, आर पवित्र नगर यरूशलेमोक परमेश्वरेर लिकिन स्वर्ग से नीचानोत नाभते देखाल गेल। ११ यरूशलेम शहर परमेश्वरेर रोशनी से चमकेछिले। आर वहार चमक बहुत कीमती यशब पत्थलेर मान्दी छिले, जहार आर-पार देखा जाछिले। १२ यरूशलेम शहर मजबूत ऊँचा देवाल से घेराल छिले, जहार बारहखान फाटक छिले। फाटकलार पर बारहडा फरीस्ता छिले, आर उला फाटकेर पर इजराएली लोकेर बारहडा बंशेर नाम लिखाल छिले। १३ देवालखानेर पूरब भीति तीनखान फाटक, उत्तर भीति तीनखान फाटक, आर तीनखान फाटक दक्खिन भीति, आर तीनखान फाटक पश्चिम भीति छिले। १४ जैखान देवाल यरूशलेम शहरोक घेरे राखिहिले, उखानेर बारहडा नेंव छिले, आर उलार पर भेड़ार बच्चाडार बारह मसीह दूतेर नाम लिखाल छिले। १५ जहाँय मोर साथे बात करछिले, वहार लिकिन नगर आर वहार फाटकलार आर वहार घेराल दिवालखानोक नपवार तने एकखान सोनार गज छिले। १६ इडा नगर चौखट छिले, आर वहार लम्बाई-चौड़ाई बराबर छिले, आर वहाँय नपवार गजडा दे नापिल, त २,४०० किलोमीटर होल। आर शहरटार लम्बाई, चौड़ाई, आर ऊँचाईर बराबर छिले। १७ उडा फरीस्ता नगरटार देवालखानेर ऊँचाई नापिल, जैकिसम मानुष नापेछे, त ऊँचाई ६० मीटर छिले, १८ नगरटार देवालखान यशब कीमती पत्थलेर बनाल छिले, आर

नगरटा इकिसम सोना दे बनाल छिले, जैखान सोना एकदम साफ शीशार मान्दी छिले। १९ उडा नगरेर देवालडार नेंव अलग-अलग रंगेर कीमती पत्थल से बनाल छिले। पहिलाडा नेंव यशब पत्थलेर छिले, दोसराडा नीलमणि पत्थलेर, तेसराडा लालड़ी पत्थलेर, चौथाडा मरकत पत्थलेर, २० पाँचवाँडा गोमेद पत्थलेर, छटवाँडा माणिक पत्थलेर, सातवाँडा पीतमणि पत्थलेर, आठवाँडा पेरोज पत्थलेर, नौवाँडा पुखराज पत्थलेर, दसवाँडा लहसनिया पत्थलेर, एगारहवाँडा धुम्रकांत पत्थलेर आर बारहवाँडा याकूत पत्थलेर बनाल छिले। २१ बारहडा फाटक बारहडा मोतीर बनाल छिले। हरेकखान फाटक एक-एकटा मोती दे बनाल छिले। नगरटार सड़क साफ शीशार समान सोना दे बनाल छिले। २२ मुई उठिन कोय मन्दिर नी देखनु, क्योंकि सर्वशक्तिमान परमेश्वर आर भेड़ार बच्चाडा उठिनकार मंदिर छे। २३ उडा नगरोत बेला आर चानेर रोशनीर कोय जरूरी नी छे, क्योंकि परमेश्वरेर रोशनी से वहात उजाला होचिले, आर भेड़ार बच्चाडा उठिनकार चराक छे। २४ देश-देशेर लोक वहार रोशनीत चला-फिरा करबे आर दुनियाँर राजाला अपना-अपना धन-दौलत उठिन आनबे। २५ इडा नगरेर फाटक दिनोत कोयखुना बन नी होबे, आर उठिन रात नी होचे। २६ लोकला देश-देशेर कीमती आर शान-शौकतेर सामान इडा नगरोत ले ओसबे। २७ मगर उठिन कोय किसमेर अशुद्ध चीज, या घिण

काम करनेवाला, या झूठ बोलनेवाला कोय हालतोत ढुकवा नी पारबे, सिरिफ वराय ढुकबे, जैला लोकेर नाम भेड़ार बच्चाडार जीवनेर किताबोत लिखाल छे।

२२ उडा फरीस्ता फेर मोक एकटा नदी देखाल, जहार पानीखान मानुषोक जीवन दिछिले, आर शीशार मान्दी आर-पार देखाल जाछिले। इडा नदी परमेश्वरेर आर भेड़ार बच्चार राजगद्दी से निकलेछिले।^१ नदीडा यरूशलेम शहरेर सबसे बोड़ो सड़कटार बीचोबीच बहछिले। नदीडार दोनोंडा कछारोत जीवन देनेवाला गाछ छिले। उडा गाछ साल भर हर एकटा महीनात फल दिछिले। गाछटार पत्ताला से देश-देशर लोकलार बेमारी ठीक हंय जाछिले।^२ यहार बाद आर श्राप नी होबे। परमेश्वरेर आर भेड़ार बच्चाडार राजगद्दी उडा नगरोत होबे, आर परमेश्वरेर सेवकला वहार सेवा करबे।^३ भक्त लोक परमेश्वरेर मुख देखबे, आर परमेश्वरेर नाम उसार माथार पर लिखाल रोहबे।^४ यहार बाद उठिन आर रात नी होबे, उठिन चराकेर आर बेलाडार रोशनीर जरूरत नी पोर्बे क्योंकि प्रभु परमेश्वर उसार रोशनी होबे, आर सेवकला हमेशा हमेशार तने राज करबे।^५ फरीस्ताडा फेर मोक कोहले, “इला बात विश्वास करवार लायक आर सच्चा छे। प्रभु परमेश्वर जहाँय नबीलाक अपना आत्मा दिछे, वहाँय फरीस्ताक पठाल कि वहाँय

अपना सेवकलाक उला बातोक देखाय दे, जैला बहुत जल्दी होनेवाला छे।”

यीशु मसीहा जल्दी घुरे ओसबे

७ “देखेक मुई जल्दी ओसनेवाला छी। खुशहाल उडा लोक छे, जहाँय इखान किताबेर बातलाक मानछे।” ८ मुई यूहन्ना छी, जहाँय इला बातोक सुनिहे, आर देखिहे। जैखुना मुई सुननु आर देखनु, तब मुई उडा फरीस्तार भक्ति करवार तने वहार पाँलात पोड़े गेनु, जहाँय इला बातोक मोक देखाहिले। ९ मगर फरीस्ताडा मोक कोहले, “इकिसम ना करेक। मुई तुमसार मान्दी, तुमसार नबी भईलार मान्दी आर इखान किताबेर बातलाक मानने वालार मान्दी परमेश्वरेर एकझन सेवक छी। वहीलाते तुई सिरिफ परमेश्वरेर भक्ति करेक।” १० उडा फरीस्ता मोक कोहले, “इखान किताबेर भविष्यवाणी कराल बातलार पर मोहर मत लगा, क्योंकि इला सबला घटनार पूरा हवार बगलोत चले ओसिहे। ११ जहाँय बेइन्साफीर काम करछे, वहाँय वही किसम काम करते रोहोक। जहाँय अशुद्ध छे, वहाँय अशुद्ध बनाल रोहोक, जहाँय धर्मी छे, वहाँय धर्मेर काम करते रोहोक, जहाँय पवित्र छे, वहाँय पवित्र बनाल रोहोक। १२ देखेक, मुई जल्दी ओसनेवाला छी। हरेकटा लोकोक वहार कामेर मुताबिक फल मिलबे। १३ मुई अलफा आर ओमेगा, पहिला आर आखरी, शुरू आर अन्तिम छी।” १४ खुशहाल लोक वरा छे, जहाँय

अपना कपड़ालाक धोय लिछे, जसे कि वहाँय जीवन देनेवाला गाछेर हकदार हंय, आर नगरटार फाटक दे भीतरोत ठुकवा पारे। १५ मगर कुत्ताला, जादू-मंत्र करनेवाला, कुकरम करनेवाला, हत्या करनेवाला, मूर्ति पूजा करनेवाला, जहाँय झूठ बोलना पसंद करछे आर झूठ बोलते रोहचे, आर इकिसम व्यवहार करनेवाला सबकोय बाहरे रोहबे। १६ मुई यीशु अपना फरीस्ताक तुमसार लिकिन पठाही कि वहाँय तुमसाक मंडलीर तने इला बातेर गवाही दे। मुई दाऊद राजार बंशेर आर भोरकार चमकनेवाला तारा छी। १७ आत्मा आर कैना दोनोंइन कोहचे, “ओसो।” जहाँय सुनछे, वराव बोलो “ओसो।” जहाँय प्यासा छे, वहाँय “ओसो।” जहाँय जीवन देनेवाला पानी चाहचे, वहाँय ओसे बिना दाम दे पानी खवा पारे। १८ मुई हर एकइनाक जहाँय इखान किताबेर भविष्यवाणीर बातलाक सुनछे, उसाक बोलछी, अगर कोय इला बातोत कुछु जोड़ा दिबे, त परमेश्वर इखान किताबोत लिखाल सबला मुसीबतोक वहार पर ढाले दिबे। १९ अगर कोय इखान किताबेर लिखाल बातला से कुछु हटाय दिबे, त परमेश्वर जीवन देनेवाला गाछेर आर पवित्र नगर से वहार हिस्साडाक हटाय दिबे, जैलार बारे इखान किताबोत लिखाल छे। २० जहाँय इला बातोक बताछे, वहाँय कोहचे “हाँ, मुई जल्दी ओसनेवाला छी!” हे प्रभु यीशु ओसेक! २१ प्रभु यीशुर दया सभारो पर रोहोक। आमीन!